


Yesu Xolac



he New Testament in the Patep Language of Papua New Guinea

**Yesu Xolac
The New Testament in the Patep Language of Papua New
Guinea
Nupela Testamen long tokples Patep long Niugini**

copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 11 Nov 2022 from source files dated 9 Oct 2020

3d2c844d-4bc8-590b-bbf2-3a5fc1f7ad8

Contents

FRT	1
MATYÙ	3
MAK	61
LUK	97
JON	157
SINALE	197
LOM	247
1 KOLIN	275
2 KOLIN	300
GALESIA	317
EPESAS	326
PILIPAI	335
KOLOSI	342
1 TESALONAIIKA	349
2 TESALONAIIKA	355
1 TIMOTI	359
2 TIMOTI	367
TAITAS	372
PAILIMON	376
HIBLU	378
JEMS	400
1 PITA	407
2 PITA	416
1 JON	421
2 JON	428
3 JON	429
JUT	430
LEVELESEN	433
Bible reading	462

Yesu Xolac

The New Testament in the Patep language of Papua New Guinea

Nupela Testamen long tokples Patep long Niugini

Yesu Xolac

The New Testament in the Patep language of Papua New Guinea
[ptp]

Translation by Wycliffe Bible Translators

© 1986 Wycliffe Bible Translators, Inc.

Print publication, 1986 by Bible League International

Web version

2015, Wycliffe Bible Translators, Inc.
<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons license (Attribution-No Derivative Works).

<https://creativecommons.org/licenses/by-nd/4.0/>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik

narapela tok orait, yu mas askim husat i papa bilong copyright long dispela ol piksa.

Sapos yu laik strem samting i no orait long dispela tok orait, strem tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nd/4.0/legalcode>.

Sapos yu gat askim long dispela, **plis askim mipela**.

MATYU

Yesu Kilisi xolac niviha wê Matyu kivuu ge

*Yesu Kilisi tivae bue lê
(Luk 3:23-28)*

¹ Yesu Kilisi tivae bue he lê yêp ga. Devit pum lec Eblaham dî Yesu pum lec Devit.

² Eblaham nu Aisak.

Di Aisak nu Jekop.

Di Jekop nu Yuda he lie.

³ Yuda nu Peles yuu Sila wê ta Tema ge.

Di Peles nu Heslon.

Di Heslon nu Lam.

⁴ Di Lam nu Aminadap.

Di Aminadap nu Nason.

Di Nason nu Salmon.

⁵ Di Salmon nu Boas wê ta Lehap ge.

Di Boas nu Obet wê ta Lut ge.

Di Obet nu Jesi.

⁶ Di Jesi nu Devit wê tu Islel nêñ king.

Di Devit nu Solomon. Solomon ta ge wê liya Yulaia.

⁷ Di Solomon nu Liaboam.

Di Liaboam nu Abaisa.

Di Abaisa nu Esa.

⁸ Di Esa nu Jehosapat.

Di Jehosapat nu Jolam.

Di Jolam nu Asaia.

⁹ Di Asaia nu Jotam.

Di Jotam nu Ehas.

Di Ehas nu Hesekaia.

¹⁰ Di Hesekaia nu Manasa.

Di Manasa nu Emos.

Di Emos nu Josaia.

¹¹ Di Josaia nu Jekonaia he lie wê tibii Babilon vông vevac vô he di hôm he Islel vihati xôn dî kô he mi la vac vigwe Babilon nêb he i vông yuac pileva vô he mi dô.

¹² He dô vac vigwe Babilon di Jekonaia nu Sialtiel.

Di Sialtiel nu Selababel.

¹³ Di Selababel nu Abaiat.

Di Abaiat nu Elaiakim.

Di Elaiakim nu Eso.

¹⁴ Di Eso nu Sedok.

Di Sedok nu Ekim.

Di Ekim nu Elaiat.

¹⁵ Di Elaiat nu Eliesa.

Di Eliesa nu Matan.

Di Matan nu Jekop.

¹⁶ Di Jekop nu Josep wê vinê Malia.

Di Malia kô nu Yesu wê he nêl lê ên nêbê Kilisi.

¹⁷ Om bue wê pum lec Eblaham dî i la tyip vô Devit ge, he tiyi xocbê vigê yuu dî tô mi la yuudiyuu (14). Dî bue wê pum lec Devit dî i la tyip vô buc wê tibii Babilon vông vevac vô he Islel dî kô he mi la vigwe Babilon ge, he tiyi xocbê 14. Dî bue wê dô vô buc wê he Islel dô vac vigwe Babilon dî i la tyip vô Kilisi buc ge, he tiyi xocbê 14 êno.

Malia kô nu Yesu Kilisi (Luk 2:1-7)

¹⁸ Kiyang lec wê Yesu Kilisi yubac ge bêga ên nêbê xomxo vinoo nêb Malia ob kô Josep. Lêc yuu gên o kôma lêm, dî he yê wê Malia xêyaa ge, lêc ge yuac wê Myakilôhô Ngibua vông. ¹⁹ Malia liya Josep ge xomxo niviha, om nêb ob vông Malia ni yoc vô xomxo manôn lêm, om xo ên nêb ob sea Malia lê, lêc nêb ob nêl kiyang wê nu dô vac Malia xêyaa ge kitong vô xomxo tibeac lêm. ²⁰ Josep gên dixo kiyang wê nêb ob sea Malia ge vac nilô, mêtêc Apumtau vông angela ti lam nêl kiyang vô Josep vac vivia bêga ên nêbê, “Devit nu Josep, le i lêc xona ên wê ông ob kô Malia ge lêm, ên nipwo wê Malia ob kô ge Myakilôhô Ngibua vaci vông vô Malia. ²¹ Om Malia ob kô nu tuc, dî ông ob nêl i lê ên nêbê Yesu, ên lê tige kehe bêga nêbê obêc vô lie vêx yuu vux vêl ên he nêbê nipaên.”

²² Angela nêl bêge, om kiyang wê Apumtau nêl vô plopete ti ilage vô nôn lec. Plopete tige nêl bêga ên nêbê,

²³ “Wê lê. Vêxwo ti ob xêyaa dî kô nu ti di ob nêl i lê nêbê Emanguel.”

Plopete nêl bêge, dî lê Emanguel kehe bêga nêbê Anutu dô hixôn il.

²⁴ Josep yêp mi kidi lec dî vông tiyi xocbê Apumtau angela nêl vô i ge di viac vinê Malia mi dô hixôn lê, ²⁵ lêc o yêp hixôn lêm dî i la tyip vô buc wê nu tuc yubac ge dî Josep nêl i lê nêbê Yesu.

2

Xomxo piyôp levac lam nêb ob yê Yesu

¹ Malia kô Yesu vac vigwe Betlehem vac vigwe levac Judia. Helot tu he Islel nêb king mi dô vac vigwe Jelusalem. Mêtêc xomxo piyôp levac ya lam gê vigwe wê hiyôv tyip lam ge mi val Jelusalem dî nêl ên nêbê, ² “Nipwo paha wê ob tu xam Yuda nêm king ge, tyo dô tina? Xe xê pitua wê i vông ge vac vigwe wê hiyôv tyip lam ge, om xe lam ên xe nêb xe ob lam yev vixam kitu vô i.” ³ Helot ngô kiyang wê he nêl ge di nilô vô viyin mabu om tibii Jelusalem vihati ge, he nilô vô viyin hixôn. ⁴ Om Helot tyuc he Yuda levac wê mi si daa gee hixôn he wê xovô Moses xolac gee vihati lam di kinêg vô he ên nêbê, “Xomxo ti wê lê nêbê Kilisi ge ob yubac vac vigwe tina?” ⁵ Om he nêl lax vô i ên nêbê, “Tyo ob yubac vac vigwe Betlehem vac vigwe levac Judia. Ên plopete ti kivuu kiyang ilage i yêp bêga nêbê, ⁶ ‘Ông Betlehem vac vigwe levac Judia, ông vigwe nipwo, lêc ông tu levac nginoo Judia levac vêl, ên xomxo levac ti obêc val vac xam mahigun dî ob viac a lige Islel.’”

⁷ Helot ngô kiyang tige, mêtêc vông kiyang la xôpacên vô xomxo piyôp levac tigeet ên nêb he i lam vô i. He lam om Helot kinêg vô he nêbê buc tina wê pitua val tyip lec ge? Om he nêl kitong vô i. ⁸ Mêt Helot nêl vô he ên nêbê, “Xam loc Betlehem dî loc vông yuac levac lec myagén nipwo tige, dî xam obêc wêvô ge od xam lôm nêl vô a ên a êno ob loc yev vixag kitu vô i.”

⁹ Om he ngô Helot vya dì loc mì la, dì pitua wê he yê vac vigwe wê hiyôv tyip lam ge la mug ên he dì mila le kisii vôxumac ti wê nipwo tige diyêp vac ge. ¹⁰ He yê pitua tige dì xéyaa vô niviha yang, ¹¹ dì he la vac xumac nilô dì la yê nipwo tyo yuu ta Malia, dì yev vixa kitu vô nu tige dì pimil i. Pyap dêc he hikwee susu vac he vixec di tung la vô nipwo tyo. Susu wê he vông vô i ge gol dì xax myaluc, dì susu nivivea nivihaviha hixôn. ¹² Vô bucén Anutu nêl kitong vô he vac vivia ên nêbê, “Xam lôc vôen Helot tii vacén i ma.” Om he lax môp bangwe mì la ben.

Josep kô Malia yuu Yesu mi yon la Isip

¹³ Xomxo piyôp levac tigee la, mêdêc Josep yê Apumtau nêl angela ti vac vivia dì angela tige nêl vô i ên nêbê, “Kidi lec mì kô nipwo yuu ta dì mon pec mì loc Isip mì loc dô dì i loc tyip vô buc wê a ob nêl kiyang vô ông i tii vac ge, ên Helot ob myag nipwo tige ên nêbê ob hi i yib.” ¹⁴ Josep ngô angela vya om kidi lec vô bucén dì kô nipwo tige yuu ta dì yon la vigwe levac Isip, ¹⁵ dì la dô dì i la tyip vô buc wê Helot yib vêl ge. Om Apumtau kiyang wê plopete nêl ilage vô nôn lec. Plopete nêl bêga ên nêbê, “A tyuc nug tuc gê Isip mì i lôm.”

Helot vông nue vevac la hi Islele nue vux yib

¹⁶ Mêdêc Helot xovô nêbê xomxo piyôp levac tigee kityoo dì o milax vô i lêm, om xéyaa vô myavinê mabu. Om vông tibii la vigwe Betlehem dì la vac vigwe wê yêp ninyawehê vô Betlehem ge hixôn ên nêb he i loc hi vux nipwo wê klismas ti me yuu ge vihati i yib. Helot nêl bêge ên xomxo piyôp levac nêl vô i ên nêbê he yê pitua ila dì klismas yuu lam la vêl. ¹⁷ Om kiyang wê plopete Jelemaia nêl ilage vô nôn lec. Kiyang tige nêl bêga ên nêbê,

¹⁸ “He ngô vya vac vigwe Lama wê xomxo vông tilôt dì byag levac mabu ge. Lesel byag ên nue, dì xomxo ti o tiyi wê ob vông i nilô vô viyin maén ge lêm, ên nue vihati yib mima.”

Josep kô vinê yuu nu tuc mi lax dô Islel

¹⁹ Tîmuên wê Helot yib vêl ge od Apumtau angela ti nêl vô Josep vac vivia ên nêbê, ²⁰ “Kidi lec dì kô nipwo yuu ta dì mon lôc mì loc vac vigwe Islel i tii vac, ên he wê nêb ob hi nipwo tige i yib ge, he yib vêl.” ²¹ Mêgem Josep kidi lec mi kô nipwo hixôn ta dì yon lax mì la Islel.

²² Lêc Josep ngô wê Akeleas kô ma Helot nipilêhê dì viac vigwe Judia, om xona ên nêb ob lax mì la vigwe tige lêm. Om Anutu nêl kiyang vô Josep vac vivia tii vac, om Josep loc mì la vigwe levac Galili, ²³ dì la dô vac vigwe Nasalet. Om kiyang wê he plopete nêl ilage vô nôn lec. Kiyang tige nêl bêga ên nêbê, “He ob nêl bê i ge xomxo Nasalet ti.”

3

Jon Lipacén nêl kiyang (Mak 1:2-8; Luk 3:1-18; Jon 1:19-28)

¹ Vô buc tigee Jon Lipacén kidi mì la vac vigwe mahigun pileva vac vigwe levac Judia, dì nêl kiyang vô xomxo bêga ên nêbê, ² “Xam pilepac xam, ên Anutu buc vô kwabo lec.” ³ Jon ge wê plopete Aisaia nêl i kitong ilage bêga ên nêbê,

“Xomxo ti tyuc via levac vac vigwe mahigun pileva ên nêbê, ‘Xam viac Apumtau môp wê obêc lam vac ge dì vông i môp i yêp bôbac.’”

⁴ Jon mi vinyum ngakwi wê he vông ya bwoc kamel niviluhu ge dì vêx let wê bwoc levac ninivi ge hixôn, dì yaén wê mi ya ge hiveac hixôn vinoluc.

⁵ Dì xomxo Jelusalem dì xomxo vac vigwe levac Judia hixôn he vac vigwe toto wê yêp kwabo vô mia Jodan ge, he lam vô Jon vac mia Jodan, ⁶ dì nêl he nêni nipaên kitong, di Jon lipac he ya mia Jodan.

⁷ He Palisi hixôn Sadyusi tibeac lam ên nêbê Jon i lipac he, lêc Jon yê dì nêl vô he ên nêbê, “Myel nipaên nue xam! Letya nêl vô xam ên nêbê xam ob pec ên Anutu xéyaa myavinê wê ob val vô xam timuên ge? ⁸ Xam pilepac nilôm i vô paha lec lê, lêc vông môp niviha wê ob nêl kitong bêga bê xam pilepac xam pyap. ⁹ Dì le i lêc yong xacxam va dì xo bê Eblaham bue xam lêm. Ên a ob nêl vô xam bê Anutu tiyi wê ob nêl dì ngidax tigae ob tu Eblaham bue ge. ¹⁰ Xam tiyi xocbê xax wê xomxo ob vuv vêl ge. Ên xax wê o vuac nôn niviha lêm ge, xomxo ob vuv vihati vêl dì nêx i la vac ngwax.

¹¹ “A lipac xam ya mia ên wê xam pilepac xam pyap ge, lêc xomxo ngwe wê ob val timuên ge, xêkizêc wê i vông ge luu xêkizêc wê a vông ge vêl, dì a o niviha tiyi wê a ob kilê i su ge lêm. Xomxo tyo ob lipac xam ya Myakilôhô Ngibua hixôn ngwax. ¹² Xomxo tyo vigê obêc hôm nôn niviha dì tung i la vac xumac wê nôn niviha ob dô vac ge, dì ninivi pileva ge wê ob nêx i la vac ngwax wê yibêñ obêc ma ge, ên ngwax i ya vêl.”

Jon lipac Yesu (Mak 1:9-11; Luk 3:21-22)

¹³ Yesu sea vigwe Galili dì lam la Jodan vô Jon ên nêb i lipac i. ¹⁴ Lêc Jon kol i dì nêl vô Yesu ên nêbê, “Ông obêc lipac a ge od niviha, lêc bêna lêc ông lam vô a ên ông nêb a lipac ôngê?” ¹⁵ Lêc Yesu nêl lax vô i ên nêbê, “Ông vông i tiyi wê a nêl ge dì lipac a, ên u obêc vông môp vihati wê Anutu vông vô u ge i vô nôn lec.” Om Jon ngô dì lipac i.

¹⁶ Yesu lipac mia pyap dêc lutibed sea mia dì lax kehe, mêtêc lag puunê tax dì Yesu yê Anutu Myakilôhô Ngibua tiyi xocbê tucluu manôn ge dì i lam dô lec i. ¹⁷ Mêtêc vya ti lam gê lag puunê bêga nêbê, “A nug tige wê a xêgyaa vin lec i dì a xê i niviha.”

4

Seten yaxêñ Yesu (Mak 1:12-13; Luk 4:1-13)

¹ Mêtêc Myakilôhô Ngibua didii Yesu mi la vac vigwe myadongêñ wê xomxo dô vacêñ ma ge ên nêb Seten i yaxêñ i. ² Mêtêc Yesu o ya yaén ti lêm tiyi vidiien kehe yuu dì bucêñ kehe yuu, om vip den i. ³ Om Seten wê mi yaxêñ xomxo ge val di nêl vô i ên nêbê, “Ông obêc Anutu nu ge od ông nêl dì ngidax tigae i tu yaén ên ông wa.” ⁴ Lêc Yesu nêl lax vô i ên nêbê, “Xolac nêl bêga ên nêbê, ‘Susu yaén vaci o tiyi wê ob vông xomxo dô maviha ya ge lêm. Nge, xomxo ob dô maviha ya kiyang vihati wê lam vac Anutu mya ge.’” ⁵ Yesu nêl bêge. Nang dêc Seten kô i mi yuu la vigwe ngibua Jelusalem dì lax i la lec Anutu xumac ngibua kitôn kisii, ⁶ dì nêl vô i ên nêbê, “Ông obêc Anutu nu ge od ông sox mi loc kibun, ên kiyang ti yêp vac xolac bêga ên nêbê,

'Anutu obêc vông angela wê i vông ge lam viac ông, dì hôm ông kisii ya vigê ên nêb ông vinuxên vixam lec ngidax i ma.'

⁷ Lês Yesu nêl vô i ên nêbê, "Xolac nêl kiyang ngwe hixôn bêga nêbê, 'Le i lêc yaxê Apumtau wê ông Anutu ge lêm.'

⁸ Nang dêc Seten kô Yesu mi yuu la lec kitôn dia ti kisii, dì Seten hilung vigwe wê yêp kibun ga ge vihati hixôn susu niviha vihati vô Yesu, ⁹ dì nêl vô i ên nêbê, "Ông obêc yev vixam kitu vô a dì pimil a ge od a obêc vông vigwe hixôn susu tigae vihati vô ông dì ông ob tu kehe." ¹⁰ Lês Yesu nêl vô i ên nêbê, "Seten, pec mi loc vê! Ên xolac nêl bêga ên nêbê, 'Ông yev vixam kitu vô Apumtau wê ông Anutu ge vaci di vông yuac wê ici va vông ge.'

¹¹ Yesu nêl bêge, mêtdec Seten sea i mi la, dì angela ya val ngidu Yesu xôn.

*Buc taxlee wê Yesu nêl xolac vac vigwe levac Galili
(Mak 1:14-15; Luk 4:14-15)*

¹² Yesu ngô wê tibii tung Jon la dô vac xumac kalabuhu ge, om la vigwe levac Galili mi la dô vigwe Nasaleet. ¹³ Mêtdec sea vigwe Nasaleet dì la vigwe Kapaneam wê yêp vô mia luaên ninya vac vigwe levac wê Sebyulan yuu Napatalai vông ilage. ¹⁴ Om kiyang wê plopete Aisaia nêl ilage vô nôn lec. Kiyang tige nêl bêga ên nêbê,

¹⁵ "Vigwe Sebyulan hixôn vigwe Napatalai, yuu yêp vô mia luaên ninya, dì mia Jodan yêp vilu ganê. Tibii madiluhu wê o xomxo Yuda lêm ge lam dô vac vigwe Galili tige. ¹⁶ Om he wê dô vac mapitoc ge he yê xêseac levac. Dì he wê dô vac vigwe yibên mapitoc ge, xêseac val vô he pyap."

¹⁷ Kiyang nêl bêge. Ge buc taxlee wê Yesu nêl xolac vô xomxo bêga ên nêbê, "Xam pilepac xam, ên Anutu buc vô kwabo lec."

*Yesu tyuc xomxo yuudiyyu ên nêb he i timu vô i vixa
(Mak 1:16-20; Luk 5:1-11)*

¹⁸ Yesu mila vô mia luaên Galili ninya dì yê xomxo yuu, Saimon wê lê ngwe nêbê Pita ge dì li vux lê nêbê Andlu. Yuu nêx leac ti vac mia luaên tige nêb ob hi pis, ên yuu mi vông yuac lec pis hiên ên nêb ob kô mone lec. ¹⁹ Mêtdec Yesu nêl vô yuu ên nêbê, "Muu lam timu vô a vixag, ên a ob vông muu didii xomxo mi lam vô a i tiyi xochê muu didii pis vac leac ge."

²⁰ Om lutibed yuu sea leac dô xel di la hixôn Yesu.

²¹ Mêt yon mila yê Sebedi nu Jems yuu Jon wê yuu dô lec dipac hixôn ma Sebedi di duu leac wê tip sea ge xôn. Mêtdec Yesu keac yuu lam, ²² om lutibed yuu sea dipac hixôn ma dì la hixôn Yesu.

*Yesu vông xomxo tibeac wê yidac kehe toto ge vô niviha lec
(Luk 6:17-19)*

²³ Yesu la vîlee vac vigwe levac Galili dì la nêl kiyang vô xomxo vac he xumac lilo toto dì nêl xolac niviha lec Anutu ben lag puunê vô he, dì vông he wê yidac hixôn myavinê toto ge vihati vô niviha lec. ²⁴ Om xomxo nêl Yesu lê la vac vigwe levac Silia vihati. Dì he kô xomxo wê yidac kehe toto ge vihati mi lam vô i, hixôn he wê kô myavinê ge, dì he wê vimwo nipaên dô vac he nilô ge, dì he wê yidac vông he vixog sea ge, dì he wê len vô xèlehe ge. Mêt Yesu vông he vihati vô niviha lec. ²⁵ Dì xomxo kidu kidu wê lam gê Galili hixôn vigwe vigê yuu wê lê levac nêbê Dekapolis ge dì he

Jelusalem dì he Judia dì he wê lam gê mia Jodan vilu ganê ge, he vihati la timu vô Yesu vixa.

5

Yesu la lec kitôn kisii di nêl kiyang (Luk 6:20-23)

¹ Yesu yê xomxo kidu levac wê kituc lam vô i ge, om sea he mi la lec kitôn dì la dô kibun. Mêdêc nue ngivihi lec mi la vô i, ² dì i nêl kiyang vô he bêga ên nêbê,

³ "Xomxo wê xovô ên nêbê he tiyiên ma wê Anutu ob yê he niviha ge, he i dô hixôn xêyaa niviha, ên Anutu ben lag puunê tu he ben.

⁴ "Xomxo wê nilô vô viyin om he byag ge, he i dô hixôn xêyaa niviha, ên Anutu obêc vông he nilô vô viyin maén.

⁵ "Xomxo wê o kô he lec lêm ge, he i dô hixôn xêyaa niviha, ên Anutu obêc nêl he lê lec kibun ga vihati.

⁶ "Xomxo wê xêyaa vin lec môp niviha wê Anutu vông ge tiyi xocbê he xêyaa vin lec nêb ob ya yaên dì num mia ge, he i dô hixôn xêyaa niviha, ên môp niviha wê he vông ge, Anutu ob vông i vô nôn lec.

⁷ "Xomxo wê xo vigwe pisiv ên xomxo ge, he i dô hixôn xêyaa niviha, ên Anutu obêc xo vigwe pisiv ên he.

⁸ "Xomxo wê nilô xêseac ge, he i dô hixôn xêyaa niviha, ên he obêc yê Anutu.

⁹ "Xomxo wê vông kisoac vac xomxo wê kunacma ge, he i dô hixôn xêyaa niviha, ên Anutu obêc nêl ên nêbê he tu i nue.

¹⁰ "Xomxo obêc timu vô môp niviha wê Anutu vông ge, lêc tibii obêc vông viyin vô he ên môp tigee ge od he i dô hixôn xêyaa niviha, ên Anutu ben lag puunê tu he ben.

¹¹ "Xomxo obêc yê wê xam vông i vin a ge lêc obêc so vya vô xam di vông viyin vô xam dì kityoo kiyang tibeac tibeac lec xam ge ¹² od xam dô hixôn xêmyaa i niviha, dì hi vixam i pec, ên nôn niviha wê xam ob kô ge dô bin xam vac Anutu ben lag puunê. Xam xovô ên xam nêbê xomxo vông viyin tibêge vô plopete wê dô mugên ilage.

Kiyang pilepacên lec sol yuu xêseac (Mak 9:50; Luk 14:34-35)

¹³ "Xam tiyi xocbê sol wê ob vô niviha vô xomxo kibun ga vihati ge. Lêc sol obêc vô nyen maén ge, od il ob vông vatya vô ên i vô nyen nangê? Ge vô nipaên pyap, dì o tiyi wê ob vô niviha tií vac dì vông yuac ti ge lêm, om xomxo ob nêx i la dô xel dì kê vac kibun.

¹⁴ "Xam tiyi xocbê ngwax xêseac wê ob linac lec vigwe vihati ge. Ên vigwe levac ti obêc yêp lec kitôn kisii ge od ob yêp xôpacên lêm. ¹⁵ Xomxo ti obêc byêx ngwax vac lam ge od obêc lax i la le xôpacên vac dêg nilô lêm. Nge, ob yu i la yux seac ên nêb i linac lec xomxo vihati wê dô vac xumac nilô ge. ¹⁶ Om xêseac wê xam vông ge i lêc linac vô xomxo vihati manôñ éno bêge, ên he i yê môp niviha wê xam vông ge di hi vixa i pec ên Mag Anutu wê dô lag puunê ge.

Yesu nêl kiyang lec Moses xolac

¹⁷ "Le i lêc xo bê a lam ên a nêb a ob kitya Moses xolac hixôn plopete kiyang vêl lêm. Ên a o lam ên a nêb a ob kitya kiyang tigee vêl lêm. Nge,

a nêb a ob vông i vô nôn lec. ¹⁸ A nêl vixôhilôg nôn vô xam bê gwêbaga dì i loc tyip vô buc wê lag yuu kibun xôa obêc ma ge, kiyang wê yêp vac Moses xolac ge, bo ti xôa obêc ma lêm. Nge, vihati ob yêp dì ob vô nôn lec timuên. ¹⁹ Om xomxo ti obêc pwoo Moses xolac bo ti vac dì didii xomxo vac ên nêb he i timu vô i vixa ge od xomxo tige ob kô lê nipwo vac Anutu ben lag puunê. Lêc xomxo ti obêc timu vô xolac vihati dì didii xomxo vac ên nêb he i timu vô ge od xomxo tige obêc kô lê levac vac Anutu ben lag puunê. ²⁰ A ob nêl vô xam bê môt niviha wê xam vông ge i luu wê xomxo xolac kehe hixôn he Palisi mi vông ge vêl. Lêc obêc ma ge od o tiyi wê xam ob la vac Anutu ben ge lêm.

*Kiyang lec môt xêyaa myavinê
(Luk 12:57-59)*

²¹ “Xam ngô kiyang pyap wê yêp vô bume ilage bêga nêbê, ‘Le i lêc hi xomxo i yib lêm. Xomxo ngwe obêc hi xomxo ngwe yib ge od ob la kot dì kô myaviwen.’ ²² He nêl bêge ilage, lêc a ob nêl vô xam bê xomxo ngwe obêc kunac li ngwe ge od ob la kot dì kô myaviwen. Dì xomxo ngwe obêc so vya vô li ngwe ge od xomxo i vông i loc vô hizap levac ên i titô i. Dì xomxo ti obêc nêl nipaên lec li ngwe nêb yacyac ge od ob la dô vac ngwax levac vac vigwe nipaên.

²³ “Om ông obêc kô daa mi la le vô alta, lêc ông xovô bê muu lime ti kiyang obêc yêp ge ²⁴ od ông sea daa tige i dô kwabo vô alta dì lôc mi loc, ên muu viac kiyang vêl lê, lêc ông lôm tung daa timuên.

²⁵ “Xomxo ti obêc kô ông mi la kot lêc muu ob gên diloc vô môt ge od muu viac kiyang vôma. Lêc obêc ma ge od xomxo tyo obêc tung ông la vac hizap levac vigê, dì hizap levac ob vông ông la vac xêhipu vigê, dì xêhipu ob tung ông la dô vac kalabuhu, ²⁶ dì a nêl vixôhilôg vô ông bê ông obêc lop mi lôm vêl ên kalabuhu lêm. Nge, ông ob dô dì hi myaviwen vihati i ma vêl lê.

Kiyang lec môt yôdac vêx yuu vux

²⁷ “Xam ngô kiyang pyap wê xomxo nêl ilage bêga ên nêbê, ‘Le i lêc vông môt yôdac vêx yuu vux lêm.’ ²⁸ He nêl bêge, lêc a ob nêl vô xam bê vux ti obêc yê vêx ti dì nilô yetac ên ge od tiyi xochê vux tige vông yôdac vô vêx tige vac nilô. ²⁹ Om ông mammôn vilu hiyôv obêc didii ông mi la vac môt nipaên ge od ông pul vêl dì nêx i loc, ên ông nimnivi mya tige obêc la xôa ma ge od ông ob dô nimviha, lêc obêc dô ge od ông nimnivi vihati ob la vac vigwe nipaên. ³⁰ Dì ông vigêm hiyôv obêc didii ông mi la vac nipaên ge od ông kitov vêl dì nêx i loc, ên ông nimnivi mya tige obêc la xôa ma ge od ông ob dô nimviha, lêc obêc dô ge od ông nimnivi vihati ob la vac vigwe nipaên.

*Yesu nêl kiyang lec xomxo wê nêb ob sea vinê ge
(Matyu 19:9; Mak 10:11-12; Luk 16:18)*

³¹ “Xomxo nêl ilage bêga ên nêbê, ‘Xomxo ti obêc nêb ob sea vinê ge od i kivuu kipihac wê nêbê yuu ob seama ge ti mi vông vô vinê lê, lêc yuu i seama.’ ³² He nêl bêge ilage, lêc a ob nêl vô xam bê vux ti vinê obêc vông môt yôdac vô vux ngwe lêm, lêc liya sea vinê tyo dô ge od vux tige vông vinê la vac yôdac, dì vux ti obêc kô vêx ti wê liya sea i dì la ge od vux tige vông yôdac vô vêx tige.

Kiyang lec mōp wê xomxo hilung vigê la kisii di nêl kiyang ge

³³ “Xam ngô kiyang pyap wê yêp vô bume ilage bêga ên nêbê, ‘Le i lêc hilung vigê loc kisii dì nêl kiyang kityooën hixôn lêm. Nge, xam obêc hilung vigêm la kisii ge od xam timu vô kiyang wê xam nêl ge i yêp bôbac vô Apumtau manôn.’ ³⁴ He nêl bêge ilage, lêc a ob nêl vô xam bê le i lêc hilung vigê i loc kisii dì nêl kiyang ti hixôn lêm. Dì le i lêc nêl kiyang ti dì nêl vigwe lag puunê lê hixôn ên nêb i ngidu xam kiyang xôn lêm. Ên vigwe lag puunê ge Anutu ben. ³⁵ Dì le i lêc nêl kiyang ti dì nêl kibun lê hixôn lêm. Ên kibun ga sia nipwo wê Anutu kê vixa lec ge. Dì le i lêc nêl kiyang ti dì nêl vigwe Jelusalem lê hixôn lêm. Ên Jelusalem ge Anutu wê tu king levac ge ben. ³⁶ Dì le i lêc hilung vigê lec bazub ên nêb i ngidu xam kiyang xôn lêm. Ên xam o tiyi wê xam ob vông bamzub lihi ti vô kwem me vô viliac lec ge lêm. ³⁷ Om xam obêc nêl kiyang ge od xam nêl bê ‘Nge’ me ‘Ma’, di i pyap. Ên xam obêc nêl kiyang ya luu tige vêl ge od ge mōp wê Seten vông ge.

Kiyang lec myaviwen nipaên (Luk 6:29-30)

³⁸ “Xam ngô kiyang pyap wê he nêl ilage bêga ên nêbê, ‘Xomxo ti obêc vông ông mamnôn vô nipaên ge od ông éno vông i manôn i vô nipaên. Dì xomxo ti obêc pwoo ông nivum pec ge od ông pwoo i nivu i pec éno.’ ³⁹ He nêl bêge ilage, lêc a ob nêl vô xam bêga bê le i lêc vông myaviwen nipaên vac nipaên lêm. Nge, xomxo ti obêc pitap ông lia vilu ge od ông pilepac lia vilu i loc vô i hixôn. ⁴⁰ Xomxo ti obêc vông kiyang vô ông ên nêb ob kô ngakwi wê ông vông ge od ông vông saket mi i kô hixôn. ⁴¹ Xomxo ti obêc keac xêkizêc nêbê ông kilê i susu mi loc mōp kwabo tya ge od ông kilê mi muu loc mōp dia tya hixôn. ⁴² Xomxo ti obêc kitaa susu ti vô ông ge od ông vông vô i. Dì xomxo ti obêc kitaa susu ti vô ông ên nêb ob kô mi la lêc vông i lôm ge, od le i lêc hingoo kiyang wê nêl ge lêm.

Kiyang lec mōp xêyaa vin lecên (Luk 6:27-28,32-36)

⁴³ “Xam ngô kiyang pyap wê xomxo nêl ilage bêga ên nêbê, ‘Xam xêmyaa i vin lec lime, dì xêmyaa i vô nipaên vô tibii wê vông nipaên vô xam ge.’ ⁴⁴ He nêl bêge, lêc a ob nêl vô xam bêga bê xam xêmyaa i vin lec he wê yê xam nipaên ge, dì xam kitaa vô Anutu ên i vông niviha vô he wê vông viyin vô xam ge, ⁴⁵ ên xam obêc vông bêge ge od xam obêc tu Mag Anutu lag puunê nue, ên Anutu vông hiyôv linac lec xomxo nipaên dì he wê niviha ge hixôn, dì vông lun tô lec he wê timu vô mōp bôbac ge dì tó lec he wê so mōp bôbac ge hixôn. ⁴⁶ Ên xam xêmyaa obêc vin lec xomxo wê xêyaa vin lec xam ge od xam ob kô nôn bêna? Ên tibii nipaên mi vông bêge éno. ⁴⁷ Dì xam obêc nêl kiyang vô lime vaci ge od xam ob luu tibii vêl bêna? Ên tibii madiluhu éno mi vông bêge hixôn. ⁴⁸ Mégem xam viac xam mi dô niviha lee i tiyi xochê Mag Anutu lag puunê wê niviha lee ge.”

6

Mōp wê il ob vông susu vô xomxo ge

¹ Yesu nêl vô nue ngivihi ên nêbê, “Xam xona nêm di le i lêc vông mōp niviha vô xomxo manôn bê he i yê xam niviha lêm. Ên xam obêc vông

bêge ge od xam ob kô nôn niviha ti vô Mam Anutu wê dô lag puunê ge lêm.

² “Om xam obêc nêb xam ob vông susu ti vô xomxo wê nên susu maên ge, od xam o lêc vông xomxo ti i loc mug di vê vuac bê xomxo i yê xam lêm. Èn xomxo kityooën wê viyum nipaên vac niviha nilô ge mi vông môp tibêge vac xumac lilo di vông vac môp hixôn ên nêb xomxo i yê di yong he lê. Om a nêl vixôhilôg nôn vô xam bêga bê he kô nôn niviha pyap, om ob kô ngwe i tii vac vô buc timuên nang lêm. ³ Om xam obêc vông susu ti vô xomxo wê nên susu maên ge od xam vigêm kêd i o lêc xovô vuac wê vigêm hiyôv vông ge lêm. ⁴ Nge, vuac tibêge i yêp xôpacên, di Mag Anutu wê yê susu yuu môp xôpacên vihati ge ob vông nôn niviha vô xam.

Yesu nêl kiyang lec môp kitaaê
(Luk 11:2-4)

⁵ “Xam obêc kitaa ge od le i lêc vông i tiyi xochbê xomxo kityooën wê viyum nipaên vac niviha nilô ge mi vông ge lêm. Èn he xêyaa vin lec nêb ob le kisii vac Anutu xumac ngibua di kitaa, di le vac môp buuën wê xomxo tibeac vîlee vac ge di kitaa ên nêb xomxo i yê. Lêc a nêl vixôhilôg nôn vô xam bêga bê he kô nôn niviha pyap, om obêc kô ngwe tii vac vô buc timuên lêm. ⁶ Om xam obêc kitaa ge od xam loc vac xam bom xumac lôma di tung vuayen lec di kitaa vô Mag Anutu wê dô xôpacên ge, di Mag Anutu wê yê susu yuu môp xôpacên vihati ge ob vông nôn niviha vô xam.

⁷ “Xam obêc kitaa ge od le i lêc kitaa tiyi xochbê kiyang pileva wê nôn maên ge lêm. Èn kitaaên tibêge tiyi xochbê môp wê tibii madiluhu mi vông ge. Èn he xo ên he nêbê he ob kitaa dia ge od anutu wê he vông ge ob yê he niviha di vông kiyang wê he nêl ge vô nôn lec. ⁸ Om xam o lêc timu vô môp wê he vông ge lêm. Èn susu wê ma ên xam lêc xam gên o kitaa mi nêl lêm ge, ge Mag Anutu xovô pyap.

⁹ “Om xam kitaa bêga bê,
Xe Mag ông, wê ông dô kisii ge,
Ông lêm i lam tu ngibua.

¹⁰ Ông lam tu Apumtau i tiyi vigwe vihati.

Ông kiyang i lam vô nôn gê kibun ga xochbê yêp gê kisii ge.

¹¹ Ông vông nyang vô xe i tiyi buc
vîhati.

¹² Xe nêm myaviwen wê yêp vô xe ge, ông kitya vêl, xochbê xe kitya nêm nipaên vêl vòmá ge.

¹³ Ông o lêc dìdii xe mì loc vac kiyang wê ob yaxêne xe ge lêm. Nge, ông vô xe vêl ên nipaên vihati.

[Ông Apumtau, ông xépilihi di xêkizêc di ông xêseac kehe di luta lêc luta.
Kiyang nôn.]

¹⁴ “Wê lê. Xam obêc kitya xomxo nêm nipaên vêl ge od Mag Anutu obêc kitya xam nêm nipaên vêl. ¹⁵ Lêc xam obêc kitya xomxo nêm nipaên vêl lêm ge od Mag Anutu ob kitya xam nêm nipaên vêl lêm.

Kiyang lec môp wê he mi ngibua yaên ge

¹⁶ “Buc wê xam obêc ngibua yaên lec ge od le i lêc dô ma yux yux tiyi xochbê xomxo kityooën ge lêm. Èn he mi vông môp tibêge ên nêb xomxo i yê he di xovô bê he ngibua yaên. Lêc a nêl vixôhilôg nôn vô xam bêga bê

he kô nôn niviha pyap, om obêc kô ngwe tii vac vô buc timuên nang lêm.
17 Om xam obêc ngibua yaên ge od xam hivip bamzub di lipac mammôn hixôn,
18 ên xomxo i yê, lêc o xovô wê xam ngibua yaên ge lêm. Lêcom Mag Anutu wê dô xôpacén ge vaci ob xovô, di Mag Anutu wê yê susu yuu môt xôpacén vihati ge obêc vông nôn niviha vô xam.

*Yesu nêl kiyang lec susu nivihaviha
(Luk 12:33-34)*

19 “Le i lêc kituc susu nivihaviha tibeac gê kibun ga lêm. Ên susu wê yêp kibun ga ge, gwaakivac ob lic sea di guva ob iac sea, di tibii yôdac ob dii xumac di la vun susu tigee. **20** Om xam kituc susu nivihaviha i loc yêp vac Anutu ben lag puunê. Ên susu wê yêp vac Anutu ben lag puunê ge, gwaakivac ob lic lêm di guva ob iac lêm, di tibii yôdac ob dii xumac di la vun lêm. **21** A nêl bêge vô xam, ên vigwe wê xam susu nivihaviha dô vac ge, ge xam ob vông nilôm la vô vigwe tige.

*Xêseac wê xomxo ninivi vông ge
(Luk 11:34-36)*

22 “Xam mammôn tiyi ngwax xêseac wê linac lec nimnivi ge. Om mammôn obêc dô niviha ge od nimnivi vihati ob dô vac xêseac. **23** Lêc mammôn obêc vô nipaên ge od nimnivi vihati ob vô mapitoc. Di xêseac wê dô vac xam nilôm ge obêc mapitoc ge od mapitoc ob vô levac di hivun xam xôn.

*Kiyang lec Anutu di mone
(Luk 16:13)*

24 “Xomxo ti o tiyi wê ob vông yuac vô xomxo levac yuu ge lêm. Ên xêyaa obêc vin lec ngwe di ob yê ngwe nipaên, me obêc vông nilô la vô ngwe di vô nimi vô ngwe. Om o tiyi wê xam ob vông nilôm i loc vô Anutu hixôn mone ge lêm.

*Yesu nêl kiyang lec yaên yuu numên
(Luk 12:22-31)*

25 “Om a nêl vô xam bê xam o lêc vông nilôm i vô viyin lec yaên yuu numên hixôn ngakwi lêm, ên môt wê il ob dô madviha ge luu yaên vêl, di môt wê il ob viac nidnivi ge luu ngakwi vêl. **26** Xam wê menac di xovô bê menac o xin yaên vê lêm, di he o kô yaên nôn vac yuac lêm, di he o kituc yaên la dô vac xumac ti lêm. Lêc Mag Anutu wê dô lag puunê ge vaci vet he, di Anutu xêyaa vin lec xomxo luu menac tigee vêl om Anutu ob viac xam niviha êno. **27** Xam ti o tiyi wê xam ob xo kiyang tibeac di titul buc wê xam ob dô mamviha ge i vô dia lêm.

28 “Bêna lêc xam xo kiyang tibeac lec ngakwi? Xam xovô nita wê vuac maviya ge. He o vông yuac ti lec ngakwi me he o duu nivimahi ti lêm. **29** Lêc a nêl vô xam bêga bê vunacén wê he vông ge luu vunacén nivihaviha wê King Solomon vông ilage vêl. **30** Nita wê vuac maviya ge tyip vac yuac mi le gwêbaga, lêc titige xomxo ob kitov vêl di nêx la vac ngwax, lêc Anutu vunac vô he niviha. Xam ge, vông vinên wê xam vông ge nipwo lee tyá, lêcom xam xovô bê Anutu obêc viac xam niviha luu maviya vêl. **31** Om le i lêc xo kiyang tibeac di nêl bêga bê, ‘Il ob xa vatya, di il ob num vatya, di il ob vinyum ngakwi tibêna?’ lêm. **32** Ên tibii madiluhu ge wê xo kiyang tibeac ên nêb ob tulec susu tibêgee. Dom Mag Anutu wê

dô lag puunê ge xovô susu wê ma ên xam ge pyap. ³³ Mêgem xam obêc vông nilôm i loc vô Anutu hixôn môp niviha wê i vông ge od Anutu obêc vông susu ninivi xen vô xam hixôn. ³⁴ Om xam o lêc xo kiyang tibeac lec buc titige lêm, ên obêc titige ge od xam ob xovô susu me viyin wê xam ob tulec titige. Viyin wê buc toto vông ge i yêp lec buc titi ge bôbac.”

7

Le i lêc yaxêñ xomxo nêñ kiyang lêm (Luk 6:37-38,41-42)

¹ Yesu nêl vô nue ngivihi ên nêbê, “Le i lêc yaxêñ xomxo nêñ kiyang lutibed lêm, ên Anutu i o lêc yaxêñ xam nêm kiyang lêm. ² Èn Anutu obêc yaxêñ xam nêm kiyang tiyi xocbê xam va yaxêñ xomxo nêñ kiyang ge. Èn môp wê xam vông vô xomxo ge od Anutu obêc vông i tiyi wê xam vông vô he ge vô xam. ³ Bêna lêc ông wê xax mavigen nipwo tya wê le vac lim manôn ge dì nêlê, dì ông lungên xax yatôv wê le vac ôcông va mammôn ge? ⁴ Xax levac le vac ông mammôn, bêna lêc ông nêl vô lim ên ông nêbê ông ob hôm xax mavigen nipwo tya wê le vac lim manôn ge vêl? ⁵ Ông xomxo kityooën, ông hôm xax yatôv wê le vac ông mammôn ge vêl tax ên mammôn i seac, ge od ông tiyi wê ông ob hôm xax mavigen nipwo tya wê le vac lim manôn ge vêl.

⁶ “Le i lêc nêx susu ngibua i loc vô noo lêm. Dì le lêc nêx komkom wê mone levac ge i loc vô bwoc lêm, ên he ob kê i hibu sea dì ob pop mi nga xam.

Kiyang lec môp kitaaén (Luk 11:9-13)

⁷ “Xam kitaa vô Anutu ên i vông susu vô xam, dì xam myag susu êdêc wêvô, dì hi vigêm lec vuayen ên i tax ên xam. ⁸ Èn xomxo vihati wê kitaa vô Anutu ge obêc kô nôn tiyi wê he kitaa ge, dì xomxo ti wê myag susu ge obêc yêvô, dì xomxo ti wê hi vigê lec vuayen ge vuayen obêc tax ên i.

⁹ “Xam nume ti obêc kitaa ma ên nêb ob ya blet ge od ma ob vông ngidax ti vô, me? ¹⁰ Dì nu tige obêc kitaa ma ên nêb ob ya pis ge od ma ob vông myel ti vô, me? ¹¹ Xam ga xomxo kibun nimpaén, lêc xam mi vông susu niviha vô nume. Om xam xovô bêga bê il Mag Anutu wê dô lag puunê ge ob vông susu nivihaviha i luu vêl vô xomxo wê kitaa i ge.

¹² “Om môp vihati wê xam nêb xomxo i vông vô xam ge, xam vông môp bêge vô he êno, ên kiyang wê Moses hixôn plopete nêl ge kehe bêge.

Kiyang lec môp nipwo yuu môp levac (Luk 13:24)

¹³ “Xam loc vô môp vuayen nipwo, ên môp wê ob didii xomxo la xôa ma ge, ge môp levac wê ob vông yuac levac vô xomxo lêm. Om xomxo tibeac la vô môp ngwe ge. ¹⁴ Lêc môp wê ob didii xomxo la dô maviha ge, ge môp nipwo wê vông yuac levac vô xomxo. Om xomxo yuutyabed ob yêvô mi la vô môp tige.

Yesu nêl kiyang lec plopete kityooën (Luk 6:43-44; Luk 13:25-27)

¹⁵ “Xam xona nêm ên plopete kityooën, ên he tiyi xocbê he vinyum bwoc sipsip niviluhu om xam so ên xam nêbê he xomxo niviha. Lêc he nilô tiyi

xocbê noo nipaên. ¹⁶ Xam obêc xovô he lec môp wê he vông ge. Ên xomxo ob yul myedanôn nôn lec kipomac yin yatôv lêm. Dì xomxo ob yul kisung nôn lec nyela yatôv lêm. ¹⁷ Ên xax niviha vihati ob vuac nôn niviha, dì xax nipaên vihati ob vuac nôn nipaên. ¹⁸ Xax niviha o tiyi wê ob vuac nôn nipaên ge lêm, dì xax nipaên o tiyi wê ob vuac nôn niviha ge lêm. ¹⁹ Xax vihati wê o vuac nôn niviha lêm ge, xomxo ob vuv vêl dì nêx i la vac ngwax. ²⁰ Om xam obêc xovô plopete kityooên lec môp nipaên wê he vông ge.

²¹ “Xomxo wê mi nêl ‘Apumtau, Apumtau’ vac mya pileva ge, he ob la dô vac Anutu ben lêm. Nge, he wê timu vô môp wê Mag Anutu lag puunê vông ge wê ob la dô vac Anutu ben. ²² Ôbêc vô buc levac timuên ge od xomxo tibeac obêc nêl ên nêbê, ‘Apumtau, Apumtau, xe vông yuac plopete lec ông lêm, dì xe tii vimwo nipaên vêl ên xomxo lec ông lêm, dì xe vông do levac tibeac lec ông lêm.’ ²³ Lêc a obêc nêl vô he bê, ‘A lungên xam. Xam ge xomxo nipaên, om xam pec vêl ên a magnôn.’

Kiyang pilepacên lec xumac loxên

(Luk 6:47-49)

²⁴ “Xomxo vihati wê ngô a kiyang di vông a vyag vô nôn lec ge, he tiyi xocbê xomxo xovôên niviha ti wê lox xumac lec ngidax pitehe kisii. ²⁵ Di buc lun val dì mia butac, di vigwe viyii, om xumac vô yocyoc, lêc o kipê lêm, ên lox xumac lec ngidax om xumac le xêkizêc. ²⁶ Di xomxo vihati wê ngô a kiyang, lêc o timu vô lêm ge, he tiyi xocbê xomxo piyôp maên ti wê lox xumac lec luda pileva. ²⁷ Di buc lun val dì mia butac di vigwe viyii, om xumac vô yocyoc di kipê mi la dii sea.”

²⁸ Yesu nêl kiyang vihati gee pyap di xomxo kidu levac wê kitucma di ngô kiyang ge yetac mabu ên kiyang wê i nêl ge, ²⁹ ên Yesu o nêl kiyang vô he tiyi xocbê xomxo wê xovô Moses xolac ge lêm. Nge, nêl kiyang hixôn xêkizêc.

8

Yesu vông xomxo wê kityax mahizihizi ge ti vô niviha lec

(Mak 1:40-44; Luk 5:12-14)

¹ Yesu sea kitôn dì lop mi la di xomxo tibeac hiwocên timu vô i vixa mi lam. ² Mêđ xomxo wê kityax mahizihizi ge ti val vô Yesu di yev vixa kitu vô di nêl vô i ên nêbê, “Xomxo levac, ông obêc nêb ông ob vông a nignivi i vô niviha lec ge od ông tiyi.” ³ Mêgem Yesu titô vigê mi la vyax lec i di nêl ên nêbê, “A nêb ông vô nimnîha lec.” Yesu nêl di kityax mahizihizi tige wax la vêl lutibed di xomxo tyo ninivi vô niviha lec. ⁴ Mêdec Yesu nêl vô i ên nêbê, “Le i lêc nêl nimnîvi wê vô niviha lec ge kitong vô xomxo ti lêm. Di ông loc hilung nimnîvi mô vô xomxo wê mi si daa vô Anutu ge di vông daa i tiyi môp wê Moses xolac nêl ge, ên xomxo vihati i yê dì xovô bê ông nimnîvi vô niviha lec.”

Yesu vông Lom vevac levac nu yuac ti vô niviha lec

(Luk 7:1-10)

⁵ Yesu loc mi la vigwe Kapaneam, mêdec Lom vevac levac wê viac nue vevac 100 ge ti lam vô Yesu dì kitaa i ên nêbê, ⁶ “Xomxo levac, a nug yuac ti vông yidac levac mi yêp vac a bog, lêc vigê yuu vixa len vô xêlehe di i yaxêñ myavînê levac.” ⁷ Om Yesu nêl vô i ên nêbê, “A ob loc vông i vô

niviha lec.” ⁸ Lêc xomxo vevac tige nél lax vô i ên nêbê, “Xomxo levac, a o niviha tiyi wê ông ob lam vac a xumac lôma ge lêm. Om ông vyam i nél dì a nug yuac i vô niviha lec.” ⁹ Ên a ga êno wê a la vac xomxo levac kwa ngibi, dì a nuge vevac ge wê lam vac a kwa ngibi. Om a obêc nél vô he ti ên a nêb i loc ge od ob la, dì a obêc nél vô ti bê i lam ge od ob lam, dì a obêc nél vô nug yuac ti bê i vông yuac ge od ob vông. Dì ông êno, ông ge xomxo xêkizêc, om a xovô ên a nêbê

Ông obêc le teva di nél ge od a nug yuac tige ob vô niviha lec.” ¹⁰ Yesu ngô kiyang wê xomxo tyo nél ge om yetac, dì nél vô xomxo tibeac wê timu vô i vixa ge ên nêbê, “A nél vixôhilôg nôn vô xam bê a o xê xomxo Islel ti wê vông i vin xêkizêc tiyi xochê Lom tiga vông i vin ge lêm.

¹¹ “A nél vô xam bêga bê bibii tibeac ob kidi vac vigwe wê hiyôv tyip lam ge di vigwe wê hiyôv hoo la ge dì la dô mi ya hixôn Eblaham yuu Aisak yon Jekop vac Anutu ben lag puunê. ¹² Lêc Islel wê he nêb he ob la dô vac Anutu ben ge, Anutu ob tii he la dô vac vigwe mapitoc. Vac vigwe tige he ob byag levac di ob kic nivu lecma.”

¹³ Mêdec Yesu nél vô Lom vevac levac tige ên nêbê, “Ông loc bom. Kiyang wê ông nél ge obêc vô nôn lec i tiyi xochê ông vông i vin dì kitaa a ge.” Om hiyôv manôñ tibed tige xomxo yuac tige vô niviha lec.

Yesu vông Saimon Pita yen vêxta vô niviha lec (Mak 1:29-31; Luk 4:38-39)

¹⁴ Yesu la vac Pita ben, lêc yê wê Pita yen vêxta vông yidac ngwax tum mi yêp. ¹⁵ Om la hôm lec vigê, dì yidac tip la, mêdec vêx tyo kidi lec di viac yaên ên nêb i ya.

Yesu vông xomxo yidac tibeac vô niviha lec (Mak 1:32-34; Luk 4:40-41)

¹⁶ Vô hucêñ xomxo tibeac kô lie wê vimwo nipaêñ dô vac he nilô gee mi val vô Yesu. Mêdec Yesu nél dì vimwo nipaêñ tigee lop mi la vêl ên he, dì Yesu vông he wê yidac ge vihati vô niviha lec hixôn. ¹⁷ Om kiyang wê plopete Aisaia nél ilage vô nôn lec. Ilage Aisaia nél bêga ên nêbê, “Ici va kô il nêd myavinê hixôn yidac wê vông il ge vêl.”

Xomxo wê nêb ob timu vô Yesu vixa ge (Luk 9:57-60)

¹⁸ Yesu yê wê xomxo tibeac buu i ge, om nél vô nue ngivihi ên nêbê, “Xam lam ên il ob la mia luaên vilu ganê.” ¹⁹ Mêdec xomxo wê xovô Moses xolac ge ti val vô Yesu dì nél vô i ên nêbê, “Xolac kehe, vigwe vihati wê ông ob la vac ge, a ob loc hixôn ông.” ²⁰ Lêc Yesu nél vô i ên nêbê, “Le i lêc nél decdec bê ông ob lam hixôn a lêm, ên lilii mi yêp vac yen, dì menac mi vông liwilhi lec xax, lêc a, Xomxo Nu, a bog wê a ob xêp vac ge ma.” ²¹ Nang dêc xomxo wê mi timu vô Yesu vixa ge ti nél vô i ên nêbê, “Xomxo levac, ge tiyi wê a ob la yev mag vêl lê, lêc lam timu vô ông vixam, me?” ²² Lêc Yesu nél vô i ên nêbê, “Ông lam timu vô a vixag, dì xomxo yibêñ vaci i yev xomxo yibêñ.”

Yesu nél dì lea yuu mia vô ninya lehe vô i vya (Mak 4:36-41; Luk 8:22-25)

²³ Nang dêc Yesu la lec dipac di nue ngivihi la hixôn dì he la. ²⁴ He mila mia luaên mahigun lê, lêc lea mabu val, om mia kipyax la vac dipac nilô mi pup lec, dì Yesu diyêp, ²⁵ om nue ngivihi la tipi vô i dì nél vô i ên nêbê,

“Xomxo levac, ngidu xe xôn, ên il ob la xib.” ²⁶ Lêc Yesu nêl vô he ên nêbê, “Xam xona ên va? Xam nêm vông vinêniipwo tya.” Mêd Yesu kidi lec di piping lea yuu mia, om lea levac tip la dì mia tipiên ma. ²⁷ Om nue ngivihi yetac mabu dì nêl vòma ên nêbê, “Xomxo tiga letya, lêc lea yuu mia vô ninya lehe vô i?”

*Yesu tii vimwo nipaên vêl ên xomxo yuu
(Mak 5:1-17; Luk 8:26-37)*

²⁸ Yesu he nue ngivihi dô lec dipac dì loc mi la tibii Gadala ben wê yêp mia luaên vilu ganê. Xomxo yuu wê vimwo nipaên dô vac yuu nilô ge dô vac vigwe tige. Yuu mi dô vac vigwe wê xomxo yibêni yêp vac ge, lêc yuu yê wê Yesu val ge om yuu la vô i. Xomxo yuu ge la dô vimen, om xomxo xona ên yuu di o vilee mi la vô môt pinge lêm. ²⁹ Mêdec yuu tyuc ên nêbê, “Anutu nu ông, ông ob vông bêna vô xe? Buc tige valen gên ma, lêc ông lam ên ông nêb ông ob vông xe vô nipaên tax, me?” ³⁰ Yuu nêl bêge, mêd bwoc kidu levac diya gê teva tya. ³¹ Om vimwo nipaên wê dô vac yuu nilô gee kitaa Yesu ên nêbê, “Ông obêc tii xe vêl ge od ông vông xe la dô vac bwoc tiganêe nilô.”

³² Om Yesu nêl vô he ên nêbê, “Xam loc.” Mêgem vimwo nipaên tigee lop vêl ên xomxo yuu ge di la vac bwoc nilô, mêdec bwoc tigee vihati tup mi la vac madia di la tô vac mia di yib mima vêl.

³³ Mêd xomxo wê mi viac bwoc tigee pec mi la viyangtôv di mila nêl kiyang lec bwoc wê yib ge kitong di nêl xomxo yuu wê vimwo nipaên dô vac yuu nilô ge kitong hixôn. ³⁴ Om tibii wê dô vac vigwe tige vihati xona ên Yesu om lam myag i mi yêvô, di nêl kiyang xêkizêc vô i ên nêbê i sea he ben di loc vac vigwe bangwe.

9

*Yesu vông xomxo wê len vô xêlehe ge ti vô niviha lec
(Mak 2:1-12; Luk 5:17-26)*

¹ Yesu lec dipac mi lax mi la mia luaên vilu ganê mi la ben. ² Mêdec tibii ken xomxo wê len vô xêlehe ge ti lec pêt wê i vông ge mi lam vô Yesu. Mêgem Yesu yê wê he vông i vin ge, om nêl vô xomxo tyo ên nêbê, “Nug, ông xêmyaa i vô niviha, ên a kitya ông nêm nipaên vêl pyap.”

³ Lêcom xomxo wê xovô Moses xolac gee dô hixôn om xo vac nilô ên nêbê, “Xomxo tige so vya vô Anutu.”

⁴ Lêc Yesu xovô kiyang wê he xo vac nilô ge, om nêl vô he ên nêbê, “Bêna lêc xam xo kiyang nipaên bêge vac nilômê?” ⁵ Kiyang bêna il ob nêl lutibedê? A ob nêl bê ‘a kitya ông nêm nipaên vêl,’ me a ob nêl bê ‘ong kidi lec mi loc?’ ⁶ Mêlec a nêb a ob vông xovônen vô xam bê a, Xomxo Nu, a tiyi wê a ob kitya xomxo nêniipwo tya vêl gê kibun ga ge.” Mêgem Yesu nêl vô xomxo ti wê len vô xêlehe ge ên nêbê, “Kidi lec mi hôm ông guhu lec di lôc bom.” ⁷ Mêd vux tyo kidi lec mi la ben. ⁸ Mêgem xomxo tibeac yê di xona mabu di pimil Anutu lê, ên wê i vông xêkizêc tibêge vô xomxo tige.

*Yesu nêb Matyu i lam timu vô i vixa
(Mak 2:13-17; Luk 5:27-32)*

⁹ Pyap dêc Yesu loc mi la, lêc mila yê xomxo ti lê nêbê Matyu wê xeedô vac

xumac wê he mi kô takis vac ge. Om Yesu nêl vô i ên nêbê, “Lam timu vô a vixag.” Mêgem Matyu kidi lec dî la timu vô Yesu vixa.

¹⁰ Mêdec Yesu la ya vac Matyu ben, dî tibii nipaên wê mi kô takis ge hixôn tibii nipaên tibeac, he lam dô mì ya hixôn Yesu he nue ngivihi. ¹¹ Lêc he Palisi ge, he yê om nêl vô Yesu nue ngivihi ên nêbê, “Bêna lêc xam nêm xolac kehe la ya hixôn tibii nipaên wê mi kô takis ge yuu tibii nipaên tibeacê?”

¹² Lêc Yesu ngô wê he nêl ge om nêl vô he ên nêbê, “Xomxo niviha ob la vô docta lêm. Nge, tibii wê yidac ge wê ob la vô docta. ¹³ Om xam loc di xovô kiyang wê yêp vac xolac bêga ên nêbê, ‘A o nêb xam si daa vô a lêm. Nge, a nêb xam xo vigwe pisiv ênma môci.’ Xolac nêl bêge, om a o lam ên a nêb a ob tyuc xomxo niviha lêm. Nge, a lam ên a nêb a ob tyuc xomxo nipaên.”

*Kiyang lec yaên yuu ngakwi hixôn bwoc ninivi
(Mak 2:18-22; Luk 5:33-39)*

¹⁴ Nang dêc Jon Lipacêñ nue ngivihi val vô Yesu di nêl vô i ên nêbê, “Xe hixôn Palisi, xe mi ngibua yaên tiyi buc tibeac, lêc bêna lêc ông nume ngivihi o ngibua yaên lêm?”

¹⁵ Om Yesu nêl kiyang pilepacêñ ti vô he ên nêbê, “Tibii lie ti obêc ii vêx lêc gên dô hixôn lie ge od he nilô ob vô viyin, me? Ma vêl. Lêc obêc buc timuêñ wê tibii ob kô li tige vêl ên he ge od he ob ngibua yaên. ¹⁶ Di xomxo ti nêl ngakwi obêc tip ge od obêc kiping ngakwi paha myahipu ti vêl mi la duu lec tikwê lêm. Ên obêc vông bêge ge od myahipu paha tige obêc titê tikwê lêx di tocêñ obêc vô myakipwoc. ¹⁷ Di xomxo ti ob too wain paha vac bwoc ninivi tikwê lêm. Ên obêc too vac ge od wain obêc nyôn ninivi tikwê tige tip dî too la dî ninivi vô nipaên. Om wain paha ge, xomxo too vac bwoc ninivi paha, di wain yuu xôn ninivi ob dô niviha.”

*Xomxo levac nu vêx dî vêx yidac ngwe, yuu kiyang
(Mak 5:22-43; Luk 8:41-56)*

¹⁸ Yesu gên nêl kiyang bêge vô he, mêdec tibii levac ti lam yev vixa kitu vô i dî nêl ên nêbê, “A nug vêx gên yib tya ga om ông lam vyax vigêm lec i, ên i kidi lec maviha i tii vac.” ¹⁹ Mêgem Yesu kidi lec hixôn nue ngivihi mi he la.

²⁰ Mêd vêx ti dô vac he mahigun, lêc vêx tige, yidac kwatuacêñ ti vông i tiyi klismas vigê yuu dî yuu tô mi la (12), lêc o ma lêm. Vêx tyo val le vô Yesu nimi dî vyax vigê lec Yesu ngakwi myahipu, ²¹ ên xo ên nêbê, “A obêc hôm lec Yesu ngakwi myahipu ge od a obêc vô niviha lec.” ²² Mêdec Yesu pilepac dî yê vêx tyo, om nêl vô ên nêbê, “Nug, ông nilôm i vô niviha, ên vông vinêñ wê ông vông ge ob vông ông vô nimvîha lec.” Mêdec lutibed vêx tige vô niviha lec.

²³ Mêd Yesu loc mi la vac xomxo levac tige ben, di yê he wê vê ngivêg ge hixôn kidu levac wê byag dî vông nididun levac ge. ²⁴ Om Yesu nêl vô he ên nêbê, “Xam kidi lec mi loc, ên nipwo tige o yib lêm. Nge, ici va diyêp.” Lêc he nap lec kiyang wê i nêl ge. ²⁵ Om Yesu tii he lop mi la vêl, di la xumac lôma dî la hôm lec vêx tyo vigê, dî i kidi lec maviha. ²⁶ Mêgem xomxo nêl kiyang tige vô levac vac vigwe tigee vihati.

Yesu vông xomxo manôñ tocêñ yuu dî kwa maén ti vô niviha lec

²⁷ Yesu sea vigwe tige mi la, di xomxo yuu wê manôn toc ge timu vô i vixa, di keac via levac ên nêbê, “Davit nu, xo vigwe pisiv ên xii.” ²⁸ Mêdec Yesu la vac xumac nilô, di xomxo yuu ge val vô i, di Yesu kinêg vô yuu ên nêbê, “Muu vông i vin ên muu nêb a tiyi wê a ob vông muu mamnôn i seac ge, me?” Di yuu lee yuu ên nêbê, “Apumtau, ông tiyi.” ²⁹ Mêgem Yesu vyax vigê lec yuu manôn di nêl ên nêbê, “Muu mamnôn i seac i tiyi xocbê vông vinê wê muu vông ge.” ³⁰ Mêgem yuu manôn seac. Di Yesu nêl xêkizêc vô yuu ên nêbê, “Le i lêc loc nêl wê a vông muu mamnôn seac ge kitong vô tibii lêm.” ³¹ Lêc yuu la di la nêl Yesu lê vô levac vac vigwe vihati.

³² YUU la di xomxo kô vux ti wê vimwo nipaên vông kwa ma ge lam vÔ Yesu. ³³ Mêdec Yesu tii vimwo nipaên la vêl om xomxo tige keac via tyip niviha. Om xomxo tibeac ngô di yetac mabu di nêl ên nêbê, “Il o xê do levac bêga ti vac vigwe Islel ila lêm.” ³⁴ Lêc he Palisi nêl ên nêbê, “Yesu tii vimwo nipaên vêl ya xêkizêc wê vimwo nipaên nêl levac vông ge.”

Yesu xo vigwe pisiv ên xomxo

³⁵ Yesu mila vilee vac vigwe levac hixôn vigwe nipwo vihati, di la nêl kiyang vô xomxo vac he xumac liло toto di nêl xolac niviha lec Anutu ben vÔ he di vông he wê yidac hixôn myavinê toto ge vihati vô niviha lec. ³⁶ Yesu yê xomxo tibeac wê lam vÔ i ge di xo vigwe pisiv ên he, ên he piyôp juda di he dô hixôn viyin tiyi xocbê bwoc sipsip wê xomxo ti o viac he lêm ge. ³⁷ Om Yesu nêl vÔ nue ngivihi ên nêbê, “Yaêñ wê dô vac yuac ge vÔ nôn tibeac pyap, lêc nue yuac wê ob la kô nôn gee, he yuutyabed. ³⁸ Om xam kitaa vô Apumtau wê viac yuac ge ên i vông nue yuac tibeac i loc kituc yaêñ wê i vông ge i dô kidu tibed.”

10

Yesu nue ngivihi vigê yuu di tô mi la yuu (Mak 3:13-19; Luk 6:12-16)

¹ Yesu tyuc nue ngivihi vigê yuu di tô mi la yuu lam vÔ i, di vông xêkizêc vÔ he tiyi wê he ob tii vimwo nipaên vêl ên xomxo di vông xomxo wê yidac hixôn myavinê toto ge vÔ niviha lec.

² Nue ngivihi vigê yuu di tô mi la yuu gee lê bêga nêbê, taxlee ge, Saimon wê lê ngwe nêbê Pita ge yuu li Andlu. Di Jems wê ma Sebedi ge yuu li Jon. ³ Di Pilip yuu Batolomyu, di Tomas, di Matyu wê mi kô takis ge, di Jems wê ma Alpias ge, di Tadias, ⁴ di Saimon Selot, di Judas Iskaliot wê vông Yesu la vac tibii vevac vigê ge.

Yesu vông yuac vÔ nue ngivihi (Mak 6:7-13; Luk 9:1-5)

⁵ Yesu nêb ob vông nue ngivihi vigê yuu di tô mi la yuu gee i loc, om nêl vÔ he ên nêbê, “Xam loc vÔn tibii baba i ma, di loc vacén tibii Samelia vigwe i ma. ⁶ Di xam loc vÔ lime Islel mô, ên he tiyi xocbê bwoc sipsip wê lung sea di la xôa ma ge. ⁷ Om xam loc nêl kiyang vÔ he bêga bê, ‘Anutu buc vÔ kwabo lec.’ ⁸ Xam loc vông xomxo yidac i vÔ niviha lec, di tipi vÔ xomxo yibén i kidi lec, di vông xomxo wê kityax mahizihizi ge i vÔ niviha lec, di tii vimwo nipaên i loc vêl ên xomxo. Xêkizêc tige a vông pileva vÔ xam, om xam vông pileva vÔ xomxo di le i lêc kô mone lec lêm.

⁹ “Le i lêc su mone gol yuu silva dì kapa vac xam vixec nu lêm. ¹⁰ Di le i lêc bya vixec mi loc vô môp lêm, dì le i lêc kô nivimihi yuu lêm, dì le i lêc kô su hixôn pitoa lêm. Ên xomxo ti obêc vông yuac vô xomxo ge od ob kô xen yaén vô xomxo tigee.

¹¹ “Xam obêc la vac vigwe levac yuu nipwo ge od xam wêvô xomxo niviha dì loc dô hixôn, dì i loc tyip vô buc wê xam ob sea vigwe tige dì la ge. ¹² Om wê xam obêc la vac xumac nilô tige ge od xam nêl kiyang niviha vô he. ¹³ Di xomxo wê dô vac xumac tige obêc lee yuu ên nêbê xam dô hixôn he ge od kiyang niviha wê xam nêl ge i yêp vô he. Lêc he obêc tyuc lec lêm ge od kiyang niviha wê xam nêl ge i lôm lam vô xacxam va. ¹⁴ Di xomxo ti obêc kô xam lec niviha lêm dì ob ngô kiyang wê xam nêl ge lêm ge od xam lîloo vijuva vêl ên vixam, ên i nêl he nêl nipaên kitong vô he, dì xam sea xumac yuu vigwe tige dì loc. ¹⁵ A nêl vixôhilôg nôn vô xam bê vô buc timuên wê Anutu obêc yaxêن xomxo vihati nêl kiyang ge od Anutu obêc vông myaviwen nipaên vô xomxo viyang tige luu Sodom yuu Gomola vêl.

Yesu nêl kiyang vô nue ngivihi lec viyin viyang viyang wê ob val timuên ge

(Mak 13:9-13; Luk 21:12-17)

¹⁶ “A ob vông xam loc i tiyi xochê bwoc sipsip wê xam ob la vac noo vimen mahigun ge. Om xam viac môp wê xam vông ge niviha, dì dô mamlehe i tiyi xochê tucluu ge. ¹⁷ Xam viac xam ên xomxo, ên he ob kô xam mi la vông kiyang vô xam, dì he ob pisa xam ya yihi vac he xumac lilo, ¹⁸ di kô xam mi la lax vô gavman levac yuu king manôn di vông kiyang vô xam ên wê xam vông i vin a ge. Om xam ob nêl a kiyang kitong vô he hixôn tibii madiluhu. ¹⁹ Mêlêc buc wê he obêc kô xam mi la vac kot ge od xam o lêc myag môp yuu kiyang wê xam ob nêl ge lêm. Ên kiyang wê xam ob nêl ge Anutu ob vông vô xam vô buc tige. ²⁰ Om xacxam va ob nêl kiyang lêm. Nge, Myakilôhô Ngibua wê Mag Anutu vông ge vaci ob nêl kiyang vac xam myam.

²¹ “Vô buc tige xomxo obêc vông lie la vac tibii vigê ên nêb tibii i hi he yib, dì mae obêc vông bêge vô nue, dì nue ob yê tae mae nipaên dì vông he la vac tibii vigê ên nêb tibii i hi he yib. ²² Di xomxo vihati xêyaa ob vô nipaên vô xam ên wê xam vông i vin a lêg ge. Lêc xomxo ti obêc le xêkizêc vac viyin dì i la tyip vô buc myahipu ge od Anutu obêc vông i la dô vac i ben. ²³ He obêc vông viyin vô xam vac vigwe ngwe ge od xam pec mi loc vac vigwe bangwe. Ên a nêl vixôhilôg nôn vô xam bêga bê xam obêc vông yuac vac Islel ben vihati lêm, dì a, Xomxo Nu, a ob vena tax.

²⁴ “Nipwo xumac xulacêni ti ob luu ma wê hilung yuac vô i ge vêl lêm. Di xomxo yuac ti ob luu xomxo levac wê viac yuac ge vêl lêm. ²⁵ Lêc nipwo xumac xulacêni ti obêc tiyi ma wê hilung yuac vô i ge od pyap, dì xomxo ti obêc tiyi xomxo levac wê viac yuac ge od pyap. A tiyi xochê xomxo levac wê a viac xumac ge, dì xomxo nêl Seten lê ngwe Bielsebul lec a, om xam xovô bêga bê he obêc nêl a nipaên ge od he ob nêl nipaên lec a nuge xam hixôn luu vêl.

*Xam xona ên Anutu vaci
(Luk 12:2-9)*

²⁶ “Om xam o lêc xona ên xomxo lêm. Ên kiyang vihati wê yêp vac xomxo nilô ge ob lam yêp seac, dì kiyang wê yêp xôpacên ge, vihati ob lam yêp seac dì xomxo ob xovô. ²⁷ Kiyang wê a nêl xôpacên vô xam ge, xam loc nêl i yêp seac vô xomxo mi he i ngô. Dì kiyang wê a nêl kimunaen vô xam ge, xam loc le lec wetôv dì nêl i yêp seac vô xomxo mi he i ngô. ²⁸ Dì xam o lêc xona ên he wê ob hi xam nimnivi yib ge lêm, ên he o tiyi wê he ob hi kinum yib hixôn ge lêm. Xam xona ên Anutu môci, ên Anutu tiyi wê ob vông xam kinum yuu xôn nimnivi la vac vigwe nipaên.

²⁹ “Xomxo mi kisuu menac nipwo yuu ya mone tibed. Lêc Anutu obêc lee yuu lêm ge od menac nipwo tigee ti ob tô mi la kibun lêm. ³⁰ Dì xam ge, Anutu kitong xam bamzub lihi vihati pyap. ³¹ Om xam xonaen i ma, ên Anutu xêyaa vin lec xam nginoo menac nipwo vihati vêl.

³² “Om xomxo ti obêc nêl a kitong vô xomxo ge od a ob nêl xomxo tige kitong êno vô Mag Anutu wê dô lag puunê ge. ³³ Lêc xomxo ti obêc yax a vun vô xomxo ge od a ob yax i vun êno vô Mag Anutu wê dô lag puunê ge.

*Il xêgyaa i vin lec Yesu i luu vêl
(Luk 12:51-53; Luk 14:26-27)*

³⁴ “Xam o lêc xo bê a lam ên a nêb a ob kitov vevac i tip gê kibun ga lêm. Ên a o lam ên a nêb a ob kitov vevac i tip lêm. Nge, a kô yipac levac mi lam. ³⁵ Ên a lam ên a nêb a ob vông xomxo i dô kidu kidu. Om ma yuu nu vux xêyaa ob vô myavinê vôma, dì ta yuu nu vêx xêyaa ob vô myavinê vôma, di yen vêxwo yuu yen vêxta xêyaa ob vô myavinê vôma, ³⁶ dì xomxo wê dô vac xumac tibed gee, he ob yêma nipaên.

³⁷ “Xomxo ti xêyaa obêc vin lec ta yuu ma luu wê xêyaa vin lec a ge vêl ge od o tiyi wê ob tu a xe ge lêm. Dì xomxo ti xêyaa obêc vin lec nue vêx yuu vux luu wê xêyaa vin lec a ge vêl ge od o tiyi wê ob tu a xe ge lêm. ³⁸ Dì xomxo ti obêc kilê xax pola wê i vông ge mi timu vô a vixag lêm ge od o tiyi wê ob tu a xe ge lêm. ³⁹ Ên xomxo ti obêc viac ninivi ên yibêñ ge od ob yib mi la xôa ma. Lêc xomxo ti obêc yib lec a lêg ge od obêc dô maviha.

*Xomxo wê obêc kô nôn niviha
(Mak 9:41)*

⁴⁰ “Xomxo ti obêc kô xam lec niviha ge od tiyi xochê kô a lec niviha êno. Dì xomxo ti obêc kô a lec niviha ge od tiyi xochê kô Anutu wê vông a lam ge lec niviha êno. ⁴¹ Xomxo ti obêc kô plopete ti lec niviha ên wê i plopete ge od yuu xôn obêc kô nôn niviha tiyima, dì xomxo ti obêc kô xomxo niviha ti lec niviha ên wê i xomxo niviha ge od yuu xôn obêc kô nôn niviha tiyima. ⁴² Dì xomxo ti obêc vông mia ningigooen vac kap vô a nuge yuac ti ên wê i tu a nug ge od a nêl vixôhilôg nôn vô xam bê nôn niviha obêc ma vô i lêm. Nge, ob kô nôn lec yuac wê i vông ge.”

11

*Jon nue ngivihi val vô Yesu
(Luk 7:18-35)*

¹ Yesu nêl kiyang vô nue ngivihi vigê yuu di tô mi la yuu lec yuac wê he ob vông ge, pyap dêc sea vigwe tige mi la vîlee vac vigwe toto wê yêp vac vigwe levac tige di la nêl kiyang vô xomxo di tixuu he ya xolac.

² Jon Lipacén dô vac xumac kalabuhu, di ngô kiyang lec yuac wê Kilisi vông ge. Om vông i nue ngivihi la vô Yesu, ³ di he la kinêg ên nêbê, “Xomxo ti wê plopete ilage nél ên nêbê obêc val ge, ông tyo ga mê, me xe ob dô bin xomxo ngwe?” ⁴ Lêt Yesu luu he vya ên nêbê, “Xam lôc nél yuac wê xam wê di ngô gee kitong vô Jon bê ⁵ xomxo wê manôn tocên gee, he manôn seac, di xomxo wê vixa nipaên gee, he vixa vô niviha lec mi he la niviha, di xomxo wê kityax mahizihizi gee, he vô niviha lec, di xomxo wê ninya vô kitu gee ngô kiyang, di xomxo yibén kidi lec maviha, di xomxo wê nén susu maên gee ngô xolac niviha. ⁶ Vông vinêr wê xomxo ti vông ge obêc vô nipaên ên a lêm ge od ob dô hixôn xêyaa niviha.”

⁷ Jon nue ngivihi lax mi la vêl, di Yesu nél kiyang vô xomxo kidu levac tige lec Jon bêga ên nêbê, “Ilage wê xam la vô Jon vac vigwe mahigun pileva ge od xam la ên xam nêb xam ob la wê vatyaê? Xam la ên xam nêb xam ob la wê duvac wê lea kilê i la di i hivip lec nang ge, me? Maê. ⁸ Om xam la ên xam nêb xam ob la wê vatya? Xam la ên xam nêb xam ob la wê xomxo wê vinyum ngakwi nivihaviha ge te mi, me? Maê. Xomxo wê mi vinyum ngakwi nivihaviha ge he mi dô vac king ben. ⁹ Om xam la vô i ên va? Xam la ên xam nêb xam ob la wê plopete ti, me? Vixôhilôg, a nél vô xam bê Jon ge plopete ti wê luu plopete vihati ge vêl. ¹⁰ Ilage xomxo kivuu kiyang lec Jon mi i yêp vac xolac bêga ên nêbê, ‘Wê lê. A ob vông xomxo ti i kô a kiyang mi loc mug ông nêm môp ên i viac môp wê ông obêc mila vac ge.’

¹¹ Kiyang nél bêge, di a ob nél vixôhilôg nôn vô xam bê Jon Lipacén ge xomxo levac luu xomxo kibun ga vihati vêl. Lêcom xomxo vihati wê vô nipiwo lec vac Anutu ben ge wê nginoo Jon vêl.

¹² “Vô buc wê Jon Lipacén val ge di i lam tyip gwêbaga hixôn, Anutu xolac lam yêp seac om xomxo tibeac ngô di vông he nilô la diluhu vô Anutu. ¹³ Ên Moses he plopete vihati nél Anutu kiyang kitong di i val tyip lec Jon. ¹⁴ Di xam obêc nêb xam ob ngô ge, od xam ngô bê Jon ge Ilaija wê he nél ilage ên nêb ob val ge. ¹⁵ Xomxo ninya obêc yêp ge od i ngô kiyang.

¹⁶ “Lêt xomxo wê dô vac buc gwêbaga, a ob tixuu he lec vatya? He tiyi xochê nume nipiwo wê dô lec wetôv di tyuc la vô lie nipiwo ên nêbê,

¹⁷ ‘Xame, xe hi vyang, lêt xam o yoo lêm, di xe vông tilôt, lêt xam o vông hixôn lêm.’

¹⁸ Môp tibêge wê nume nipiwo vông ge tiyi xochê xam vông vô xii Jon, ên Jon val, lêt o ya yaén di num wain lêm, lêt xam nél ên xam nêbê vimwo nipaên dô vac i nilô. ¹⁹ Nang déc a, Xomxo Nu, a val, lêt a mi xa di mi num, lêt xam nél ên xam nêbê, ‘Wê lê. Xomxo tige mi ya levac di mi num levac mi vô mavmav di mi dô hixôn xomxo nipaên wê kô takis ge hixôn tibii nipaên tibeac.’ Xam mi nél bêge, lêt yuac wê xii Jon vông ge ob hilung vô xam bê Anutu vông xovôên vô xii, di xovôên wê i vông ge vixôhilôg nôn.”

Tibii wê o pilepac nilô lêm (Luk 10:13-15)

²⁰ Yesu vông do levac vac vigwe tibeac, lêt xomxo vac vigwe tige o pilepac he nilô lêm. Om Yesu nél he nén nipaên kitong vô he bêga ên nêbê, ²¹ “Xam Kolasin, di xam Betsaida, xam xona nêm, ên xam obêc tulec viyin. Ên do levac wê a vông vac xam bom ge, xomxo ti obêc vông vac

tibii Taia yuu Saidon ben ilage ge od tibii Taia yuu Saidon obêc yê dì xovô he nêñ nipaên dì lipac viwev lec he dì pilepac he nilô la vô Anutu. ²² Om a ob nêñ vô xam bê vô buc timuêñ wê Anutu obêc yaxêñ xomxo nêñ kiyang ge od Anutu obêc vông myaviwen nipaên vô xam luu Taia yuu Saidon vêl. ²³ Dì xam Kapaneam, xam nêñ xomxo i kô xam lec i loc yêp kisiinê, me?

Ma vêl. Xam ob la vac vigwe nipaên. Ên do levac wê a vông vac xam bom ge, xomxo ti obêc vông vac tibii Sodom ben ilage ge od vigwe Sodom ob yêp dì i val vô gwêbaga hixôn. ²⁴ Om a ob nêñ vô xam bê vô buc timuêñ wê Anutu obêc titô xomxo nêñ kiyang ge od Anutu obêc vông myaviwen nipaên vô xam luu Sodom vêl.”

Xam lam vô a di dô seac vêl

(Luk 10:21-22)

²⁵ Vô buc tige Yesu kitaa bêga ên nêbê, “Mag Anutu, ông lag yuu kibun kehe ông. Om a pimil ông ên wê ông o vông kiyang tige vô xomxo wê xovôêñ yuu piyôp levac ge lêm. Nge, ông vông vô xomxo wê gên o xovô lêm ge, ²⁶ ên ôcông va xovô ên nêb ông ob vông bêge ge.

²⁷ “Mag vông xêkizêc yuu xovôêñ vihati ge vac a vigêg. Xomxo ti o xovô nu a lêm. Nge, Mag vaci wê xovô a. Di xomxo ti o xovô Mag lêm. Nge, aca va wê a xovô Mag, dì xomxo wê a nêb a ob hilung Mag vô he ge, he ob xovô Mag.

²⁸ “Xam wê xam vông yuac levac dì kilê viyin ge, xam lam vô a ên lam dô seac vêl. ²⁹ Xam lam tu a nuge yuac dì kô xovôêñ niviha vô a, ên a ga xomxo malehe ti dì a o yong a lêm, om xam nilôm ob dô seac vêl. ³⁰ Ên yuac wê a vông vô xam ge, ge o yuac viyin lêm ên a ngidu xam xôn. Di xolac wê a vông vô xam ên a nêb xam vông ge, ge o viyin lêm.”

12

Kiyang lec buc sabat

(Mak 2:23-28; Luk 6:1-5)

¹ Vô buc wê sabat ge, Yesu he nue ngivihi la vilee mi la vac yuac lôma wê wit ge. Lêc vip den nue ngivihi, om he le yul wit nôn mi ya. ² Lêc Palisi ya yê wê he vông ge om nêñ vô Yesu ên nêbê, “Wê lê, gwêbaga buc sabat wê Moses xolac vibu nêb il ob vông yuac ti lec lêm ge, lêc nume ngivihi vông yuac lec.” ³ Lêc Yesu nêñ vô he ên nêbê, “Mêđ xam o kitong xolac wê nêñ lec bug Devit ge lêm, me? Devit he lie dô, lêc vip den he, ⁴ om he la vac Anutu xumac ngibua di la ya blet wê xomxo daa siêñ tung vô Anutu manôñ ge. Blet tige, Devit he lie o tiyi wê ob ya ge lêm. Nge, xomxo daa siêñ gee, heche va ob ya. ⁵ Mêđ xam o kitong kiyang ti wê yêp vac Moses xolac ge lêm, me? Kiyang tige nêñ ên nêbê xomxo daa siêñ mi vông he yuac vac Anutu xumac ngibua lec buc sabat, om xochê he pwoo kiyang lec buc sabat vac ge, lêc he o vông i so lêm. ⁶ Om a ob nêñ vô xam bê a ga a luu Anutu vông xumac ngibua tige vêl. ⁷ Kiyang yêp vac xolac bêga ên nêbê, ‘A o nêb xam si daa vô a lêm. Nge, a nêb xam xo vigwe pisiv ênma môci.’ Kiyang nêñ bêge, om xam obêc xovô kiyang tige kehe ge od xam obêc vông viyin vô he wê nêñ kiyang maêñ ge lêm. ⁸ Ên a, Xomxo Nu, wê a tu sabat kehe.”

Yesu vông xomxo wê vigê vilu vô xêlehe ge ti vô niviha lec
(Mak 3:1-6; Luk 6:6-11)

⁹ Yesu sea yuac lôma dì la vac Yuda xumac lilo ti. ¹⁰ Lêc xomxo wê vigê vilu vô xêlehe ge ti dô. Mêdec xomxo ya nêb ob vông kot vô Yesu, om he kinêg vô i ên nêbê, “Ge tiyi wê il ob vông xomxo i vô niviha lec vô buc sabat ge, me?” ¹¹ Om Yesu nêl vô he ên nêbê, “Xomxo ti vac xam mahigun ge, bwoc sipsip tibed wê i vông ge obêc tó vac lôva lec buc sabat ge od xomxo tige obêc la pul i lôm kisii ên lôva, me? Nge, obêc pul i lôm. ¹² Xomxo nginoo bwoc sipsip vêl, om ge tiyi wê il ob vông niviha vô xomxo lec buc sabat.” ¹³ Mêdec Yesu nêl vô xomxo ti wê vigê vilu vô xêlehe ge ên nêbê, “Titô vigêm.” Om

xomxo tyo titô vigê, lêc vigê vô niviha lec tiyi xocbê vigê viluo. ¹⁴ Om he Palisi kidi lec dì la kitucma dì myag môp wê nêb he ob hi Yesu i yib lec ge.

¹⁵ Lêc Yesu xovô kiyang wê he Palisi nêl vôma ge om sea vigwe tige dì la. Lêc xomxo tibeac la timu vô i vixa, om Yesu vông he wê yidac gee vihati vô niviha lec, ¹⁶ lêc vibu he nêb he nêlén i kitong vôen xomxo i ma. ¹⁷ Om Anutu kiyang wê plopete Aisaia nêl ilage vô nôn lec. Kiyang tige nêl bêga ên nêbê,

¹⁸ “Wê lê. Xomxo tige, a nug yuac wê a vinoo i pyap. A xêgyaa vin lec i, dì a xê i niviha. A ob vông Myakilôhô Ngibua wê a vông ge i hivun i xôn, dì i ob nêl a xolac niviha vô tibii madiluhu. ¹⁹ Dì ob nêl kiyang kunacên yuu higacên lêm, dì ob hibap kiyang vac wetôv bê xomxo i ngô lêm. ²⁰ Xomxo ya tiyi xocbê duvac wê hibu nipwo tya ge, lêc a nug yuac tige ob hibu he sea lêm. Dì xomxo ya tiyi xocbê ngwax wê tum lec kilen ge, lêc xomxo tyo ob hi i yib lêm. Xomxo tyo ob vông yuac mi dô ên vông kiyang niviha i pwoo nipaên i pec. ²¹ Dì tibii baba wê o Yuda lêm ge vihati ob vông i vin i lê dì dô bin i.”

Xomxo nêl ên nêbê Yesu vông yuac ya xêkizêc wê vimwo nipaên Seten vông ge

(Mak 3:20-30; Luk 11:14-23; Luk 12:10)

²² Mêd he kô xomxo ti mi lam vô Yesu. Vimwo nipaên dô vac xomxo tyo nilô dì vông i manôn toc dì vông i dô yac dì keacên ma. Om Yesu vông xomxo tyo vô niviha lec dì manôn seac dì i yê vigwe dì keac. ²³ Om xomxo vihati wê yê ge yetac mabu dì nêl vôma ên nêbê, “Xomxo tige Devit nu, me?” ²⁴ Lêc he Palisi ngô om nêl vôma ên nêbê, “Bielsebul wê tu vimwo nipaên nêl levac ge vông xêkizêc vô Yesu, om Yesu tii vimwo nipaên vêl ya xêkizêc wê Bielsebul vông ge.”

²⁵ Lêc Yesu xovô kiyang wê yêp vac he piyôp ge om nêl vô he ên nêbê, “Xomxo viyang ti obêc le kidu yuu dì vông vevac vôma ge od he ob dô nipaên. Dì xomxo vigwe ti me xumac ti obêc hibu he la yuu di vông vevac vôma ge od he ob dô niviha lêm. ²⁶ Dì Seten obêc tii lie dì hibuma sea ge od xêkizêc wê he vông ge ob ngiduma xôn tibêna? ²⁷ Dì a obêc tii vimwo nipaên vêl ya xêkizêc wê Bielsebul vông ge od xam lime mi tii vimwo nipaên vêl ya xêkizêc wê letya vông ge? Xam lime i yaxên kiyang wê xam nêl lec a ge. ²⁸ Lêc a obêc tii vimwo nipaên vêl ya xêkizêc wê Anutu Myakilôhô Ngibua vông ge od xam xovô bê Anutu buc val pyap vô xam.

²⁹ “Xomxo xêkizêc ti obêc dô vac ben xumac lôma ge od tibii yôdac ti ob la vac xumac lôma dì la vun i susu tibêna? Lêc obêc ku xomxo xêkizêc

tige xôn ya yihi ge od tiyi wê ob kô i nêñ susu vihati wê dô vac xumac nilô ge mi la.

³⁰ "Xomxo ti obêc vin a lêm ge od tiyi xochê vông vevac vô a. Di xomxo ti obêc kituc xomxo lam vô a lêm ge od tiyi xochê tii he moo sea ge.

³¹ "Om a ob nêl vô xam bê Anutu tiyi wê ob kitya nipaêñ vihati hixôn kiyang wê xomxo so vya vô i ge vêl. Lêc xomxo ti obêc so vya vô Myakilôhô Ngibua ge od o tiyi wê Anutu ob kitya i nêñ nipaêñ tige vêl ge lêm. ³² Di xomxo ti obêc nêl kiyang nipaêñ lec a, Xomxo Nu, ge od Anutu ob kitya i nêñ nipaêñ vêl. Lêc xomxo ti obêc nêl kiyang nipaêñ lec Myakilôhô Ngibua ge od Anutu ob kitya i nêñ nipaêñ vêl lêm. Nipaêñ wê i vông ge, Anutu obêc hôm xôn mi i yêp dia di i la tyip vô buc timuêñ.

Xax nôn niviha yuu nipaêñ

(Luk 6:43-45)

³³ "Xax obêc niviha ge od nôn obêc niviha, di xax obêc nipaêñ ge od nôn obêc nipaêñ. Om xomxo obêc yê xax nôn wê vuac lec yatôv ge od ob xovô bê xax tige niviha, me xovô nêbê nipaêñ. ³⁴ Xam myel nue xam! Xam xomxo nipaêñ, om xam ob nêl kiyang niviha tibêna? Ên kiyang wê pup vac xam nilôm ge, ge wê xam myam nêl seac. ³⁵ Xomxo niviha ge, niviha yêp vac nilô om mi vông môp niviha. Di xomxo nipaêñ ge, nipaêñ yêp vac nilô om mi vông môp nipaêñ.

³⁶ "A ob nêl vô xam bê vô buc timuêñ wê Anutu obêc yaxêñ xomxo vihati nêñ kiyang ge od ob yaxêñ kiyang vaxvax wê xomxo nêl ge vihati. ³⁷ Wê ông myam obêc nêl kiyang niviha ge od Anutu ob yê ông nêb ông xomxo niviha. Di ông myam obêc nêl kiyang nipaêñ ge od Anutu ob yê ông nêb ông xomxo nipaêñ."

Xomxo nêb he ob yê do levac

(Mak 8:11-12; Luk 11:29-32)

³⁸ Nang dêc xomxo wê xovô Moses xolac gee hixôn he Palisi ya nêl vô Yesu ên nêbê, "Xolac kehe, xe nêb ông vông do levac ti ên xe xê." ³⁹ Lêc Yesu nêl vô he ên nêbê, "Xam gwêbaga, xam ge xomxo nipaêñ wê xam o vông i vin lêm ge, om xam nêb xam ob wê do levac ti. Lêc a ob vông do levac ti mi xam wê lêm. Ên do levac tibed wê a ob hilung vô xam ge wê plopete Jona vông ilage. ⁴⁰ Ên ilage Jona dô vac pis mabu yocêñ ti nilô tiyi bucêñ yon di vidiiêñ yon. Om a, Xomxo Nu, a obêc la xêp vac kibun nilô tiyi bucêñ yon di vidiiêñ yon. ⁴¹ Om buc timuêñ wê Anutu obêc yaxêñ xomxo nêñ kiyang ge od tibii Niniva obêc kidi lec di nêl xam gwêbaga nêm nipaêñ kitong, ên ilage tibii Niniva ngô kiyang wê Jona nêl vô he ge di pilepac he, lêc gwêbaga a dô hixôn xam di a nginoo Jona vêl, lêc xam o pilepac xam lêm. ⁴² Om buc timuêñ wê Anutu obêc yaxêñ xomxo nêñ kiyang ge od vêx levac wê tu tibii Siba nêñ kwin ilage obêc kidi lec hixôn xam wê xam dô gwêbaga di nêl xam nêm nipaêñ kitong. Ên vêx tige kidi vac vigwe kehe tevabanê ên nêb ob lam ên lam ngô kiyang wê king Solomon nêl piyôp niviha ge. Lêcom gwêbaga, a lam dô hixôn xam di a nginoo Solomon vêl, lêc xam o ngô a vyag lêm.

Vimwo nipaêñ lax dô vac xomxo nang

(Luk 11:24-26)

⁴³ "Vimwo nipaêñ ti obêc lop mi la vêl ên xomxo ti ge od ob la vilee vac vigwe myadongêñ mi la myag vigwe wê ob la dô seac vêl vac ge. Lêc

yêvôen vigwe ti obêc ma ge ⁴⁴ od ob nêl bêga bê, ‘A ob lax mi la dô vac bog wê a sea di lam ge i tii vac nang.’ Mêd vimwo nipaên tige obêc lax mi la vô xomxo ti wê dô vac lêc sea mi la ge, di ob lax yê wê xomxo tyo pityep di vunac vô pyap lêc dô pileva ge. ⁴⁵ Om obêc lax mi la kô vimwo nipaên vigê vilu di sec yuu wê heche va nipaên luu i vêl ge, di kô he mi lam di he xôn la dô vac xomxo tige nilô. Om xomxo tige dô vac nipaên nôn nginoo viwen tax vêl. Om xam xomxo nipaên gwêbaga, xam ob tulec nipaên tiyi bêge.”

Yesu tae lie

(Mak 3:31-35; Luk 8:19-21)

⁴⁶ Yesu gên nêl kiyang vô xomxo mi dô vac xumac lôma, mèdec tae lie val le xumac kehe ên nêb ob keac vô i. ⁴⁷ Om xomxo ti nêl vô Yesu ên nêbê, “Tame lime val le xumac kehe ên nêb ob nêl kiyang vô ông.” ⁴⁸ Lêc Yesu nêl vô xomxo tyo ên nêbê, “A tag letya? Di a lige letya?” ⁴⁹ Mêd hilung vigê la vô nue ngivihi di nêl ên nêbê, “A tage lige wê he dô ga. ⁵⁰ Èn xomxo wê ngô Mag Anutu lag puunê kiyang di vông i vô nôn lec ge, he tu a tage lige vêx yuu vux.”

13

Kiyang pilepacén lec xomxo ti wê liloo vê vac yuac

(Mak 4:1-9; Luk 8:4-8)

¹ Vô buc tige Yesu sea xumac nilô di lop mi la vixun di la dô kibun vô mia luaên ninya. ² Mèdec xomxo tibeac hiwocên kituc lam vô i, om Yesu la lec dipac ti di la dô lec, di xomxo kidu levac tige le vô mia luaên ninya. ³ Mêd Yesu nêl kiyang tibeac, lêc nêl tiyi xochê kiyang pilepacén ge vôhe. Om nêl kiyang pilepacén ti vô he bêga ên nêbê, “Xomxo ti la ên nêb ob la liloo susu vê vac yuac. ⁴ Om liloo i la lê, lêc vê ya tô vac môt, om menac lam ya. ⁵ Di ya tô lec kibun nipwo tya wê dô lec ngidax kisii ge, om tyip lutibed, ⁶ lêc ngilôhô la tulec ngidax ên kibun nipwo tya, om hiyôv ya i vilôvac di i yib. ⁷ Di vê mangwe tô mi la dô vac hivu kehe, lêc tyip hixôn hivu, om hivu hivun i yib. ⁸ Di ya tô mi la dô vac kibun niviha, om tyip di vuac nôn niviha. Mègem ya vuac nôn 100 di ya vuac nôn 60 di ya vuac nôn 30. ⁹ Xomxo ti ninya obêc yêp ge od i ngô kiyang tiga.”

Yesu nêl kiyang pilepacén lec kehe va?

(Mak 4:10-12; Luk 8:9-10)

¹⁰ Om nue ngivihi lam kinêg vô Yesu ên nêbê, “Bêna lêc ông nêl kiyang pilepacén vô he?” ¹¹ Mègem Yesu luu he vya bêga ên nêbê, “Kiyang wê ob nêl Anutu ben kehe kitong ge yêp xôpacén, lêc Anutu hilung vô xam om xam xovô, lêc Anutu o hilung vô tibii baba lêm. ¹² Èn xomxo ti obêc xovô xolac ge od Anutu obêc kitiv xovônen levac lec hixôn ên i xovô i luu vêl. Lêc xomxo ti obêc xovô xolac lêm ge od Anutu ob vô i nêl xovônen nipwo tya ge vêl ên i. ¹³ Om a nêl kiyang pilepacén vô he, ên he manôñ yê lê, lêc xochê he manôñ o yê lêm, di he ngô lê, lêc xochê he ninja o ngô lêm, mègem he o xovô kehe lêm. ¹⁴ Om he vông kiyang wê plopete Aisaia nêl ilage vô nôn lec. Ilage Aisaia nêl bêga ên nêbê, ‘Xam obêc ngô kiyang lê, lêc xam piyôp obêc xovô kehe lêm, di xam mammôn obêc yê lê, lêc xam ob xovô lêm. ¹⁵ Èn xam nilôm xêkizêc, di ninyam vô kitu, di mammôn toc, ên xam nêb xam ob wê lêm, di

xam nêb xam ob ngô kiyang ti lêm, dì xam nêb xam ob xovô kehe lêm, dì xam nêb xam ob pilepac nilôm i lôm vô a ên a vông xam vô nimviha lec lêm.’

16 Asaia nêl bêge ilage, lêc xam xêmyaa i vô niviha, ên xam mamnôn yê a, dì xam ninyam ngô a kiyang. **17** A nêl vixôhilôg nôn vô xam bê plopete hixôn xomxo niviha wê dô ilage, he tibeac nêb he ob yê tiyi xochê xam wê gwêbaga, lêc he yêen ma, dì he nêb he ob ngô kiyang tiyi xochê xam ngô gwêbaga, lêc he ngôen ma.

*Yesu nêl kiyang lec xomxo wê liloo vê ge kehe kitong
(Mak 4:13-20; Luk 8:11-15)*

18 “Xam ngô lê, ên a ob nêl kiyang pilepacên lec xomxo wê liloo vê ge kehe kitong vô xam. **19** Vê wê tô vac môp ge, ge tiyi xochê xomxo wê ngô kiyang lec Anutu ben lê, lêc xovôen ma ge, om Seten lam vô vêl ên he nilô. **20** Dì vê wê tô vac kibun nipwo tya wê dô lec ngidax kisii ge, ge tiyi xochê xomxo wê ngô xolac dì vông i vin lutibed mi xêyaa vô niviha, **21** lêc he tiyi xochê ngec wê ngilôhô ma ge, om he dô nipwo tya, lêc he obêc tulec viyin me xomxo obêc vông myavinê vô he ên wê he vông i vin xolac ge od he sea vông vinên wê he vông ge lutibed. **22** Dì vê wê tô vac hivu kehe ge, ge tiyi xochê xomxo wê ngô xolac mi dô, lêc he nilô vô valval ên susu kibun ga yuu mone, om môp tige hivun xolac xôn, dì nôn ma. **23** Dì vê wê tô vac kibun niviha ge, ge tiyi xochê xomxo wê ngô xolac mi xovô kehe ge, om he vuac nôn niviha tiyi xochê 100 dì ya tiyi 60 dì ya tiyi 30.”

Kiyang pilepacên lec nita nipaên wê tyip vac yuac ge

24 Yesu nêl kiyang pilepacên ngwe vô he bêga ên nêbê, “Anutu ben kehe tiyi xochê xomxo ti wê la liloo ngec vê vac i yuac ge. **25** Mêd vô bucên wê yêp ge xomxo nipaên ngwe val liloo vê nipaên la hixôn vac yuac di lax mi la. **26** Mêdec buc ya lam la vêl dì ngec niviha tyip mi vô nôn, dì nita nipaên tyip hixôn. **27** Om xomxo levac tige nue yuac val kinêg vô i ên nêbê, ‘Xomxo levac, ông liloo vê niviha vac yuac wê ông vông ge, lêc bêna lêc nita nipaên tigee tyip hixônê?’

28 “Om xomxo levac tige nêl lax vô he ên nêbê, ‘Xomxo nipaên ti vông tige.’ Om nue yuac kinêg vô i ên nêbê, ‘Tiyi wê xe ob la xuac nita nipaên tige vêl ge, me?’ **29** Lêc xomxo levac nêl vô he ên nêbê, ‘Ge o tiyi lêm, ên xam obêc xuac nita nipaên ge od xam ob xuac ngec niviha hixôn. **30** Om xam vông yuu xôn i le dì i loc tyip lec buc wê il ob la kô nôn ge lê. Mêd obêc buc tige od a ob nêl vô he wê ob la kô nôn ge bê he i loc pul nita nipaên vêl mi titup i loc bun ti di nêx i loc vac ngwax, dì pul nôn niviha mi kô mi loc tung vac xumac wê nôn niviha dô vac ge.’”

*Kiyang pilepacên lec vixôô nôn yuu yis
(Mak 4:30-34; Luk 13:18-21)*

31 Yesu nêl kiyang pilepacên ti vô he bêga ên nêbê, “Anutu ben kehe tiyi xochê vixôô nôn wê xomxo ti kô mi la nêx vac yuac ge. **32** Vixôô nôn ge nipwpwo, lêc obêc tyip mi vô levac dì luu susu yaya vêl dì la tu xax, dì menac viyang viyang lam vông liwihi lec ngen mi dô lec dì ya nôn.”

33 Nang dêc Yesu nêl kiyang pilepacên ngwe bêga ên nêbê, “Anutu ben kehe tiyi xochê yis nipwo tya wê vêx ti pilepac hixôn plaua, om vông plaua dung mi vô levac.”

³⁴ Yesu nêl kiyang tigee vihati vô xomxo kidu levac, lêc o nêl kiyang kehe yêp seac vô he lêm. Nge, nêl kiyang pilepacên pileva vô he. ³⁵ Mêgem kiyang wê plopete nêl ilage vô nôn lec. Plopete nêl bêga ên nêbê, “A ob nêl kiyang pilepacên vô he.

Dì kiyang wê yêp xôpacên vô buc wê Anutu tung lag yuu kibun dì i val tyip gwêbaga hixôn ge, a ob nêl kiyang tigee kehe kitong i yêp seac.”

Yesu nêl kiyang pilepacên wê nêl lec nita nipaên ge kehe kitong

³⁶ Yesu sea xomxo kidu levac tige di la dô vac xumac lôma. Mêd nue ngivihi val nêl vô i ên nêbê, “Kiyang pilepacên lec nita nipaên wê tyip vac yuac ge, ông nêl kehe kitong vô xe ên xe xovô.”

³⁷ Om Yesu nêl vô he ên nêbê, “Xomxo levac ti wê liloo vê niviha vac yuac ge, ge a, Xomxo Nu, ³⁸ dì yuac tyo ge tiyi kibun, dì vê niviha ge tiyi Anutu nue, di nita nipaên ge tiyi Seten nue, ³⁹ dì tibii nipaên ti wê liloo vê nipaên vac yuac ge tiyi Seten, di buc wê xomxo kô nôn lec ge tiyi buc myahipu, dì xomxo yuac wê pul nôn ge tiyi angela. ⁴⁰ Dì wê he pul nita nipaên vêl mi si lec ngwax ge, tiyi xochê yuac wê he obêc vông vô buc myahipu ge. ⁴¹ Om vô buc myahipu tige a, Xomxo Nu, a ob vông a nuge angela he i loc vac vigwe vihati wê a vông ge ên he i loc kituc xomxo nipaên wê didii xomxo la vac môt nipaên ge hixôn he wê mi vông môt nipaên ge vihati, ⁴² dì nêx he i loc vac ngwax levac. Vac ngwax tige he obêc byag dì nivu obêc kic lecma. ⁴³ Mêd vô buc tige xomxo niviha obêc linac xêseac tiyi xochê hiyôv ge vac Mag ben. Xam ninyam obêc yêp ge od xam ngô kiyang tiga.

Yesu nêl kiyang pilepacên lec mone levac wê yêp vac yuac ge

⁴⁴ “Anutu ben kehe tiyi xochê mone levac wê yêp vac kibun nilô, lêc xomxo ti la tulec lê, lêc vun i dô vac kibun nilô i tii vac. Xomxo tige xêyaa vô niviha, om la vông susu vihati wê i vông gee mi tibii kisuu i ma, dì kô mone mi la kisuu kibun tige ya.

Yesu nêl kiyang pilepacên lec komkom nivihaviha

⁴⁵ “Kiyang pilepacên ngwe bêga nêbê Anutu ben kehe tiyi xochê xomxo ti wê vông yuac lec myagén komkom nivihaviha nêb ob kisuu. ⁴⁶ Yê komkom niviha ti wê mone levac ge, om la vông i susu mi tibii kisuu i ma, dì kô mone mi lax kisuu komkom tyo ya.

Yesu nêl kiyang pilepacên lec leac

⁴⁷ “Kiyang pilepacên ti bêga ên nêbê Anutu ben kehe tiyi xochê leac wê xomxo nêx la vac gwec ge dì pis toto la dô vac leac nilô, ⁴⁸ dì i pup lec, om he pul i lôm gwec ninja dì la dô kibun dì vinoo pis wê niviha ge di tung la vac dêg, dì pis wê nipaên ge he nêx la. ⁴⁹ Om tiyi xochê buc timuên wê kibun ob tiyôô vac ge, od angela ob vông yuac tibêge, ên he obêc val vô xomxo nipaên vêl vac xomxo niviha mahigun, ⁵⁰ dì nêx he la vac ngwax mahelac. Vac ngwax tige he obêc byag mabu di nivu obêc kic lecma.”

Kiyang pilepacên lec susu paha yuu tikwê

⁵¹ Yesu kinêg vô nue ngivihi ên nêbê, “Xam xovô kiyang pilepacên wê a nêl ge vihati kehe pyap, me?” Lêc he nêl ên nêbê, “Xe xovô.” ⁵² Om Yesu nêl vô he ên nêbê, “Om xomxo ti wê xovô xolac tikwê ge obêc ngô xolac paha wê a nêl lec Anutu ben kisiinê ge mi vông i vin ge od tiyi xochê

xomxo tyo la vac xumac lôma dì la kô susu paha yuu tikwê vac susu wê i vông ge nilô dì vông vô xomxo ên nêb i ngidu he xôn.”

*Xomxo Nasalet vô nimi vô Yesu
(Mak 6:1-6; Luk 4:16-30)*

⁵³ Yesu nêl kiyang pilepacén tigee pyap dêc sea vigwe tige, ⁵⁴ dì lax mi la Nasalet wê ben kehe ge, dì la nêl xolac vô he Nasalet vac he xumac lilo, lêc he yetac mabu lê, lêcom he o vông i vin xolac wê i nêl ge lêm, om he nêl vÔma ên nêbê, “Xomxo tiga kô xovÔen niviha hixôn do levac vô letya?”

⁵⁵ Xomxo tiga kamundac nu, dì ta Malia, dì lie Jems yuu Josep dì Saimon hixôn Judas, ⁵⁶ dì lie vêx ge, he vihati dô hixôn il. Xomxo tiga xomxo kibun, lêc kô xovÔen yuu xêkizêc ga gê na?” ⁵⁷ Om he vô nimi vô i. Om Yesu nêl vô he ên nêbê, “Vac vigwe viyang viyang ge, tibii ob kô plopete lec, dom plopete tyo tae mae lie hixôn xomxo vac ici va ben kehe ob kô i lec lêm.”

⁵⁸ Om Yesu o vông do tibeac vac ben kehe lêm, ên xomxo Nasalet o vông i vin i lêm.

14

*Jon Lipacén yib
(Mak 6:14-29; Luk 3:19-20; Luk 9:7-9)*

¹ Vô buc tige hizap levac Helot ngô kiyang wê xomxo mi nêl lec Yesu ge, ² om nêl vô nue yuac ên nêbê, “Xomxo tige Jon Lipacén wê yib ge, lêc kidi lec maviha om vông do levac ya xêkizêc wê i vông ge.”

³⁻⁴ Helot nêl bêge, ên ilage Helot kô li Pilip vinê Helodias, om Jon nêl vô Helot vô buc tibeac ên nêbê, “Môp wê ông ii lim tuc vinê ge tiyiên ma.” Mêgem Helodias kunac Jon dì nêl vô Helot, om Helot vông tibii la hôm Jon xôn dì tung i la vac xumac kalabuhu. ⁵ Di Helot nêb ob hi Jon i yib, lêc xona ên xomxo tibeac, ên he yê Jon tiyi xochê plopete ti.

⁶ Mêdec Helot buc wê ta kô i lec ge, om Helot myêl vizid levac dì tyuc xomxo tibeac lam. He lam dô dì Helodias nu vêx lam yoo vac he mahigun mi he yê dì Helot xêyaa vô niviha. ⁷ Mêd Helot titô vigê la kisii dì hilu kiyang vô vêx tige ên nêbê, “A nêl hixôn nôn bêga bê ông obêc kitaa susu ti vô a ge od a obêc vông vô ông.” ⁸ Mêd Helodias nêl kiyang xêkizêc vô nu vêx tige tax, om nu tyo nêl vô Helot ên nêbê, “A nêb ông kiku Jon Lipacén kwa i tip dì tung bazub lec dipac ti mi vông vô a.”

⁹ Nêl bêge, om Helot nilô vô viyin, lêc xo i lax lec kiyang wê hilu pyap dì xomxo tibeac dô mi ngô hixôn ge, om nêb ob vông i tiyi kiyang wê nêl vô vêx tige. ¹⁰ Om vông xomxo ti la vô Jon vac xumac kalabuhu mi la kiku Jon kwa tip, ¹¹ dì tung bazub lec dipac ti dì kô mi lax vông vô Helodias nu vêx tige dì i kô mi la vông vô ta. ¹² Mêd Jon nue ngîvîhi lam kô Jon nôn mi la yev, dì la nêl kitong vô Yesu.

*Yesu vet xomxo 5,000
(Mak 6:31-44; Luk 9:10-17; Jon 6:1-13)*

¹³ Yesu ngô wê Jon yib ge, om sea vigwe tige dì la lec dipac ti mi la vigwe mahigun pileva wê xomxo ti do vacén ma ge. Lêc xomxo tibeac ngô wê Yesu la ge, om sea ben dì la vô Yesu vixa. ¹⁴ Yesu mila lop vêl ên dipac dì yê ma la xomxo tibeac wê val dô kidu kidu ge, om xo vigwe pisiv ên he, dì vông he wê yidac gee vô niviha lec.

¹⁵ Hiyôv hoo la, mêtue nue ngivihi lam nêl vô Yesu ên nêbê, “Vigwe ga, vigwe mahigun pileva ti, dì hiyôv hoo la gwêba, om ông vông xomxo i loc vac vigwe nipwopwo vihati ên loc kisuu xen yaên wê he ob ya ge.” ¹⁶ Lêt Yesu nêl vô he ên nêbê, “He loc ên vatya? Xacxam va vông yaên mi he i ya.” ¹⁷ Om he nêl vô i ên nêbê, “Xe xom yaên o tibeac lêm. Nge, blet vigê vilu dì beac yuubed wê dô.” ¹⁸ Mêt Yesu nêl vô he ên nêbê, “Xam kô mi lam vô a.”

¹⁹ Yesu nêl om xomxo kidu levac tigeetô mi dô lec hisinac. Pyap dêc Yesu hôm blet vigê vilu ge dì beac yuubed ge dì yê ma la kisii di kitaa lec blet hixôn beac, mêt hibû blet dì vông vô nue ngivihi, dì he kô mi la titang vô xomxo tigeet. ²⁰ Mêt he vihati ya i den he pyap, mêtdec nue ngivihi la kituc myapip wê dô gee mi la su vac sepac vigê yuu dì tô mi la yuu mi i pup lec. ²¹ Di xomxo wê dô mi ya gee, he vux vaci tiyi xochê 5,000, lêt vêx yuu nipwopwo wê dô hixôn ge, he o kitong hixôn lêm.

Yesu la lec mia luaên kisii (Mak 6:45-52; Jon 6:16-21)

²² Yesu nêl vô nue ngivihi nêb he i lec dipac mi le mug mi loc vilunê. Om he loc mi la, dì Yesu dô ên nêb ob vông xomxo kidu levac tige he i loc vêl lê. ²³ He la vêl, mêtdec Yesu loc mi la lec kitôn ti ên nêb ob la kitaa. Mêt vigwe buc di Yesu vaci gên dô lec kitôn tige. ²⁴ Lêt dipac wê nue ngivihi dô lec ge mila le vac mia luaen mahigun dì lea levac hôm dipac xôn di vông i vô pilepac pilepac. ²⁵ Vigwe kêt pitoc vac vô kwabo lec wê ob vô xêseacseac ge, mêtdec Yesu la lec mia kisii dì mila vô nue ngivihi. ²⁶ He yê ma lam Yesu wê lam lec mia kisii mi val ge, om he xona mabu di nêl ên nêbê, “Ge vimwo nipaen ti.” Om he yetac dì iac. ²⁷ Lêt lutibed Yesu nêl ên nêbê, “Xam xêmyaa viyin i ma, ên ga a, om xam xonaen i ma.”

²⁸ Mêt Pita nêl vô i ên nêbê, “Apumtau, obêc ông ge od ông nêl ên a loc lec mia kisii mi loc vô ông.” ²⁹ Om Yesu nêl ên nêbê, “Lamê.” Om Pita lop vêl ên dipac dì la lec mia kisii mi la vô Yesu. ³⁰ Lêt yê

lea levac om xona, dì hoo la vac mia, om iac dì nêl ên nêbê, “Apumtau, hôm a lec.”

³¹ Om lutibed Yesu titô vigê dì hôm Pita xôn dì nêl vô i ên nêbê, “Vông vinê wê ông vông ge nipwo tya. Bêna lêt ông nilôm yuuê?” ³² Mêtdec yuu lec lax lec dipac, dì lea tip la. ³³ Dì he wê dô lec dipac gee yev vixa kitu vô Yesu dì nêl vô i ên nêbê, “Vixôhilôg nôn, Anutu nu ông.”

Yesu vông xomxo tibeac vô niviha lec gê Genesalet (Mak 6:53-56)

³⁴ Yesu he nue ngivihi la mia luaen vilu ganê mi la lop mi la vac vigwe Genesalet. ³⁵ Xomxo tigeet xvô ôn nêb Yesu, om he vông dic la vac vigwe nipwopwo vihati ên nêb he i kô xomxo yidac vihati mi lam. ³⁶ Dì he kitaa i ên nêb he ob hôm lec ngakwi wê i vông ge myahipu ên yidac i ma ên he, om he wê hôm vigê lec gee vihati vô niviha lec.

15

Anutu xolac nginoo xomxo nêñ kiyang vêl (Mak 7:1-13)

¹ He Palisi hixôn xomxo wê xvô Moses xolac gee lam gê Jelusalem di val vô Yesu dì nêl ên nêbê, ² “Bêna lêt ông nume ngivihi sea môp wê bugé

vông ge dì ya hixôn vigê ningeacê? Èn he obêc ya ge od he o lipac vigê lêm, lêc xe mô ge, xe mi timu vô buge vông môp dì lipac vigêm.”

³ Lêc Yesu nêl lax vô he ên nêbê, “Bêna lêc xam timu vô bume vông môp dì pwoo Anutu kiyang vacê? ⁴ Èn Anutu kiyang ngwe nêl bêga ên nêbê, ‘Xam hôm tame mame lê lec dì ngô he kiyang.’ Dì kiyang ngwe nêl bêga ên nêbê, ‘Xomxo ti obêc nêl kiyang nipaên lec ta yuu ma ge od xomxo i hi i yib.’ ⁵ Anutu kiyang nêl bêge, lêc xam mi nêl ên xam nêbê xomxo ti obêc nêl vô ta yuu ma ên nêbê, ‘Susu wê a ob ngidu muu xôn ya ge dô, lêcom a ob vông daa vô Anutu, om muu nêm ob ma.’ Xomxo obêc nêl bêge ge od xam nêbê ge tiyi dì xam o hôm tame mame lê lec lêm. ⁶ Lêc môp tige tiyi xocbê xam la vô bume vông môp dì kitya Anutu kiyang vêl. ⁷ Xam xomxo kityooën wê xam viyum nipaên vac niviha ge. Kiyang wê plopete Aisaia kivuu ilage nêl nôn lec xam bêga nêbê,

⁸ ‘Xomxo tigee pimil a ya mya pileva, lêc he nilô le teva ên a. ⁹ He mi nêl kiyang wê xomxo vaci xovô ge, lêc he nêl ên nêbê he nêl Anutu kiyang, om he yev vixa kitu vô a pisiv.’”

Susu wê ob vông xomxo vô nipaên ge (Mak 7:14-23)

¹⁰ Yesu keac xomxo kidu levac lam vô i dì nêl vô he ên nêbê, “Xam ngô kiyang wê a ob nêl ge dì xovô niviha. ¹¹ Susu wê ob la vac xomxo mya ge o tiyi wê ob vông xomxo vô nipaên ge lêm. Nge, susu wê lam vac xomxo mya ge wê ob vông he vô nipaên.”

¹² Yesu nue ngivihi val nêl vô i ên nêbê, “Ông ngô wê he Palisi xêyaa vô myavinê lec kiyang wê ông nêl ge, me?” ¹³ Om Yesu nêl vô he ên nêbê, “Susu vihati wê Mag lag puunê yevêne ma ge i obêc pul hixôn ngilôhô. ¹⁴ Om xam vông he Palisi i dô, ên he nêbê he ob didii xomxo la vac môp, lêc he manôñ toc. Dì xomxo ma tocêñ ngwe obêc didii xomxo ma tocêñ ngwe ge od yuu xôn ob la tê vac madia.”

¹⁵ Pita nêl vô i ên nêbê, “Ông nêl kiyang pilepacêñ tige kehe kitong vô xe ên xe ngô.” ¹⁶ Om Yesu nêl vô he ên nêbê, “Xam êno gên lungêñ kiyang tige, me? ¹⁷ Susu vihati wê xomxo ob tung vac mya dì ya ge ob la dô vac xêyaa, dì lop mi la vêl. Lêc mêd xam lungêñ tige, me? ¹⁸ Lêc susu vihati wê yêp vac xomxo nilô dì lôm tyip vac mya ge wê vông xomxo vô nipaên. ¹⁹ Èn susu wê lam vac xomxo nilô ge bêga nêbê, xovôêñ nipaên, hi xomxo yib, vông môp iiamaen vô nipaên, môp yôdac vêx yuu vux, vun xomxo susu, nêl kiyang kityooën, dì nêl kiyang nipaên lec xomxo. ²⁰ Môp nipaên tigee wê vông xomxo vô nipaên. Lêc xomxo ti obêc sea bue vông môp dì ya ya vigê ningeac ge od ob vông i vô nipaên lêm.”

Kenan vêx ti vông i vin Yesu (Mak 7:24-30)

²¹ Yesu sea vigwe tige mi la vigwe levac wê vigwe Taia yuu Saidon yêp vac ge. ²² Dì Kenan vêx ti wê dô vac vigwe tige lam vô Yesu dì keac levac ên nêbê, “O Apumtau, Devit nu ông, ông xo vigwe pisiv ên a, ên vimwo nipaên ti dô vac a nug vêx nilô dì vông i dô vac viyin mabu.” ²³ Yesu ngô lêc o nêl kiyang ti lax vô i lêm. Lêc nue ngivihi val kitaa i ên nêbê, “Vêx tyo vô byag byag dì mi timu vô il vixad ga, om ông nêl ên i lôc.”

²⁴ Om Yesu nêl vô vêx tyo ên nêbê, “Anutu vông a lam vô Islele vaci wê tiyi xocbê bwoc sipsip wê lung sea ge.” ²⁵ Lêc vêx tige lam yev vixa kitu vô

i di nêl ên nêbê, “Apumtau, ngidu a xôn.” ²⁶ Lêc Yesu nêl vô i ên nêbê, “Ga o tiyi wê il ob vô nipwo xen yaên vêl ên he di nêx i loc vô noo ge lêm.”*

²⁷ Om vêx tyo nêl ên nêbê, “Apumtau, ông nêl kiyang nôn. Lêcom noo mi ya myapipu wê xomxo vông i tò mi la vac pêt ngibi ge.” ²⁸ Om Yesu nêl vô i ên nêbê, “O vêx, ông vông i vin xékizêc ta, om kiyang wê ông kitaa vô a ge ob vô nôn lec vô ông.” Yesu nêl bêge, di vô hiyôv manôn tibed tige vêx tyo nu vô niviha lec.

Yesu vông xomxo yidac tibeac vô niviha lec

²⁹ Mêdec Yesu sea vigwe tige di la vô mia luaên Galili ninya, di la lec kitôn di la dô kibun. ³⁰ Mêdec xomxo kidu kidu val vô i, di he kô lie vixa nipaên, di manôn tocên, di vixa gecên, di kwa maên hixôn yidac toto ge mi lam lii he vô Yesu vixa, om Yesu vông he vihati vô niviha lec. ³¹ Mêgem xomxo kidu levac tige yê di yetac mabu ên wê xomxo kwa maên keac di xomxo vixa gecên ge vixa vô bôbac lec, di he wê vixa nipaên ge vô niviha lec di la, di wê manôn tocên ge manôn seac di he yê vigwe. Om he hi vixa pec ên Islel vông Anutu.

Yesu vet xomxo 4,000 (Mak 8:1-10)

³² Yesu keac ên nêb nue ngivihi lam vô i di nêl vô he ên nêbê, “A xo vigwe pisiv ên xomxo kidu levac tigae ên he lam dô hixôn a tiyi buc yon di he xen yaên ma. Di a xêgyaa o vin lec wê a ob vông he loc vip ge lêm, ên vip ob vông he vigê yuu vixa ma gê môp.” ³³ Om nue ngivihi nêl vô i ên nêbê, “Vigwe ga vigwe mahigun pileva wê xomxo ti dô vacên ma ge, om il obêc kô yaên tibeac gê na ên vet xomxo tigae ya?” ³⁴ Lêc Yesu luu he vya ên nêbê, “Xam blet vaba dô?” Di he nêl ên nêbê, “Xe blet vigê vilu di sec yuu hixôn beac nipwo yuutya dô.”

³⁵ Om Yesu nêl vô xomxo kidu levac tigee ên nêbê, “Xam tô mi dô lec kibun.” ³⁶ Mêd hôm blet vigê vilu di sec yuu hixôn beac gee di kitaa lec, mêd hibu di vông vô nue ngivihi, di nue ngivihi titang vô xomxo tigee vihati. ³⁷ Om he vihati ya i den he, di myapipu wê dô ge he su vac sepac vigê vilu di sec yuu mi i pup lec. ³⁸ Xomxo wê dô mi ya gee, he vux vaci tiyi xocbê 4,000, lêc vêx hixôn nue gee he o kitong hixôn lêm. ³⁹ Pyap dêc Yesu vông xomxo kidu kidu lax vac ben ben, di i va la lec dipac mi la vigwe Magadan.

16

Palisi yuu Sadyusi nêb ob yê do levac (Mak 8:11-13; Luk 12:54-56)

¹ He Palisi yuu Sadyusi val vô Yesu ên nêb ob yaxê i, om nêl vô Yesu ên nêb i vông do lag puunê ti ên he ob yê. ² Lêc Yesu nêl vô he ên nêbê, “Hiyôv hoo la di vigwe buc di guva tum lec lag ge wê xam nêbê hiyôv ob linac. ³ Vigwe obêc vidii lêc maviyob ge od xam nêbê lun ob val. Xam wê susu lec lag di xovô niviha, lêc xam o tiyi wê xam ob wê do levac wê nêl buc gwêbaga kitong mi xovô kehe ge lêm. ⁴ Xam gwêbaga, xam ge xomxo nipaên wê xam o vông i vin lêm ge, om xam nêb xam ob wê do

* ^{15:26:} Kiyang wê Yesu nêl lec nipwo yuu noo ge, ge kiyang pilepacên wê nêl lec he Yuda hixôn tibii ba. ên he Yuda yê tibii wê o Yuda lêm ge nipaên, nêb he tiyi xocbê noo. Om nipwo tige tixuu lec he Yuda, di noo tixuu lec tibii ba wê o Yuda lêm ge.

levac ti. Lêc a ob vông do levac ti mì xam wê lêm. Ên do levac tibed wê a ob hilung vô xam ge wê Jona vông ilage.” Yesu nêl bêge, pyap dêc sea he dì la.

*Kiyang pilepacén lec yis wê he Palisi yuu Sadyusi vông ge
(Mak 8:14-21)*

⁵ Yesu he nue ngivihi la mia luaën vilu ganê, lêc he o xovô mì kô blet ya hixôn lêm. ⁶ Mêd Yesu nêl vô he ên nêbê, “Xam xona nêm ên yis wê he Palisi yuu Sadyusi vông ge.” ⁷ Om nue ngivihi nêl vòma ên nêbê, “Yesu nêl kiyang tibêge ên wê il o kô blet ti lêm ge.” ⁸ Lêc Yesu xovô kiyang wê he nêl vòma ge, om nêl vô he ên nêbê, “Xam nêm vông vinên ge nipwo tya. Bêna lêc xam nêl vòma ên xam nêbê xam xom blet ma? ⁹ Xam gên o xovô lêm, me? Xam mêt lungêñ blet vigê vilu wê xomxo 5,000 ya ge, me? Xam su myapipu vac sepac vaba mì i pupê? ¹⁰ Di xam mêt lungêñ blet vigê vilu dì sec yuu wê xomxo 4,000 ya ge, me? Xam su myapipu vac sepac vaba mì i pupê? ¹¹ Bêna lêc xam lungêñ? A o nêl kiyang lec blet lêm. Nge, a nêb xam xona nêm ên blet wê he Palisi yuu Sadyusi vông ge.” ¹² Yesu nêl bêge, om he xovô ên nêbê Yesu o nêb he i viac he niviha ên blet wê xomxo ob ya ge lêm. Nge, nêb he i viac he niviha ên kiyang wê he Palisi yuu Sadyusi vông ge.

*Pita nêl Yesu kehe kitong
(Mak 8:27-30; Luk 9:18-21)*

¹³ Yesu la vigwe ti lê nêbê Sisalia Pilipai di kinêg vô nue ngivihi en nêbê, “Tibii nêl Xomxo Nu a nêb letya?” ¹⁴ Om he nêl vô i ên nêbê, “Xomxo ya nêl ên nêb ông ge Jon Lipacén, dì ya nêl ên nêb ông plopete Ilaija, dì ya nêl ên nêb ông ge plopete Jelemaia me plopete ba ti.” ¹⁵ Mêd Yesu kinêg vô he ên nêbê, “Di xacxam va nêl a ên xam nêb a letya?” ¹⁶ Om Saimon Pita nêl lax vô i ên nêbê, “Ông Kílisi, Anutu mavîha nu ông.”

¹⁷ Om Yesu nêl vô Pita ên nêbê, “Jona nu Saimon, ông xêmyaa i vô niviha, ên xomxo kibun ga ti o nêl kiyang tige kehe kitong vô ông lêm. Nge, a Mag wê dô lag puunê ge wê nêl kitong vô ông. ¹⁸ Om a nêl vô ông bê ông lêm Pita, kehe nêbê ngidax. Om a ob lax xomxo vông vinên i loc lec ngidax kisii. Dì xêkizêc wê Seten vông ge o tiyi wê ob pwoo he pec ge lêm. ¹⁹ A ob vông ki Anutu ben lag puunê vô ông. Dì kiyang yuu môp wê ông obêc kitya vêl gê kibun ga ge od Anutu êno ob kitya vêl gê kisii ganê. Lêc kiyang yuu môp wê ông obêc hôm xôn mì i yêp gê kibun ga ge od Anutu êno ob hôm xôn mì i yêp gê kisii ganê.” ²⁰ Om Yesu le vac nue ngivihi xôn nêb he i o nêl vô xomxo bê i Kílisi lêm.

*Yesu nêl ên nêbê ob yib di kidi lec
(Mak 8:31-9:1; Luk 9:22-27)*

²¹ Vô buc tige Yesu nêl i kiyang taxlee vô nue ngivihi ên nêbê ob la Jelusalem, dì Yuda levac hixôn xomxo levac wê mi si daa gee dì he wê xovô Moses xolac gee he ob vông myavinê levac vô i dì hi i yib, dì buc yon ob lam la vêl dì i ob kidi lec mavîha tii vac nang.

²² Om Pita kô Yesu mi yuu la dô viyonê, dì nêl xêkizêc vô Yesu ên nêbê, “Apumtau, Anutu i le vac kiyang tige xôn. Ên viyin tibêge i o lêc tulec ông lêm.” ²³ Lêc Yesu pilepac i dì vô nîmi vô Pita, dì nêl vô Pita ên nêbê, “Seten, ông loc vêl! Ên ông le vac a xôn. Ông o nêl i tiyi Anutu piyôp lêm. Nge, ông nêl i tiyi piyôp wê xomxo kibun ga vông ge.”

²⁴ Mêdêc Yesu nêl vô nue ngivihi ên nêbê, “Xomxo ti obêc nêb timu vô a vixag ge od i vông i vô nipwo lec dì kilê xax pola wê i vông ge dì timu vô a vixag. ²⁵ Èn xomxo ti obêc viac ninivi ên nêb i dô maviha ge od obêc yib. Lêc xomxo ti obêc sea ninivi lec a lêg ge od ob dô maviha luta. ²⁶ Èn xomxo ti obêc vilu vô susu kibun ga vihati tu i xe, lêc sea môp wê ob dô maviha ya ge od ob vô niviha vô i bêna? Xomxo ob vông vatya êdêc i kinu i dô maviha ya? ²⁷ Èn a, Xomxo Nu, a obêc lop mi lôc hixôn a nuge angela dì lam hixôn xêseac wê Mag vông ge, dì a ob vông myaviwen vô xomxo toto i tiyi nipaên yuu niviha wê he vông ge. ²⁸ Lêc a nêl nôn vô xam bê xomxo wê le ga, he ya yibê obêc ma dì obêc yê wê Xomxo Nu ob lam tu king ge lê, dêc yib timuên.”

17

Yesu ninivi pikwê bangwe (Mak 9:2-13; Luk 9:28-36)

¹ Buc vigê vilu dì sec ti lam la vêl, mêd Yesu kô Pita dì Jems yuu li Jon dì he la lec kitôn dia ti, mi heche va la dô. ² Om yon yê wê Yesu ninivi pikwê mi vông bangwe, dì manôn linac xocbê hiyôv, dì ngakwi xêseac dì vô hixelac hixelac. ³ Mêdec yon yê wê Moses yuu Ilaija val keac hixôn Yesu ge. ⁴ Om Pita nêl vô Yesu ên nêbê, “Apumtau, ga niviha wê il dô ga, om ông obêc tyuc lec ge od a ob lox xumac yon, tî vô ông, dì ngwe vô Moses dì ti vô Ilaija.”

⁵ Pita gên nêl kiyang tibêge, mêdêc viyobtoc wê xêseac ge ti lam hivun he xôn, dì vya ti lam vac viyobtoc tige nilô dì nêl ên nêbê, “Ge a nug wê a xêgyaa vin lec i dì a xê i niviha ge om xam ngô kiyang wê i vông ge.”

⁶ Nue ngivihi yon ge ngô vya tige mêdêc yon yev vixa kitu dì kipôm manôn lec kibun, dì yon xona mabu. ⁷ Lêc Yesu lam vyax vigê lec yon dì nêl ên nêbê, “Kidi lec, dì xonaên i ma.” ⁸ Om yon vêl manôn lec kisii, dì yê Yesu vaci le dì yuu xôa ma.

⁹ He gên lop lec kitôn tige dì Yesu nêl xêkizêc vô yon ên nêbê, “Mon o lêc nêl kiyang wê mon wê dì ngô ge kitong vô xomxo ti lêm. Nge, i lêc loc tyip lec wê a, Xomxo Nu, a obêc kidi vac yibê ge lê.” ¹⁰ Mêd yon kinêg vô i ên nêbê, “Bêna lêc xomxo wê xovô Moses xolac gee nêl ên nêbê Ilaija obêc val tax dì Kilisi wê Anutu vinoo i ge obêc val timuên?” ¹¹ Mêdec Yesu nêl ên nêbê, “Vixôhilôg, Ilaija ob vena ên titô môp vihati i yêp niviha i tii vac. ¹² Lêc a nêl vô mon bê Ilaija lam pyap, lêc xomxo lungêi i, di he vông nipaên vô i tiyi xovôên wê he vông ge. Om a, Xomxo Nu, a êno obêc tulec myavinê tiyi bêge.” ¹³ Yesu nêl bêge, om nue ngivihi xovô ên nêbê kiyang wê Yesu nêl lec Ilaija ge, nêl lec Jon Lipacén.

Yesu tiyi vimwo nipaên vêl ên xomxo nipwo ti (Mak 9:14-29; Luk 9:37-42)

¹⁴ Mêdec he lop kitôn tige mi la vô xomxo kidu levac ti, lêc xomxo ti val yev vixa kitu vô Yesu dì nêl vô i ên nêbê, ¹⁵ “Xomxo levac, ông xo vigwe pisiv ên a nug vux, ên vông yidac mavên mi dô vac viyin mabu, ên mi vixog mi la vac ngwax dì la vac mia tiyi buc tibeac. ¹⁶ Om a kô mi lam vô nume ngivihi ên a nêb he i vông i vô niviha lec lê, lêc he tiyiên ma.”

¹⁷ Om Yesu nêl ên nêbê, “Xam gwêbaga, xam ge xomxo nipaên wê xam o vông i vin lêm ge. Om a ob dô hixôn xam dì i miloc vô buc tina lê? Dì a

ob kilê viyin wê xam vông ge dì i miloc tina lê? Loc kô nipwo tige mi lam vô a.” ¹⁸ Om ma la kô nu tyo mi lam vô Yesu, dì Yesu píping vimwo nipaên la vêl ên nu dì i vô niviha lec lutibed.

¹⁹ Om timuên ge, Yesu nue ngivihi vaci la kinêg vô i ên nêbê, “Bêna lêc xe mô o tiyi wê xe ob tii vimwo nipaên tige vêl lêmê?” ²⁰ Om Yesu nêl vô he ên nêbê, “Xam tiyiên ma ên vông vinêñ wê xam vông ge tiyiên ma. A nêl vixôhilôg nôn bê xam nêm vông vinêñ obêc nipwo tya tiyi xochê vixôô nôn ge od xam ob nêl vô kitôn tiga bê, ‘Ông pul mi loc le ganê,’ dì kitôn tiga obêc pul i mi la. Xam obêc vông i vin ge od xam obêc tiyi wê xam ob vông yuac vihati. ²¹ [Môp kitaaén yuu ngibua yaén ge tiyi wê ob tii vimwo nipaên tibêge vêl ên xomxo, dì môp ngwe o tiyi lêm.]”

Yesu nêl kiyang vông yuu lec wê obêc yib ge (Mak 9:30-32; Luk 9:43-45)

²² Yesu he nue ngivihi mila vigwe Galili, dì Yesu nêl vô he ên nêbê, “Xomxo ob vông a, Xomxo Nu, la vac tibii vigê, ²³ dì he ob hi a xib, lêc buc yon obêc lam la vêl ge od a obêc kidi lec magviha tii vac nang.” Yesu nêl bêge om nue ngivihi nilô vô viyin mabu.

Yesu vông mone takis xumac ngibua

²⁴ He val vigwe Kapaneam, mêt xomxo wê mi kô mone takis xumac ngibua ge* lam vô Pita dì kinêg vô i ên nêbê, “Xam nêm xolac kehe mi vông mone takis xumac ngibua ge hixôn, me?” ²⁵ Om Pita lee yuu ên nêbê, “Xe nêm xolac kehe mi vông.” Pyap dêc Pita lax mi la ben mi la vac xumac lôma, dì lutibed Yesu nêl vô i ên nêbê, “Saimon, ông nêbê va? Xomxo levac kibun ga, he mi kô mone takis vô letyaet? He mi kô vô he nue, me he mi kô vô tibii ba?” ²⁶ Mêt Pita nêl ên nêbê, “He mi kô mone takis vô tibii ba.” Om Yesu nêl ên nêbê, “Om heche va nue ge ob dô nêñ dì ob tung mone takis lêm. ²⁷ Dì a ga, Anutu nu a, om yuac ti o yêp vô a wê a ob vông mone takis ên Anutu xumac ngibua ge lêm. Lêc ge o niviha wê il ob vông he wê mi kô mone takis xumac ngibua ge kunac il ge lêm. Om ông loc gwec dì loc pul pis ya huk. Dì pis taxlee wê ông ob pul ge, ông sux mya dì ông ob tulec mone wê dô vac mya ge, dì kô mi loc vông vô he wê mi kô mone xumac ngibua ge dì loc tung u nêd.”

18

Letya obêc tu levac vac Anutu ben? (Mak 9:33-37,42-48; Luk 9:46-48; Luk 17:1-2)

¹ Vô buc tige Yesu nue ngivihi val nêl vô i ên nêbê, “Letya ob tu levac vac Anutu ben kisiinê luu he ba vêlê?”

² Om Yesu keac nipwo ti lam vô he dì lax i la le vac he mahigun, ³ dì nêl vô nue ngivihi ên nêbê, “A ob nêl vixôhilôg nôn vô xam bê xam obêc pilepac xam mi vô nipwo lec tiyi xochê xomxo nipwo tiga lêm ge od xam ob la dô vac Anutu ben lag puunê lêm. ⁴ Lêc xomxo ti obêc pilepac i mi vô nipwo lec tiyi xochê nipwo tiga ge od ge wê ob tu levac vac Anutu ben lag puunê luu he ba vêl.

* **17:24:** Xomxo Yuda mi vông mone takis vô xomxo wê viac Anutu xumac ngibua ge tiyi klismas vihati, tiyi xochê il mi vông mone baset gwêbaga ge. Mone takis tige he kituc ên nêb i viac Anutu xumac ngibua.

⁵ “Xomxo ti obêc kô nipwo tibêga lec ên wê vông i vin a lêg ge od tiyi xochê kô a lec êno. ⁶ Lêc xomxo ti obêc didii nipwo tigae wê vông i vin a ge ti mi la vac nipaên ge od ge tiyi wê tibii ob nux ngidax levac lec i kwa di nêx i la vac gwec madia wê vô mapitoc ta ge.

⁷ “Xomxo kibun ga wê didii xomxo mi la vac nipaên ge, myaviwen nipaên ob tulec he vihati. Vixôhilôg, nipaên viyang viyang ge ob yaxê il, lêc xomxo ngwe obêc didii xomxo ngwe mi la vac nipaên ge od i xona nê, ên obêc tulec myaviwen nipaên.

⁸ “Di ông vigêm vilu me vixam vilu obêc didii ông mi la vac nipaên ge od ông kitov mi nêx i loc vêl, di ông dô ya vigêm vilubed me vixam vilubed, êdêc loc dô mamviha vac Anutu ben. Ên ông vigêm yuu xôn me vixam yuu xôn obêc dô, lêc didii ông mi la vac nipaên ge od Anutu obêc nêx ông la vac ngwax wê ditum luta di yibê ma ge. ⁹ Di mammôn vilu obêc didii ông mi la vac nipaên ge od ông pisupac vêl mi nêx i loc, di ông dô ya mammôn vilubed, êdêc loc dô mamviha vac Anutu ben. Ên mammôn yuu xôn obêc dô, lêc didii ông mi la vac nipaên ge od Anutu obêc nêx ông la vac ngwax vac vigwe nipaên.

*Kiyang pilepacêñ lec bwoc sipsip
(Luk 15:3-7)*

¹⁰ “Xam viac xam di le i lêc yê nume nipwo tigae i tiyi xochê susu pileva ge lêm, ên a nêl vô xam bê vac vigwe lag puunê he nêng angela mi le vô Mag Anutu lag puunê manôn tiyi buc vihati. ¹¹ [A, Xomxo Nu, a lam ên a nêb a ob myag he wê xôa ma ge mi kô mi lôm.]

¹² “Xam xo ên xam nêbê va? Xomxo ti obêc viac bwoc sipsip 100 lêc ti xôa obêc ma ge od xomxo tige ob vô va? Obêc sea sipsip 99 gee he ob le lec kitôn, di ob la myag ti wê xôa ma ge. ¹³ Di obêc la yêvô ge od a nêl nôn bê xomxo tyo ob pimil sipsip tige luu 99 wê le ge vêl. ¹⁴ Mêgem Mag Anutu wê dô lag puunê ge nêb nue nipwo tigae ti xôa ob ma lêm.

Yesu nêl kiyang lec lim ti wê vông nipaên ge

¹⁵ “Ông lim ti obêc vông nipaên ti vô ông ge od ôcông va loc vô i di muu dô di ông nêl i nêng nipaên kitong vô i. Di obêc ngô ông kiyang ge od tiyi xochê ông kô i mi lôm vac xam mahigun. ¹⁶ Lêc ngôen ông kiyang obêc ma ge od ông kô xomxo yuu me yon di xam loc vô lim tige ên he i ngiduma xôn di yaxê kiyang wê muu ob nêl ge. ¹⁷ Lêc lim tige ngôen xam obêc ma ge od xam loc nêl i nêng nipaên kitong vô konglegesen. Léc ngôen konglegesen kiyang obêc ma ge od xam wê i tiyi xochê tibii madiluhu me tibii nipaên ge.

¹⁸ “A nêl vixôhilôg nôn vô xam bê kiyang yuu môp wê xam obêc kitya vêl gê kibun ga ge od Anutu êno ob kitya vêl gê kisii ganê. Di kiyang yuu môp wê xam obêc hôm xôn mi i yêp gê kibun ga ge od Anutu êno ob hôm xôn mi i yêp gê kisii ganê.

¹⁹ “A ob nêl ti hixôn vô xam bê xomxo yuu gê kibun ga, yuu nilô obêc yêp tibed ên susu ti wê yuu nêb yuu ob kitaa vô Anutu ge od a Mag wê dô lag puunê ge ob vông i vô nôn lec vô yuu. ²⁰ Ên xomxo yuu me yon obêc kitucma lec a lêg ge od a obêc dô vac he mahigun.”

Kiyang pilepacêñ lec xomxo yuac wê o kitya myaviwen vêl lêm ge

²¹ Mêdêc Pita val vô Yesu di kinêg vô i ên nêbê, “Apumtau, lige ti obêc vông nipaên vô a ge od a ob kitya i nêng nipaên vêl i tiyi buc vaba? Buc vigê vilu di sec yuu obêc tiyi, me?”

²² Lêc Yesu nêl vô i ên nêbê, “Maê. A nêl vô ông bê buc vigê vilu di sec yuu ge o tiyi lêm. Nge, ông kitya i nêng nipaên vêl i tiyi buc vihati.

²³ “Om Anutu ben kehe tiyi xocbê xomxo levac ti wê nêb ob kô mone vac i mone wê vông vô nue yuac ge. ²⁴ Mêgem taxlee ge he kô nu yuac ti mi la le vô xomxo levac tige manôn. Nu yuac tige kô mone 10 milion vô xomxo levac tyo ilage, ²⁵ lêc o tiyi wê ob vông mone vac ge lêm. Om xomxo levac tige nêl ên nêbê he i vông nu yuac tyo hixôn vinê nue di he susu vihati ên tibii i kisuu di he i vông mone tige vihati vac. ²⁶ Lêc nu yuac tige yev vixa kitu vô xomxo levac tyo di kitaa i ên nêbê, ‘Xomxo levac, ông hôm a nêng kiyang xôn mi i yêp lê di vông buc ya vô a ên a obêc vông mone vihati vac ông mone.’ ²⁷ Om xomxo levac tige xo vigwe pisiv ên nu yuac tyo om piwelac i vêl di hi kiyang tyo yib di vông i la.

²⁸ “Nang dêc nu yuac tyo lop mi la di la tulec lie ti wê vông yuac hixôn i ge. Ilage li tige kô mone 100 vô i. Om nu yuac tyo hôm i xôn lec kwa di nêl vô i ên nêbê, ‘Ông vông mone vac a mone vihati.’ ²⁹ Om li tige yev vixa kitu vô i di kitaa i ên nêbê, ‘Ông hôm a nêng kiyang xôn mi i yêp lê di vông buc ya vô a ên a obêc vông mone vihati vac ông mone.’ ³⁰ Lêc xomxo tyo ngôen ma, di tung li tige la dô vac kalabuhu ên nêb i loc dô mi i loc tyip lec buc wê ob vông mone vihati vac i xe ge.

³¹ “Mêd xomxo ya wê vông yuac hixôn i ge yê, om he nilô vô nipaên, di he la vô xomxo levac tige di nêl kiyang vihati kitong vô i. ³² Mêd xomxo levac tige tyuc nu yuac tyo lôm vô i, di nêl vô i ên nêbê, ‘Ông xomxo yuac nipaên. Ông kitaa a, om a kitya ông nêng myaviwen vihati vêl, ³³ di a xo vigwe pisiv ên ông, lêc bêna lêc ông o xo vigwe pisiv ên lim tige lêmê?’ ³⁴ Mêd xomxo levac xéyaa vô myavinê om vông nu yuac tyo la vac tibii wê viac xumac kalabuhu ge vigê ên nêb he i vông myavinê vô i di i loc tyip vô buc wê ob vông mone vihati vac i xe ge.” ³⁵ Yesu nêl kiyang pilepacén tige pyap di nêl hixôn ên nêbê, “Xam obêc kitya lime nêng nipaên vêl hixôn nilôm yadiluhu lêm ge od Mag kisiinê ob vông vô xam vihati tiyi xocbê xomxo levac vông vô nu yuac tige.”

19

*Môp wê vông môp iimaên vô nipaên ge
(Mak 10:1-12; Luk 16:18)*

¹ Yesu nêl kiyang tigeet pyap di sea vigwe Galili di la vac vigwe levac Judia wê yêp mia Jodan sox laên. ² Di xomxo kidu levac la vô i vixa, om Yesu vông he wê yidac ge vô niviha lec vac vigwe tige.

³ Dêc he Palisi lam vô Yesu ên nêb ob yaxên i, om kinêg vô i ên nêbê, “Xomxo ti obêc sea vinê ên yucyuu va kiyang nipwo tya wê yêp vac yuu mahigun ge od obêc tiyi, me?”

⁴ Om Yesu nêl lax vô he ên nêbê, “Xam mêd o kitong kiyang wê yêp vac xolac ge lêmê? Kiyang tige nêl bêga ên nêbê vô buc taxlee ilage Anutu wê tung susu vihati gee tung xomxo vêx yuu xôn vux, ⁵ di nêl ên nêbê, ‘Môp yêp bêga, vux ob sea ta yuu ma di la dô hixôn vinê di yuu tu nôn tibed.’

⁶ Anutu nêl bêga om yuu ob dô tiyi xocbê xomxo yuu ge lêm. Nge, yuu

ob tu nôn tibed. Mêgem môp wê Anutu vông xomxo yuu tu nôn tibed ge, xomxo ti i o lêc tax i tip lêm.”

⁷ Mêd he Palisi nêl vô i ên nêbê, “Om bêna lêc Moses nêl ên nêbê xomxo ti obêc nêb ob sea vinê ge od i kivuu kipihac wê nêbê yuu ob seama ge di vông vô vinê lê, lêc yuu i sea ma?”

⁸ Mêlêc Yesu nêl vô he ên nêbê, “Xam nilôm xêkizêc ta, om Moses lee yuu ên nêbê tiyi wê xam ob sea vinême ge. Lêc mugên ilage môp tibêge o yêp lêm.” ⁹ Om a nêl vô xam bê vux ti vinê obêc vông môp yôdac vô vux ngwe lêm, lêc liya sea vinê di la ii vêx paha ngwe ge od vux tige vông môp yôdac.”

¹⁰ Om Yesu nue ngivihi nêl vô i ên nêbê, “Om môp wê Anutu vông vô vux yuu vinê obêc yêp bêge ge od ge niviha wê vux ob ob dô gilon di o ii vêx lêm.”

¹¹ Lêc Yesu nêl vô he ên nêbê, “Xomxo vihati o tiyi wê ob la vô kiyang tibêge lêm. Nge, xomxo titi wê Anutu vông xêkizêc vô he ge wê he ob vông bêge di ob ii vêx lêm.” ¹² Ên xomxo viyang viyang ge, titi o tiyi wê ob ii vêx ge lêm. Ên he ya, tae kô he tiyiên ma om he o tiyi wê he ob ii vêx ge lêm. Di he ya, tibii vêl he om he o tiyi wê he ob kô vêx ge lêm. Di he ya, he vông he nilô la vô Anutu xolac yuu ben, om he ngibua he ên nêb he ob ii vêx lêm. Om xomxo ti tiyi wê obêc ngô kiyang tige ge od i ngô.”

Yesu kitaa lec nue nipwopwo (Mak 10:13-16; Luk 18:15-17)

¹³ Mêd xomxo kô nue nipwopwo mi lam vô Yesu ên nêb i vyax vigê lec he di kitaa lec he, lêc nue ngivihi piping he nêb he loc vôen Yesu i ma, ¹⁴ lêc Yesu nêl vô he ên nêbê, “Vông nipwopwo i lam vô a di le vac xônên i ma, ên xomxo tibêgee tu vigwe lag puunê kehe.” ¹⁵ Om Yesu vyax vigê lec he, pyap di loc mi la vigwe ngwe.

Xomxo ngivihi ti wê susu tibeac (Mak 10:17-31; Luk 18:18-30)

¹⁶ Xomxo ngivihi ti val vô Yesu di kinêg vô i ên nêbê, “Xolac kehe, a obêc vông môp niviha tina êdêc dô magviha luta lêc luta?” ¹⁷ Mêd Yesu nêl vô i ên nêbê, “Bêna lêc ông kinêg a lec môp wê niviha ge? Anutu tibed ge wê niviha, om ông obêc nêb la dô mamviha ge od ông viac xolac vihati.” ¹⁸ Om xomxo ngivihi tige nêl vô i ên nêbê, “Xolac tina?” Om Yesu nêl ên nêbê, “Xolac wê nêl ên nêbê le i lêc hi xomxo i yib lêm. Le i lêc vông môp yôdac vêx yuu vux lêm. Le i lêc vun xomxo ngwe susu lêm. Le i lêc nêl kiyang kityooên lec xomxo ngwe lêm.” ¹⁹ Loc vac tam yuu mam kwa ngibi. Di xêmyaa i vin lec xomxo vihati i tiyi xocbê ông xêmyaa vin lec ôcông va ge.”

²⁰ Mêd xomxo ngivihi tyo nêl vô i ên nêbê, “A viac xolac vihati gee pyap. Om môp tina gên yêp wê a ob vông hixôn ge?” ²¹ Lêc Yesu nêl vô i ên nêbê, “Ông obêc nêb ông ob tu xomxo wê niviha lee ge od ông lôc vông ông susu vihati mi tibii i kisuu di vông mone vô xomxo wê nêb susu maên ge êdêc kô nôn niviha gê lag puunê. Om ông lôc vông bêge di lôm timu vô a vixag.” ²² Xomxo ngivihi tyo ngô kiyang tige di nilô vô viyin mabu ên i susu tibeac, om sea Yesu di la.

²³ Mêd Yesu nêl vô nue ngivihi ên nêbê, “A nêl vixôhilôg vô xam bê xomxo wê susu tibeac ge obêc nêb la vac Anutu ben ge od obêc vông yuac levac vô he.” ²⁴ A ob nêl kiyang ti vô xam i tii vac hixôn bê bwoc kamel

ti obêc nêb la vac yin kitu tocêng ge od obêc yuac levac, mêlêc xomxo wê susu tibeac ge obêc nêb la vac Anutu ben ge od obêc tu yuac levac vô i luv vêl.”

²⁵ Yesu nue ngivihi ngô kiyang tige dì yetac mabu yocêng di kinêg i ên nêbê, “Obêc tibêge ge od letya tiyi wê obêc la dô maviha vac Anutu ben ge?” ²⁶ Léc Yesu manôn la vô he dì i nêl vô he ên nêbê, “Xomxo mô o tiyi lêm, dì Anutu möci tiyi wê ob vông môp vihati.” ²⁷ Mêd Pita nêl vô i ên nêbê, “Wê lê. Xe ga, xe sea susu wê xe vông ge vihati dô dì lam timu vô ông vixam. Om xe obêc kô nôn vatya vô buc timuêne?”

²⁸ Mêd Yesu nêl vô he ên nêbê, “A nêl vixôhilôg nôn vô xam bê vô buc timuêng wê susu vihati obêc vô paha lec ge od a, Xomxo Nu, a ob kô lêg levac mi dô lec sia king. Dì xam wê xam timu vô a vixag gee, xam êno obêc dô lec sia king vigê yuu dì tô mi la yuu, dì yaxêng lime Islel wê xam hipu vigê yuu dì tô mi la yuu ge nêng kiyang. ²⁹ Dì xomxo vihati wê sea ben hixôn tae mae lie dì nue dì sea yuac yaêng wê he vông ge hixôn ên nêb ob vông a lêg i vô levac ge od Anutu ob vông nôn nivîha 100 100 hiwoêng vô he dì ob vông he dô maviha luta lêc luta. ³⁰ Léc xomxo mugêng tibeac obêc lax timu, dì xomxo timuêng obêc lam la mug.”

20

Kiyang pilepacêng lec xomxo yuac

¹ Yesu nêl ên nêbê, “Anutu ben kehe tiyi xochê xomxo levac ti wê tu yuac wain kehe ge. Om pitoc yang ge la ên nêb ob la myag xomxo wê ob la vông yuac wain wê i vông ge. ² Mêdêc la tulec he dì nêl vô he ên nêbê obêc vông mone kehe titi vô he tiyi buc titi. Om he lee yuu dì i vông he la vac yuac. ³ Hiyôv tyip lam 9 klok vidiiêng, lêc xomxo tyo mila yê wê xomxo ya le vida vida lec wetôv ge, ⁴ om nêl vô he ên nêbê, ‘Xam loc vông yuac wain di a ob vông mone nivîha vô xam.’ Om he la.

⁵ “Hiyôv lam tyip vidii pipumêng dì xomxo tyo lax yê he ya hixôn, dì vông he la vac yuac. Dì hîyôv manôn yon hucêng i vông tibêge. ⁶ Nang dêc vô 5 klok hucêng xomxo tyo la yê he ya wê le vida vida ge. Om nêl vô he ên nêbê, ‘Bêna lêc xam dile vaxvax dì yuac ma dì vigwe hucê?’ ⁷ Om he nêl vô i ên nêbê, ‘Xomxo ti o vông yuac vô xe lêm.’ Om nêl vô he ên nêbê, ‘Xam êno loc yuac wain.’

⁸ “Pyap dêc vigwe buc, mêdêc xomxo levac tyo wê vông yuac wain ge nêl vô xomxo ti wê viac nue yuac ge ên nêbê, ‘Ông tyuc a nuge yuac vihati i lam dì vông mone vô he. Taxlee ge ông vông mone vô he wê val vông yuac timuêng ge dì i miłoc vô he wê val vông yuac tax ge.’

⁹ “Mêd he wê val vông yuac vô 5 klok hucêng ge lam tax dì he vihati kô mone kehe titi tiyima. ¹⁰ Pyap dêc he wê val vông yuac vô pitoc ge lam, dì he xo ên he nêb mêd he ob kô mone nginoo he wê val vông yuac hucêng ge vêl. Lêc he êno kô mone kehe titi. ¹¹ He kô mone pyap dì kunac xomxo levac tige wê i yuac wain ge, ¹² dì nêl vô i ên nêbê, ‘Xomxo tigae wê val vông yuac hucêng ge he vông yuac tiyi hîyôv manôn tibed, lêc ông vông mone vô he tiyi xochê ông vông vô xe ge, lêc xe vông yuac pitoc yang dì vigwe buc lec mi hîyôv ya xe nimnivi vô myavinê.’

¹³ “Lêc xomxo tyo nêl vô he ên nêbê, ‘Xam lige, a o vông ti so vô xam lêm. Xam lee yuu ên xam nêb a vông mone kehe titi vô xam titi. ¹⁴ Om

xam kô nêm mone mi loc, ên a nêb a ob vông mone vô he wê lam timuên ge i tiyi xocbê a vông vô xam ge. ¹⁵ Ge aca mone om a obêc vông tiyi xocbê a xovô ge od tiyiên obêc ma, me? Xam ob wê a nipaên lec a vigêg yuac, me?”

¹⁶ Yesu nêl kiyang pilepacê tige pyap di nêl ên nêbê, “Om he timuên obêc lam la mug, di he mugêng ge ob lax timu.”

*Yesu nêl kiyang vông lu yon lec wê ob yib di kidi lec ge
(Mak 10:32-34; Luk 18:31-33)*

¹⁷ Yesu he nue ngivihi loc mi la ên nêb ob la Jelusalem, om he mila môp ti di Yesu kô nue ngivihi vigê yuu di tô mi la yuu mi he la dô viyonêng di nêl vô he ên nêbê, ¹⁸ “Xam ngô lê. Il ob la Jelusalem, di xomxo ob vông Xomxo Nu la vac he levac wê mi si daa gee hixôn xomxo wê xovô Moses xolac gee vigê di he ob vông kot vô a di hilu kiyang wê ob hi a xib ge xôn, ¹⁹ di he ob vông a la vac tibii wê o Yuda lêm ge vigê, mêd tibii tigee ob so vya vô a, di pisa a ya yihi, di tul a lec xax, di buc yon ob lam la vêl di a obêc kidi lec magviha.”

*Jems yuu Jon nêb yuu ob tu levac
(Mak 10:35-45)*

²⁰ Vô buc tige Sebedi nu yuu, Jems yuu Jon, hixôn ta, yon lam vô Yesu, di ta yev vixa kitu vô i di nêl ên nêbê ob kitaa susu ti vô i. ²¹ Om Yesu nêl vô i ên nêbê, “Ông ob kitaa vatya vô a?” Mêd vêx tyo nêl vô i ên nêbê, “Ông lee yuu ên a nug yuu, yuu i kô lê levac vô buc wê ông ob tu levac ge, di ngwe i dô vô ông vigêm hiyôv di ngwe i dô vô ông vigêm kêt.”

²² Lêc Yesu nêl ên nêbê, “Kiyang wê mon kitaa vô a ge, mon o xovô kehe lêm. Viyin wê a ob kilê ge, muu tiyi wê muu ob kilê hixôn, me?” Lêc yuu nêl vô i ên nêbê, “Xii tiyi pyap.” ²³ Mêd Yesu nêl vô yuu ên nêbê, “Vixôhilôg, muu ob kilê viyin. Lêc xomxo wê ob kô lê levac mi dô vô a vigêg hiyôv di dô vô a vigêg kêt ge, a o tu kehe lêm. Ên vigwe yuu ge, Mag Anutu vaci viac di vinoo he wê ob kô lê levac ge.”

²⁴ Mêdêc Yesu nue ngivihi vigê yuu ngô kiyang wê Sebedi nu yuu nêl ge om he xêyaa vô myavinê ên kiyang wê yuu nêl ge. ²⁵ Lêc Yesu keac he lam di nêl vô he ên nêbê, “Xam xovô ên xam nêbê tibii levac vac vigwe ya viac lie ya kiyang xêkizéc, di tibii levac ya yong he di nêl kiyang xonaên ên nêb lie i timu vô. ²⁶ Di xam ga, xam o lêc vông môp bêge lêm. Nge, xam ti obêc nêb tu xam nêm levac ge od i tu xam nêm xomxo yuac, ²⁷ di xam ti obêc nêb tu mugêng wê xam vông ge od i tu xomxo wê ob vông yuac vidaaên vô xam ge, ²⁸ i tiyi xocbê a, Xomxo Nu, a o lam ên a nêb xomxo i vông yuac vô a lêm. Nge, a lam ên a nêb a ob vông yuac di ngidu xomxo xôn, di a ob xib, ên vô xomxo tibeac vêl ên he nêñ nipaên.”

*Yesu vông xomxo ma tocên yuu yê vigwe tii vac
(Mak 10:46-52; Luk 18:35-43)*

²⁹ Yesu he nue ngivihi kidi gê Jeliko ên nêb ob la, di xomxo kidu kidu timu vô he vixa. ³⁰ Lêc xomxo matocên yuu dô vô môp ninja, mêd ngô wê Yesu val ge om tyuc vya levac ên nêbê, “Devit nu, xo vigwe pisiv ên xii.” ³¹ Lêc xomxo tibeac higac vô yuu ên nêbê, “Muu dô kiyang maên.” Lêc yuu tyuc vya levac tii vac ên nêbê, “Xomxo levac, ông Devit nu, xo vigwe pisiv ên xii.”

³² Mêd Yesu le kizêc dî keac yuu lam vô i dî kinêg vô yuu ên nêbê, “Muu nêb a vông bêna vô muuê?” ³³ Om yuu nêl vô i ên nêbê, “Xomxo levac, vông xii mamnôn i seac.” ³⁴ Mêd Yesu xo vigwe pisiv ên yuu dî vyax vigê lec yuu manôn, dî lutibed yuu manôn seac dî yuu yê vigwe, om yuu timu vô Yesu vixa mi he la.

21

Yesu la Jelusalem tiyi xochê king (Mak 11:1-11; Luk 19:28-40; Jon 12:12-19)

¹ Yesu he nue ngivihi mîla kwabo vô Jelusalem. Mêd he val vigwe Betpasi wê yêp kwabo vô kitôn Oliv ge. Mêdêc Yesu nêb ob vông nue ngivihi yuu i loc, ² om nêl vô yuu ên nêbê, “Muu loc vigwe tiganê, di muu obêc mîla ge od lutibed muu ob wê mam la bwoc donki ti wê xomxo ku xôn mî i le vac môp hixôn nu ge. Om muu piwelac yihi vêl ên yuu dî didii yuu mi lam vô a. ³ Lêc xomxo ti obêc nêl kiyang ti vô muu lec wê muu kô donki ge od muu nêl vô i bêga bê, ‘Xomxo levac nêb ob kô mî vông yuac lec.’ Muu obêc nêl bêge ge od lutibed xomxo tige ob tyuc lec dî vông donki tige vô muu.”

⁴ Yesu nêl bêge ên nêb kiyang wê plopete nêl ilage i vô nôn lec. Kiyang tige bêga nêbê,

⁵ “Xam nêl vô xomxo Saion bêga bê, ‘Xam wê lê. King wê xam vông ge val vô xam gwêbaga. Xomxo tige xomxo malehe, di i dô lec bwoc donki. Xomxo tyo dô lec bwoc donki nu ti mi val.’”

⁶ Nue ngivihi yuu la vông i tiyi xochê Yesu nêl vô yuu ge. ⁷ Om yuu didii bwoc donki ta hixôn nu mi lôm vô Yesu, dî yuu vax yuu ngakwi lec donki kisii di Yesu dô lec. ⁸ Mêd xomxo tibeac vax he nivimahi lec môp dî he ya hup xax lihi mi vax i tup vô môp wê Yesu ob xoc vô ge tiyi xochê môp wê xomxo mi kô xomxo levac lec ge. ⁹ Di xomxo kidu levac wê la mug di kidu levac wê timu vô Yesu vixa gee, he vihati tyuc vya levac ên nêbê,

“Il ob pimil Devit nu. Il ob hi vîxad i pec ên xomxo ti wê tu Apumtau manôn mi val ge. Il ob pimil Anutu lê i vô levac dî i loc yêp kisii.”

¹⁰ He tyuc bêge, di Yesu mîla Jelusalem, di xomxo Jelusalem vihati vô nididun levac di nêl vîoma ên nêbê, “Xomxo tiga letya?” ¹¹ Om xomxo kidu levac wê lam hixôn Yesu ge nêl lax vô he ên nêbê, “Xomxo tiga Yesu, plopete ti wê lam gê Nasalet vac vigwe levac Galili ge.”

Yesu tii xomxo wê vông vitevac vac Anutu xumac ngibua ge la vêl (Mak 11:15-19; Luk 19:45-48; Jon 2:13-22)

¹² Mêdêc Yesu la vac Anutu xumac ngibua nilô dî la tii tibii vihati wê divông vitevac lec susu vac xumac ngibua nilô gee lop mi lam la vêl, di tibii wê vông mone luuma gee, Yesu vông he nêñ tevol kipê sea, di xomxo wê vông menac nêb tibii i kisuu ên tu xochê daa ge, Yesu kipê he nêñ sia sea, ¹³ di nêl vô he ên nêbê, “Xolac nêl bêga ên nêbê, ‘A xumac tiga, xumac kitaa vacên.’ Xolac nêl bêge, lêc xam vông a xumac vô nipaên tiyi xochê xumac wê tibii yôdac xôpac vac ge.”

¹⁴ Yesu dô vac Anutu xumac ngibua nilô di xomxo matocên hixôn xomxo vixa pecen val vô i di i vông he vô niviha lec. ¹⁵ Lêc xomxo levac wê mi si daa gee hixôn he wê xovô Moses xolac gee, he yê do levac wê Yesu vông ge di ngô kiyang wê nue nipwo tyuc bêga ên nêbê, “Il ob pimil Devit nu.” Om

xomxo levac tigee ni nyag ¹⁶ di nêl vô Yesu ên nêbê, “Kiyang wê nipwopwo nêl ge, ông ngô, me?” Lêc Yesu nêl vô he ên nêbê, “Ge a ngô, lêc kiyang wê yêp vac xolac ge, mêt xam o kitong lêmê? Kiyang nêl bêga ên nêbê, ‘Nume nipwo dì he wê gên lul ge, ông nêl kiyang pimilêن vac he mya om he pimil ông.’”

¹⁷ Yesu nêl kiyang tige vô he pyap dì loc mi la yêp gê Betani.

Yesu nêl vya lôt higuc dì i mupac

(Mak 11:12-14,20-24)

¹⁸ Yesu he nue ngivihi yêp di kidi mi la pitoc ên nêb ob la Jelusalem, lêc mila môp ti dì vip den Yesu. ¹⁹ Mêt Yesu yê ma la higuc wê le vô môp ninya ge, om la kwabo nêb ob ya nôn, lêc nôn ti o yux lec lêm. Nge, yatôv hixôn lihi pileva le. Om Yesu nêl vô xax tyo ên nêbê, “Ông obêc vuac nôn ti i tii vac lêm.” Om lutibed xax tige mupac.

²⁰ Nue ngivihi yê dì yetac dì kinêg vô Yesu ên nêbê, “Bêna lêc higuc tiganê mupac lutibedê?” ²¹ Om Yesu nêl lax vô he ên nêbê, “Xam obêc kitaa susu ti vô Anutu hixôn vông vinêن ge od Anutu ob vông vô xam. Om a nêl vixôhilôg nôn vô xam bêga bê xam obêc vông i vin hixôn nilôm tibed ge od xam obêc nêl kiyang tiyi xocbê a nêl lec higuc ge dì obêc vô nôn lec. Lêc xam ob vông yuac tibed mô lêm. Nge, xam obêc nêl vô kitôn tiganê bê, ‘Ông pul mi loc vac gwec’ ge od ob la tiyi xocbê xam nêl ge. ²² Èn xam obêc kitaa susu ti vô Anutu hixôn vông vinêن ge od Anutu ob vông vô xam.”

He Islel kinêg Yesu ên nêbê, “Ông kô xêkizêc vô letya?”

(Mak 11:27-33; Luk 20:1-8)

²³ Yesu la vac Anutu xumac ngibua nilô, di la nêl xolac vô xomxo. Mêt xomxo levac wê mi si daa gee hixôn he Islel levac ya val kinêg vô i ên nêbê, “Ông kô xêkizêc vô letya lêc lam vông yuac tigae, di ông tu letya manônê?” ²⁴ Om Yesu nêl lax vô he ên nêbê, “A éno ob kinêg kiyang ti vô xam, di xam obêc nêl kitong ge od a éno ob nêl xomxo ti wê vông xêkizêc vô a ge kitong vô xam. ²⁵ Om a ob kinêg vô xam bê mia lipacêن wê Jon vông ge kehe yêp vô letya? Kehe lam vô Anutu lag puunê me xomxo kibun ga vông?”

Om he ngaénma di nêl vôma ên nêbê, “Il ob nêbê va? Èn il obêc nêl bê Anutu lag puunê vông ge od Yesu ob nêl vô il bêga bê, ‘Bêna lêc xam o vông i vin kiyang wê Jon nêl ge lêmê?’ ²⁶ Lêc il obêc nêl bê xomxo kibun ga vông ge od il ob xona ên xomxo vihati, ên he vông i vin ên he nêbê Jon ge plopete nôn.” ²⁷ Om he nêl vô Yesu ên nêbê, “Xe o xovô mia lipacêن wê Jon vông ge kehe lêm.” Mêt Yesu nêl vô he ên nêbê, “Om a éno ob nêl xomxo ti wê vông xêkizêc vô a ge kitong vô xam lêm.

Yesu nêl kiyang pilepacêن lec xomxo ti nu yuu

²⁸ “Xam xo ên xam nêbê va? Xomxo ti nu yuu dô, om ma la nêl vô nu tuc ên nêbê, ‘Tuc, gwêbaga ông loc vông yuac wain wê a vông ge.’ ²⁹ Lêc nu tuc nêl lax vô ma ên nêbê, ‘A ob la lêm.’ Nu tuc nêl bêge dì timuên lêc pilepac nilô di la vông yuac wê ma nêl ge. ³⁰ Nang dêc ma la vô nu môn di nêl vô i tiyi xocbê nêl vô nu tuc ge. Mêt nu môn nêl i lax vô ma ên nêbê, ‘Mag, a ob la.’ Lêc kityoo di o la vông yuac lêm. ³¹ Om nu yuu ngwe na wê ngô ma kiyang?” Om xomxo daa sién hixôn he Islel levac nêl vô Yesu ên

nêbê, "Nu tuc." Mêd Yesu nêl vô he ên nêbê, "A nêl vixôhilôg nôn vô xam bê tibii nipaên wê kô takis gee hixôn vêx yôdac gee, he ob mug ên xam mì la vac Anutu ben lag puunê.³² Ên Jon Lipacêñ lam hilung môp bôbac vô xam, lêc xam o vông i vin kiyang wê i nêl ge lêm. Lêc tibii nipaên wê kô mone takis gee hixôn vêx yôdac gee, he vông i vin, di xam xovô wê he vông i vin ge, lêc xam o pilepac xam mì vông i vin lêm.

*Yesu nêl kiyang pilepacêñ lec xomxo nipaên wê viac yuac wain ge
(Mak 12:1-12; Luk 20:9-19)*

³³ "Xam ngô kiyang pilepacêñ ngwe. Xomxo ti bin yuac levac wê i vông ge di xin wain vac dì ku xenac kisuu lec, di yev lôva ti wê xomxo ob gig wain nôn vac ge di lox xumac wê xomxo ob dô vac di yê yuac xôn ge. Om vông yuac tige vac tibii ya vigê ên nêb he i viac. Pyap dêc xomxo tyo la dô vac vigwe teva ngwe.³⁴ Di buc wê wain nôn huu ge vô kwabo lec, om vông nue yuac ya la vô tibii wê viac yuac wain gee ên nêb he i loc yul wain nôn wê huu ge di kô mi lôm vô i.³⁵ Om he la, lêc tibii wê viac yuac ge hôm he xôn dì tax ti ninivi sea di hi ngwe yib di nêx ti ya ngidax.³⁶ Nang dêc timuêñ xomxo levac tyo vông nue yuac ya la nang. He tibeac nginoo he wê la tax ge vêl, lêc tibii wê viac yuac gee vông nipaên vô he tiyi xocbê he vông vô xomxo yuac wê la tax ge.

³⁷ "Mêdêc timuêñ xomxo levac tyo vông nu tuc la vô he, ên xo vac nilô bêga ên nêbê, 'Ga aca va nug om he ob yê i xocbê xomxo levac di ngô kiyang wê ob nêl vô he ge.'³⁸ Lêc tibii wê viac yuac gee yê nu tuc wê mila ge, om nêl vÔma ên nêbê, 'Xomxo tige wê ma ob nêl i lê lec yuac wain ga. Om il ob hi i yib ên yuac wain ga i tu il xe.'³⁹ Om he hôm i xôn dì kô mi la ninyawehe di la hi i yib.⁴⁰ Om xomxo levac tige obêc val ge od ob vông bêna vô tibii tige wê viac i yuac gee?"

⁴¹ Om xomxo daa siêñ hixôn he Islel levac nêl vô Yesu ên nêbê, "Xomxo levac tige ob vông myavinê levac vô he di hi he yib, di ob vông yuac wain tige vac tibii ba vigê ên he i viac, di he ob vông wain nôn vô xomxo levac tyo vô buc wê he obêc yul nôn ge."

⁴² Mêd Yesu nêl vô he ên nêbê, "Kiyang wê yêp vac xolac ge, xam mêd o kitong lêm, me? Ên kiyang nêl bêga ên nêbê,

'Ngidax ti wê xomxo xumac loxên yê nêbê tiyiên ma ge, ge wê tu ngidax xêkizêc wê ob hôm xumac xôn ge. Apumtau vaci vông bêge, di xe xê tiyi xocbê susu niviha.'

⁴³ Xolac nêl bêge, om a ob nêl vô xam bê Anutu ob vô kiyang yuu yuac wê i vông ge vêl ên xam Yuda di ob vông vac tibii ba vigê, di he ob vông i vô nôn lec.⁴⁴ [Xomxo ti obêc mwoc mì hi i lec ngidax tige ge od ob hi i len vô pipu sea, di ngidax tige obêc tô mì hi xomxo ti ge od ob hi i pital sea.]"

⁴⁵ He levac wê mi si daa gee hixôn he Palisi ngô kiyang pilepacêñ tige di xovô ên nêbê Yesu nêl kiyang lec he.⁴⁶ Om he nêb he ob hôm Yesu xôn, lêc he xona ên xomxo tibeac, ên he tibeac yê Yesu tiyi xocbê plopote ti.

¹ Nang dêc Yesu nêl kiyang pilepacên ngwe vô he bêga ên nêbê, ² “Anutu ben kehe tiyi xocbê môp wê xomxo levac ti vông. Xomxo tige nu vux ti nêb ob kô vêx om ma nêb ob myêl vizid levac. ³ Mêd vông kiyang la vô tibii ya tax ên nêb ob myêl vizid levac ti. Om vô buc wê obêc myel yaêng ge od vông nue yuac la nêl vô tibii tigee nêb he i lam vac yaêng levac. Lêc tibii tigee nêb ob lam lêm. ⁴ Om xomxo levac tige vông nue yuac ya la tii vac dì nêl vô he ên nêbê, ‘Xam lôc vô he wê a nêb he i lam vac vizid ge, dì nêl kitong vô he bê a viac a pyap, dì a hi bwoc kau dì bwoc nipwo levac levac hixôn dì viac yaêng vihati pyap, om he i lam ya vizid a vông, ên a nug ob kô vêx.’

⁵ “Mêgem nue yuac tigee la nêl kiyang vô tibii, lêc he ni ma lec kiyang nêb ob ngô lêm. Om he la vaxvax, tì la yuac yaêng dì tì la yuac mone, ⁶ dì he ya hôm xomxo levac nue yuac xôn mi vông he vô nipaêñ dì hi he yib. ⁷ Om xomxo levac tige xêyaa vô myavinê, om vông nue vevac la vô he wê hi i nue yuac yib ge, dì nue vevac hi he yib dì nyuu he nêñ xumac, dì ngwax ya he ben ma vêl.

⁸ “Mêd xomxo levac tyo nêl vô nue yuac ên nêbê, ‘A myêl vizid levac pyap mi i dô, lêc xomxo wê a tyuc he ên a nêb he i lam ya ge o tiyi wê ob ya ge lêm. ⁹ Mêgem xam loc vac môp levac vihati, dì xomxo wê xam ob tulec ge, xam kô vihati mi lam vac vizid wê a vông ge.’ ¹⁰ Om nue yuac la le vac môp vihati dì la kituc xomxo niviha yuu xôn nipaêñ wê he tulec ge dì kô he vihati mi la vac vigwe wê he ob ya vizid vac ge. Om he la pup lec xomxo levac tyo ben.

¹¹ “He val dô, mêdêc xomxo levac tyo la vac xumac nilô ên nêb ob yê he, lêc yê xomxo ti wê o vinyum ngakwi vizid ya yaêng ge lêm. ¹² Om xomxo levac nêl vô i ên nêbê, ‘Lig, bêna lêc ông o vinyum ngakwi vizid ya yaêng lêm, lêc lam dô hixônê?’ Lêc xomxo tyo o xovô kiyang ti wê ob nêl lax vô i ge lêm. ¹³ Om xomxo levac tyo nêl vô nue yuac ên nêbê, ‘Xam ku xomxo tige vixa yuu vigê xôn dì nêx i loc vac vigwe mapitoc. Vac vigwe tige xomxo ob byag levac dì nîvu kic lecma.’ ¹⁴ Yesu nêl kiyang pilepacên tige pyap dì nêl ên nêbê, “Anutu tyuc xomxo tibeac lê, lêc ob vînoo nôn tîi.”

Xomxo kinêg Yesu lec mone wê he tung takis vô Sisa ge (Mak 12:13-17; Luk 20:20-26)

¹⁵ Mêdêc he Palisi la kitucma dì keac lec kiyang wê nêb ob kinêg vô Yesu ên i nêl kiyang ti i so. ¹⁶ Om Palisi vông he nue ngivihi hixôn Helot nue ngivihi la vô Yesu dì he nêl vô i ên nêbê, “Xolac kehe, xe xovô ên xe nêbê ông wê ông mi nêl kiyang hixôn nôn, dì ông tixuu xomxo ya môp wê Anutu vông ge dì ông o kityoo lêm, dì ông o xona ên xomxo ti lêm, ên ông wê xomxo vihati tiyima. ¹⁷ Om ông nêl vô xe bê ông xovô bêna? Il Yuda obêc vông takis vô king Sisa wê tibii ba ge od ob pwoo Moses xolac vac, me?”

¹⁸ Lêc Yesu xovô kiyang nipaêñ wê yêp vac he nilô ge om nêl vô he ên nêbê, “Xam tibii kityooêñ, bêna lêc xam nêb ob yaxêñ a? ¹⁹ Xam kô mone takis tyo mi lam a xê.” Om he vông mone ti vô i. ²⁰ Di Yesu kinêg vô he ên nêbê, “Letya kinu yuu lê wê yêp lec mone tiga?” ²¹ Lêc he nêl ên he nêbê, “Sisa kinu yuu lê wê yêp lec mone tiga.” Om Yesu nêl vô he ên nêbê, “Om susu wê Sisa xe ge, xam vông i loc vô Sisa, dì susu wê Anutu xe ge, xam vông i loc vô Anutu.”

²² He ngô kiyang wê Yesu nêl ge dì yetac mabu, dì sea i dì la.

*He Sadyusi kinêg Yesu lec wê xomxo ob kidi lec vac yibên ge
(Mak 12:18-27; Luk 20:27-40)*

²³ Vô buc tyo xomxo Sadyusi ya val vô Yesu. He Sadyusi ge, he mi nêl ên he nêbê xomxo yibên ob kidi lec mi dô maviha lêm. Om he val kinêg vô Yesu ên nêbê, ²⁴ “Xolac kehe, Moses xolac nêl bêga ên nêbê, ‘Xomxo ti obêc yib dì nu ma ge od xomxo tyo li ngwe ob ii vêxôv tige ên yuu i kô nue dì nue i tu susu wê ma yibên vông ge kehe.’ Moses xolac nêl bêge. ²⁵ Om ilage vux vigê vilu dì sec yuu wê ta yuu ma tibed ge dô vac xe mahigun. Mêdêc li tuc kô vêx ti lêc yib dì nu ma, om li mòn kô vêx tyo nang. ²⁶ Lêc li mòn yib dì nu ma om li gwaa kô vêx tige tii vac nang, lêc yib dì nu ma, dì lie timuén vihati kô vêx tige dì i mila vô li timuén tyo hixôn, lêc nu ma dì he vihati yib. ²⁷ Dì timuén lêc vêx tyo yib. ²⁸ Ông nêl ên ông nêbê xomxo ob kidi lec maviha vac yibên, om xe nêb xe ob kinêg ông bê buc wê xomxo yibên obêc kidi lec ge od vêx tige ob tu vux tina vinê? Ên vux vigê vilu di sec yuu ii vêx tibed lec buc wê he dô maviha ge.”

²⁹ Lêc Yesu nêl i lax vô he ên nêbê, “Xam o xovô kiyang wê yêp vac xolac ge lêm dì xam o xovô xêkizêc wê Anutu vông ge lêm, om xam nêl kiyang so. ³⁰ Ên buc wê xomxo yibên ob kidi lec ge, he ob iima lêm. Nge, he ob dô tiyi xocbê angela lag puunê. ³¹ Dì kiyang lec wê xomxo yibên ob kidi lec maviha ge, xam mêt o kitong kiyang wê Anutu nêl vô xam ge lêm, me? Ên Anutu nêl bêga ên nêbê, ³² ‘Eblaham Anutu a, dì Aisak Anutu a, dì Jekop Anutu a.’ Anutu nêl bêge, lêc yon yib tax dêc Anutu nêl kiyang tige timuén om kiyang tige nêl kitong ên nêbê Anutu o tu xomxo yibên nêl Anutu lêm. Nge, tu xomxo maviha nêl Anutu.”

³³ Xomxo kidu levac tige ngô dì yetac mabu ên kiyang wê Yesu nêl ge.

*Xolac nôn tibed wê nginoo xolac baba vêl ge
(Mak 12:28-31; Luk 10:25-28)*

³⁴ He Palisi ngô wê Yesu kiyang vông he Sadyusi dô kiyang maên ge om he kitucma mi la vô Yesu. ³⁵ Dì he wê tu Moses xolac kehe gee ti nêb ob yaxê Yesu om kinêg vô i ên nêbê, ³⁶ “Xolac kehe, xolac wê Anutu nêl vô Moses ge, tina wê nginoo vêl ge?”

³⁷ Om Yesu nêl vô i ên nêbê, “Xolac ti wê nginoo vêl ge bêga nêbê ông xêmyaa i vin lec ông Apumtau Anutu dì ông vông nilôm yuu kinum dì piyôp i loc yadiluhu vô Anutu. ³⁸ Xolac tibed tiga wê yêp mugên dì nginoo baba vêl. ³⁹ Dì xolac ngwe wê vông yuu ge tiyi xocbê ngwe wê yêp mugên ge nêl bêga ên nêbê ông xêmyaa i vin lec xomxo vihati i tiyi xocbê ông xêmyaa vin lec ôcông va ge. ⁴⁰ Xolac yuu ga tu kiyang wê Moses he plopete nêl ilage vihati kehe.”

*Yesu kinêg he Palisi lec lê Kilisi
(Mak 12:35-37; Luk 20:41-44)*

⁴¹ He Palisi kitucma mi la dô hixôn Yesu, om Yesu kinêg vô he bêga ên nêbê, ⁴² “Xam xo bêna lec xomxo levac wê lê Kilisi ge? Xam xo ên xam nêbê letya nu i?” Om he Palisi nêl vô Yesu ên nêbê, “Ge Devit nu ti.”

⁴³ Mêt Yesu nêl vô he ên nêbê, “Obêc Devit bue timuén ti ge od bêna lêc Myakilôhô Ngibua vông Devit nêl kiyang lec Kilisi ên nêbê Apumtau? Ên Devit nêl bêga nêbê,

⁴⁴ ‘Apumtau Anutu nêl vô a lig Apumtau ên nêbê, “Ông lôm dô vô a vigêg hiyôv dì a ob vông tibii wê vông vevac vô ông gee, he i loc dô vac ông kwa ngibi.”’

⁴⁵ Devit nêl bége, om Devit obêc nêl lec Kilisi ên nêbê Apumtau ge od bêna lêc xam nêbê Kilisi ge Devit bue ti?” ⁴⁶ He ngô kiyang wê Yesu nêl ge, lêc ti o tiyi wê ob luu kiyang ti lax vô i ge lêm. Om vô buc tige he xona ên i om he o kinêg kiyang ti vô i tii vac lêm.

23

*Môp wê he Palisi hixôn he wê xovô Moses xolac gee mi vông
(Mak 12:38-39; Luk 11:43,46; Luk 20:45-46)*

¹ Nang déc Yesu nêl vô xomxo kidu levac hixôn i nue ngivihi ên nêbê, ² “He wê xovô Moses xolac gee hixôn he Palisi, he le vac Moses nipilêhê di vông Moses xolac vô xam, ³ om kiyang vihati wê he nêl vô xam ge, xam ngô di timu vô. Lêc le i lêc vông môt tiyi xochê he vông ge lêm. Ên he tixuu xam ya kiyang niviha, lêc he o timu vô kiyang wê he mi nêl ge lêm. ⁴ Ên he vông viyin vô xam tiyi xochê he titup susu viyin dì lii lec xam kidiac ên nêb xam kilê ge, lêc he o hôm nipwo ti vac vigê hixôn lêm. ⁵ Môp vihati wê he mi vông ge, he vông ên he nêb xomxo i yê di pimil he. Om he kivuu Anutu xolac lec kipihac dì su vac vixec nu wê duu bwoc ninivi ge dì ku yêp lec mahigê maxooên, dì he duu myahilihi dia la yux lec ngakwi myahipu, ⁶ dì he obêc la ya vizid levac me obêc la vac xumac lilo ge od he nêb he ob la dô lec sia wê xomxo levac mi dô lec ge, ⁷ dì he xêyaa vin lec wê he ob la vilee lec wetôv ên nêb xomxo i kô he lec, dì xêyaa vin lec nêb xomxo i nêl bê he xolac kehe.

⁸ “Lêcom a ob nêl vô xam bêga bê xomxo ti i o lêc nêl vô xam bê xam ge xolac kehe lêm. Ên xomxo tibed tu xam nêm xolac kehe, dì xam vihati xam lime. ⁹ Dì le i lêc vinoo xomxo kibun ga ti bê xam mam lêm, ên mam tibed wê dô lag puunê. ¹⁰ Dì xomxo ti i o lêc nêl vô xam bê xam xomxo levac lêm. Ên xam nêm xomxo levac tibed ge Kilisi. ¹¹ Xomxo wê tu xam nêm levac ge i loc tu xam nêm tibii yuac hixôn lê, ¹² ên xomxo ti obêc kô i lec ge od Anutu ob vông i lê vô nipwo lec. Lêc xomxo ti obêc pilepac i dì vô nipwo lec ge od Anutu ob vông i lê vô levac.

*Yesu nêl vô he Palisi ên nêbê he nilô pital pyap
(Mak 12:40; Luk 11:39-42,44,52; Luk 20:47)*

¹³ “Xam wê xam xovô Moses xolac gee hixôn xam Palisi, xam tibii kityooên, xam nilôm pital pyap. Xam tung vuayen lag puunê lec ên xomxo. Xacxam va ob la vac lêm, lêc he wê nêb ob la vac Anutu ben ge xam le vac he xôn. ¹⁴ [Xam wê xam xovô Moses xolac gee hixôn xam Palisi, xam tibii kityooên, xam nilôm pital pyap. Xam vô vêxôv nêb susu yuu xumac vêl ên he, dì buc wê xam obêc kitaa ge od xam mi viyum nêm nipaên vac kitaaen dia. Om xam obêc kô myaviwen nipaên luu vêl.]

¹⁵ “Xam wê xam xovô Moses xolac gee hixôn xam Palisi, xam tibii kityooên, xam nilôm pital pyap. Xam la vac sip dì la vilee vac vigwe mi la ên xam nêb xam ob pilepac xomxo ti i tu xam nume ngivihi. Lêc xomxo tyo obêc tu nume ngivihi ge od xam vông i la vac nipaên levac luu wê xam vông ge vêl, om xam xôn vihati ob la vac vigwe nipaên.

¹⁶ “Xam ge mamtocên, lêc xam nêb xam ob hilung môp vô xomxo, xam nilôm pital pyap. Xam mi nêl ên xam nêbê, ‘Xomxo ti obêc titô vigê la kisii dì nêl kiyang ti dì nêl Anutu xumac ngibua lê hixôn ge od kiyang wê i nêl ge kiyang pileva. Lêc xomxo ti obêc titô vigê la kisii dì nêl kiyang ti dì nêl gol wê he lipac lec xumac ngibua ge lê hixôn ge od xomxo tyo i vông i tiyi kiyang wê i nêl ge.’ ¹⁷ Xam mi nêl bêge, lêc xam ge tibii yacyac wê manôñ toc ge. Susu ngwe na wê nginoo vêlê? Gol nginoo vêl, me Anutu xumac ngibua wê vông gol tu ngibua ge nginoo vêlê? ¹⁸ Xam mi nêl ên xam nêbê, ‘Xomxo ti obêc titô vigê la kisii dì nêl kiyang ti dì nêl alta lê hixôn ge od kiyang wê i nêl ge kiyang pileva. Lêc xomxo ti obêc titô vigê la kisii dì nêl kiyang ti dì nêl daa wê yêp lec alta ge lê hixôn ge od xomxo tige i vông i tiyi kiyang wê i nêl ge.’ ¹⁹ Xam mi nêl bêge, lêc xam ge tibii matocên. Susu ngwe na wê nginoo vêlê? Daa nginoo vêl, me alta wê vông daa tu ngibua ge nginoo vêlê? ²⁰ Om a nêl vô xam bê xomxo ti obêc titô vigê la kisii dì nêl kiyang ti dì nêl alta lê hixôn ge od tiyi xochbê nêl daa wê yêp lec alta kisii ge lê hixôn. ²¹ Di xomxo ti obêc titô vigê la kisii dì nêl kiyang ti dì nêl Anutu xumac ngibua lê hixôn ge od tiyi xochbê nêl Anutu wê dô vac xumac tige lê hixôn. ²² Di xomxo ti obêc titô vigê la kisii dì nêl kiyang ti dì nêl vigwe lag puunê lê hixôn ge od tiyi xochbê nêl Anutu sia king lê dì nêl Anutu wê dô lec sia tige lê hixôn.

²³ “Xam wê xam xovô Moses xolac gee hixôn xam Palisi, xam tibii kityooêñ, xam nilôm pital pyap. Ên xam obêc tulec lehac yuu ngec di xax ninivi nivivea ge od xam mi tung kidu vigê yuu dì vông ti la tu daa vô Anutu. Lêc xam sea môp levac wê Moses xolac nêl ge xochbê môp bôbac di môp wê xam ob xo vigwe pisiv ên xomxo, di môp wê xam ob vông i vin. Om a ob nêl vô xam bê xam o lêc vông môp ngwe di sea ngwe lêm. Nge, xam vông yuu xôn tiyima. ²⁴ Xam ge mamtocên, lêc xam nêb xam ob hilung môp vô xomxo. Xam mi hôm vimeac vêl ên yaêñ, lêc bwoc levac xam ngôñ diluhu.

²⁵ “Xam wê xam xovô Moses xolac gee hixôn xam Palisi, xam tibii kityooêñ, xam nilôm pital pyap. Xam mi lipac nimnivi pileva tiyi xochbê xam lipac kap yuu pile nîmi ge, dom xam nilôm ge, môp yôdac hixôn môp nipaêñ pup lec. ²⁶ Xam Palisi matocên, xam lipac kap yuu pile nilô i vô niviha lê, èdêc nîmi i vô niviha lec hixôn.

²⁷ “Xam wê xam xovô Moses xolac gee hixôn xam Palisi, xam tibii kityooêñ, xam nilôm pital pyap. Xam tiyi xochbê vigwe yibêñ wê xomxo vunac vô niviha ge. Il xê vixun nêbê niviha, lêc nilô ge, xomxo yibêñ len hixôn susu ningeac vihati ge dô vac. ²⁸ Om xam êno tiyi bêge, ên xomxo mi yê xam nêbê xam xomxo niviha, lêc xam nilôm môci, môp kityooêñ hixôn môp wê xam pwoo Anutu kiyang vac ge yêp vac xam nilôm.

*Yesu nêl vô he Palisi ên nêbê he ob kô myaviwen nipaêñ
(Luk 11:47-51; Luk 13:34-35)*

²⁹ “Xam wê xam xovô Moses xolac gee hixôn xam Palisi, xam tibii kityooêñ, xam nilôm pital pyap. Xam mi lox xumac niviha lec plopete wê yibêñ ge lôva kisii dì xam vunac vô xomxo niviha wê yibêñ ge lôva. ³⁰ Di xam mi nêl ên xam nêbê, ‘Xe obêc dô vac buge buc ilage od xe ob timu vô môp wê he vông ge dì hi plopete yib lêm.’ ³¹ Xam nêl bêge, om xam nêm kiyang nêl xam kitong nêbê xomxo wê hi plopete yib ge nue

xam. ³² Om xam loc vêl dì loc vông môp nipaên i tiyi xocbê mame bume vông ilage! ³³ Myel nipaên nue xam! Anutu obêc yaxêن xam dì vông xam la vac vigwe nipaên. Om xam ob pec ên myaviwen nipaên tige tibêna?

³⁴ “Om a nêl vô xam bê a ob vông plopete dì xomxo piyôp levac hixôn xomxo wê xovô xolac kehe gee i loc vô xam. Lêc xam ob hi he mangwe yib, dì he mangwe, xam ob tul lec pola, di mangwe, xam ob pisa ya yihi vac xumac liло wê xam vông ge, dì tii he vac vigwe viyang viyang mi he la vêl. ³⁵ Om xam ob kô myaviwen nipaên lec wê bume hi xomxo niviha yib ilage. Xam bume hi Ebel wê o vông nipaên ti lêm ge yib taxlee dì i val vô Belekaia nu Sekalaia wê bume hi i yib vac xumac ngibua yuu alta mahigun ge. ³⁶ Om a nêl hixôn nôn vô xam bê xam wê xam dô gwêbaga ge, xam obêc kô myaviwen nipaên lec môp soën vihati wê bume vông ilage.

³⁷ “O Jelusalem, Jelusalem, xam wê xam hi plopete yib, dì xam nêx he wê Anutu vông i loc vô xam ge ya ngidax mi he yib. Buc tibeac ge a keac ên a nêb xam lam vô a tiyi xocbê kokilêx ta keac nue vîlu lax vac vinihi kwa ngibi ge, lêc xam nêb a vôngên i ma. ³⁸ Om xam ngô lê. Anutu ob sea xam bom i yêp pileva. ³⁹ Om a nêl vô xam bê xam ob wê a i tii vac nang lêm, dì i loc vô buc timuên wê xam ob nêl bêga bê, ‘Il ob pîmil xomxo ti wê tu Apumtau manôñ mi val ge.’”

24

Anutu xumac ngibua ob dii vêl (Mak 13:1-2; Luk 21:5-6)

¹ Yesu lop vac Anutu xumac ngibua ên nêb ob la, lêc nue ngivihi mila vô i ên nêb ob hilung xumac niviha ya wê le hixôn xumac ngibua ge ên nêb i yê bê xumac niviha. ² Lêc Yesu nêl vô he ên nêbê, “Gwêbaga xam wê xumac tigae vihati, lêc a nêl nôn vô xam bê obêc buc timuên ge od xumac tigae ob dii sea di ngidax ngwe ob dô lec ngwe kisii lêm.”

Viyin tibeac wê ob val timuên ge (Mak 13:3-13; Luk 21:7-19)

³ Yesu la dô lec kitôn Oliv kisii, dì nue ngivihi heche val nêl vô i ên nêbê, “Xe nêb ông nêl vô xe bê kiyang wê ông nêl lec Anutu xumac ngibua ge ob vô nôn lec vô buc tina? Dì do tina wê obêc val tax ên xe xê dì xovô bê ông ob vena di lag yuu kibun obêc pilepac ge?”

⁴ Om Yesu nêl lax vô he ên nêbê, “Xam viac xam niviha êdêc xomxo i o lêc kityoo xam lêm. ⁵ Èn xomxo tibeac ob val nêl a lêg lec he lê nêbê he Kilisi, om he ob kityoo xomxo tibeac. ⁶ Dì xam obêc ngô vevac nididun val kwabo di ngô kiyang lec vevac wê teva ge od le i lêc yetac di xona lêm. Èn vevac tigee ob val tax, lêc buc myahipu gên yêp dia. ⁷ Èn tibii viyang ngwe ob vông vevac vô tibii viyang ngwe, dì xomxo vigwe ti ob dô kidu kidu di vông vevac vómâ, dì vip levac ob den xomxo vac vigwe ya, dì ngiyêg ob yoc vac vigwe ya, ⁸ om viyin tigee wê ob val taxlee, lêc viyin tibeac gên yêp wê ob val timuên hixôn.

⁹ “Vô buc tigee tibii ob hôm xam xôn di vông xam la vac tibii vigê dì he ob vông myavinê vô xam dì hi xam wib. Di tibii vac vigwe vihati yang xêyaa ob vô myavinê vô xam ên wê xam vông i vin a lêg ge. ¹⁰ Dì xomxo tibeac ob sea vông vinêñ wê he vông ge, dì he ob vông lie la vac tibii vevac vigê, dì he xêyaa ob vô myavinê vómâ. ¹¹ Di plopete kityooen tibeac obêc val

kityoo xomxo tibeac. ¹² Dì môp nipaên obêc vô levac, om xomxo tibeac obêc sea môp xêyaa vin lec maên. ¹³ Lêt xomxo ti obêc le xêkizêc dì i la tyip vô buc myahipu ge od Anutu obêc kô i mì la tung vac ben. ¹⁴ Dì xomxo ob nêl xolac niviha lec Anutu ben kisiinê la vac vigwe vihati yang ên xomxo vihati i ngô. Pyap dêc buc myahipu obêc val timuên.”

*Yesu nêl kiyang lec nipaên nôn wê ob val timuên ge
(Mak 13:14-23; Luk 21:20-24)*

¹⁵ Xam wê xam kitong kiyang tiga, xam xovô niviha, ên Yesu nêl bêga ên nêbê, “Obêc buc timuên ge susu nipaên nôn wê ob vông vigwe vô nipaên ge ob la le vac xumac ngibua. Ilage plopete Danyel nêl kitong lec susu nipaên tige. ¹⁶ Om buc wê susu nipaên tige obêc val le seac ge od xomxo wê dô vac vigwe Judia ge he i pec mi loc lec kitôn, ¹⁷ dì he wê dô lec xumac kisii ge he i o lêc lop mì lax kô he susu ti vac xumac nilô lêm. Nge, he i pec mi loc lutibed. ¹⁸ Dì he wê la vac yuac lôma ge he i o lôm kô vinyumên ti lêm. Nge, he i pec mi loc lutibed. ¹⁹ Dì xam xo vigwe pisiv ên vêx wê nu dô vac xêyaa ge dì vêx wê vông lul vô nue ge, ên vô buc tigee he ob dô vac viyin levac mabu luu vêl. ²⁰ Om xam kitaa vô Anutu bê xam ob pec mi la vô buc sabat yuu buc ningigoôn lêm, ²¹ ên vô buc tige viyin levac mabu ob val. Vô buc mugên ilage dì i val gwêbaga hixôn, viyin tibêge o tulec xomxo lêm, dì vô buc timuên ge viyin tibêge ob yêp i tii vac lêm. ²² Buc viyin tigee obêc yêp dia ge od ob kitya xomxo vihati vêl. Lêt Anutu ob xo he wê vinoo he pyap ge, om ob kitov buc tigee vô myabo.

²³ “Vô buc tige xomxo ti obêc nêl vô xam bê, ‘Wê lê, Kilisi dô ga’ me obêc nêl bêga bê, ‘Kilisi dô ganê’, ge od xam o lêc vông i vin kiyang tige lêm. ²⁴ Èn tibii kityooên ya ob val nêl bê he Kilisi me plopete, dì he ob vông do levac toto ên nêb ob pilepac xomxo nilô i loc vô kiyang kityooên, dì he nêb he ob kityoo xomxo wê Anutu vinoo pyap ge hixôn. ²⁵ Xam ngô lê. Kiyang tige gên o vô nôn lec lêm, lêc a nêl kitong vô xam tax.

²⁶ “Om xomxo obêc nêl vô xam ên nêbê, ‘Wê lê, Kilisi dô vac vigwe myadongên tiganê’, ge od xam o lêc loc vigwe tiganê lêm. Dì he obêc nêl vô xam ên nêbê, ‘Wê lê, Kilisi dô vac xumac nilô tiganê’, ge od xam o lêc vông i vin he kiyang lêm. ²⁷ Èn a, Xomxo Nu, a obêc vena tiyi xocbê deac hixelac lutibed vac vigwe vihati wê hiyôv tyip lam dì hoo la ge, om xomxo vihati obêc yê dì xovô.

²⁸ “Susu yibêti obêc yêp vac vigwe ti ge od menac byang wê mi ya pitalêti ge ob kituc la lec.

*Yesu nêl kiyang lec buc wê i ob vena lec ge
(Mak 13:24-31; Luk 21:25-33)*

²⁹ “Viyin levac wê ob val timuên ge obêc tip la vêl. Nang dêc lutibed hiyôv yuu dentuc obêc vô mapitoc dì linacêti ob ma, di pitua lag puunê obêc tô sea mì lam, dì susu xêkizêc lag puunê obêc vô yocyoc. ³⁰ Mêd do levac wê hilung a Xomxo Nu ge obêc val yêp seac vac lag. Om xomxo vihati gê kibun ga, he ob yê dì nilô ob vô viyin dì he ob byag. Nang dêc he obêc yê a, Xomxo Nu, a dô vac viyobtoc mi lam gê kisii ganê dì lam hixôn xêkizêc yuu xêseac levac. ³¹ Mêd vuac ob tyuc nididun levac, dì a ob vông a nuge angela he i loc tiyi kibun myahipu vihati dì loc vilu vô xomxo vihati wê Anutu vinoo he pyap ge.

³² “Xam xovô lec xax livêl. Ên livêl lihi obêc yal mima ge od xam xovô bê buc wê hiyôv ob linac ge. ³³ Mêgem buc timuên wê susu tigee vihati wê a nêl vô xam ga obêc val vô xam ge od xam obêc wê di xovô bê buc wê a ob vena lec ge vô kwabo lec. ³⁴ A nêl vixôhilôg nôn vô xam bê xomxo wê dô gwêbaga ge, he ob yib lêm di kiyang wê a nêl vô xam ga vihati obêc vô nôn lec pyap lê. ³⁵ Lag yuu kibun xôa obêc ma, di kiyang wê a vông ge, bo ti xôa obêc ma lêm. Nge, vihati obêc yêp.

*Xomxo ti o xovô buc wê Yesu ob vena lec ge lêm
(Mak 13:32-37; Luk 17:26-30,34-36)*

³⁶ “Buc wê a ob vena lec ge, xomxo ti o xovô buc yuu hiyôv manôn tige lêm, di angela lag puunê lungêng buc tige, di a, Xomxo Nu, a êno lungêng. Dom Mag vaci tibed wê xovô buc tige. ³⁷ Môp wê xomxo vông vô Nôa buc ilage, xomxo ob vông môp tibêge di i loc vô buc wê a, Xomxo Nu, ob vena lec ge. ³⁸ Vô buc ilage wê mia gên o hivun kibun xôn lêm ge, xomxo dô mi ya di num di iima, di i la tyip lec buc wê Nôa la dô vac sip nilô ge, ³⁹ lêc he lungêng wê mia ob hivun kibun xôn ge, di lutibed mia butac di hivun he vihati yib mima vêl. Om buc wê a, Xomxo Nu, ob vena lec ge ob tiyi lec bêge. ⁴⁰ Vô buc tige xomxo yuu ob la vac yuac yaén di Anutu ob kô ngwe di sea ngwe dô xel. ⁴¹ Di vêx yuu ob divông yebac, lêc Anutu ob kô ngwe di sea ngwe dô xel. ⁴² Mêgem xam dô di viac xam, ên xam o xovô buc wê xam Apumtau ob vena lec ge lêm. ⁴³ Xam xovô bê xomxo ti wê i xumac ge obêc xovô hiyôv manôn wê tibii yôdac ob val vô bucên ge od xomxo tyo ob dô bin ben ên nêb tibii yôdac i o dii xumac di vun i susu lêm. ⁴⁴ Om xam êno, xam viac xam, ên a, Xomxo Nu, a obêc vena lec buc wê xam xo ên xam nêbê a vena lecên ob ma ge.

*Yesu nêl kiyang pilepacêñ lec xomxo yuac niviha yuu nipaêñ
(Luk 12:42-46)*

⁴⁵ “Xomxo yuac letya dô wê viac i yuac niviha hixôn piyôp niviha ge? Xomxo levac wê viac nu yuac tige vinoo i ên nêb i viac lie yuac vihati di vông yaén vô he tiyi buc vihati. ⁴⁶ Om xomxo levac tyo obêc vena lêc yê wê nu yuac tige viac yuac niviha ge od ob vông xéyaa niviha vô nu yuac tyo. ⁴⁷ A nêl vixôhilôg vô xam bê xomxo levac tyo ob vông susu vihati wê i vông ge vac nu yuac tige vigê ên nêb i viac. ⁴⁸ Lêc xomxo levac obêc la di nu yuac tyo obêc xo bêga nêbê, ‘Xomxo levac tyo ob vena lutibed lêm.’ ⁴⁹ Nêl bêge om hi lie yuac, di ya di num hixôn tibii wê num mi vô mavmav ge. ⁵⁰ Obêc vông bêge ge od xomxo levac ob vena lec buc hixôn hiyôv manôn ti wê nu yuac tige xo ên nêb ob vena lec lêm ge. ⁵¹ Om xomxo levac obêc hi i vô nipaêñ di vông i la dô vac vigwe nipaêñ hixôn xomxo kityooêñ. Vac vigwe tige xomxo obêc byag di kic nivu lecma.”

25

Kiyang pilepacêñ lec vêxwo vigê yuu

¹ Yesu nêl vô nue ngivihi ên nêbê, “Buc wê a ob vena lec ge od xomxo wê nêb ob la vac Anutu ben kisii ganê ge he ob tiyi xochê vêxwo vigê yuu wê kô he lam mi la le vac môp ên nêb ob bin xomxo levac ti wê ob val ge. ² Vêxwo vigê vilu wê piyôp maên, di he vigê vilu wê piyôp niviha. ³ Om vêxwo vigê vilu wê piyôp maên ge kô he lam, lêc he o kô wel hixôn lêm. ⁴ Di vêx vigê vilu wê piyôp niviha ge kô he lam di kô wel hixôn vac butol

titi. ⁵ He vihati dô bin xomxo levac tyo, lêc valên ma, mêt he manôn yêp om he yêp.

⁶ “Mêtêc vô vivuaên mahigun xomxo ti tyuc nya levac ên nêbê, ‘Xomxo levac tyo val. Om xam loc tulec xomxo tyo vac möp ên kô i mi lam.’ ⁷ Mêtêc vêx vihati kidi lec di viac he lam, ⁸ di he wê piyôp niviha ge too wel vac he lam, di he wê piyôp maên ge nêl vô he wê piyôp niviha ge ên nêbê, ‘Xam vông xe nêm wel ya ên xe too vac xe lam.’ ⁹ Lêc he wê piyôp niviha ge nêl i lax vô he ên nêbê, ‘Ma. Wel ga o tiyi il xôn vihati lêm. Om xam loc kisuu nêm.’ ¹⁰ Mêtêc he wê piyôp maên ge loc mi la myag wel ên nêb ob kisuu nêm. Mêt xomxo levac tyo val, om vêx wê viac he pyap ge la hixôn i mi he la vac xumac nilô di la ya vizid levac, di vuayen tung lec.

¹¹ “Lêc vêxwo vigê vilu wê piyôp maên ge vena timuên di vena tyuc ên nêbê, ‘Xomxo levac, xomxo levac, ông tax vuayen ên xe.’ ¹² Lêc xomxo levac tige nêl i lax vô he ên nêbê, ‘A nêl nôn vô xam bêa lungên xam.’” ¹³ Yesu nêl kiyang pilepacên tige pyap dêc nêl vô nue ngivihi ên nêbê, “Om xam dô di viac xam, ên xam o xovô buc yuu hiyôv manôn wê a obêc vena lec ge lêm.

Yesu nêl kiyang pilepacên lec xomxo yuac wê kô mone ge (Luk 19:11-27)

¹⁴ “Om buc wê a ob vena lec ge tiyi xocbê xomxo levac ti wê nêb ob la vigwe tevabanê ge. Om nêl nue yuac lam vô i di vông susu vihati wê i vông ge la vac he vigê ên nêb he i viac. ¹⁵ Xomxo levac tyo xovô yuac yuu xovôên wê nue yuac toto vông ge, om titang mone vô he tiyi bêge. Om vông K5,000 vô nu yuac ti, di vông K2,000 vô ngwe di vông K1,000 vô ti ên nêb yon i vông yuac lec mone tige. Pyap dêc loc mi la. ¹⁶ Mêtêc nu yuac ti wê kô K5,000 ge la vông yuac lec mone tige, om kô K5,000 lôm kituc lec. ¹⁷ Di nu yuac ti wê kô K2,000 ge la vông yuac lec mone tige, om kô K2,000 lôm kituc lec. ¹⁸ Di ti wê kô K1,000 ge la yev lôva mi lii mone la yêp vac di hivun xôn.

¹⁹ “Mêt buc dia lam la vêl, di xomxo levac vena di tyuc nue yuac lam vô i ên nêb ob ngô kiyang lec yuac wê yon vông lec mone wê i vông vô yon ge. ²⁰ Mêt nu yuac ti wê kô K5,000 ge kô mone vihati mi lam le vô xomxo levac tyo manôn di nêl vô i ên nêbê, ‘Xomxo levac, ông vông K5,000 vô a, di a vông yuac lec, om a kô K5,000 hixôn.’ ²¹ Mêt xomxo levac tige nêl vô i ên nêbê, ‘Ông xomxo yuac niviha, ên ông vô ninyamlehe vô a di vông yuac niviha. Ông viac susu wê nipwo ge niviha om a ob vông susu tibeac vac ông vigêm ên ông viac. Om ông xêmyaa i niviha di ông lam dô hixôn a.’

²² “Nang dêc nu yuac ti wê kô K2,000 ge lam le vô xomxo levac tyo manôn di nêl vô i ên nêbê, ‘Xomxo levac, ông vông K2,000 vô a, di a vông yuac lec, om a kô K2,000 hixôn.’ ²³ Om xomxo levac tige nêl vô i ên nêbê, ‘Ông xomxo yuac niviha, ên ông vô ninyamlehe vô a di vông yuac niviha. Ông viac susu wê nipwo ge niviha, om a ob vông susu tibeac vac ông vigêm ên ông viac. Om ông xêmyaa i niviha di ông lam dô hixôn a.’

²⁴ “Mêtêc nu yuac ti wê kô K1,000 ge lam le vô xomxo levac tyo manôn di nêl vô i ên nêbê, ‘Xomxo levac, a xovô ên a nêbê ông xomxo wê ông mi keac myam pilahi. Di yuac wê xomxo ti yev vê vac ge, ông la kô nôn vac, di xomxo wê vông yuac ge od ông la kô nôn vac di kô ya sola hixôn.

25 Om a xona ên ông dì a kô K1,000 wê ông vông vô a ge mi la yev lôva mi lii vac dì hivun xôn. Om ông hôm ông mone.’

26 ‘Lêc xomxo levac tige nêl lax vô i ên nêbê, ‘Ông xomxo yuac nipaên wê ông vô nim maên. Ông nêl ên ông nêbê a la kô nôn vac yuac wê xomxo yev vê vac ge, dì xomxo wê vông yuac ge od a la kô nôn vac dì kô ya sola hixôn.’ **27** Ông nêl bêge, lêc bêna lêc ông o kô mone a vông mi la lii vac xumac beng lêmê? Ên ông obêc vông bêge ge od buc wê a ob vena lec ge od a ob kô K1,000 wê a vông vô ông ge dì kô ya wê solaên ge hixôn.’ **28** Xomxo levac tyo nêl bêge, nang dêc nêl vô nue yuac ya bêga nêbê, ‘Xam vô K1,000 vêl ên xomxo yuac tige dì vông vô a nug yuac ngwe wê kô K5,000 pyap ge ên i kituc lec.’ **29** Ên xomxo ti xovôênnihiha obêc dô vô i ge od a obêc vông mangwe hixôn. Dì xomxo ti xovôênnihiha obêc ma ge od a obêc vô xovôênnihiha wê i vông ge vêl ên i.’ **30** Om xam hôm xomxo yuac nipaên tige xôn dì nêx i loc vac vigwe mapitoc. Vac vigwe tige xomxo obêc byag dì kic nivu lecma.’

Yesu nêl kiyang lec buc wê ob yaxênnihiha vihati lec ge

31 ‘Obêc buc timuên ge Xomxo Nu ob lop mi lôm hixôn xêseac wê i vông ge dì angela vihati ob lam hixôn i, dì ob dô lec sia king dì yaxênnihiha nêl kiyang.’ **32** Vô buc tige xomxo vihati yang ob kituc lam le vô i manôn, dì i ob vông he le kidu yuu tiyi xochê xomxo wê viac bwoc sipsip yuu memek ge od vînôo bwoc sipsip le kidu ngwe dì memek le kidu ngwe.

33 Om ob vông bwoc sipsip le vô vigê hiyôv dì ob vông memek le vô vigê kêt. **34** Mêd xomxo levac tige ob nêl vô he wê dô vô vigê hiyôv ge bêga nêbê, ‘Mag Anutu vông vizid niviha vô xam, om xam lam dô vac vigwe niviha wê Anutu nêl xam lêm lec ge. Vô buc mugênilage wê Anutu tung lag yuu kibun taxlee ge, od viac vigwe tige pyap ên nêb ob vông vô xam.’

35 En ilage vip den a om xam vông yaên mi a xa, dì a nêb a ob num mia om xam vông mia ningigooênnihiha vô a mi a num, dì a lam xochê xomxo vîtevac ge vô xam lêc xam viac a niviha, **36** dì ngakwi ma ên a, om xam vông a nêg ngakwi, dì yidac vông a om xam vev ngwax vô a niviha, dì a la dô vac xumac kalabuhu dì xam lam wê a.’

37 ‘Om xomxo niviha ob nêl lax vô ên nêbê, ‘Apumtau, vô buc tina wê vip den ông om xe vông yaên mi ông wa? Di vô buc tina wê ông nêb ông ob num mia om xe vông mia mi ông numê?’ **38** Dì vô buc tina wê ông lam xochê xomxo vîtevac ge vô xe om xe viac ông niviha? Di vô buc tina wê ngakwi ma ên ông om xe vông ông nêg ngakwi?’ **39** Dì vô buc tina wê yidac vông ông mi xe vev ngwax vô ông dì viac ông niviha ge, dì vô buc tina wê ông la dô vac xumac kalabuhu om xe loc xê ôngê?’

40 ‘Mêdêc xomxo levac tige ob nêl vô he bêga ên nêbê, ‘A nêl vixôhilôgnôn vô xam bê xam ngidu a lige wê lê nipwo ge xôn ya susu tibêgee, om tiyi xochê xam ngidu a xôn.’

41 ‘Pyap dêc obêc nêl vô he wê dô vô vigê kêt gee bêga nêbê, ‘Xam gee wê xam ob kô myaviwen nipaên. Xam pec vêl ên a magnôn mi loc vac ngwax wê yibén obêc ma ge. Anutu viac ngwax tige pyap vô Seten he nue yuac.’ **42** En ilage vip den a lêc xam o vông yaên mi a xa lêm, dì a nêb a ob num mia lêc xam o vông mia mi a num lêm, **43** dì a lam xochê xomxo vîtevac ge vô xam lêc xam o viac a niviha lêm, dì ngakwi ma ên a lêc xam

o vông ngakwi vô a lêm, dì yidac vông a, dì a la dô vac xumac kalabuhu lêc xam o lam wê a lêm.’

⁴⁴ “Mêd xomxo nipaên ob kinêg vô i ên nêbê, ‘Apumtau, vô buc tina wê vip den ông, dì ông nêb ông ob num mia, dì ông lam xochê xomxo vitezvac ge, dì ngakwi ma ên ông, dì yidac vông ông, dì ông la dô vac xumac kalabuhu, lêc xe o ngidu ông xôn lêmê?’

⁴⁵ “Om xomxo levac tyo obêc nêl i lax vô he bêga ên nêbê, ‘A nêl vixôhilôg nôn vô xam bê xam o ngidu xomxo wê lê nipwo ge xôn ya susu tibégee lêm, om tiyi xochê xam o ngidu a xôn lêm.’ ⁴⁶ Xomxo levac obêc nêl bêge, dì he wê nipaên ge obêc la yaxêñ myavinê levac luta lêc luta. Lêc xomxo wê niviha ge obêc la dô maviha luta lêc luta.”

26

He Yuda levac hilu kiyang ên nêb ob hi Yesu i yib (Mak 14:1-2; Luk 22:1-2; Jon 11:45-53)

¹ Yesu nêl kiyang tigeer vihati pyap dêc nêl vô nue ngivihi ên nêbê, ² “Xam xovô bê buc yuu ob lam la vêl, nang dêc obêc buc Pasova, dì xomxo obêc vông Xomxo Nu la vac tibii vigê ên he i hi i yib lec xax pola.”

³ Mêdêc xomxo levac wê mi si daa gee hixôn he Yuda levac levac gee la kitucma vac Kaiapas ben. Kaiapas ge xomxo daa sién nêl levac. ⁴ He keac vôma dì myag môp wê nêb ob hôm Yesu xôn xôpacêñ dì hi i yib ge. ⁵ Lêc he nêl vôma ên nêbê, “Il ob hôm Yesu xôn lec buc ngibua wê il mi xovô buc Isip ilage lêm, ên xomxo tibeac lam dô hixôn om obêc yê wê il hôm Yesu xôn ge od ob yê nipaên dì nidiidun levac obêc tyip.”

Vêx ti too mia nivivea niviha lec Yesu bazub (Mak 14:3-9; Jon 12:1-8)

⁶ Yesu la vigwe Betani dì la dô vac Saimon ben. Saimon ge xomxo ti wê kityax mahizihizi ya ninivi ilage lêc gwêbaga vô niviha lec. ⁷ Yesu dô mi ya hixôn i dì vêx ti kô butol niviha wê mia nivivea niviha le vac ge ti mi lam vô i. Mia tige mone levac, lêc vêx tige too lec Yesu bazub. ⁸ Lêc Yesu nue ngivihi yê dì xêyaa vô nipaên dì nêl vôma ên nêbê, “Bêna lêc vêx tige too mia tige sea? ⁹ Mia tige tiyi wê il ob vông mi tibii i kisuu lec mone levac dì il ob vông mone vô he wê nêl susu maêñ gee lê, lêc vêx tige too sea.”

¹⁰ Yesu xovô kiyang wê he nêl vôma ge, om nêl vô he ên nêbê, “Bêna lêc xam vông viyin vô vêx tige? Môp wê vêx vông vô a ge niviha. ¹¹ Ên xomxo wê nêl susu maêñ ge ob dô hixôn xam luta. Lêc a ga, a ob dô xuhu dia hixôn xam lêm. ¹² Vêx tige too mia nivivea lec a ên nêb ob viac a nignivi tax ên xomxo obêc yev a vac lôva. ¹³ A nêl hixôn nôn vô xam bêga bê vac vigwe vihati wê xomxo obêc la nêl xolac tiga vac ge od xomxo ob nêl môp wê vêx tige vông ge kitong hixôn ên xomxo vihati i ngô dì xovô.”

Judas nêb ob vông Yesu vac xomxo levac vigê (Mak 14:10-11; Luk 22:3-6)

¹⁴ Yesu nue ngivihi wê vigê yuu dì tô mi la yuu ge ti lê nêbê Judas Iskaliot la vô xomxo levac wê mi si daa gee, ¹⁵ dì kinêg ên nêbê, “A obêc vông Yesu vac xam vigêm ge od xam ob vông vatya vô a?” Om he vông mone silva kehe ti dì vigê yuu vô i. ¹⁶ Om vô buc tige Judas myag môp wê ob vông Yesu vac he vigê ge.

*Yesu he nue ngivihi ya yaén vô buc Pasova
(Mak 14:12-21; Luk 22:7-14,21-23; Jon 13:21-30)*

¹⁷ Buc tigee buc ngibua wê he Yuda ob ya blet wê yis maên ge ên nêb ob xovô buc Isip ilage. Om vô buc ngibua taxlee ge Yesu nue ngivihi val kinêg vô i ên nêbê, “Ông nêb xe la viac yaén wê il ob xa lec buc Pasova ge vac xumac tina?” ¹⁸ Léc Yesu nêl vô he ên nêbê, “Xam loc vac vigwe Jelusalem dì loc nêl vô xomxo tige bêga bê, ‘Xolac kehe nêl bêga ên nêbê, A nêg buc vô kwabo lec, om a hixôn nuge ngivihi, xe ob xa yaén vac ông bom vô buc Pasova wê il mi xovô buc Isip ilage.’” ¹⁹ Yesu nêl bêge, om nue ngivihi la vông i tiyi wê i nêl ge di la viac yaén wê he ob ya ge.

²⁰ Mêdec hiyôv hoo la, dì Yesu he nue ngivihi vigê yuu dì tô mi la yuu, he dô mi ya, ²¹ mêtdec Yesu nêl vô he ên nêbê, “A nêl vixôhilôg nôn bêga bê xam ti ob nêl a kitong dì vông a la vac tibii vigê.” ²² Om he nilô vô viyin dì he toto kinêg vô Yesu ên nêbê, “Apumtau, obêc a, me?” ²³ Léc Yesu nêl lax vô he ên nêbê, “Xomxo ti wê xii xôn vigêm obêc la vac dipac nilô ge wê ob nêl a kitong dì vông a vac tibii vigê.” ²⁴ Vixôhilôg, a Xomxo Nu, a ob xib tiyi xocbê xolac nêl lec a ilage. Léc xomxo ti wê ob nêl a kitong dì vông a la vac tibii vigê ge obêc kô myaviwen nipaên lec. Ta obêc kô i ilage lêm ge od obêc vô nivîha vô i, ên obêc tulec myaviwen nipaên lêm!” ²⁵ Mêdec Judas wê ob nêl i kitong ge kinêg ên nêbê, “Xolac kehe, obêc a, me?” Om Yesu nêl lax vô i ên nêbê, “Ông nêl i tiyi.”

*Yesu vông môp paha wê pasa ge vô nue ngivihi
(Mak 14:22-26; Luk 22:15-20; 1 Kolin 11:23-25)*

²⁶ Yesu he nue ngivihi dô mi ya, mêtdec Yesu hôm blet ti dì kitaa lec, mêtdec hibù dì vông vô he dì nêl ên nêbê, “Xam hôm mi wa. Ga a nignivi.” ²⁷ Nang dêc hôm kap wê mia wain le vac ge, dì kitaa lec, dì vông vô he di nêl ên nêbê, “Xam vihati hôm mi num, ²⁸ ên ga a hi wê ob vông

kiyang wê Anutu hilu ilage vô nôn lec. Om a obêc kipyax a hi sea ên i kitya xomxo tibeac nêl nipaên vêl.” ²⁹ A nêl vô xam bêga bê a obêc num mia wain ti i tii vac lêm dì i la tyip vô buc wê a ob num wain paha hixôn xam vac Mag Anutu ben ge.”

³⁰ Pyap dêc he vông lilo ti dì la vixun dì la lec kitôn Oliv.

*Yesu nêl ên nêbê Pita ob yax i vun
(Mak 14:27-31; Luk 22:31-34; Jon 13:36-38)*

³¹ Mêdec Yesu nêl vô nue ngivihi ên nêbê, “Vô bucên tiga xam vihati ob pec ên viyin wê ob val tulec a ge. Ên kiyang yêp vac xolac bêga nêbê, ‘A ob hi xomxo ti wê viac bwoc sipsip ge om sipsip obêc pec dì moo sea.’” ³² Xolac nêl bêge, lêc a nêl vô xam bêga bê a obêc kidi lec magviha dì mug la Galili dì xam obêc timu.” ³³ Om Pita nêl vô Yesu ên nêbê, “He vihati obêc sea ông ge od he ob sea, lêc a mô ti, a ob sea ông lêm.” ³⁴ Léc Yesu nêl vô i ên nêbê, “A nêl vixôhilôg nôn vô ông bê vô bucên tiga ông obêc yax a vun lu yon tax dì kokilêx obêc divô vya timuên.” ³⁵ Léc Pita nêl vô i ên nêbê, “Tibii obêc hi a xib hixôn ông ge od pyap, lêc a ob yax ông vun lêm.” Di nue ngivihi vihati nêl tiyi xocbê Pita nêl ge.

*Yesu la kitaa gê Getsemani
(Mak 14:32-42; Luk 22:39-46)*

³⁶ Yesu he nue ngivihi loc mi la vigwe ti lê nêbê Getsemani, di Yesu nêl vô nue ngivihi ên nêbê, “Xam dô ga ên a ob la ganê ên la kitaa.” ³⁷ Mêd Yesu kô Pita hixôn Sebedi nu yuu mi he la, lêc Yesu nilô vô viyin mabu ên xovô viyin levac wê ob tulec i ge. ³⁸ Om nêl vô yon ên nêbê, “A nilôg vô viyin levac tiyi xocbê a ob xib ge. Om mon dô ga di dô mamviha hixôn a.” ³⁹ Mêd Yesu la teva tya, di la kipôm manôn vac kibun di kitaa ên nêbê, “Mag, obêc tiyi ge od viyin levac tige i o lêc tulec a lêm. Lêc a nêb ông o lêc vông i tiyi kiyang wê a nêl ga lêm. Nge, ông vông i tiyi xovôên wê ông vông ge.”

⁴⁰ Pyap dêc Yesu milax vô nue ngivihi yon di yê wê yon yêp ge, om nêl vô Pita ên nêbê, “Bêna lêc mon wêpê? Mon o tiyi

wê mon ob dô mamviha hixôn a buc myabo tya ge lêmê? ⁴¹ Mon dô mamviha di kitaa êdêc viyin ti i o lêc yaxêñ mon di pwoo mon pec lêm. Ên nilôm nêb ob vông yuac lê, lêc nimnivi vô viyin.”

⁴² Nang dêc Yesu la teva tya nang di la kitaa lu ngwe tii vac bêga ên nêbê, “Mag, ông obêc nêb viyin levac tiga i tulec a ge od pyap. A ob vông i tiyi xocbê ông nêl ge.” ⁴³ Pyap dêc vena yê wê yon manôn yêp om yon yêp ge. ⁴⁴ Om Yesu sea yon di lax mi la kitaa lu ti wê vông yon ge, di lax kitaa tiyi xocbê la kitaa taxlee ge.

⁴⁵ Pyap dêc Yesu vena vô yon di nêl vô yon ên nêbê, “Bêna lec mon diwêp seac vêlê? Mon wê lê, hiyôv manôn ga wê xomxo ob vông a, Xomxo Nu, vac tibii nipaêñ vigê. ⁴⁶ Om mon kidi lec ên il ob la. Wê! Xomxo ti wê ob vông a la vac tibii vigê ge val le kwabo.”

Judas Iskaliot vông Yesu la vac Yuda levac vigê (Mak 14:43-50; Luk 22:47-53; Jon 18:3-12)

⁴⁷ Yesu gên nêl kiyang tibêge, di Judas Iskaliot wê Yesu nue ngivihi ti ge val. Di xomxo kidu levac wê hôm yipac yuu xax gee val hixôn, ên xomxo levac wê mi si daa gee hixôn he Yuda levac levac vông he lam hixôn Judas. ⁴⁸ Om Judas wê nêb ob vông Yesu vac tibii vigê ge nêl kiyang vô he tax ên nêbê, “Xomxo ti wê a ob nga i lia ge, ge xomxo tyo tige mê. Om xam hôm i xôn.” ⁴⁹ Nêl bêge, mêtêc lutibed val vô Yesu di nêl vô i ên nêbê, “Bucêñ xolac keheê” di nga i lia. ⁵⁰ Mêd Yesu nêl vô i ên nêbê, “Lig, môp wê ông lam ên nêb ông ob vông ge, ông vông lutibed.” Mêd xomxo kidu levac lam hôm Yesu xôn pilahi.

⁵¹ Lêc xomxo wê dô hixôn Yesu ge ti tul yipac vêl ên bwoc ninivi di sap xomxo levac wê mi si daa ge nue yuac ti ninya lihi vilu la vêl. ⁵² Lêc Yesu nêl vô i ên nêbê, “Hoo yipac i lôc vac bwoc ninivi. Ên he wê vông vevac mi hi xomxo ge, vevac obêc tulec he mi hi he yib. ⁵³ Lêc mêtêc ông xo ên ông nêb a tiyiên ma wê a obêc kitaa vô Mag di i vông angela tibeac hiwocên luu xomxo vevac kidu levac vigê yuu di tô mi la yuu vêl ge lam lutibed vô a ên he i lam ngidu a xôn. ⁵⁴ Lêc a obêc vông bêge ge od kiyang wê yêp vac xolac ge obêc vô nôn lec tibêna? Ên xolac nêl ên nêbê viyin levac obêc tulec a.”

⁵⁵ Mêd Yesu nêl vô xomxo kidu levac tige bêga ên nêbê, “Xam kô yipac yuu xax di val vô a tiyi xocbê xam lam vô tibii yôdac ti. Lêc tiyi buc vihati a mi dô hixôn xam vac Anutu xumac ngibua di a nêl xolac vô xam, lêc xam o hôm a xôn lêm. ⁵⁶ Lêc môp wê xam vông vô a gwêbaga ge vông

xolac wê plopete kivuu ilage vô nôn lec.” Yesu nêl kiyang tige pyap dî nue ngivihi pec mi moo sea.

Yuda levac levac vông kot vô Yesu

(Mak 14:53-65; Luk 22:54-55,63-71; Jon 18:13-14,19-24)

⁵⁷ Mêd he wê hôm Yesu xôn gee didii i mi la vac Kaiapas ben. Kaiapas ge xomxo daa sién nêl levac. Xomxo levac wê xovô Moses xolac ge hixôn he Yuda levac levac, he la kitucma mi dô tax. ⁵⁸ Mêdêc Pita timu vô Yesu vixa mi la, lêc le la teva teva, om mila vac xenac nilô wê Kaiapas ben yêp vac ge mi la dô hixôn Kaiapas nue yuac wê viac vigwe ge ên nêb ob yê bê xomxo ob vông bêna vô Yesu.

⁵⁹ Mêd xomxo levac wê mi si daa gee hixôn he kaunsil vihati, he myag tibii wê ob vô nilô vô Yesu ge, ên he nêb he ob hi i yib. ⁶⁰ Mêd tibii tibeac val so kiyang lec Yesu, lêc he Yuda levac levac gee o tulec kiyang ti tiyi wê ob hi Yesu lec ge lêm. Nang dêc timuên ge xomxo yuu val ⁶¹ nêl ên nêbê, “Xomxo tige nêl bêga nêbê, ‘A tiyi wê a ob dii Anutu xumac ngibua tiga vêl dî lox vac i tiyi buc yon.’”

⁶² Om xomxo daa sién nêl levac tige kidi lec di nêl vô Yesu ên nêbê, “Ông ob nêl kiyang ti lax vô he, me? Ông xovô kiyang nipaên wê he nêl lec ông ge kehe, me?” ⁶³ Lêc Yesu keacén ma. Mêdêc xomxo levac tige nêl vô i ên nêbê, “A nêl vô ông lec Anutu maviha lê bê ông nêl ông kitong vô xe bê ông Kilisi wê Anutu nu ge, me?”

⁶⁴ Om Yesu nêl vô i ên nêbê, “Ông nêl i tiyi. Lêc a nêl vô xam bêga bê obêc buc timuên ge od xam ob wê a, Xomxo Nu, a obêc la dô vô Anutu xézikêc kehe vigê hiyôv, dî dô vac viyobtoc lag puunê dî lam.”

⁶⁵ Mêd xomxo daa sién nêl levac tige xêyaa vô myavinê, om lêx ici va ngakwi dî nêl ên nêbê, “Xomxo tige so vya vô Anutu ên nêbê Anutu nu i. Om il ob nêl xomxo ya i lam nêl kiyang ti lec i i tii vac lêm. Ên ici va so vya vô Anutu mi xam ngô pyap. ⁶⁶ Om xam nêb il ob vô bêna vô i?” Mêdêc he vihati nêl lax vô i ên nêbê, “Xomxo tige nêl nipaên tiyi wê il ob hi i yib lec ge.”

⁶⁷ Mêd he pisuv myaluc la vac Yesu manôn, dî he ya lun vigê dî hi i, di ya pitap i manôn ya vigê, ⁶⁸ di nêl vô i ên nêbê, “Ông nêl ên ông nêbê ông Kilisi, om nêl xomxo ti wê hi ông ge lê mi xe ngô.”

Pita yax Yesu vun

(Mak 14:66-72; Luk 22:56-62; Jon 18:15-18,25-27)

⁶⁹ Pita dô vixun vac xenac nilô wê Kaiapas ben yêp vac ge, lêc dô kibun, mêd vêx yuac ti val nêl vô i ên nêbê, “Ông ga wê ông mi dô hixôn Yesu wê ben Galili ge ti mêmê.” ⁷⁰ Lêc Pita yax Yesu vun vô he vihati manôn di nêl ên nêbê, “A lungê kiyang wê ông nêl ge kehe.”

⁷¹ Nang dêc Pita kidi mi la dô xenac kehe kwabo vô vuayen, dî vêx yuac ngwe yê dî nêl vô tibii wê dile kwabo ge ên nêbê, “Xomxo tige wê mi dô hixôn Yesu Nasalet.” ⁷² Lêc Pita yax Yesu vun tii vac nang ên nêbê, “A nêl vixôhilôg nôn bê a o xovô xomxo tige lêm.” ⁷³ He dô mahigun dia tya di tibii ya val nêl vô Pita ên nêbê, “Vixôhilôg, xe xovô ên xe nêbê ông ge Yesu nue ngivihi ti, ên ông mi keac vac tibii Galili vya om nêl kitong ên nêb ông ge ông xomxo Galili ti tiyi xochê Yesu ge.” ⁷⁴ Lêc Pita nêl ên nêbê, “A obêc nêl kiyang nôn lêm ge od Anutu i vông myaviwen nipaên vô a. Om a nêl vixôhilôg bê a o xovô xomxo tige lêm.” Pita nêl kiyang tige mi

tiyôô dì kokilêx hi vya. ⁷⁵ Mêd Pita xovô kiyang wê Yesu nêl vô i bêga nêbê, “Ông obêc yax a vun lu yon tax dì kokilêx obêc hi vya timuên.” Pita xovô kiyang tige om lop mi la xenac kehe dì la byag levac.

27

He kô Yesu mi la vô Pailat (Mak 15:1; Luk 23:1-2; Jon 18:28-32)

¹ Vigwe vidii, dì xomxo levac wê mi si daa gee hixôn he Yuda levac levac, he vihati kitucma dì keac lec kiyang wê ob hi Yesu i yib lec ge. ² Om he ku Yesu xôn dì kô mi la vông vac gavman levac Pailat vigê.

Judas Iskaliot yib (Sinale 1:18-19)

³ Judas Iskaliot wê vông Yesu vac tibii vigê ge yê wê he nêb he ob hi Yesu i yib ge. Om nilô vô viyin ên môt nipaên wê i vông ge, om kô mone silva kehe ti dì vigê yuu mi la ên nêb ob tung i lax dô vô xomxo levac wê mi si daa gee hixôn he Yuda levac levac. ⁴ Om la nêl vô he ên nêbê, “A nêg nipaên, ên a vông xomxo ti wê nipaên ti o yêp vô i lêm ge loc vac xam vigêm di xam ob hi i yib.” Lêc he nêl vô i ên nêbê, “Xe kiyang ti o yêp vô xe lêm. Nge, ge yêp vô ôcông va.” ⁵ Mêd Judas nêx mone silva tige la lec kibun vac Anutu xumac ngibua nilô di lop mi la dì la ku kwa di yib.

⁶ Mêd xomxo levac wê mi si daa gee la hôm mone silva tigee mi kô, di nêl vôma ên nêbê, “Mone tiga wê hi xomxo yib ge, om o tiyi wê il ob tung hixôn mone daa ge lêm.” ⁷ Om he keac vôma dì hilu kiyang ên nêb ob kô mone mi la kisuu kibun vô tibii wê pitii dêg ge ên nêb kibun tige i tu vigwe yibêñ wê he ob yev tibii vigwe teva vac ge. ⁸ Mêgem he nêl kibun tige lê nêbê kibun wê xomxo hi kipyax lec ge, dì lê tige yêp gwêbaga hixôn.

⁹ Om kiyang wê plopete Jelemaia nêl ilage vô nôn lec. Jelemaia nêl bêga ên nêbê,

“He kô mone silva kehe ti dì vigê yuu tige. He Islel nêl ên nêbê mone tige wê he kisuu xomxo ti ya. ¹⁰ He kô mone tige mi la kisuu kibun vô tibii wê pitii dêg ge tiyi xocbê Apumtau nêl vô a ge.”

Pailat kinêg kiyang vô Yesu (Mak 15:2-5; Luk 23:3-5; Jon 18:33-38)

¹¹ He vông Yesu la le vô gavman levac Pailat manôn, dì gavman levac tige kinêg vô i ên nêbê, “Ông ge king wê he Yuda vông ge, me?” Om Yesu lee yuu ên nêbê, “Ông nêl i tiyi.” ¹² Dì xomxo levac wê mi si daa gee hixôn he Yuda levac levac vô nilô vô Yesu, lêc Yesu o nêl kiyang ti lax vô he lêm.

¹³ Mêdêc Pailat nêl vô i ên nêbê, “Ông ngô kiyang tibeac wê he vô nilô vô ông ge, me?” ¹⁴ Lêc Yesu o keac ti lec kiyang nipaên wê he nêl lec i ge lêm. Om gavman levac tige xo kiyang tibeac lec Yesu.

Yesu le vô Pailat manôn (Mak 15:6-15; Luk 23:13-25; Jon 18:39-19:16)

¹⁵ Tiyi klismas vihati vô buc ngibua wê he Yuda mi xovô buc Isip ilage, he Yuda mi nêl xomxo kalabuhu ti lê vô Pailat dì Pailat piwelac i vêl di vông i la. ¹⁶ Dì vô buc tige xomxo nipaên ti lê nêbê Jisas Balabas dô vac xumac kalabuhu. Xomxo tibeac xovô i ên nêbê xomxo nipaên. ¹⁷ Xomxo Yuda tibeac hiwocên kitucma vô Pailat, dì Pailat kinêg ên nêbê, “Xam

nêb a piwelac xomxo yuu ga ngwe na i loc vô xamê? Xam nêb a piwelac Balabas me a piwelac Yesu wê he mi nêl lê nêbê Kilisi ge?”¹⁸ Pailat xovô ên nêbê he Yuda levac yê Yesu nipaên, om vông i lam vac i vigê.¹⁹ Pailat dô lec sia wê mi dô lec dì mi ngô xomxo kiyang ge, mêtêc vînê vông kiyang lam vô i bêga nêbê, “Ông o léc vông xomxo niviha tige i vô nipaên lêm, ên gwêbaga a xê vivia bucén ti lec i om vông a nilôg vô viyin.”

²⁰ Xomxo levac wê mi si daa gee hixôn he Yuda levac levac gee, he nêl kiyang la vac xomxo tibeac niôl dì he hôm xôn nêbê he ob tyuc bê Pailat i piwelac Balabas vêl dì hi Yesu i yib.²¹ Pailat kinêg vô he tii vac nang ên nêbê, “Xam nêb a piwelac xomxo yuu ga ngwe na vêl dì vông i lôc vô xamê?” Lêc he nêl ên nêbê, “Balabas.”²² Om Pailat kinêg vô he ên nêbê, “Om Yesu wê he mi nêl lê nêbê Kilisi ge, a ob vông bêna vô i?” Lêc he vihati nêl ên nêbê, “Tul i lec xax pola!”²³ Lêc Pailat kinêg ên nêbê, “Il ob hi i yib lec kehe tina?” Lêc he tyuc levac ên nêbê “Tul i lec xax pola!”

²⁴ Pailat xovô wê he ngôen i kiyang obêc ma ge, dì yaxén wê he obêc vông vevac vô i ge, om hôm mia dì lipac vigê vac mia vô he vihati manôn, dì nêl wê he ên nêbê, “Xomxo tiga hi obêc kipyax sea ge od myaviwen obêc yêp vô a lêm. Nge, obêc yêp vô xacxam va.”²⁵ Mêtêc he vihati nêl lax vô i ên nêbê, “Myaviwen tige i lam vô xe dì i yêp vô xe nuge hixôn!”²⁶ Om Pailat piwelac Balabas vêl dì vông i la, dì nêl om he pisa Yesu ya yhi. Pyap dêc Pailat vông i la vac nue vevac vigê ên nêb he i tul i lec xax.

*Tibii vevac so vya vô Yesu
(Mak 15:16-20; Jon 19:2-3)*

²⁷ Mêtêc gavman levac Pailat nue vevac kô Yesu mi la vac Pailat ben, dì he keac lie vevac kidu levac lam.²⁸ Mêtêc he lam kwax Yesu ngakwi vêl ên i, dì kô ngakwi hi ti tiyi xochê king mi vinyum ge mi la vinyum lec Yesu,²⁹ dì he buu kipomac yin mi tung lec i bazub xochê kilung ge, dì vông duvac ti vac i vigê hiyôv ên nêb i kô. Mêtêc he yev vixa kitu vô dì pimil i pisiv dì nêl vô ién nêbê, “O king wê Yuda vông ge, ông dô nimviha.”³⁰ Mêtêc he pisuv myaluc lec i, dì vô duvac vêl dì hi i bazub ya.³¹ He so vya vô i pyap, dì kwax ngakwi hi vêl dì vinyum Yesu vaci ngakwi lec i, mêtêc kô i mi la ên nêb ob la tul i lec xax.

*He tul Yesu la yux lec xax
(Mak 15:21-32; Luk 23:26-43; Jon 19:17-27)*

³² Dì he mila môt ti, lêc mila tulec tibii Sailini ti lê nêbê Saimon, mêtêc he kidu i nêb i kîlê xax pola wê he ob hi Yesu lec ge.

³³ Mêtêc he mila vigwe ti lê nêbê Golgota. Lê tige kehe bêga nêbê bazub len.³⁴ Mêtêc he pilepac kinin kilin hixôn wain dì vông vô Yesu ên nêb i num, om Yesu tep mi yaxén lê, lêc nêbê i numên ob ma.³⁵ Mêtêc he tul i lec pola. Pyap dêc he nêb he ob titang Yesu ngakwi vóma, om he tide mi yê dì titang i tiyi.³⁶ Dì he dô kibun dì dô bin i.³⁷ Dì he kivuu kiyang wê he nêl lec i ge dì la tul vô i bazub kisii ên nêbê, “XOMXO TIGA YESU, KING WÊ HE YUDA VÔNG GE.”

³⁸ Mêtêc he hi tibii yôdac yuu lec xax hixôn, ngwe le vô vigê hiyôv di ngwe le vô vigê kêt.³⁹ Mêtêc xomxo wê vîlee mi la dì lôm ge tipi niba dì so vya vô Yesu⁴⁰ ên nêbê, “Ông wê ông nêb ông ob dì Anutu xumac ngibua vêl dì lox vac i tiyi buc yon ge, ông ngidu ôcông va xôn. Ông obêc Anutu nu ge od ông lop mi lam vêl ên xax.”⁴¹ Mêtêc xomxo levac wê mi si daa gee

hixôn he wê xovô Moses xolac gee dì he Yuda levac levac, he êno so vya vô Yesu dì nêl vôma ên nêbê. ⁴² “Xomxo tige ngidu xomxo tibeac xôn, lêc o tiyi wê ob ngidu ici va xôn ge lêm. Xomxo tige obêc Islel nêñ king ge od i lop vêl ên xax ên il xê dì vông i vin i. ⁴³ Xomxo tige nêbê i Anutu nu, dì i vông i vin ên nêbê Anutu ob ngidu i xôn. Om Anutu xêyaa obêc vin lec i ge od i vô i vêl ên myavinê wê tulec i ge.” ⁴⁴ He nêl bêge, dì tibii yôdac yuu wê he tul lec xax hixôn Yesu ge, yuu so vya vô Yesu hixôn.

Yesu yib

(Mak 15:33-41; Luk 23:44-49; Jon 19:28-30)

⁴⁵ Hiyôv tyip kitôn mêd vigwe vihati vô mapitoc dì i mila vô hiyôv manôn yon wê hucen ge. ⁴⁶ Vô kwabo lec hiyôv manôn yon, Yesu tyuc vya levac ên nêbê, “Eli, eli, lama sabaktani?” Kiyang tige kehe bêga nêbê, “A Anutu, a Anutu, bêna lêc ông sea a?” ⁴⁷ Mêdêc xomxo wê le kwabo vô Yesu ge ngô kiyang wê i nêl ge, om he ya so ên he nêbê, “Xomxo tige kiyag vya lec Ilaija.” ⁴⁸ Mêd lutibed he ti tup mì la kô mia myamilumac dì too mia kilin vac dì kilax vac ngising dì hôm i la kisii vô Yesu mya ên nêb i num. ⁴⁹ Lêc he ya nêl vô i ên nêbê, “Dô tya lê, ên il ob dô mì yaxên bê Ilaija ob val ngidu i xôn, me?” ⁵⁰ Lêc Yesu tyuc vya levac tii vac dì vông myakîlhô la dì yib.

⁵¹ Mêd lutibed nivimihi levac ti wê yux vac Anutu xumac ngibua ge lêx la yuu vac kisii dì la tô vô myahipu, dì ngiyêg yoc, dì ngidax levac hibu sea, ⁵² di lôva mya tax, dì xomxo vông vinén wê yib ilage, he tibeac kidi lec hixôn ninivi ⁵³ dì lam vac lôva mi la, di buc timuêñ wê Yesu kidi lec ge he la hilung he vô xomxo tibeac vac vigwe ngibua Jelusalem.

⁵⁴ Yesu yib, dì tibii levac wê viac nue vevac 100 ge ti hixôn nue vevac ya dô bin Yesu wê yux lec xax ge, dì he yê wê ngiyêg vông kibun yoc dì tixuu tixuu mangwe val hixôn, om he xona mabu dì nêl ên nêbê, “Vixôhilôg nôn, xomxo tige Anutu nu.”

⁵⁵ Vêx tibeac le teva dì yê ma la Yesu. Vô buc wê Yesu dô Galili ge vêx tigee mi timu vô i vixa dì viac i mi he la Jelusalem. ⁵⁶ He ti Malia wê ben Makdala ge, di ngwe Jems yuu Josep ta Malia, dì ti Sebedi nu yuu ta.

Josep lii Yesu ninivi vac lôva wê he kiden vac ngidax ge

(Mak 15:42-47; Luk 23:50-55; Jon 19:38-42)

⁵⁷ Vigwe huc, dì xomxo Alimata ti lê nêbê Josep wê vông i vin Yesu ge val. Josep ge xomxo wê i susu tibeac ge. ⁵⁸ Josep la vô Pailat dì la kitaa Yesu ninivi nêb ob kô mi la lii vac lôva. Om Pailat tyuc lec dì he vông Yesu ninivi vô Josep. ⁵⁹ Mêd Josep kô Yesu ninivi mi la lii vac nivimihi kwem paha yang ti ⁶⁰ mi la lii i la vac lôva paha wê i vông wê ici va kiden vac ngidax ge. Pyap dêc vixog ngidax levac ti la le vac lôva mya xôn, dì i loc mi la. ⁶¹ Malia Makdala yuu Malia ngwe, yuu dô kwabo vô lôva dì yuu yê.

Tibii vevac viac lôva

⁶² Buc wê he Yuda mi viac yaêñ wê he ob ya lec buc sabat ge lam la vêl, di titige xomxo levac wê me si daa gee hixôn he Palisi, he la kitucma vô Pailat, ⁶³ dì nêl vô i ên nêbê, “Xomxo levac, xe xovô kiyang wê xomxo kityooën tige nêl vô buc wê gên dô maviba ge. Xomxo tyo nêl bêga ên nêbê, ‘Buc yon obêc lam la vêl lê, lêc a obêc kidi lec magviha.’” ⁶⁴ Nêl bêge, om ông nêl ên nume vevac he i viac lôva xêkizêc ta i tiyi buc yon, ên Yesu nue ngivihi ob lam kô ninivi mi la vun dì kityoo il ên nêbê Yesu

kidi lec maviha vac yibén. He obêc vông bêge ge od kiyang kityooén wê he ob nêl ge obêc luu kiyang kityooén wê Yesu nêl ge vêl.”⁶⁵ Mêdêc Pailat nêl vô he ên nêbê, “Xam kô nume yuac mi loc pitii ngidax mya xôn ên i vô xêkizêc i tiyi xochê xacxam va xovô ge.”⁶⁶ Om he mila pitii lôva mya xôn dì vông vibuên xêkizêc ta dì xomxo le bin.

28

Yesu kidi lec vac yibén

(Mak 16:1-10; Luk 24:1-10; Jon 20:1-18)

¹ Buc sabat lam la vêl dì da pitoc yang, dêc Malia Makdala yuu Malia ngwe, yuu la ên nêb ob la yê lôva. ² Mêdêc lutibed ngiyêg mabu yoc, ên Apumtau nu angela ti lop mi lam gê lag puunê dì lam vixog ngidax la vêl ên lôva mya, dì la dô lec ngidax tige kisii. ³ Angela tige manôn xêseac tiyi xochê deac hixelac ge, dì ngakwi tiyi xochê viyobtoc kwem. ⁴ Om xomxo wê viac lôva gee yê dì xona mabu dì yetac dì tilii sea mi la yêp kibun tiyi xochê xomxo yibén.

⁵ Lêc angela tige nêl vô vêx yuu ên nêbê, “Muu xona ên i ma, ên a xovô wê muu myag Yesu wê he hi lec xax ge. ⁶ Lêc o dô ga lêm, ên kidi lec maviha tiyi xochê kiyang wê i nêl ge. Muu lam wê vigwe wê yêp lec ge. ⁷ Om muu lôc lutibed dì lôc nêl kitong vô nue ngivihi bêga bê Yesu kidi lec maviha vac yibén, di ob mug mi la Galili dì xam ob mila wê i gê tiganê. Kiyang ga a nêl vô muu pyap.”

⁸ Yuu xona mabu, lêc yuu xêyaa vô niviha, dì yuu sea lôva lutibed di tup mi la ên nêb ob la nêl kiyang tige kitong vô Yesu nue ngivihi. ⁹ Yuu lax mi la, lêc Yesu mila vô yuu vac môp dì nêl vidiiën vô yuu. Om yuu val le kwabo vô Yesu dì vyax vigê lec Yesu vixa dì pimil i. ¹⁰ Mêdêc Yesu nêl vô yuu ên nêbê, “Muu xona ên i ma. Muu loc nêl kiyang vô a lige bê he i loc Galili, ên he obêc yê a gê ganê.”

Tibii vevac wê le bia ge nêl kiyang kityooén

¹¹ Om vêx yuu ge gên loc môp, lêc tibii vevac wê viac lôva gee ya la Jelusalem dì la nêl kiyang tige vihati kitong vô xomxo levac wê mi si daa gee. ¹² Om xomxo levac tigee la kitucma hixôn he Yuda levac, dì he keac lec kiyang tige. Om vông mone levac vô tibii vevac wê viac lôva ge, ¹³ dì

nêl vô he ên nêbê, “Xam loc nêl vô xomxo bê, ‘Vô bucén xe xêp dì Yesu nue ngivihi lam kô ninivi mi la vun.’¹⁴ Xam loc nêl bêge, lêc gavman levac obêc ngô kiyang tige dì kunac xam ge od xe ob vông i ma i tô ya kiyang malehe mangwe dì ob kunac xam lêm.”¹⁵ Om tibii vevac tigee kô mone mi la nêl kiyang kityooén tiyi xochê Yuda levac nêl vô he ge. Om kiyang kityooén tige la nêx lec Yuda ben vihati mi yêp, dì yêp gwêbaga hixôn.

Yesu vông yuac vac nue ngivihi vigê

(Mak 16:14-18; Luk 24:36-49; Jon 20:19-23)

¹⁶ Yesu nue ngivihi vigê yuu dì ti tô mi la ge, he loc mi la vigwe Galili mi la lec kitôn ti wê Yesu nêl ên nêbê he i lêc loc dô lec ge. ¹⁷ Om he mila tyip, di yê Yesu om he yev vixa kitu vô i, lêc he ya niô vông yuu yuu. ¹⁸ Mêdêc Yesu lam kwabo vô he di lam nêl vô he ên nêbê, “Anutu vông xêkizêc lag yuu kibun vihati vô a pyap.”¹⁹ Om a nêl vô xam bê xam loc vac vigwe vihati yang di loc nêl a xolac kitong vô xomxo vihati ên he i vông i vin di tu a nuge. Dì xam loc lipac he lec Mag Anutu hixôn nu tuc dì Myakilôhô

Ngibua yon lê. ²⁰ Dì xam tixuu he ya kiyang vihati wê a nêl vô xam ge ên he i timu vô. Xam ngô lê. A obêc dô hixôn xam i tiyi buc vihati dì i loc tyip lec buc wê lag yuu kibun myahipu obêc tiyôô vac ge.”

MAK Yesu Kîlisi xolac wê Mak kivuu ge

Jon Lipacên nêl Yesu kitong

(Matyu 3:1-12; Luk 3:1-9,15-17; Jon 1:19-28)

1 Kiyang tiga, xolac niviha wê nêl Yesu Kîlisi wê Anutu nu ge kitong.

2 Xolac tiga, plopet Aisaia nêl kitong mugêñ ilage, om Anutu vyâ wê Aisaia kivuu ge yêp bêga nêbê,

“Ngô lê. A ob vông xomxo ti i kô a kiyang mi loc mug ông nêm môp, ên i viac môp wê ông obêc mila vac ge. **3** Om xomxo tige obêc tyuc vyâ vac vigwe mahigun pileva bêga nêbê, ‘Xam viac Apumtau môp wê ob lam vac ge di vông i môp i yêp bôbac.’”

4 Kiyang nêl bêge, mègem Jon Lipacên la vac vigwe mahigun pileva di la nêl xolac vô xomxo ên nêbê he i pilepac he di lipac mia êdêc Anutu i kitya he nêñ nipaén vêl. **5** Om xomxo Jelusalem hixôn xomxo vac vigwe levac Judia vihati la vô Jon di nêl he nêñ nipaén kitong vô i, om he la le vac mia Jodan di Jon lipac he.

6 Jon vinyum ngakwi wê he duu bwoc kamel niviluhu ge di vêx let wê bwoc ninivi ge, di yaêñ wê mi ya ge, hiveac hixôn vinoluc. **7** Mêd Jon nêl xolac vô

xomxo bêga ên nêbê, “Xomxo ti obêc val timuêñ, lêc xêkizêc wê i vông ge luu xêkizêc wê a vông ge vêl, di a o nigviha tiyi wê a ob piwelac yihi vêl ên su wê i vông ge lêm. **8** A ga, a lipac xam ya mia pileva, lêc xomxo tige obêc lipac xam ya Myakilôhô Ngibua.”

Jon lipac Yesu

(Matyu 3:13-17; Luk 3:21-22)

9 Vô buc tigeet Yesu sea ben Nasalet wê yêp vac vigwe levac Galili ge di la vô Jon Lipacên di Jon lipac i vac mia Jodan. **10** Lipac i pyap di Yesu lec mi lôm kehe, lêc lutibed Yesu yê wê lag puunê tax di Myakilôhô Ngibua tu tucluu manôn di lam yêp lec i kisii. **11** Mêd vyâ ti lam hixôn gê lag puunê ên nêbê, “Ông a nug wê a xêgyaa vin lec ông di a xê ông niviha ge.”

Seten yaxêñ Yesu

(Matyu 4:1-11; Luk 4:1-13)

12 Mêd lutibed Myakilôhô Ngibua vông Yesu la vac vigwe mahigun pileva wê xomxo ti dô vacêñ ma ge, **13** di Yesu la dô tiyi xochê buc kehe yuu di Seten yaxêñ i. Vigwe tige, bwoc mavihô dô hixôn, lêc angela lam viac Yesu.

Yesu nêl xolac taxlee gê Galili

(Matyu 4:12-17; Luk 4:14-15)

14 Tîbii tung Jon Lipacên la dô vac xumac kalabuhu, pyap dêc Yesu la vac vigwe levac Galili di la nêl Anutu xolac vô xomxo ên nêbê, **15** “Gwêbaga buc wê Anutu nêl ge ob vô nôn lec, di vigwe kisiinê nu vô kwabo lec. Om xam pilepac xam di vông i vin xolac.”

Yesu tyuc xomxo yuudiyuu la vô i

(Matyu 4:18-22; Luk 5:1-11)

¹⁶ Yesu mila vô mia luaên Galili ninya lêc yê wê Saimon yuu li Andlu nêx leac vac mia luaên tige nêb ob hi pis, ên yuu ge, yuu mi vông yuac mone lec pis hiên. ¹⁷ Om Yesu nêl vô yuu ên nêbê, “Muu lam timu vô a vixag, ên a ob vông muu didii xomxo mi lam vô a i tiyi xocbê muu didii pis vac leac ge.” ¹⁸ Om lutibed yuu sea leac dô xel di la hixôn Yesu.

¹⁹ Mêd yon sea vigwe ge di la teva tyá, lêc mila yê Sebedi nu yuu, Jems yuu Jon wê yuu dô lec dipac di duu yuu leac wê tip sea ge xôn. ²⁰ Mêd Yesu keac yuu lam om yuu sea ma Sebedi hixôn nue yuac he dô lec dipac di yuu la hixôn Yesu.

*Yesu tii vimwo nipaên vêl ên xomxo ti
(Luk 4:31-37)*

²¹ He la dô vac vigwe Kapaneam, dêc buc wê sabat ge od Yesu la vac he xumac lilo di la nêl xolac vô xomxo. ²² Mêd xomxo tigee yetac ên kiyang wê Yesu nêl vô he ge, ên Yesu o tixuu he tiyi xocbê xomxo wê xovô Moses xolac ge lêm. Nge, Yesu nêl kiyang hixôn xêkizêc.

²³ Xomxo ti wê vimwo nipaên dô vac nilô ge dô hixôn he vac xumac lilo tige, om keac via levac ên nêbê, ²⁴ “Yesu Nasalet, ông lam ên ông nêb ông ob vông bêna vô xe? Ông nêb ông ob kitya xe vêl, me? A xovô ông ên a nêbê ông ge xomxo ngibua wê Anutu vông ông lam ge.” ²⁵ Lêc Yesu nêl kiyang xêkizêc la vô i ên nêbê, “Keacén i ma, di lam loc vêl ên xomxo tige.” ²⁶ Mêgem vimwo nipaên tige vô kitiv kitiv xomxo tige di tyuc via levac di sea i di la. ²⁷ Mêd xomxo wê dô mi yê gee yetac mabu di nêl vîma ên nêbê, “Xomxo tige va nêl kiyang bêna? Tige kiyang paha ti. Ên i nêl kiyang hixôn xêkizêc vô vimwo nipaên tiyi xocbê xomxo levac ge, om vimwo nipaên ngô i via di vông i tiyi wê nêl ge.” ²⁸ Di lutibed xomxo nêl Yesu lê vô levac vac vigwe Galili vihati.

*Yesu vông Saimon Pita yen vêxta vô niviha lec
(Matyu 8:14-15; Luk 4:38-39)*

²⁹ He sea xumac lilo di lop mi la vixun, di Jems yuu Jon, yuu la hixôn di he xôn la vac Saimon yuu Andlu ben. ³⁰ Lêc Saimon yen vêxta vông yidac ngwax tum mi diyêp lec pêt, om he nêl kitong vô Yesu. ³¹ Om Yesu la le kwabo vô i di hôm lec i vigê di vông i le kisii, di yidac tige tip la di i vô niviha lec, mêd la myêl yaén mi vet he ya.

*Yesu vông xomxo yidac tibeac vô niviha lec
(Matyu 8:16-17; Luk 4:40-41)*

³² Hiyôv hoo la di vigwe ob buc mêd xomxo tibeac kô xomxo yidac hixôn xomxo wê vimwo nipaên dô vac he gee mi la vô Yesu. ³³ Om xomxo vihati wê dô vac vigwe tige la kitucma mi le kwabo vô xumac tige vuayen. ³⁴ Mêd Yesu vông xomxo wê tulec yidac toto gee tibeac vô niviha lec di tii vimwo nipaên vêl ên xomxo tibeac. Lêc vimwo nipaên xovô Yesu om Yesu vibü he nêb he i o lêc nêl i kitong vô xomxo lêm.

*Yesu vông yuac mi vilee vac vigwe Galili
(Luk 4:42-44)*

³⁵ Vô pitoc yang Yesu kidi lec di sea vigwe tige di la vac vigwe mahigun pileva wê xomxo dô vacên ma ge, di la kitaa. ³⁶ Lêc Saimon he lie myag i la, ³⁷ dêc mila yêvô om nêl vô i ên nêbê, “Xomxo tibeac dimyag ông.” ³⁸ Lêc Yesu nêl vô he ên nêbê, “Maê. Il ob la vac vigwe yaya wê yêp kwabo

ge ên a nêl xolac vô he hixôn. Ên yuac ga wê a lam ên a nêb a ob vông ge.” ³⁹ Mêgem Yesu la vigwe Galili vihati dì la nêl xolac vac Yuda xumac lilo toto ge dì tiimwo nipaên vêl ên xomxo.

*Yesu vông xomxo wê kityax mahizihizi ge ti vô niviha lec
(Matyu 8:1-4; Luk 5:12-16)*

⁴⁰ Xomxo wê kityax mahizihizi ge ti la yev vixa kitu vô Yesu dì kitaa i ên nêbê, “Ông obéc nêb a vô nigviha lec ge od ông tiyi wê ông ob vông a nignivi i vô niviha lec.” ⁴¹ Mêdêc Yesu xo vigwe pisiv ên i om vyax vigê lec dì nêl vô ên nêbê, “A nêb ông vô nimviha lec.” ⁴² Yesu nêl dì yidac tige tip la lutibed dì i ninivi vô niviha lec. ⁴³ Mêd Yesu nêl kiyang xêkizêc vô i ên nêbê, “Ông kidi lec mi loc, ⁴⁴ dì ông o léc nêl nimnivi wê vô niviha lec ge kitong vô xomxo ti lêm. Dì ông loc hilung nimnivi mô vô xomxo wê mi si daa vô Anutu ge dì vông daa i tiyi môp wê Moses xolac nêl ge, ên xomxo vihati i yê dì xovô bê ông nimnivi vô niviha lec om ông vông daa.” ⁴⁵ Yesu nêl bêge lê, lêc xomxo tige la nêl kiyang kitong vac vigwe viyang viyang, mègem Yesu o tiyi wê ob la hilung i seac vac vigwe levac tiyi xocbê ilage lêm, om la dô vac vigwe mahigun pileva, lêc xomxo vac vigwe viyang viyang ge kituc la vô i.

2

*Yesu vông xomxo ti wê vixa vô xêlehe ge vô niviha lec
(Matyu 9:1-8; Luk 5:17-26)*

¹ Buc mangwe la vêl lêc Yesu lax mi la ben Kapaneam, dì xomxo ngô wê i lax dô vac ben ge, ² om xomxo tibeac la pup lec i ben dì le vac vuayan hixôn, om môp ti o yêp lêm. Mêd Yesu nêl xolac vô he, ³ lêc xomxo yuudiyuu ken li ti wê len vô xêlehe ge mi lam, ên nêb ob kô i mi la vô Yesu. ⁴ Lêc xomxo pup lec vigwe om môp ti o yêp wê he ob kô i mi la vô Yesu ge lêm, om he lec xumac mi la kisii mi la dii xumac mya ti wê Yesu le ge vêl dì vông

xomxo tyo lop mi la hixôn pêt dì la yêp vô Yesu manôn. ⁵ Mêd Yesu yê wê he vông i vin ge om nêl vô xomxo tyo ên nêbê, “Nug, a kitya ông nêm nipaên vêl pyap.”

⁶ Mêlêc xomxo wê xovô Moses xolac gee ya dô hixôn om ngô kiyang wê Yesu nêl ge dì xo vac nilô bêga nêbê, ⁷ “Bêna lêc xomxo tige nêl kiyang tibêge? Ge so vya vô Anutu, ên xomxo ti o tiyi wê ob kitya xomxo nêl nipaên vêl ge lêm. Nge, Anutu vaci tibed tiyi wê ob kitya xomxo nêl nipaên vêl.” ⁸ Lêc Yesu xovô kiyang wê he xo vac nilô ge, om nêl vô he ên nêbê, “Bêna lêc xam xo kiyang tibêge vac nilômê? ⁹ Xam ngô lê. Kiyang tina wê obêc vô viyin maén ge? Kiyang wê nêbê, ‘A kitya ông nêm nipaên vêl ge, me kiyang wê nêbê, ‘Ông kidi lec dì kô ông pêt lec dì loc?’ ¹⁰ Mêlêc a nêb a ob vông xovô vô xam bê a, Xomxo Nu, a xêkizêc tiyi wê a ob kitya xomxo nêl nipaên vêl gê kibun ga, om xam wê.” Om Yesu nêl vô xomxo ti wê len vô xêlehe ge ên nêbê, ¹¹ “A nêl vô ông bê ông kidi lec dì hôm ông guhu lec dì lôc bom.” ¹² Dì lutibed xomxo tige kidi lec vac he mahigun dì hôm i guhu lec dì loc mi la. Mègem xomxo gee vihati yê dì yetac mabu dì pimil Anutu dì nêl ên nêbê, “Xe o xê susu bêga ti ila lêm.”

*Yesu keac Livai la hixôn i
(Matyu 9:9-13; Luk 5:27-32)*

¹³ Yesu lax mi la mia luaën Galili tii vac mêt xomxo tibeac la vô i, di i nêl xolac vô he. ¹⁴ Pyap di Yesu loc mi la léc mila yê Livai wê Alpias nu ge, wê xeedô vac xumac wê he mi kô mone takis vô tibii vac ge, om Yesu la nêl vô i ên nêbê, “Lam timu vô a vixag.” Mêgem Livai kidi lec di la hixôn Yesu mi yuu la.

¹⁵ Mêt Yesu hixôn i nue ngivihi la ya hixôn Livai vac i ben, léc tibii wê mi kô mone takis ge hixôn xomxo nipaên, he tibeac la ya hixôn he, ên xomxo tibêgee tibeac mi timu vô Yesu. ¹⁶ Léc Palisi wê xovô Moses xolac ge he ya yê wê Yesu diya hixôn tibii nipaên yuu tibii wê mi kô takis gee, om nêl vô Yesu nue ngivihi ên nêbê, “Bêna léc Yesu la ya hixôn tibii wê mi kô mone takis ge hixôn tibii nipaên?” ¹⁷ Mêt Yesu ngô wê he nêl ge, om nêl vô he ên nêbê, “Xomxo niviha obêc la vô docta lêm. Nge, tibii yidac ge wê obêc la vô docta. Om xam xovô bêga bê a o lam ên xomxo niviha lêm. Nge, a lam ên tibii nipaên, ên a nêb a ob tyuc he lam vô a.”

*Kiyang lec môp wê xomxo ngibua yaên ge
(Matyu 9:14-17; Luk 5:33-39)*

¹⁸ Buc ti Jon Lipacên nue ngivihi hixôn Palisi he ngibua yaên tiyi môp wê he Yuda mi vông ge, om xomxo mangwe la nêl vô Yesu ên nêbê, “Jon Lipacên nue ngivihi hixôn Palisi ge, he mi ngibua yaên, léc bêna léc nume ngivihi o ngibua yaên lêmê?” ¹⁹ Léc Yesu nêl vô he ên nêbê, “Tibii viyang ti lie ti obêc ii vêx ti léc gên dô hixôn he ge od he obêc ngibua yaên, me? Ma vêl. Ên li tige gên dô hixôn he, om he ob dô hixôn xêyaa niviha di ob ngibua yaên lêm. ²⁰ Léc obêc buc timuên wê tibii ob kô li tige vêl ên he ge od ge wê he ob ngibua yaên.”

Kiyang pilepacên lec môp tikwê hixôn môp paha

²¹ Yesu nêl ên nêbê, “Xomxo ti nêngakwi obêc tip ge od obêc kiping ngakwi paha myahipu ti vêl mi la duu lec tikwê lêm. Ên obêc vông bêge ge od myahipu paha tige obêc titê tikwê lêx di tocén obêc vô levac. ²² Di xomxo ti obêc too wain paha vac bwoc ninivi tikwê lêm. Ên obêc too vac ge od wain obêc vuac di tax ninivi tikwê tip di wain too la. Om wain paha ge, xomxo i too vac bwoc ninivi paha.”

*Yesu nêl kiyang lec môp wê vibuên yuac lec sabat ge
(Matyu 12:1-8; Luk 6:1-5)*

²³ Vô buc sabat ti Yesu he nue ngivihi la vô môp wê la vac yuac yaên ge ti, mêt he mila lê, léc nue ngivihi le yul wit nôn wê tiyi xochê pidi nôn ge di ya. ²⁴ Léc Palisi ya yê di nêl vô Yesu ên nêbê, “Wê lê, gwêbaga buc sabat wê Moses xolac vibu nêb il ob vông yuac ti lec lêm ge, léc bêna léc nume ngivihi vông yuac lec?”

²⁵ Léc Yesu nêl vô he ên nêbê, “Môp wê bug Devit vông ilage, xam kitong, me xam lungê? Môp bêga nêbê Devit he lie dô, léc vip den he. ²⁶ Vô buc tige Abiata tu xomxo daa sién nêngakwi levac mi dô vac Anutu xumac ngibua, om Devit la vac xumac ngibua tige di la hôm blet ti wê he tung vô Anutu manôn ge. Blet tige xomxo pileva o tiyi wê ob ya ge lêm. Nge, xomxo wê mi si daa vô Anutu gee, heche va ob ya. Léc Devit kô mi lax ya dêc vông mi lie ya hixôn. Léc Devit môp ge tiyi, ên Abiata vaci vông vô Devit mi i ya.”

²⁷ Om Yesu nêl vô he ên nêbê, “Om xam xovô bê xe êno o vông i so lêm, ên Anutu o tung xomxo ên nêb he i ngidu buc sabat xôn lêm. Nge, vông buc sabat ên nêb i ngidu xomxo xôn.” ²⁸ Om a, Xomxo Nu, a tu buc sabat kehe hixôn.”

3

*Yesu vông xomxo wê vigê vô nipaên ge ti vô niviha lec vô buc sabat
(Matyu 12:9-14; Luk 6:6-11)*

¹ Yesu la vac Yuda xumac lilo lu ngwe tii vac, lêc xomxo wê vigê vilu vô xêlehe ge ti dô hixôn he vac xumac tige. ² Di xomxo wê xeedô gee yê Yesu xôn ên nêb ob yê bêc Yesu obêc vông xomxo tige vô niviha lec vô sabat ge, od he ob vông kot vô Yesu. ³ Mêđ Yesu nêl vô xomxo vigê nipaên tige ên nêbê, “Kidi lec mi le vac mahigun.” ⁴ Om Yesu nêl vô he vihati ên nêbê, “Xolac wê il Yuda vông ge, nêb il vông bêna lec sabatê? Nêb il vông niviha, me nêb il vông nipaên? Il ob vông xomxo vô niviha lec, me il ob hi he i yib lec sabat?” Lêc he dô kiyang maên dì o nêl kiyang ti lax vô Yesu lêm. ⁵ Om Yesu yê he vihati manôn dì xêyaa vô myavinê vô he, di nilô vô viyin ên wê he nilô xêkizêc ta dì he o vông i vin lêm ge, om nêl vô xomxo vigê nipaên tige ên nêbê, “Titô vigêm.” Mêgem xomxo tyo titô vigê lêc vigê vô niviha lec. ⁶ Mêđ lutibed he Palisi kidi mi la, di la kitucma hixôn Helot nue dì he xôn myag môt wê nêb ob hi Yesu i yib lec ge.

Xomxo tibeac la vô Yesu vac mia luaên Galili

⁷ Yesu he nue ngivihi loc mi la mia luaên Galili di xomxo tibeac timu vô Yesu vixa. ⁸ Xomxo tigee lam gê vigwe Galili yuu Judia, di lam gê Jelusalem, di lam gê Idumia, di lam gê mia Jodan vilu ganê dì lam gê vigwe Taia yuu Saidon, ên he ngô yuac wê Yesu vông ge om nêb ob lam ên lam yê. ⁹ Om Yesu nêl vô nue ngivihi ên nêbê, “Xomxo tibeac hiwocén val dô om obêc hiivun a xôn, om xam loc viac dipac ti, êdêc a sox la dô lec.” ¹⁰ Yesu nêl bêge, ên vông xomxo yidac tibeac vô niviha lec, om he wê yidac ge le i vivac i ên nêb he ob vyax vigê lec i ên he i vô niviha lec. ¹¹ Di vimwo nipaên wê dô vac xomxo ge yê Yesu om yev vixa kitu vô dì tyuc via levac ên nêbê, “Ông ge Anutu nu.” ¹² Lêc Yesu vibu he nêb he i o lêc nêl i kitong vô xomxo lêm.

*Yesu vinoô nue ngivihi vigê yuu dì tô mi la yuu
(Matyu 10:1-4; Luk 6:12-16)*

¹³ Yesu la lec kitôn ti, mêđ keac xomxo ya nêb he i loc vô i. Om he la vô i, ¹⁴ di Yesu vinoô he vigê yuu dì tô mi la yuu ên nêb he i dô hixôn i, dêc obêc vông he la nêl xolac, ¹⁵ di ob vông xêkizêc vô he i tiyw wê he ob tii vimwo nipaên vêl ên xomxo ge. ¹⁶ Om he lê bêga, Saimon, wê Yesu nêl i lê ngwe nêbê Pita, ¹⁷ di Jems yuu Jon wê yuu ma Sebedi ge lêc Yesu nêl yuu xôn lê ngwe bêga nêbê Boanesia. Lê tige kehe bêga nêbê deac tugêñ, ên yuu ge wê mi higac vô xomxo ge, ¹⁸ di Andlu yuu Pilip di Batolomyu, di Matyu yuu Tomas, di Jems wê ma Alpias ge, di Tadias yuu Saimon Selot, ¹⁹ di Judas Iskaliot wê obêc hilung Yesu vô tibii vevac timuêñ ge.

*Xomxo nêl nêbê Yesu vông yuac ya xêkizêc wê Seten vông ge
(Matyu 12:24-32; Luk 11:14-23; Luk 12:10)*

²⁰ Yesu lax mi la vac ben xumac lôma, mêđ xomxo tibeac la kitucma hixôn i om hiyôv manôn wê Yesu he nue ngivihi ob ya yaën lec ge ma.

21 Mêd Yesu lie ngô kiyang tige om val ên nêb ob lam kô Yesu, ên xomxo ya nêl ên nêbê Yesu vô mavmav.

22 Di xomxo wê xovô Moses xolac ge wê he lam gê Jelusalem ge, he nêl ên nêbê, “Bielsebul wê tu vimwo nipaên nêl levac ge dô vac Yesu nilô, om Yesu tii vimwo nipaên vêl ên xomxo ya xêkizêc wê Bielsebul vông ge.”

23 Om Yesu keac xomxo vihati val kwabo vô i dì i nêl kiyang pilepacên ya vô he bêga nêbê, “Bêna lêc Seten ob tii Seten vaci vêl? **24** Xomxo viyang ti obêc hibuma la yuu dì vông vevac vóma ge od he ob dô niviha lêm. **25** Di xomxo wê xumac tibed ge obêc hibuma la yuu di vông vevac vóma ge od he obêc dô niviha lêm. Nge, xêkizêc wê he vông ge ob tô mi la. **26** Om kiyang wê xam nêl ge obêc kiyang nôn ge od obêc tiyi xochê Seten vaci vông vevac vô Seten di hibuma sea, lêc obêc bêge ge od xêkizêc wê Seten vông ge obêc tip vac.

27 “Xomxo xêkizêc ti obêc dô vac i ben xumac lôma ge od xomxo ti o tiyi wê ob la vun i susu ge lêm. Lêc obêc ku xomxo tige xôn pilahi ya yihi ge od tiyi wê tibii ob la vac i ben xumac lôma di la vun i nêl susu vihati ge.

28 “A nêl hixôn nôn vô xam bê xomxo ti obêc vông môt nipaên, me obêc nêl kiyang nipaên ge od Anutu tiyi wê ob kitya nipaên tige vêl ge. **29** Lêc xomxo ti obêc nêl kiyang nipaên lec Myakilôhô Ngibua ge od o tiyi wê Anutu ob kitya i nêl nipaên tige vêl ge lêm. Nge, nipaên tige ob yêp vô xomxo tige luta lêc luta.” **30** Yesu nêl kiyang tige vô he ên wê he nêl ên he nêbê vimwo nipaên dô vac i nilô ge.

Yesu tae lie

(Matyu 12:46-50; Luk 8:19-21)

31 Yesu tae lie val le vixun, di vông kiyang la vô Yesu ên nêb i lam vô he. **32** Om xomxo wê dô ngivina Yesu gee nêl vô i ên nêbê, “Tame lime val le vixun ên nêb ob yê ông.” **33** Lêc Yesu nêl lax vô he ên nêbê, “Xomxo letya wê a tage lige ge?” **34** Mêd Yesu yê ma la xomxo wê dô i ngivina i ge dì nêl ên nêbê, “Wê lê, ga a tage lige. **35** Ên xomxo wê timu vô Anutu kiyang ge, ge wê tu a tage lige ge.”

4

Kiyang pilepacên lec xomxo ti lîloo vê vac yuac

(Matyu 13:1-9; Luk 8:4-8)

1 Yesu lax mi la mia luaên Galili dì lax nêl xolac vô xomxo vô mia ninya. Lêc xomxo tibeac hiwocên, om Yesu lec la lec dipac ti mi dô lec, di du mi la mahigun dì nêl xolac vô xomxo wê dô kehe ge. **2** Yesu nêl kiyang pilepacên tibeac vô xomxo om nêl ti vô xomxo tigee bêga nêbê, **3** “Xam ngô lê. Xomxo ti la ên nêb ob la lîloo susu vê vac yuac. **4** Om lîloo i la lê, lêc vê mangwe tô mi la dô vac môt om menac lam ya. **5** Di ya tô lec kibun nipwo tya wê dô lec ngidax kisii ge om tyip lutibed, **6** lêc ngilôhô la tulec ngidax om buc wê hiyôv linac ge od ya i vîlôvac dì i yib. **7** Di vê mangwe tô mi la dô vac hivu kehe lêc tyip hixôn hivu di hivu hivun xôn om o vuac nôn niviha lêm. **8** Di vê mangwe tô mi la dô vac kibun niviha om tyip di vuac nôn niviha. Mêgem ya vuac nôn 30 dì ya vuac 60 dì ya 100.” **9** Yesu nêl bêge vô he di nêl hixôn ên nêbê, “Xomxo ti ninya obêc yêp ge od i ngô di xovô.”

*Yesu nêl kiyang lec kiyang pilepacén
(Matyu 13:10-17; Luk 8:9-10)*

¹⁰ Dêc timuên Yesu vaci la dô viyonêñ, dì nue ngivihi hixôn xomxo wê mi dô hixôn i gee, he mila vô i dì la kinêg kiyang pilepacén kehe ên nêb i nêl kitong vô he. ¹¹ Om Yesu nêl vô he ên nêbê, “Kiyang wê nêl lec Anutu môp yuu ben ge yêp xôpacén lê, lêc Anutu nêb ob hilung vô xam ên xam xovô. Dì xomxo baba ge ngô kiyang tiyi xocbê kiyang pilepacén pileva. ¹² Om ‘he ob yê lê, lêc ob yêvô nôn ti lêm, dì he ob ngô kiyang lê, lêc he ob xovô kehe lêm, om he o tiyi wê he ob pilepac he ên Anutu i kitya he nêñ nipaêñ vêl ge lêm.’”

*Yesu nêl kiyang pilepacén kehe kitong
(Matyu 13:18-23; Luk 8:11-15)*

¹³ Yesu nêl vô he ên nêbê, “Xam obêc lungêñ kiyang pilepacén tige kehe ge od xam ob xovô kiyang pilepacén vihati ge kehe tibêna? ¹⁴ Kehe bêga nêbê vê wê xomxo tige la lîloo ge tiyi xocbê Anutu xolac. ¹⁵ Dì vê wê tô vac môp ge, tiyi xocbê xomxo wê ngô Anutu kiyang lê, lêc lutibed Seten lam vô vêl ên he nilô. ¹⁶ Dì vê wê tô mi la dô lec kibun nipwo tya wê dô lec ngidax kisii ge, ge tiyi xocbê xomxo wê ngô xolac dì vông i vin lutibed hixôn xêyaa niviha, ¹⁷ lêc he tiyi xocbê ngec wê ngilôhô maêñ ge, om he dô nipwo tya lêc xomxo obêc vông viyin vô he ên wê he vông i vin xolac ge od he sea vông vinêñ lutibed. ¹⁸ Dì vê wê tô mi la dô vac hivu kehe ge, ge tiyi xocbê xomxo wê ngô xolac mi dô lê, ¹⁹ lêc he vông nilô la vô susu yuu môp kibun ga dì he xêyaa vin lec wê he nêb ob kô susu tibeac hixôn mone ge, om môp tige hivun xolac xôn dì he o vô nôn niviha lêm. ²⁰ Lêc vê wê tô mi la dô vac kibun niviha ge, ge tiyi xocbê xomxo wê ngô xolac dì vông i vin dì vuac nôn tibeac, om vê ya vuac nôn 30 dì he ya vuac 60 dì ya vuac 100.”

*Kiyang pilepacén lec lam
(Luk 8:16-18)*

²¹ Yesu nêl ên nêbê, “Xomxo ti obêc byêx ngwax vac lam ge od ob lax i la vac dêg, me lax i la le vac pêt ngibi, me? Ma, ob lax i le lec tevol kisii ên i linac vac vigwe. ²² Susu wê dô xôpacén ge vihati obêc val dô seac timuên, dì kiyang wê yêp xôpacén ge obêc val yêp vac xêseac. ²³ Xam ninyam obêc yêp ge od xam ngô dì xovô.”

²⁴ Di Yesu nêl ên nêbê, “Kiyang wê xam ngô ge, xam vyac xovô niviha lê. Ên môp wê xam vông vô xomxo ge Anutu obêc vông i tiyi wê xam vông vô he ge vô xam, dì Anutu vaci obêc vông mangwe i luu wê xam vông vô lime ge vêl vô xam hixôn. ²⁵ Ên xomxo obêc xovô xolac mi hôm pilahi ge od Anutu obêc kipyax tibeac lec hixôn vô i. Lêc xomxo obêc hôm xolac pilahi lêm ge, od nipwo tya wê yêp vac i nilô ge, Anutu obêc vô vêl.”

Kiyang pilepacén lec vê wê tyip ge

²⁶ Yesu nêl ên nêbê, “Anutu ben kehe ge tiyi xocbê xomxo ti wê la lîloo vê vê vac yuac ge, ²⁷ lêc lax dô dì buc ya la vêl lêc milax yê wê vê tyip mi vô levac ge, lêc o xovô kehe lêm. ²⁸ Ên kibun vaci vông yuac lec, om vê tyip mi vô lihi lec dì vuac nôn, ²⁹ dì buc wê nôn huu ge od xomxo tyo la ên nêb ob la yul nôn.”

*Kiyang pilepacén lec vixôô nôn
(Matyu 13:31-32,34-35; Luk 13:18-19)*

³⁰ Yesu nêl ên nêbê, “Anutu ben kehe ge tiyi vatya? Di il ob nêl kiyang pilepacén tibêna wê ob tiyi môp tige? ³¹ Ge tiyi xocbê vixôô nôn wê nipwo lee tyâ i luu nôn baba vêl ge, ³² lêc xomxo obêc xin ge od obêc tyip mi vô levac luu susu baba vêl di obêc sux ngen lec di menac lam vông liwihi lec mi dô vac hinyena.”

³³ Yesu obêc nêl xolac vô xomxo ge od mi nêl kiyang pilepacén tibêge tibeac vô he tiyi wê he ob xovô ge. ³⁴ Lêc o nêl kiyang kehe yêp seac vô he hixôn lêm. Nge, nêl kiyang pilepacén pileva, di timuên wê he nue ngivihi vaci dô ge od Yesu nêl kiyang pilepacén kehe kitong vô he.

*Yesu nêl di viyîiên levac tip la
(Matyu 8:23-27; Luk 8:22-25)*

³⁵ Vô buc tibed tige vigwe luc om Yesu nêl vô nue ngivihi ên nêbê, “Il ob la mia luaên vilu ganê.” ³⁶ Mêgem he sea xomxo tigee dô di he lec dipac ti wê Yesu dô lec ge di he xôn loc mi la, di dipac ya la hixôn. ³⁷ He mîla mahigun lê, lêc lea viyîiên mabu ti val om mia kipyax la vac dipac nîlô di la pup lec. ³⁸ Lêc Yesu la dô lec dipac viwen timuên di kiluu bazub lec kiluuêti di yêp, om nue ngivihi la tipi vô di nêl vô ên nêbê, “Xolac kehe, vô kwabo lec wê il ob xib ge, lêc mêt ông o xovô il lêm, me?” ³⁹ Mêt Yesu kidi lec di nêl vô lea yuu mia ên nêbê lea i tip loc di mia i yêp kizêc, om lea tip la di mia yêp tipiên ma. ⁴⁰ Mêt Yesu nêl vô nue ngivihi ên nêbê, “Bêna lêc xam xona? Vông vinêni wê xam vông ge tyo nôn tina?” ⁴¹ Om he yetac mabu di nêl vômâ ên nêbê, “Xomxo tiga letya lêc lea yuu mia vô ninya lehe vô i?”

5

*Yesu tii vimwo nipaên vêl ên xomxo ti
(Matyu 8:28-34; Luk 8:26-39)*

¹ Yesu he nue ngivihi loc mi la tibii Gelasa ben wê yêp mia luaên vilu ganê ge. ² He mîla lop vêl ên dipac lêc xomxo wê vimwo nipaên dô vac i nîlô ge ti lam vac vigwe yibêni di lam vô Yesu. ³ Vuxtige ben wê mi dô vac ge, mi dô vac vigwe yibêni, di xomxo ti o tiyi wê ob ku i xôn ge lêm. ⁴ Ên buc tibeac ge xomxo ku i vigê yuu vixa xôn ya sen lê, lêc xomxo tyo tax sen tip sea, di xomxo ti o tiyi wê ob hôm i xôn ge lêm, ên xêkizêc wê xomxo tige vông ge luu xêkizêc wê he vông ge vêl. ⁵ Vô vidiiêni yuu bucén vihati ge xomxo tige mi vîlee mi la vac vigwe yibêni di la lec kitôn di mi iac di gôl ninivi sea ya ngidax.

⁶ Xomxo tige yê wê Yesu val le teva ge om tup mi la vô di la yev vixa kitu vô. ⁷⁻⁸ Lêc Yesu nêl vô i ên nêbê, “Vimwo nipaên, ông lam loc vêl ên xomxo tige.” Mêgem xomxo tyo iac mabu di nêl ên nêbê, “Yesu, ông ge Anutu lag puunê nu ông, lêc ông ob vô vatya vô a? A le vô Anutu manôn di a kitaa ông bê ông o lêc vông a vô nipaên lêm.” ⁹ Mêt Yesu kinêg vô i ên nêbê, “Ông lêm le?” Di i nêl ên nêbê, “A lêg kehe bêga nêbê kidu levac, ên xe ga, xe tibeac.” ¹⁰ Mêt i kitaa Yesu tii vac vac ên nêb i o lêc tii vimwo nipaên i loc vêl ên vigwe tige lêm.

¹¹ Bwoc kidu levac vông zuac mi le lec kitôn, ¹² om vimwo nipaên tigee kitaa Yesu ên nêbê, “Ông vông xe la dô vac bwoc tiganêe.” ¹³ Mêt Yesu

tyuc lec om vimwo nipaên tigee lam la vêl ên xomxo tige di la dô vac bwoc tyoe nilô, mêt bwoc tigee tup mi la vac vigwe madia di la tô vac mia luaên di num mia mi yib. Bwoc tigee tibeac hiwocê tiyi xochê 2,000 lêc he yib mima vêl.

¹⁴ Mêt xomxo wê mi viac bwoc tigee ge pec mi la, di mila nêl kiyang tige kitong vô tibii vac vigwe levac hixôn vigwe nipwo viyang viyang ge. Om xomxo tibeac la ên nêb ob la yê han, ¹⁵ om he val vô Yesu lêc val yê xomxo ti wê vimwo nipaên dô vac ilage, lêc vimwo sea i di i piyôp vô niviha lec di i vinyum nivimihî lec di xeedô hixôn Yesu, om he yê di xona ên. ¹⁶ Di xomxo wê dô mi yê wê Yesu tii vimwo nipaên vêl ên xomxo tige, nêl kitong vô tibii wê val gee di nêl lec bwoc hixôn. ¹⁷ Om tibii tigee vihati kitaa Yesu ên nêb i loc vêl ên he ben.

¹⁸ Mêgem Yesu lec dipac ên nêb ob lax mi la, lêc xomxo ti wê Yesu tii vimwo nipaên vêl ên i ge, lam kitaa Yesu ên nêb ob la hixôn i, ¹⁹ lêc Yesu nêl vô ên nêbê, “Ông la hixônê a ob ma, di ông lôc bom ên lôc nêl do levac wê Apumtau vông vô ông ge kitong vô lime di nêl lec wê Apumtau xo vigwe pisiv ên ông ge hixôn.” ²⁰ Mêgem xomxo tyo lax mi la ben di la nêl kiyang wê Yesu vông i vô niviha lec ge kitong vô xomxo vac vigwe levac Dekapolis vihati, om xomxo tigee ngô kiyang wê i nêl ge di yetac mabu.

*Jailas nu vêx, di vêx yidac ngwe, yuu kiyang
(Matyu 9:18-26; Luk 8:40-56)*

²¹ Yesu la lec dipac mi lax mi la mia luaên vilu ganê, mi la dô vô mia ninya di xomxo tibeac kitucma mi la vô i. ²² Mêt xomxo levac wê mi viac Yuda xumac lilo ge ti lê nêbê Jailas yê wê Yesu val ge, om lam yev vixa kitu vô ²³ di kitaa vô i ên nêbê, “A nug vêx vông yidac mabu ti di vô kwabo lec wê ob yib ge. Om a nêb ông lam vyax vigêm lec ên yidac i ma di i vô niviha lec.” ²⁴ Om Yesu la hixôn Jailas mi yuu la, lêc xomxo tibeac lam hivun Yesu xôn di he xôn la.

²⁵ Mêt vêx ti dô vac he mahigun, lêc vêx tige, yidac kwatuacêñ vông i tiyi klismas 12, lêc yidac tige o ma lêm, ²⁶ di i kô myavinê tibeac vô docta di sea i mone la mima vêl, lêc yidac tige o tiyôô ên i lêm. Nge, yidac tige vô levac di dô xuhu dia. ²⁷ Mêt vêx tyo ngô kiyang wê xomxo mi nêl lec Yesu ge om la vac xomxo tigee mahigun di la le vô Yesu nimi di vyax vigê lec Yesu vinyumêñ. ²⁸ Vông bêge ên xo ên nêbê, “A obêc vyax vigê lec Yesu vinyumêñ ge od a obêc vô nigviha lec.” ²⁹ Om lutibed yidac tyo tip la di vêx tyo yaxêñ wê yidac tyo ma ên i ge. ³⁰ Mêt Yesu yaxêñ wê xêkizêc wê i vông ge ya sea i, om pilepac i vac xomxo tigee mahigun di kinêg ên nêbê, “Letya hôm vigê lec vinyumêñ wê a vông ge?” ³¹ Lêc nue ngivahi nêl vô i ên nêbê, “Xomxo tibeac le i ngivina ông xôn, lêc bêna lêc ông kinêg ên ông nêbê letya vyax vigê lec ôngê?” ³² Lêc Yesu yê i vivac vô he vihati ên nêb ob yê xomxo ti wê vyax vigê lec i ge, ³³ mêt vêx tige xovô wê xêkizêc wê Yesu vông ge la vông i vô niviha lec ge om xona di la hixôn ni yetacêñ di la yev vixa kitu vô Yesu di nêl i kiyang kitong vihati vô Yesu. ³⁴ Mêt Yesu nêl vô i ên nêbê, “Nuge, vông vinêñ wê ông vông ge vông ông vô niviha lec, om ông lôc hixôn xêmyaa niviha, ên yidac wê ông vông ge tip la gwêba pyap.”

³⁵ Yesu gên nêl kiyang, dêc xomxo vac Jailas ben val nêl vô Jailas ên nêbê, “Num vêx yib gwêba, om le i lêc vông yuac levac vô xolac kehe

lêm.” ³⁶ Yesu ngô kiyang wê he nêl ge lêc o vông i vin lêm, om nêl vô Jailas ên nêbê, “Xonaén i ma dì ông vông i vin.” ³⁷ Mê Yesu nêl ên nêbê xomxo vihati i dô om he dô dì Yesu kô Jems yuu li Jon dì Pita mi he la. ³⁸ He mila vô kwabo lec Jailas ben lêc Yesu ngô wê xomxo byag dì vô nidiidun tibeac ge, ³⁹ om la xumac lôma dì la nêl vô he ên nêbê, “Bêna lêc xam byag dì vô nidiidun tibeac? Vêx tige o yib ti. Nge, ici va yêp.” ⁴⁰ Mê he nap lec kiyang wê Yesu nêl ge. Om Yesu vông he vihati la vixun, dì kô vêx tyo ta yuu ma hixôn nue ngivihi yon dì he la vac xumac nilô ti wê vêx tyo diyêp vac ge. ⁴¹ Mê Yesu la hôm lec vêx tyo vigê dì nêl vô i ên nêbê, “Talita kumi.” Kiyang tige kehe bêga nêbê, “Vêx, a nêl bê ông kidi lec.” ⁴² Om lutibed vêx tyo kidi lec mi vîlee. Vêx tige, klismas wê i vông ge tiyi xocbê 12. Dì he wê he dô mi yê gee yetac mabu. ⁴³ Lêc Yesu nêl kiyang xekizêc vô he ên nêbê, “Xam o lêc nêl ga kitong vô xomxo ti lêm.” Dì nêl vô he ên nêbê, “Xam vông yaên vô vêx tyo ên i ya.”

6

Xomxo Nasalet vô nimi vô Yesu (Matyu 13:53-58; Luk 4:16-30)

¹ Yesu sea vigwe tige dì lax mi la Nasalet wê i ben kehe ge, dêc nue ngivihi la hixôn. ² He dô dì buc sabat ge od Yesu la vac xumac lilo dì la nêl xolac vô xomxo. Om xomxo tibeac ngô i kiyang dì yetac mabu dì nêl ên nêbê, “Xomxo tige kô kiyang yuu piyôp vô letya lêc mi vông do levac tibêgee? ³ I ge xomxo wê xumac loxên ge ti, wê Malia nu ge, om i lie Jems yuu Josis dì Judas yuu Saimon. Dì lie vêx dô hixôn il ga.” He nêl bêge dì he nilô vô viyin dì he yê Yesu nipaên. ⁴ Mê Yesu nêl vô he ên nêbê, “Vac vigwe viyang viyang ge, xomxo ob kô plopet lec, dom plopet tyo tae mae lie hixôn xomxo vac i ben vigwe kehe obêc kô i lê lec lêm.” ⁵ Om Yesu o tiyi wê ob vông do tibeac vac ben Nasalet ge lêm, dì i vyax vigê lec xomxo yidac titi dì vông he vô niviha lec. ⁶ Mê Yesu yê wê lie Nasalet o vông i vin i lêm ge, om xo bêga nêbê, “Bêna lêc he o vông i vin a lêmé?” Mêgem Yesu sea Nasalet dì loc mi la vîlee vac vigwe toto dì la nêl xolac vô tibii.

Yesu vông yuac vô nue ngivihi (Matyu 10:5-15; Luk 9:1-6)

⁷ Yesu keac nue ngivihi vigê yuu dì tô mi la yuu la vô i, dì vông he yuu yuu loc mi la, dì vông xekizêc wê i vông ge vô he ên nêbê he i loc tii vimwo nipaên vêl ên xomxo, ⁸ dì nêl vô he ên nêbê, “Xam hôm pitoa vac vigêm dì loc, dì xam o lêc kô susu ya hixôn lêm, xocbê yaên yuu vixec di mone hixôn lêm. ⁹ Xam su su lec vixam, dì xam vinyum vinyumên tibed lec, dì xam o lêc kô vinyumên ngwe hixôn lêm. ¹⁰ Dì xam obêc la vac vigwe ti mi la dô vac xumac ti ge od xam dô vac xumac tige tibed i tiyi buc wê xam ob dô ge. Pyap dêc xam sea vigwe tige dì loc bangwe. ¹¹ Lêc xam obêc mila vac vigwe ti di xomxo viyang tige o hôm xam lec niviha lêm di o ngô kiyang wê xam nêl ge lêm ge od xam liloo vijuva vêl ên vixam pitehe ên i nêl he nêni nipaên kitong vô he dì loc.” ¹² Om Yesu nue ngivihi loc mi la, dì la nêl xolac vô xomxo ên nêbê he i pilepac he, ¹³ dì he tii vimwo nipaên vêl ên xomxo tibeac, dì xomxo yidac tibeac ge, he lipac wel lec he dì vông he vô niviha lec.

*Jon Lipacén yib
(Matyu 14:1-12; Luk 3:19-20; Luk 9:7-9)*

¹⁴ Hizap levac Helot ngô kiyang wê tibii mi nêl lec Yesu ge, ên xomxo nêl Yesu kitong la vô levac vac vigwe tibeac, om he ya nêl ên he nêbê Yesu ge Jon Lipacén wê yib ge, kidi lec nang om vông do levac ya xêkizêc wê i vông ge. ¹⁵ Lêc xomxo ya nêl ên he nêbê ge plopet Ilaija, di ya nêl ên nêbê Yesu ge plopet tiyi xochê plopet wê dô ilage ti. ¹⁶ Mêd Helot ngô kiyang wê he mi nêl ge di nêl ên nêbê, “Ge Jon Lipacén wê a kitov i kwa tip mi i yib ilage lêc kidi lec maviha vac yibén.”

¹⁷⁻¹⁸ Kiyang wê Helot hi Jon yib ilage bêga nêbê ilage Helot kô li Pilip vinê Helodias om Jon Lipacén la nêl vô Helot ên nêbê, “Môp wê ông kô lim tuc vinê ge tiyiên ma.” Mêgem Helodias kunac Jon di nêl vô Helot om Helot vông tibii la hôm Jon xôn di tung i la dô vac xumac kalabuhu. ¹⁹ Mêd Helodias xêyaa vô myavinê mabu vô Jon di nêl nêb ob hi Jon yib, lêc tiyiên ma, ²⁰ ên Helot xovô nêbê Jon ge xomxo niviha di i ngibua, om Helot xona ên Jon di viac i niviha ên nêb Helodias i o lêc vông i vô nipâen lêm. Mêd Helot obêc ngô kiyang wê Jon mi nêl ge, od vông i nilô vô himena himena, lêc Helot xêyaa vin lec kiyang wê Jon mi nêl ge om nêb ob ngô.

²¹ Mêd Helodias myag môp wê ob hi Jon i yib lec ge, om Helot buc wê ta kô i lec ge Helot myél vizid levac di tyuc gavman levac hixôn tibii vevac wê levac ge di xomxo Galili levac vihati gee lam. ²² He dô mi ya lêc Helodias nu vêx lam yoo vô he, di Helot hixôn xomxo wê lam ya hixôn i ge vihati xêyaa vin lec i, om Helot nêl vô vêx tyo ên nêbê, “Ông obêc nêb kô susu ti ge od ông nêl kitong vô a dì a ob vông vô ông.” ²³ Om Helot hilu kiyang xôn vô i di nêl ên nêbê, “A nêl hixôn nôn vô ông bêga bê ông obêc kitaa susu ti vô a ge, od a ob vông vô ông. Om ông obêc kitaa a ên ông nêbê a vông kibun wê a vông ge viwen i tu ông lêm i lec ge od a ob vông i tiyi wê ông nêl ge.”

²⁴ Mêd vêx tyo lax mi la kinêg vô ta ên nêbê, “Tag, ông nêb a kitaa susu vatyat?” Om ta nêl vô ên nêbê, “Ông lôc nêl bê ông ob kô Jon Lipacén bazub.” ²⁵ Mêd vêx tyo ngô kiyang wê ta nêl ge om tup mi lax vô Helot di lax nêl vô ên nêbê, “A nêb ông tung Jon Lipacén bazub lec pile ti mi vông vô a lutibed.” ²⁶ Helot ngô kiyang wê vêx tyo nêl ge di nilô vô viyin mabu, lêc xovô kiyang wê hilu xôn di xomxo tibeac dô mi ngô hixôn ge, om nêb ob pwoo kiyang wê nêl vô vêx tyo ge vac lêm. ²⁷ Mêgem Helot vông tibii vevac ti la ên nêb i loc kô Jon bazub, om tibii tyo la vac xumac kalabuhu di la kitov Jon kwa tip, ²⁸ di tung bazub lec pile di kô mi lax vông vô Helodias nu vêx tige di i kô mi la vông vô ta.

²⁹ Mêd Jon nue ngivihi ngô wê i yib ge om he val kô Jon nôn mi la yev.

*Yesu vet xomxo 5,000
(Matyu 14:13-21; Luk 9:10-17; Jon 6:1-13)*

³⁰ Nue ngivihi wê Yesu vông he la ge venâ nêl kiyang wê he la nêl ge hixôn yuac wê he la vông ge kitong vô Yesu. ³¹ Lêc xomxo tibeac la di lôm vô Yesu he nue ngivihi om hiyôv manôn wê he ob dô seac vêl di ya yaén ge ma. Mêgem Yesu nêl vô he ên nêbê, “Xam lam ên il ob la vac vigwe wê mahigun pileva di xomxo ti dôen ma ge ên xam loc dô seac vêl.” ³² Om Yesu he nue ngivihi, heche va la lec dipac di mila vac vigwe wê xomxo ti o dô vac ge lêm.

³³ Lêc xomxo tibeac yê wê he la ge di xovô he om xomxo vac vigwe buhu toto ge tup mî la ên nêb he ob la vac vigwe ti wê Yesu he nue ngivihi obêc mila vac ge. Om he mug la tax, ³⁴ dêc Yesu he nue mila timuên, mêd he lop vêl ên dipac di Yesu yê wê xomxo tibeac val dô ge om xo vigwe pisiv ên he, ên he dô tiyi xochê bwoc sipsip wê ma ti o viac he ge lêm om Yesu nel kiyang tibeac vô he.

³⁵ Mêd hiyôv hoo la di vigwe huc om nue ngivihi la nêl vô Yesu ên nêbê, “Vigwe ga, vigwe mahigun pileva ti di hiyôv hoo la gwêba, ³⁶ om ông vông xomxo i loc vac vigwe viyang viyang ên loc kisuu xen yaên wê ob ya ge.”

³⁷ Lêc Yesu nêl vô he ên nêbê, “Xacxam va vông yaên vô he ên he i ya.” Lêc he nêl vô i ên nêbê, “Obêc bêna? Ông nêb xe la kisuu blet lec mone yul yuu mî lôm vông vô he ên he i ya, me?” ³⁸ Mêd Yesu kinêg lax vô he ên nêbê, “Blet vaba dô? Xam loc wê lê.” Om he lax yê di vena nêl ên nêbê, “Blet vigê vilu di beac nôn yuubed dô.”

³⁹ Om Yesu nêl vô he ên nêbê, “Xam tô mi dô kibun lec hisinac di xam dô kidu kidu.” ⁴⁰ Om he tô mi dô kidu kidu lêc ya dô tiyi xochê 100 di ya dô tiyi xochê 50. ⁴¹ Mêd Yesu hôm blet vigê vilu ge hixôn beac yuu ge di lax ma la lag kisiinê di kitaa lec blet yuu beac, mêd hibu blet di vông vô nue ngivihi ên nêb he i titang vô xomxo tigee. Nang dêc hibu beac di vông vô nue nêb he i titang vô xomxo tigee hixôn mî he ya. ⁴² Om xomxo vihati ya i den he, ⁴³ lêc blet yuu beac wê gên dô ge nue ngivihi su vac sepac vigê yuu di tô mi la yuu mî i pup lec. ⁴⁴ Xomxo wê dô mî ya gee, he vux tiyi xochê 5,000 ge.

Yesu la lec mia luaên kisii (Matyu 14:22-33; Jon 6:16-21)

⁴⁵ Yesu nêl vô nue ngivihi nêb he i lec dipac di loc mug mî loc vigwe Betsaida wê yêp mia luaên vilu ganê. Om he loc mî la di Yesu dô ên nêb ob vông xomxo tigee i lôc ben vêl lê. ⁴⁶ He la vêl mêd Yesu loc mi la lec kitôn ên nêb ob la kitaa. ⁴⁷ Mêd vigwe buc di dipac wê nue ngivihi dô lec ge mila le vac mia luaên mahigun, di Yesu vaci gên dô vô mia luaën ninya, ⁴⁸ di yê wê lea levac hôm dipac xôn hixôn nue ngivihi om he vông yuac levac lec hisooênn mia lêc dipac o vyac la lêm, di vô kwabo lec wê vigwe ob vidii ge mêd Yesu lam lec mia kisii di val vô nue ngivihi di vông xochê ob luu he vêl mi la ge. ⁴⁹ Lêc nue ngivihi vihati yê wê Yesu lam lec mia kisii mî val ge om he so ên he nêb mêd xomxo wê yibêng ge ti kinu val vô he, om he iac ⁵⁰ di xona mabu. Lêc lutibed Yesu nêl vô he ên nêbê, “Xam xonaên i ma di xam xêmyaa i vô nivîha, ên ga a.” ⁵¹ Mêd Yesu lec la lec dipac hixôn he di lea tip la. Lêc nue ngivihi yetac mabu, ⁵² ên he o xovô môt wê Yesu vông blet vô tibeac vihevage lêm, ên he nilô yen xêkizêc om he vyac xovôôn ma.

Yesu vông xomxo tibeac vô nivîha lec gê Genesalet (Matyu 14:34-36)

⁵³ Mêd Yesu he nue ngivihi la lec dipac la mia luaên vilu ganê di la vac vigwe Genesalet, di ku dipac xôn mî i yêp ⁵⁴ di he lop mi la, lêc lutibed xomxo vac vigwe tige xovô Yesu, ⁵⁵ om he tup mî la vac vigwe tigee vihati di la ken lie wê yidac ge lec pêt mî la vac vigwe wê Yesu la dô vac ge. ⁵⁶ Om Yesu ob la vac vigwe levac ti me nipwo ti me vigwe mahigun ti ge od xomxo ken lie yidac mi la lii lec wetôv di kitaa Yesu nêb he ob hôm lec

vinyumêñ wê i vông ge myahipu ên yidac i ma ên he, om he wê hôm vigê lec vinyumêñ wê Yesu vông ge he vîhati vô niviha lec.

7

Anutu xolac nginoo xomxo vông xolac vêl (Matyu 15:1-9)

¹ He Palisi hixôn xomxo wê xovô Moses xolac ge wê he ben Jelusalem ge, he ya kitucma mi la vô Yesu, ² lêc yê wê Yesu nue ngivihi ya yaêñ lêc he o lipac vigê tiyi xochê môp wê he Yuda mi vông ge lêm. Om he nêl ên he nêbê he ya ya vigê ningeac. ³ Ên he Palisi hixôn Yuda vîhati, he mi timu vô môp wê bue ilage vông ge bêga nêbê xomxo obêc lipac vigê tiyi xochê môp wê bue mi vông ge pyap di ya yaêñ timuêñ. Lêc lipacén obêc ma ge od ob ya yaêñ lêm. ⁴ Di he ob la kisuu yaêñ vac maket ge od ob vena lipac pyap lêc ya timuêñ. Di he mi timu vô môp wê bue vông ge tibeac hixôn, xochê môp wê ob lipac kap yuu pile hixôn dêg ge. ⁵ He vông môp bêge om Palisi hixôn xomxo wê xovô Moses xolac gee nêl vô Yesu ên nêbê, “Bêna lêc ông nume sea môp wê buge vông ge di ya hixôn vigê ningeacê?” ⁶ Lêc Yesu nêl vô he ên nêbê, “Kiyang wê plopet Aisaia kivuu ilage nêl nôn lec xam xomxo kityooêñ di i yêp bêga nêbê,

‘Xomxo tige pimil a ya mya pileva, lêc he nilô le teva ên a. ⁷ He mi nêl kiyang wê xomxo vaci xovô ge, lêc he nêl ên he nêbê he nêl Anutu kiyang, om he yev vixa kitu vô a pisiv.’

⁸ Om a nêl vô xam bêga bê xam sea Anutu xolac la yêp xel di la timu vô môp wê xomxo vaci mi vông ge.”

⁹ Di Yesu nêl hixôn vô he ên nêbê, “Tyac xam so ên xam nêb môp wê xam sea Anutu xolac di la timu vô bume môp ge ob vô niviha vô xamê?

¹⁰ Ên xolac wê Moses nêl ge bêga nêbê, ‘Xam hôm tame mame lê lec di ngô he kiyang’, di kiyang ngwe nêl ên nêbê, ‘Xomxo ti obêc nêl kiyang nipaêñ lec ta yuu ma ge od xomxo i hi i yib.’ ¹¹ Anutu xolac nêl bêge, lêc xam mi nêl ên xam nêbê xomxo ti nêñ susu wê ob ngidu ta yuu ma xôn ya ge obêc dô, lêc xomxo tige obêc nêl vô yuu ên nêbê, ‘Susu tige a nêl pyap ên a nêb a ob vông vô Anutu, om muu nêm ob ma.’ ¹² Om môp tige tiyi xochê xam le vac môp wê xomxo tige ob ngidu ta yuu ma xôn ge. ¹³ Om môp wê xam timu vô bume vông xolac mi hôm xôn mi i yêp ge tiyi xochê xam kitya Anutu xolac vêl. Lêc xam mi vông môp tibeac hixôn.”

Susu wê ob vông xomxo vô nipaêñ (Matyu 15:10-20)

¹⁴ Yesu keac xomxo lam vô i di nêl vô he vihati ên nêbê, “Xam vihati ngô kiyang wê a ob nêl ge di xovô lê. ¹⁵ Susu wê ob la vac xomxo nilô ge o tiyi wê ob vông he vô nipaêñ ge lêm. Lêc susu wê yêp vac xomxo nilô di lop mi lam seac ge wê ob vông he vô nipaêñ. ¹⁶ [Xam ninyam obêc yêp ge od xam ngô nêm di xovô.]”

¹⁷ Mêđ Yesu sea xomxo tige di la xumac lôma, lêc nue ngivihi la kinêg kiyang pilepacén tige kehe vô i. ¹⁸ Om Yesu nêl vô he ên nêbê, “Ên xam êno, xam lungêñ kiyang tige kehe? Susu wê xomxo ob ya mi i la vac he nilô ge o tiyi wê ob vông he vô nipaêñ ge lêm, lêc mêđ xam lungêñ tige? ¹⁹ Susu yaêñ ob vông xomxo vô nipaêñ lêm, ên ob la vac he piyôp yuu xovôêñ hixôn lêm. Nge, ob la dô vac xêyaa di lop mi la vêl.” Yesu kiyang

tige nêl ên nêbê susu yaên vihati niviha tiyi wê xomxo ob ya ge. ²⁰ Di Yesu nêl vô he ên nêbê, “Kiyang wê yêp vac xomxo nilô lêc lop mi lam vixun ge wê ob vông he vô nipaên. ²¹ Èn kiyang nipaên wê yêp vac xomxo nilô lêc lam le seac ge bêga nêbê xovôrôen nipaên, môp yôdac vêx yuu vux, vunênen xomxo susu yôdac, hiên xomxo yib, ²² vông môp iimaén vô nipaên, môp madoên, môp nipaên yaya, nêl kiyang kityooên, vông môp vaxvax, yê xomxo nipaên, nêl kiyang nipaên lec xomxo, yong he, di vông môp vaxvax tiyi xochê piyôp niviha ti o yêp vô he lêm. ²³ Môp nipaên tigee wê mi yêp vac xomxo nilô, om obêc lop mi lam vixun ge od ob vông xomxo vô nipaên.”

*Pinisia vêx ti vông i vin Yesu
(Matyu 15:21-28)*

²⁴ Yesu sea vigwe tige di loc mi la vigwe ti wê yêp kwabo vô Taia ge, mêd la dô vac xumac ti ên nêb ob dô di xomxo yêen i i ma, lêc o tiyi wê ob dô xôpacên ge lêm. ²⁵⁻²⁶ Mêd vêx ti wê vimwo nipaên dô vac i nu vêx ge ngô wê Yesu lam dô vac xumac tige. Vêx tige o vêx Yuda lêm. Nge, i tibii Pinisia ti wê i ben vigwe kehe Silia ge. Lêc la vô Yesu di la yev vixa kitu vô di kitaa i ên nêbê i tii vimwo nipaên vêl ên nu vêx.

²⁷ Lêc Yesu nêl vô i ên nêbê, “Il ob vông yaên vô nipwo mi he ya vêl lê, ên o tiyi wê il ob kô nipwo xen yaên mi nêx i loc vô noo ge lêm.”* ²⁸ Lêc vêx tyo nêl ên nêbê, “Xomxo levac, ông nêl kiyang nôn. Lêcom myapipu wê tô mi la dô vac tevol kwa ngibi ge, noo ya.” ²⁹ Om Yesu nêl vô i ên nêbê, “Kiyang wê ông nêl ge niviha, om ông lôc bom, ên vimwo nipaên sea num gwêba di i vô niviha lec.” ³⁰ Mêgem vêx tyo lax mi la ben di yê wê nu tyo diyêp lec pêt ge di xovô nêbê vimwo nipaên sea i di la.

Yesu vông xomxo wê yac di ninja vô kitu ge ti vô niviha lec

³¹ Yesu sea vigwe Taia ên nêb ob la mia luaên Galili, om la Saidon di la Dekapolis di mîla mia luaên Galili. ³² Lêc xomxo kô vux ti wê ninja vô kitu di vyac keacênen ma ge mi la vô Yesu, di kitaa Yesu nêl Yesu i vyax vigê lec xomxo tige ên i vô niviha lec. ³³ Om Yesu kô xomxo tige mi yuu la le viyonênen mêd Yesu kitiv vigê liyihî la vac xomxo tyo ninja vilu vilu, mêd pisuv myaluc lec vigê di kitiv lec xomxo tyo get. ³⁴ Mêd Yesu lax ma la lag kisii di vê myakilôhô xêkizêc di nêl vô xomxo tyo ên nêbê, “Epata.” Kiyang tige kehe bêga nêbê, “Ninyam i toc di ông ngô vigwe.” ³⁵ Mêgem xomxo tige ninja toc di i ngô kiyang di get vô viyin maên di i keac niviha. ³⁶ Lêc Yesu vibu xomxo tigee xêkizêc ta ên nêb he i o lêc nêl tige kitong vô xomxo ya lêm. Yesu nêl kiyang tige tii vac vac vô he, lêc he o ngô lêm di he la nêl kiyang tige vô levac vô xomxo mi he ngô hixôn, ³⁷ om he yetac mabu di nêl ên nêbê, “Môp wê i vông ge vihati niviha, di ici va tiyi wê ob vông xomxo ninja kitu, he ninja i toc ên he i ngô kiyang, di vông xomxo wê yac ge he i keac niviha.”

* **7:27:** Kiyang wê Yesu nêl lec nipwo yuu noo ge, ge kiyang pilepacên wê nêl lec he Yuda hixôn tibii ba. ên he Yuda yê tibii wê o Yuda lêm ge nipaên, nêb he tiyi xochê noo. Om nipwo tige tixuu lec he Yuda, di noo tixuu lec tibii ba wê o Yuda lêm ge.

8

*Yesu vet xomxo 4,000
(Matyu 15:32-39)*

¹ Vô buc ti nang xomxo tibeac kitucma vô Yesu mi dô hixôn i, lêc he xen yaén wê he ob ya ge ma, om Yesu nél nue ngivihi lam di nél vô he ên nêbê, ² “A xo vigwe pisiv ên xomxo tigae, ên he lam dô hixôn a tiyi buc yon di he xen yaén wê he ob ya ge ma, ³ om he obêc dô vip dêc a vông he lax mi la ge od vip ob vông he vigê yuu vixa ma vac môt, ên he ya lam vac vigwe teva.” ⁴ Lêc nue ngivihi nél vô i ên nêbê, “Om il ob la kô yaén gê na ên vông vô xomxo tigae mi he i ya? Ên vigwe ga, vigwe myadongên.” ⁵ Om Yesu kinêg vô he ên nêbê, “Xam blet vaba dô?” Di he nél ên nêbê, “Xe blet vigê vilu di sec yuu dô.”

⁶ Om Yesu nél vô xomxo tigee vihati ên nêb he i tô mi dô kibun, mêd hôm blet vigê vilu di sec yuu ge di kitaa lec mêd hibu di vông vô nue ngivihi ên nêb he i titang vô xomxo, om nue ngivihi kô mi la titang vô he vihati. ⁷ Di beac nipwo ya dô om Yesu kitaa lec di vông vô nue ngivihi ên nêb he i loc titang vô xomxo tigee ên he i ya hixôn. ⁸ Mêd xomxo tigee ya i tiyi he di myapipu dô om he tung vac sepac vigê vilu di sec yuu mi i pup lec. ⁹ Xomxo tigee tiyi xocbê 4,000 ge. Pyap di Yesu vông he lax mi la ben, ¹⁰ di lutibed Yesu he nue ngivihi loc mi la lec dipac di la vigwe Dalmanuta.

*Palisi nêb ob yê do levac
(Matyu 16:1-4)*

¹¹ Palisi ya val vô Yesu, ên nêb ob yaxên i, om la nga ên kiyang wê Yesu nél ge di nél nêb Yesu i vông do lag puunê ti hixôn ên he ob yê. ¹² Om Yesu nilô vô viyin di i nél ên nêbê, “Bêna lêc xomxo gwêbaga nél nêb he ob yê do levacé? A nél hixôn nôn vô xam bêga bê xomxo wê dô gwêbaga ob yê do levac ti lêm.” ¹³ Mêd Yesu sea he di la lec dipac di loc mi la mia luaén Galili vilu ganê.

*Yesu nél kiyang pilepacên lec yis
(Matyu 16:5-12)*

¹⁴ Yesu nue ngivihi la hixôn lêc he o xovô mi kô xen blet ti hixôn lêm, di blet nôn tibed yêp vac dipac. ¹⁵ Mêd Yesu nél kiyang xêkizêc vô he ên nêbê, “Xam xona nêm ên yis wê he Palisi hixôn Helot vông ge.” ¹⁶ Mêd Yesu nue ngivihi nél vôma, ên he so ên he nêb mêd Yesu nél kiyang tige lec he xen blet wê ma ge. ¹⁷ Lêc Yesu xovô kiyang wê he nél vôma ge om nél vô he ên nêbê, “Bêna lêc xam nél ên xam nêbê xam xom blet ma? Mêd xam gên o xovô lêmê? Xam nilôm xêkizêc ên vatya? ¹⁸ Xam mamnôn yêp lêc mêd xam o wê lêm? Di xam ninyam yêp lêc mêd xam o ngô kiyang lêm? Di yuac wê a vông vac xam mahigun ge, xam mêd lungên? ¹⁹ Om buc wê a hibu blet vigê vilu di vet xomxo 5,000 ya ge, od xam su myapipu vac sepac vaba?” Om he nél ên nêbê, “Sepac vigê yuu di tô mi la yuu.” ²⁰ Mêd Yesu nél nang ên nêbê, “Di buc wê a hibu blet vigê vilu di sec yuu di vet xomxo 4,000 ya ge od xam su myapipu vac sepac vaba?” Mêd he nél ên nêbê, “Sepac vigê vilu di sec yuu.” ²¹ Om Yesu nél vô he ên nêbê, “Xam gên o xovô tige lêmê?”

Yesu vông xomxo manôn tocên ti vô niviha lec gê Betsaida

²² He mila vigwe Betsaida mēd xomxo kō vux wê manôn toc ge ti mi la vô Yesu dì la kitaa Yesu nêb i vyax vigê lec i ên manôn i seac. ²³ Om Yesu la hôm lec xomxo tige vigê dì didii i mi yuu la ninyawehe, mēd Yesu pisuv myaluc lec xomxo tyo manôn di vyax vigê lec dì kinêg ên nêbê, “Ông mammôn seac mi ông wê susu ya?” ²⁴ Mêd xomxo tyo yê ma la di nêl vô Yesu ên nêbê, “A xê xomxo lê, lêc a xê he tiyi xochbê xax wê vô videba videba mì lam ge dì a o xêvô he nôn lêm.” ²⁵ Mêd Yesu vyax vigê lec xomxo tyo manôn tui vac mēd xomxo tyo yê vigwe xêkizêc dì manôn vô niviha lec om i yê vigwe vihati yêp seac. ²⁶ Mêd Yesu nêl vô i ên nêbê, “Ông lôc vac bom bôbac di ông o lêc loc vigwe Betsaida lêm.”

*Pita nêl Yesu kitong nêb i Kilisi
(Matyu 16:13-20; Luk 9:18-21)*

²⁷ Yesu he nue ngivihi loc mi la, nêb ob la vigwe Sisalia Pilipai om he mila môt ti, lêc Yesu kinêg vô nue ngivihi ên nêbê, “Xomxo mi nêb a letya?” ²⁸ Om he nêl vô i ên nêbê, “Xomxo ya nêbê ông ge Jon Lipacên, dì ya nêbê ông plopet Ilaija, dì ya nêbê ông plopete ti.” ²⁹ Om Yesu kinêg vô he ên nêbê, “Dì xacxam va nêb a letya?” Mêd Pita nêl ên nêbê, “Ông Kilisi ti wê Anutu vông ông lam ên nêb ông lam ngidu xomxo xôn ge.” ³⁰ Mêgem Yesu vibu he nêb he i o lêc nêl i kitong vô xomxo lêm.

*Yesu nêl myavinê wê ob tulec i ge kitong
(Matyu 16:21-28; Luk 9:22-27)*

³¹ Yesu nêl kiyang vô nue ngivihi ên nêbê, “A, Xomxo Nu, a obêc kô myavinê levac mabu, dì Yuda levac hixôn xomxo levac wê mi si daa vô Anutu gee dì xomxo wê xovô Moses xolac gee, he obêc vô nîmi vô a dì hi a xib, dì buc yon obêc lam la vêl dì a obêc kidi lec magviha i tui vac.” ³² Yesu nêl kiyang tige seac vô he om Pita kô Yesu mi yuu la dô viyonê, mēd Pita nêl xêkizêc vô Yesu ên nêb i nêlén kiyang tibêge i ma. ³³ Lêc Yesu pilepac manôn lax vô nue ngivihi dì nêl xêkizêc vô Pita ên nêbê, “Seten, ông loc vêl. Ên xovôen wê ông vông ge o tiyi xochbê xovôen wê Anutu vông ge lêm. Nge, xovôen wê ông vông ge tiyi xochbê xovôen wê xomxo kibun ga vông ge.”

³⁴ Yesu keac nue ngivihi hixôn xomxo tibeac ên nêb he i loc vô i, om nêl vô he ên nêbê, “Xomxo ti obêc nêb timu vô a vixag ge od i vông i vô nipwo lec dì kilê viyin i tiyi xochbê kilê xax pola ge dì timu vô a vixag. ³⁵ Ên xomxo ti obêc nêb viac ninivi ên viyin yuu yibén ge od maviha wê i vông ge xôa obêc ma, lêc xomxo ti obêc sea ninivi lec a lêg yuu xolac ge od ob dô maviha. ³⁶ Ên xomxo ti obêc kituc susu kibun ga vihati tu ixe, lêc obêc sea môp wê ob dô maviha ya ge od ob vô niviha vô i tibêna? ³⁷ Dì xomxo obêc vông vatya ên kisuu maviha wê ob dô ya ge? ³⁸ Xomxo gwêbaga sea Anutu dì la vac môp nipaên, om xomxo ti vac he mahigun obêc vô nîmi vô a hixôn a kiyang ge od a, Xomxo Nu, a êno obêc vô nimig vô i lec buc wê a obêc lop mi lôm hixôn angela ngibua dì lam hixôn xêseac wê Mag vông ge.”

9

¹ Mêd Yesu nêl vô he ên nêbê, “A nêl hixôn nôn vô xam bêga bê xam wê xam le ga, xam ya obêc dô mamviha dì wê xolac wê Anutu ben kisiinê ge obêc val hixôn xêkizêc.”

*Yesu ninivi pikwê
(Matyu 17:1-13; Luk 9:28-36)*

² Buc vigê vilu dì sec ti lam la vêl mêd Yesu kô Pita yuu Jems yon Jon dì he la lec kitôn dia ti, dì heche va la dô, lêc yon yê wê Yesu ninivi pikwê mi vô bangwe, ³ dì i ngakwi vô kwem vivea lecén luu ngakwi kibun ga wê xomxo lipac i vô kwem ge vêl. ⁴ Mêd yon yê wê Moses yuu Ilaija val keac hixôn Yesu ge. ⁵ Om Pita nêl vô Yesu ên nêbê, “Xolac kehe, ga niviha wê il dô ga, om xen ob lox xumac yon, ti vô ông, dì ngwe vô Moses dì ti vô Ilaija.” ⁶ Pita nêl bêge pileva, ên yon xona mabu om Pita o xovô kiyang wê ob nêl ge lêm. ⁷ Mêd viyobtoc ti lam hivun he xôn, dì vya ti lam vac viyobtoc dì nêl ên nêbê, “Ge a nug wê a xêgyaa vin lec i ge om xam ngô i vya.” ⁸ Lêc lutibed yon yê ma la wê Yesu vaci le dì yuu xôa ma ge.

⁹ He sea vigwe kitôn dì lax mi la, lêc Yesu vibu yon ên nêbê, “Mon o lêc nêl wê mon wê ge kitong vô xomxo ti lêm dì i loc vô buc wê a, Xomxo Nu, a obêc kidi lec vac yibên ge lê.” ¹⁰ Om yon hôm kiyang tige xôn mi i yêp vô yon, lêc bo ti wê Yesu nêl ên nêb ob kidi lec vac yibên ge, yon ngô lê, lêc yon o xovô kehe lêm om yon keac lec.

¹¹ Mêd yon kinêg vô Yesu ên nêbê, “Xomxo wê xovô Moses xolac gee mi nêl ên he nêbê Ilaija obêc val tax dì Kilisi obêc val timuên, om he nêl tibêge ên va?” ¹² Om Yesu nêl vô yon ên nêbê, “Vixôhilôg, Ilaija ge wê ob val mug ên vông môp yuu kiyang i vô niviha lec lê. Lêc bêna lêc kiyang yêp vac xolac hixôn bêga nêbê Xomxo Nu obêc kô myavinê mabu dì xomxo obêc yê i nipaên dì vô nimi vô i hixôn? ¹³ A nêl vô xam bê Ilaija val pyap, lêc xomxo vông môp nipaên vô i tiyi xovôên wê he vông ge, tiyi xochê kiyang wê plopete kivuu lec i mi i yêp vac kipihac ge.”

*Yesu tii vimwo nipaên vêl ên xomxo ti
(Matyu 17:14-21; Luk 9:37-43)*

¹⁴ Yesu hixôn nue ngivihi yon ge milax vô nue vihati, lêc yê wê xomxo tibeac kitucma mi lam dô hixôn nue ngivihi ge, dì xomxo wê xovô Moses xolac gee val dô hixôn dì he hixôn Yesu nue ngivihi kinêgma lec kiyang. ¹⁵ Mêd xomxo vihati gee yê Yesu dì yetac mabu om tup mi la vô i dì la nêl vidiliên vô i. ¹⁶ Mêd Yesu kinêg vô nue ngivihi ên nêbê, “Xam dikeac lec kiyang vatya?” ¹⁷ Mêd xomxo ti kidi vac he mahigun dì nêl ên nêbê, “Xolac kehe, a kô a nug vux tiga mi lam vô ông, ên vimwo nipaên dô vac i nilô om vông i dô yac dì keacên ma, ¹⁸ dì buc wê vimwo nipaên tyo ob vông yuac vac i nilô ge od hôm i xôn dì nêx i lec kibun dì mya ngimong lam vac mya dì i kic nivu lecma, dì ninivi vô xêkizêc lec. Om a kitaa nume ngivihi ên a nêb he i tii vimwo nipaên tige i loc vêl lê, lêc he tiyiên ma.”

¹⁹ Mêd Yesu nêl vô he vihati ên nêbê, “Xam vêx yuu vux gwêbaga, vông vinêñ wê xam vông ge nôn ma. Om a ob dô hixôn xam dì i miloc vô buc tina lê, lêc xam vông i vinê? Dì a ob kilê viyin wê xam vông ge dì i miloc buc tina lê? Loc kô num tige mi lam.” ²⁰ Om he la kô nu tige mi lam vô i, lêc vimwo nipaên wê dô vac nu tyo nilô ge yê Yesu om lutibed vông yuac

makikun vac nu tyo nilô di nêx i lec kibun di vông i vô liyil liyil di mya ngimong lam vac mya.

²¹ Mêd Yesu kinêg vô nu tige ma ên nêbê, “Vimwo nipaên tige dô vac num tige tiyi klismas vaba?” Lêc xomxo tyo nêl vô Yesu ên nêbê, “Vô buc wê i gên nipwo. ²² Om buc tibeac vimwo nipaên nêx i la vac ngwax di nêx i la vac mia ên nêb ob hi i yib. Om a kitaa ông bê ông obêc tiyi ge od ông xo vigwe pisiv ên xii di ngidu i xôn.” ²³ Lêc Yesu nêl vô i ên nêbê, “Ông nêl ên ông nêbê mêd a obêc tiyi? Lêc a nêl vô ông bê xomxo ti obêc vông i vin ge od tiyi wê ob vông môp vihati ge.” ²⁴ Mêd lutibed xomxo tige nêl ên nêbê, “A vông i vin, lêc a o vông i vin xêkizêc lêm, om ông ngidu vông vinêñ wê a vông ge xôn.” ²⁵ Yesu yê wê xomxo tibeac val dô di dival valén om nêl kiyang xêkizêc vô vimwo nipaên ên nêbê, “Ông vimwo nipaên wê ông vông xomxo tiga ninya vô kitu di keacêñ ma ge, a nêl vô ông bê ông lam lop mi loc vixun vêl ên nu tiga, di ông o lêc lôc mi loc vac i nilô i tii vac lêm.” ²⁶ Mêd vimwo nipaên iac mabu di hi nu tyo lec kibun sea, di sea i di lam la vêl. Mêd nu tyo yép tipiêñ ma tiyi xochbê xomxo yibêñ om xomxo tibeac so ên nêb mêd nu tyo yib. ²⁷ Lêc Yesu la hôm lec i vigê di vông i le kisii.

²⁸ Pyap dêc Yesu lax mi la xumac lôma di lax dô hixôn nue ngivihi lêc nue kinêg vô i ên nêbê, “Bêna lê lêc xe mô o tiyi wê xe ob tii vimwo nipaên tige vêl lêmê?” ²⁹ Lêc Yesu nêl vô he ên nêbê, “Kitaaêñ tibed ge wê ob tii vimwo nipaên tibêge vêl, di môp baba ge ti o tiyi lêm.”

*Yesu nêl kiyang vông lu yuu lec myavinê wê ob kô ge
(Matyu 17:22-23; Luk 9:43-45)*

³⁰ Yesu he nue ngivihi sea vigwe tige di loc mi la vac vigwe Galili, lêc Yesu nêb xomxo i o lêc xovô vigwe wê he ob la vac ge lêm, ³¹ ên Yesu nêb ob nêl kiyang vô nue ngivihi vaci, om tixuu he ya kiyang bêga nêbê, “Xomxo ob vông Xomxo Nu la vac tibii vigê di he ob hi i yib, lêc buc yon obêc lam la vêl ge od obêc kidi lec mavîha tii vac nang.” ³² Yesu nêl bêge lêc nue ngivihi lungêñ kiyang tige kehe di xona om he o kinêg kiyang tyo kehe vô Yesu lêm.

*Letya ob tu levac?
(Matyu 18:1-5; Luk 9:46-48)*

³³ He mila Kapaneam di la dô vac xumac lôma, lêc Yesu kinêg vô nue ngivihi ên nêbê, “Xam nêl kiyang vatya vôma vac môpê?” ³⁴ Lêc he dô xôa maên, ên buc wê he lam wô môp ge od he ngaénma ên nêb mêd letya obêc tu he nêñ mugêñê? ³⁵ Om Yesu tô mi dô di keac nue ngivihi vigê yuu di tò mi la yuu lam vô i di nêl vô he ên nêbê, “Xomxo ti obêc nêb tu mugêñ ge od i loc le tâmuén di vông yuac wê ob ngidu lie vihati xôn ge.” ³⁶ Mêd Yesu la kô nipwo ti mi lam vac he mahigun, dêc kiva nipwo tyo lec di nêl vô nue ngivihi ên nêbê, ³⁷ “Xomxo ti obêc hôm nipwo tibêga lec ên wê vông i vin a lêg ge od ge tiyi xochbê

hôm a lec éno, di xomxo ti wê hôm a lec ge od o tiyi xochbê hôm aca va lec lêm. Nge, hôm xomxo ti wê vông a lam ge lec hixôn éno.”

*Xomxo wê o vông vevac vô il lêm ge, tiyi xochbê il nidpipu
(Luk 9:49-50)*

³⁸ Jon nêl vô Yesu ên nêbê, “Xolac kehe, xe xê xomxo ti tii vimwo nipaên vêl ên xomxo lec ông lêm, om xe vibu i ên xe nêb i vôngêñ tibêge i ma,

ên xomxo tige o mi dô hixôn xe mì timu vô ông lêm.” ³⁹ Lêc Yesu nêl ên nêbê, “Xam o lêc vibu i lêm, ên xomxo ti obêc vông do levac lec a lêg ge od o tiyi wê ob nêl kiyang nipaên lec a decdec ge lêm.” ⁴⁰ Ên xomxo wê o vông vevac vô il lêm ge, ge tiyi xocbê il nidpipu wê ob ngidu il xôn ge. ⁴¹ A nêl hixôn nôn vô xam bê xomxo ti obêc vông mia numên vô xam ên wê xam vông i vin Kilisi ge od xomxo tige obêc kô nôn niviha lec timuên.

*Môp wê ob vông xomxo vô nipaên
(Matyu 18:6-9; Luk 17:1-2)*

⁴² “Xomxo ti obêc vông nipwo tigee ti sea vông vinêñ wê i vông ge di la vac môp nipaên ge od xomxo i nux ngidax lec i kwa di nêx i loc vac gwec madia. ⁴³ Di ông vigêm vilu obêc didii ông mì la vac nipaên ge od ông kitov vêl di dô ya vigêm vilubed êdêc loc dô mamviha vac Anutu ben. Ên ông vigêm yuu xôn obêc dô ge od ob nêx ông la vac vigwe nipaên wê ngwax tum xuhu dia di ob yib lêm ge. ⁴⁴ [Vac vigwe nipaên tige, myel vêê wê yibêñ obêc ma ge ob nga xomxo, di ngwax ditum hixôn di yibêñ ma.] ⁴⁵ Di ông vixam vilu obêc didii ông mì la vac môp nipaên ge od ông kitov vêl di dô ya vixam vilubed êdêc loc dô mamviha vac Anutu ben. Ên ông vixam yuu xôn obêc dô ge od ob nêx ông la vac vigwe nipaên. ⁴⁶ [Vac vigwe nipaên tige, myel vêê wê yibêñ obêc ma ge ob nga xomxo, di ngwax ditum hixôn di yibêñ ma.] ⁴⁷ Di ông mammôn vilu obêc vông ông la vac môp nipaên ge od ông pisupac vêl di dô ya mammôn vilubed êdêc loc dô vac Anutu ben, ên mammôn yuu xôn obêc dô ge od ob nêx ông la vac vigwe nipaên. ⁴⁸ Vac vigwe nipaên tige, myel vêê wê yibêñ obêc ma ge ob nga xomxo, di ngwax ditum hixôn di yibêñ ma.

⁴⁹ “Ngwax obêc la lec xomxo vihati tiyi xocbê xomxo hilee sol lec yaêñ ge. ⁵⁰ Sol ge niviha, lêc sol obêc vô nyen maêñ ge od il obêc vô vatya vô ên i vô nyen i tii vac nangê? Sol i dô vac xam, di xam dô hixôn lime di xêmyaa i vin lec he.”

10

*Yesu nêl kiyang lec môp wê vông ii maêñ vô nipaên ge
(Matyu 19:1-12; Luk 16:18)*

¹ Yesu sea vigwe tige di la vac vigwe levac Judia di la vac vigwe ti wê yêp mia Jodan vilu ganê. Mêd xomxo tibeac val kitucma vô Yesu om Yesu nêl xolac wô he tiyi môp wê mi vông ila ila ge.

² Mêd Palisi ya val, nêb ob yaxêñ i om kinêg nêbê, “Môp wê xomxo ob sea vinê ge, xolac nêb môp tibêge tiyi, me tiyien ma?” ³ Lêc Yesu kinêg lax vô he ên nêbê, “Xolac wê Moses vông ge nêbê va vô xamê?” ⁴ Om he nêl ên nêbê, “Moses nêl ên nêbê xomxo ti obêc nêb sea vinê ge od ob kivuu kipihac wê nêbê yuu ob seama ge di vông vô vinê lê dêc yuu seama.” ⁵ Lêc Yesu nêl vô he ên nêbê, “Moses kivuu xolac tige vô xam ên wê xam nilôm yen xêkizêc ta ge. ⁶ Ên buc mugêñ ilage wê Anutu tung lag yuu kibun ge, od Anutu tung xomxo väx yuu xôn vux. ⁷ Mêgem môp yêp bêga nêbê vux ob sea ta yuu ma di la dô hixôn vinê, ⁸ di yuu ob tiyi xocbê nôn tibed. Om yuu ob dô tiyi xocbê nôn yuu ge lêm. Nge, yuu ob dô i tiyi xocbê nôn tibed. ⁹ Mêgem môp wê Anutu vông yuu tu nôn tibed ge, xomxo i o lêc tax i tip lêm.”

10 He lax xumac lôma lêc nue ngivihi kinêg kiyang tige vô Yesu tii vac nang. **11** Om Yesu nêl vô he ên nêbê, “Vux ti obêc sea vinê dì la kô vêx paha ngwe ge od ge vông môp yôdac vêx yuu vux. **12** Dì vêx ti obêc sea liya dì la kô vux paha ngwe ge od vêx tige vông môp yôdac vêx yuu vux.”

*Yesu kitaa lec nue nipipwo
(Matyu 19:13-15; Luk 18:15-17)*

13 Xomxo kô nue nipipwo mi la vô Yesu, ên nêb i vyax vigê lec he dì kitaa lec he, lêc Yesu nue ngivihi kunac he nêb he loc vôen Yesu i ma. **14** Lêc Yesu yê môp wê nue ngivihi vông ge di xêyaa vô myavinê om nêl vô he ên nêbê, “Vông nipipwo i lam vô a di le vac xônên i ma, ên xomxo tibêgee wê tu kehe ên vigwe kisiinê. **15** A nêl hixôn nôn vô xam bêga bê xomxo ti obêc vông i vin Anutu xolac mi la vac i kwa ngibi tiyi xochê nipipwo tigae lêm ge od o tiyi wê ob la dô vac Anutu ben ge lêm.” **16** Mêd Yesu kiva nipipwo tiguee di vyax vigê lec he dì kitaa lec he.

*Xomxo wê susu tibeac gee
(Matyu 19:16-30; Luk 18:18-30)*

17 Yesu loc mi la vô môp mi la, di xomxo ti tup mi la vô i vac môp, di la yev vixa kitu vô dì kinêg ên nêbê, “Xolac kehe niviha, a obêc vông bêna êdêc dô magviha luta lêc luta?” **18** Lêc Yesu nêl vô i ên nêbê, “Bêna lêc ông nêl niviha lec a? Xomxo niviha ti o dô lêm. Anutu vaci nôn tibed wê niviha. **19** Ông xovô Moses xolac pyap wê nêl ên nêbê, ‘Ông o lêc hi xomxo i yib lêm. Ông o lêc vông yôdac vêx yuu vux lêm. Ông o lêc vun xomxo ngwe susu lêm. Ông o lêc nêl kiyang kityooên lec xomxo ti lêm. Ông o lêc kityoo xomxo di vô he susu vêl lêm. Ông loc vac tam yuu mam vya kwa ngibi.’” **20** Om xomxo tyo nêl vô Yesu ên nêbê, “Xolac kehe, buc wê a gên nipwo di i val tyip gwêbaga, a viac xolac gee vihati mi vông i vô nôn lec.” **21** Mêd Yesu yê i manôn di xêyaa vin lec i, mêd nêl vô i ên nêbê, “Môp ti gên yêp wê ông ob vông hixôn ge. Ông loc vông susu wê ông vông ge vihati mi tibii i kisuu, di ông vông mone vô xomxo wê nên susu maên ge, ên ông obêc vông bêge ge od ông obêc kô susu nôn niviha gê kisii ganê. Ông loc vông bêge di lôm timu vô a vixag.” **22** Xomxo tyo ngô kiyang tige di nilô vô viyin levac ên i susu tibeac. Om sea Yesu di la.

23 Mêd Yesu manôn yê nue ngivihi di nêl vô he ên nêbê, “Xomxo wê susu tibeac ge obêc nêb la vac Anutu ben ge od obêc vông yuac levac vô he.” **24** Yesu nue ngivihi ngô kiyang tige di yetac mabu. Lêc Yesu nêl tii vac vô he ên nêbê, “Xam nuge, xomxo obêc nêb la vac Anutu ben ge od yuac levac. **25** Bwoc kamel obêc la vac yin kitu tocên ge, od obêc yuac levac, di

xomxo wê susu tibeac ge obêc nêb la vac Anutu ben ge od obêc yuac levac luu vêl.” **26** Om Yesu nue ngivihi yetac mabu yocêñ di nêl vô i ên nêbê, “Obêc tibêge ge od letya tiyi wê obêc la dô maviha vac Anutu ben ge?” **27** Lêc Yesu yê manôn la bôbac vô he di nêl ên nêbê, “Xomxo vaci o tiyi lêm, dom Anutu vaci ge od tiyi pyap. Ên môp vihati yang ge, Anutu tiyi wê ob vông ge.”

28 Mêd Pita nêl vô Yesu ên nêbê, “Om wê lê. Xe ga, xe sea susu wê xe vông ge vihati dô di lam timu vô ông vixam.” **29** Mêd Yesu nêl ên nêbê, “A nêl hixôn nôn vô xam bêga bê xomxo ti obêc sea ben hixôn tae mae lie di nue hixôn yuac yaén wê i vông ge ên wê nêb ob vông a lêg yuu xolac i

vô levac ge,³⁰ od xomxo tige obêc kô xumac hixôn yuac yaên tibeac dì tae mae lie dì nue tibeac gê kibun ga, lêc tibii obêc vông myavinê vô i hixôn, dì buc timuên ge od obêc la dô maviha luta lêc luta.³¹ Lêc xomxo mugên tibeac obêc lax mì la timu, dì xomxo timuên tibeac obêc lam la mug.”

*Yesu nêl kiyang vông lu yon lec myavinê wê ob kô ge
(Matyu 20:17-19; Luk 18:31-34)*

³² Yesu he nue ngivihi loc mi la ên nêb ob la Jelusalem. Om he mila vac môp, lêc Yesu la mug dì nue ngivihi hixôn xomxo ya he timu vô i vixa. Mêd nue ngivihi xo kiyang tibeac, dì xomxo wê la hixôn gee, he xona. Mêgem Yesu kô nue ngivihi vigê yuu dì tô mi la yuu mì he la dô viyonên dì Yesu nêl viyin wê ob tulec i ge kitong vô he,³³ om nêl ên nêbê, “Xam ngô lê. Il ob la Jelusalem, dì xomxo ob vông Xomxo Nu vac xomxo levac wê mi si daa gee hixôn xomxo wê xovô Moses xolac gee vigê, dì he ob vông kot vô i dì hilu kiyang wê ob hi i yib ge xôn dì vông i la vac tibii wê o Yuda lêm gee vigê,³⁴ mêd tibii tigeet ob so vya vô i dì pisuv mya lec dì pisa ya yihi dì hi i yib, dì buc yon obêc lam la vêl ge od obêc kidi lec maviha nang.”

*Jems yuu Jon nêb yuu ob tu levac
(Matyu 20:20-28)*

³⁵ Sebedi nu yuu Jems yuu Jon la vô Yesu dì nêl vô ên nêbê, “Xolac kehe, xii ob kitaa susu ti vô ông, ên ông vông vô xii.”³⁶ Om Yesu nêl vô yuu ên nêbê, “Om muu nêb a vông bêna vô muuê?”³⁷ Mêd yuu nêl vô i ên nêbê, “Buc wê ông ob dô vac xêseac ge, od xii nêb ông vông lê levac vô xii dì xii ngwe ob dô vô ông vigêm vilu hiyôv dì ngwe ob dô vô vigêm vilu kêt.”³⁸ Lêc Yesu nêl vô yuu ên nêbê, “Susu wê muu kitaa vô a ge muu o xovô kehe lêm. Di kap wê a ob num vac ge, muu tiyi wê muu ob num vac hixôn, me? Di mia lipacén wê a ob lipac ge, muu tiyi wê muu ob lipac hixôn, me? Ên myavinê levac hixôn viyin obêc hivun a xôn.”³⁹ Mêd yuu nêl vô Yesu ên nêbê, “Xii tiyi pyap.” Lêc Yesu nêl vô yuu ên nêbê, “Vixôhilôg, myavinê wê a ob kilê ge, muu ob kilê hixôn. Di viyin wê a ob tulec ge, obêc tulec muu êno hixôn.”⁴⁰ Lêc xomxo wê ob kô lê levac mì dô vô a vigêg hiyôv dì dô vô a vigêg kêt ge, a o tiyi wê a ob nêl ge lêm. Ên Anutu vaci ob nêl xomxo wê i viac vigwe pyap vô he ge.”

⁴¹ Yesu nue ngivihi vigê yuu ngô kiyang wê Jems yuu Jon nêl ge om he xêyaa vô myavinê vô yuu. ⁴² Om Yesu keac he vihati la vô i dì nêl vô he ên nêbê, “Xam xovô ên xam nêbê xomxo wê tu tibii baba nén levac ge, he mi yong he ên lê levac wê he kô ge, dì he mi nêl kiyang xêkizêc vô lie ên nêb he i loc vac kiyang wê he nêl ge kwa ngibi.”⁴³ Di xacxam va, xam o lêc vông môp tibêge lêm. Xam ti obêc nêb tu xam nêm levac ge, od i tu xam nêm xomxo yuac.⁴⁴ Dì xam ti obêc nêb tu xam nêm mugên ge od i kô lê vidaaén dì vông yuac vô lie vihati.⁴⁵ Ên a, Xomxo Nu, a o lam ên a nêb xomxo i vông yuac vô a lêm. Nge, a lam ên a nêb a ob vông yuac vô xomxo ên ngidu he xôn, dì a ob xib ên vô xomxo tibeac vêl ên he nêni nipaên.”

*Yesu vông xomxo ma tocên ti vô niviha lec
(Matyu 20:29-34; Luk 18:35-43)*

⁴⁶ Yesu he nue ngivihi hixôn xomxo tibeac ge, he val Jeliko, nang dêc sea Jeliko di la nang. Léc xomxo matocên ti lê nêbê Batimias wê ma Timias ge dô vô môp ninya, ên mi dô di mi kitaa mone vô tibii wê lam vô môp ge. ⁴⁷ Léc ngô wê Yesu Nasalet val ge, om tyuc vya levac bêga nêbê, “Yesu, Devit nu, ông xo vigwe pisiv ên a.” ⁴⁸ Mêd xomxo tibeac higac di nêl ên nêbê, “Ông vyam i ma.” Léc Batimias ngôên he ma di tyuc vya levac tii vac vac ên nêbê, “Devit nu, ông xo vigwe pisiv ên a.” ⁴⁹ Mêgem Yesu val le di nêl ên nêbê, “Xam keac i lam.” Om he la nêl vô Batimias ên nêbê, “Ông xêmyaa i vô nivinha di ông kidi lec mi lam, ên Yesu nêl nêbê ông loc vô i.” ⁵⁰ Om Batimias kwax i kol siot vêl di kidi lec lutibed di la vô Yesu. ⁵¹ Mêd Yesu kinêg vô i ên nêbê, “Ông nêb a vông bêna vô ôngê?” Léc xomxo ma tocên tige nêl vô i ên nêbê, “Xomxo levac, a nêb ông vông a magnôn i seac.” ⁵² Mêd Yesu nêl vô i ên nêbê, “Om ông lôc, ên vông vinêr wê ông vông ge vông ông vô nimvîha lec.” Om lutibed xomxo tyo manôn seac di i yê vigwe mêd la hixôn Yesu mi he la.

11

*Yesu la vac vigwe Jelusalem tiyi xochê xomxo levac ge
(Matyu 21:1-11; Luk 19:28-40; Jon 12:12-19)*

¹ Yesu he nue ngivihi loc mi la ên nêb ob la Jelusalem. He la vac vigwe Betpasi yuu Betani wê yêp kwabo vô kitôn Oliv ge. Vigwe yuu ge yêp kwabo vô Jelusalem. Om Yesu vông nue ngivihi yuu la, ² di nêl vô yuu ên nêbê, “Muu loc vac vigwe ti wê yêp vilu ganê. Wê muu obêc mila ge od muu ob wê donki wê gên ligên ge ti wê xomxo vô yihi lec kwa di i dile ge. Donki tige xomxo ti gên o dô lec ila lêm. Om muu piwelac yihi vêl ên di didii i mi lam. ³ Léc xomxo ti obêc kinêg muu ên nêbê, ‘Muu ob piwelac yihi tige vêl ên va?’ ge od muu nêl vô bê ‘Apumtau nêb ob kô mi vông yuac lec di obêc vông i lôm lutibed.’”

⁴ Yesu nêl bêge vô yuu di yuu loc mi la, di mila yê bwoc donki ti wê xomxo ku xôn di ku lec xumac ti vuayen di i dile kwabo vac môp ge, mêd yuu piwelac yihi vêl, ⁵ léc xomxo wê dile ge nêl vô yuu ên nêbê, “Bêna lêc muu dipiwelac yihi vêl ên donki tige?” ⁶ Om yuu nêl i tiyi kiyang wê Yesu nêl vô yuu ge, mêd xomxo tigee tyuc lec, ⁷ om yuu didii donki tige mi lax vô Yesu, mêd yuu vax yuu ngakwi lec kisii dêc Yesu dô lec. ⁸ Mêd xomxo tibeac vax he nivimihi lec môp di he ya kô xax lihi wê he la kô vac yuac ge mi vax vac môp wê Yesu ob xoc vô ge. Môp tige wê he mi kô xomxo levac lec ge. ⁹ Mêgem he wê la mug hixôn he wê timu vô Yesu gee, he vihati tyuc ên nêbê,

“Il ob pimil Anutu. Di il ob hi vixad i pec ên xomxo ti wê tu Apumtau manôn mi val ge.

¹⁰ Il ob hi vixad ên il nêd king wê val gwêbaga, ên ob viac il tiyi xochê bug Devit viac il ilage. Il ob vông Anutu lê i vô levac di i yêp kisii.”

¹¹ Mêd Yesu mila Jelusalem di la vilee vac Anutu xumac ngibua mi la yê susu vihati ge pyap, mêd hiyôv hoo la di vigwe ob buc, om Yesu hixôn nue ngivihi vigê yuu di tô mi la yuu, he lax mi la vigwe Betani.

*Yesu nêl vya lôt higuc nêb i vuac nôn lêm
(Matyu 21:18-19)*

¹² Vigwe vidiiêñ titige Yesu he nue ngivihi sea Betani dì la, lêc vip den Yesu. ¹³ Om Yesu yê ma la higuc ti wê le teva ge dì lihi levac om la kwabo ên nêb ob yê bêc nôn ya yux lec ge od ob ya. Om la yê, lêc lihi pileva di nôn ti o yux lec lêm, ên buc wê nôn ob yux lec ge gên yêp. ¹⁴ Om Yesu nêl kiyang xêkizêc lec higuc ên nêbê, “Tiyi buc vihati yang ge ông ob vuac nôn ti i tii vac lêm.” Yesu nêl bêge dì nue ngivihi ngô hixôn.

*Yesu tii tibii wê vông vitevac vac Anutu xumac ngibua gee la vêl
(Matyu 21:12-17; Luk 19:45-48; Jon 2:13-22)*

¹⁵ He mila Jelusalem mêt Yesu la vac Anutu xumac ngibua dì la tii xomxo wê divông vitevac gee la vêl, dì xomxo wê vông mone luuma gee, Yesu kipyax he nêñ tevol sea, dì xomxo wê vông vitevac lec menac gee, Yesu kipyax he nêñ sia sea, ¹⁶ dì Yesu vibu xomxo nêb he i o lêc kilê he susu mi loc vac xumac ngibua lêm. ¹⁷ Mêt

Yesu nêl vô he ên nêbê, “Anutu vya yêp vac xolac bêga nêbê, ‘Xumac wê a vông ge, xomxo vac vigwe vihati gee, he ob kitaa vac.’ Xolac nêl bêge, lêc xam vông i tu xocbê xumac wê tibii yôdac ob xôpac vac ge.”

¹⁸ Mêt xomxo levac wê mi si daa gee hixôn he wê xovô Moses xolac gee ngô kiyang tige om myag môp wê ob hi Yesu yib lec ge, lêc he xona ên Yesu ên wê xomxo vihati yetac ên kiyang wê Yesu nêl ge. ¹⁹ Yesu he nue ngivihi dô dì vigwe buc om he sea Jelusalem dì lax mi la Betani.

*Kitaaén wê xomxo vông vinêñ vông ge ob vô nôn lec
(Matyu 21:20-22)*

²⁰ Vigwe vidiiêñ titige, he lax mi la Jelusalem lêc yê wê higuc tige lihi yal vêl dì mupac vac kitôn dì i la tô kehe. ²¹ Mêt Pita xovô kiyang wê Yesu nêl vihevage om nêl vô i ên nêbê, “Xolac kehe, wê lê. Xax ti wê ông nêl vyam lôt vihevage, tyo mupac.” ²² Lêt Yesu nêl vô he ên nêbê, “Xam vông i vin Anutu. ²³ A nêl hixôn nôn vô xam bêga bê xomxo ti obêc nêl vô kitôn tige bê i pul vêl mi loc vac gwec, dì xomxo tige nilô ob vông yuu lêm, nge, obêc vông i vin xêkizêc ên nêbê kiyang wê i nêl ge ob vô nôn lec ge od ob vô nôn lec. ²⁴ Om a nêl vô xam bêga bê xam obêc nêbê kitaa susu ti vô Anutu ge od xam vông i vin xêkizêc bê xam obêc kô susu tige, ên xam obêc vông bêge ge od xam obêc kô i tiyi wê xam kitaa ge.

²⁵ “Dì buc wê xam ob kitaa vô Anutu ge od lime ti nêñ soën obêc yêp vô xam ge od xam kitya nipaêñ tige vêl lê, êdêc Mag wê dô lag puunê ge i kitya xam nêm nipaêñ vêl hixôn. ²⁶ [Lêt xam obêc kitya lim tige nêñ nipaêñ vêl lêm ge od Mag wê dô kisiinê ge obêc kitya xam nêm nipaêñ vêl êno lêm.]”

*Xomxo kinêg xêkizêc wê Yesu vông ge kehe
(Matyu 21:23-27; Luk 20:1-8)*

²⁷ Yesu he nue ngivihi milax Jelusalem tii vac, mêt Yesu la vîlee vac Anutu xumac ngibua lêc xomxo levac wê mi si daa gee hixôn xomxo wê xovô Moses xolac gee hixôn he Yuda levac levac, he val vô Yesu, ²⁸ dì val kinêg vô i ên nêbê, “Letya vông ông lam ên nêb ông lam vông môp tibêgee? Ông tu letya manon dì vông môp tibêgee?” ²⁹ Lêt Yesu luu he vya dì nêl lax vô he ên nêbê, “A êno ob kinêg kiyang ti vô xam, dì xam obêc nêl kitong ge od a ob nêl xomxo ti wê vông a lam ge kitong vô xam. ³⁰ Om a ob kinêg xam bêga bê môp wê Jon Lipacêñ lipac xomxo ge, môp tige

kehe yêp vô letya? Ge yêp vô Anutu lag kisiinê, me yêp vô xomxo kibun ga? Xam nêl kehe kitong vô a.”

³¹ Om he ngaênma dì nêl vôma ên nêbê, “Il obêc nêb va? Ên il obêc nêl bê Anutu lag kisiinê vông Jon lam ge od Yesu obêc nêl vô il bê, ‘Bêna lêc xam o vông i vin kiyang wê Jon nêl ge lêmê?’ ³² Léc il obêc nêl bê xomxo kibun ga vông Jon la lipac xomxo ge od tiyiên ob ma.” He nêl bêge, ên he xona ên xomxo, ên xomxo vihati vông i vin ên he nêbê Jon ge plopet nôn.

³³ Mégem he nêl vô Yesu ên nêbê, “Xe o xovô lêm.” Mêd Yesu nêl vô he ên nêbê, “Om a êno ob nêl xomxo ti wê vông xêkizêc vô a ge kitong vô xam lêm.”

12

Kiyang pilepacêñ lec xomxo nipaêñ wê viac yuac ge (Matyu 21:33-46; Luk 20:9-19)

¹ Mêd Yesu nêl kiyang pilepacêñ ti vô xomxo bêga ên nêbê, “Xomxo ti xin wain vac yuac dì ku xenac kisuu lec dì yev lôva ti wê xomxo ob gig xax nôn vac ge dì lox xumac wê xomxo ob dô vac dì viac yuac ge. Mêd xomxo tige nêb ob la dô vac vigwe teva ngwe, om vông yuac tige vac xomxo ya vigê ên nêb he i viac. Pyap dì xomxo tige la dô teva ngwe, ² dì buc wê wain huu ge om vông nue yuac ti lax mi la vô xomxo wê viac yuac wain ge ên nêb i loc kô wain nôn ya. ³ Xomxo tyo mila, lêc xomxo wê vông yuac lec wain ge hôm i xôn dì hi i dì vông i lax mi la pileva. ⁴ Nang dêc xomxo ti wê i yuac ge vông nue yuac ngwe la vô he nang, lêc he hi i lec bazub dì vô vya nipaêñ vô i dì vông i lax mi la nêñ. ⁵ Mêd xomxo levac vông nu yuac ti wê vông yon ge la nang, lêc xomxo tige hi i yib. Mêd xomxo tyo vông nue yuac toto la lêc he hi he ya vô nipaêñ dì hi he ya yib. ⁶ Mêd xomxo tibed dô hixôn xomxo levac tige. Ge i nu tuc wê i xêyaa vin lec i ge om buc ti lêc xomxo levac tyo vông nu tuc la vô xomxo wê viac i yuac ge, ên nêl ên nêbê, ‘Ga aca va nug om he ob kô i lec niviha dì la vac kiyang wê i vông ge kwa ngibi.’ ⁷ Léc xomxo wê viac yuac tige nêl vôma ên nêbê, ‘Xomxo tige wê obêc tu yuac kehe om il ob hi i yib édêc yuac ga i tu il xe.’

⁸ Om he hôm i xôn dì hi i yib, dì nêx i nôn la yêp vô yuac ninya.

⁹ “Om xomxo ti wê i yuac ge ob vô vatya? Ge ob la hi xomxo tige yib dì vông i yuac vô xomxo baba mi he viac nang.

¹⁰ “Kiyang wê yêp vac Anutu xolac ge xam mêt o kitong lêm? Ên kiyang yêp bêga nêbê,

‘Ngidax ti wê xomxo xumac loxên yê lêc nêbê tiyiên ma ge, ge wê tu ngidax xêkizêc wê ob hôm xumac xôn ge. ¹¹ Apumtau vaci vông tige om xe xê tiyi xocbê susu niviha yang ge.’”

¹² Xomxo levac wê mi si daa gee hixôn xomxo wê xovô Moses xolac gee, he xovô ên he nêbê Yesu nêl kiyang pilepacêñ tige lec he, om he nêb he ob hôm Yesu xôn, lêc he xona ên xomxo tibeac, om he sea Yesu dì la.

Xomxo kinêg Yesu lec mone wê ob tung vô Sisa ge (Matyu 22:15-22; Luk 20:20-26)

¹³ He vông Palisi ya hixôn Helot nue ya la vô Yesu ên nêb ob kityoo Yesu ên vông i nêl kiyang ya i so. ¹⁴ Om he val nêl vô i ên nêbê, “Xolac kehe, xe xovô ên xe nêbê ông ge wê ông nêl kiyang hixôn nôn dì ông o xona ên xomxo ti lêm, ên ông wê xomxo vihati tiyima, om ông mi nêl kiyang nôn

dì ông tixuu xomxo vihati ya kiyang wê Anutu vông ge. Om xe nêb xe ob kinêg vô ông bê tiyi wê il Yuda ob vông mone takis vô king Sisa ge, me il vôngên ob ma?"

¹⁵ Léc Yesu xovô kiyang kityooén wê yêp vac he nilô ge om nêl vô he ên nêbê, "Bêna lêc xam nêb xam ob yaxên a? Xam kô mone ti mi lam ên a xê." ¹⁶ Om he kô mone ti mi lam, di Yesu kinêg vô he ên nêbê, "Letya kinu yuu lê wê yêp lec mone tiga?" Om he nêl ên nêbê, "Sisa kinu yuu lê." ¹⁷ Mêgem Yesu nêl vô he ên nêbê, "Om susu wê Sisa xe ge, xam vông i loc vô Sisa, di susu wê Anutu xe ge, xam vông i loc vô Anutu." Mêd xomxo tigee ngô kiyang wê Yesu nêl ge di yetac mabu.

*He kinêg vô Yesu lec môp wê xomxo ob kidi lec vac yibên ge
(Matyu 22:23-33; Luk 20:27-40)*

¹⁸ Xomxo Sadyusi ya val vô Yesu. He Sadyusi ge, he vông i vin ên he nêbê xomxo ob kidi lec vac yibên lêm. Om he la nêl vô Yesu ên nêbê, ¹⁹ "Xolac kehe, Moses xolac nêl bêga vô il ên nêbê xomxo ti obêc kô vêx ti lêc nu ma di liya yib di vinê dô ge od vux tyo li timuên ob ii vêx tyo nang di vông nue, êdêc nue i tu susu wê ma yibên vông ge kehe. Moses xolac nêl bêge, ²⁰ om wê vux vigê vilu di sec yuu ob dô lec ta yuu ma tibed, dêc li tuc obêc kô vêx ti lêc yib di nu ma ge, ²¹ od li môn ob ii vêx tige i tii vac nang, lêc wê obêc yib di nu ma ge od li gwaa ob ii nang, lêc wê li gwaa obêc yib ge ²² od lie timuên vihati ob timu vô môp tibed ge dêc ii vêx tige, lêc wê vihati obêc yib di nue ma, dêc vêx tyo obêc yib timuên. ²³ Om xe nêb xe ob kinêg vô ông bê buc wê xomxo yibên obêc kidi lec ge od vêx tige obêc tu vux tina vinê? Ên vux vigê vilu di sec yuu, he xôn ii vêx tibed lec buc wê he dô maviha ge."

²⁴ Léc Yesu nêl vô he ên nêbê, "Xam nêl i so di kehe bêga nêbê xam o xovô kiyang wê yêp vac xolac ge lêm, di xam o xovô xêkizêc wê Anutu vông ge lêm. ²⁵ Èn buc wê xomxo obêc kidi lec maviha vac yibên ge, vêx yuu vux ob iima vô buc tige lêm. Nge, he ob dô tiyi xochê angela lag puunê ge.

²⁶ "Di kiyang lec môp wê xomxo yibên ob kidi lec maviha ge, xam mêd lungên kiyang bo ti wê Moses kivuu lec xax wê ngwax ditum lec ge? Vac kiyang tige Moses kivuu Anutu vya wê nêl vô i ge mi i yêp vac kipihac xolac bêga nêbê, 'A ga, Anutu wê Eblaham yuu Aisak yon Jekop mi kitaa vô a.' ²⁷ Om kiyang tige nêl kitong ên nêbê Anutu o tu xomxo yibên nê Anutu lêm. Nge, Anutu tu xomxo maviha nê Anutu. Om kiyang wê xam nêl ên xam nêbê xomxo ob kidi lec vac yibên lêm ge, xam nêl i so."

*Xolac yuu wê nginoo xolac baba vêl ge
(Matyu 22:34-40; Luk 10:25-28)*

²⁸ Xomxo wê xovô Moses xolac ge ti val ngô wê he ngaêhma lec kiyang ge di ngô wê Yesu luu he kiyang ya kiyang niviha ge, om kinêg vô Yesu ên nêbê, "Xolac wê Anutu nêl vô Moses ge, tina wê nginoo xolac baba vêl ge? ²⁹ Om Yesu nêl vô i ên nêbê, "Xolac ti wê yêp tax di nginoo baba vêl ge bêga nêbê, 'Xam xomxo Islel, xam ngô lê. Il Apumtau Anutu, i Apumtau tibed. ³⁰ Ông xêmyaa i vin lec ông Apumtau Anutu di ông vông nilôm yen yuu piyôp di xêkizêc hixôn kinum i loc diluhu vô Anutu.' ³¹ Di xolac ti wê vông yuu ge yêp bêga nêbê, 'Ông xêmyaa i vin lec xomxo baba i tiyi

xocbê ông xêmyaa vin lec ôcông va ge.' Xolac baba ti o nginoo xolac yuu ge vêl lêm."

³² Mêd xomxo tige nêl vô Yesu ên nêbê, "Xolac kehe, ông nêl ge niviha. Ông nêl kiyang nôn ên ông nêbê Anutu ge tibed dì ngwe o dô hixôn i lêm.

³³ Om il xêdyaa ob vin lec i dì il ob vông nilôd yuu piyôp hixôn xêkizêc vihati i loc diluhu vô Anutu, dì il xêdyaa ob vin lec xomxo baba tiyi xochê il xêdyaa vin lec icil va ge, ên il obêc vông bêge ge od ob niviha luu daa wê xomxo mi si lec ngwax hixôn daa baba ya vêl."

³⁴ Mêd Yesu ngô wê xomxo tige nêl kiyang hixôn piyôp niviha ge om nêl vô i ên nêbê, "Ông o dô teva ên Anutu ben kisiinê lêm." Mêd xomxo vihati xona ên wê ob kinêg kiyang ya vô Yesu nang ge.

*Yesu kinêg lê Kilisi vô he
(Matyu 22:41-46; Luk 20:41-44)*

³⁵ Yesu la nêl xolac vô xomxo vac Anutu xumac ngibua dì nêl bo ti hixôn bêga nêbê, "Bêna lêc xomxo wê xovô Moses xolac ge nêl ên he nêbê Kilisi wê Anutu nêb ob vông i lam ge, ge Devit nu? ³⁶ Ên Myakîlôhô Ngibua vông xovôên vô Devit om Devit vaci kivuu kiyang bêga nêbê,

'Apumtau Anutu nêl vô a Apumtau ên nêbê, Ông dô vô a vigêg hiyôv dì a obêc vông tibii wê vông vevac vô ông ge he i dô vac ông kwa ngibi.'

³⁷ Om kiyang tige, Devit vaci nêl lec Kilisi ên nêbê i Apumtau. Om bêna lêc xomxo nêl ên nêbê Kilisi ge Devit bue timuên ti?" Mêd xomxo tibeac nêb ob ngô kiyang wê Yesu mi nêl ge.

*Yesu nêl xomxo wê xovô Moses xolac gee nén nipaên kitong
(Matyu 23:1-36; Luk 11:37-54; Luk 20:45-47)*

³⁸ Yesu nêl kiyang vô xomxo bêga ên nêbê, "Xam xona nêm ên xomxo wê xovô Moses xolac gee, ên he xêyaa vin lec môp wê he ob vinyum ngakwi dia dì la vilee lec wetôv, ên he nêb xomxo i yê he dì kô he lec, ³⁹ dì he obêc la vac xumac lilo, me he ob la ya vízid levac ge, od he nêb he ob dô lec sia niviha wê xomxo levac mi dô lec ge. ⁴⁰ Lêc he mi vô xomxo vêxôv nênsusu yuu xumac vêl ên he, dì buc wê he ob kitaa ge od he viyum nêniipaên vac kitaaê dia. Om he ob kô myaviwen levac mabu luu vêl."

*Vêxôv ti vông daa vô Anutu ge
(Luk 21:1-4)*

⁴¹ Yesu dô kwabo vô kilong wê xomxo mi tung mone daa vac ge dì yê wê xomxo tibeac lam tung mone vac ge. Mêd xomxo wê mone levac gee he lam tung mone levac vac kilong, ⁴² mêt vêxôv wê nênsusu mone ma ge ti val tung mone hi yuu tya vac kilong. ⁴³ Mêd Yesu keac nue ngivihi lam vô i dì nêl vô he ên nêbê, "A ob nêl hixôn nôn vô xam bê mone hi nôn yuu tya wê vêxôv tiga lam tung vac kilong ge nginoo mone wê xomxo baba lam tung ge vêl. ⁴⁴ Ên he mone levac dô, lêc he lam tung viwen dì he xe levac dô, dì vêxôv tiga, i nênsusu mone ma lêc lam tung mone yuu tya wê i vông ge la vac kilong, dì ti o dô wê ob kisuu xen yaêñ lec mi ya ge lêm."

13

*Yesu nêl lec viyin wê ob val timuên ge
(Matyu 24:1-14; Luk 21:5-19)*

¹ Yesu lop vac Anutu xumac ngibua ên nêb ob la, lêc nue ngivihi ti nêl vô i ên nêbê, "Xolac kehe, xumac tigae, niviha yang dì tibii lox ya ngidax niviaviha." ² Lêc Yesu nêl vô i ên nêbê, "Xumac levac wê xam diwê ga, a nêl vô xam bê obêc buc timuên ge od ngidax tigae, ngwe ob dô lec ngwe kisii lêm. Ên tibii ob dii dì nêx sea."

³ Mêđ Yesu la dô lec kitôn Oliv wê yuu xôn Anutu xumac ngibua le tiyima ge, lêc Pita yuu Jems dì Jon yuu Andlu mila vô Yesu dì heche va dô, dì he kinêg vô Yesu ên nêbê, ⁴ "Xe nêb ông nêl vô xe bê kiyang wê ông nêl lec xumac ngibua ge obêc vô nôn lec yelacna? Dì do tina wê obêc val vô xe tax ên xe xê dì xovô bê kiyang tige obêc vô nôn lecê?"

⁵ Mêgem Yesu nêl vô he ên nêbê, "Xam viac xam niviha êdêc xomxo i o lêc kityoo xam lêm. ⁶ Ên xomxo tibeac obêc val nêl a lêg dì nêl bêga nêbê he Kilisi om obêc kityoo xomxo tibeac.

⁷ "Dì xam obêc ngô kiyang wê nêbê vevac tyip vac vigwe ya mi xomxo hima ge od le i lêc yetac dì xona lêm. Ên vevac tige obêc val, lêc ge o buc myahipu tyo lêm. Nge, buc tyo gên yêp. ⁸ Ên tibii viyang ngwe ob vông vevac vô viyang ngwe, dì tibii viyang viyang ob dô kídu kídu dì vông vevac vÔma, dì ngiyêg ob yoc vac vigwe ya di vip ob den xomxo vac vigwe ya. Om viyin tigee wê ob val taxlee vÔ xomxo lêc viyin tibeac gên yêp wê ob val timuên.

⁹ "Xacxam va viac xam niviha, ên xomxo obêc hôm xam xôn dì vông xam la le kot vÔ kaunsil manôn, dì he ob hi xam vac xumac lilo nilô, dì he ob vÔng xam la le vÔ king hixôn gavman levac manôn mi he vÔng kot vÔ xam ên wê xam vÔng i vin a ge, om xam ob nêl a xolac kitong vÔ he.

¹⁰ Ên xomxo vihati ob ngô xolac pyap lê, dêc buc myahipu ob val timuên.

¹¹ Mêđ buc wê he obêc hôm xam xôn dì vÔng xam la vac kot ge od le i lêc xona dì nêl bê 'Xe ob nêl kiyang bêna vÔ he?' lêm. Buc wê xam ob la le vÔ he manôn ge od xam nêl i tiyi kiyang wê Myakilôhô Ngibua ob vÔng vÔ xam vÔ buc tige, ên kiyang wê xam ob nêl ge obêc tiyi xochê xacxam va kiyang ge lêm. Nge, ge kiyang wê Myakilôhô Ngibua vÔng vÔ xam ge.

¹² VÔ buc tige xomxo ya obêc vÔng heche va lie la vac tibii vigê ên nêb tibii i hi he yib, dì mae obêc vÔng heche va nue vÔ tibii bêge éno, dì nue obêc yê tae mae nipaén dì vÔng he vac tibii vigê dì tibii obêc hi he yib.

¹³ Mêđ xomxo vihati obêc yê xam nipaén ên wê xam vÔng i vin a lêg ge. Dì xomxo ti obêc le xékizêc vac vÔng vinêr dì i la tyip vÔ buc myahipu ge od Anutu obêc vÔng i la dô vac i ben.

Nipaén nôn obêc val timuên (Matyu 24:15-28; Luk 21:20-24)

¹⁴ "Obêc buc timuên ge, susu nipaén nôn wê ob vÔng vigwe vÔ nipaén ge obêc la le vac vigwe ngibua ti wê xomxo vîbu nêbê susu niviha pîleva ob le vac ge. (Xam wê xam kitong kiyang tiga, xam xovô kiyang tiga kehe lê.) Dì buc wê susu tige obêc val le seac ge od xomxo wê dô vac vigwe. Judia ge, he i pec mi loc lec vigwe kitôn, ¹⁵ om he wê dô lec xumac kisii ge he i o lêc lop mi lax kô susu ti vac xumac nilô lêm, ¹⁶ dì he wê dô vac yuac lôma ge he i o lêc pop mi lax kô vinyumén ti hixôn lêm. ¹⁷ Dì vêx wê nu dô vac xêyaa hixôn vêx wê vÔng lul vÔ nue ge, he ob dô vac viyin levac vÔ buc tige. ¹⁸ Mêgem xam kitaa vÔ Anutu bê viyin tige i o lêc val vÔ buc wê lun yuu ningigooén ge lêm, ¹⁹ ên viyin wê ob val vÔ buc tige obêc levac mabu

yocên luu viyin baba vihati vêl. Ên buc mugên ilage wê Anutu tung susu vihati ge dì i val vô buc gwêbaga, hixôn buc wê ob val timuên ge, viyin tulec xomxo, lêc o tiyi xochê viyin wê a nêl ga lêm. ²⁰ Viyin tige obêc levac mabu, lêc Anutu obêc xovô xomxo wê i vinoo pyap nêb he tu ixe ge om ob tax buc tige tip myabo. Ên buc obêc yêp dia ge od viyin tige obêc kitya xomxo vihati vêl.

²¹ “Vô buc tige xomxo ti obêc nêl vô xam ên nêbê, ‘Xam wê lê. Kilisi dô ga,’ me obêc nêl bêga nêbê, ‘Kilisi dô ganê’ ge od xam o lêc vông i vin lêm. ²² Ên xomxo kityooën ya obêc val nêbê he Kilisi me he plopete, di he ob vông do levac hixôn do toto wê xomxo ob yetac ên ge dì pilepac xomxo nilô la vô kiyang kityooën wê he nêl ge, om obêc tiyi ge od obêc kityoo xomxo wê Anutu vinoo he pyap ge ya hixôn. ²³ Mêgem xam xona ên xam dì viac xam niviha, ên kiyang wê ob vô nôn lec timuên ge a nêl vihati kitong yêp seac vô xam.

*Buc wê Xomxo Nu ob vena ge
(Matyu 24:29-31; Luk 21:25-28)*

²⁴ “Viyin levac tige obêc tip la vêl, nang dêc hiyôv yuu dentuc ob vô mapitoc dì linacêñ obêc ma, ²⁵ dì pitua lag puunê obêc tô sea mi lam, di susu xêkizêc wê kisii ganê ge ob vô yocyoc mi la dì lôm. ²⁶ Mêd vô buc tige xomxo ob yê Xomxo Nu ob lam vac viyobtoc hixôn xêseac yuu xêkizêc levac dì lam. ²⁷ Mêd a ob vông angela loc vac vigwe vihati dì i loc tiyi kibun yuu lag myahipu dì loc vilu vô xomxo wê Anutu vinoo he pyap ge vihati.

*Kiyang pilepacêñ lec xax wê mi pwoc ge
(Matyu 24:32-35; Luk 21:29-33)*

²⁸ “Xam xovô kiyang lec xuc. Ên xuc obêc val ge od xam xovô ên xam nêbê buc wê susu ob vô nôn niviha lec ge val. ²⁹ Mêgem xam obêc wê susu wê a nêl vô xam ga obêc vô nôn lec ge od xam obêc xovô bêga bê buc wê a obêc lop mi lôm ge vô kwabo lec. ³⁰ A nêl hixôn nôn vô xam bê xomxo wê dô gwêbaga ge obêc dô dì kiyang wê a nêl ga vihati obêc vô nôn lec vêl lê. ³¹ Lag yuu kibun xôa obêc ma, dì a kiyang ti xôa obêc ma hixôn lêm. Nge, vihati obêc yêp.

*Xomxo ti o xovô buc wê Yesu obêc vena lec ge lêm
(Matyu 24:36-44)*

³² “Buc ti wê kiyang tige ob vô nôn lec ge, xomxo ti o xovô buc tige lêm, di angela wê dô lag puunê ge êno o xovô buc tige lêm, di Anutu nu a, a êno lungêñ, dì Mag vaci tibed wê xovô buc tige. ³³ Om xam viac xam di bin buc wê Xomxo Nu ob vena lec ge, ên buc tige xam o xovô lêm.

³⁴ “Ge tiyi xochê xomxo ti sea ben ên nêb ob la dô vigwe bangwe, om vông yuac wê i vông ge vac nue toto vigê ên nêb he i viac, dì nêl vô xomxo ti wê mi viac vuayen ge nêb i dô dì yaxêñ buc wê ob vena lec ge. ³⁵ Mêgem xam êno, xam dô mi yaxêñ buc, ên xam o xovô buc wê xomxo levac tyo ob vena lec ge lêm, om mêd obêc vena vô bucên me vivuaén mahigun, me wê kokilêx ob vô vya ge me vigwe vidiién, ge xam lungêñ. ³⁶ Om xam dô mi yaxêñ, ên gec lêc xam diwêp dì i vena lutibed. ³⁷ Om kiyang ga, a nêl vô xam dì a nêl vô xomxo vihati hixôn bêga ên a nêbê xam dô dì yaxêñ buc tige.”

14

*Xomxo levac wê Yuda gee nêb ob hi Yesu i yib
(Matyu 26:1-5; Luk 22:1-2; Jon 11:45-53)*

¹ Buc yuu obêc lam la vêl ge od xomxo Yuda ob myêl levac di ya blet xêkizêc wê yis maên ge ên nêb ob xovô buc Pasova. Mêd xomxo levac wê mi si daa gee hixôn xomxo wê xovô Moses xolac gee, he myag môp wê nêb ob hôm Yesu xôn xôpacêc di hi i yib ge. ² Lêc he nêl ên he nêbê, “Il ob hôm i xôn lec buc levac Pasova lêm, ên xomxo obêc yê il nipaên di vông vevac vô il.”

*Vêx ti too mia nivivea lec Yesu bazub
(Matyu 26:6-13; Jon 12:1-8)*

³ Yesu la vigwe Betani di la dô vac Saimon ben. Saimon ge wê kityax mahizihizi ya ninivi ilage, lêc gwêbaga vô niviha lec. Mêd Yesu dô mi ya hixôn i, di vêx ti kô butol niviha wê mia nivivea niviha le vac ge ti mi lam vô i. Mia tige mone levac. Mêd vêx tige tax butol mya di too mia nivivea tige lec Yesu bazub. ⁴ Lêc xomxo wê dô ge, he ya yê môp tige tiyiên ma di nêl vôma ên nêbê, “Bêna lêc vêx tige too mia tige sea? ⁵ Mia tige tiyi wê il ob vông mi tibii i kisuu lec mone yul yon di il ob vông mone vô tibii wê nênsusu maên gee lê, lêc vêx tige too sea.” Om he

xêyaa vô nipaên di he kunac vêx tige. ⁶ Lêc Yesu nêl ên nêbê, “Bêna lêc xam vông viyin vô vêx tige? Xam vông i dô. Ên môp wê i vông vô a ge, niviha. ⁷ Ên xomxo wê nênsusu maên gee ob dô hixôn xam luta, om xam obêc nêb vông môp niviha vô he ge, od buc tibeac yêp tiyi wê xam ob vông ge. Lêc a ga, a ob dô hixôn xam buc dia lêm. ⁸ Vêx tige vông môp tiyi xochê yêp vô i ge, ên a gên o xib lêm, lêc i lam lipac mia nivivea lec a, om tiyi xochê viac a nignivi wê xomxo ob yev a vac lôva ge. ⁹ A nêl hixôn nôn vô xam bêga bê vac vigwe vihati wê xomxo ob la nêl xolac vac ge, xomxo ob nêl vêx tiga kitong hixôn, om xomxo vihati ob xovô môp niviha wê i vông ge.”

*Judas nêb ob vông Yesu vac xomxo levac vigê
(Matyu 26:14-16; Luk 22:3-6)*

¹⁰ Judas Iskaliot ge Yesu nu ngivihi ti, lêc la vô xomxo levac wê mi si daa gee, ên nêb ob vông Yesu i loc vac he vigê. ¹¹ Mêd he ngô kiyang wê Judas nêl ge di nilô vô niviha, om he hilu kiyang xôn nêb ob vông mone ya vô Judas. Mêd Judas myag môp wê ob vông Yesu vac he vigê ge.

*Yesu ya bwoc sipsip hixôn nue ngivihi
(Matyu 26:17-25; Luk 22:7-14,21-23; Jon 13:21-30)*

¹² Buc wê xomxo Yuda ob ya blet wê yis maên ge val, om buc taxlee ge wê he ob hi bwoc sipsip mi ya ên xovô buc Pasova ge, om Yesu nue ngivihi kinêg vô i ên nêbê, “Xe ob la viac xumac nilô tina wê il ob xa yaên vac lec buc Pasova ge?” ¹³ Om Yesu vông nue ngivihi yuu la di nêl vô yuu ên nêbê, “Muu loc vac vigwe Jelusalem, di muu obêc mila vô xomxo vux ti wê kilê mia vac dêg ge, od muu loc vô i vixa, ¹⁴ di obêc la vac xumac lôma ge od muu nêl vô xomxo ti wê i xumac ge bêga bê, ‘Xolac kehe nêb xii lam kinêg vô ông bê xumac nilô tina wê i hixôn nue ngivihi ob ya yaên vac lec buc Pasova ge?’ ¹⁵ Muu obêc kinêg bêge vô i ge od obêc hilung xumac nilô levac ti wê yêp kisii ge vô muu, di susu wê il ob xa lec di dô lec ge

le vac xumac tige pyap, om muu viac yaén wê il ob xa ge vac xumac nilô tige.” ¹⁶ Yesu nél bêge vô yuu om yuu loc mi la Jelusalem, dì mila yê tiyi xocbê Yesu nél ge, mègem yuu la viac yaén wê he ob ya ge.

¹⁷ Hiyôv hoo la dì vigwe ob buc, om Yesu hixôn nue ngivihi vigê yuu di tô mi la yuu mila, ¹⁸ mèd he la dô mi ya, léc Yesu nél ên nêbê, “A nél hixôn nôn vô xam bêga bê xam wê il xa yaén hixônma ge ti obêc nél a kitong vô xomxo levac levac.” ¹⁹ Kiyang tige vông he nilô vô viyin om he toto kinêg lax vô Yesu ên nêbê, “Méd a yuubê, me?” ²⁰ Mèd Yesu nél vô he ên nêbê, “Xam vigê yuu dì tô mi la yuu ge, ti obêc nél a kitong. Ge xomxo ti wê xii xôn vigêm ob la vac dipac nilô ge.” ²¹ Vixôhilôg, Xomxo Nu ob yib tiyi xocbê xolac nél ilage, léc xomxo ti wê ob vông Xomxo Nu la vac tibii vigê ge, obêc kô myaviwen nipaén lec timuén. Om xomxo tige yubacên obêc ma ilage ge od obêc niviha.”

Yesu vông pasa vô nue ngivihi

(Matyu 26:26-30; Luk 22:15-20; 1 Kolin 11:23-25)

²² He diya, dêc Yesu hôm blet ti dì kitaa lec mèd hibu di vông vô he di nél ên nêbê, “Hôm mi wa. Ga a nignivi.” ²³ Nang dêc hôm kap wê wain le vac ge di kitaa lec mèd vông vô he di he toto num vac. ²⁴ Mèd Yesu nél vô he ên nêbê, “Ga a hi wê a ob kipyax sea ên a nêb i ngidu xomxo tibeac xôn, om ob vông kiyang wê Anutu hilu pyap ge i vô nôn lec.” ²⁵ A nél hixôn nôn vô xam bê a obêc num mia wain i tii vac nang lêm dì i loc tyip vô buc wê a ob num wain paha vac Anutu ben ge.”

²⁶ He vông lilo ti pyap di loc mi la lec kitôn Oliv.

Yesu nél ên nêb Pita obêc yax i vun

(Matyu 26:31-35; Luk 22:31-34; Jon 13:36-38)

²⁷ Yesu nél vô he ên nêbê, “Xam vihati nilôm obêc vô viyin di xam ob sea a, i tiyi xocbê kiyang wê yêp vac xolac bêga nêbê, ‘A ob hi xomxo ti wê viac bwoc sipsip ge, om sipsip vihati obêc pec dì moo sea.’” ²⁸ Xolac nél bêge, dì a nél vô xam bêga bê a obêc kidi lec magviha dì mug la Galili di xam obêc timu.” ²⁹ Mèd Pita nél vô Yesu ên nêbê, “Xomxo vihati obêc nêb sea ông ge od he ob sea, dì a mô ge, a ob sea ông lêm.” ³⁰ Léc Yesu nél vô i ên nêbê, “A nél hixôn nôn vô ông bê vô bucên tiga kokilêx obêc hi vya lu yuu lêm dì ông obêc yax a vun lu yon.” ³¹ Léc Pita luu Yesu vya dì nél kiyang xêkizêc lax vô ên nêbê, “Ma vêl. A ob yax ông vun lêm. Dì tibii obêc hi a xib hixôn ông ge od pyap, léc a ob yax ông vun lêm.” Dì nue ngivihi vihati nél tiyi xocbê Pita nél ge.

Yesu la kitaa gê Getsemani

(Matyu 26:36-46; Luk 22:39-46)

³² Yesu he nue ngivihi loc mi la vigwe ti lê nêbê Getsemani, mèd Yesu nél vô nue ên nêbê, “Xam dô ga ên a ob la kitaa.” ³³ Om Yesu kô Pita yuu Jems hixôn Jon dì he la, léc Yesu nilô vô viyin mabu, ³⁴ om nél vô yon ên nêbê, “A nilôg vô viyin levac tiyi xocbê a ob xib ge. Om mon dô di wê môp xôn di le i yêp lêm.” ³⁵ Mèd Yesu la teva tya dì la kipôm manôn vac kibun di kitaa ên nêb obêc tiyi ge od viyin tige i o lêc tulec i lêm. ³⁶ Om kitaa bêga nêbê, “O mag, ông tiyi wê ông ob vông môp vihati ge, om a nêb ông vô viyin tige vêl ên a, léc ông o lêc vông i tiyi wê a nêb ông vông ge lêm. Nge, ông vông i tiyi xovôôn wê ông vông ge.”

³⁷ Pyap dì Yesu lax mi la vô nue ngivihi yon, lêc yê wê yon yêp nilô ma ge om nél vô Pita ên nêbê, “Saimon, bêna lêc ông wêpê? Ông o tiyi wê ông ob dô mamviha tya lê ge, me? ³⁸ Om mon kidi lec mi kitaa, êdêc susu nipaên i o lêc yaxê mon lêm. Ên nilôm nêb ob vông yuac lê, lêc nimnivi vô viyin.”

³⁹ Mêd Yesu lax mi la nang dì la kitaa tii vac, lêc kitaa tiyi xocbê la kitaa lu ngwe tax ge. ⁴⁰ Pyap dì lax mi la vô yon tii vac, lêc yê wê yon manôn yêp om yon yêp ge. Om Yesu tipi vô yon lêc yon o xovô kiyang ti wê ob nêl vô Yesu ge lêm.

⁴¹ Mêd Yesu la kitaa dì vena lu ti wê vông yon ge, lêc yon yêp nilô ma om Yesu nél vô yon én nêbê, “Bêna lêc mon diwêp wêpêné? Ge pyap, ên buc wê xomxo ob vông Xomxo Nu la vac tibii nipaên vigê ge val vô kwabo lec. ⁴² Om mon kidi lec ên il ob la. Mon wê, xomxo ti wê ob vông a la vac tibii vigê ge val le ge.”

Xomxo Yuda hôm Yesu xôn dì Yesu nue ngivihi pec sea

(Matyu 26:47-56; Luk 22:47-53; Jon 18:3-12)

⁴³ Yesu gên nêl kiyang tige dì lutibed Judas wê nu ngivihi ti ge val. Dì xomxo tibeac wê hôm yipac yuu vigo ge val hixôn. Xomxo tigee, xomxo levac wê mi si daa gee hixôn xomxo wê xovô Moses xolac gee dì Yuda levac levac ge, he vông he lam. ⁴⁴ Judas nêl kiyang ti vô xomxo tigee pyap ên nêbê, “Xomxo ti wê a obêc nga lia ge, od xam xovô bê ge xomxo tyo mêm. Om xam hôm i xôn dì wê i xôn dì kô mi loc.”

⁴⁵ Mêd Judas val dì la kwabo vô Yesu dì nêl vô i ên nêbê, “Xolac kehe” mêd nga i lia. ⁴⁶ Om xomxo tigee yê dì la hôm Yesu xôn.

⁴⁷ Mêd xomxo ti wê le kwabo ge hôm i yipac dì sev xomxo daa sién nêl levac nu yuac ti ninya lihi vilu la vêl. ⁴⁸ Mêd Yesu nél vô xomxo wê hôm i xôn gee ên nêbê, “Xam xo ên xam nêbê a tibii yôdac ti om xam kilê yipac hixôn vigo dì lam hôm a xônê? ⁴⁹ Tiyi buc vihati a mi dô hixôn xam vac Anutu xumac ngibua dì a mi nêl xolac vô xam, lêc xam o hôm a xôn lêm. Om gwêbaga, kiyang wê yêp vac xolac ge ob vô nôn lec.” ⁵⁰ Mêd Yesu nue ngivihi vihati sea i dì pec mi la.

⁵¹ Xomxo ngivihi ti wê duc nivîmîhi yêp yaên kwem ti ge mila vô Yesu vixa, om tibii nêb ob hôm i xôn, ⁵² lêc ngivihi tyo pec mi la, dì nivîmîhi tô mi yêp dì i pec mi la xêtuac.

Yesu la le vô xomxo levac manôn

(Matyu 26:57-68; Luk 22:54-55,63-71; Jon 18:13-14,19-24)

⁵³ Mêd he didii Yesu mi la vô xomxo ti wê tu xomxo daa sién nêl levac ge, mêd xomxo levac wê mi si daa gee hixôn xomxo wê xovô Moses xolac gee dì xomxo levac levac gee, he vihati kitucma mi lam. ⁵⁴ Mêd Pita timu vô Yesu vixa mi la, lêc le lam teva tya om mila vô xomxo daa sién nêl levac ben wetôv dì mila nyuu ngwax hixôn xêhipue.

⁵⁵ Mêd xomxo levac wê mi si daa gee hixôn xomxo kaunsil vihati kitucma mi dô, mêd he keac xomxo ya lam ên nêb he i lam nêl kiyang wê Yesu mi vông vô he ge kitong, ên he nêb he ob tulec kiyang soén wê Yesu mi nêl ge ên hi i yib lec. Lêc he o tulec kiyang ti lêm, ⁵⁶ ên xomxo tibeac vô nilô vô Yesu, lêc he nêl kiyang kityooën dì kiyang wê he vông ge o tiyima lêm. ⁵⁷ Om he ya le kisii dì nêl kiyang kityooën bêga lec Yesu ên nêbê, ⁵⁸ “Xe ngô wê xomxo tige nêl ên nêbê, ‘A ob dii xumac ngibua ti wê xomxo lox

ya vigê ge vêl, dì buc yon obêc lam la vêl ge od a ob lox vac, lêc a vigêg ob lox lêm.”⁵⁹ Lêc xomxo wê nêl kiyang tige, vihati o nêl kiyang tiyima lêm.

⁶⁰ Mêd xomxo daa sién nêl levac tige kidi mi la le vac he mahigun di kinêg vô Yesu ên nêbê, “Xomxo nêl kiyang nipaên lec ông, om ông ob nêl kiyang ti lax vô he, me?”⁶¹ Lêc Yesu le mya pilîhi dì o nêl

kiyang ti lax vô he lêm. Om xomxo levac tige kinêg vô i tii vac ên nêbê, “Anutu wê il mi pîmil ge, ông Kilisi wê i nu ge, me?”⁶² Om Yesu nêl ên nêbê, “A Kilisi, Anutu nu. Dì xam ob wê a Xomxo Nu, a ob la dô vô Anutu, xêkizêc kehe, vigê hiyôv, dì a ob vena vac viyobtoc kisii ganê.”⁶³ Mêd xomxo levac tige nilô vô nipaên om lêx ici va ngakwi di nêl ên nêbê, “Om il ob keac xomxo ya mi he i lam nêl kiyang hixôn i tii vac lêm.”⁶⁴ Ên ici va so vya vô Anutu mi xam ngô pyap. Om xam nêb il vông bêna vô i?” Mêd he vihati nêl ên nêbê, “Yesu vông nipaên om il ob hi i yib.”

⁶⁵ Mêd xomxo ya pisuv myaluc lec Yesu mêt viyum i manôn xôn ya nivimhi di hi i dì nêl vô ên nêbê, “Nêl xomxo ti wê hi ông ge lê kitong.” Mêd xêhipu wê viac Anutu xumac ngibua ge kô i mi la dì la hi ya vigê.

Pita yax Yesu vun

(Matyu 26:69-75; Luk 22:56-62; Jon 18:15-18,25-27)

⁶⁶ Pita gên le kibun lec wetôv mêt vêx ti wê vông yuac vô xomxo daa sién nêl levac ge val,⁶⁷ lêc yê wê Pita dinyüu ngwax mi dô ge om yê i manôn di nêl vô i ên nêbê, “Ông ge wê ông mi dô hixôn Yesu Nasalet ge.”⁶⁸ Lêc Pita nêl ên nêbê, “A lungên, dì a o xovô kiyang wê ông nêl ge lêm.” Mêt Pita titêc vêl ên he mi la le vô vuayen ninya [dì kokilêx hi vya taxlee.]⁶⁹ Mêt vêx yuac tige yê Pita tii vac nang om nêl vô xomxo wê dô kwabo ge ên nêbê, “Xomxo tige wê mi dô hixôn Yesu he nue.”⁷⁰ Lêc Pita yax Yesu vun nang di nêb i lungên.

Mêt he dô myabo ty a nang mêt xomxo wê dô ge nêl vô Pita ên nêbê, “Vixôhilôg, xe xovô ên xe nêbê ông ge Yesu nu ngivihi ti, ên ông ge xomxo Galili ti.”⁷¹ Lêc Pita nêl kiyang xêkizêc ên nêbê, “A le vô Anutu manôn di a nêl hixôn nôn bêga bê a o xovô xomxo ti wê xam nêl ge lêm.”⁷² Mêt lutibed kokilêx hi vya tii vac nang. Om Pita xovô kiyang wê Yesu nêl vô i bêga nêbê, “Kokilêx obêc vô vya lu yuu lêm di ông obêc yax a vun lu yon.” Pita xovô kiyang tige om byag levac.

15

Yesu la le vô gavman levac Pailat manôn

(Matyu 27:1-2,11-14; Luk 23:1-5; Jon 18:28-38)

¹ Vô pitoc yang xomxo levac wê mi si daa gee di xomxo wê xovô Moses xolac gee di Yuda levac levac hixôn kaunsil baba, he xôn kitucma di keac lec kiyang pyap mêt ku Yesu xôn di kô i mi la vô hizap levac Pailat.² Mêt Pailat kinêg vô i ên nêbê, “Ông ge king wê Yuda vông ge, me?” Lêc Yesu nêl vô i ên nêbê, “Ông nêl i tiyi.”³ Mêt xomxo levac wê mi si daa gee, he so vya tibeac lec Yesu,⁴ om Pailat kinêg vô Yesu ên nêbê, “Ông tiyi wê ông ob nêl kiyang ti lax vô he ge, me? Ngô lê. He nêl kiyang tibeac lec ông.”⁵ Lêc Yesu o nêl kiyang ti lax vô i lêm, om Pailat yetac di xo kiyang tibeac.

*Pailat tyuc lec nêb he i hi Yesu lec xax
(Matyu 27:15-26; Luk 23:13-25; Jon 18:39-19:16)*

⁶ Môp wê Pailat mi vông ge yêp bêga nêbê buc wê xomxo Yuda ob myêl vizid Pasova ge od he mì nel xomxo wê dô vac kalabuhu ge ti lê vô Pailat di Pailat piwelac i di vông i lam vô he. ⁷ Vô buc tige xomxo ti lê nêbê Balabas dô vac xumac kalabuhu. Balabas hixôn xomxo ya, he vông vevac vô gavman Lom di hi xomxo ya yib om tibii vông he la dô vac kalabuhu. ⁸ Mêd xomxo Yuda tibeac la vô Pailat di nel vô Pailat nêb i piwelac xomxo ti vêl i tiyi xochê môp wê Pailat mi vông ilage. ⁹ Om Pailat kinêg vô he ên nêbê, “Om xam nêb a piwelac xomxo ti wê xam Yuda nêm king ge, me?” ¹⁰ Pailat nel bêge, ên xovô nêbê xomxo levac wê mi si daa gee vaci vông Yesu lam vô i ên wê he xêyaa vô myavinê vô Yesu ge. ¹¹ Lêc xomxo levac wê mi si daa gee nel kiyang tibeac vô xomxo Yuda ên nêb he i nel vô Pailat bê i piwelac Balabas vêl. Om he nel bêge vô Pailat. ¹² Om Pailat kinêg vô he nang ên nêbê, “Om xomxo ti wê xam nel lê nêbê Yuda nêm king ge, a ob vông bêna vô i?” ¹³ Mêd he tyuc vya levac la vô Pailat ên nêbê, “Hi i lec xax pola.” ¹⁴ Lêc Pailat nel vô he ên nêbê, “Om il ob hi i ên vatya? Xomxo tyo vông nipaên tina?” Lêc he tyuc vya levac tii vac vac ên nêbê, “Hi i lec xax.” ¹⁵ Pailat nêb ob vông he xêyaa vô nivîha, om piwelac Balabas lax vô he mêd kô Yesu mi la hi i ya yih, pyap dêc vông i la vac tibii vevac vigê ên nêb he i kô mì loc hi lec xax.

*Tibii vevac so vya vô Yesu
(Matyu 27:27-31; Jon 19:2-3)*

¹⁶ Mêd tibii vevac kô Yesu mi la vac gavman levac ben di keac lie vevac vihati lam. ¹⁷ Mêd he kô ngakwi hi tiyi xochê king mi vinyum ge mi la vinyum lec Yesu dêc buu kipomac yin mi tung lec i bazub xochê kilung ge. ¹⁸ Mêd he pimil Yesu pisiv di nel ên nêbê, “Ông king wê Yuda vông ge, ông dô nimviha.” ¹⁹ Mêd he hi Yesu bazub ya duvac di pisuv myaluc lec di yev vixa kitu vô i tiyi xochê pimil i pisiv ge. ²⁰ He so vya vô i pyap, mêd kwax ngakwi hi tige vêl di vinyum ici va ngakwi lec i nang, mêd kô i mi la ên nêb ob la hi i lec xax.

*He hi Yesu lec xax pola
(Matyu 27:32-44; Luk 23:26-43; Jon 19:17-27)*

²¹ He kô Yesu mi la vô môp dêc he yê xomxo ti wê dilam ên nêb ob la vigwe levac ge. Xomxo tyo lê nêbê Saimon wê Aleksanda yuu Lupas ma ge di i ben Sailini. Om he kidu i nêb i kilê xax pola wê he ob hi Yesu lec ge.

²² Mêd he kô Yesu mi la vigwe ti lê nêbê Golgota. Lê tige kehe bêga nêbê bazub len. ²³ Mêd xomxo ya nêb ob vông mia wain wê he pilepac malasin hixôn ge vô Yesu ên i num, lêc Yesu nêbê numên ob ma. ²⁴ Mêd tibii vevac hi Yesu lec xax pola, mêd he nêb he ob titang Yesu ngakwi vîma om he tide mi yê dêc titang i tiyi.

²⁵ He hi Yesu lec xax vô pitoc, tiyi xochê hiyôv manôn 9. ²⁶ Mêd kiyang wê ob nel xomxo nêm nipaên kitong ge, he kivuu i yêp kisii om kiyang wê he kivuu lec Yesu ge, he kivuu bêga nêbê, “XOMXO TIGA, KING WÊ HE YUDA VÔNG GE.” ²⁷ Mêd he hi tibii wê mi vun xomxo susu ge yuu lec xax hixôn Yesu, om ngwe yux lec xax vô Yesu vigê vilu hiyôv di ngwe yux vô

vigê kêd. ²⁸ [Om kiyang wê plopet kivuu ilage vô nôn lec. Kiyang yêp bêga nêbê, “He nêl i lê hixôn xomxo nipaên.”]

²⁹ Mêd xomxo wê lam la ge tipi niba vô Yesu dì so vya vô bêga nêbê, “Ông tige wê ông nêb ông ob dii Anutu xumac ngibua vêl dì lox vac i tiyi buc yon mêt? ³⁰ Om ông ngidu ôcông va xôn dì lop vêl ên xax.” ³¹ Mêd xomxo levac wê mi si daa gee ya hixôn xomxo wê xovô Moses xolac gee he êno so vya vô Yesu dì nêl vòma ên nêbê, “Xomxo tige ngidu xomxo ya xôn, lêc o tiyi wê ob ngidu ici va xôn ge lêm. ³² Om xomxo ti wê nêbê i Kilisi wê Islel vông king ge, i lop vêl ên xax ên il xê dì vông i vin.” Mêd tibii yuu wê diyux hixôn Yesu ge, yuu êno nêl kiyang nipaên lec Yesu hixôn.

Yesu yib

(Matyu 27:45-56; Luk 23:44-49; Jon 19:28-30)

³³ Hiyôv yev kitôn pux mêd vigwe ge vihati vô mapitoc ta dì i la vô hiyôv manôñ yon wê hucen ge. ³⁴ Mêd hiyôv manôñ yon ge, Yesu tyuc vya levac ên nêbê, “Eloi, eloi, lama sabaktani?” Kiyang tige kehe bêga nêbê, “Mag Anutu, mag Anutu, bêna lêc ông sea a?” ³⁵ Mêd xomxo wê le kwabo vô Yesu ge ngô kiyang wê i nêl ge, om he ya nêl ên nêbê, “Ngô lê, tige kiyag vya lec Ilaija.” ³⁶ Mêd xomxo ti tup mi la kô mia myamilumac dì tinyum vac mia kilin dì kilax vac ngising dì hôm la kisii vô Yesu mya nêb i tep, dì nêl ên nêbê, “Om il ob dô mi yaxêñ bêc Ilaija obêc val vông i lop vêl ên xax, me?” ³⁷ Mêd Yesu tyuc vya levac dì yib.

³⁸ Mêd nivimihi levac ti wê yux vac Anutu xumac ngibua ge lêx vac kisii dì lam tô vô myahipu. ³⁹ Mêd tibii levac ti wê viac tibii vevac vihati ge le vô Yesu manôñ dì yê wê yib ge om nêl ên nêbê, “Vixôhilôg, xomxo tige Anutu nu.”

⁴⁰ Di vêx ya le teva lêc yê ma la Yesu. Vêx tige, Malia wê ben Makdala ge hixôn Malia wê Jems timuêñ yuu Josis ta ge, dì Salomi. ⁴¹ Vô buc wê Yesu dô Galili ge od vêx tige mi timu vô i vixa dì viac i ya yaêñ. Di buc wê Yesu la Jelusalem ge, vêx tibeac ya la hixôn om he xôn dô mi yê wê Yesu yib ge.

He lii Yesu vac lôva

(Matyu 27:57-61; Luk 23:50-55; Jon 19:38-42)

⁴² Buc tige, buc wê he Yuda ob viac he ge, ên titige obêc buc sabat. Mêd vigwe huc, ⁴³ om Josep wê ben Alimatis ge la vô Pailat. Josep ge kaunsil ti om mi dô vac kitucmaén hixôn Yuda levac levac dì xomxo yê i nêb i xomxo nivîha ti. Josep dô bin buc wê Anutu nu ob lam tu king gê kibun ga. Mêd Josep xonaêñ ma dì loc mi la vô Pailat dì la kitaa i ên nêb i vông Yesu ninivi vô i ên i ob la lii vac lôva. ⁴⁴ Mêd Pailat yetac ên wê Josep nêl nêbê Yesu yib ge om keac tibii vevac levac tige lam dì kinêg vô i ên nêbê, “Yesu yib gwêba, me?” ⁴⁵ Mêd tibii levac tyo nêl ên nêbê, “Yesu yib gwêba.” Om Pailat tyuc lec nêb Josep i kô Yesu ninivi mi loc lii vac lôva. ⁴⁶ Mêd Josep la kisuu nivimihi kwem ti mêt la kwax Yesu vêl ên xax dì viyum vac nivimihi tige dì kô mi la lii vac lôva wê he kiden vac ngidax ge ti. Pyap dêc vixog ngidax levac ti la le vac lôva mya xôn. ⁴⁷ Mêd Malia wê ben Makdala ge hixôn Malia wê Josis ta ge, yuu la hixôn om yê vigwe wê Josep la lii Yesu yêp vac ge.

16

*Yesu kidi lec vac yibén
(Matyu 28:1-8; Luk 24:1-12; Jon 20:1-10)*

1 Buc sabat la vél mèd Malia wê ben Makdala ge hixôn Malia wê Jems ta ge di Salomi, yon kisuu wel hixôn susu nivivea ya ên nêb ob la lipac lec Yesu ninivi. **2** Mèd da pitoc yang ge yon kidi mi la, ên nêb ob la vac lôva. **3** Lèc yon kinêg vôma ên nêbê, “Letya obêc vixog ngidax vél ên lôva mya ên xonê?” **4** Yon nèl bêge ên wê ngidax tige mabu yocên ge. Mèd yon yê ma la lèc yê wê ngidax vixog mi la vél ên lôva mya ge. **5** Om yon la vac lôva nilô lèc yê xomxo ngivihi ti wê vinyum ngakwi

kwem dia ge dô vô yon vigê hiyôv, om yon yetac mabu. **6** Lèc xomxo tyo nèl vô yon ên nêbê, “Mon yetacén i ma. Ên mon myag Yesu Nasalet ti wê tibii hi lec xax ge. Lèc o dô ga lêm, ên kidi lec maviha vac yibén. Mon wê vigwe wê yép lec ga pileva. **7** Om mon lôc, dì lôc nèl vô Pita hixôn Yesu nue ngivihi baba ge bêga bê Yesu ob mug la Galili dì xam obêc mila wê i gê Galili tiyi xocbê nèl vô xam ilage.”

8 Mèd vêx yon ngô kiyang wê i nèl ge dì yon kinu la dì yon yetac, om yon lop mi la vixun dì pec mi la, dì yon o nèl kiyang kitong vô xomxo ti lêm, ên yon xona mabu.

*Malia wê ben Makdala ge yê Yesu
(Matyu 28:9-10; Jon 20:11-18)*

9 [Da pitoc yang ge wê Yesu kidi lec vac yibén ge od hilung i vô Malia wê ben Makdala ge taxlee. Malia ge wê Yesu tii vimwo nipaén vigê vilu di sec yuu vél ên i ilage. **10** Om Malia la vô xomxo wê mi dô hixôn Yesu ilage ên nêb ob nèl kiyang tige kitong vô he. He dô hixôn nilô viyin dì byag mi dô, **11** lèc Malia la nèl vô he ên nêbê, “Yesu kidi lec vac yibén om hilung i vô a mi a xê i.” He ngô kiyang tige lê, lèc he o vông i vin lêm.

*Yesu mila vô nue ngivihi yuu vac môp
(Luk 24:13-35)*

12 Nang dêc Yesu nue ngivihi yuu sea Jelusalem dì la vô môp, lèc Yesu ninivi pilepac bangwe dì i val vô yuu. **13** Om yuu lax mi la nèl kitong vô nue ngivihi baba, lèc he o vông i vin kiyang wê yuu nèl ge lêm.

*Yesu vông yuac sinale vô nue ngivihi
(Matyu 28:16-20; Luk 24:36-49; Jon 20:19-23)*

14 Nang dêc Yesu nue ngivihi vigê yuu dì ti tô mi la ge dô dì ya yaêñ, lèc Yesu mila vô he mèd nèl kiyang xêkizêc vô he ên wê he nilô xêkizêc di he o vông i vin lêm ge, ên xomxo wê yê Yesu vô buc wê kidi lec maviha ge nèl kitong vô he lê, lèc he o vông i vin lêm. **15** Mèd Yesu nèl vô he ên nêbê, “Xam loc vac vigwe vihati dì loc nèl xolac vô xomxo vihati yang. **16** Dì xomxo ti obêc vông i vin dì lipac mia ge od Anutu obêc kitya i nèn nipaén vél dì ob dô maviha luta. Lèc xomxo ti obêc vông i vin lêm ge od ob tulec myaviwen nipaén wê ob kitya i vél ge. **17** Om xomxo wê vông i vin ge ob vông do levac hixôn bêga bê he ob nèl a lèg dì tii vimwo nipaén vél, dì he ob keac xomxo ba vya, **18** dì he obêc hôm myel nipaén me he ob num mia kilin wê ob hi xomxo yib ge od susu tigee ob vông he vô nipaén lêm, dì he obêc vyax vigê lec xomxo yidac ge od yidac ob tip la.”

*Yesu lec mi lax vō ma Anutu
(Luk 24:50-53; Sinale 1:9-11)*

¹⁹ Apumtau Yesu nêl kiyang vô ma Anutu kô i mi la lag puunê dì i la dô vô ma Anutu vigê hiyôv. ²⁰ Mêd nue ngivihi loc mi la nêl xolac vac vigwe vihati, dì Apumtau ngidu he xôn om he vông do tibeac viyang viyang, om do wê he mi vông ge nêl kitong nêbê he nêl kiyang nôn.]

LUK Yesu Kilisi xolac wê Luk kivuu ge

Kiyang tyo kehe

¹⁻² Xe levac Tiopilas, ông xovô pyap bê ilage kiyang val le seac vac xe mahigun mi xomxo mangwe yê vô buc taxlee, om he nêl xolac wê he yê ge kitong vô xe. Nang dêc xomxo tibeac mangwe nêb he ob kituc kiyang ge vihati mi kivuu vac kipihac, om he toto kivuu kiyang tiyi wê xomxo taxlee nêl dì i val vô il ga hixôn. ³ Om a êno nêb a ob kivuu kiyang ge vac kipihac mi vông i loc vô ông, ên buc tibeac a kinêg mi xovô kiyang ge vihati kehe. Om a kivuu vihati bôbac yuu niviha vac kipihac, ⁴ ên a nêb ông kitong mi xovô bê xolac wê xomxo nêl mi ông ngô ge, nôn vixôhilôg.

Angela nêl Jon kitong vô ma Sekalaia

⁵ Vô buc wê Helot tu king mi viac vigwe Judia ge, xomxo ti dô lê nêbê Sekalaia di vinê lê nêbê Ilisabet. Sekalaia ge xomxo wê mi si daa vô Anutu ge ti, vac kiidu ti wê lê nêbê Abaisa ge, di vinê kehe vac Elon. ⁶ Mêd yuu ge, Anutu yê manôn niviha lec yuu, nêb yuu xomxo niviha lee, ên yuu timu vô Apumtau kiyang yuu xolac vihati dì o vông ti so lêm. ⁷ Lêc yuu nu ma, ên Ilisabet o kô nipwo ti lêm, di yuu liya vô kipwoc yuu vêxta.

⁸ Sekalaia he lie daa sién la vông yuac vac Anutu xumac ngibua, ên ge he nêb buc wê ob vông yuac lec ge, om Sekalaia la si daa vô Anutu. ⁹ Môp wê he mi vông ge, he mi tide ên nêb i nêl kitong vô he bê he tina ob la vac xumac ngibua nilô ên la si daa nivivea niviha vô Apumtau. Om he tide, lêc nêb Sekalaia, om Sekalaia la vac xumac ngibua nilô, ¹⁰ di xomxo tibeac kitaa vô Anutu mi dô vixun, di Sekalaia si daa nivivea niviha vô Anutu. ¹¹ Mêd Apumtau angela ti val le vô alta wê si daa lec ge vô vigê hiyôv, ¹² di Sekalaia yê mi yetac ên di xona ên. ¹³ Lêc angela tige nêl vô i ên nêbê, "Sekalaia, xonaên i ma, ên Anutu ngô kitaaên wê ông kitaa ge pyap. Om vinêm Ilisabet obêc kô num vux ti di ông ob nêl lê nêbê Jon. ¹⁴ Mêd ông obêc pimil di ông nilôm obêc vô niviha, di buc wê num tige obêc yubac ge od obêc vông xomxo tibeac xêyaa vô niviha. ¹⁵ Ên num tyo, Anutu obêc yê nêb i tu xomxo levac, di i o lêc num mia wain yuu mia xêkizêc lêm. Buc wê obêc gên dô vac ta xêyaa ge od Myakilôhô Ngibua obêc hivun i xôn pyap, ¹⁶ di timuên ge od obêc pilepac xomxo Islel tibeac nilô lax vô he Apumtau Anutu. ¹⁷ Xomxo tige ob kô xovôên yuu xêkizêc i tiyi xochbê Ilaija kô ge di i mug Apumtau môp, om obêc pilepac mae nilô lax vô nue, di obêc pilepac he wê pwoo kiyang vac ge nilô di he i loc kô xovôên yuu piyôp niviha wê xomxo vông vinê vông ge. Om môp ge wê ob viac xomxo nilô pyap, êdêc he i dô hixôn nilô niviha di Apumtau i val."

¹⁸ Angela nêl pyap, mêd Sekalaia kinêg vô i ên nêbê, "Kiyang wê ông nêl ge ob vô nôn lec bêna? Ên xii vô kipwoc yuu vêxta ga mê."

¹⁹ Mêd angela nêl vô i ên nêbê, "A ga Gebliel wê a mi le vô Anutu manôn ge, lêc Anutu vông a lam ên nêb a lam nêl kiyang niviha tiga vô ông. ²⁰ Om kiyang wê a nêl ga obêc vô nôn lec vô buc wê Anutu nêl ge. Lêcom ông o

vông i vin kiyang tyo lêm, om ông ngô lê. Ông obêc dô tiyi xocbê yac ge dì keacên ob ma, dì i miloc vô buc wê kiyang obêc vô nôn lec ge lê.”

²¹ Xomxo wê kitucma mi dô vixun ge dô bin Sekalaia, dì kinêg vôma ên nêbê, “Sekalaia la vô va, lêc la dô gwêba ta vac xumac nilô?” ²² He dô dêc Sekalaia lop mi lôm, lêc keacên ma vô he, ên mya viyin, om he xovô nêbê mêt yê vatya ti vac xumac ngibua nilô. Lêc Sekalaia hilung kiyang ya vigê vô he, ên mya viyin. ²³ Mêd buc wê Sekalaia yuac daa sién ge tiyôô, om lax ben viyangtôv.

²⁴ Mêd lax dô ben di vinê Ilisabet, nu tuc dô vac xêyaa dì i mi dô vac xumac lôma tiyi dentuc vigê vilu, dì nêl ên nêbê, ²⁵ “Anutu xo vigwe pisiv ên a ên wê a mi le top dì nipwo ma ge, om vông niviha vô a mi vô a nig yocên vêl.”

Angela Gebriel nêl Yesu kitong vô Malia

²⁶ Ilisabet nu dô vac xêyaa tiyi dentuc vigê vilu dì sec ti, lêc Anutu vông angela Gebriel la vac vigwe Nasalet vac vigwe levac Galili, ²⁷ dì i la vô vêxwo ti lê Malia. Malia ge, tae mae nêl i lê lec Josep ên nêbê yuu i iima, lêc yuu gên dô teva. Josep ge, kehe vac king Devit. ²⁸ Mêd Gebriel la nêl vô Malia ên nêbê, “Ông wê Anutu yê ông niviha ge, kiyang malehe i hivun ông xôn, ên Apumtau dô hixôn ông.”

²⁹ Malia ngô kiyang tyo, lêc vông i nilô vô viyin levac, dì i xo ên nêbê, “Kiyang malehe ga, kehe bêna?”

³⁰ Mêd Gebriel nêl vô i ên nêbê, “Malia, xonaên i ma, ên Anutu yê ông niviha. ³¹ Om ngô lê. Ông obêc vivi num vux ti dêc obêc yubac ge, dì ông nêl lê bê Yesu. ³² Num tyo ob tu xomxo levac dì xomxo ob nêl i lê nêbê Anutu lag puunê nu, dì Apumtau Anutu obêc vông i tu king mi viac xomxo tiyi xocbê bu Devit ilage, ³³ om obêc tu xomxo Islel wê Jekop nue bue gee nêl king mi viac he luta lêc luta, dì i lê king obêc tiyôô lêm.”

³⁴ Mêlêc Malia kinêg vô angela tyo ên nêbê, “Kiyang ga obêc vô nôn lec bêna? Ên a gên o kô vux ti lêm.”

³⁵ Mêd angela luu i vya ên nêbê, “Myakilôhô Ngibua obêc lam vô ông, dì xêkizêc wê Anutu lag puunê vông ge obêc lam hivun ông xôn, om nipwo ti wê ông obêc kô ge, xomxo ob nêb i ngibua dì i Anutu nu.

³⁶ “Ngô lê. Gôniam Ilisabet wê vô vêxta dì mi le top dì nu ma ge, gwêbaga vivi nu vux ti, lêc gên dô dì dentuc vigê vilu dì sec ti lam la vêl, om obêc kô nu tige. ³⁷ Ên kiyang yuu yuac ti o vô viyin vô Anutu lêm. Nge, Anutu tiyi wê ob vông susu vihati vô nôn lec ge.”

³⁸ Om Malia nêl vô angela ên nêbê, “Apumtau nu yuac a, om kiyang wê ông nêl vô a ge i vô nôn lec.” Pyap dêc angela sea i dì lax.

Malia la yê Ilisabet

³⁹ Vac buc tige mahigun ti, Malia kidi dì tup la vac vigwe kitôn ti wê yêp vac vigwe Judia ge, ⁴⁰ dì la vac Ilisabet yuu Sekalaia ben xumac lôma dì la pul Ilisabet vige dì nêl kiyang malehe vô i. ⁴¹ Mêd Ilisabet ngô Malia vya dì nu wê dô vac i xêyaa ge yetac dì ngigax i, mêt Myakilôhô Ngibua lam hivun Ilisabet xôn, ⁴² dì i nêl vya levac vô Malia ên nêbê, “Anutu vông vizid niviha vô ông luu vêx baba ge vêl. Dì num wê ông ob kô ge, vizid niviha wê Anutu vông ge obêc hivun i xôn. ⁴³ A ga bêna lê, lêc a Apumtau ta val vô a? ⁴⁴ Om ngô lê. A ninyag gên ngô ông vyam wê ông val nêl vô

a ge, lêc a nug wê dô vac a xêgyaa ga yetac mi ngigax i dì pimil. ⁴⁵ Ông vông i vin pyap om ông hi vixam i pec, ên kiyang wê Anutu nêl vô ông ge obêc vô nôn lec timuên.” Ilisabet nêl bêge.

Malia kiyang pimilên

⁴⁶ Malia nêl ên nêbê,

“A nilôg pimil Apumtau lê, ⁴⁷ dì a kinug hi vixa ên Anutu wê ngidu a xôn ge. ⁴⁸ Ên a ga Anutu nu yuac pileva, lêc Anutu xêyaa vin lec a, om gwêbaga dì timuên ge, xomxo vihati obêc nêl a lêg la bê Anutu vông vizid niviha vô a, ⁴⁹ ên Anutu xêkizêc kehe vông do levac tige vô a, dì i lê ngibua. ⁵⁰ Anutu xêyaa vin lec xomxo wê la vac i kwa ngibi ge, om môp bêge wê ob yêp vô xomxo tibeac tibeac vihati dì i loc vô myahipu. ⁵¹ Anutu vigê vông yuac xêkizêc, om tii xomxo wê nilô yong he ge moo sea mi la. ⁵² Dì Anutu vô xêkizêc vêl ên xomxo levac wê kô lê king ge, dì hôm xomxo pileva lê lec. ⁵³ Mêd xomxo susu maén wê vip den he ge, Anutu vông susu niviha vô he, dì xomxo wê susu tibeac ge Anutu vông he la nêñ ya vigê pileva. ⁵⁴⁻⁵⁵ Anutu ngidu nue yuac Islele xôn, ên xovô kiyang wê nêl pyap vô buge ilage ên nêbê i xêyaa ob vin lec Eblaham he nue bue timuên dì i loc tiyi buc myahipu.” Malia nêl bêge.

⁵⁶ Malia dô hixôn Ilisabet tiyi dentuc yon dêc lax mi la ben.

Ilisabet kô nu tuc Jon

⁵⁷ Buc wê Ilisabet nu ob yubac ge, om nu tyo yubac lêc nu tuc. ⁵⁸ Mêd Ilisabet ngidêe lie hixôn xomxo vac ben viyangtôv ge ngô wê Apumtau vông niviha vô i ge, om he la pimil Anutu hixôn Ilisabet.

⁵⁹ Buc vigê vilu dì sec yon la vêl, lêc he kituc la nêb ob gôl nu tyo ninivi dì nêl i lê. Om he nêb he ob nêl lê lec ma Sekalaia vaci, ⁶⁰ lêc ta nêl ên nêbê, “Maë! Il ob nêl i lê bê Jon.” ⁶¹ Lêc he nêl vô i ên nêbê, “Letya lê tige? Lime ngidême ti lê o bêge lêm.” ⁶² Om he vô hilung hilung ya vigê kinêgên vô ma Sekalaia ên nêb i nêl bê he ob nêl nu tyo lê bêna. ⁶³ Mêd Sekalaia vông he la kô taple nipwo ti dì i kivuu lê lec ên nêbê “Jon”. Mêd he yê dì yetac ên. ⁶⁴ Mêd lutibed Sekalaia kwa tyip dì get vô xêlehe dì i keac, mêgem pimil Anutu. ⁶⁵ Om xomxo wê dô vac vigwe tige xona, dì kiyang tige la vac vigwe kitôn Judia vihati, ⁶⁶ om xomxo vihati wê ngô kiyang tige xo kiyang tibeac vac nilô dì nêl ên nêbê, “Nipwo tige obêc dô bêna timuênê?” He nêl bêge, ên he xovô ên nêb xêkizêc wê Anutu vông ge ngidu i xôn.

Sekalaia pimil Anutu

⁶⁷ Myakilôhô Ngibua hivun Sekalaia xôn dì i nêl kiyang tiyi xocbê plopete ti bêga ên nêbê,

⁶⁸ “Il ob pimil Apumtau wê tu il Islele nêd Anutu ge, ên i ge wê lam ngidu il wê il tu i nue ge xôn dì vô il vêl ên nipaên, ⁶⁹ om vông xomxo xêkizêc ti kidi vac kehe Devit wê i nu yuac ge, ên nêb i ngidu il xôn dì vông il dô vac niviha, ⁷⁰ i tiyi xocbê Anutu nêl vô i plopete ngibua ilage mi he nêl kitong ge. ⁷¹ Kiyang tige, Anutu nêl nêb ob vô il vêl ên tibii vevac wê ob hi il gee yuu tibii wê xêyaa vô myavinê vô il gee. ⁷² Om Anutu xo vigwe pisiv ên il buge mi ngidu he xôn, dì xovô i kiyang wê zôô i tu ngibua ilage. ⁷³⁻⁷⁴ Kiyang tige wê Anutu hilu vô

il bug Eblaham ilage, om ob vô nôn lec vô il bêga bê Anutu ob vô il vêl ên xomxo vevac wê nêb ob kitya il vêl ge, ên nêb il vông i yuac mi dô vac, di xonaên i ma, ⁷⁵ di il le ngibua yuu niviha vô Anutu manôn di vông i yuac i tiyi buc vihati wê il dô kibun ga ge.

⁷⁶ Ông nipwo tige, timuên xomxo ob nêl bê ông plopet wê Anutu kisii ganê vông ge, ên ông ob mug Apumtau di titô i nén môp i vô bôbac, ⁷⁷ di ông ob nêl kitong vô xomxo wê tu Anutu nue ge ên he i xovô bê Anutu ob kitya he nêb nipaên vêl di vông he i dô vac niviha. ⁷⁸ Il Anutu ob vông bêge ên wê xêyaa vin lec il ge, om ob vông xomxo ti wê xêseac lag puunê ge i lam vô il, ⁷⁹ ên i lam linac lec xomxo wê dô vac mapitoc ta di he xona ên yibênen ge. Om obêc didii il di i la timu vô kiyang malehe.” Sekalaia nêl bêge.

⁸⁰ Om nipwo tige lig mi vô levac di i piyôp xovô kiyang niviha, di i la dô vac vigwe mahigun pileva wê xomxo dô vacên ma ge di i mila vô buc wê lam hilung i vô xomxo Islel ge.

2

Malia kô nu tuc Yesu (Matyu 1:18-25)

¹ Vô buc tige King Sisa Ogastas vông kiyang ti la vô xomxo vac vigwe vihati ên nêb he vihati i loc ên tibii i kivuu he lê. ² Buc tige, ge wê he kivuu xomxo vihati lê taxlee, di Sailinias tu gavman levac mi viac vigwe Silia vac buc tige mi dô. ³ Om xomxo toto lax ben ben ên nêb tibii i kivuu he lê. ⁴ Josep ge, kehe vac king Devit, mêt kidi vac Nasalet vac vigwe levac Galili mi la, di mila vac vigwe levac Judia di la bu Devit ben luta lê nêbê Betlehem. ⁵ Om Josep yuu xôn vinê Malia la Betlehem ên nêb gavman i kivuu yuu lê. Malia ge, nu dô vac i xêyaa, ⁶ mêt yuu gên dô Betlehem di buc vô kwabo lec wê Malia nu ob yubac ge. ⁷ Lêc xomxo pup lec xumac wê vitevac nêb ge vihati, om yuu la dô vac bulmakau ben, mêtdec nu tyo yubac lêc nu tuc, mêt Malia viyum vac nivimihi di la lii i yêp vac bulmakau dipac wê mi ya vac ge.

Angela nêl Yesu kitong vô xomxo wê viac bwoc sipsip ge

⁸ Vac vigwe tige xomxo wê viac bwoc sipsip gee dô vô vigwe ninya di viac he bwoc sipsip vô bucên mi dô. ⁹ Mêt Apumtau angela ti val vô he, di xêseac wê

Apumtau vông ge lam linac lec he, om he yê di xona mabu. ¹⁰ Lêc angela tyo nêl vô he ên nêbê, “Xonaên i ma. Di xam ngô lê. A ob nêl kiyang niviha ti vô xam, di kiyang tyo wê ob vông xomxo vihati xêyaa vô niviha yang. ¹¹ Om a ob nêl vô xam bêga bê vô buc gwêbaga vac vigwe wê king Devit mi dô vac ilage, nu ti yubac. Ge xam nêm xomxo wê ob vô xam vêl ên nipaên. Ge Apumtau Kilisi. ¹² Om do wê xam ob xovô i lec ge bêga bê xam obêc wê nipwo tyo wê ta viyum vac nivimihi di i diyêp vac bulmakau dipac wê mi ya vac ge.”

¹³ Angela nêl bêge vô he, di lutibed angela lag puunê tibeac hiwocên val le hixôn angela tyo di pimil Anutu ên nêbê, ¹⁴ “Anutu lê i vô levac gê lag puunê, di kiyang malehe i lam kibun ga vô xomxo wê Anutu yê niviha ge.”

Xomxo bwoc viacên la yê Yesu

¹⁵ Angela tigee sea he dì lax mì la lag puunê, mèd xomxo bwoc viacén tigee nél vòma ên nèbê, “Xam kidi lec ên il ob la Betlehem ên la xê kiyang ti wê Apumtau vông vô angela mì he val nél vô il ge nôn.” ¹⁶ Om he kidi lec dì tup lutibed dì mila yê wê Josep yuu Malia xeedô dì nu tuc diyép vac bwoc dipac wê mi ya vac ge. ¹⁷ He yê pyap di nél kiyang lec nipwo tyo tiyi wê angela nél kitong vô he ge. ¹⁸ Mèd xomxo vihati wê ngô kiyang wê xomxo bwoc viacén tigee nél ge ngô dì yetac ên dì xo kiyang tibeac lec. ¹⁹ Mèlêc Malia ngô kiyang dì viac i yêp vac nilô dì xovô i tiyi buc vihati. ²⁰ Mèd xomxo bwoc viacén tigee lax mì la, dì lax pimil Anutu dì hi vixa pec ên kiyang vihati wê he ngô dì yê nôn tiyi kiyang wê angela nél vô he ge.

He nél Yesu lê

²¹ Buc vigê vilu dì sec yon la vêl, om he gôl nipwo tige ninivi dì nél i lê ên nèbê Yesu. Lê tige wê Yesu gên o lam la vac Malia nilô lêm dì angela nél tax vô Malia.

Simion yuu Ana yê Yesu vac Anutu xumac ngibua

²² Buc wê Malia yuu nu tuc ob la lipac ningeac vêl i tiyi kiyang wê yêp vac Moses xolac ge, om Josep yuu Malia kô Yesu mì la vac xumac ngibua Jelusalem, ên nêb ob vông i loc vô Apumtau, ²³ i tiyi Apumtau kiyang wê yêp vac kipihac xolac bêga ên nèbê vêx ti obêc kô nu tuc taxlee ge od he ob vông i loc tu Anutu xe ngibua. ²⁴ Di yuu nêb yuu ob vông daa hixôn i tiyi Apumtau kiyang wê nél ên nèbê yuu i lêc kô dea yuu me tucluu nu yuu mì loc si daa vô i ge.

²⁵ Xomxo ti dô Jelusalem lê nèbê Simion. Simion ge, xomxo vông vinén nôn wê mi kitaa vô Anutu dì dô bin xomxo ti wê ob lam vô viyin vêl ên Islel ge, dì Myakilôhô Ngibua hivun Simion xôn. ²⁶ Ilage Myakilôhô Ngibua nél kitong vô i ên nêb i ob yib lutibed lêm. Nge, nêb ob dô mì yê Kilisi wê Apumtau ob vông i lam ge lec manôn lê, lêc yib timuên. ²⁷ Mèd Myakilôhô Ngibua kidu Simion nêb i loc vac Anutu xumac ngibua, om Simion la dô, dêc Yesu ta yuu ma kô i mì la vac xumac ngibua ên nêb ob vông i tiyi môt wê Moses xolac nél ge. ²⁸ Mègem Simion yê dì hôm Yesu mì kiva lec, dì pimil Anutu ya vya tibêga ên nèbê,

²⁹ “O Apumtau, gwêbaga a nêb ông kô ông num yuac a mì loc vô ông hixôn nilôg niviha, i tiyi kiyang wê ông nêb vô a ilage, ³⁰ ên gwêbaga a magnôn yê xomxo ti wê ông vông i lam ên ông nêb i vô xe vêl ên nipaên ge. ³¹ Ge ông viac pyap mì vông i lam le seac vô xomxo manôn ên ông nêb vihati i yê, ³² ên i ge xêseac wê ob linac lec tibii madiluhu ên he i xovô ông, dì i wê ob vông nume Islel lê i vô levac.”

³³ Yesu ta yuu ma yetac ên kiyang wê Simion nêb lec i ge, ³⁴ mèd Simion kitaa lec yon, dì nêl vô ta Malia ên nèbê, “Ngô lê. Num tiga wê obêc vông xomxo Islel tibeac tô mì la, dì obêc hôm xomxo tibeac lec mì he le niviha. Num tyo tiyi do wê ob hilung Anutu môt vô xomxo ge, lêc xomxo tibeac obêc so vya vô i, ³⁵ om xomxo nén kiyang wê xo vac nilô ge obêc lam le seac. Dì ôcông va nilôm, viyin obêc kitiv ông xocbê yii kitiv ông dì la vac ông nilôm ge.” Simion vya bêge.

³⁶ Plopete vêx ti dô lê nèbê Ana. Ana ge, ma Panyuel dì kehe Asa. Lêc kô vux ti dì yuu dô klismas vigê vilu dì sec yuu, ³⁷ lêc liya yib om tu vêxôv mì dô dì vô vêxta dì i klismas 84. Mèd Ana mì dô vac Anutu xumac ngibua

dì mi ngibua yaên dì mi kitaa vô Anutu tiyi lec bucén yuu vidiiêñ vihati. ³⁸ Léc buc tya ge Ana val yê Yesu yon ta yuu ma, om pimil Anutu dì lax nêñ Yesu kitong vô xomxo vihati wê dô bin buc wê Anutu ob vô Jelusalem vêl ên viyin ge.

Josep yuu Malia yon Yesu lax mi la Nasalet

³⁹ Josep yuu Malia vông môt vihati tiyi xocbê Anutu xolac nêñ ge. Pyap mêñ yon nu tuc lax mi la ben Nasalet vac vigwe levac Galili. ⁴⁰ Yon dô déc nu tuc lig levac dì vô xêkizêc lec hixôn piyôp levac, dì Anutu vizid hivun i xôn.

Yesu dô vac xumac ngibua Jelusalem

⁴¹ Yesu ta yuu ma mi la Jelusalem tiyi klismas vihati, ên nêb ob la yê buc Pasova ên xovô buc wê he sea Isip ilage. ⁴² Mêñ Yesu klismas vigê yuu di tô mi la yuu, om yon ta yuu ma la Jelusalem ên nêb ob la yê buc Pasova tyo nang. ⁴³ Buc Pasova vihati pyap, di he nêb ob lax ben, léc Yesu dô Jelusalem dì ta yuu ma lungêñ i. ⁴⁴ Yuu xo ên yuu nêb mêñ Yesu la hixôn lie ya mi he la, om vidiiêñ tige yuu myag i di kinêg i vô lie hixôn nipipu wê he xôn la ge, ⁴⁵ lêc yuu o yêvô lêm, om yuu lax mi la Jelusalem mi lax myag i. ⁴⁶ Yuu myag i tiyi buc yon, lêc la yêvô i vac Anutu xumac ngibua nilô wê xeedô hixôn Yuda levac levac wê kitucma ge, di ngô he kiyang di le kinêg kiyang kehe vô he. ⁴⁷ Mêñ xomxo wê ngô Yesu kiyang ge yetac ên i kiyang yuu piyôp niviha wê luu he via ge. ⁴⁸ Mêñ Yesu ta yuu ma val yê di yetac ên i, om ta nêl vô i ên nêbê, “Tuce, ông vông bêna vô xii ga lê, lêc ông vông

xii mam myag ông yoo mi xulac hixôn nilôm viyin mabu?” ⁴⁹ Mêñ Yesu nêl i lax vô yuu ên nêbê, “Muu myag a ên va? Muu o xovô bê a ob dô vac Mag xumac ga lêmê?” ⁵⁰ Lêc yuu o xovô Yesu kiyang ge kehe lêm.

⁵¹ Mêñ Yesu kidi mi la hixôn yuu di yon lax mi la ben Nasalet. Yon milax dô Nasalet ge od Yesu vô ninya lehe vô ta yuu ma kiyang tiyi lec vihati, mêtgem ta Malia xovô kiyang tige vihati yêp vac nilô tiyi buc vihati. ⁵² Yesu lig hixôn piyôp niviha, om Anutu hixôn xomxo vihati xêyaa vin lec i.

3

Jon Lipacêñ nêl xolac vô xomxo

(Matyu 3:1-12; Mak 1:2-8; Jon 1:19-28)

¹ Vô buc tige Taibilias Sisa tu king mi viac xomxo vac klismas vigê yuu di vixa vilu (15) mi dô, di xomxo ya tu gavman levac di viac vigwe ya ya, he lê bêga, Pontias Pailat viac vigwe levac Judia di Helot viac vigwe levac Galili di li Pilip viac vigwe yuu lê Itulia yuu Tlakonaitis, di Laisenias viac vigwe Abilini. ² Di Anas yuu Kaiapas tu xomxo wê mi si daa gee nêñ bazub mi dô. Vô buc tige Anutu kiyang la vô Jon wê Sekalaia nu ge vac vigwe mahigun pileva. ³ Om Jon kidi mi la mia Jodan di la vac vigwe viyang viyang di la nêl xolac vô xomxo ên nêbê he i pilepac he di lipac mia êdêc Anutu i kitya he nêñ nipaén vêl. ⁴ Om kiyang wê plopete Aisaia kivuu ilage mi i yêp ge vô nôn lec bêga ên nêbê, “Xomxo ti tyuc via levac vac vigwe mahigun pileva ên nêbê, ‘Xam viac

Apumtau môt wê obêc lam vac ge di vông i vô bôbac. ⁵ Om xam hivun vigwe madia xôn ên i vô bôbac, di den kitôn levac yuu nipwo vihati vêl mi vông i vô niviha, di titô môt nigecêñ i vô bôbac lec,

dì hôm ngidax wê dô vac môp ge vêl ên môp i vô niviha lec, ⁶ ên xomxo vihati i yê Anutu môp wê ob vô xomxo vêl ên nipaên ge.”

⁷ Xomxo tibeac la vô Jon ên nêb i lipac he, lêc Jon nêl vô he ên nêbê, “Myel nipaên nue xam. Letya nêl vô xam ên nêbê xam ob pec ên Anutu xêyaa myavinê wê ob tulec xam ge? ⁸ Xam pilepac xam dì vông môp niviha ên i nêl xam kitong bê xam pilepac xam pyap. Dì le i lêc yong xam dì nêl bê xam bum Eblaham lêm. A ob nêl vô xam bê Anutu tiyi wê ob vông ngidax tigae i tu Eblaham nue hue ge. ⁹ Xam tiyi xochê xax wê xomxo hôm kov ên nêb ob vuv vêl ge, ên kov vô manôn mi yêp vô xax kehe. Ên xax wê o vuac nôn niviha lêm ge, xomxo ob vuv vêl dì nêx i loc vac ngwax.”

¹⁰ Jon nêl bêge vô he, om he vihati kinêg vô i ên nêbê, “Om xe ob vông bêna?” ¹¹ Om Jon nêl vô he ên nêbê, “Xomxo ti, siot yuu obêc dô ge, od i vông ngwe vô xomxo ngwe wê nêbê siot ma ge. Dì xam ti yaén obêc dô vô xam ge od ông vông bêge vô xomxo wê xen yaén ma ge éno mège.”

¹² Mêd xomxo wê mi kô takis gee, ya val vô Jon ên nêb i lipac he, om kinêg vô i ên nêbê, “Xolac kehe, xe ob vông bêna?” ¹³ Mêd Jon nêl vô he ên nêbê, “Mone takis wê xam mi kô ge, xam kô i tiyi wê gavman nêl ge, dì le i lêc kô i nginoo loc lêm.” ¹⁴ Dì tibii vevac ya kinêg vô Jon ên nêbê, “Dì xe gae obêc vông bêna?” Lêc Jon nêl vô he ên nêbê, “Xam o lêc hi xomxo vax vax mi vun he mone lêm. Dì le i lêc vông kot kityooén vô xomxo lec he mone lêm. Nge, xam kô mone lec yuac wê xam vông ge dì i pyap.”

¹⁵ Xomxo tigee dô bin Kîlisi wê ob val ge om he ngô Jon kiyang wê nêl ge dì nilô vô hinyoma hinyoma dêc he kinêg vôma ên nêbê, “Mêd ga Kîlisi tyo mè, me?” ¹⁶ Lêc Jon nêl vô he ên nêbê, “A lipac xam ya mia pileva, dì timuêñ xomxo ngwe obêc val, lêc i xêkizêc luu xêkizêc wê a vông ge vêl, dì a o nigviha tiyi wê a ob piwelac yihi vêl ên su wê i vông ge lêm. Ên obêc val lipac xam ya Myakilôhô Ngibua yuu ngwax. ¹⁷ I vigê vínoo vô ngec nôn wê nêb ob tung vac xumac wê nôn niviha ob dô vac ge, dì ninivi pileva ge wê obêc nêx i la vac ngwax wê mi tum luta ge ên ngwax i ya vêl.”

¹⁸ Mêd Jon nêl kiyang tibeac hixôn ên nêb i vông xovôén vô he, dì nêl Anutu xolac vô he vihati.

Helot tung Jon vac xumac kalabuhu

¹⁹ Jon kunac gavman levac Helot wê viac vigwe Galili ge, ên Helot kô li tuc vinêñ Helodias di vông môp nipaên tibeac hixôn. ²⁰ Lêc Helot vông nipaên levac ti hixôn wê vông Jon vac kalabuhu.

Jon lipac Yesu

(*Matyu 3:13-17; Mak 1:9-11*)

²¹ Buc wê xomxo lipac mia ge od Yesu lipac mia hixôn. Lipac mia pyap dì lôm kitaa, dêc vigwe kisii ganê tax, ²² dì Myakilôhô Ngibua tu xochê tucluu manôn dì lam dô lec Yesu. Mêd vyâ ti lam gê lag piunê ên nêbê, “Ông a nug wê a xêgyaa vin lec ông dì a xê ông niviha ge.”

Yesu bue tivae lê

(*Matyu 1:1-17*)

²³ Yesu klismas 30, dì i nêl xolac vô xomxo taxlee. Dì xomxo mi nêl Yesu nêb i Josep nu. Dì Josep mae bue tivae he lê bêgae:

Josep ma Hilai,²⁴ di Hilai ma Matat, di Matat ma Livai, di Livai ma Melkai,
 di Melkai ma Janai, di Janai ma Josep,
 25 di Josep ma Matataias, di Matataias ma Emos, di Emos ma Neam, di
 Neam ma Eslai, di Eslai ma Nagai,
 26 di Nagai ma Meat, di Meat ma Matataias, di Matataias ma Semen, di
 Semen ma Josek, di Josek ma Joda,
 27 di Joda ma Joanan, di Joanan ma Lesa, di Lesa ma Selababel, di Selababel
 ma Sialtiel, di Sialtiel ma Nelai,
 28 di Nelai ma Melkai, di Melkai ma Edai, di Edai ma Kosam, di Kosam ma
 Elmadam, di Elmadam ma El,
 29 di El ma Josua, di Josua ma Eliesa, di Eliesa ma Jolim, di Jolim ma Matat,
 di Matat ma Livai,
 30 di Livai ma Simion, di Simion ma Yuda, di Yuda ma Josep, di Josep ma
 Jonam, di Jonam ma Elaiakim,
 31 di Elaiakim ma Melia, di Melia ma Mena, di Mena ma Matata, di Matata
 ma Netan, di Netan ma Devit,
 32 di Devit ma Jesi, di Jesi ma Obet, di Obet ma Boas, di Boas ma Salmon,
 di Salmon ma Nason,
 33 di Nason ma Aminadap, di Aminadap ma Atmin, di Atmin ma Anai, di
 Anai ma Heslon, di Heslon ma Peles, di Peles ma Yuda,
 34 di Yuda ma Jekop, di Jekop ma Aisak, di Aisak ma Eblaham, di Eblaham
 ma Tila, di Tila ma Neho,
 35 di Neho ma Selak, di Selak ma Leu, di Leu ma Pelek, di Pelek ma Ebe,
 di Ebe ma Sela,
 36 di Sela ma Kenan, di Kenan ma Apaksat, di Apaksat ma Siem, di Siem
 ma Nôa, di Nôa ma Lamek,
 37 di Lamek ma Metusala, di Metusala ma Inok, di Inok ma Jalet, di Jalet
 ma Mahalalel, di Mahalalel ma Kenan,
 38 di Kenan ma Inos, di Inos ma Set, di Set ma Adam, di Adam kehe Anutu.

4

Seten yaxêñ Yesu (*Matyu 4:1-11; Mak 1:12-13*)

1 Myakilôhô Ngibua hivun Yesu xôn mêt i sea mia Jodan di lax mi la.
 Léc Myakilôhô Ngibua didii i mì la vac vigwe mahigun pileva wê xomxo
 dô vacêm ma ge. ² Mêt Yesu la dô buc kehe yuu di Seten yaxêñ i.

Yesu yaên ti ma di buc tibeac tige la vêl om vip den i. ³ Mégem Seten
 nêl vô Yesu ên nêbê, “Ông obêc Anutu nu nôn ge od ông nêl ên ngidax
 tiga i tu yaên ti ên ông wa.” ⁴ Léc Yesu nêl vô i ên nêbê, “Xolac nêl bêga
 ên nêbê, ‘Susu yaên vaci o tiyi wê xomxo ob dô maviha ya ge lêm.’”

5 Mêt Seten didii Yesu mi yuu lec mi la lec kitôn kisii mêt Seten hilung
 vigwe wê yêp kibun ga ge vihati vô Yesu lutibed, ⁶ di nêl vô i ên nêbê, “A
 ob vông vigwe gee vihati hixôn xêkizêc yuu lê levac wê he vông ge vô
 ông. Ên susu vihati ge tu axe pyap, om a obêc nêb vông vô xomxo ti ge od
 a ob vông. ⁷ Mégem ông obêc yev vixam kitu vô a di pimil a ge od vihati
 obêc tu ông xe.” ⁸ Léc Yesu nêl vô i ên nêbê, “Xolac nêl bêga nêbê, ‘Ông
 yev vixam kitu vô ông Apumtau Anutu tibed, di vông yuac wê ici va vông
 ge.’”

⁹ Mêd Seten didii Yesu mi yuu la Jelusalem, di i mila lax Yesu la lec Anutu xumac ngibua myahipu kisii, di nêl vô i ên nêbê, “Ông obêc Anutu nu nôn ge od ông sox loc kibun. ¹⁰ Èn xolac nêl bêga ên nêbê, ‘Anutu obêc vông i angela lam viac ông, ¹¹ om he obêc hôm ông kisii ya vigê, êdêc ông o lêc vinux vixam lec ngidax lêm.’”

¹² Lêc Yesu nêl vô i ên nêbê, “Xolac nêl bêga ên nêbê, ‘Ông o lêc yaxên Apumtau ông Anutu lêm.’”

¹³ Seten yaxên Yesu ya môp vihati ge pyap, dêc sea i di la, ên nêb ob la dô di buc ngwe nang lê.

*Yesu vông yuac xolac taxlee gê Galili
(Matyu 4:12-17; Mak 1:14-15)*

¹⁴ Xékizéc wê Myakilôhô Ngibua vông ge hivun Yesu xôn di i lax mi la Galili, di xomxo nêl i kitong vac vigwe gee vihati mi i la tiyi vigwe myahipu.

¹⁵ Mêd Yesu la nêl Anutu xolac vac he xumac lilo vihati om xomxo pimil di vông i lê vô levac.

*Xomxo Nasalet vô nimi vô Yesu
(Matyu 13:53-58; Mak 6:1-6)*

¹⁶ Yesu milax Nasalet vac ben wê i nipwo di i dô vac lêc lig mi vô levac vac ge. Yesu lax dô, di buc sabat ge od la vac xumac lilo tiyi môp wê mi vông ge, mêd kidi lec ên nêb ob kitong xolac vô he, ¹⁷ om he vông kipihac wê plopete Aisaia kiyang yêp vac ge vô i, mi i tidii lêc yêvô kiyang ti wê yêp bêga ên nêbê,

¹⁸ “Myakilôhô Ngibua wê Apumtau vông ge lam lec a, ên Anutu vinoo a ên nêb a nêl i xolac kitong vô xomxo wê nênsusu maén gee. Om vông a lam ên nêb a vô viyin vêl ên xomxo wê dô vac kalabuhu ge, di vông xomxo wê manôn toc ge manôn i seac, di vông a lam ên nêb a vô viyin levac wê hivun xomxo xôn ge vêl. ¹⁹ Di nêb a nêl Apumtau buc wê ob vông vizid niviha vô xomxo ge kitong.”

²⁰ Yesu kitong pyap, mêd vilun kipihac xôn di vông i lax vô xomxo ti wê viac xumac lilo ge di tô mi dô ên nêb ob nêl kiyang vô he, om xomxo vihati wê dô vac xumac tige manôn la vô i tibed.

²¹ Mêd Yesu nêl vô he ên nêbê, “Xolac ti wê a kitong mi xam ngô ga, vô nôn lec gwêbaga.” ²² Mêd he pimil Yesu di yetac ên kiyang niviha wê Yesu nêl ge di nêl vîoma ên nêbê, “Ga bêna? Xomxo tiga Josep nu mêt?”

²³ Mêd Yesu nêl vô he ên nêbê, “Vixôhîlôg, xam obêc nêl kiyang pilepacên bêga vô a bê, ‘Docta, ông vông ôcông va nimnivi i vô niviha lec lê. Èn yuac yuu do wê ông la vông vac vigwe Kapaneam mi xe ngô ge, xe nêb ông vông vac il bed ga éno bêge lê.’ Xam obêc nêl bêge vô a lê, ²⁴ lêc a ob nêl hixôn nôn vô xam bê plopete ti obêc nêl kiyang vac ici va ben ge, od lie ob vông i vin i kiyang lêm. ²⁵ I tiyi xochê môp wê bume tivame vông vô plopet Ilaija ilage. Vô buc tige lun valên ma tiyi klismas yon di dentuc vigê vilu di sec ti, om vip mabu yêp vac vigwe Islel vihati. Di vêxôv tibeac dô Islel wê he xen yaén ma ge, ²⁶ lêc Anutu o vông Ilaija la vô vêxôv ti vac ici ben Islel ên nêb i loc ngidu i xôn lêm. Nge, vông i la vigwe Salepat vac tibii Saidon ben ên nêb i loc vô vêxôv Saidontige ên i ngidu i xôn. ²⁷ Nang dêc buc wê plopete Ilaisa dô ge, od xomxo wê kityax

mahizihizi ge tibeac dô vac vigwe Islel, léc Ilaisa o vông he ti vô niviha lec lêm. Nge, la vac tibii Silia ben di la vông Neman tibed vô niviha lec.”

²⁸ Yesu nêl bêge, mêd he wê dô vac xumac lilo mi ngô i kiyang ge, he xêyaa vô myavinê mabu vô i, ²⁹ om he kidi lec di kô i mi la ninyawehé. Vigwe tige yêp lec kitôn ti om he kô Yesu mi la vigwe ninya wê madia ge, ên nêb ob tiyot i loc vac madia. ³⁰ Léc Yesu la vac he mahigun di loc mi la.

*Yesu tii vimwo nipaên vêl ên xomxo ti
(Mak 1:21-28)*

³¹ Yesu loc mi la Kapaneam vac vigwe levac Galili, di buc sabat ge od nêl xolac vô he vac he xumac lilo. ³² Mégem he yetac ên kiyang wê Yesu nêl ge, ên Yesu nêl kiyang hixôn xêkizêc. ³³ Vac xumac lilo tige xomxo wê vimwo nipaên dô vac nilô ge ti dô hixôn, om keac vyá levac ên nêbê, ³⁴ “Yesu Nasaret, ông lam ên ông nêb ông ob vông bêna vô xe? Ông nêb ông ob kitya xe vêle? Ên a xovô ông ên a nêbê ông ge xomxo ngibua wê Anutu vông ông lam ge.”

³⁵ Léc Yesu keac xêkizêc ên nêbê, “Ông keacêni ma, di lop mi loc vêl ên xomxo tige.” Mégem vimwo nipaên tige vô makikun vac xomxo tige mêd hivip i di vixog i la vac xomxo tibeac mahigun, dêc sea i di la vêl, léc o vông xomxo tyo ninivi vô nipaên lêm. ³⁶ Mêd xomxo tibeac tige yê di yetac mabu di nêl voma ên nêbê, “Xomxo tige va nêl kiyang bêna, léc nêl kiyang hixôn xêkizêc vô vimwo nipaên tiyi xocbê i xomxo levac ge om vimwo nipaên ngô di pec mi la vêl.” ³⁷ Mégem xomxo vông Yesu lê vô levac vac vigwe buhu toto ge di i la tiyi myahipu.

*Yesu vông Saimon Pita yen vêxta vô niviha lec
(Matyu 8:14-15; Mak 1:29-31)*

³⁸ Yesu kidi vac xumac lilo di la vac Saimon Pita ben. Léc Saimon yen vêxta vông yidac levac ngwax tum, om he nêb Yesu i loc vông i vô niviha lec. ³⁹ Om Yesu la le kwabo vô i di piping i yidac ên nêbê, “Loc vêl.” Om yidac tip la lutibed di vêx tyo vô niviha lec mi kidi lec, di vông yebac vô he xen yaêñ hixôn.

*Yesu vông xomxo yidac tibeac vô niviha lec
(Matyu 8:16-17; Mak 1:32-34)*

⁴⁰ Hiyôv hoo la, dêc xomxo tibeac kô lie wê yidac kehe toto ge mi la vô Yesu, om Yesu vyax vigê lec he toto di vông he vô niviha lec. ⁴¹ Di xomxo tibeac wê vimwo nipaên dô vac he ge, vimwo nipaên tige lop mi la vêl ên he di tyuc vyá levac ên nêbê, “Ông ge Anutu nu.” Léc Yesu keac levac lec he nêbê, “Xam keacêni ma,” ên he xovô pyap ên nêbê Yesu ge Kilisi ti wê Anutu vông i lam ge.

*Yesu la nêl xolac vac vigwe ya
(Mak 1:35-39)*

⁴² Vigwe vidiién pitoc yang tya ge, Yesu kidi mi sea vigwe tige di la vac vigwe mahigun pileva wê xomxo maén ge. Léc xomxo myag i, léc mila vô i om nêl i xôn nêb i dô hixôn he di seaén he i ma. ⁴³ Léc Yesu nêl vô he ên nêbê, “Méléc a ob la nêl Anutu ben kehe kitong vô xomxo vac vigwe baba hixôn. Ên yuac ga wê Anutu vông a lam ên nêb a vông ge.” ⁴⁴ Om Yesu la nêl xolac vac Yuda xumac lilo viyang viyang ge vihati.

5

*Yesu nêl dêc Saimon Pita hi pis tibeac
(Matyu 4:18-22; Mak 1:16-20)*

¹ Buc ti Yesu mila le vô mia luaên Genesalet ninya, dì xomxo tibeac la dô dì hivun i xôn, ên nêb ob ngô Anutu xolac wê Yesu ob nêl ge. ² Mêlêc Yesu yê dipac yuu wê yêp vô mia ninya ge, lêc xomxo wê mi kô dipac ge dô lecén ma, ên he la dilipac he leac wê mi hi pis vac ge. ³ Mêd Yesu lec la lec dipac ngwe wê Saimon vông ge dì nêl vô Saimon ên nêbê, “Vông dipac i du mi loc mahigun tya.” Om he vông i du mi la mahigun dì Yesu dô lec dipac dì nêl xolac vô xomxo wê dô kehe ge.

⁴ Yesu nêl xolac pyap, dêc nêl vô Saimon ên nêbê, “Vông dipac i loc vac gwec madia dì tung leac i loc vac mia ên hi lili.” ⁵ Lêc Saimon luu i vya ên nêbê, “Xolac kehe, vihevage buc xuhu dia tiga xe vông yuac levac lec lili myagên, vivuatitôv dì vigwe vidii lec, lêc xe o hi ti lêm. Lêc ga mô ông nêl om a ob lax tung leac i loc vac mia.” ⁶ Om he tung leac la, lêc lili tibeac vac leac mi i pup lec xocbê ob tax i tip ge, ⁷ om he tyuc lie dipac ngwe ên nêb he i lam kô lili hixôn he. Om he lam dì he tung lili vac dipac yuu xôn mi i pup lec tiyi xocbê ob vông dipac tô mi la vac mia nilô ge. ⁸ Mêd Saimon Pita yê di la yev vixa kitu vô Yesu di nêl ên nêbê, “Apumtau, loc vêl ên a, ên a ga tibii nigpaen.” ⁹ Saimon nêl bêge, ên i hixôn lie wê dô hixôn i ge yetac mabu ên wê Yesu nêl dì he hi lili tibeac ge. ¹⁰ Di Sebedi nu Jems yuu Jon wê yuu mi vông yuac lili hixôn Saimon ge, yuu yê dì yetac ên êno. Mêd Yesu nêl vô Saimon ên nêbê, “Xonaên i ma. Ên timuên ge od ông obêc vông yuac bêga bê ông obêc kituc xomxo i lam vô a.” ¹¹ Mêd he soo mia mi la le kehe, pyap dêc susu vihati ge dô dì he la timu vô Yesu.

*Yesu vông xomxo wê kityax mahizihizi ge ti vô niviha lec
(Matyu 8:1-4; Mak 1:40-45)*

¹² Yesu la dô vac vigwe ti, lêc xomxo wê kityax mahizihizi dô lec i ninivi ma vêl ge ti yê Yesu om lam yev vixa kitu vô i dì kitaa i ên nêbê, “Xomxo levac, ông obêc nêb vông a nignivi i vô niviha lec ge od ông tiyi wê ông ob vông i vô nôn lec ge.” ¹³ Mêgem Yesu titô vigê la vyax lec i dì nêl ên nêbê, “A nêb ông vô nimviha lec.” Yesu nêl dì kityax mahizihizi tige wax la vêl di i ninivi vô niviha lec lutibed. ¹⁴ Mêgem Yesu nêl kiyang xêkizêc vô i ên nêbê, “Ông o lêc nêl kitong vô xomxo ti lêm. Dì loc hilung nimnivi mô vô xomxo wê mi si daa vô Anutu ge dì vông daa i tiyi Moses xolac wê nêl ge, ên xomxo vihati i yê dì xovô bê ông nimnivi vô niviha lec.” ¹⁵ Yesu nêl bêge lê, lêc xomxo nêl i lê vô levac la vac vigwe viyang viyang ge, om xomxo tibeac mi kituc la vô i, ên nêb ob ngô kiyang wê i nêl ge, dì he nêb i vông he ninivi yidac i vô niviha lec. ¹⁶ Lêc buc ya Yesu le sea he dì la vac vigwe mahigun pileva dì la kitaa.

*Yesu vông xomxo ti wê vixa len vô xêlehe ge vô niviha lec
(Matyu 9:1-8; Mak 2:1-12)*

¹⁷ Buc ti Yesu nêl xolac vô xomxo tibeac, lêc Palisi yuu xomxo wê xovô Moses xolac gee lam vac vigwe Jelusalem dì Galili yuu Judia vihati mi lam dô hixôn. Dì xêkizêc wê Apumtau Anutu vông ge lam hivun Yesu xôn ên nêb i vông yidac i vô niviha lec ya. ¹⁸ Mêd xomxo ya ken xomxo ti wê len vô xêlehe ge lec pêt dì mila, ên nêb ob vông i loc vô Yesu manôn ên i vông i vô niviha lec. Lêc Yesu dô vac xumac nilô, ¹⁹ dì xomxo tibeac pup lec,

om môp ti o yêp wê he ob kô i mi la vô Yesu ge lêm. Om he lec xumac mi la kisii mi la dii xumac mya ti dì vông xomxo tyo tô mi la hixôn pêt vac tibii tibeac mahigun dì la yêp vô Yesu manôn. ²⁰ Mêd Yesu yê wê he vông i vin ge om nêl vô xomxo tyo ên nêbê, “Lig, a kitya ông nêm nipaên vêl pyap.”

²¹ Mêlêc xomxo wê xovô Moses xolac gee yuu Palisi gee ngô dì nêl vôma ên nêbê, “Xomxo tige letya lêc so vya vô Anutu? Ên xomxo ti o tiyi wê ob kitya xomxo nêm nipaên vêl ge lêm. Nge, Anutu vaci tibed ge wê ob kitya vêl ge.” ²² Mêd Yesu xovô kiyang wê he nêl vac nilô ge om nêl vô he ên nêbê, “Bêna lêc xam xo kiyang bêge vac nilômê? ²³ Xam xovô lê. Kiyang ngwe na wê obêc vô viyin maén ge? Kiyang wê nêbê, ‘A kitya ông nêm nipaên vêl’ ge, me kiyang wê nêbê, ‘Ông kidi lec mi loc’ ge? ²⁴ Mêlêc a nêb a ob vông xovôen vô xam bê a, Xomxo Nu, a xêkizêc tiyi wê a ob kitya xomxo nêm nipaên vêl gê kibun ga, om xam lêc wê.’” Mêdêc Yesu nêl vô xomxo tyo wê len vô xêlehe ge ên nêbê, “A nêl vô ông bê ông kidi lec mi hôm ông guhu lec di lôc bom.” ²⁵ Mêdec lutibed xomxo tyo kidi lec vac he mahigun dì hôm

i guhu lec dì la ben hixôn nilô pimilên. ²⁶ Mêgem xomxo gee vihati yê di yetac mabu, di he pimil Anutu hixôn nilô yetacê dì nêl vôma ên nêbê, “Gwêbaga il xê mad lec do nivîha viyonêti.”

Yesu keac Livai la hixôn i (Matyu 9:9-13; Mak 2:13-17)

²⁷ Yesu la, lêc mila yê xomxo ti lê nêbê Livai wê xeedô vac xumac wê he mi kô mone takis vô tibii vac ge, om Yesu la nêl vô i ên nêbê, “Kidi mi lam hixôn a.” ²⁸ Mêgem Livai kidi lec dì sea i yuac yuu susu vihati dô xel di la timu vô Yesu vixa mi he la.

²⁹ Mêd Livai myêl vizid levac vô Yesu vac ben, di xomxo wê mi kô takis gee hixôn xomxo yaya la dô hixôn yuu mi he ya. ³⁰ Lêc he Palisi hixôn he lie wê xovô Moses xolac gee yê tiyiên ma, om nêl vô Yesu nue ngivihi ên nêbê, “Bêna lêc xam la wa di num hixôn tibii wê mi kô mone takis gee yuu tibii nipaêné?” ³¹ Mêd Yesu ngô wê he nêl bêge, om nêl vô he ên nêbê, “Xomxo nivîha obêc la vô docta lêm. Nge, tibii yidac ge wê obêc la vô docta. ³² Om a ob nêl vô xam bê a o lam ên a nêb a ob tyuc xomxo nivîha lêm. Nge, a lam ên tibii nipaên, ên a nêb he i pilepac he.”

Kiyang lec môp tikwê yuu paha (Matyu 9:14-17; Mak 2:18-22)

³³ Mêd he nêl vô Yesu ên nêbê, “Jon nue ngivihi mi ngibua yaén dì mi kitaa tiyi buc vihati, dì Palisi nue ngivihi mi vông bêge êno. Mêd ông va ge, nume ngivihi mi ya dì mi num dì o ngibua lêm.” ³⁴ Mêlêc Yesu nêl vô he ên nêbê, “Buc ti wê tibii viyang ti lie ti obêc ii vêx ti lêc gên dô hixôn he ge, od he obêc ngibua yaén, me? Maê.” ³⁵ Lêc obêc buc timuên wê tibii ob kô li tige väl ên he ge, od ge wê he obêc dô hixôn viyin dì ngibua yaén.”

³⁶ Mêd Yesu nêl kiyang pilepacén ti vô he bêga ên nêbê, “Xomxo ti nêngakwi obêc tip ge, od obêc kiping ngakwi paha myahipu ti vêl mi la duu lec tikwê lêm. Ên obêc vông bêge ge od obêc vông ngakwi paha vô nipaên, dì myahipu paha tige obêc la tiyi ngakwi tikwê lêm. ³⁷ Di kiyang ngwe, xomxo ti obêc too mia wain paha vac bwoc ninivi tikwê lêm. Ên obêc too vac ge od wain obêc vuac dì tax ninivi tikwê tip dì wain too la.”

³⁸ Om wain paha ge, xomxo i too vac bwoc ninivi paha. ³⁹ Di xomxo wê num wain tikwê ge obêc nêb num wain paha nang lêm, ên he nêl ên he nêbê wain tikwê nyen niviha luu vêl.”

6

*Yesu nêl kiyang lec môt sabat
(Matyu 12:1-8; Mak 2:23-28)*

¹ Vô buc sabat ti, Yesu he nue ngivihi la vô môt wê la vac yuac yaên ge ti. Mêd he mila lê, lêc nue ngivihi le yul wit nôn wê tiyi xocbê pidi nôn ge di hili ninivi la vêl di ya nôn. ² Lêc Palisi ya yê di nêl vô he ên nêbê, “Gwêbaga buc sabat wê Moses xolac ngibua nêb il ob vông yuac ti lec lêm ge, lêc bêna lêc xam vông yuac lecê?” ³ Lêc Yesu luu he vya bêga ên nêbê, “Môt wê bug Devit vông ilage, xam kitong, me xam lungên? Ên Devit he lie dô lê, lêc vip den he, ⁴ om Devit la vac Anutu xumac ngibua di la hôm blet ti wê he tung vô Anutu manôn ge. Blet tige, xomxo pileva o tiyi wê ob ya ge lêm. Nge, xomxo wê mi si daa vô Anutu ge, heche va ob ya. Lêc Devit kô mi lax ya dêc vông mi lie ya hixôn. Lêc Devit o vông i so lêm, ên xomxo wê mi si daa ge vaci vông mi i ya.” ⁵ Di Yesu nêl hixôn vô he ên nêbê, “Om xam xovô bê a, Xomxo Nu, a tu buc sabat kehe hixôn.”

*Yesu vông xomxo wê vigê nipaên ge ti vô niviha lec vô buc sabat
(Matyu 12:9-14; Mak 3:1-6)*

⁶ Mêd sabat timuên ngwe Yesu la vac Yuda xumac liло mi la nêl xolac vô he. Lêc yê xomxo wê vigê hiyôv len yuu kilôhô xêlehe ge ti dô hixôn he. ⁷ Lêc Yuda wê xovô Moses xolac gee hixôn he Palisi dô di yê Yesu xôn ên nêb ob yê bêc obêc vông xomxo tige vô niviha lec vô sabat ge od he ob vông kiyang vô i. ⁸ Lêc Yesu xovô he nilô ge om nêl vô xomxo vigê nipaên tige ên nêbê, “Kidi mi lam le mahigun tinê.” Mêgem xomxo tyo kidi lec mi la le vac he mahigun. ⁹ Om Yesu nêl vô he vihati ên nêbê, “A ob kinêg vô xam bê xolac wê il Yuda vông ge, nêb il vông bêna lec sabatê? Nêb il vông niviha me nêb il vông nipaên? Om il ob vông xomxo i vô niviha, me il ob vông he i vô nipaên xel lec sabat?” ¹⁰ Mêd Yesu vô yê yê he vihati di nêl vô xomxo vigê nipaên tige ên nêbê, “Titô vigêm.” Mêd xomxo tyo titô vigê, lêc vigê vô niviha lec. ¹¹ Om xomxo wê xovô Moses xolac gee yuu Palisi, he xêyaa vô myavinê mabu di he nêl vôma ên nêbê, “Om il ob vông bêna vô Yesu?”

*Yesu vinoo aposolo vigê yuu di tô mi la yuu
(Matyu 10:1-4; Mak 3:13-19)*

¹² Vô buc tige Yesu la lec kitôn ti ên nêb ob la kitaa vô Anutu, om bucên tige yadiluhu Yesu kitaa vivuatitôv mi dô di vigwe vidii lec. ¹³ Vigwe vidii mêd Yesu tyuc nue ngivihi vihati lam vô i mêd vinoo he vigê yuu di tô mi la yuu wê ob kô lê aposolo ge. ¹⁴ Om he lê bêga, Saimon, wê Yesu nêl lê ngwe nêbê Pita, di Pita li Andlu, di Jems yuu Jon, di Pilip yuu Batolomyu, ¹⁵ di Matyu yuu Tomas, di Jems ngwe wê ma Alpias ge, di Saimon Selot, ¹⁶ di Judas wê ma Jems ge di Judas Iskaliot wê obêc hilung Yesu vô tibii vevac timuên ge.

*Yesu vông xomxo tibeac vô niviha lec
(Matyu 4:23-25)*

¹⁷ Pyap dêc Yesu he nue ngivihi sea kitôñ tyo di lop mi lôm tô lec vigwe hibuhu ngwe. Di xomxo wê mi timu vô Yesu gee hixôn xomxo Judia vigwe nipwopwo hixôn vigwe levac Jelusalem, di Taia yuu Saidon wê yêp kwabo vô gwec ninya ge, he tibeac val kitucma mi dô, ¹⁸ ên he nêb he ob ngô Yesu kiyang, di he wê yidac ge nêb Yesu i vông he ninivi i vô niviha lec. Di xomxo wê vimwo nipaên vông he vô nipaên ge, Yesu tii vimwo vêl ên he di vông he vô niviha lec. ¹⁹ Mêgem xomxo gee vihati nêb obêc hôm lec Yesu ninivi, ên he yê wê xêkizêc wê Yesu vông ge la vông xomxo tibeac vô niviha lec ge.

*Kiyang xêyaa niviha yuu kiyang viyin
(Matyu 5:1-12)*

²⁰ Mêd Yesu yê ma la nue ngivihi di nêl vô he ên nêbê,
“Xam wê xam xo ên xam nêbê xam o niviha lêm ge, xam xêmyaa i niviha, ên xam tu Anutu nue pyap.

²¹ “Xam wê vip den xam ge, xam xêmyaa i niviha, ên timuên ge od xam obêc wa i den xam.

“Di xam wê xam nilôm viyin di xam byag gwêbaga ge, xam nilôm i vô niviha, ên xam obêc nap hixôn xêmyaa niviha timuên. ²² Buc wê xomxo obêc yê xam nipaên ên wê xam vông i vin Xomxo Nu ge di obêc tii xam di nêl kiyang nipaên lec xam di so vya vô xam ên nêb xam tibii nipaên ge od xam nilôm i niviha. ²³ Om buc wê he obêc vông bêge vô xam ge od xam pimil di xêmyaa i vô niviha lee, ên nôn niviha wê xam obêc kô ge yêp vac Anutu ben lag puunê. Môp bêge wê he bue vông vô plopete ilage êno.

²⁴ “Dom xam wê mone levac yuu susu tibeac ge, xam xona nêm, ên xam kô susu niviha mi dô hixôn xêmyaa niviha pyap, om xam obêc kô niviha ti timuên nang lêm.

²⁵ “Di xam wê xam wa i den ge, xam xona nêm, ên vip obêc den xam timuên.

“Di xam wê xam nap mi dô gwêbaga, xam xona nêm, ên xam obêc byag di dô hixôn nilôm viyin timuên.

²⁶ “Om xomxo viyang viyang obêc pimil xam ge, od xam xona nêm, ên he bue vông bêge vô plopete kityooênilage êno mêgê.”

*Il xêdyaa i vin lec xomxo wê vông vevac vô il ge
(Matyu 5:38-48)*

²⁷ Yesu nêl vô he ên nêbê, “A ob nêl vô xam wê xam ngô a kiyang ga bêga bê xam xêmyaa i vin lec xomxo wê vông vevac vô xam ge, di xam vông niviha vô xomxo wê he xêyaa vô nipaên vô xam ge. ²⁸ Di xam kitaa lec xomxo wê nêl vya vô xam ge, di xam kitaa vô Anutu bê i vông niviha vô xomxo wê so vya vô xam ge. ²⁹ Xomxo ti obêc pitap ông lia viulu ge od ông vông viluo hixôn vô i, di xomxo ti obêc kô ông saket ge od ông o lêc kol siot lêm. Nge, ông vông vô i hixôn. ³⁰ Di xomxo ti obêc kitaa susu ti vô ông ge od ông vông vô i, di xomxo ti obêc kô ông nêm susu ti mi la ge od le i lêc kidu bê i vông i lôm vô ông lêm. ³¹ Môp niviha wê xam nêb xomxo i vông vô xam ge, od xam vông niviha vô he êno bêge.

³² “Ên xam xêmyaa obêc vin lec xomxo wê xêyaa vin lec xam ge vaci di xêmyaa o vin lec xomxo baba hixôn lêm ge od xam ob kô pimilên niviha lec môp tibêge tibêna? Ên tibii nipaên xêyaa vin lec xomxo wê xêyaa vin lec he ge êno. ³³ Di xam obêc vông niviha vô xomxo wê vông niviha vô

xam ge vaci ge od xam ob kô pimilên niviha lec môp tibêge tibêna? Ên tibii nipaên êno mi vông môp tibêge. ³⁴ Di xam obêc vông susu pileva vô xomxo lêc xam nêb he i vông myaviwen vac ge od xam ob kô pimilên niviha lec môp tibêge tibêna? Ên tibii nipaên mi vông susu pileva vô xomxo nêb he i vông myaviwen vac êno mêtê. ³⁵ Om a ob nêl vô xam bê xam xêmyaa i vin lec xomxo wê vông vevac vô xam ge di vông niviha vô he, di xam vông susu vô xomxo di le i lêc xo bê he i vông myaviwen vac vô xam lêm. Xam obêc vông bêge ge od xam ob kô nôn niviha luu vêl timuên di xam ob tu Anutu lag puunê nue. Ên Anutu ge wê vông niviha vô tibii nipaên wê o mi pimil i lêm ge. ³⁶ Mêgem xam êno xo vigwe pisiv ên xomxo di vông niviha vô he i tiyi xocbê Mag Anutu xo vigwe pisiv ên il ge.”

*Kiyang wê ob yaxêñ xomxo ge
(Matyu 7:1-5)*

³⁷ Yesu nêl vô he ên nêbê, “Xam o lêc yaxêñ xomxo nêl kiyang lêm, êdêc Anutu i yaxêñ xam nêm kiyang êno lêm. Di xam o lêc nêl vyam nipaên lec xomxo bê he i kô myaviwen nipaên lêm, êdêc Anutu i nêl vya nipaên lec xam lêm. Di xam piwelac kiyang nipaên wê xomxo vông ge vêl êdêc Anutu i piwelac vêl ên xam êno. ³⁸ Om xam vông susu vô xomxo lê, êdêc Anutu i vông vô xam êno. Ên Anutu obêc vông tibeac vô xam tiyi xocbê ob vông vac xam sepac mi i pup lec dêc kitiv i tô mi la, dêc kipyax ya lec hixôn mi i pup lec di kipyax sea ge. Ên môp wê xam vông vô xomxo ge od Anutu obêc vông i tiyi wê xam vông vô he ge vô xam.”

³⁹ Mêgem Yesu nêl kiyang pilepacén ti vô he bêga ên nêbê, “Xomxo manôn tocén ngwe o tiyi wê ob didii xomxo ma tocén ngwe ge lêm. Ên ge od yuu xôn ob la tô madia. ⁴⁰ Di nipwo xumac xulacén ti ob luu ma wê tixuu he ge vêl lêm. Lêc he obêc kô xovôên niviha vac xumac kipihac mi la tiyôô lec myahipu ge od he obêc tiyi xocbê ma wê tixuu he ge.

⁴¹ “Om ông ge, bêna lêc ông wê xax mavigen wê le vac lim manôn ge di lungên levac mabu ngwe wê le vac ôcông va mamnôn ge? ⁴² Bêna lêc ông ob nêl vô lim bê, ‘Lige, a ob vông xax mavigen wê le vac ông mamnôn ge vêl,’ dom dilungên levac ngwe wê le vac ôcông va mamnôn ge? Ông xomxo kityooên, ông pul xax levac wê le vac ôcông va mamnôn ge vêl tax di mamnôn i seac niviha lê, êdêc pul nipwo tya wê le vac lim manôn ge vêl.”

*Kiyang pilepacén lec xax nôn niviha yuu nipaên
(Matyu 7:16-20; Matyu 12:33-35)*

⁴³ Yesu nêl nang ên nêbê, “Xax niviha ti obêc vuac nôn nipaên lêm, di xax nipaên obêc vuac nôn niviha lêm. ⁴⁴ Xax vihati ge il ob xovô lec nôn toto. Ên xomxo ob yul higuc nôn lec hizap yatôv lêm, di xomxo ob yul viyodac nôn lec kipomac yatôv lêm. ⁴⁵ Di il xomxo tiyi lec bêge. Ên xomxo wê piyôp niviha yêp vac he nilô ge od ob vông môp nipaên. Ên kiyang yuu xovôên wê pup vac xomxo nilô ge, xomxo mya nêl i lam seac.

*Kiyang pilepacén lec xumac yuu
(Matyu 7:24-27)*

46 “Bêna lêc xam nêl a ên xam nêbê, ‘Apumtau, apumtau,’ lêc xam o vông a vyag wê a nêl vô xam ge vô nôn lec lêmê? **47** Xomxo wê lam vô a mì lam ngô a kiyang dì vông a vyag vô nôn lec ge, a ob nêl he kitong vô xam. **48** He tiyi xochê xomxo ti nêb ob lox xumac om yev lôva madia ta dêc hoo teac vac dêc tung ngidax la nêb ngidax i hôm teac xôn, dêc lox xumac lec, lêc lun val om mia butac mabu, lêc xumac tige o kipê lêm, ên xomxo tige lox i xumac xêkizêc ta. **49** Lêc xomxo wê ngô a kiyang lê, lêc o vông i vô nôn lec lêm ge, ge tiyi xochê xomxo ti lox xumac lec kibun pileva di o yev hipu la vac kibun lêm, om mia butac mì val mabu ge od dii i nêl xumac sea.”

7

Yesu vông Lom tibii vevac ti nu yuac ti vô niviha lec (Matyu 8:5-13)

1 Yesu nêl kiyang vihati mi xomxo ngô, pyap di i loc mi la vigwe Kapaneam. **2** Mêd Lom tibii vevac levac ti dô vac vigwe tige, lêc i nu yuac ti vông yidac levac tiyi wê ob yib ge. Tibii vevac tyo xêyaa vin lec nu yuac tige, **3** lêc ngô wê Yesu val vigwe tige, om vông Yuda levac ya la vô Yesu ên nêb he i loc nêl vô Yesu ên i lam vông nu yuac tyo i vô niviha lec. **4** Om he mila vô Yesu dêc mila kitaa i xêkizêc ên nêbê, “Vô ninyam lehe vô tibii vevac tiganê vyá, ên i ge xomxo niviha, **5** wê xêyaa vin lec il Yuda di i lox il xumac liло ge.”

6 Mêd Yesu ngô he vyá di la hixôn he mi he la, mêd he mila kwabo vô tibii vevac tyo ben, lêc tibii tyo vông lie ya lam nêl i vyá vô Yesu bêga ên nêbê, “Xomxo levac, a xomxo nigpaén, om ông o tiyi wê ông ob vac lam vac a bog xumac lôma ge lêm, **7** om a xovô ên a nêb a ob loc le vô ông mammôn lêm. Lêc a nêb ông le teva di vyam pileva i nêl, ên a nug i vô niviha lec. **8** A xovô bêge, ên a ga êno wê a la vac xomxo levac viulu kwa ngibi, di a nuge vevac ge wê la vac a kwa ngibi. Om a obêc nêl vô he ti bê i loc ge od ob la, di a obêc nêl vô ti bê i lam ge od ob lam, di a obêc nêl vô a nug yuac ti bê i vông yuac tige ge od ob vông. Om a xovô ên a nêbê ông ge xomxo xêkizêc om ông obêc le teva di nêl ge od a nug ge ob vô niviha lec.”

9 Yesu ngô kiyang wê xomxo tige nêl hixôn vông vinêng ge om yetac ên di pop manôn lax vô xomxo tibeac wê ditimu vô i vixa ge di nêl vô he ên nêbê, “Xame, a ob nêl vô xam bê a o xê Islel ti vông i vin xêkizêc tiyi xochê tibii tiga vông ge lêm.” **10** Om xomxo wê tibii levac tige vông he la ge lax mi la tibii levac tyo ben, lêc milax yê wê nu yuac tyo vô niviha lec ge.

Yesu tipi vô vêxôv ti nu kidi lec maviha

11 Nang dêc buc ti lêc Yesu la vigwe Nen, di nue ngivihi hixôn xomxo tibeac hiwocên la hixôn. **12** Mêd Yesu mila kwabo vô vuayen wê ob la vac viyangtôv ge, lêc xomxo ken xomxo yibêng ti mi val ên nêb ob kô mi la yev. Vêx vêxôv ti nu tibed tige, om xomxo viyang tige tibeac lam hixôn i. **13** Mêd Apumtau Yesu yê vêx tige di xo vigwe pisiv ên i om nêl vô i ên nêbê, “Byagên i ma.” **14** Mêd la vyax vigê lec pêt wê yibêng yêp lec ge di xomxo wê ken ge le, dêc Yesu nêl vô yibêng tigo ên nêbê, “Nug, a nêl vô ông bê ông kidi lec.” **15** Om yibêng tigo kidi lec mi dô di keac vô he, dêc Yesu vông i lax vô ta. **16** Mêgem xomxo tigee yê di xona mabu, di pimil

Anutu ên nêbê, "Il nêd plopete levac ti kidi vac il mahigun ga mêt." Dì he ya nêbê, "Gwêbaga Anutu val le seac vô il madnôñ ên nêb ob hôm il wê il tu ixe ge lec." ¹⁷ Mêt xomxo nêl Yesu lê kitong mi i vô levac mi la vac vigwe Judia vihati dì la vac vigwe ninya hixôn.

*Jon Lipacén vông nue ngivihi la kinêg Yesu kehe
(Matyu 11:2-19)*

¹⁸ Mêt Jon Lipacén nue ngivihi lax mi la nêl Yesu do levac wê vông ge kitong vô Jon, ¹⁹ om Jon keac nue ngivihi yuu lam vô i dì nêl vô yuu nêbê yuu i loc vô Apumtau Yesu ên loc kinêg vô i bê, "Xomxo ti wê plopete ilage nêl ên nêb obêc val ge, ông xomxo tyo tiga mêt, me xe ob dô bin xomxo ngwe?" ²⁰ Mêgem yuu mila vô Yesu di la nêl vô i ên nêbê, "Jon Lipacén vông xii lam ên nêb xii lam kinêg ông bê xomxo ti wê plopete ilage nêl ên nêb obêc val ge, ông xomxo tyo tiga mêt, me xe ob dô bin xomxo ngwe lê?"

²¹ Vô buc tyá ge Yesu dô dì vông xomxo yidac kehe toto tibeac vô nivîha lec dì tii vimwo nipaên vêl ên xomxo tibeac, dì vông xomxo wê manôñ tocën ge, manôñ seac. ²² Mêgem Yesu nêl vô yuu ên nêbê, "Muu lôc mi loc dì nêl môp wê muu ngô yuu wê ge kitong vô Jon bê xomxo manôñ tocën, manôñ seac, dì xomxo vixa nipaên, vixa vô nivîha lec mi he la nivîha, dì xomxo wê kityax mahizihizi ge, kityax yôv dì he vô nivîha lec, dì xomxo wê ninya vô kitu ge, ngô kiyang, dì xomxo yibêñ kidi lec mavîha tii vac nang, dì xomxo wê nêñ susu maén gee ngô xolac nivîha. ²³ Xomxo wê nilô o vông yuu lec a lêm ge wê obêc dô hixôn xêyaa nivîha."

²⁴ Jon nue ngivihi yuu ge lax mi la vêl, dêc Yesu nêl Jon kehe kitong vô xomxo tigee ên nêbê, "Ilage wê xam la vô Jon vac vigwe mahigun pileva ge, xam nêb xam ob la wê va? Xam nêb xam ob la ên la wê duvac wê lea kilê i la dì i hivip lec nang ge, me? ²⁵ Xam la ên xam nêb xam ob la wê vatya? Xam nêb xam ob la wê xomxo wê vinyum ngakwi nivîhaviha ge ti, me? Lêc xomxo wê vinyum ngakwi paha wê nivîha ge wê mi dô vac king ben. ²⁶ Xam la ên xam nêb xam ob la wê plopete ti? Vixôhilôg, a nêl vô xam bê i plopete ti, lêc luu plopete vihati vêl. ²⁷ Ên Anutu nêl Jon kitong mi i yêp vac kipihac xolac bêgâ ên nêbê,

'Ngô lê, a ob vông xomxo ti i kô a kiyang mi loc mug ông nêm môp, ên i viac môp wê ông obêc mila vac ge.'

²⁸ Anutu kiyang bêge, dì a ob nêl vô xam bê xomxo levac luu xomxo kibun ga vihati vêl. Vixôhilôg, lêcom xomxo vihati wê vô nipwo lec vac Anutu ben ge obêc luu Jon vêl."

²⁹ Mêt xomxo wê mi kô takis gee hixôn xomxo vihati, he ngô Yesu kiyang tige dì vô ninya lehe vô ên nêbê Anutu môp ge nivîha, ên ilage he pilepac he dì Jon lipac he. ³⁰ Lêc Palisi yuu xomxo wê xovô Moses xolac gee, he vô nimi vô Anutu môp nivîha wê hilung vô he ge, om he nêb Jon i o lêc lipac he lêm.

³¹ Mêt Yesu nêl nang ên nêbê, "Xomxo buc gwêbaga, he va bêna? A ob tixuu he môp lec kiyang ti. ³² He tiyi xochê nue nipwo wê dô lec wetôv dì tyucma ên nêbê, 'Xame, xe hi vyang lêc xam o yoo lêm, nang dì xe vông tilôt lê, lêc xam o byag lêm.' He môp tiyi xochê môp wê xam nêl vô xii Jon ge, ³³ ên Jon Lipacén val, lêc mi ngibua yaén dì numén wain ma, lêcom xam nêl ên xam nêbê vimwo nipaên dô vac i nilô. ³⁴ Nang dêc a,

Xomxo Nu, a val lêc a mi xa di num vô, di a o ngibua ti lêm, lêc xam nêl ên xam nêbê, ‘Wê lê. Xomxo tige va mi ya levac di mi num wain levac mi vô mavmav, di mi dô hixôn xomxo wê mi kô takis lêc mi vun mangwe ge yuu tibii nipaên.’³⁵ Xam mi nêl bêge, lêcom a ob nêl vô xam bê xomxo wê timu vô piyôp niviha di kô xovôen vô Anutu ge, he nêl ên nêbê xovôen wê Anutu vông ge nôn vixôhilôg.”

Vêx nipaên ti lipac wel nivivea lec Yesu vixa

³⁶ Palisi ti lê nêbê Saimon nêl vô Yesu ên nêb i loc vac i ben ên yuu ob ya. Om Yesu la vac i ben di yuu dô di ya. ³⁷ Mêd vêx nipaên ti wê mi dô vac vigwe tige ngô wê Yesu la dô vac Palisi tyo ben di la ya hixôn i ge, om kô butol niviha ti wê wel nivivea le vac ge di la vac Palisi tyo ben, ³⁸ di la le kwabo vô Yesu vixa di byag mi dô, di maluc yuc lec Yesu vixa pitehe. Om vêx tyo kitya maluc ya bazub lihi, di hiwaa Yesu vixa pitehe di lipac wel nivivea tyo lec Yesu vixa.

³⁹ Mêd Palisi ti wê nêl Yesu lam vac i ben tige yê môp wê vêx tyo vông ge, om xo bêga ên nêbê, “Xomxo tige obêc plopete ti vixôhilôg ge od obêc xovô vêx tige wê lam hôm vigê lec i ge di obêc xovô i môp wê mi vông ge bê i vêx nipaên ti.”

⁴⁰ Mêd Yesu nêl vô Palisi tyo ên nêbê, “Saimon, a ob nêl kiyang ti vô ông.” Mêd Saimon nêl lax vô ên nêbê, “Om ông nêl kiyang ti wê ông ob nêl ge.” ⁴¹ Om Yesu nêl ên nêbê, “Xomxo yuu la kô mone vô xomxo ti, ngwe kô mone yul ti (K100) di ngwe kô mone kipihac ti (K10). Om yuu xôn myaviwen yêp vô xomxo tige. ⁴² Lêcom yuu xôn o tiyi wê yuu ob lax hi myaviwen vêl ge lêm, om xomxo tyo vaci hi yuu myaviwen vêl. Om a ob kinêg vô ông bê xomxo yuu ge, ngwe na xêyaa ob vin lec xomxo tyo luu vêlê?” ⁴³ Mêd Saimon nêl ên nêbê, “Mêd obêc ngwe wê i myaviwen levac ge.” Mêd Yesu nêl vô i ên nêbê, “Ông nêl lec bôbac.”

⁴⁴ Mêd Yesu pilepac i vô vêx tige di nêl vô Saimon ên nêbê, “Om wê vêx tiga. A lam dô vac ông bom ga lê, lêc ông o timu vô môp wê il Yuda mi vông ge lêm di vông mia ên a lipac vixag vac lêm. Dom vêx tiga lipac a vixag ya maluc di kitya vêl ya bazub lihi. ⁴⁵ Di buc wê a lam vac ông bom ga ge, od ông o pul a vigê di hôm a lec niviha lêm. Dom vêx tige val lê, lêc hôm a lec niviha di le hiwaa a vixag. ⁴⁶ Di ông o lipac wel lec a bagzub lêm. Dom vêx tiga val lipac wel nivivea lec a vixag. ⁴⁷ Om a ob nêl vô ông bê vêx tiga xêyaa vin lec a luu vêl om nêl i kitong ên nêbê i nêbê nipaên tibeac lê, lêc Anutu kitya vihati vêl om i xêyaa vin lec a luu vêl. Lêc xomxo ngwe wê Anutu kitya i nêbê nipaên yuuyabed vêl ge od xêyaa obêc vin lec Anutu nipwo tyo.” ⁴⁸ Mêd Yesu nêl vô vêx tyo ên nêbê, “A nêl vô ông bê a kitya ông nêm nipaên vêl pyap.” ⁴⁹ Mêd xomxo wê dô mi ya hixôn Yesu gee xo bêga ên nêbê, “Xomxo tige letya lêc kitya xomxo nêbê nipaên vêlê?” ⁵⁰ Mêd Yesu nêl vô vêx tyo ên nêbê, “Vông vinêr wê ông vông ge, ge wê kitya ông nêm nipaên vêl di vông ông vô nimviha lec. Om ông lôc hixôn xêmyaa niviha.”

8

Vêx wê mi la hixôn Yesu gee

¹ Nang dêc Yesu he nue ngivihi vigê yuu di tô mi la yuu tup vac vigwe levac yuu nipwo toto, di Yesu nêl Anutu ben kehe kitong vô xomxo. ² Mêd

vêx ya mi la hixôn Yesu he nue ngivihi ên nêb ob viac he. Vêx tigee wê ilage Yesu tii vimwo nipaên vêl ên mangwe di vông he mangwe yidac kehe toto ge vô niviha lec. Om he lê bêga, Malia Makdala ti wê Yesu tii vimwo nipaên vigê vilu di sec yuu la vêl ên i ge,³ di Joana wê liya Susa mi viac King Helot xumac ge, di ti lê Susana, di vêx tibeac yaya hixôn. Om vêx tigee wê viac Yesu he nue ngivihi ya he mone di ngidu he xôn ên yuac wê he vông ge.

*Kiyang pilepacên lec xomxo ti wê liloo vê vac yuac ge
(Matyu 13:1-9; Mak 4:1-9)*

⁴ Om buc ti lêc xomxo tibeac vac vigwe toto toto ge kituc la vô Yesu, mêgem Yesu nêl kiyang pilepacên ti vô he bêga ên nêbê,⁵ "Xomxo ti kidi mi la ên nêb ob la liloo ngec vê vac yuac. Om liloo i la lê, lêc vê mangwe tô vac môp om xomxo kê di menac lam ya.⁶ Di ya tô lec ngidax wê kibun nipwo tya dô lec ge, om tyip lutibed lêc kibun niluc ma om hiyôv ya i vilôvac di i yib.⁷ Di mangwe tô mi la dô vac hivu kehe om hivu tyip hixôn di hi i yib.⁸ Di mangwe tô mi la dô vac kibun niviha om tyip niviha di vuac nôn niviha 100 100 tiyi kehe toto ge." Yesu nêl bêge vô he dêc nêl ên nêbê, "Xomxo ti ninja obêc yêp ge od i ngô di xovô."

*Yesu nêl kiyang pilepacên kehe kitong
(Matyu 13:10-23; Mak 4:10-20)*

⁹ Mêđ Yesu nue ngivihi kinêg kiyang pilepacên tige kehe vô Yesu. ¹⁰ Om Yesu nêl vô he ên nêbê, "Kiyang lec Anutu môp yuu ben ge yêp xôpacên lê, lêc Anutu nêb ob hilung kehe vô xam ên xam xovô. Di xomxo baba ge ngô kiyang tiyi xocbê kiyang pilepacên pileva, om he yê lê, lêc yêvôen nôn ti ma, di he ngô kiyang lê, lêc xovôen kehe ma.

¹¹ "Kiyang pilepacên tyo kehe bêga nêbê vê ge Anutu kiyang. ¹² Di vê wê tô vac môp ge, ge tiyi xocbê xomxo ngô Anutu kiyang lê, lêc lutibed Seten lam vô vêl ên he nilô, ên nêb he i o lêc vông i vin Anutu di i vô he vêl ên nipaên lêm. ¹³ Di vê wê tô mi la dô lec ngidax wê kibun nipwo tya dô lec ge, ge tiyi xocbê xomxo ngô xolac di vông i vin lutibed hixôn xéyaa niviha tax tyaa, lêc he tiyi xocbê ngec wê ngilôhô maên ge, ên he vông i vin nipwo tya lêc Seten yaxên he ge od he sea vông vinêng lutibed. ¹⁴ Di vê wê tô mi la dô vac hivu kehe ge, ge tiyi xocbê xomxo ngô xolac mi dô lê, lêc he nilô xovô susu nivihaviha kibun ga yuu mone hixôn viyin ya wê ob tulec he ge om hivun xolac xôn di nôn ma. ¹⁵ Di vê wê tô mi la dô vac kibun niviha ge, ge tiyi xocbê xomxo wê ngô xolac mi xovô di hôm pilihu hixôn nilô yuu xovôen niviha, om he le xêkizêc ta di vô nôn tibeac.

*Kiyang pilepacên lec lam
(Mak 4:21-25)*

¹⁶ "Xomxo ti obêc byêx ngwax vac lam ge od ob lax dêg lec me vun vac pêt ngibi lêm. Nge, ob yu i yux seac ên xomxo wê ob lam vac xumac nilô ge, he i lam yê xêseac. ¹⁷ Ên kiyang vihati wê yêp xôpacên ge obêc lam le seac, di kiyang vihati wê yêp vac nilô ge obêc hivelac lec mi nôn lam le seac.

¹⁸ "Mêgem kiyang wê xam ngô ge, xam vyac xovô niviha lê. Ên xomxo wê xovô kiyang mi hôm pilihu ge od Anutu obêc kipyax tibeac lec hixôn vô i. Lêc xomxo wê o xovô kiyang mi hôm pilihu lêm ge od nipwo tya wê dô vô i ge, Anutu obêc vô vêl."

*Yesu tae lie
(Matyu 12:46-50; Mak 3:31-35)*

¹⁹ Yesu tae lie val ên nêb ob la vô Yesu, lêc tiyiên ma ên tibii tibeac kitucma om kisuu Yesu lec. ²⁰ Om xomxo ya nêl vô Yesu ên nêbê, “Tame lime val le vixun ên nêb ob yê ông.” ²¹ Lêc Yesu nêl vô he ên nêbê, “Xomxo wê ngô Anutu xolac dì vông i vô nôn lec ge, ge wê tu a tage lige ge.”

*Yesu nêl om lea viyiiên tip la
(Matyu 8:23-27; Mak 4:35-41)*

²² Buc ti lê lêc Yesu he nue ngivihi lec dipac ti di Yesu nêl vô he ên nêbê, “Il ob la mia luaên vilu ganê.” ²³ Om he la lê, lêc Yesu yêp mêt lea viyiiên mabu ti val om vông mia vuac mabu tiyi wê ob pup lec dipac dì kipyax he la vac mia ge. ²⁴ Om nue ngivihi la tipi vô Yesu dì nêl ên nêbê, “Xomxo levac, il ob la xib ga.” Om Yesu

kidi lec dì piping lea yuu mia vuacên dì i tip la dì mia vô malehe lec. ²⁵ Mêgem Yesu nêl vô nue ngivihi ên nêbê, “Xam vông vinên tyo nôn tina?” Mêgem he xona dì yetac mabu dì nêl vÔma ên nêbê, “Xomxo tiga letya lêc nêl via lec lea yuu mia dì i vô ninya lehe vô i dì tip la lutibedê?”

*Yesu tii vimwo nipaên vêl ên xomxo ti
(Matyu 8:28-34; Mak 5:1-20)*

²⁶ Yesu he nue ngivihi loc mi la tibii Gegesa ben wê yêp mia luaên vilu ganê ge dì Galili ge yêp mia vilu. ²⁷ He mila lop vêl ên dipac di xomxo ti vac vigwe tige val vô Yesu. Vux tige vimwo nipaên dô vac i nilô mi vông i piyôp vô yacyac om buc mahigun dia tige o mi vinyum vinyumên ti lêm, dì sea ben viyangtôv yuu xumac wê ob yêp vac ge dì la mi yêp vac vigwe wê xomxo yev yibêñ vac ge. ²⁸⁻²⁹ Om xomxo mi ku i vigê yuu vixa xôn ya sen dì yê i xôn mi dô lê, lêc buc tibeac vimwo nipaên ngigax i xêkizêc dì tax sen tip sea dì kô i mi la vac vigwe myadongêñ. Mêt xomxo tyo yê Yesu dì la yev vixa vô i, dì Yesu piping vimwo nipaên nêb i loc vêl ên xomxo tyo. Om xomxo tyo iac mabu dì nêl ên nêbê, “Yesu, ông ge Anutu lag puunê nu ông, lêcom ông ob vô va vô a? A kitaa ông bê ông o lêc vông a vô nipaên lêm.”

³⁰ Mêt Yesu kinêg vô i ên nêbê, “Ông lêm le?” Lêc tyo nêl ên nêbê, “A lêg kehe nêbê kidu levac.” Nêl lê bêge, ên vimwo nipaên tibeac dô vac i nilô. ³¹ Mêt vimwo nipaên tigee kitaa Yesu ên nêbê, “Ông o lêc tii xe la vac Seten ben nipaên lêm.”

³² Bwoc kidu levac dìya mi le lec kitôn tige, om vimwo nipaên tigee kitaa Yesu ên nêb i vông he la dô vac. Om Yesu tyuc lec, ³³ dì vimwo nipaên tigee lam la vêl ên xomxo tyo dì la dô vac bwoc tyoe nilô, mêt bwoc tyoe tup mi la dì la vac vigwe madia dì la tô vac mia luaên dì num mia mi yib mima vêl.

³⁴ Mêt xomxo wê mi viac bwoc tyoe ge yê wê bwoc la yib mima vêl ge, om pec mi la, dì mila nêl kitong vô tibii vac vigwe levac hixôn vigwe nipwo viyang viyang ge. ³⁵ Om tibii wê ngô kiyang ge la ên nêb ob la yê han, mêtgem he mila vô Yesu lêc yê wê xomxo ti wê vimwo nipaên dô vac i ge, vimwo nipaên lop mi la vêl dì i dô hixôn piyôp niviha dì vinyum ngakwi lec dì xeedô kwabo vô Yesu dì ngô Yesu kiyang. Om he yê tige dì xona mabu. ³⁶ Mêtgem xomxo wê dô mi yê wê Yesu tii vimwo nipaên vêl ên xomxo tige mi vông i vô niviha lec ge, nêl i tiyi wê he yê ge kitong vô

tibii wê val gee hixôn. ³⁷ Om tibii Gegesa vihati kitaa Yesu ên nêb i loc vêl ên he ben. He nêl bêge ên he xona mabu, mègem Yesu lec dipac ên nêb ob lax mi la. ³⁸ Léc xomxo ti wê Yesu tii vimwo nipaên vêl ên i ge, lam kitaa Yesu ên nêb ob la hixôn, léc Yesu vông i lax mi la ben di nêl vô i ên nêbê, ³⁹ “Ông lôc mi loc bom di loc nêl do levac wê Anutu vông vô ông ge kitong vô xomxo vihati.” Mègem xomxo tyo lax mi la ben di la nêl kiyang wê Yesu vông i vô niviha lec ge kitong vô xomxo vihati.

*Jailas nu vêx, di vêx yidac ngwe, yuu kiyang
(Matyu 9:18-26; Mak 5:21-43)*

⁴⁰ Yesu lax mi la mia luaên vilu Galili ge nang, léc xomxo tibeac dibin i mi xeedô, om he xêyaa vô niviha ên wê Yesu vena ge. ⁴¹ Mèd xomxo levac ti lê nêbê Jailas val vô Yesu. Jailas ge wê tu levac di mi viac lie Yuda hixôn xumac liло ge, léc lam yev vixa kitu vô Yesu di kitaa i ên nêbê i loc vac i ben, ⁴² ên nu byac vông yidac levac ti mi vô kwabo lec wê ob yib ge. Nu byac tige tibed di i klismas 12.

Om Yesu la hixôn Jailas mi yuu la, léc xomxo tibeac lam vuac lec Yesu. ⁴³ Mèd vêx ti dô vac he mahigun, léc vêx tige, yidac kwatuacêñ vông i tiyi klismas 12, léc o ma lêm, di vêx tyo vông i mone la mima vô docta lê, léc ti o tiyi wê ob vông i vô niviha lec ge lêm. ⁴⁴ Mègem vêx tyo val le vô Yesu nîmi di vyax vigê lec Yesu ngakwi myahipu mègem lutibed hi tyo kwep lec. ⁴⁵ Mèd Yesu nêl ên nêbê, “Letya vyax vigê lec a?” Léc xomxo vihati nêl lax ên nêbê, “Maê, xe ga maê.” Mègem Pita nêl ên nêbê, “Xolac kehe, xomxo tibeac le i ngivina ông di vigwe tocêñ ma, om letya yêvô ti wê vyax vigê lec ông ge?” ⁴⁶ Léc Yesu nêl lax ên nêbê, “Ti vyax vigê lec a, om a yaxêñ léc xêkizêc la vêl ên a.” ⁴⁷ Mègem vêx tige xovô nêbê o tiyi wê ob yax i vun ge lêm, om la hixôn ni yetacêñ mi la yev vixa vô Yesu di nêl i kehe wê vyax vigê lec Yesu ge kitong di nêl lec wê i yidac ma lutibed ge kitong hixôn, di xomxo tigee vihati yê hixôn. ⁴⁸ Mègem Yesu nêl vô i ên nêbê, “Nuge, vông vinêñ wê ông vông ge, ge wê vông ông vô nimviha lec. Om ông lôc hixôn nilôm niviha.”

⁴⁹ Yesu gên dinêl kiyang mi dô, di xomxo ti vac Jailas ben val nêl vô Jailas ên nêbê, “Num byac yib gwêba, mègem le i léc vông yuac levac vô xolac kehe mi i lam lêm.” ⁵⁰ Mèd Yesu ngô kiyang tige di nêl vô Jailas ên nêbê, “Le nilô i vô viyin lêm. Nge, ông vông i vin mô, ên num ge ob vô niviha lec.” ⁵¹ Mègem Yesu mila Jailas ben lêc nêl vô xomxo vihati ên nêb he i dô vixun, dêc kô Pita yuu Jon di Jems di nu tige ta yuu ma hixôn di he la vac xumac lôma. ⁵² Mèd xomxo vihati byag mi vông tilôt ên vêx tyo mi dô, léc Yesu nêl vô he ên nêbê, “Byagén i ma, ên vêx ge o yib lêm. Nge, ici va yêp.” ⁵³ Léc xomxo tigee nap lec Yesu kiyang ên he xovô ên he nêbê vêx ge yib vêl. ⁵⁴ Méléc Yesu la hôm lec vêx tyo vigê di nêl via levac ên nêbê,

“Byac, kidi lec.” ⁵⁵ Mègem vêx tyo myakilôhô lax mi la vac ninivi di i kidi lec lutibed mi dô, di Yesu nêl ên nêbê, “Xam vông yaén ti mi i ya.” ⁵⁶ Mèd vêx tyo ta yuu ma yetac mabu ên wê nu kidi lec ge, léc Yesu nêl vô yuu ên nêbê, “Muu o lêc nêl ga kitong vô xomxo ti lêm.”

*Yesu vông yuac vô nue ngivihi
(Matyu 10:5-15; Mak 6:7-13)*

¹ Yesu tyuc nue ngivihi vigê yuu dì tô mi la yuu la vô i dì vông xêkizêc wê i vông ge vô he ên nêb he i loc tii vimwo nipaên vêl ên xomxo dì vông xomxo yidac i vô niviha lec. ² Mêd Yesu vông he la ên nêb he i loc nêl Anutu ben yuu môp kitong vô xomxo i tiyi vigwe vihati dì vông he wê yidac gee i vô niviha lec. ³ Mêd nêl vô he ên nêbê, “Xam o lêc kô susu ya hixôn lêc loc vô môp lêm, xocbê pitoa yuu vixec dì yaên yuu mone dì vinyumên yuu lêm. Nge, xam loc ya vigêm pileva dì vinyumên tibed. ⁴ Di xam obêc mila vac vigwe ti mi la dô vac xumac ti ge od xam dô vac xumac tige tibed i tiyi buc wê xam ob dô ge. Pyap dêc xam sea vigwe tige dì loc bangwe. ⁵ Lêc xam obêc mila vac vigwe ti lêc xomxo viyang tige o hôm xam lec niviha lêm ge od xam liloo vijuva vêl ên vixam ên i nêl he nêñ nipaên kitong vô he dì loc.” ⁶ Om Yesu nue ngivihi la vac vigwe viyang viyang ge dì la nêl xolac vac vigwe toto ge dì vông xomxo yidac vô niviha lec.

*Helot ngô kiyang lec Yesu
(Matyu 14:1-2; Mak 6:14-16)*

⁷ Hizap levac Helot ngô kiyang wê xomxo mi nêl lec Yesu ge lêc vông i nilô vô juda juda, ên xomxo ya nêl ên nêbê Yesu ge Jon Lipacêñ wê yib ge lêc kidi lec nang, ⁸ dì xomxo ya nêl ên nêbê ge plopete Ilaija wê dô ilage om vena nang, di he ya nêl ên nêbê ge plopete ilage ti kidi lec vac yibêñ. ⁹ Mêd Helot nêl ên nêbê, “Jon Lipacêñ ge wê a kitov i kwa ilage, lêcom xomxo letya tiganê lêc tibii dinêl kiyang tibêge lec i?” Om Helot myag ên nêb ob yê Yesu.

*Yesu vet xomxo 5,000
(Matyu 14:13-21; Mak 6:30-44; Jon 6:1-13)*

¹⁰ Mêd nue ngivihi wê Yesu vông he la yuac ge vena nêl he yuac kitong vô Yesu. Om Yesu kô heche va dêc sea xomxo baba dô dì he la vac vigwe ti lê nêbê Betsaida. ¹¹ Lêc xomxo ngô wê he la ge om timu vô Yesu he nue ngivihi vixa dêc mila vô he, mêd Yesu xêyaa vô niviha ên wê he mila ge, om nêl Anutu ben yuu môp kitong vô he dì vông he wê yidac ge vô niviha lec. ¹² He dô dì vigwe huc om nue ngivihi vigê yuu dì tô mi la yuu la nêl vô Yesu ên nêbê, “Vông xomxo tigae i loc, ên he i loc vac vigwe viyang viyang ge ên loc kisuu yaên dì loc yêp, ên vigwe ga, vigwe myadongêñ.” ¹³ Lêc Yesu nêl vô he ên nêbê, “Xacxam va ob vông yaên vô he mi he i ya.” Lêc he nêl lax vô Yesu ên nêbê, “Xe xom yaên ga o tibeac lêm, blet vigê vilu dì beac yuutyabed. Lêcom ông nêb xe la kisuu yaên vô xomxo tibeac tigae, me?” ¹⁴ He nêl bêge ên xomxo tigee tibeac hiwocêñ mègem vux vaci, he 5,000.

Mêgem Yesu nêl vô nue ngivihi ên nêbê, “Xam vông he i loc dô kidu kidu i tiyi xomxo kehe yuu dì vigê yuu (50).” ¹⁵ Om he vông tibii la dô i tiyi wê Yesu nêl ge. ¹⁶ Mêgem Yesu hôm blet vigê vilu ge hixôn beac yuu ge dì lax ma la lag kisiinê dêc kitaa lec blet yuu beac dì hibu mi vông vô nue ngivihi ên nêb he i kô mi loc titang vô xomxo tyoe. ¹⁷ Mêd xomxo vihati ya i den he dêc nue ngivihi la kituc myapiipu wê gên dô ge mi su vac sepac vigê yuu dì tô mi la yuu mi i pup lec.

*Pita nêl Yesu kitong nêb i Kilisi
(Matyu 16:13-28; Mak 8:27-9:1)*

¹⁸ Buc ti Yesu he nue ngivihi la dô vac vigwe ti, mêt Yesu vaci kitaa vô ma Anutu mi dô. Pyap dêc kinêg vô nue ngivihi ên nêbê, “Xomxo mi nêb a letya?” ¹⁹ Mêt he nêl lax vô i ên nêbê, “Ya nêbê ông ge Jon Lipacên, di ya nêbê ông Ilaija, di ya nêbê ông plopete ilage ti lêc ông kidi lec vac yibén mi dô gwêbaga.” ²⁰ Mêt Yesu nêl vô he ên nêbê, “Di xacxam va nêb a letya?” Méléc Pita nêl ên nêbê, “Ông ge Kilisi wê Anutu vông ông lam ge.” ²¹ Mêt Yesu nêl kiyang xêkizêc vô he nêbê he i o lêc nêl i kitong vô xomxo ti lêm, ²² di nêl vô he ên nêbê, “A, Xomxo Nu, a obêc kô myavinê levac mabu, di he Yuda levac levac hixôn xomxo levac wê mi si daa vô Anutu gee hixôn he wê xovô Moses xolac gee, he obêc vô nîmi vô a di hi a xib, di buc yon obêc la vêl lêc a obêc kidi lec magviha i tii vac nang.”

²³ Mêt Yesu nêl vô he vihati ên nêbê, “Xomxo ti obêc nêb timu vô a kiyang ge od i vông i vô nipwo lec i tiyi buc vihati di kilê viyin i tiyi xochê kilê xax pola ge mi timu vô a vixag. ²⁴ Ên xomxo ti obêc viac ici va ninivi nîviha ên nêb ob dô mavîha ge od kinu hixôn ninivi obêc yib. Lêc xomxo ti obêc sea ninivi lec a lêg ge od obêc dô mavîha luta. ²⁵ Ên xomxo ti obêc kituc susu kibun ga vihati tuixe, lêc ici va obêc yib mi la vac nipaén ge od obêc vô nîviha vô i tibêna? ²⁶ Ên xomxo ti obêc vô nîmi vô a hixôn a xolac ge od a, Xomxo Nu, a êno obêc vô nimig vô i lec buc wê a obêc lop mi lôm hixôn xêseac wê Mag Anutu yuu angela ngibua vông ge. ²⁷ Lêc a ob nêl hixôn nôn vô xam bê xam wê xam le ga, xam ya ob dô mi wê wê Anutu nu ob lam tu king ge lê dêc wib timuén.”

*Yesu nîvihi pilepac
(Matyu 17:1-13; Mak 9:2-13)*

²⁸ Yesu nêl kiyang tige pyap dêc da ti la vêl mêt kô Pita yuu Jon yon Jems mi he la lec kiôñ ti ên Yesu nêb ob la kitaa. ²⁹ Om Yesu kitaa mi dô, lêc nîvihi pilepac mi vô bangwe di i ngakwi vô makwem ta di tee lec vigwe. ³⁰⁻³¹ Mêt lutibed xomxo yuu lam hixôn xêseac mi lam le hixôn Yesu di yon keac. Ge Moses yuu Ilaija, om yuu nêl lec môp wê Yesu ob la vông gê Jelusalem di nêl lec wê ob sea kibun ga ge.

³² Pita yon li yuu manôñ vô yêp yêp lê, lêc yon manôñ seac di yon yê xêseac wê Yesu vông ge di yê xomxo yuu wê le hixôn i ge. ³³ Pyap mêt xomxo yuu ge nêl vô Yesu ên nêb yuu ob la, lêc Pita nêl vô Yesu ên nêbê, “Xolac kehe, ga nîviha wê il dô ga, om xen ob lox xumac yon, ông nêm ti, di Moses nêñ ti di Ilaija nêñ ti.” Pita lungêñ kiyang wê ob nêl ge om nêl kiyang bêge pileva.

³⁴ Pita gên nêl kiyang tige dêc viyobtoc ti lam hivun he xôn om yon xona. ³⁵ Mêt vyâ ti lam vac viyobtoc di nêl ên nêbê, “Ge a nug wê a vinoo i ge om xam ngô i vyâ.” ³⁶ Vyâ nêl pyap mêt yon yê wê Yesu tibed xeele ge. Mêt vô buc tigee yon o nêl kiyang wê yon yê ge kitong vô xomxo ti lêm.

*Yesu tii vimwo nipaén vêl ên xomxo ti
(Matyu 17:14-21; Mak 9:14-29)*

³⁷ Vigwe vidiién titige he sea kitôñ di lax mi la, lêc mila vô xomxo tibeac wê dival vô môp ge, ³⁸ mêt xomxo ti vac he mahigun tyuc vyâ levac ên nêbê, “Xolac kehe, a kitaa ông bê ông wê a nug vux tiga lê, ên a nug nôn tibed ga mêt. ³⁹ Lêc buc tibeac vimwo nipaén ti hôm i xôn di vông i iac

mabu dì vô pwoo pwoo i mì hi i lec kibun dì mya ngimong lam, om vông i vô nipaên dì o sea i lutibed lêm. ⁴⁰ Om a kitaa nume ngivihi ên a nêb he i tii vimwo nipaên tiga i loc vêl lêc he tiyien ma.”

⁴¹ Mêgem Yesu nêl vô he ên nêbê, “Xam gwêbaga, xam nêm vông vinêñ ma. Xam nilôm gên nipaên. Om a ob dô hixôn xam dì i miloc na lê lêc xam vông i vinê? Di a ob kilê viyin wê xam vông ge dì i miloc na lê? Om kô num tyo mì lamê.” ⁴² Mêd nu tige gên kidi mì lam lêc vimwo nipaên tige hôm i dì nêx i la hi i sea lec kibun. Mêgem Yesu lec ni vô vimwo nipaên tige mì tii i la vêl dì vông nipwo tyo vô niviha lec dì vông i lax vô ma. ⁴³ Om xomxo tigee vihati yê dì yetac mabu ên xêkizêc levac wê Anutu vông ge.

*Yesu nêl kiyang vông lu yuu lec wê obêc yib ge
(Matyu 17:22-23; Mak 9:30-32)*

Xomxo yetac mabu ên môp wê Yesu vông ge, dêc Yesu nêl vô nue ngivihi ên nêbê, ⁴⁴ “Xam vyac vô ninyam vô kiyang wê a ob nêl ga bê xomxo obêc vông Xomxo Nu la vac tibii vigê.” ⁴⁵ Lêc nue ngivihi lungêñ kiyang tyo kehe, ên kehe yêp xôpacêñ om he vyac xovôêñ ma. Lêc he xona ên nêb ob kinêg kiyang tyo kehe vô Yesu lêm.

*Letya ob tu levac?
(Matyu 18:1-5; Mak 9:33-40)*

⁴⁶ Yesu nue ngivihi ngaêñma ên nêb letya ob tu he nêñ levac? ⁴⁷ Lêc Yesu xovô he nilô wê he nêl ge om la kô nipwo ti mi lam lax i le pikeb i, ⁴⁸ di nêl vô he ên nêbê, “Xomxo ti obêc hôm nipwo bêga lec ên wê vông i vin a lêg ge od ge tiyi xochê hôm a lec ge. Di xomxo ti obêc hôm a lec ge od ge tiyi xochê hôm xomxo ti wê vông a lam ge lec hixôn. Ên xomxo wê dô nipwo vac xam mahigun ge, ge wê ob tu xam nêm levac.”

⁴⁹ Mêd Jon nêl vô Yesu ên nêbê, “Xolac kehe, xe xê xomxo ti tii vimwo nipaên vêl ên xomxo lec ông lêm, om xe vibu i nêb i vôngêñ tibêge i ma, ên o mi dô hixôn xe mì timu vô ông lêm.” ⁵⁰ Lêc Yesu nêl vô i ên nêbê, “Xam o lêc vibu i lêm. Ên xomxo wê o vông vevac vô xam lêm ge, ge xam nêm wê ob ngidu xam xôn ge.”

Tibii Samelia o hôm Yesu lec lêm

⁵¹ Buc vô kwabo lec wê Yesu ob lax mì la lag puunê ge, mêd Yesu nêb ob la Jelusalem, ⁵² om vông xomxo ya le mug la. Mêd he mila vac tibii Samelia ben, ên he nêb he ob la yê vigwe ti wê Yesu ob la dô vac ge, ⁵³ lêc tibii viyang tige xovô nêbê Yesu ge xomxo Yuda ti wê nêb ob la Jelusalem ge, om he vibu nêbê Yesu loc vacen he ben i ma. ⁵⁴ Mêd nue ngivihi Jems yuu Jon yê môp wê he vông ge om nêl vô Yesu ên nêbê, “Apumtau, ông nêb xii nêl dì ngwax i lam gê kisii ganê ên ya tibii tigae i ma vêl, me?” ⁵⁵ Mêlêc Yesu pilepac i dì kunac yuu ên kiyang wê yuu nêl ge. ⁵⁶ Pyap dêc he la vigwe bangwe.

*Xomxo wê nêb ob timu vô Yesu ge
(Matyu 8:19-22)*

⁵⁷ He mila vô môp lê, lêc xomxo ti val nêl vô Yesu ên nêbê, “Vigwe wê ông ob la vac ge, a ob loc hixôn ông.” ⁵⁸ Lêc Yesu nêl vô i ên nêbê, “Le i lêc nêl decdec bê ông ob lam hixôn a lêm. Ên lili mi yêp vac yen, di

menac vông liwihi lec xax mi yêp lec, lêc a, Xomxo Nu, a bog wê a ob xêp vac ge ti yêpênen ma.”

⁵⁹ Yesu nêl vô xomxo ngwe ên nêbê, “Lam hixôn a.” Lêc xomxo tige nêl ên nêbê, “Xomxo levac, a ob loc hixôn ông lê, lêc ông vông a lax dô di yev mag vêl lê.” ⁶⁰ Lêc Yesu luu i vya di nêl ên nêbê, “Xomxo yibên i yev yibên, di ông loc nêl Anutu ben yuu môp kitong vô xomxo.”

⁶¹ Xomxo ngwe nêl vô Yesu ên nêbê, “Xomxo levac, a ob loc hixôn ông lê, lêc ông vông a lax bog mi lax nêl kitong vô lige lê.” ⁶² Lêc Yesu nêl vô i ên nêbê, “Xomxo ti obêc nêbê i obêc vông Anutu yuac ge od i o lêc yê manôn i loc ninya ninya lêm, ên ge od o tiyi wê ob tu Anutu nu mi vông i yuac ge lêm.”

10

Yesu vông xomxo kehe yon di vigê yuu (70) la vac yuac

¹ Nang dêc Yesu vînnoo xomxo kehe yon di vigê yuu (70) hixôn mi vông he yuu yuu la vac vigwe titi, ên nêb he i mug mi loc vac vigwe vihati wê Yesu obêc mila vac ge. ² Mêd nêl vô he ên nêbê, “Yaên wê dô vac yuac ge vô nôn tibeac pyap lê, lêc xomxo ti wê ob kô nôn tyo gee yuutyabed, om xam kitaa vô yuac tyo kehe bê i vông xomxo i loc vông yuac ên kituc ixe nôn.

³ “Om xam locê. Lêc xam xovô bê a ob vông xam loc xochê bwoc sipsip nue wê la vac noo vimen mahigun ge. ⁴ Om xam o lêc kô mone yuu vixec di su hixôn lêm, di xam o lêc keac tôt vô xomxo ti vac môp lêm. ⁵ Xam obêc la vac xumac ti ge od xam nêl kiyang tax bêga bê, ‘Kiyang malehe i lam lec xomxo wê dô vac xumac tiga.’ ⁶ Mêd xomxo kiyang malehe obêc dô vac xumac tige ge od kiyang malehe wê xam kitaa lec he ge ob yêp lec he. Lêc obêc ma ge od kiyang malehe obêc lôm vô xacxam va tii vac nang. ⁷ Mêd xumac wê xam obêc dô vac ge, xam dô vac xumac tige tibed, di le i lêc dô tul tul vac xumac tibeac lêm. Nge, xam dô tige mi wa di num wê xomxo ob vông vô xam ge, ên xomxo wê ob vông yuac ge obêc kô nôn lec yuac wê he vông ge.

⁸ “Om xam obêc la vac vigwe ti lêc xomxo hôm xam lec ge od xam wa yaén wê he vông vô xam ge, ⁹ di xam vông he viyang tige wê yidac vông ge i vô niviha lec, di xam nêl vô he bêga bê, ‘Anutu nu kisiinê val pyap vô xam.’”

¹⁰ “Lêc xam obêc mila vac vigwe ti lêc xomxo o hôm xam lec lêm ge od xam lôc mi loc le vac môp, di nêl vô he bêga bê, ¹¹ ‘Xam bom vijuva wê pitii lec xe vixam ge, xe ob liloo i lôc mi loc yêp vô xam. Mêlêc xam xovô bêga bê Anutu nu kisiinê val kwabo pyap.’ Xam nêl bêge vô he. ¹² Om a ob nêl vô xam bê obêc buc timuên wê Anutu ob yaxên xomxo ge, od xomxo viyang tige obêc kô viyin levac luu viyin wê tibii Sodom ob kô ge vêl.”

Viyin lec xomxo wê o vông i vin lêm ge (Matyu 11:20-24)

¹³ Yesu nêl ên nêbê, “Xam tibii Kolasin, xam xona nêm ên viyin wê xam obêc kô ge. Di xam tibii Betsaida, xam éno xona nêm. Ên do levac wê a vông vac xam bom ge, xomxo ti obêc vông bêge vac tibii Taia yuu Saidon ben ilage ge od tibii Taia yuu Saidon obêc pilepac he di lipac viwev lec he

dì dô hixôn nilô viyin ên wê he xovô nêni paen ge. ¹⁴ Léc xam o pilepac xam lêm, om buc tîmuên wê Anutu obêc yaxêni xomxo ge, od xam obêc kô myaviwen nipaen i luu wê tibii Taia yuu Saidon ob kô ge vêl. ¹⁵ Di xam tibii Kapaneam, xam xo ên xam nêb xam ob kô lêm levac mi la dô vac Anutu ben lag puunê? Ma vêl, xam ob la vac vigwe nipaen.”

¹⁶ Mêgem Yesu nêl vô nue ngivihi ên nêbê, “Xomxo ti obêc ngô xam vyam ge od tiyi xochê ngô a vyag. Léc xomxo obêc vô ninya kitu vô xam vyam ge od tiyi xochê he vô ninya kitu vô a vyag, di xomxo wê vô ninya kitu vô a vyag ge tiyi xochê he vô ninya kitu vô xomxo ti wê vông a lam ge vya hixôn.”

Xomxo kehe yon di vigê yuu (70) vena vô Yesu

¹⁷ Xomxo kehe yon di vigê yuu wê Yesu vông he la yuac gee vena hixôn xêyaa niviha di nêl vô Yesu ên nêbê, “Apumtau, xe nêl ông lêm ge od vimwo nipaen vô ninya lehe vô mi la vac xe vyam kwa ngibi.” ¹⁸ Léc Yesu nêl vô he ên nêbê, “A xê Seten tô gê kisii ganê mi lam xochê deac hixelac ge. ¹⁹ Om xam ngô lê. A vông xêkizêc vô xam pyap, om xam tiyi wê xam obêc kê myel yuu kipyêc, di xam obêc pwoo xêkizêc wê Seten vông ge i pec, di susu ti o tiyi wê ob vông xam vô nipaen ge lêm. ²⁰ Vixôhilôg, léc xam o lêc pimil xam bê vimwo nipaen la vac xam kwa ngibi lêm. Nge, xam pimil Anutu ên wê kivuu xam lêm yêp lag puunê ge.”

Yesu pimil ma Anutu hixôn xêyaa niviha (Matyu 11:25-27; Matyu 13:16-17)

²¹ Vô buc tige Myakilôhô Ngibia vông Yesu xêyaa vô niviha di i kitaa vô ma Anutu bêga ên nêbê, “Mag Apumtau, ông lag yuu kibun kehe ông, om a hi vixag pec ên ông, ên ông o vông kiyang tige vô xomxo wê piyôp levac yuu xovônen niviha ge lêm. Nge, ông hilung vô xomxo wê lê nipwo ge. Mag, ông vông ya xovônen wê ôcông va vông ge.”

²² Pyap dêc Yesu nêl ên nêbê, “Mag vông susu ge vihati vô a. Mêlec xomxo ti o xovô nu a lêm. Nge, Mag vaci xovô. Di xomxo ti o xovô Mag lêm. Nge, nu aca va wê a xovô, di xomxo wê a nêb a ob hilung Mag vô he ge, he ob xovô Mag.”

²³ Mêd Yesu pilepac i vô nue ngivihi di nêl vô heche va ên nêbê, “Xam xêmyaa i vô niviha ên wê xam wê môt wê a vông ge. ²⁴ Ên a ob nêl vô xam bê plopete yuu king wê dô ilage, he tibeac nêb ob yê i tiyi xochê xam wê ge lê, lêc he yêen ma. Di he tibeac nêb ob ngô kiyang xochê wê xam ngô ge lê, lêc he ngôen ma.”

Kiyang pilepacên lec tibii Samelia ti

²⁵ Buc ti lêc xomxo wê xovô Moses xolac ge ti kidi lec di nêl kiyang vô Yesu ên nêb ob yaxêni i, om nêl bêga ên nêbê, “Xolac kehe, a obêc vông bêna êdêc dô magviha luta lêc luta?” ²⁶ Léc Yesu nêl lax vô i ên nêbê, “Kiyang wê yêp vac Moses xolac ge, ông kitong lêc nêbê va?” ²⁷ Mêgem xomxo tyo nêl ên nêbê, “Xolac nêl bêga ên nêbê, Ông xêmyaa i vin lec ông Apumtau Anutu di ông vông nilôm yuu kinum di xêkizêc yuu piyôp i loc diluhu vô Anutu, di ông xêmyaa i vin lec xomxo baba i tiyi xochê ông xêmyaa vin lec ôcông va ge.” ²⁸ Mêgem Yesu nêl ên nêbê, “Ông nêl ge niviha pyap, om ông obêc vông bêge ge od ông obêc dô mamviha luta lêc luta.”

²⁹ Léc xomxo tige nêb ob viac i niviha om kinêg vô Yesu ên nêbê, “Kiyang wê nêl ên nêbê il xêdyaa i vin lec xomxo baba ge, ge nêl lec xomxo nae?”

³⁰ Om Yesu nêl kiyang pilepacên ti vô i bêga ên nêbê, “Xomxo ti kidi gé Jelusalem ên nêb ob la Jeliko, om la vô môp mi la, léc tibii yôdac wê mi vun xomxo susu ge hi i vô nipaêñ di lêx i nêl ngakwi sea di kô i susu vihati mi la, dêc xomxo tyo la yêp vac môp di vô kwabo lec wê ob yib ge.

³¹ Léc vô buc tige xomxo wê mi si daa vô Anutu ge ti mila vô môp tige mi la yê lê, léc sea i yêp di luu vêl mi la. ³² Nang dêc xomxo Livai wê mi vông yuac vac Anutu xumac ngibua ge ti mila vô môp tige mi la yê lê, léc sea i yêp di luu vêl mi la.

³³ “Mêd tibii Samelia ti mila vô môp tige om val yê xomxo tyo wê yêp ge, léc xo vigwe pisiv ên i, ³⁴ om la kwabo vô dêc vông malasin wel yuu wain vac xomxo tyo kityax wê tibii vevac hi ge, mi viyum xôn, dêc tung i la lec i bwoc donki mêd kô mi

la vac xumac wê xomxo kisuu di yêp vac ge ti di viac i. ³⁵ Vigwe vidiiêñ mêd tibii Samelia tige vông mone kehe ti vô xomxo ti wê viac xumac tige di nêl vô i ên nêbê, ‘Ông viac xomxo tiga niviha ya mone wê a vông ga, dêc ông obêc vông luu vêl ge od a obêc vena vông vac ông xe wê ông viac xomxo tiga ya ge.’”

³⁶ Yesu nêl bêge dêc kinêg vô xomxo xolac kehe tige ên nêbê, “Om ông xo ên ông nêb xomxo yon ge, tina xêyaa vin lec xomxo ti wê tibii yôdac hi ge?” ³⁷ Léc xomxo tyo nêl lax ên nêbê, “Xomxo ti wê xo vigwe pisiv ên i ge.” Om Yesu nêl vô i ên nêbê, “Om ông lôc, di loc vông môp i tiyi bêge.”

Mata yuu li Malia

³⁸ Mêd Yesu he nue ngîvihi la lêc mila vac vigwe ti wê vêx ti dô vac lê nêbê Mata. Om Mata kô Yesu mi la vac i ben. ³⁹ Léc Mata li vêx ngwe dô lê nêbê Malia, om Malia la dô hixôn Apumtau Yesu mi ngô i kiyang.

⁴⁰ Léc Mata vông yuac levaclec yebac mi vô vîlee vîlee mi vông nilô vô viyin om la nêl vô Yesu ên nêbê, “Apumtau, nii Malia sea a mi vông aca tibed vông yuac lec yaêñ ga. Lêcom mêd ông wê ge niviha? Ông nêl ên i lam vông yuac hixôn a.” ⁴¹ Léc Apumtau nêl vô i ên nêbê, “Mata, Mata, ông vông nilôm la vô susu viyang viyang ge om vông ông nilôm vô viyin lec. ⁴² Mêlêc môp tibed wê ông sea ge. Ge môp niviha wê Malia vông ge, om il obêc vô vêl ên i nang lêm.”

11

Yesu nêl môp kitaaêñ kitong vô nue ngîvihi (Matyu 6:9-15; Matyu 7:7-11)

¹ Buc ti Yesu la kitaa vac vigwe ti, pyap dêc nue ngîvihi ti nêl vô i ên nêbê, “Apumtau, xe nêb ông nêl môp kitaaêñ kitong vô xe i tiyi xochê Jon Lipacêñ nêl vô nue ge.” ² Mêgem Yesu nêl vô he ên nêbê, “Xam obêc kitaa ge od xam kitaa bêga bê,

‘Mag, ông lêm i lam tu ngîbuia. Ông lam tu Apumtau i tiyi vigwe vihati.

³ Ông vông yaêñ vô xe i tiyi buc vihati. ⁴ Xe nêm myavîwen wê yêp vô xe ge ông kitya vêl, xochê xe kitya nêm nipaêñ vêl vîoma ge. Ông o lêc didii xe mi loc vac kiyang wê ob yaxêñ xe ge lêm.’”

⁵ Mêd Yesu nêl vô he ên nêbê, “Xam ti obêc la vô ngidêm ti vô vivuaên mahigun dì nêl vô i ên nêbê, ‘Ngidêg, a val ga vô ông ên a nêbê ông vông blet yon vô a, ⁶ ên a ngidêg ngwe val vô vigwe bucên ty a vô a, lêcom yaên wê a ob vông vô i ge ma.’ ⁷ Lêc ngidêm dô vac xumac nilô di nêl bêga vô ông ên nêbê, ‘Ga vivuaên mahigun dì a tung xumac lec pyap di xe nuge xêp ga mê, om o tiyi wê a ob kidi lec mi vông yaên ti vô ông ge lêm. Mêgem ông lôcê.’ ⁸ Om a ob nêl vô xam bê ngidêm obêc kidi lec mi lam vông yaên vô ông ge od ob vông vô ông ên wê i ngidê ông ge lêm. Nge, obêc vông vô ông ên wê ông kitaa i nginong ge. ⁹ Om a ob nêl vô xam bê xam kitaa susu ya vô Anutu ên Anutu i vông vô xam, di xam myag susu êdêc wêvô, di xam kituu vuayen ên Anutu i tax vuayen ên xam. ¹⁰ Èn xomxo vihati wê kitaa vô Anutu ge obêc kô nôn tiyi wê he kitaa ge, di xomxo vihati wê myag susu ge obêc yêvô, di xomxo vihati wê kituu vuayen ge od Anutu obêc tax vuayen ên he.

¹¹ “Xame, xam nume ti obêc kitaa xam nêb ob ya pis ge od xam obêc vông myel vô, me? ¹² Me nume ti obêc kitaa xam ên nêb xam vông kokilêx nulen vô i ge od xam obêc vông kipyêc vô, me? Maê. ¹³ Xam ga xomxo kibun nimpaên, lêc xam mi vông susu nivihaviha vô nume, om xam xovô bêga bê il Mag Anutu lag puunê nêb ob vông susu nivihaviha luu vêl vô il om ob vông Myakilôhô Ngibua vô xomxo wê kitaa i ge.”

*Xomxo nêl ên nêbê Yesu vông yuac ya xêkizêc wê Seten vông ge
(Matyu 12:22-30; Mak 3:20-27)*

¹⁴ Yesu tii vimwo nipaên ti vêl ên xomxo ti. Vimwo tyo vông xomxo tige dô yac dì keacêñ ma, om buc wê Yesu tii vimwo tyo la vêl ge od xomxo tyo keac, dì xomxo wê yê gee yetac mabu. ¹⁵ Lêc xomxo ya nêl ên nêbê, “Bielsebul wê tu vimwo nipaên nêb levac ge vông xêkizêc vô Yesu, om Yesu tii vimwo nipaên vêl ya xêkizêc wê Bielsebul vông ge.” ¹⁶ Dì xomxo ya nêb ob yaxêñ Yesu, om nêl vô i ên nêbê, “Xe nêb ông vông do levac ti mi xe xê ên i nêl kitong bê ông kô xêkizêc vô Anutu lag puunê.” ¹⁷ Lêc Yesu xovô kiyang wê yêp vac he nilô ge om nêl vô he ên nêbê, “Xomxo viyang ti obêc hibuma sea mi hima ge od ob dô nivîha nang lêm. Me xomxo xumac ti obêc hibuma sea mi hima ge od obêc vông he vô nipaên. ¹⁸ Bêge mêgem Seten he lie obêc hibuma sea mi hima ge od xêkizêc wê he vông ge ob yêp nivîha tibêna? Ge he ob dô nipaên. A nêl bêge ên wê xam nêl ên xam nêbê a tii vimwo nipaên la vêl ên xomxo ya xêkizêc wê Bielsebul vông ge. ¹⁹ Lêc a ob kinêg vô xam bê a obêc tii vimwo nipaên vêl ya xêkizêc wê Bielsebul vông ge od letya wê vông xêkizêc vô lime lêc he tii vimwo nipaên vêl ya ge? Ge lime vaci ob yaxêñ kiyang wê xam nêl ge lê. ²⁰ Lêc Anutu vaci obêc vông xêkizêc vô a dì a tii vimwo nipaên la vêl ge od xam xovô bêga bê Anutu lam tu levac vac xam mahigun pyap.

²¹ “Xomxo xêkizêc ti obêc hôm susu vevac vac vigê dì dô bin i xumac ge od susu wê i vông ge ob dô nivîha. ²² Lêc xomxo ngwe wê xêkizêc luu vêl ge obêc val vông vevac vô i dì nginoo vêl ge od ob vô susu vevac wê xomxo tige xo nêb ob ngidu i xôn ge vêl, dêc kô susu wê xomxo tige vông ge vihati mi la titang vaxvax vô lie ya.

²³ “Om a ob nêl bêga bê xomxo ti obêc dô hixôn a mi ngidu a xôn lêm ge od ge tiyi xochê vông vevac vô a. Dì xomxo wê o viû vô xomxo hixôn a lêm ge od ge tiyi xochê tii he moo sea ge.

*Vimwo nipaén vena i tii vac nang
(Matyu 12:43-45)*

²⁴ “Vimwo nipaén ti obêc lam la vêl ên xomxo ti ge od ob la vilee vac vigwe myadongên mi la myag vigwe ti wê ob la dô seac vêl vac ge. Lêc yêvôen vigwe ti obêc ma ge od ob nêl bêga bê, ‘A ob lax mi la dô vac bog wê a sea dî lam ge i tii vac nang.’ ²⁵ Om vimwo tige obêc lax mi la vô xomxo ti wê i dô vac ilage mi lax yê wê pityep mi viac niviha ge, ²⁶ od obêc la kô vimwo nipaén wê nêni nipaén luu i vêl ge vigê vilu dî sec yuu, lêc he xôn lax dô vac xomxo tige, dî vông i vô nipaén levac luu viwen tax ge vêl.”

Môp wê xomxo ob dô hixôn xêyaa niviha ge

²⁷ Yesu nêl kiyang tige vô xomxo tibeac, lêc vêx ti tyuc vya levac vac he mahigun ên nêbê, “Ông tam ti wê kô ông mi vông lul vô ông ge, i dô hixôn xêyaa niviha.” ²⁸ Lêc Yesu nêl ên nêbê, “Bêge mêlêc a nêl bê xomxo wê ngô Anutu kiyang mi viac ge wê ob dô hixôn xêyaa niviha.”

*Xomxo nêb he ob yê do levac
(Matyu 12:38-42; Mak 8:12)*

²⁹ Xomxo tibeac lam kitucma mi dô, mêtgem Yesu nêl vô he ên nêbê, “Xomxo gwêbaga, xomxo nipaén nôn. He nêb he ob yê do levac lê, lêc a ob nêl bê he ob yê do tibeac lêm. Nge, do tibed wê he ob yê ge, tiyi xochê wê Jona vông ilage. ³⁰ Ên môp wê Jona la dô vac lili gwec nilô tiyi buc yon ge, ge Anutu hilung vô tibii Niniva tiyi xochê do levac ge. Bêge mêtgem a, Xomxo Nu, a obêc tu do levac bêge vô xomxo gwêbaga êno.

³¹ “Om obêc buc timuén wê Anutu obêc titô xomxo ge, od vêx levac wê tu tibii Siba nêni kwin vac buc ilage ge obêc kidi lec hixôn xam wê xam dô gwêbaga di nêl xam nêm nipaén kitong. Ên vêx tige kidi vac kibun myahipu dî lam ên nêb ob lam ngô kiyang wê King Solomon nêl hixôn piyôp niviha ge. Di gwêbaga a wê a luu Solomon vêl ge a lam dô hixôn xam lê, lêc xam o ngô a vyag lêm. ³² Om obêc buc timuén wê Anutu obêc titô xomxo ge, od tibii Niniva êno obêc kidi lec hixôn xam wê xam dô gwêbaga di nêl xam nêm nipaén, ên ilage tibii Niniva ngô kiyang wê Jona nêl vô he ge di pilepac he, di gwêbaga a wê a luu Jona vêl ge a lam dô hixôn xam, lêc xam o pilepac xam lêm.

*Kiyang pilepacén lec lam
(Matyu 5:15; Matyu 6:22-23)*

³³ “Xomxo ti obêc byêx ngwax vac lam ge od ob vun vac pêt ngibi me lax dêg lec xôn lêm. Nge, ob lax i le lec tevol kisii ên xomxo wê ob lam vac xumac nilô ge i lam yê xêseac. ³⁴ Xam mamnôn tiyi xochê lam wê linac lec nimnivi ge, om mamnôn obêc dô niviha ge od obêc vông nimnivi vihati dô vac xêseac, lêc xam obêc vông mamnôn vô nipaén ge od nimnivi vihati obêc mapitoc. ³⁵ Om xam viac xam êdêc xêseac wê dô vac xam ge i o lêc vô mapitoc lêm. ³⁶ Ên nimnivi vihati obêc dô vac xêseac di mapitoc ma ge od nimnivi obêc xêseac niviha xochê lam xêseac linac lec ông ge.”

*Môp nipaén wê he Palisi hixôn xomxo wê xovô Moses xolac gee vông ge
(Matyu 23:1-36; Mak 12:38-40; Luk 20:45-47)*

³⁷ Yesu nêl kiyang tige pyap dêc Palisi ti val nêl vô Yesu nêb i loc ya hixôn i, om Yesu la vac Palisi tyo ben mi la dô hixôn i mi ya. ³⁸ Lêc Palisi

tyo yê wê Yesu diya ge lê, lêc o lipac vigê tax tiyi xocbê môp wê he Palisi mi vông ge lêm, om yetac mabu.³⁹ Lêc Yesu nêl vô i ên nêbê, “Xam Palisi ge, xam mi lipac nimnivi pileva tiyi xocbê xam lipac kap yuu pile nimi ge, dom xam nilôm ge, môp yôdac yuu nipaên pup lec.⁴⁰ Xam tibii piyôp maên. Anutu ti wê tung il nidnivi ge o tung il nilôd hixôn lêmê?⁴¹ Om a ob nêl vô xam bê xam vông susu wê dô vac pile yuu kap nilô ge vô xomxo wê nêñ susu maên ge ên i loc ngidu he xôn. Xam obêc vông bêge ge od xam nêm môp vihati obêc vô paha lec.

⁴² “Om xam Palisi ge, xam xona nêm ên viyin wê ob val vô xam ge. Ên xam nêb xam ob timu vô Moses xolac vihati, om xam obêc tulec susu xocbê lehac yuu ngec nipwopwo ge od xam mi tung kidu vigê yuu lêc mi vông kidu ti la tu daa vô Anutu. Xam mi vông bêge lê, lêc xam sea môp bôbac yuu môp xêyaa vin lecén Anutu. Om a ob nêl bê xam o lêc vông môp ngwe vô niviha di sea ngwe lêm. Nge, xam vông yuu xôn i vô niviha.

⁴³ “Xam Palisi, xam xona nêm ên viyin wê obêc tulec xam ge. Ên buc wê xam la vac xumac lilo ge, od xam yong xam ên xam nêb xam ob dô lec sia niviha vô xomxo manôn, di buc wê xam la vîlee lec wetôv ge od xam nêb xomxo vihati i pimil xam ya vya niviha.

⁴⁴ “Mêgem xam xona nêm ên viyin wê obêc tulec xam ge. Ên xam nilôm tiyi xocbê lôva wê le vac kibun nilô mi xomxo len yêp vac ge, mêlêc xomxo tibeac lungêñ di xoc vô kisii mi la om vông he vô nipaên.”

⁴⁵ Mêgem xomxo wê xovô Moses xolac ge ti nêl vô Yesu ên nêbê, “Xolac kehe, kiyang wê ông nêl ge, ge ông nêl nipaên lec xe hixôn.”⁴⁶ Lêcom Yesu nêl vô he ên nêbê, “Xam wê xam xovô Moses xolac ge, xam xona nêm ên viyin wê obêc tulec xam ge. Ên xam nêl kiyang tibeac vô xomxo ên xam nêb he i timu vô, om xam lii viyin levac lec he, lêc xam vigêm o kilê viyin tige hixôn he lu ya lêm.

⁴⁷ “Om xam xona nêm ên viyin wê obêc tulec xam ge. Ên mame bume tivame, he hi plopete yib, lêc gwêbaga xam divunac vô lôva wê plopete yêp vac ge.⁴⁸ Om môp tibêge nêl xam kitong ên nêbê xam xêmyaa vô niviha ên môp wê bume vông ilage, ên bume hi plopete yib, lêc gwêbaga xam vunac vô lôva wê plopete yêp vac ge.

⁴⁹ “Mêgem Anutu wê xovôêñ kehe ge nêl bêga ên nêbê, ‘A ob vông plopete yib sinale i loc vô he lê, lêc he obêc vông viyin vô he dêc hi he ya yib.’⁵⁰ Om xomxo wê dô gwêbaga, he ob kô myavîwen nipaên lec wê he hi plopete yib ge. Ge nêl lec plopete vihati yang, he wê dô vô buc taxlee ilage wê Anutu tung lag yuu kibun ge di i val tyip lec buc gwêbaga hixôn.⁵¹ Kiyang tige lec Ebel wê taxlee ge di i val tyip lec plopete Sekalaia ti wê bume hi i yib vac xumac ngibua yuu alta mahigun ge. Vixôhilôg, a ob nêl hixôn nôn vô xam bê xomxo gwêbaga ob kô myavîwen nipaên lec môp gee vihati.

⁵² “Om xam wê xam xovô Moses xolac ge, xam xona nêm ên viyin wê xam ob kô ge. Ên môp wê xomxo ob ngô xolac kehe ge, xam le vac xôn, ên xacxam va lungêñ xolac kehe om xam le vac môp xôn ên xomxo wê nêñ ob ngô mi xovô ge.”

⁵³ Yesu nêl pyap dêc sea Palisi tyo ben di loc mi la, dêc he wê xovô Moses xolac gee hixôn he Palisi yê Yesu nipaên om he le kinêg kiyang

viyang viyang vô i ⁵⁴ ên nêb ob yaxêb bêc obêc nêl kiyang ti so ge od ob vông i loc vac kot.

12

Xona nêm ên kiyang kityooên (Matyu 10:26-27)

¹ Vô buc tige xomxo tibeac hiwocên la kitucma vô Yesu, om he la pup lec vigwe xochbê ob dô lecma vixa hixôn, dêc Yesu nêl vô nue ngivihi tax ên nêbê, “Xam viac xam ên môp nipaên wê Palisi mi vông ge, ên he mi viyum kiyang nipaên vac kiyang niviha, om môp tige tiyi xochbê yis wê ob vông blet vuac mi vô levac ge. ² Ên kiyang vihati wê yêp xôpacên ge obêc lam le seac, di kiyang vihati wê yêp vac xomxo nilô ge obêc hivelac lec di xomxo vihati xovô. ³ Om kiyang vihati wê xam nêl vô bucên ge od xomxo obêc ngô vô vidiién, di kiyang vihati wê xam kimuna vôma vac xumac lôma ge od obêc nêl i vô levac lec wetôv.

Xomxo i xona ên Anutu tibed (Matyu 10:28-31)

⁴ “Xam lige, a ob nêl vô xam bê xam o lêc xona ên xomxo wê ob hi xam nimnivi yib ge lêm, ên he o tiyi wê obêc vông viyin yaya vô xam hixôn timuén ge lêm. ⁵ Lêc a ob nêl xomxo ti wê xam ob xona ên ge kitong vô xam bê Anutu tibed wê obêc hi xomxo yib, dêc obêc timuén ge xêkizêc wê i vông ob nêx xomxo la vac vigwe nipaên. Om a nêl vô xam bê xam xona ên i tibed.

⁶ “Xam xovô ên xam nêbê xomxo ti obêc kisuu menac nipwo vigê vilu ge od obêc kisuu ya mone nipwo tiyi xochbê mone hi yuubed ge. Bêge mêlêc Anutu o lungên menac nipwopwo gee lêm. Nge, xovô gee vihati. ⁷ Di Anutu o lungên xam êno lêm. Nge, kitong xam bamzub lihi vihati pyap. Om xam xonaên i ma, ên Anutu xêyaa vin lec xam nginoo menac vihati vêl.

Il ob nêl Yesu kitong vô xomxo (Matyu 10:19-20,32-33; Matyu 12:32)

⁸ “A ob nêl vô xam bê xomxo ti obêc nêl a kitong vô xomxo ge od a, Xomxo Nu, a ob nêl i kitong vô Anutu nue angela. ⁹ Lêc xomxo ti obêc yax a vun vô xomxo manôn ge od a obêc yax i vun vô Anutu nue angela manôn êno bêge.

¹⁰ “Xomxo ti obêc so vya vô a, Xomxo Nu ge od tiyi wê Anutu obêc kitya nipaên tige vêl ge. Lêc xomxo ti obêc so vya vô Myakilôhô Ngibua ge od o tiyi wê Anutu ob kitya i nêl nipaên tige vêl ge lêm.

¹¹ “Mêd buc wê xomxo obêc kô xam mi la vô xomxo levac vac xumac lilo me gavman ti me xomxo levac ti ge od xam o lêc xona di xo bêga bê ‘Xe ob luu he vya ya kiyang tina, di xe ob nêl kiyang bêna vô he?’ Le i lêc xo kiyang tibêge lêm. ¹² Ên obêc hiyôv manôn myabo tya ge od Myakilôhô Ngibua ob hilung kiyang wê xam ob nêl ge vô xam.”

Kiyang pilepacên lec xomxo wê mone tibeac ge ti

¹³ Xomxo ti vac xomxo tibeac mahigun nêl vô Yesu ên nêbê, “Xolac kehe, ông nêl vô a lig ngwe ge bê i vông susu wê mag vigê ge viwen vô a.” ¹⁴ Lêc Yesu nêl vô i ên nêbê, “Letya vinoo a nêb a titô xam nêm kiyang mi vông

byed vô xam susu? Ge yêp vô xacxam va.” ¹⁵ Mêgem Yesu nêl vô he vihati ên nêbê, “Xam xona nêm ên mamdoên vô susu viyang viyang ge, ên susu tibeac wê xomxo vông ge o tiyi wê ob vông he dô maviha ge lêm.”

¹⁶ Mêgem Yesu nêl kiyang pilepacên ti vô he bêga ên nêbê, “Xomxo wê susu levac ge ti dô, lêc yuac wê i vông ge vô nôn tibeac, ¹⁷ om xo bêga ên nêbê, ‘A ob vông bêna? Ên xumac wê a ob kituc susu vihati nôn vac ge tiyiên ma.’ ¹⁸ Om nêl bêga ên nêbê, ‘A ob vông môp bêga bê a ob dii xumac wê a kituc susu nôn vac ge mì lox xumac levac pileva ên kituc yaén nôn yuu susu vihati wê a vông ge i loc dô vac. ¹⁹ Pyap dêc a ob xo bêga bê a kituc susu tibeac dì obêc dô tiyi klismas tibeac om a ob dô seac vêl mì xa di num hixôn xêgyaa niviha.’ ²⁰ Mêlec Anutu nêl vô i ên nêbê, ‘Ông xomxo piyôp maên. Bucên hig ge ông obêc wib, om susu tibeac wê ông kituc ge obêc tu letya xe?’”

²¹ Mêgem Yesu nêl ên nêbê, “Kiyang tige tiyi xochbê xomxo ti kituc susu tibeac tu ici va xe lêc o xovô Anutu lêm om Anutu yê i tiyi xochbê xomxo pileva ti.”

*Il ob vông il nilôd i vô viyin lêm
(Matyu 6:25-34)*

²² Yesu nêl vô nue ngivihi ên nêbê, “Bêge mêgem a ob nêl vô xam bê xam o lêc vông nilôm i vô viyin lec yaén wê xam ob wa ge yuu ngakwi wê xam ob vinyum ge lêm, ²³ ên môp wê il ob dô madviha ya ge luu susu yaén vêl, dì il nidnivi luu ngakwi vêl.

²⁴ “Om xam xovô menac lê. Ên menac o xin vê vac yuac lêm, dì he o kô yaén nôn vac yuac lêm, di he nêl xumac wê ob kituc yaén vac ge ti o le lêm. Mêlec Anutu vet he tiyi buc vihati. Di Anutu xêyaa vin lec xomxo nginoo menac gee vêl om ob viac xam niviha. ²⁵ Xame, xam ti obêc xo kiyang tibeac nêb xam ob dô mamviha ge od tiyi wê xam ob tul lec buc wê ob dô maviha ge i loc dia, me? ²⁶ Ma vêl, xam o tiyi wê xam ob vông bêge ge lêm. Om bêna lêc xam xo kiyang tibeac lec susu ninivi xen?

²⁷ “Dì xam xovô nita wê vuac maviya ge. Maviya o duu nivimihî lêm, di he o vông yuac ti lec ngakwi lêm, lêc a ob nêl vô xam bê vunac vunac wê he vông ge luu vunac vunac niviha wê King Solomon vông ge vêl. ²⁸ Nita wê vuac maviya mi le vac yuac gwêba dì obêc titige pisaên vêl ge od ob nêx i la vac ngwax, lêc Anutu vunac vô he niviha. Mêgem xam xovô bêga bê Anutu ob viac xam niviha luu nita maviya vêl. Lêc vông vinêwê xam vông ge o xêkizêc lêm. ²⁹ Om xam o lêc vông nilôm i loc vô susu yaén yuu numên lêm, me xam o lêc vông nilôm i vô viyin lec lêm. ³⁰ Ên tibii madiluhu ge wê vông nilô la vô susu ninivi xen ge, dom Mag Anutu xovô susu wê ma vô xam ge. ³¹ Mêgem xam vông nilôm i loc vô Anutu xolac yuu ben tibed lê, ge od Anutu obêc vông susu bêge vô xam hixôn.

*Kiyang lec susu niviha lag puunê
(Matyu 6:19-21)*

³² “Xam kidu nipwo tya ga, xam xona ên i ma. Ên Mag Anutu xovô pyap nêb xam ob tu xomxo levac hixôn i vac i ben lag puunê. ³³ Om xam vông susu wê xam vông ge mì tibii i kisuu, dêc xam vông mone vô tibii wê nêb susu maên ge ên i vô niviha vô he. Dêc xam kituc susu nivihaviha i loc yêp lag puunê i tiyi xochbê mone yêp vac kilong niviha ge. Ên susu wê yêp

lag puunê ge, tibii yôdac ti obêc vun lêm, dì gwaakivac yuu susu nippaa ti obêc vông i vô nipaên lêm. ³⁴ Èn vigwe wê susu nivihaviha wê xam vông ge la dô vac ge, xam ob vông nilôm la vô vigwe tige.

Nue yuac i le maviha

³⁵ “Xam viac xam dêc xam vêx let lec dì byêx ngwax vac lam, ³⁶ dì xam dô i tiyi xochbê tibii yuac wê dô bin xomxo levac wê ob vena vac vizid ge, ên xomxo tyo obêc vena hi vigê lec vuayen ge od he i tax xumac lutibed. ³⁷ Om xomxo levac tyo obêc vena yê wê nue yuac dô maviha dì yêpêñ ma ge od ob hi vixa pec ên he. A ob nêl hixôn nôn vô xam bê xomxo levac tyo obêc vêx nivimihî tiyi wê nue yuac mi vinyum ge dì vông he dô kidu ti dêc ici va obêc titang yaên vô he. ³⁸ Dì xomxo levac tyo obêc vena vô vivuaén mahigun me obêc vô kwabo lec wê kokilêx ob vô via ge, lêc nue yuac obêc dô dì yêpêñ ma ge od ob hi vixa ên he.

³⁹ “Xam xovô lê. Xomxo ti wê i xumac ge obêc xovô buc wê tibii yôdac ob val lec ge od ob dô maviha mi bin i xumac êdêc tibii i o lêc loc vac i ben nilô mi vun i susu lêm. ⁴⁰ Om xam êno viac xam mi dô bin buc wê a Xomxo Nu obêc vena lec ge, ên buc wê xam obêc xovô lêm ge wê a obêc vena lec ge.”

Kiyang pilepacêñ lec nue yuac niviha yuu nipaên (Matyu 24:45-51)

⁴¹ Pita kinêg vô Yesu ên nêbê, “Apumtau, ông nêl kiyang pilepacêñ ga vô xecxe va, me ông nêl vô xomxo vihati?” ⁴² Lêc Yesu nêl ên nêbê, “Xomxo yuac letya wê viac yuac hixôn piyôp niviha ge? Xomxo levac obêc vinoo i ên nêb i viac lie yuac vihati dì vông yaên vô he i tiyi buc vihati. ⁴³ Om xomxo levac tyo obêc vena yê wê nu yuac tige viac yuac wê i vông ge niviha ge od ob hi vixa ên i. ⁴⁴ A ob nêl hixôn nôn vô xam bê xomxo levac tige obêc vông nu yuac tyo tu levac mi viac susu wê i vông ge vihati. ⁴⁵ Lêc nu yuac tige obêc xo bêga vac nilô bê, ‘Tibii levac la dô ilatikwê dì o vena lutibed lêm’, om loc hi lie yuac vêx yuu vux, dì ya di num levac dì mav ge ⁴⁶ od xomxo levac obêc vena lec buc wê nu yuac tige lungên di o dô bin i lec ge lêm, om xomxo levac obêc vông myaviwen vô i dì vông i la dô hixôn tibii wê o vông i vin lêm ge.

⁴⁷ “Tibii yuac ti obêc xovô môp wê i tibii levac vông vô i ge lêc o viac mi vông i vô nôn lec lêm ge od levac tyo obêc pisa i vô nipaên. ⁴⁸ Lêc tibii yuac ti obêc lungên môp wê i tibii levac nêb i vông ge, dêc vông ti so tiyi wê ob kô myaviwen nipaên lec ge od tibii tyo obêc vông myaviwen nipwo tya vô dì hiên i luu vêlén ob ma. Èn xomxo wê kô susu tibeac vô Anutu ge, ge wê Anutu nêb i vông myaviwen tibeac vac. Dì xomxo obêc vông susu tibeac vô xomxo ti ên nêb i vông yuac ya ge od he obêc nêl nêbê, ‘Ông vông susu vô xe i luu vêl vac.’”

Yesu yuac obêc hibu xomxo la yuu (Matyu 10:34-36)

⁴⁹ Yesu nêl bêga ên nêbê, “A lam ên a nêb a ob lii ngwax i yêp kibun ga, om a nilôg xo ên a nêbê i tum lutibed. ⁵⁰ Mêlêc viyin ti vô kwabo lec wê a ob kilê ge, lêc gên o val lêm, om a ob dô hixôn nilôg viyin levac dì i miloc vô buc wê viyin tyo obêc lam la vêl ge lê. ⁵¹ Xam xo ên xam nêb a lam ên a nêb a ob vông kiyang malehe i yêp gê kibun ga, me? Ma vêl,

a lam ên a nêb xomxo i hibu he sea lec a. ⁵² Om gwêbaga dì obêc buc timuên hixôn ge od obêc môp bêga bê xomxo vigê viulu vac xumac ti obêc hibuma sea lec a lêg, lêc yuu dô kidu ngwe dì yon dô kidu ngwe. ⁵³ Om he obêc hibuma, dì ma yuu nu vux ob yêma nipaên, dì ta yuu nu vêx ob yêma nipaên, dì vêxta yuu yen vêx ob yêma nipaên.”

*Môp wê il ob xovô susu wê ob val timuên ge
(Matyu 16:2-3)*

⁵⁴ Pyap dêc Yesu nêl vô xomxo gee vihati ên nêbê, “Xam obêc wê mapitoc ti le vac viyobtoc ge od xam mi nêl ên xam nêbê lun ob val, dêc vixôhilôg, lun val tiyi xocbê xam nêl ge. ⁵⁵ Dì buc wê lea ob val ge od xam nêl ên xam nêbê hiyôv ob linac niviha, dêc vixôhilôg, hiyôv linac i tiyi wê xam nêl ge. ⁵⁶ Lêcom xam tibii kityooên, ên xam wê susu wê dô vac lag ge lê, lêc xovô niviha, di bêna lêc xam dilungên môp wê Anutu vông gwêbaga vô xam mamnôn ge?”

*Il ob titô nêd kiyang
(Matyu 5:25-26)*

⁵⁷ Yesu nêl ên nêbê, “Bêna lêc xam o vyac xovô môp niviha mô lê? ⁵⁸ Xomxo ti obêc kô ông mi muu la kiyang ge od muu hi kiyang i yib lutibed vac môp wê muu gên loc ge, êdêc i o lêc vông ông loc le vô hizap manôn dêc hizap i vông ông loc vô xêhipu mi xêhipu i vông ông loc kalabuhu lêm. ⁵⁹ A ob nêl vô ông bê ông ob la dô vac kalabuhu dì hi myaviwen vihati i ma vêl lê.”

13

Xomxo wê o pilepac he lêm ge obêc yib

¹ Vô buc tige xomxo ya val vô Yesu mi val nêl xomxo Galili kitong vô i. Ge nêl lec he Galili ti wê he dihi bwoc sipsip ên he nêb ob si i tu daa vô Anutu lê, lêc gavman levac Pailat vông nue lam hi he dì kipyax he hi sea hixôn bwoc hi. ² Mêgem Yesu nêl vô he ên nêbê, “Xam xo ên xam nêbê Galili tigee, he vông nipaên luu lie Galili vêl om he yib lec he nêl nipaên. ³ Lêcom a ob nêl vô xam bê he o yib lec ngwe bêge lêm. Lêcom xam xovô bê xam obêc pilepac xam lêm ge od xam obêc wib bêge êno. ⁴ Di xomxo Jelusalem vigê yuu dì vixa vilu di sec yon (18) wê xumac vixa dia kipê mi hi he yib gê Siloam ge, xam xo ên xam nêbê he vông nipaên luu lie Jelusalem baba vêl om he yib lec he nêl nipaên. ⁵ Lêcom a ob nêl vô xam bê he o yib lec kehe bêge lêm. Lêcom xam xovô bê xam obêc pilepac xam lêm ge od xam obêc wib bêge êno mê.”

Kiyang pilepacên lec xax ti wê nôn ma ge

⁶ Yesu nêl kiyang pilepacên ti vô he ên nêbê, “Xax kwacsung ti le vac xomxo ti yuac om xomxo tyo la yê ên nêb ob la yul nôn, lêc nôn ma, ⁷ om nêl vô xomxo ti wê mi viac i yuac ge ên nêbê, ‘Ngô lê. A lam ga tiyi klismas yon ên a nêb a ob yul kwacsung tiga nôn lê, lêc nôn ti o yux lec lêm. Om ông vuv vêl ên i o vô kibun hizi vêl vaxvax lêm.’ ⁸ Lêc xomxo viacên tige nêl vô i ên nêbê, ‘Vông i le klismas ngwe ga hixôn dì a den kibun yuu kô bwoc yaa mi tung vac kehe mi xê lê. ⁹ Dì klismas ngwe timuên u ob xê lê, lêc vuac ge od i le, lêc vuacên ma ge od ông nêl dì a vuv vêl.’”

Yesu vông vêx ti vô niviha lec vô buc sabat

¹⁰ Vô buc sabat ti Yesu nêl xolac vô xomxo vac xumac lilo ti. ¹¹ Lêt vêx ti dô hixôn he, dì vimwo nipaên dô vac i ni'lô dì vông yidac vô i tiyi klismas vigê yuu di vixa vilu di sec yon (18). Om vêx tyo nimi kizêc len gec om o tiyi wê ob le bôbac ge lêm. ¹² Lêt Yesu yê vêx tyo om keac i lam di nêl vô i ên nêbê, "Vêx, a vông ông yidac la vêl." ¹³ Mêgem vyax vigê lec i di lutibed vêx tyo le bôbac di pimil Anutu.

¹⁴ Lêt xomxo levac ti wê viac xumac lilo ge ni nyag vô Yesu ên wê vông vêx tige vô niviha lec vô buc sabat ge, om nêl vô xomxo tibeac gee ên nêbê, "Buc vigê vilu di sec ti yêp wê il ob vông yuac lec ge om xam ti obêc vông yidac ge od xam lam lec buc yuac ên xomxo i vông xam vô nimviha lec, di xam o lêc lam lec buc sabat lêm." ¹⁵ Lêt Apumtau Yesu luu i vya ên nêbê, "Xam tibii kityooên, ên xam mi la vac bwoc ben di la piwelac xam kau yuu donki lec buc sabat di dìdii he mi la vô mia ên xam nêb he i num. ¹⁶ Lêt vêx tiga Eblaham bue ti, lêt Seten ku i xôn tiyi klismas vigê yuu di vixa vilu di sec yon (18), om a piwelac viyin tige vêl ên i lec buc sabat. Lêt mêt xam wê ên xam nêb môt tibêge o niviha lêm?" ¹⁷ Yesu nêl bêge om xomxo wê yê i nipaên ge ni yoc ên he, di xomxo vihati gee he xêyaa vô niviha ên do levac vihati wê Yesu vông ge.

*Kiyang pilepacêñ lec vixôô yuu yis
(Matyu 13:31-33; Mak 4:30-32)*

¹⁸ Yesu nêl ên nêbê, "Anutu ben kehe ge tiyi vatya? A ob tixuu lec kiyang ti. ¹⁹ Ge tiyi xocbê vixôô nôn nulen wê nipwo lee tya, lêt xomxo ti kô mi la nêx vac yuac mêt nôn tyo tyip mi vô levac di menac viyang viyang lam vông liwihi lec ngen mi dô lec."

²⁰ Nang dêc Yesu nêl ên nêbê, "Anutu ben kehe ge, a ob tixuu lec va?

²¹ Ge tiyi xocbê yis nipwo tya wê vêx ti pilepac hixôn plaua levac om vông plaua vuac mi vô levac ge."

*Kiyang lec môt wê xomxo ob la vac Anutu ben ge
(Matyu 7:13-14,21-23)*

²² Yesu la ên nêb ob la Jelusalem, lêt la vac vigwe levac yuu nipwo toto mi la nêl xolac vô xomxo. ²³ Lêt xomxo ti kinêg i ên nêbê, "Apumtau, xomxo wê Anutu obêc kô he mi he la dô maviha ge, obêc yuu tya, me?" Om Yesu nêl vô he ên nêbê, ²⁴ "Xam vông yuac xêkizêc êdêc vac loc vac vuayen nipwo. Ên xomxo tibeac obêc xo ên nêb he ob la vac vuayen nipwo tige lê, lêt tiyiên ma wê he ob la vac ge. ²⁵ Ên xomxo wê i xumac ge obêc kidi mi lam tung xumac lec, om xam ob le vixun di kituu vuayen di nêl bêga bê, 'Apumtau, tax vuayen ên xe.' Lêt obêc nêl vô xam bêga bê, 'Xam lam gê na? Xam ge a lungên xam.' ²⁶ Lêt xam obêc luu i vya bêga bê, 'Xe ga wê il mi xa mi mi dô, di ông mi nêl xolac vô xe vac xe bom ge.' ²⁷ Lêt obêc nêl vô xam bêga bê, 'Xam ge a lungên xam. Xam ge tibii nipaên, om xam loc vêl ên a magnôn.' ²⁸ Om xam obêc wê bume Eblaham yuu Aisak di Jekop hixôn plopete vihati wê he la dô vac Anutu ben, dom xam ge wê Anutu obêc tii xam la dô vixun, di xam obêc byag di kic nivum lecma. ²⁹ Di tibii obêc kidi vac vigwe ninja vilu vilu di viwen wê hiyôv tyip lam ge di viwen wê hiyôv hoo la ge, mi la ya di dô vac Anutu ben. ³⁰ Om xam wê lê. Tibii wê xam nêb he timuén ge ya ob lam la mugên, di xomxo wê mugên ge ya obêc lôm la timuén."

*Yesu xo vigwe pisiv ên xomxo Jelusalem
(Matyu 23:37-39)*

³¹ Vô buc mahigun tige Palisi ya val nêl vô Yesu ên nêbê, “Ông sea vigwe ga dì lam loc bangwe, ên Helot nêb ob hi ông wib.” ³² Léc Yesu nêl vô he ên nêbê, “Xam loc nêl vô tibii kityooën tige bêga bê gwêbaga dì titige wê a obêc tii vimwo nipaên vêl ên xomxo dì vông xomxo yidac i vô niviha lec, dì duuma ge wê a obêc tiyôô yuac. ³³ Léc gwêbaga dì titige dì duuma ge wê a ob la, ên plopete wê xomxo hi he yib ge, he o yib vac vigwe ya lêm. Nge, he yib vac vigwe Jelusalem tibed.

³⁴ “Di xam Jelusalem, xam ge wê xam hi plopete yib, dì xomxo wê Anutu vông i loc vô xam ge, od xam nêx he ya ngidax. Buc tibeac ge a vông ên a nêb a ob kituc xam lôm vô a tiyi xochê kokilêx wê mi kituc nue lax vac vinihi ngibi ge, lêc xam nêb a vôngên i ma. ³⁵ Om xam ngô lê. Anutu obêc sea xam bom i dô xel. Di a ob nêl vô xam bê xam ob wê a i tii vac nang lêm, dì i miloc vô buc wê xam obêc nêl bêga bê ‘Il ob pîmil xomxo ti wê tu Apumtau manôn mi val ge.’”

14

Yesu vông xomxo yidac ti vô niviha lec

¹ Buc sabat ti Yesu la vac Palisi levac ti xumac mi la ya hixôn i, lêc xomxo wê dô gee diiyê i xôn. ² He dô lê, lêc xomxo wê ninivi vô vuac vuac ge ti val vô Yesu, ³ om Yesu kinêg he wê xovô Moses xolac gee yuu he Palisi wê dô gee ên nêbê, “Tiyi wê il ob vông xomxo wê yidac ge i vô niviha lec vô sabat, me?” ⁴ Lêc he o luu kiyang ti lax vô i lêm, om Yesu la hôm xomxo yidac tyo dì vông i vô niviha lec dì vông i loc mi la. ⁵ Mêgem Yesu nêl vô xomxo gee ên nêbê, “Xam nume ti me bwoc ti obêc tô lôva madia lec buc sabat ge od tiyîen ma wê xam ob pul i lôm lutibed lec sabat ge, me?” ⁶ Lêc he o luu kiyang ti lax vô Yesu lêm.

Xomxo i o lêc yong he bê he xomxo levac lêm

⁷ Yesu yê xomxo wê lam ya vac Palisi tyo ben ge, lêc yê wê he ya yong he nêb he ob dô lec sia niviha wê xomxo levac mi dô lec gee, om Yesu nêl kiyang pilepacên ti vô he ên nêbê, ⁸ “Xomxo ti obêc nêl ông la vac vizid ti ge od ông o lêc yong ông mi loc dô lec sia niviha wê xomxo levac ob dô lec ge lêm. Ên xomxo levac ngwe obêc val ge ⁹ od xomxo ti wê myêl vizid tige obêc nêl vô ông bê, ‘Kidi lec mi loc dô ganê dì vông sia vô xomxo levac tige mi i dô lec,’ di ông nim obêc yoc ên wê ông la dô timuên.

¹⁰ “Om xomxo ti obêc nêl ông la vac vizid ti ge od ông loc dô timuên ti lê, lêc xomxo ti wê myêl vizid tige obêc nêl vô ông ên nêbê, ‘Ngidêg, lam dô lec sia niviha ga’ od ông obêc tu xomxo levac ti vô xomxo gee manon. ¹¹ Ên xomxo ti obêc yong i nêb i xomxo levac ge od Anutu obêc yê i xochê xomxo pileva, lêc xomxo ti obêc vông i vô nipwo ge od Anutu obêc pîmil i dì vông i lê vô levac.”

¹² Pyap dêc Yesu nêl vô Palisi ti wê myêl vizid tige ên nêbê, “Ông obêc myêl vizid ge od ông o lêc nêl tame mame lime ngidême, me xomxo wê susu tibeac ge i lam lêm, ên he ge wê he obêc myêl vizid nang mi vông myaviwen vac vô ông. ¹³ Nge, ông obêc myêl vizid ge od ông tyuc xomxo wê nênsususmaen hixôn he wê o xekizêc lêm di he wê vixa nipaên hixôn

he wê ma tocên gee i lam. ¹⁴ Xomxo tigee o tiyi wê ob vông myaviwen vac vô ông ge lêm, lêc Anutu ob vông myaviwen niviha vô ông vô buc timuên wê xomxo niviha ob kidi lec vac yibêng ge om ông ob dô hixôn xêmyaa niviha.”

*Kiyang pilepacên lec vizid
(Matyu 22:1-10)*

¹⁵ He gên ya mi dô vac Palisi tyo ben, lêc xomxo ti vac he mahigun ngô kiyang wê Yesu nêl lec vizid ge om nêl vô Yesu ên nêbê, “Xomxo wê ob la ya mi dô vac Anutu ben lag puunê ge obêc dô hixôn xêyaa niviha.” ¹⁶ Lêc Yesu nêl kiyang pilepacên vô i bêga ên nêbê, “Xomxo ti nêb ob myêl vizid levac ti om vông kiyang la vô xomxo tibeac ên nêb he i lam ya. ¹⁷ Om buc wê ob ya yaén ge od vông nu yuac ti la nêl vô xomxo wê ob lam vac vizid ge ên nêbê, ‘Yaén noc pyap, om xam lam ên lam wa.’

¹⁸ “Lêc he toto nêl lax vô i ên nêbê he laên ob ma. Om ti nêl vô i ên nêbê, ‘A kisuu kibun ti, om a ob la xê, om ông lôc nêl vô tibii levac bê o tiyi wê a ob loc ge lêm.’ ¹⁹ Di ti nêl vô i ên nêbê, ‘A kisuu bwoc kau vigê yuu om a ob la tixuu mi xê bêc obêc vông yuac niviha, om ông lôc nêl vô xomxo levac bê o tiyi wê a ob loc ge lêm.’ ²⁰ Di ti nêl ên nêbê, ‘A kô vêx paña ti om a locên ob ma.’

²¹ “Mêgem nu yuac tyo lax mi la nêl kitong vô i xomxo levac, mêd xomxo levac tyo ngô di xêyaa vô myavinê di i nêl vô nu yuac tyo ên nêbê, ‘Ông loc tup vô môt levac yuu nipwo vihati vac vigwe levac ga di tyuc xomxo wê nênsusu maên hixôn he wê o xêkizêc lêm ge di he wê vixa nipaên hixôn he wê manôn tocên gee vihati i lam.’ ²² Om nu tyo la vông i tiyi dêc lôm nêl vô i ên nêbê, ‘A vông i tiyi wê ông nêl ge lê, lêc vigwe gên o pup lec lêm.’

²³ “Mêgem xomxo levac tyo nêl vô i ên nêbê, ‘Om ông loc vô môt nipwopwo wê la vac yuac ge vihati di loc kidu xomxo vihati ên he i lam pup lec a xumac. ²⁴ Lêc a nêl vô ông bê xomxo wê a tyuc he taxlee lêc he o lam lêm ge, ti ob ya vizid wê a vông ge hixôn lêm.’”

*Kiyang lec xomxo wê nêb ob timu vô Yesu ge
(Matyu 10:37-38)*

²⁵ Xomxo tibeac hiwocên timu vô Yesu vixa mi he la, lêc Yesu pop i di nêl vô he ên nêbê, ²⁶ “Xomxo ti obêc nêb timu vô a xolac, lêc vông nilô lax vô tae mae lie di vinêe nue di ici va, di o vông nilô la diluhu vô a lêm ge od o tiyi wê ob tu a nug ge lêm. ²⁷ Di xomxo wê o kilê viyin lec tiyi xochê kilê xax pola ge mi timu vô a lêm ge, ge o tiyi wê ob tu a nug ge lêm.

²⁸ “Om xam ngô lê. Xam ti obêc xo ên xam nêb xam ob lox xumac vixa dia ti ge od i dô mi xovô bê mone dô i tiyi wê ob lox xumac tige ya di i pyap ge, me? ²⁹ Obêc xovô bêge tax lêm ge od obêc yev teac vac pyap, lêc o tiyi wê ob lox xumac tige pyap ge lêm, di xomxo vihati ob yê di so vya vô ông ³⁰ di nêl bêga nêbê, ‘Xomxo tige nêb ob lox xumac lê, lêc o lox i pyap lêm.’”

³¹ “Di kiyang ngwe, king ti wê nue vevac 10,000 ge nêb ob la vông vevac vô king ngwe wê nue vevac 20,000 ge od i dô mi xovô bêga bê xêkizêc wê nue vông ge tiyi wê obêc nginoo king ngwe wê nue 20,000 ge vêl ge, me he tiyiên ma. ³² Lêc obêc xovô bê tiyiên ma ge od king ngwe ge i gên dô teva di i vông xomxo mangwe i loc ên he i viac kiyang bê vevac obêc ma.

³³ “Kiyang bêge, mègem xam xovô bê xam ti obêc vô nimim vô susu wê i vông ge vihati lêm ge od o tiyi wê ob tu a nug ge lêm.

*Kiyang pilepacên lec sol
(Matyu 5:13; Mak 9:50)*

³⁴ “Sol ge niviha, lêc obêc vô nyen maên ge od il obêc vông bêna vô ên i vô nyen i tii vac nangê? ³⁵ Èn sol wê nyen maên ge o niviha tiyi wê il ob vông yuac ya ge lêm, om il ob nêx i la xel. Xam ninyam obêc yêp ge od xam ngô dì xovô.”

15

*Kiyang pilepacên lec bwoc sipsip ti
(Matyu 18:12-14)*

¹ Tibii nipaên wê mi kô takis gee hixôn tibii nipaên yaya, he tibeac la vô Yesu ên nêb ob ngô i vya. ² Lêc he Palisi yuu xomxo wê xovô Moses xolac gee yê dì vô mya nipaên vô dì nêl ên nêbê, “Xomxo tya ganê kô tibii nipaên lec dì ya mi dô hixôn he.”

³ Mègem Yesu nêl kiyang pilepacên ti vô he ên nêbê, ⁴ “Xam ti obêc viac bwoc sipsip 100 lêc ti xôa obêc ma ge od obêc sea sipsip 99 gee i le dì lax myag ti wê xôa ma ge. ⁵ Dì obêc yêvô ge od obêc kilê lec kidiac dì lax mi la ben hixôn xêyaa niviha, ⁶ dì lax nêl lie hixôn nipipu ya lam di nêl vô he ên nêbê, ‘Xam lam ên il xôn ob dô hixôn xêdyaa niviha dì pimil a bwoc, ên a bwoc ga xôa ma lê, lêc a la xêvô mi kô mi vena nang.’ ⁷ Kiyang bêge mègem a ob nêl vô xam bê xomxo wê vông nipaên ge ti obêc pilepac i ge od he wê dô kisii ganê obêc hi vixa ên i, nginoo xomxo 99 wê he nêb he vô niviha lec pyap om he ob pilepac he lêm ge.”

Kiyang pilepacên lec mone wê xôa ma ge

⁸ Yesu nêl ên nêbê, “Vêx ti mone vigê yuu, lêc ti xôa ma om byêx ngwax vac lam dì pityep xumac nilô dì myag. ⁹ Myag lêc yêvô om nêl lie hixôn nipipu ya lam dì nêl vô he ên nêbê, ‘Xam xêmyaa i vô niviha hixôn a, ên a mone xôa ma, lêc a xêvô i tii vac nang.’ ¹⁰ Kiyang bêge om a ob nêl vô xam bê xomxo wê vông nipaên ge ti obêc pilepac i ge od Anutu nue angela obêc hi vixa ên i tiyi xochê vêx tige hi vixa ên mone wê yêvô ge.”

Kiyang pilepacên lec nu ngivihi ti wê sea ma di la ge

¹¹ Yesu nêl vô he ên nêbê, ‘Xomxo ti do, dì i nu tuc yuu nu mòn. ¹² Lêc nu mòn nêl vô ma ên nêbê, ‘Mag, kibun yuu mone wê ông nêl a lêg lec ge, a ob kô vihati.’ Om ma vông byed vô susu vô yuu, om nu tuc kô viwen dì nu mòn kô viwen. ¹³ He o dô buc xuhu dia lêm. Nge, dô nipwo tya, lêc nu mòn viduba i susu hixôn mone wê ma vông vô i ge vihati dì loc mi la vigwe teva ti, dì la nêx mone la sea lec môp nipaên. ¹⁴ I nêm mone ma vêl, dì vip mabu yêp vac vigwe tige dì susu ma ên i. ¹⁵ Om la vông yuac vô tibii viyang tige ti, lêc tibii tyo vông i la bwoc ben ên nêb i loc viac i bwoc. ¹⁶ Mêlêc vip den i mabu om xo ên nêb ob ya xax nôn wê bwoc mi ya ge ên i den i, lêc xomxo ti o vông yaén ti vô i mi i ya lêm.

¹⁷ “Mêd i piyôp vô niviha dì i xovô nang, om xo ên nêbê, ‘Nue yuac wê mag vông ge, yaén tibeac dô vô he, dom a va ga, vip obêc den a xib mê. ¹⁸ Mègem a ob kidi mi lax mi la vô mag, mi lax nêl vô bê, ‘Mag, a vông i

so vô Anutu dì vông i so vô ông hixôn, ¹⁹ dì a o nigviha tiyi wê ông ob nêl bê ông num a ge lêm. Om ông vông a tu ông num yuac ti.”’

²⁰ “Nêl kiyang bêge pyap, mêt kidi mi la ên nêb ob lax mi la vô ma, lêc gên mila teva dì ma yê ma la wê nu mòn val ge, om xo vigwe pisiv ên dì tup mi la dì mila kiva xôn. ²¹ Mêt nu mòn nêl vô ma ên nêbê, ‘Mag, a vông i so vô Anutu dì vông i so vô ông hixôn, om a o nigviha tiyi wê ông ob nêl bê ông num a ge lêm.’ ²² Ma ngô lê, lêc nêl vô nue yuac ên nêbê, ‘Xam loc kô ngakwi dia niviha ti mi lam vinyum lec mòn. Di xam kô ling ti mi lam su lec i vigê dì kô su mi lam su lec i vixa xôn. ²³ Di loc kô bwoc kau nu wê gên ligên niviha ge ti mi lam hi, ên il ob xa hixôn xêdyaa niviha, ²⁴ ên a nug tiga xocbê la yib ila lê, lêc gwêbaga dô mavilha, dì xôa ma ila lê, lêc gwêbaga il xêvô i nang.’ Om he myêl vizid mi ya dì dô hixôn xêyaa niviha.

²⁵ “Di nu tuc la dô vac yuac dì val vô kwabo vô xumac lêc val ngô wê he yoo ge, ²⁶ om keac nu yuac ti lam dì kinêg vô i ên nêbê, ‘Xam vô va?’ ²⁷ Lêc nu yuac tige nêl ên nêbê, ‘Lim mòn val gwêba, om mam hi bwoc kau nu wê gên ligên niviha ge ti mi myêl vô lim mòn ên wê la dô lê, lêc vena niviha vô i ge.’ ²⁸ Li tuc ngô lêc xêyaa vô myavinê om nêb ob la vô ma yuu li mòn vac xumac lôma lêm. Om ma lop mi lam vixun dì lam viac kiyang vô nu tuc. ²⁹ Lêc nu tuc nêl lax vô ma ên nêbê, ‘A ga wê a vông yuac levac vô ông tiyi klismas tibeac dì a o pwoo ông vyam ti vac lêm, lêc ông o nêl a lêg lec bwoc vimek nu ti ên xe lige myêl mi xa dì dô hixôn xêmyaa niviha lêm. ³⁰ Di num mòn ge wê kô ông mone mi la vông i la lec vêx yôdac lê, lêc gwêbaga vena om ông hi bwoc levac wê lig niviha ge ti vô i.’

³¹ “Mêt ma nêl vô nu tuc ên nêbê, ‘Tuc, u mi dô ga luta, om susu wê a vông ge vihati tu ông xe. ³² Di gwêbaga il vihati ob dô hixôn xêdyaa niviha ên wê lim mòn vena ge, ên xôa ma ila om il xê xocbê la yib ge, lêc la dô mavilha om vena gwêbaga dì il xê i manôn nang.’”

16

Kiyang pilepacêñ lec tibii yuac nipaêñ ti

¹ Nang dêc Yesu nêl vô nue ngivihi ên nêbê, ‘Xomxo susu tibeac ti dô, di nu yuac ti viac i susu, lêc xomxo ya la nêl kitong vô xomxo levac tyo ên nêbê, ‘Num ti wê bin ông yuac ge mi vông ông susu yuu mone la vax vax.’

² Om xomxo levac tige keac nu yuac tyo lam dì kinêg vô i ên nêbê, ‘Ông vông bêna lêc a ngô xocbê kiyang yêp vô ôngê? Ông loc kivuu a susu wê ông viac ge vihati lec kipihac ti dêc vông i lam ên a xê, ên ông ob viac a yuac i tii vac lêm.’

³ “Om nu yuac tyo xo bêga ên nêbê, ‘Om a ob vông bêna? Ên xomxo levac obêc tii a vêl ên i yuac gwêbaga, lêc xêkizêc wê a vông ge tyiên ma wê a ob kiden kibun ge, dì a nig yoc ên wê a ob kitaa susu vaxvax vô xomxo ya ge. ⁴ Lêcom ga a xovô môp wê a ob vông ge ti, êdêc buc wê xomxo levac obêc tii a vêl ên i yuac ge od xomxo ya i kô a mi loc vac ben dì viac a.’ ⁵ Om môp wê xovô ge bêga ên nêbê keac tibii wê i xomxo levac myaviwen yêp vô ge he toto lam, dêc kinêg ti wê val taxlee ge ên nêbê, ‘Ông kô susu vaba vô xomxo levac lêc myaviwen gên yêpê?’ ⁶ Om xomxo tyo nêl vô i ên nêbê, ‘Ge a kô wel vac dlam 100.’ Om nu yuac tyo

nêl vô i ên nêbê, ‘Hôm kipihac wê ông myaviwen yêp lec ge dî kivuu ông myaviwen i tô mî loc xocbê dlam wel 50.’⁷ Nang dêc xomxo ngwe val om nu yuac tyo kinêg i ên nêbê, ‘Ông myaviwen vaba yêpê?’ Lêc xomxo tyo nêl ên nêbê, ‘Pidi yul 100.’ Om nu yuac tyo nêl vô i ên nêbê, ‘Hôm kipihac ga dî kivuu ông myaviwen bê pidi yul 80.’

⁸ “Om xomxo levac tyo yê môp nipaên wê nu yuac tige vông ge, lêc pimil nu yuac tige ên wê vông môp hixôn piyôp niviha ge. Ên xomxo wê vông nilô la vô susu kibun ga ge, he kô piyôp levac lec môp yuu yuac kibun ga luu xomxo wê dô vac xêseac ge vêl.

⁹ “Om a ob nêl vô xam bê xam ngidu xomxo xôn ya mone yuu susu kibun ga ên he xêyaa i vô niviha vô xam, dî buc timuêñ wê xam vigêm obêc sea mone ge od Anutu i kô xam mî xam loc dô vac i ben luta lêc luta.

¹⁰ “Xomxo ti obêc viac yuac nipwopwo wê xomxo nêb i vông ge niviha ge od obêc viac yuac levac niviha êno bêge, lêc xomxo ti obêc viac yuac nipwopwo niviha lêm ge od obêc viac yuac levac êno niviha lêm.¹¹ Mone yuu susu kibun ga, ge susu pileva, lêc xam obêc viac niviha lêm ge od letya obêc vông vizid wê nôn niviha ge ti vac xam vigêmê?¹² Dî xam obêc viac xomxo ngwe susu niviha lêm ge od letya ob vông susu vô xam ên nêb i tu xam nêmê?

¹³ “Xomxo ti o tiyi wê ob vông yuac vô xomxo levac yuu ge lêm, ên xêyaa obêc vin lec ngwe dî ob yê ngwe nipaên, me obêc vông nilô la vô ngwe dî vô nimi vô ngwe. Om o tiyi wê xam ob vông nilôm i loc vô Anutu yuu xôn mone ge lêm.”

Yesu kiyang lec môp yaya

¹⁴ Palisi ngô kiyang wê Yesu nêl ge lêc vô mya nippaâa vô, ên he xêyaa vin lec mone luu vêl.¹⁵ Om Yesu nêl vô he ên nêbê, “Xam ge wê xam yong xam ên xam nêbê xomxo i yê xam nêbê xam niviha, lêc Anutu xovô xam nilôm nêb nipaên, ên môp wê xomxo yê nêb niviha ge, ge wê Anutu yê ên nêb juda juda nipaên.

¹⁶ “Moses xolac hixôn plopete kiyang yêp dî i val tyip vô buc wê Jon lipac xomxo ge, dî vô buc wê Jon vông ge dî i val gwêbaga, a nêl xolac paha wê Anutu ben ge vô xomxo, mêgem xomxo tibeac nilô kidu he nêb he ob tu Anutu nue mî la dô vac i ben.¹⁷ Lag yuu kibun obêc la xôa ma, lêc Moses xolac bo ti obêc la xôa ma hixôn lêm.

¹⁸ “Xomxo ti obêc sea vinê dî la kô vêx bangwe ge od ge vông yôdac vêx yuu vux, dî xomxo ti obêc kô vêx ti wê liya sea i dî la ge od ge vông môp yôdac vêx yuu vux.”

Xomxo wê susu tibeac ge ti yuu Lasalas

¹⁹ Nang dêc Yesu nêl ên nêbê, “Xomxo susu tibeac ti dô dêc vinyum ngakwi nivihaviha dî ya yaêñ nivihaviha tiyi buc vihati.²⁰⁻²¹ Dêc xomxo susu maên ge ti dô lénêbê Lasalas, lêc mi yêp vô xomxo susu tibeac tyo vuayen, ên nêb ob ya yaêñ myapipu wê tô mi la vac tevol kwa ngibi ge, lêc kityax dô lec Lasalas ninivi vihati om noo lam mi tep lec.

²² “Yuu mi dô dî buc ti lê, lêc Lasalas yib dî angela lam kô i mî la tung i hixôn Eblaham vac Anutu ben lag puunê. Nang dêc xomxo susu tibeac tyo yib nang mi lie yev,²³ dî i la dô vac vigwe nipaên dî kô myavinê levac mi dô, dêc yê ma la kisii lêc yê Eblaham wê dô tevabanê dî Lasalas dô hixôn i ge.²⁴ Mêgem tyuc vya levac ên nêbê, ‘Mag Eblaham, ông xo vigwe pisiv

ên a, dì vông Lasalas i lam tinyum vigê liy়ih বাচ mia dì kô mi lam kitiv
lec a get ên i vô ningigooén vô a, ên ngwax ya a nignivi vô myavinê levac.’

²⁵ “Lêc Eblaham nêl vô i ên nêbê, ‘Nuge, ông xovô lê. Èn buc wê ông
dô kibun ge, od ông dô vac nivîha hixôn susu nivîha, dì Lasalas dô vac
nipaén nôn, lêc gwêbaga Lasalas dô vac nivîha yuu malehe dì ông va dô
vac nipaén yuu myavinê. ²⁶ Dì kiyang ti yêp bêga nêbê vun madia ti yêp
kisuu xe dì xam lec, om xomxo ti obêc nêbê kidi vac ga dì loc vô xam ge od
tiyiên ob ma, dì ngwe obêc nêbê kidi vac xam mi lam vô xe ge od tiyiên ob
ma.’

²⁷ “Mêđ xomxo susu tibeac tyo nêl ên nêbê, ‘Mag Eblaham, a kitaa ông
bê ông vông Lasalas i lôc mi loc mag ben, ²⁸ ên a lige vux vigê vilu dô,
om a nêb i loc nêl vô he bê he i sea môp nipaén êdêc he i o lêc lam kô
myavinê nipaén hixôn a lêm.’

²⁹ “Lêc Eblaham nêl vô i ên nêbê, ‘Kiyang wê Moses he plopete kivuu
ge yêp pyap, om he i ngô.’ ³⁰ Lêc xomxo tyo nêl ên nêbê, ‘Mag, ge tiyiên
ma, lêc xomxo ti obêc kidi lec vac yibêñ mi la nêl kiyang vô he ge od he
obêc pilepac he.’ ³¹ Lêc Eblaham nêl ên nêbê, ‘He ob ngô Moses he plopete
kiyang mi vông i vin lêm ge od xomxo ti obêc kidi lec vac yibêñ mi lax ge
od he obêc vông i vin xomxo tige via yea êno lêm.’”

17

Môp wê ob vông xomxo vô nipaén ge (Matyu 18:6-7,21-22; Mak 9:42)

¹ Yesu nêl vô nue ngivihi ên nêbê, “Môp nipaén toto yêp wê ob vông
xomxo vô nipaén ge, lêc xomxo ti wê dìdii xomxo vac nipaén ge obêc kô
myaviwen levac lec. ² Xomxo tibêge, xomxo ob nux ngidax viyin lec i
kwa dì nêx i la vac gwec madia ge od nivîha, êdêc i o lêc vông xomxo wê
xovôén ma ge ti i vô nipaén lêm. ³ Om xam viac xam nivîha. Dì lime ti
obêc vông i so ge od ông nêl i nêñ soén vô i, dì obêc pilepac i ge od ông
kitya i nêñ nipaén vêl. ⁴ Dì lim tyo obêc vông i so vô ông lu vigê vilu dì
sec yuu lec buc ti, dì lam vô ông lu vigê vilu dì sec yuu lêc nêl ên nêbê, ‘A
vông i so vô ông’ ge od ông kitya i nêñ nipaén tigee vihati vêl.”

Môp vông vinêñ

⁵ Apumtau Yesu nue ngivihi nêl vô i ên nêbê, “Xe nêb ông vông xe nêm
vông vinêñ i vô levac.” ⁶ Lêc Apumtau nêl vô he ên nêbê, “Xam nêm vông
vinêñ obêc nipwo tya tiyi xochê vixôô nôn nulen ge od xam tiyi wê xam
ob nêl vô xax levac tige bê, ‘Ông pul ông vêl ên kibun dì loc ên loc yev
ông vac gwec’ ge od obêc vô ninya lehe vô xam.”

Môp wê nue yuac ob vông ge

⁷ Yesu nêl ên nêbê, “Xam nume yuac ti obêc sap kibun me viac bwoc di
vena ge od ông ob nêl bêna vô i? Ông ob nêl vô bê, ‘Ông lam tô mi dô
kibun mi wa yaén?’ ⁸ Ông ob nêl tibêge lêm. Nge, ông ob nêl vô bê, ‘Ông
viac ông di myêl yaén mi duu, dì kô mi lam ên a ob xa di num tax, dêc
ông wa di num timuén.’ ⁹ Dì num yuac tige obêc nêl bêna vô ông? Obêc
nêl bê ông pimil i ên wê vông yuac wê ông nêl ge, me? Ob nêl tibêge
lêm, ên ge i yuac wê mi vông ge. ¹⁰ Om xam êno, xam obêc vông yuac
vihatí tiyi xochê Anutu nêl vô xam ge od xam o lêc nêl bê Anutu i pimil

xam lêm. Nge, xam nêl bêga bê, ‘Xe tibii yuac pileva. Xe o tiyi wê xe ob nêl bê Anutu i pimil xe ge lêm. Èn yuac wê xe vông ge, Anutu vông vac xe vigêm om xe vông.’”

Yesu vông xomxo kityax mahizihizi vigê yuu vô niviha lec

¹¹ Yesu la ên nêb ob la Jelusalem, lêc la vac Samelia yuu Galili ben yôg, ¹² mì la vac vigwe ti, lêc xomxo kityax mahizihizi vigê yuu yê i, lêc le teva ¹³ dì tyuc vya levac ên nêbê, “Apumtau Yesu, xo vigwe pisiv ên xe.” ¹⁴ Om Yesu yê he dì nêl vô he ên nêbê, “Xam loc ên loc hilung nimnivi vô xomxo wê mi dô vac xumac ngibua ge lê ên he i yê bê xam nimnivi vô niviha lec.” Om he dila vô môp lêc he ninivi vô niviha lec. ¹⁵ Om he yê wê ninivi vô niviha lec ge, lêc he ti pop mi lax mì la vô Yesu dì pimil Anutu ya vya levac, ¹⁶ dì yev vixa kitu vac dì kipôm manôn vô Yesu vixa kwa ngibi dì pimil i ên wê vông i vô niviha lec ge. Xomxo tige tibii Samelia ti. ¹⁷ Mêd Yesu nêl ên nêbê, “A vông xomxo vigê yuu vô niviha lec lê, lêc he vigê vilu dì sec yuudiyuu la na? ¹⁸ Tibii tibed ga wê vena pimil Anutu ge, dom he baba wê Yuda ge ti o vena lêm.” ¹⁹ Mêd Yesu nêl vô tibii Samelia tyo ên nêbê, “Kidi lec mì lôc bom, ên vông vinê wê ông vông ge wê vông ông nimnivi vô niviha lec.”

Yesu buc wê ob lop mi lôm ge

(Matyu 24:23-28,37-41)

²⁰ Palisi ya val kinêg vô Yesu ên nêbê, “Buc wê Anutu obêc lam tu king mi xomxo la vac i kwa ngibi ge obêc yelacna?” Lêc Yesu nêl ên nêbê, “Xam ob wê do ti lê lêc xovô bê Anutu buc wê ob tu king ge val ge lêm. ²¹ Di xomxo tiyîen ma wê ob yê mi nêl bê, ‘Wê, tyo val ga’ me ‘Tyo dô ganê.’ Xam ngô lê. Anutu lam tu king vac xam mahigun pyap.”

²² Mêd Yesu nêl vô nue ngîvîhi ên nêbê, “Obêc buc timuên ge od xam obêc zid bê Xomxo Nu buc i vena lutibed ên xam wê, lêcom xam wêen ob ma. ²³ Di xomxo ya obêc nêl vô xam bê, ‘Wê, tyo dô ganê,’ me ‘Tyo val ga.’ Lêc xam o lêc loc vô he vixa lêm. ²⁴ Èn buc wê Xomxo Nu obêc vena ge od obêc vena tiyi xochbê deac hixelac lutibed di xêseac linac la vac vigwe vihati ge. ²⁵ Mêlêc Xomxo Nu obêc kô myavinê levac tax dì xomxo wê dô gwêbaga obêc vô nîmi vô i.

²⁶ “Lêc buc timuên wê Xomxo Nu obêc vena ge od xomxo obêc dô i tiyi xochbê xomxo dô vô Nôa buc ilage dì Xomxo Nu ob vena. ²⁷ Èn xomxo ilage ya dì num dì iima mi dô, dì i mila tyip lec buc wê Nôa la dô vac sip nilô ge lê, lêc lutibed mia butac mabu dì lam hi xomxo vihati yib mima vêl.

²⁸ “Di Lot buc bêge êno, ên xomxo ya dì num dì kisuu susu vôma di vông yuac lec yaén dì lox xumac mì dô, ²⁹ lêc buc wê Lot kidi gê Sodom mì la ge od ngwax yuu ngidax myavinê tô gê lag puunê tiyi xochbê lun val ge mi lam hi xomxo gee yib mima vêl. ³⁰ Om buc wê Xomxo Nu obêc vena le seac ge od xomxo obêc dô mi vông bêge êno.

³¹ “Obêc buc tige lêc xomxo ti dô lec xumac kisii ge od i o lêc lop mi lax kô i susu vac xumac lôma lêm, me xomxo ti obêc la dô vac yuac ge od i o lêc lax mì la ben lêm. Nge, susu i dô dì xomxo i loc nêm mô. ³² Xam xovô Lot vinê wê tu ngidax mì le vac môp ge. ³³ Èn xomxo ti obêc nêb viac ninivi ên viyin yuu yibên ge od mavîha wê i vông ge obêc yib. Lêc xomxo ti obêc sea i ninivi lec a lêg ge od obêc dô mavîha yuu niviha.

34 “A ob nêl vô xam bê obêc buc tige xomxo yuu ob diyêp lec pêt ti vô bucên, lêc Anutu obêc kô ngwe dì sea ngwe dô. **35** Di vêx yuu obêc divông yuac ti mì dô, lêc Anutu obêc kô ngwe dì sea ngwe dô. **36** [Di vux yuu obêc dô vac yuac ti lê, lêc Anutu obêc kô ngwe dì sea ngwe.]”

37 Méd nue ngivihi kinêg vô Yesu ên nêbê, “Apumtau, kiyang tige obêc vô nôn lec gê na?” Lêc Yesu nêl vô he ên nêbê, “Xam xovô bê susu wê yib mì pital ge obêc yêp vac vigwe ti ge od menac byang kitucma dì la lec vigwe tige.”

18

Kiyang pilepacêñ lec vêxôv ti yuu hizap nipaêñ ti

1 Mêd Yesu nêl kiyang pilepacêñ ti vô nue ngivihi, ên nêb ob vông xovôêñ vô he bê he i kitaa i tiyi buc vihati dì ni ma lecêñ i ma. **2** Om nêl kiyang pilepacêñ bêga vô he ên nêbê, “Hizap ti dô vac vigwe ti, lêc o xona ên Anutu lêm dì yê xomxo vihati tiyi xochê susu vidaaêñ ge. **3** Di vêxôv ti dô vac vigwe tige, lêc la mì kitaa hizap tige tiyi buc vihati ên nêbê, ‘Tibii ti nêb ob vông kiyang vô a, om a nêb ông ngidu a xôn ên a nêg kiyang.’ **4** Lêc hizap o vông i vin i vya lutibed lêm, di buc tibeac la vêl lê, lêc hizap tyo xo bêga ên nêbê, ‘A o xona ên Anutu lêm, dì a o xona ên xomxo ti lêm. Nge, a xê he tiyi susu vidaaêñ. **5** Lêcom vêxôv tige môci lam mì kitaa a nginong om a obêc ngidu i xôn ên i kiyang, ên i o lêc lam nginong nginong mì vông a nig i ma lêm.’”

6 Mêd Apumtau Yesu nêl vô nue ngivihi ên nêbê, “Xam xovô kiyang wê hizap nipaêñ tige nêl ge lê. **7** Om xam xo ên xam nêbê va? Xomxo wê Anutu vînoo he pyap nêb he tu ixe ge, he obêc kiyag vya lec Anutu tiyi bucên yuu vidiiën vihati ge od Anutu obêc ngô he vya lêmê? Di obêc ngidu he xôn lutibed lêmê? **8** A ob nêl vô xam bê Anutu obêc ngô he vya di ngidu he xôn lutibed. Lêc a ob kinêg vô xam bê buc wê Xomxo Nu obêc lop mì lôm ge od obêc yê bê xomxo vông i vin, me o vông i vin lêm?”

Kiyang pilepacêñ lec Palisi ti yuu tibii takis kôen ngwe

9 Yesu nêl kiyang pilepacêñ tiga vô xomxo ya wê nêb he tibii vông vinêñ niviha dì yê xomxo baba ên nêb he xomxo vidaaêñ ge, om nêl bêga vô he ên nêbê, **10** “Xomxo yuu la vac Anutu xumac ngibua ên nêb ob la kitaa, Palisi ngwe di tibii takis kôen ngwe. **11** Om Palisi tyo la le dì kitaa vac nilô bêga ên nêbê, ‘O Anutu, a pimil ông ên wê a o nipaêñ tiyi xochê xomxo baba ge lêm, ên he mi vông môp yôdac susu yuu yôdac vêx yuu vux di môp nipaêñ yaya. Di a o nipaêñ tiyi xochê tibii takis kôen ganê lêm. **12** Ên a ga wê a mi ngibua yaêñ lec buc yuu yuu tiyi da vihati, di a mone yuu susu wê a mi kô ge a mi tung vigê yuu yuu, om a mi vông kidu ti vô ông.’ **13** Di tibii takis kôen ngweo milâ le teva, di o lax ma la kisiinê xochê môp wê xomxo baba mi vông ge lêm. Nge, xovô nêb i tibii nipaêñ om kituu pikopac di kitaa bêga ên nêbê, ‘O Anutu, ông xo vigwe pisiv ên a di kitya a nêg nipaêñ vêl, ên a ga tibii nigpaêñ.’”

14 Om Yesu nêl ên nêbê, “A nêl vô xam bê tibii takis kôen ge Anutu kitya i nêng nipaêñ vêl di yê i niviha dì i lax mì la ben, di Palisi ge Anutu o yê niviha lêm. Ên xomxo wê ob yong ici va ge, ge wê Anutu obêc vông i vô nipwo lec, di xomxo wê vông ici vô nipwo lec ge, ge wê Anutu ob pimil i di vông i lê vô levac.”

*Yesu kitaa lec nipwo
(Matyu 19:13-15; Mak 10:13-16)*

¹⁵ Xomxo kô nue nipwo mi la vô Yesu, ên nêb i vyax vigê lec he di kitaa lec he, lêc Yesu nue ngîvîhi yê di vô mya nipaên vô he. ¹⁶ Lêc Yesu keac nipwo lam di nêl ên nêbê, “Vông nipwo i lam vô a di xam o le vac he xôn lêm, ên xomxo tibêge wê ob la dô vac Anutu ben ge. ¹⁷ A nêl hixôn nôn vô xam bê xomxo ti obêc vông i vin Anutu mi la vac i kwa ngîbi tiyi xochê nipwo mi la vac tae mae kwa ngîbi lêm ge od o tiyi wê obêc la dô vac Anutu ben ge lêm.”

*Xomxo wê susu yuu mone levac ge
(Matyu 19:16-30; Mak 10:17-31)*

¹⁸ Xomxo levac ti kinêg vô Yesu ên nêbê, “Xolac kehe niviha, a obêc vông bêna êdêc dô magyiha luta lêc luta?” ¹⁹ Lêc Yesu nêl vô i ên nêbê, “Bêna lêc ông nêb a niviha? Xomxo niviha ti o dô lêm. Anutu vaci nôn tibed wê niviha. ²⁰ Ông xovô xolac wê Anutu nêl vô Moses ên nêbê, Ông o lêc vông môp yôdac vêx yuu vux lêm. Ông o lêc hi xomxo i yib lêm. Ông o lêc vun xomxo ngwe susu lêm. Ông o lêc nêl kiyang kityooën lec xomxo ti lêm. Ông loc vac tam yuu mam vya kwa ngîbi.” ²¹ Om xomxo levac tyo nêl ên nêbê, “Buc wê a gên nipwo di i val tyip gwêbaga, a viac xolac gee vihati mi vông i vô nôn lec.” ²² Yesu ngô tige, di luu i vya ên nêbê, “Môp ti gên yêp wê ông ob vông hixôn bêga bê ông loc vông susu tibeac wê ông vông ge mi tibii i kisuu di ông vông mone vô tibii wê nêl susu maên ge, ên ông obêc kô susu niviha gê kisii ganê. Pyap dêc ông lôm timu vô a vixag.” ²³ Xomxo levac tyo ngô kiyang ge lê, lêc kiyang tige vông i nilô vô viyin levac, ên wê i mone levac ge.

²⁴ Om Yesu yê i di nêl ên nêbê, “Xomxo wê susu tibeac ge obêc nêb la vac Anutu ben ge od obêc viyin levac vô he. ²⁵ Môp wê bwoc kamel ti obêc la vac yin kitu tocêng, viyin levac lê, lêc xomxo susu tibeac obêc nêb la vac Anutu ben ge od obêc viyin levac luu vêl.” ²⁶ Mêgem xomxo wê ngô kiyang tige nêl ên nêbê, “Obêc tibêge ge od letya tiyi wê ob la dô maviha ge?” ²⁷ Lêc Yesu nêl ên nêbê, “Môp wê xomxo tiyiên ma wê ob vông ge, ge Anutu ob vông.”

²⁸ Mêd Pita nêl vô Yesu ên nêbê, “Wê lê. Xe ga wê xe sea susu wê xe vông ge vihati dô di lam timu vô ông vixam.” ²⁹ Lêc Yesu nêl vô he ên nêbê, “Vixôhilôg, a ob nêl vô xam bê xomxo ti obêc sea ben hixôn vinêe nue di tae mae lie lec Anutu xolac yuu ben ge ³⁰ od obêc kô myaviwen niviha luu vêl gê kibun ga, di buc timuên ge od obêc la dô maviha luta lêc luta.”

*Yesu nêl kiyang vông lu yon lec myavinê wê ob kô ge
(Matyu 20:17-19; Mak 10:32-34)*

³¹ Yesu kô nue ngîvîhi vigê yuu di tô mi la yuu mi he la, dêc Yesu nêl vô he ên nêbê, “Xam ngô lê. Il ob la Jelusalem lê, lêc kiyang vihati wê plopete kivuu lec Xomxo Nu ilage obêc vô nôn lec. ³² Om xomxo obêc vông i la vac tibii wê o Yuda lêm ge vigê, dêc tibii obêc vô mya nipaên vô i di pisuv myaluc lec, ³³ di pisa i ya yihi dêc hi i yib, di buc yon obêc lam la vêl ge od ob kidi lec maviha nang.” ³⁴ Mêgem nue ngîvîhi ngô kiyang tyo lêc he lungêñ, ên kiyang kehe o yêp seac vô he lêm om he vyac xovôën ma.

*Yesu vông xomxo ma tocên ti vô niviha lec
(Matyu 20:29-34; Mak 10:46-52)*

³⁵ Yesu mila kwabo vô vigwe Jeliko, lêc xomxo ma tocên ti dô vô môt ninya di kitaa susu vô tibii, ³⁶ lêc ngô kiyang ngena wê lam hixôn Yesu ge om kinêg vô xomxo ya ên nêbê, “Tibii vô nididun ên va?” ³⁷ Lêc xomxo nêl vô i ên nêbê, “Yesu Nasalet valê.” ³⁸ Om xomxo ma tocên tyo tyuc ên nêbê, “Yesu, Devit nu, ông xo vigwe vô pisiv ên a.” ³⁹ Lêc xomxo wê lam mug ge nêl ên nêbê, “Dô kiyang maén.” Lêc ma tocên tyo tyuc nginong nginong hixôn via levac ên nêbê, “Ông Devit nu, xo vigwe vô pisiv ên a.” ⁴⁰ Mêgem Yesu val le di nêl vô xomxo nêb he i kô xomxo ma tocên tyo mi lam vô i. Om he kô mi val di val lax i le vô Yesu manôn dêc Yesu kinêg vô i ên nêbê, ⁴¹ “Ông nêb a vông bêna vô ôngê?” Om xomxo tyo nêl ên nêbê, “A nêb ông vông a magnôn i seac.” ⁴² Om Yesu nêl vô i ên nêbê, “Mamnôn i seac. Vông vinê wê ông vông ge vông ông vô nimviha lec.” ⁴³ Mêgem lutibed xomxo tyo manôn seac, di i la hixôn Yesu di pimil Anutu. Di xomxo wê yê ge vihati pimil Anutu ên wê xomxo ma tocên tige manôn seac ge.

19

Yesu yuu Sakias kiyang

¹ Yesu la vac vigwe Jeliko, ² di xomxo ti lê nêbê Sakias dô vac vigwe tige. Sakias ge xomxo takis kôen nêl levac di i mone yuu susu tibeac. ³ Sakias nêb ob yê Yesu om la lêc tiyiên ma, ên myabo om xomxo tibeac le vac i manôn xôn, ⁴ om tup mi la mug vô môt wê Yesu ob lam vô ge di mila lec xax ti ên nêb ob la dô ên yê Yesu wê i val ge. ⁵ Yesu mila vac xax kwa ngibi

wê Sakias dô lec ge di lax ma lec di nêl vô Sakias ên nêbê, “Sakias, lop lutibed ên a ob dô hixôn ông vac ông bom gwêbaga.” ⁶ Mêgem Sakias lop lutibed di kô Yesu mi la vac ben hixôn xêyaa niviha. ⁷ Tibii yê wê Yesu la dô vac Sakias ben ge om he ni nyag di nêl ên nêbê, “Bêna lêc xomxo tiganê la dô vac tibii nipaên tiganê ben di la dô hixôn?” ⁸ Mêlêc Sakias le vô he vihati manôn di nêl vô Apumtau Yesu ên nêbê, “Apumtau, ngô lê. Susu vihati wê a vông ge a ob vông vihen i loc vô xomxo wê nêl susu maén ge. Di a obêc kityoo xomxo ya di vô he mone vêl ila ge od a ob vông he xe vac i luu vêl, xochê a obêc kô xomxo ti mone kehe ti ge od a obêc vông kehe yuudiyuu vô i nang.” ⁹ Mêgem Yesu nêl vô i ên nêbê, “Gwêbaga Anutu kitya xam xumac tiga nêm nipaên vêl di xam tu Anutu nue, ên ông ge, ông Eblaham tivae ti êno. ¹⁰ Ên a, Xomxo Nu, a lam ên xomxo wê lung la vac nipaên ge, ên a nêb a ob hôm he lec ên he i dô niviha.”

*Kiyang pilepacên lec xomxo vigê yuu wê kô mone ge
(Matyu 25:14-30)*

¹¹ He ngô kiyang ngwe ge vêl, nang dêc Yesu nêl kiyang pilepacên ti vô he, ên he mila kwabo vô Jelusalem lêc tibii wê diloc hixôn i ge so ên nêb mêd he ob mila Jelusalem ge od Yesu ob tu Anutu manôn di tu king, om Yesu nêb he i xovô buc tige bê gên yêp teva, ¹² om nêl kiyang pilepacên bêga vô he ên nêbê, “Xomxo levac ti dô vac vigwe ti, lêc nêb ob la vac vigwe teva ngwe ên xomxo i vông i tu king ên lôm viac vigwe wê mi dô vac ge. ¹³ Om buc wê nêb ob la ge od nêl nue yuac vigê yuu ge lam vô i di

vông mone kipihac yuu yuu vô he toto dì nêl vô he ên nêbê, ‘Xam vông yuac lec mone tigae dì i loc tyip lec buc wê a obêc vena ge.’

¹⁴ “Mêd xomxo levac tyo loc mi la, lêc tibii vigwe tige xéyaa vô nipaên vô i, om vông lie ya timu vô i vixa mi la, ên nêb he i loc nêl bê, ‘Xe nêb xomxo tiga ob tu king mi viac xe lêm.’ ¹⁵ Lêc xomxo tyo mila kô lê levac pyap di lax mi la vac ben wê ob viac ge. Mêd nêl nue yuac wê vông mone vô he ge lam vô i, ên nêb ob xovô mone wê he vông yuac lec ge bêc he tulec ya hixônê?

¹⁶ “Om xomxo ti wê val taxlee ge nêl vô i ên nêbê, ‘Xomxo levac, ông vông mone kipihac yuu vô a, lêc a vông yuac lec om a tulec yul yuu hixôn.’

¹⁷ Om xomxo levac nêl vô xomxo tyo ên nêbê, ‘Ông ge xomxo niviha wê ông viac a yuac niviha ge. Ông kô mone nipwo tya lêc ông viac niviha, om a ob vông ông tu levac di viac vigwe levac vigê yuu.’

¹⁸ “Nang dêc nu yuac ngwe wê vông yuu ge val nang di nêl ên nêbê, ‘Xomxo levac, ông vông mone kipihac yuu vô a, lêc a vông yuac lec om a tulec yul ti hixôn.’ ¹⁹ Om xomxo levac tyo nêl vô i ên nêbê, ‘Niviha, om a ob vông ông tu levac di viac vigwe levac vigê vilu.’

²⁰ “Nang dêc nu yuac ti wê vông yon ge val nang di nêl ên nêbê, ‘Xomxo levac, ga ông mone kipihac yuu wê ông vông vô a ge, om ông hôm ông xe. Ông mone ga a viyum vac nivimihi mi tung i dô, ²¹ ên a xona ên ông, ên a xovô ên a nêbê ông ge xomxo myampilihi, ên susu wê xomxo ngwe ob tung ge od ông ob kô, di yaên wê xomxo ngwe yev he xe ge od ông la mi kô nôn.’

²² “Lêc xomxo levac nêl vô i ên nêbê, ‘Ông ge xomxo nipaên. Ên kiyang wê ông nêl ga hilung ông nêm nipaên, ên ông xovô ên ông nêbê a ga xomxo myagpilihi om susu wê xomxo ngwe tung i dô ge, a la mi kô, di yaên wê xomxo ngwe yev he xe ge od a la mi kô nôn. ²³ Ông xovô bêge lê, lêc bêna lêc ông o la lii mone wê a vông ge vac xumac mone êdêc buc wê a vena ge od a kô mone wê a vông ge di kô wê dô lecén ge hixônê?’ ²⁴ Mêgem xomxo levac nêl vô xomxo wê he xôn le ge ên nêbê, ‘Xam hôm mone kipihac yuu ge vêl ên xomxo tige vigê di loc vông vô xomxo ngwe wê mone yul yuu ge.’ ²⁵ Lêc he nêl ên nêbê, ‘Xomxo levac, xomxo ganê mone levac tiyi yul yuu.’

²⁶ “Lêc xomxo levac nêl ên nêbê, ‘A ob nêl vô xam bê xomxo wê he susu dô ge, he ob kô ya hixôn, di xomxo wê susu ma ên he di nipwo tya dô vô he ge od a ob vô vêl ên he. ²⁷ Di xomxo wê xéyaa vô nipaên vô a ên nêb a o tu king lêm ge, xam loc kô he mi lam di hi he i yi lec a magnôn.’”

*Yesu la Jelusalem lêc tibii pimil i tiyi xochê king ge
(Matyu 21:1-11; Mak 11:1-11; Jon 12:12-19)*

²⁸ Yesu nêl bêge pyap di loc mi la ên nêb ob la Jelusalem. ²⁹ Mêd mila kwabo vô vigwe yuu lê nêbê Betpasi yuu Betani wê yêp kwabo vô kitôn Oliv ge. Mêd vông nu ngivihi yuu la, ³⁰ di nêl vô yuu ên nêbê, ‘Muu loc vac vigwe tiganê, di muu obêc mila wê donki wê gên ligên ge ti wê tibii vô yihi lec kwa di i dile ge. Donki tige xomxo ti o dô lec ila lêm. Mêgem muu piwelac yihi vêl ên di kô mi lam. ³¹ Lêc xomxo ti obêc kinêg muu bê, ‘Muu ob piwelac yihi tige vêl ên va?’ ge od muu nêl vô bê, ‘Apumtau nêb ob vông yuac lec.’”

³² Yuu la i tiyi wê Yesu nêl ge dî mila tulec donki, ³³ om yuu piwelac yihi vêl ên, lêc xomxo wê he donki ge kinêg yuu ên nêbê, “Muu piwelac ge ên va?” ³⁴ Lêc yuu nêl ên nêbê, “Apumtau nêb ob vông yuac lec.”

³⁵ Mêd yuu kô donki tyo mî lax vô Yesu, dî he vax he ngakwi lec kisii dêc Yesu dô lec. ³⁶ Yesu dô lec dî la vô môp, mêd xomxo ya vax he nivimhi lec môp wê Yesu ob tup vô ge i tiyi xocbê môp wê tibii mi vông vô he king ge. ³⁷ Mêd Yesu lop vô môp kitôn Oliv dî mila kwabo vô Jelusalem, lêc xomxo vihati wê mi timu vô Yesu kiyang ge, he pimil Anutu hixôn xêyaa niviha ên do levac wê Yesu vông mi he yê ge, ³⁸ dî he nêl levac la kisii ên nêbê, “Il ob hi vixad i pec ên il nêd king wê tu Anutu manôñ dî lam ge.

Kiyang malehe yêp lag kisiinê, dî Anutu wê dô lag kisiinê, il ob vông i lê i vô levac.”

³⁹ He nêl bêge, lêc Palisi wê dô hixôn he ge, he ya nêl vô Yesu ên nêbê, “Xolac kehe, ông nêl vô nume bê he i dô kiyang maên.” ⁴⁰ Lêc Yesu nêl ên nêbê, “A ob nêl vô xam bê he obêc dô kiyang maên ge od ngidax obêc tyuc dî pimil a nang.”

Yesu byag ên tibii Jelusalem

⁴¹ Mêd Yesu mila kwabo vô Jelusalem dêc yê ma la dî byag, ⁴² dî nêl ên nêbê, “Gwêbaga xam obêc xovô môp wê xam ob dô vac malehe ge od obêc niviha. Lêc ga xam lungên, ên kiyang ga yêp xôpacén om xam o xovô lêm. ⁴³ Xam ngô lê. Obêc buc ti lêc tibii wé yê xam nipaên ge obêc val ku xenac kisuu xam xôn dî o tiyi wê xam ti ob la ge lêm. ⁴⁴ Dî he ob hi xam hixôn nume wê xam dô vac vigwe ga vihati vô nipaên, dî ngidax wê xam lox xumac ya ge, ngwe ob dô lec ngwe kisii lêm. Kehe bêga bê xam o xovô Anutu wê lam ên nêb ob hôm xam lec ge lêm.”

Yesu tii tibii wê vông vîtevac vac Anutu xumac ngibua ge vêl (Matyu 21:12-17; Mak 11:15-19; Jon 2:13-22)

⁴⁵ Yesu la vac Anutu xumac ngibua dî la tii tibii wê vông vîtevac vac nilô ge la vêl, ⁴⁶ dî nêl vô he ên nêbê, “Xolac nêl bêga nêbê, ‘A xumac ga, xumac kitaa vacen,’ lêc xam vông i tiyi xocbê xumac wê tibii yôdac ob kitcumac vac ge.”

⁴⁷ Yesu mi nêl xolac vac Anutu xumac ngibua tiyi buc vihati. Mêd xomxo levac wê mi si daa gee dî xomxo wê xovô Moses xolac gee hixôn xomxo levac levac ya, he xôn nêb he ob hi Yesu i yib, ⁴⁸ lêc he o tulec môp ti wê he ob hi Yesu lec ge lêm, ên xomxo tibeac vô ninya vô kiyang wê Yesu nêl ge dî o sea i lêm.

20

Xomxo kunac Yesu ên nêbê, “Ông kô xêkizêc vô letya?” (Matyu 21:23-27; Mak 11:27-33)

¹ Buc ti lêc Yesu la vac Anutu xumac ngibua dî la nêl xolac vô tibii, dî xomxo levac wê mi si daa vô Anutu gee dî xomxo wê xovô Moses xolac gee hixôn he Yuda levac levac val vô Yesu, ² dî val kunac i ên nêbê, “Ông tu letya manôñ dî lam vông môp tigaê? Letya nêb ông vông môp tibêgaê?” ³ Lêc Yesu nêl lax vô he ên nêbê, “A êno ob kinêg kiyang ti vô xam. Om xam nêl vô a bê ⁴ letya vông Jon la lipac xomxo? Ge Anutu lag kisiinê vông, me xomxo kibun ga vông?” ⁵ Om he nêl vôma bêga ên nêbê, “Il obêc nêl bê Anutu lag kisiinê vông ge od Yesu obêc nêl vô il bê, ‘Lêc bêna

lêc xam o vông i vin kiyang wê Jon nêl ge lêmê? ⁶ Lêc il ob nêl bê xomxo kibun ga vông Jon la yuac tige, od xomxo obêc nêx il ya ngidax, ên he vihati vông i vin ên he nêbê Jon ge plopet wê Anutu vông i la ge ti.” ⁷ Om he nêl vô Yesu ên nêbê, “Xe o xovô Jon Lipacên kehe lêm.” ⁸ Mêd Yesu nêl vô he ên nêbê, “Om a êno ga, a ob nêl xomxo ti wê vông a lam ge kitong vô xam lêm.”

*Kiyang pilepacên lec tibii nipaên wê viac yuac ge
(Matyu 21:33-46; Mak 12:1-12)*

⁹ Mêd Yesu nêl kiyang pilepacên ti vô xomxo bêga ên nêbê, “Xomxo ti xin wain vac i yuac ti, di vông vô tibii ya nêb he i viac, ên nêb ob la vigwe teva ti di la dô buc xuhu dia. ¹⁰ Mêgem loc mi la dô mêt buc wê wain ob huu ge om vông nu yuac ti lax mi la vô tibii wê diviac i yuac ge ên nêbê i loc kô i wain nôn ya, om xomxo tyo mila lêc xomxo wê viacên wain ge hi i di vông i lax mi la pileva. ¹¹ Nang dêc xomxo ti wê i yuac ge vông nu yuac ngwe lax vô he nang, lêc tibii yuac viacên pisa i di vô mya nipaên vô i di vông i lax mi la pileva. ¹² Nang dêc xomxo levac tige vông nu yuac ti wê vông yon ge la nang, lêc he hi i vô nipaên di nêx i la ninya. ¹³ Om xomxo ti wê i yuac ge xo bêga ên nêbê, ‘A ob vô va? Ga a ob vông a nug tuc wê a xêgyaa vin lec i ge i loc vô he, ên mêt he ob yê i xocbê xomxo levac di la vac kiyang wê i vông ge kwa ngibi.’ ¹⁴ Lêc xomxo wê viac i yuac ge yê wê xomxo levac tyo nu mila ge om he nêl vòma ên nêbê, ‘Xomxo ti wê ma obêc nêl i lê lec yuac ga ge val, om il ob hi i yib êdêc yuac ga i tu il xe.’ ¹⁵ Om he hôm i xôn di kô mi la vô yuac ninya di hi i yib. Om a ob kinêg vô xam bê xomxo ti wê i yuac ge obêc vô va vô he? ¹⁶ Ge obêc hi xomxo tigee yib di vông i yuac vô xomxo baba mi he i viac nang.” Xomxo wê ngô kiyang tige nêl ên nêbê, “Le i lêc vông tibêge lêm.”

¹⁷ Mêd Yesu yê he di nêl ên nêbê, “Xam nêbê môt bêge i ma, mêtêc kiyang wê plopete kivuu ilage, kehe bêna? Ên plopete ilage kivuu kiyang mi i yêp bêga ên nêbê, ‘Ngidax ti wê xomxo xumac loxên yê lêc nêb tiyien ma ge, ge wê tu ngidax xêkizêc wê ob hôm xumac xôn ge.’ ¹⁸ A ob nêl vô xam bê xomxo ti obêc tô mi hi i lec ngidax tige ge od ob hi i len vô pipu sea, di ngidax tige obêc tô mi hi xomxo ti ge od obêc hi i pital sea.”

¹⁹ Yesu nêl bêge dêc xomxo wê xovô Moses xolac gee hixôn xomxo levac wê mi si daa gee, he xovô ên he nêbê Yesu nêl kiyang pilepacên tige lec he, om he nêb he ob hôm Yesu xôn lutibed, lêc he xona ên wê xomxo tibeac ge.

*Xomxo nêb ob yaxêñ Yesu kiyang lêc Yesu o nêl ti so lêm
(Matyu 22:15-22; Mak 12:13-17)*

²⁰ Mêd xomxo wê xovô Moses xolac gee hixôn xomxo levac wê mi si daa gee yê Yesu xôn di vông xomxo ya la vô i ên nêb he i yê i xôn di yaxêñ i kiyang bêc obêc nêl ti so ge od he ob vông i loc vac gavman vigê di vông kiyang vô. Xomxo tigee kityoo nêb he xomxo niviha, ²¹ om la kinêg vô Yesu ên nêbê, “Xolac kehe, xe xovô ên xe nêbê xolac wê ông nêl vô xomxo ge, ông nêl bôbac di niviha, di ông o xona ên xomxo ti lêm. Nge, ông mi nêl Anutu kiyang hixôn nôn vô xomxo vihati tiyima. ²² Om xe ob kinêg vô ông bê tiyi wê il Yuda ob vông mone takis vô king Sisa wê tibii madiluhu ge, me il ob vông lêm?” ²³ Lêc Yesu xovô kiyang kityooen wê yêp vac he nilô ge om nêl vô he ên nêbê, ²⁴ “Xam hilung mone ti mi a xê. Letya

kinu yuu lê wê yêp lec mone ga?” Om he nêl ên nêbê, “Sisa kinu yuu lê.” 25 Mêgem Yesu nêl vô he ên nêbê, “Mêgem susu wê Sisa xe ge, xam vông i loc vô Sisa, di susu wê Anutu xe ge, xam vông i loc vô Anutu.” 26 Mêd he o tiyi wê he ob kityoo Yesu ên i nêl kiyang ya so lec xomxo manôn ge lêm, ên he yetac ên kiyang wê Yesu nêl lax vô he ge om he dô kiyang maên.

*He kinêg vô Yesu lec môp wê xomxo ob kidi lec vac yibêng ge
(Matyu 22:23-33,41-46; Mak 12:18-27,35-37)*

27 Xomxo Sadyusi ya val vô Yesu. He Sadyusi ge, he o vông i vin bê xomxo ob kidi lec vac yibêng lêm. 28 Om he la nêl vô Yesu ên nêbê, “Xolac kehe, Moses xolac nêl bêga vô il ên nêbê xomxo ti obêc kô vêx ti lêc nu ma di i yib di vinê gên dô ge od vux tyo lie ti ob ii vêx tyo nang êdêc vông nue, di nue i tu susu wê ma yibêng vông ge kehe. Moses xolac nêl bêge. 29 Om wê vux vigê vilu di sec yuu ob dô lec ta yuu ma tibed, mêdêc li tuc obêc kô vêx ti lêc yib di nu ma ge, 30-31 od li môn ob ii vêx tige i tii vac nang, lêc wê obêc yib di nu ma ge od li gwaa ob ii nang, lêc wê li gwaa obêc yib ge od lie timuên vihati ob timu vô môp tibed ge di ii vêx tige, lêc wê vihati obêc yib di nue ma, 32 dêc vêx tyo obêc yib timuên ge. 33 Xam nêl ên xam nêbê xomxo obêc kidi lec vac yibêng om xe nêb xe ob kinêg vô ông bê buc wê xomxo yibêng obêc kidi lec ge, od vêx tige obêc tu vux tina vinê? Èn vux vigê vilu di sec yuu, he xôn ii vêx tige lec buc wê he dô maviha ge.”

34 Mêgem Yesu nêl vô he ên nêbê, “Xomxo wê dô gwêbaga ge, he iima. 35 Lêc xomxo wê Anutu nêb he niviha tiyi wê ob kidi lec vac yibêng di la dô maviha timuên ge, he ob iima vô buc timuên lêm. 36 Èn he obêc yib i tii vac nang lêm. Nge, he ob dô tiyi xochê angela ge, ên he kidi lec vac yibêng di he tu Anutu nue.

37 “Moses kiyang nêl kitong êno ên nêbê xomxo yibêng obêc kidi lec i tii vac nang. Ge yêp seac vac kiyang wê Moses kivuu lec xax wê ngwax ditum lec ge bêga ên nêbê, ‘Apumtau Anutu ge Eblaham yuu Aisak yon Jekop Anutu wê yon mi kitaa vô ge.’ 38 Yon yib tax dêc Moses kivuu kiyang tige timuên, lêc Moses kivuu i tiyi xochê yon xeedô ge. Om il ob xovô bê Anutu o tu xomxo yibêng nê Anutu lêm. Nge, Anutu tu xomxo maviha nê Anutu, ên xomxo wê maviha hixôn he wê yibêng ge, Anutu yê he vihati xochê he dô maviha ge.”

39 Yesu nêl bêge dêc xomxo wê xovô Moses xolac gee, he ya nêl ên nêbê, “Xolac kehe, ông nêl ge bôbac la tiyi.” 40 He nêl bêge, ên he xona om he nêb he ob kinêg kiyang i tii vac vô Yesu lêm.

41 Lêc Yesu nêl vô he ên nêbê, “Bêna lêc xomxo ya nêl ên nêbê Kilisi wê Anutu nêb ob vông i lam ge, ge Devit nu? 42 Èn Devit vaci kivuu vac kipihac Sam bêga ên nêbê,

‘Apumtau Anutu nêl vô a Apumtau ên nêbê, Ông dô vô a vigêg hiyôv, 43 di a obêc vông tibii wê vông vevac vô ông ge he i dô vac ông vigêm vilu kwa ngibi.’

44 Devit nêl ên nêbê Kilisi ge Apumtau, om bêna lêc xomxo nêl ên nêbê Kilisi ge Devit bue timuên ti?”

*Xomxo wê xovô Moses xolac gee nê nipaên
(Matyu 23:1-36; Mak 12:38-40; Luk 11:37-54)*

⁴⁵ Xomxo tibeac dô om he ngô kiyang wê Yesu nêl vô nue ngivihi bêga ên nêbê, ⁴⁶ “Xam viac xam ên môp nipaên wê xomxo wê xovô Moses xolac gee mi vông ge. Ên he xêyaa vin lec môp wê he ob vinyum ngakwi dia nivîha dì la vilee vac maket ên he nêb xomxo i yê he dì pimil he ya kiyang malehe, di he obêc la vac xumac lilo, me he ob la ya vízid levac ge od he nêb he ob dô lec sia niviha wê xomxo levac mi dô lec ge. ⁴⁷ Léc he ge wê he mi vô xomxo vêxôv nênsusu yuu xumac vêl ge, dì buc wê he ob kitaa ge od he mi viyum nênsipaên vac kitaâen dia. Om myaviwen nipaên wê he ob kô ge obêc levac mabu luu vêl.”

21

Vêxôv wê vông daa vô Anutu ge (Mak 12:41-44)

¹ Yesu dô dì yê wê tibii wê mone levac gee lam tung mone vac kilong wê tibii mi tung mone daa vac ge. ² Mêd yê wê vêxôv

wê mone ma ge ti val tung mone hi yuu tya vac kilong tyo. ³ Mêgem Yesu nêl ên nêbê, “A ob nêl hixôn nôn vô xam bê mone yuutyabed wê vêxôv tiganê tung vac kilong ge nginoo daa wê xomxo baba tung ge vêl.

⁴ Ên he mone tibeac dô lê, lêc he vông nipwo tya dì he xe levac dô, dom vêx tiganê ge i nênsunu ma dì hi yuu tya, lêc vông vihati tu daa, dì ti o dô wê ob kisuu xen yaên lec ge lêm.”

Yesu nêl lec viyin wê ob val timuên ge (Matyu 24:1-14; Mak 13:1-13)

⁵ Xomxo ya nêl kiyang lec Anutu xumac ngibua ên nêbê, “Xumac tiga, tibii lox ya ngidax nivihaviha dì vunac vô ya susu nivihaviha.” Léc Yesu nêl vô he ên nêbê, ⁶ “Susu wê xam wê ga, obêc buc timuên ge od ngidax tigae ob dii sea, dì ngwe ob dô lec ngwe kisii lêm.”

⁷ Mêd he kinêg vô Yesu ên nêbê, “Xolac kehe, kiyang tige obêc vô nôn lec yelacna? Dì do vatya obêc val tax ên xe xê dì xovô bê susu tige ob vô nôn lecê?” ⁸ Mêgem Yesu nêl ên nêbê, “Xam viac xam niviha êdêc tibii i o lêc kityoo xam lêm. Ên xomxo tibeac obêc val kityoo xam dì nêl a lêg dì nêl bê he Kilisi, dì nêl bê buc vô kwabo lec. Léc xam o lêc vông i vin he vya dì timu vô he lêm. ⁹ Dì xam obêc ngô kiyang wê nêbê vevac tyip vac vigwe ya mi xomxo hima ge, od le i lêc yetac dì xona lêm. Ên vevac tige obêc val tax, lêc buc myahipu gên yêp dia.”

¹⁰ Nang dêc Yesu nêl vô he ên nêbê, “Vô buc tige tibii viyang ngwe ob vông vevac vô viyang ngwe, dì tibii viyang viyang ob dô kidu kidu dì vông vevac vôma. ¹¹ Vac vigwe viyang viyang ge ngiyêg ob yoc levac di vip levac ob den xomxo dì yidac levac ob vông he. Dì do levac ya ob lam gê lag kisiinê dì vông xomxo xona mabu.

¹² “Vô buc wê susu tigee valên gên ma ge, od tibii obêc hôm xam xôn di vông viyin levac vô xam, dì vông kiyang vô xam vac xumac lilo wê Yuda vông ge dì tung xam la vac kalabuhu. He ob nêb vông a lêg i vô nipaên, mègem he obêc kô xam mi la dì vông xam le vô king yuu gavman levac manôn dì vông kiyang vô xam. ¹³ Léc buc tige wê xam ob nêl a xolac kitong vô he, ¹⁴ om le i lêc xo kiyang wê xam ob nêl lax vô he ge lêm. ¹⁵ Ên a obêc vông xam piyôp yêp seac dì xam nêl kiyang niviha, om he

wê nêb ob vông vevac vô xam ge, he o tiyi wê he ob pwoo kiyang wê a nêl vô xam ge vac lêm.

¹⁶ “Mêd xacxam va tame mame lime ngidême hixôn xam nimpipu, heche va obêc vông xam vac tibii vevac vigé dì he obêc hi xam ya wib. ¹⁷ Dì xomxo vihati xêyaa obêc vô nipaên nôn vô xam ên wê xam vông i vin a lêg ge. ¹⁸ Lêc xam obêc dô nimviha dì bamzub lihi ti tyá obêc pul vêl lêm.
¹⁹ Om xam le xêkizêc êdêc dô mamviha timuên.

*Yesu nêl kiyang lec wê Jelusalem obêc vô nipaên ge
(Matyu 24:15-21; Mak 13:14-19)*

²⁰ “Buc wê tibii vevac obêc lam buu vigwe Jelusalem xôn ge od xam xovô bê buc wê vigwe ob vô nipaên ge vô kwabo lec. ²¹ Om buc tige, xomxo wê dô vac vigwe Judia ge, he i pec mi loc lec vigwe kitôn, dì he wê dô vac vigwe Jelusalem ge, he i pec mi loc vêl, dì he wê dô Jelusalem ninja ge, he i o lêc dilôc vac vigwe Jelusalem lêm. ²² Èn buc tige wê Anutu ob vông myaviwen nipaên vô xomxo Yuda i tiyi kiyang wê plopete kivuu ilage, om kiyang gee vihati obêc vô nôn lec. ²³ Om vêx wê nu dô vac xêyaa hixôn vêx wê divông lul vô nue vô buc tige, he ob dô vac viyin levac. Èn xomxo kibun ga ob dô vac viyin levac dì xêyaa myavinê wê Anutu vông ge ob tulec he Yuda vihati. ²⁴ Mêd tibii ob hi he ya yib ya yipac dì ku he ya xôn dì kô he mi la vac tibii ba ben dì he la dô dì vông yuac kalabuhu. Dì tibii wê o Yuda lêm ge ob vông vigwe Jelusalem vô nipaên dì heche va ob tu kehe dì viac i tiyi buc wê Anutu nêl ge.

*Buc wê Xomxo Nu ob vena ge
(Matyu 24:29-31; Mak 13:24-27)*

²⁵ “Mêd do toto ob val vac hiyôv yuu dentuc dì pitua gê lag kisiinê, dì xomxo kibun ga vihati nilô ob vô viyin levac dì he ob xona ên mia gwec wê vuac dì vô didun levac ge. ²⁶ Dì pitua yuu susu wê lag ge ob yetac dì sea vigwe wê le lec ge dì la, om xomxo ob yê dì xovô susu nipaên wê ob val kibun ge om he ob xona mabu dì vixog mi la kibun. ²⁷⁻²⁸ Mêd buc wê susu tigee obêc val ge, od xam nilôm i vô viyin maén di xam wê mam i loc kisii, ên buc wê Anutu ob vô xam vêl ên viyin yuu nipaên ge vô kwabo lec. Mêd ge wê a, Xomxo Nu, a ob lam vac viyobtoc hixôn xêkizêc yuu xêseac di lam kibun, dì xomxo vihati ob yê wê a val ge.”

*Kiyang pilepacên lec xax wê mi pwoc ge
(Matyu 24:32-35; Mak 13:28-31)*

²⁹ Mêd Yesu nêl kiyang pilepacên ti vô he ên nêbê, “Xam xovô xax wê ob pwoc lihi ge. ³⁰ Èn xax lihi obêc pwoc lec ge od xam xovô ên xam nêbê ge buc wê hiyôv ob linac niviha ge. ³¹ Mêgem xam xovô bêga bê môp wê xam ob xovô Anutu buc ge, tiyi bêge éno. Om xam obêc wê do tigee wê val ge od xam xovô bê buc wê Anutu ob tu king dì vông xomxo vihati la vac i kwa ngîbi ge vô kwabo lec.

³² “A nêl hixôn nôn vô xam bêga bê xomxo wê dô gwêbaga ge obêc dô di kiyang tigee vihati obêc vô nôn lec lê. ³³ Lag yuu kibun xôa obêc ma, lêc kiyang wê a vông ge, bo ti obêc la xôa ma lêm.

Yesu nêl vô nue ngivihi ên nêb he i viac he

³⁴ “Xam viac xam niviha, dì le i lêc num mi vô mavmav lêm, dì xam o lêc xo kiyang tibeac lec susu wê nimnivi xe ge dì nilôm i vô viyin lec lêm, ên

xam obêc viac xam niviha lêm ge od Xomxo Nu obêc lop mi lôm lutibed ge od xam ob lungên, tiyi xochbê pulac wê lilii lungên om mila mô, lêc vac ge.³⁵ Èn buc tige obêc val vô xomxo wê dô lec kibun ga vihati yang.³⁶ Om xam viac xam i tiyi buc vihati, dì xam kitaa vô Anutu bê i vông xêkizêc vô xam i tiyi wê xam ob le xêkizêc dì kilê viyin wê ob tulec xam ge êdêc le niviha vô Xomxo Nu manôn wê obêc vena ge.”

³⁷ Mêd Yesu la mi nêl xolac vac Anutu xumac ngibua tiyi vidiiên vihati, dì bucên ge mi sea Jelusalem dì la mi yêp lec kitôn Oliv.³⁸ Mêdêc pitoc yang ge xomxo tibeac mi kidi mi la vac Anutu xumac ngibua ên nêb ob la ngô Yesu kiyang wê nêl ge.

22

*Judas nêb ob vông Yesu vac xomxo levac vigê
(Matyu 26:1-5,14-16; Mak 14:1-2,10-11; Jon 11:45-53)*

¹ Buc wê tibii Yuda ob myêl levac di ya blet xêkizêc wê yis maên ge ên xovô buc Pasova ge vô kwabo lec.² Mêd xomxo levac wê mi si daa gee hixôn xomxo wê xovô Moses xolac gee he nêb he ob hi Yesu i yib, lêc he xona ên xomxo tibeac, om he myag môt wê he ob hôm i xôn ge.

³ Judas Iskaliot ge Yesu nue ngivihi ti lê, lêc Seten la vac i nilô.⁴ Om Judas loc mi la vô xomxo levac wê mi si daa gee hixôn xêhipu levac wê mi viac Anutu xumac ngibua gee, di he keac lec môt wê Judas ob vông Yesu vac he vigê ge.⁵ Om xomxo levac tigee nilô vô niviha dì he nêb wê Judas ob vông Yesu vac he vigê ge od he ob vông mone vô i.⁶ Mêgem Judas tyuc lec, mêd myag môt wê ob hôm Yesu xôn ge, lêc xovô wê xomxo tibeac mi dô hixôn Yesu ge om dô bin buc wê Yesu vaci obêc dô tamaên dì xomxo ma ge lê.

*Pita yuu Jon viacid wê he ob ya ge
(Matyu 26:17-25; Mak 14:12-21; Jon 13:21-30)*

⁷ Buc wê tibii Yuda ob ya blet xêkizêc dì hi bwoc sipsip mi ya ên xovô buc Pasova ge,⁸ om Yesu nêl vô Pita yuu Jon ên nêbê, “Ga buc Pasova om muu loc myêl vizid ên il ob xa.”⁹ Om yuu kinêg vô i ên nêbê, “Ông nêb xii la myêl vac xumac tina?”

¹⁰ Mêgem Yesu nêl vô yuu ên nêbê, “Muu ngô lê. Muu loc vac vigwe Jelusalem dì muu obêc wê xomxo ti dikilê mia mi la ge, od muu timu vô xomxo tige vixa dì loc vac xumac wê xomxo tyo ob la vac ge,¹¹ dì nêl vô xomxo ti wê i xumac ge bê, ‘Xolac kehe nêb xii lam kinêg vô ông bê xumac nilô tina wê i hixôn nue ngivihi ob ya vizid vac ge?’¹² Muu obêc kinêg bêge vô i ge od obêc hilung xumac nilô levac ti wê yêp kisii ge vô muu. Susu wê il ob dô lec ge le vac xumac tige pyap, om muu loc myêl vizid wê il ob xa ge vac.”¹³ Mêgem Pita yuu Jon loc mi la, dì mila yê i tiyi wê Yesu nêl ge, mêtgem yuu la myêl yaén wê he ob ya ge.

*Yesu vông pasa vô nue ngivihi
(Matyu 26:26-30; Mak 14:22-26; 1 Kolin 11:23-25)*

¹⁴ Buc wê he ob ya vizid ge om Yesu hixôn nue ngivihi, he xôn dô di ya.¹⁵ Mêd Yesu nêl vô he ên nêbê, “A xovô ên a nêbê a obêc kô myavinê levac om a nilôg kidu a ên a nêb a ob xa vizid tiga hixôn xam tax lê dêc

kô myavinê timuên. ¹⁶ A nêl vô xam bêga bê a ob xa vizid tiga i ti vac lêm dì i loc tyip vô buc wê vizid tiga obêc vô nôn lec vac Anutu ben.”

¹⁷ Mêd Yesu hôm kap ti dì kitaa vô Anutu di nêl vô he ên nêbê, “Xam hôm dì titang vôma. ¹⁸ A ob nêl vô xam bê a obêc num wain bêga i ti vac lêm dì i miloc vô buc wê a ob num mia vac Anutu ben ge.” ¹⁹ Nang dêc Yesu hôm blet ti dì kitaa lec mêt hibu dì vông vô he titi dì nêl ên nêbê, “Ga a nigrivi wê a vông ên a nêb i ngidu xam xôn ge. Xam timu vô môp bêga dì xov a.” ²⁰ He ya pyap mêt Yesu vông bêge vô kap wain êno, dì nêl ên nêbê, “Mia wain ga a hi wê a ob kipyax sea ên xam ge. Mêgem kiyang paha wê Anutu hilu ge, a obêc vông i vô nôn lec ya a hi.

²¹ “Xam wê lê. Xomxo ti wê ob vông a vac tibii vevac vigê ge xeedô dì ya hixôn a lec tevol tiga. ²² A, Xomxo Nu, a ob xib i tiyi xochê kiyang wê Anutu nêl pyap ge lê, lêc xomxo ti wê ob vông a la vac he vigê ge obêc kô myaviwen levac lec timuên.” ²³ Yesu nêl bêge pyap, mêt nue ngivihi nêl vôma ên nêbê, “Om il tina wê il obêc vông môp tibêge?”

Yesu nue ngivihi ngaénma ên nêb he tina obêc tu levac i luu he baba vêl

²⁴ Mêt Yesu nue ngivihi ngaénma ên nêb mêt he tina obêc tu levac i luu he baba vêl. ²⁵ Lêc Yesu nêl vô he ên nêbê, “King kibun ga môp wê nêb tibii viyang viyang ge i loc vac he kwa ngibi, dì tibii wê tu levac ge nêb xomxo wê pileva ge i pimil he ên yuac wê he vông ge. ²⁶ Lêc xam o lêc timu vô môp bêge lêm. Nge, xam wê xam kô lêm levac ge, xam dô i tiyi xomxo wê lê maén ge, dì xam wê xam tu levac ge, xam dô i tiyi xochê xomxo wê mi yuang yuac vô xam ge. ²⁷ A ob kinêg xam bê xomxo ngwe na wê levac ge? Ge xomxo ngwe wê dô dì ya ge, me i nu yuac ngwe wê myêl i xen yaén dì kô mi lam ge? Ge xam xovô ên xam nêbê ge xomxo ngwe wê dô mi ya ge. Lêc a ga, a lam dô hixôn xam tiyi xochê xam num yuac ti.

²⁸ “Viyin tibeac tulec a, lêc xam o sea a lêm. Nge, xam kilê viyin hixôn a. ²⁹ Mag Anutu nêb a tu king dì kô lêg levac, om a ob vông xam tu king dì kô lêm levac hixôn a êno bêge, ³⁰ om buc wê a ob tu king ge od xam ob dô hixôn a dì il xôn ob xa dì num, dì xam obêc dô lec sia king dì yaxê lime Islel wê xam hipu vigê yuu dì tô mi la yuu ge nêl kiyang.”

Yesu nêl ên nêb Pita obêc yax i vun

(Matyu 26:31-35; Mak 14:27-31; Jon 13:36-38)

³¹ Yesu nêl vô Saimon Pita ên nêbê, “Saimon, ngô lê. Seten nêl ên nêbê ob yaxê xam, om Anutu tyuc lec ên nêb i yaxê. ³² Lêc a kitaa vô Anutu lec ông ên a nêbê ông o lêc sea vông vinên lêm. Dì buc wê ông ob pilepac ông mi lax vô Anutu ge od ông ngidu lime nêl vông vinên xôn.”

³³ Lêc Pita nêl vô i ên nêbê, “Apumtau, a obêc loc hixôn ông. Wê tibii ob vông ông la vac kalabuhu me hi ông wib ge, od a ob kô myavinê hixôn ông.” ³⁴ Lêc Yesu nêl vô i ên nêbê, “Pita, a ob nêl vô ông bê vô bucên tyá ga kokilêx vôên vya obêc gên ma dì ông ob yax a vun lu yon bê ông lungê a.”

Kiyang lec susu wê ob ngidu xomxo xôn ge

³⁵ Yesu nêl vô nue ngivihi ên nêbê, “Buc ilage wê a vông xam la vac yuac ge od a nêb xam kôen vixec yuu mone di su i ma. Om a ob kinêg vô xam bê susu ya mi ma ên xam vô buc ya, me?” Lêc he nêl ên nêbê, “Maê, susu ti o ma ên xe buc ti lêm.” ³⁶ Mêt Yesu nêl ên nêbê, “Dom gwêbaga, xomxo ob viac xam lêm, om xam vixec mone obêc dô ge, od xam kô hixôn

mì loc. Dì vixec êno bêge. Dì xam ti yipac obêc ma ge od xam vông nêm kolsiot ên tibii i kisuu dì xam kô mone mi loc kisuu yipac lec.³⁷ A nêl bêga vô xam, ên viyin obêc val i tiyi kiyang wê yêp vac xolac bêga ên nêbê, ‘Xomxo nêl nêb i ge tibii nipaên.’ Om a ob nêl vô xam bê kiyang tiga obêc vô nôn lec vô a, ên kiyang vihati wê he kivuu lec a ilage obêc vô nôn lec.”³⁸ Om he nêl vô Yesu ên nêbê, “Apumtau, wê. Yipac yuu yêp ga.” Mêd Yesu nêl ên nêbê, “Ge pyap.”

*Yesu la kitaa gê Getsemani
(Matyu 26:36-46; Mak 14:32-42)*

³⁹ Pyap dêc Yesu sea Jelusalem dì la lec kitôn Oliv tiyi xocbê mi vông ge, mêd nue ngivihi timu vô i vixa mi he la.⁴⁰ Mêd he mila vigwe tige om Yesu nêl vô he ên nêbê, “Xam dô dì kitaa êdêc viyin wê ob yaxêن xam ge i o lêc vông xam tô lêm.”⁴¹ Mêd Yesu sea he dì la teva tya tiyi xocbê xomxo ti ob nêx ngidax la tô ge, dêc la yev vixa kitu vac di kitaa bêga ên nêbê,⁴² “O Mag, ông obêc tyuc lec ge od ông vô viyin tiga vêl ên a. Lêc ông o lêc vông i tiyi wê a nêb ông vông ge lêm. Nge, ông vông i tiyi wê ôcông va xovô ge.”

⁴³ [Mêd angela ti lam gê kisiinê dì lam ngidu i xôn. ⁴⁴ Yesu nilô vô viyin levac dì i kitaa xêkizêc dì nivinê tyip tiyi xocbê hi ge dì yuc la kibun.]

⁴⁵ Yesu kitaa pyap dì kidi mi lax vô nue ngivihi, lêc yê wê he nilô vô viyin levac om he yêp.⁴⁶ Mêgem Yesu nêl vô he ên nêbê, “Bêna lêc xam diwêpê? Xam kidi lec di kitaa êdêc viyin wê ob yaxêن xam ge i o lêc vông xam tô lêm.”

*Judas vông Yesu la vac Yuda levac vigê
(Matyu 26:47-56; Mak 14:43-50; Jon 18:3-11)*

⁴⁷ Yesu gên dinêl kiyang tige dì xomxo tibeac val mi lam. Judas wê Yesu nue ngivihi vigê yuu dì tô mi la yuu ge ti kô tibii mi he lam, dêc Judas val le hixôn Yesu ên nêb ob nga lia,⁴⁸ lêc Yesu nêl vô i

ên nêbê, “Judas, bêna lêc ông nga Xomxo Nu lia ên ông nêb tibii i lam hôm i xôn?”

⁴⁹ Yesu nue ngivihi yê wê tibii tigee nêb ob hôm i xôn ge om he kinêg vô i ên nêbê, “Apumtau, ông nêb xe hi he ya yipac, me?”⁵⁰ Lêc lutibed nu ngivihi ti hôm yipac dì sap xomxo levac wê mi si daa ge nu yuac ti ninia lihi vilu hiyôv vêl.⁵¹ Lêc Yesu nêl ên nêbê, “Môp bêge i ma.” Mêd vyax vigê lec xomxo tige ninia dì i vô niviha lec.

⁵² Mêd xomxo wê lam ên nêb ob lam hôm Yesu xôn ge, ge he xomxo levac wê mi si daa gee dì xêhipu levac wê mi viac Anutu xumac ngibua gee, hixôn he Yuda levac levac ya, om Yesu nêl vô he ên nêbê, “Xam xo ên xam nêbê a tibii yôdac ti om xam lam hixôn yipac yuu vigo?⁵³ Ilage a mi dô hixôn xam vac Anutu xumac ngibua tiyi buc vihati, lêc xam o hôm a xôn lêm. Lêc gwêbaga buc wê xam vông, om xêkizêc wê mapitoc vông ge vô levac.”

*Pita yax Yesu vun nêbê i lungêñ
(Matyu 26:57-58,69-75; Mak 14:53-54,66-72; Jon 18:12-18,25-27)*

⁵⁴ He hôm Yesu xôn dì kô i mi la vô xomxo ti wê tu xomxo daa sién nêl levac ge om he mila vac xomxo levac tyo ben, dì Pita timu vô he vixa lêc le lam teva teva.⁵⁵ Mêd xomxo wê dô vac xomxo levac tige ben ge vev ngwax lec wetôv dì nyuu mi dô, dì Pita la dô hixôn he.⁵⁶ Mêdêc vêx yuac

ti yê Pita wê xeedô di ngwax linac lec ge om yê i kizêc dêc nêl ên nêbê, “Xomxo tya ga wê mi dô hixôn Yesu ge.”⁵⁷ Lêc Pita nêl ên nêbê, “A lungên xomxo tige.”⁵⁸ He dô nipwo tya, nang dêc xomxo ngwe yê Pita nang di nêl vô i ên nêbê, “Ông wê ông mi dô hixôn Yesu he nue.” Lêc Pita nêl ên nêbê, “Maê, o a lêmê.”

⁵⁹ Hiyôv manôn ti la vêl, nang dêc xomxo ti nêl xêkizêc nang ên nêbê, “Vixôhîlôg, xomxo tiga wê mi dô hixôn Yesu, ên yuu xôn tibii Galili yuu.”

⁶⁰ Lêc Pita nêl ên nêbê, “A lungên kiyang wê ông nêl ge.” Pita gên o nêl kiyang tiyôô lêm, di kokilêx hi via lutibed.⁶¹ Mêd Apumtau Yesu pilepac i di yê Pita, om Pita xovô kiyang wê Yesu nêl vô i ên nêbê, “Vô bucên tiga kokilêx vöen via obêc gên ma di ông obêc yax a vun lu yon di nêl bê ông lungên a.”⁶² Pita xovô wê i vông i so ge om sea vigwe tige di la byag levac.

*Yesu la le vô tibii Yuda levac levac manôn
(Matyu 26:59-68; Mak 14:55-65; Jon 18:19-24)*

⁶³ Mêd xomxo wê hôm Yesu xôn ge keac nipaên lec di hi,⁶⁴ di ku i manôn vac nivimihi di nêl vô i ên nêbê, “Ông nêl bê letya hi ôngê.”⁶⁵ Mêd he nêl kiyang nipaên tibêge tibeac lec i.

⁶⁶ Vigwe vidii mêd he Yuda levac levac nêb ob kitucma, om xomxo levac wê mi si daa gee di xomxo wê xovô Moses xolac gee hixôn he levac levac ge mangwe, he kitucma mi dô, mêd tibii kô Yesu mi la lax vô he manôn. Mêd he kinêg vô Yesu ên nêbê,⁶⁷ “Nêl vô xe bê ông ge Kilisi ti wê Anutu nêb ob vông i lam ge, me?” Lêc Yesu nêl vô he ên nêbê, “A obêc nêl kitong vô xam ge od xam ob vông i vin a vyag lêm,⁶⁸ di a obêc kinêg kiyang vô xam ge od xam ob luu a vyag lêm. Nge, xam ob dô kiyang maên.⁶⁹ Viwen wê timuên ge, a, Xomxo Nu, a ob dô vô Anutu wê xêkizêc kehe ge vigê hiyôv.”

⁷⁰ Mêd he vihati kinêg ên nêbê, “Ông ge Anutu nu mêt?” Mêd Yesu nêl ên nêbê, “Xam nêl i tiyi, ên a ga Anutu nu.”⁷¹ Mêd he nêl vóma ên nêbê, “Pyap om il ob kinêg kiyang ya hixôn lêm. Èn ici va nêl i kitong vac mya mi il ngô pyap.”

23

*Yesu la le vô gavman levac Pailat manôn
(Matyu 27:1-2,11-14; Mak 15:1-5; Jon 18:28-38)*

¹ Xomxo levac vihati kidi lec di kô Yesu mi la di la lax vô Pailat manôn.² Mêd he nêl kiyang nipaên lec Yesu bêga ên nêbê, “Xecxe xê wê xomxo tiga vô pilepac pilepac vô xe di nêb xe o vông mone takis vô il nêd king Sisa lêm, di kityoo xe ên nêbê i ge Kilisi wê tu king ge.”³ Mêd Pailat kinêg vô Yesu ên nêbê, “Ông ge king wê he Yuda vông ge, me?” Mêd Yesu lee yuu ên nêbê, “Ông nêl i la tiyi.”⁴ Mêd Pailat nêl vô xomxo levac daa sién hixôn xomxo gee vihati ên nêbê, “A yaxên xomxo tiga nêl kiyang, lêc kiyang ti o yêp vô i lêm.”⁵ Lêc xomxo tigee nêl kiyang xêkizêc ên nêbê, “Xomxo tige la nêl kiyang vaxvax vô xomxo vac vigwe Galili di la vac vigwe Judia vihati di val ga hixôn.”

Yesu la le vô gavman levac Helot manôn

⁶ Pailat ngô kiyang tige, dì kinêg vô he ên nêbê, “Xomxo tiga, tibii Galili ti, me?” ⁷ Léc he nêl ên nêbê Yesu ben Galili wê Helot viac ge, om Pailat vông i loc mi la vô Helot, ên Helot lam dô Jelusalem vô buc tige.

⁸ Yesu mila vô Helot mêt Helot yê dì xéyaa vô niviha yang, ên ilage xomxo nêl Yesu kitong vô i om Helot nêb ob yê Yesu dì nêb i vông do ti ên i ob yê. ⁹ Mêgem Helot kinêg kiyang tibeac vô Yesu, lêc Yesu o nêl kiyang ti lax vô i lêm.

¹⁰ Mêt xomxo levac wê mi si daa gee hixôn xomxo wê xovô Moses xolac gee le kwabo dì vông kiyang xékizéc vô Yesu, ¹¹ dì Helot hixôn nue vevac yê Yesu nipaên dì so vya vô i mêt kô ngakwi niviha ti dì lam vinyum lec Yesu. Pyap dêc vông i lax mi la vô Pailat nang. ¹² Ilage Helot yuu Pailat mi yêma nipaên, lêc buc tige yuu xéyaa vir lecma dì yuu keac niviha vôma nang.

*Pailat tyuc lec nêb tibii i hi Yesu lec xax pola
(Matyu 27:15-26; Mak 15:6-15; Jon 18:39-19:16)*

¹³ Pailat tyuc xomxo levac wê mi si daa gee hixôn xomxo levac levac di tibii tibeac kituc la vô i, ¹⁴ mêt nêl vô he ên nêbê, “Xam kô xomxo tige mi lam vô a ên xam nêb mi nêl kiyang vaxvax vô xomxo om vông he yê gavman nipaên, om a kinêg kiyang vô i lec xam mammôn, lêc a o tulec kiyang xocbê xam nêl ge ti vô i lêm. ¹⁵ Dì Helot éno o tulec kiyang ti lêm, om vông i lôm vô il nang. Xam ngô lê, xomxo tiga o vông ti so tiyi wê il ob hi i yib lec ge lêm. ¹⁶ Om a ob pisa i ya yihi dì vông i lôc ben.”

¹⁷ [Môp wê he Yuda vông ge yêp bêga nêbê buc wê he ob myêl vizid Pasova ge od he mi nêl xomxo wê dô vac kalabuhu ge ti lê vô gavman levac, dì gavman levac ob piwelac i vêl.] ¹⁸ He môp bêge, mêtgem xomxo tibeac tyuc vya levac ên nêbê, “Hi xomxo tiga i yib dì vông Balabas i lôm vô xe.” ¹⁹ Ilage Balabas hixôn xomxo tibeac vông vevac vô gavman Lom vac vigwe tige dì hi xomxo ya yib om he vông i la dô vac kalabuhu. ²⁰ Pailat nêb ob piwelac Yesu om nêl bêge vô xomxo tibeac tigee nang, ²¹ lêc he tyuc vya levac nang ên nêbê, “Hi i yib lec xax pola. Hi i yib lec xax pola.” ²² Mêtgem Pailat nêl kiyang ti wê vông yon ge vô he ên nêbê, “Ên xomxo tiga vông nipaên vatya? A o tulec i nêl nipaên ti tiyi wê il ob hi i yib lec ge lêm. Om a ob pisa i ya yihi dì vông i lôc nêl.” ²³ Léc he tyuc vya levac nginong ên nêbê, “Hi i lec xax”, om he vya hi Pailat vya tô, ²⁴ mêt Pailat timu vô he vya, ²⁵ om Balabas wê vông vevac vô gavman dì hi xomxo yib ge, Pailat nêb he i piwelac i vêl i tiyi wê he nêl ge, dì vông Yesu la vac he vigê ên nêb he i vông i tiyi wê he xovô ge.

*He hi Yesu lec xax pola
(Matyu 27:32-44; Mak 15:21-32; Jon 19:17-27)*

²⁶ He kô Yesu mi la vô môp, dêc he yê xomxo ti wê dilam ên nêb ob la Jelusalem ge. Xomxo tyo lê nêbê Saimon dì i ben Sailini. Om he hôm i xôn di vông i kilê xax pola wê he ob hi Yesu lec ge dì timu vô Yesu vixa.

²⁷ Yesu mug mêt xomxo tibeac ditimu vô i vixa, dì vêx ya byag dì vông tilôt lec i. ²⁸ Om Yesu pilepac i dì nêl vô he ên nêbê, “Xam vêx Jelusalem, le i lêc byag ên a lêm. Nge, xacxam va byag ên xam hixôn nume. ²⁹ Ên obêc buc timuên ge od tibii ob val vông viyin vô xam, om xam ob nêl bêga bê, ‘Vêx wê le pileva di kôen nu ma ge, me vêx wê o vông lul vô nu lêm ge, he ob dô viyin maén tya.’ ³⁰ Mêt vô buc tige xomxo ob nêl vô kitôn bê,

‘Pul mi lam hi xe.’ Di ob nêl vô kitôn nipwo bêga bê, ‘Lam hivun xe xôn.’
31 Gwêbaga he vông viyin vô a tiyi xocbê ob vuv xax paha ge. Di xam ge tiyi xocbê xax mupacén om he ob vông bêna vô xam timuén?”

32 Mêd he kô tibii nipaén yuu hixôn, wê ob hi yuu yib hixôn Yesu. **33** Mêd he mila vac vigwe ti lê nêbê bazub len, mêd he hi Yesu hixôn tibii nipaén yuu ge lec xax pola vac vigwe tige. Yesu yux vac mahigun dì tibii nipaén yuuo yux vilu vilu. **34** Mêd Yesu nêl ên nêbê, “Mag, ông kitya tibii gae nêñ nipaén vêl, ên he lungêñ om he vông.” Mêd tibii vevac tigeê nêb ob titang Yesu ngakwi vóma om he tide mi yê dêc titang i tiyi. **35** Mêd xomxo tibeac dô dì yê, mêd Yuda levac levac nêl nipaén lec Yesu ên nêbê, “Xomxo tige ngidu xomxo ya xôn ilage, om obêc Kilisi wê Anutu vinoo i nôn ge od i ngidu ici va xôn êno.”

36 Mêd tibii vevac êno nêl nipaén lec Yesu, dì he kô mia wain wê kilin ge mi la le kwabo vô Yesu nêb ob vông mi i num, **37** dì nêl vô i ên nêbê, “Ông obêc xomxo Yuda nêñ king ge od ông ngidu ôcông va xôn.” **38** Mêd kiyang ti yêp lec kisii vô Yesu bazub ên nêbê, “XOMXO TIGA, KING WÊ HE YUDA VÔNG GE.”

39 Tibii nipaén wê yux lec xax hixôn Yesu ge, ngwe nêl vya nipaén vô Yesu ên nêbê, “Ông Kilisi mè? Od ông ngidu ôcông va xôn dì ngidu xii xôn êno.” **40** Lêc ngwe kunac di nêl ên nêbê, “Ông o xona ên Anutu lêmè? Xon xôn kô myaviwen nipaén tiyima lê, **41** lêc u kô nipaén tiyi môp nipaén wê u vông ge, om ge la tiyi, dom xomxo tiga o vông nipaén ti lêm.” **42** Mêd nêl vô Yesu ên nêbê, “Yesu, buc wê ông ob tu king hixôn xékizéc ge od ông xo a.” **43** Mêd Yesu nêl vô i ên nêbê, “A ob nêl hixôn nôn vô ông bê gwêbaga ông ob la dô hixôn a gê paladis.”

Yesu yib

(Matyu 27:45-56; Mak 15:33-41; Jon 19:28-30)

44 Hiyôv tyip kitôn mêd hiyôv linacên ma di vigwe vihati vô mapitoc ta dì i la vô hiyôv manôñ yon wê hucen ge. **45** Mêd nivimahi levac ti wê yux vac Anutu xumac ngibua ge lêx la yuu vac mahigun.

46 Mêd Yesu tyuc vya levac ên nêbê, “O Mag, a kinug i loc vac ông vigêm.” Nêl bêge pyap mêd yib.

47 Mêd tibii levac wê viac nue vevac ge yê susu tigeê dì pimil Anutu di nêl ên nêbê, “Vixôhilôg, xomxo tiga niviha dì nipaén ti o yêp vô i lêm.”

48 Mêd xomxo wê val ên nêb ob yê ge, he tibeac le dì yê wê Yesu yib ge, pyap dêc he lax mi la ben, lêc he nilô vô viyin om he kituu pikopac dì la.

49 Dì xomxo wê Yesu lie gee hixôn vêx wê sea Galili di mi timu vô Yesu vixa gee, he xôn le teva tya dì yê susu vihati yang wê tibii vông vô Yesu ge.

He lii Yesu vac lôva

(Matyu 27:57-61; Mak 15:42-47; Jon 19:38-42)

50-51 Xomxo ti dô lê nêbê Josep dì i ben Alimatiâ wê yêp vac vigwe Yuda ge. Josep ge Yuda levac ti wê tu kaunsil dì mi dô vac kitucmaén hixôn Yuda levac levac, lêc o tyuc lec kiyang wê kaunsile hilu lec Yesu ge hixôn lêm. Ên Josep ge xomxo niviha ti wê dô bin buc wê Anutu nu ob lam tu king gê kibun ga. **52** Mêd Josep la vô Pailat di la kitaa Pailat ên nêb ob kô Yesu ninivi mi la yev. **53** Mêgem Pailat tyuc lec dì Josep la kwax Yesu vêl

ên xax dì la viyum vac nivimihi kwem ti dì la lii vac lôva wê he yev vac ngidax ge ti. Lôva tige, he o lii xomxo ti vac ila lêm. Nge, gên paha. ⁵⁴ Buc tige, ge buc wê he Yuda ob viac he, ên vigwe obêc huc ge od he buc sabat wê ngibua ge myahipu ob val.

⁵⁵ Mégem vêx wê sea ben Galili dì mi timu vô Yesu gee, he timu vô Josep vixa dì la yê wê he lii Yesu ninivi vac lôva ge. ⁵⁶ Pyap dì he lax mi la ben dì lax viac wel hixôn susu wê nivivea ge. Pyap dêc buc sabat, om he dô seac vêl tiyi môp wê Moses xolac nel ge.

24

Yesu kidi lec vac yibén

(*Matyu 28:1-10; Mak 16:1-8; Jon 20:1-10*)

¹ Sabat la vêl di da pitoc yang ge vêx tigee kô susu nivivea wê he viac pyap ge mi la. He mila vô lôva wê he lii Yesu vac ge, ² lêc yê ngidax wê tibii lax i le vac vuayen xôn ge vixog la vêl, ³ om he vac la vac lôva nilô lêc he o yêvô Apumtau Yesu ninivi lêm. ⁴ Mégem he xo kiyang tibeac tibeac, lêc lutibed vux yuu wê vinyum ngakwi kwem wê teeën ge val le kwabo vô he. ⁵ Mêd vêx tigee yê dì xona mabu di kilong kibun, lêc xomxo yuu ge nelô vô he ên nêbê, “Bêna lêc xam myag xomxo mavîha tige vac xomxo yibén bené? Xomxo tige yêpêng ga ma, dì i kidi lec mavîha mi la. ⁶ Xam xovô i lôc vô kiyang wê Yesu nelô vô xam dì xam gên dô Galili ge wê i nelô bêga ên nêbê, ⁷ ‘He obêc vông Xomxo Nu la vac tibii nipaên vigê dì he hi i yib, di buc ti wê vông yon ge od obêc kidi lec i tii vac nang i tiyi kiyang wê Anutu nelô pyap ge.’”

⁸ Mégem vêx tigee xovô kiyang wê Yesu nelô ilage nang, ⁹ om he sea lôva di lax mi la nelô kiyang tigee vihati kitong vô nue ngivihi vigê yuu dì to mi la ti ge hixôn xomxo yaya. ¹⁰ Vêx wê nelô kiyang tige vô nue ngivihi ge, Malia Makdala yuu Joana yon Malia wê Jems ta ge dì vêx yaya. ¹¹ Lêc nue ngivihi ngô kiyang tige tiyi xocbê kiyang kityooën, om he o vông i vin lêm. ¹² Mégem Pita kidi lec dì tup mi la vô lôva, dì mila kilong lôva nilô mi yê, lêc yê wê nivimihi ti wê he viyum Yesu vac ge diyêp pileva, mégem lax mi la hixôn nilô viyin, ên lungêng tige kehe.

Xomxo yuu yê Yesu lec môp

(*Mak 16:12-13*)

¹³ Vô buc tige, xomxo wê mi dô hixôn Yesu ge yuu la vô môp ên nêb ob la vigwe ti lê nêbê Emeas. Môp wê ob sea Jelusalem dì la Emeas ge tiyi xocbê 11 kilomita. ¹⁴ Yuu dila vô môp dì keac lec byed wê tibii vông vô Yesu ge. ¹⁵ Yuu dikeac, lêc Yesu val vô yuu dì yon xôn dila vô môp. ¹⁶ Yuu manôñ yê Yesu lê, lêc yuu o xovô bê ge Yesu lêm.

¹⁷ Mêd Yesu kinêg vô yuu ên nêbê, “Muu dikeac lec vatya dì tup vô môpê?” Mégem yuu le dì nilô vô viyin dì manôñ vô nipaên. ¹⁸ Mêd ngwe wê lê nêbê Kliopas ge nelô vô Yesu ên nêbê, “Tibii vac vigwe viyang viyang ge la Jelusalem om he vihati yê dì ngô susu wê val vac buc mahigun tiga, dom mêd ông tibed wê ông dilungê?” ¹⁹ Mêd Yesu kinêg vô yuu ên nêbê, “Muu nelô lec susu vatya?” Om yuu nelô i ên nêbê, “Xii dinêl kiyang lec Yesu Nasalet. Yesu ge plopete ti wê vông yuac xêkizêc dì nelô kiyang hixôn xêkizêc, di Anutu hixôn xomxo vihati yê i niviha. ²⁰ Lêc xomxo levac wê mi si daa gee hixôn

Yuda levac wê mi viac il gee, he vông i la vô gavman levac dì gavman levac tyuc lec nêb i yib om he hi i yib lec xax pola. ²¹ Ilage xe vông i vin ên xe nêbê Yesu ge xomxo wê ob vô Islel vêl ên nipaên ge, lêc mad xomxo tyo yib. Di kiyang bo ti hixôn bêga bê xomxo tyo yib nyop, om ga buc wê vông yon ge. ²² Mêd gwêbaga vêx wê xe xôn mi dô ge vông xe yetac mabu, ên he kidi pitoc yang mi la yê lôva ti wê he lii Yesu vac ge, ²³ lêc he o tulec Yesu lêm, om he vena nêl vô xe ên nêbê, ‘Xe xê angela ya di he nêl vô xe ên nêbê Yesu kidi lec mavilha nang.’ ²⁴ Om xomxo wê xe xeedô gee ya kidi di loc mi la yê lôva nang, lêc mila yê tiyi xochê vêx tigee nêl ge, dì he o tulec Yesu lêm.”

²⁵ Mêd Yesu nêl vô yuu ên nêbê, “Muu piyôp maên. Bêna lêc muu gên o vông i vin kiyang wê plopete nêl ilage lêmê? ²⁶ Ên kiyang yêp bêga nêbê Kilisi wê Anutu nêb ob vông i lam ge obêc kô myavinê, pyap dêc obêc la dô vac xêseac dì kô lê levac, lêc mêd muu o xovô tige lêm?” ²⁷ Yesu nêl bêge pyap, nang dêc nêl Moses xolac dì nêl plopete kiyang ge vihati kehe kitong hixôn vô yuu, ên nêbê kiyang gee vihati nêl lec i.

²⁸ Mêd yon mila kwabo vô vigwe wê yuu ob la ge, lêc Yesu vông xochê ob luu yuu vêl dì loc mi la ge, ²⁹ om yuu nêl xôn ên nêbê, “Ông dô hixôn xiê, ên hiyôv hoo la gwêba om vigwe ob buc.” Om Yesu la hixôn yuu dì yon la dô vac yuu ben. ³⁰ Mêd yon dô ên nêb ob ya yaên, dêc Yesu hôm blet dì kitaa lec dì hibu dì vông vô yuu. ³¹ Mêd yuu yê dì xovô nêbê ge Yesu, lêc lutibed Yesu xôa ma di yuu o yê i ti vac nang lêm. ³² Di yuu nêl vòma ên nêbê, “Buc wê Yesu keac hixôn u vac môp dì nêl xolac kehe vô u ge od kiyang tige tipi vô u nilôd dì vông u xêdyaa vô niviha.”

³³ Mêgem lutibed yuu kidi lec dì lax mi la Jelusalem vô nue ngivihi vigê yuu di tô mi la ti hixôn lie ya wê he kitucma mi dô ge, ³⁴ mêd he nêl vô yuu ên nêbê, “Vixôhilôg, Apumtau Yesu kidi lec. Ge hilung i vô Saimon Pita gwêba.” ³⁵ Mêd yuu nêl kitong vô he lec wê Yesu dila hixôn yuu vô môp ge, dì nêl wê Yesu hibu blet dì kitaa lec om yuu xovô i.

Yesu hilung i vô nue ngivihi (Matyu 28:16-20; Mak 16:14-18; Jon 20:19-23)

³⁶ Yuu gên dinêl kiyang tige, dì Yesu val le vac he mahigun dì nêl vô he ên nêbê, “Kiyang malehe i hivun xam xôn.” ³⁷ He ngô kiyang tige om he yetac di xona mabu, ên he xo ên he nêbê ge xomxo yibén ti kinu. ³⁸ Lêc Yesu nêl vô he ên nêbê, “Bêna lêc xam nilôm vô viyin di xam xo kiyang tibeacé? ³⁹ Xam wê a vigêg yuu vixag ga dì xovô bê ga a, dì xam vyax vigêm lec a nignivi mi yaxên, ên xomxo yibén kinu ge od len yuu liyôhô o xochê a ga lêm.” ⁴⁰ [Yesu nêl bêge pyap dì hilung vigê yuu vixa vô he.] ⁴¹ He yê bêge di nilô vô niviha, lêc he gên o vông i vin lêm. Nge, he nilô vô tibeac. Om Yesu nêb he i xovô bê i o xomxo yibén kinu lêm, om kinêg vô he ên nêbê, “Yaên ya dô vô xamê?” ⁴² Mêgem he vông beac wê he si lec ngwax ge ti vô i, ⁴³ mêd i hôm dì ya vô he manôn.

⁴⁴ Nang dêc Yesu nêl vô he ên nêbê, “Ilage wê a gên dô hixôn xam ge, od a nêl kiyang bêga vô xam ên a nêbê kiyang wê xomxo kivuu lec a mi i yêp vac Moses xolac yuu plopete kiyang dì yêp vac kipihac Sam ge, ge vihati obêc vô nôn lec.” ⁴⁵ Ge Yesu nêl i kitong vô he om he piyôp xovô kiyang vihati wê yêp vac xolac ge, ⁴⁶ di i nêl vô he ên nêbê, “Kiyang yêp bêga nêbê Kilisi wê Anutu nêb ob vông i lam ge obêc kô myavinê dì yib,

dì buc ti wê vông yon ge od obêc kidi lec maviha vac yibên nang,⁴⁷ di kiyang yêp hixôn bêga nêbê xomxo i loc nêl xolac lec Kilisi lê vac vigwe vihati bêga bê xomxo i pilepac he êdêc Anutu i kitya he nêñ nipaêñ vêl. Xam vông yuac tige gê Jelusalem tax,⁴⁸ di xam ob nêl kiyang wê xam wê di ngô ge vihati kitong.⁴⁹ Xam ngô lê. Myakilôhô Ngibua wê Mag nêl nêb ob vông i lam ge, a obêc vông i lam vô xam, om xam dô Jelusalem di i loc vô buc wê Anutu ob vông xêkizêc wê kisii ganê i lam hivun xam xôn lê.”

*Yesu lec mi lax vô Anutu
(Mak 16:19-20; Sinalé 1:9-12)*

⁵⁰ Mêd Yesu kô he dì he sea Jelusalem mi la Betani, mêd Yesu vông vigê la kisii di kitaa lec he.⁵¹ Yesu kitaa mi le, di he yê wê Anutu kô i di i lec mi la kisii ge.⁵² Mêd he lax hixôn xêyaa niviha mi la Jelusalem,⁵³ mêd tiyi buc vihati ge he la pimil Anutu vac xumac ngibua.

JON

Yesu Kilisi xolac niviha wê Jon kivuu ge

Kiyang nôn lam tu xomxo gê kibun

¹ Ilage vô buc taxlee ge, kiyang tyo dô. Kiyang tyo dô hixôn Anutu, dì ici va Anutu. ² Vô buc mugên ilage i dô hixôn Anutu, ³ dì Anutu nêl dì xomxo tyo tung susu vihati, dì susu ti o lam môt bangwe lêm. Nge, xomxo tyo tung susu vihati. ⁴ Di ici va ge maviha kehe, dì maviha wê i vông ge linac vô xomxo mi he dô vac xêseac. ⁵ Xêseac wê i vông ge linac vac mapitoc, dì mapitoc o tiyi wê ob hivun xêseac tige xôn ge lêm.

⁶ Anutu vông xomxo ti lam lê nêbê

Jon. ⁷ Jon lam nêl xêseac kehe kitong vô xomxo ên nêb he vihati i ngô kiyang wê i nêl ge dì vông i vin. ⁸ Ici va ge o xêseac tyo lêm. Nge, lam ên nêb ob nêl xêseac tige kitong vô xomxo.

⁹ Xêseac tige lop mi lam kibun ga, dì i xêseac nôn wê ob linac lec xomxo vihati ge. ¹⁰ Ici va tung susu kibun ga dì ici va lam dô kibun, lêc xomxo kibun ga, he o xovô i lêm. ¹¹ La vac ben vigwe kehe lê, lêc lie o kô i lec niviha lêm. ¹² Lêc xomxo wê kô i lec niviha dì vông i vin ge, od vông he tu Anutu nue. ¹³ Môt wê he tu Anutu nue ge o tiyi xochê môt wê xomxo kibun ga kô nue ge lêm, dì kehe o yêp vac xovôen wê xomxo vông ge lêm. Nge, Anutu vaci vông he tu i nue.

¹⁴ Kiyang lam tu xomxo gê kibun ga dì i dô vac xe mahigun, om xe xê xêseac wê i vông ge. Xêseac tige Anutu vông vô nu tuc tibed, di xêyaa vin lecên yuu kiyang nôn hivun i xôn. ¹⁵ Jon nêl xomxo tige kitong dì keac vya levac ên nêbê, "Xomxo tyo tiga, wê a nêl kiyang lec ilage ên a nêbê xomxo ngwe wê ob val timuên ge luu a vêl, ên buc wê a gên ma ge, xomxo tiga dô tax."

¹⁶ Ici va tu vizid viyang viyang ge kehe om vông vizid tibeac vô il luu vêl. ¹⁷ Ilage Anutu nêl xolac vô Moses mi i nêl vô xomxo, lêc xêyaa vin lecên hixôn kiyang nôn, Yesu Kilisi vaci kô mi lam. ¹⁸ Xomxo ti o yê Anutu lec manôn lêm. Nu tuc tibed wê dô hixôn Ma Anutu ge wê lam nêl Anutu kehe kitong vô il.

*Jon Lipacén nêl i kehe kitong vô xomxo
(Matyu 3:1-12; Mak 1:2-8; Luk 3:2-18)*

¹⁹ Yuda levac wê dô Jelusalem ge vông xomxo wê mi si daa gee hixôn xomxo Livai ya la vô Jon dì he la kinêg vô i ên nêbê, "Ông ge letya?" ²⁰ Om Jon nêl i kehe kitong yêp seac vô he dì o yax vun lêm, om nêl i kitong ên nêbê i o Kilisi ti wê he dô bin ge lêm. ²¹ Om he kinêg ên nêbê, "Om ông letya? Ông tiyi xochê plopet Ilaija, me?" Lêc Jon nêl vô he ên nêbê, "A o Ilaija lêm." Om he kinêg nang ên nêbê, "Ông ge plopet ti wê xe mi dô bin ge, me?" Lêc Jon nêl ên nêbê, "A o plopet tige lêm." ²² Om he kinêg tui vac ên nêbê, "Ông ge letya? Xe obêc milax nêl kiyang tibêna vô xomxo wê vông xe lam ge? Om ông nêl ông kehe kitong vô xe." ²³ Om Jon nêl vô he tiyi xochê kiyang wê plopet Aisaia kivuu ilage bêga nêbê, "A ga xomxo ti

wê tyuc via levac vac vigwe mahigun pileva ên nêbê, ‘Xam viac Apumtau môt wê ob lam vac ge i yêp niviha.’”

²⁴ Xomxo tigeet, tibii Palisi vông he

lam, ²⁵ mêd he kinêg vô Jon ên nêbê, “Ông nêl ên ông nêbê ông o Kilisi lêm, dì nêl ên ông nêbê ông o Ilaija lêm, dì nêl ên ông nêbê ông o plopet tige lêm, lêc bêna lêc ông lipac xomxo ya mia?” ²⁶ Om Jon nêl ên nêbê, “A lipac xomxo ya mia pileva, dì xomxo ti val le vac xam mahigun lêc xam o xovô lêm. ²⁷ A lam tax dì xomxo tige obêc val timuên, lêc a o nigviha tiyi wê aob piwelac yihi vêl ên su wê i vông ge lêm.” ²⁸ Jon nêl kiyang tige gê Betani wê yêp mia Jodan kehe vilu ganê. Vigwe tige wê Jon mi lipac xomxo vac ge.

Yesu ge bwoc sipsip nu wê Anutu vông i lam ge

²⁹ Titige Jon yê wê Yesu val ge om nêl ên nêbê, “Xam wê lê, ge bwoc sipsip nu wê Anutu vông i lam kibun ên nêbê i lam yib dì kitya xomxo nén nipaên vêl ge. ³⁰ Ge xomxo wê a nêl kiyang lec ilage ên a nêbê, ‘A lam tax dì xomxo ti wê ob val timuên ge luu a vêl, ên buc wê a gên ma ge, xomxo tige dô tax.’ ³¹ A gên o xê xomxo tige lêm, lêc a lam lipac xomxo ya mia, ên a nêbê a ob nêl xomxo tige kitong vô xomxo Islel.”

³² Nang dêc Jon nêl kitong bêga ên nêbê, “A xê wê Myakilôhô Ngibua lam gê kisii ganê tiyi xochê menac tucluu dì lam yêp lec Yesu kisii. ³³ A gên o xovô i lêm, lêc Anutu wê vông a lam lipac xomxo ya mia ge nêl vô a tax ên nêbê, ‘Ông obêc wê Myakilôhô Ngibua lop mi lam dô lec xomxo ti ge od ông xovô bê xomxo tige wê ob lipac xomxo ya Myakilôhô Ngibua.’ ³⁴ A xê wê kiyang tige vô nôn lec ge om a nêl kitong bê xomxo tige, Anutu nu.”

Yesu keac xomxo yuudiyuu timu vô i vixa

³⁵ Vigwe vidiîen titige Jon le hixôn i nue ngivihi yuu, ³⁶ lêc yê wê Yesu val ge, om nêl ên nêbê, “Wê lê, ge bwoc sipsip nu wê Anutu vông ge.” ³⁷ Nu ngivihi yuu ge ngô wê Jon nêl ge om la timu vô Yesu mi he la. ³⁸ Mêd Yesu pilepac i di yê wê yuu la vô i vixa ge om kinêg vô yuu ên nêbê, “Muu lam ên vatya?” Lêc yuu nêl ên nêbê, “Labai, ông dô vac xumac tina?” Labai ge, kehe bêga nêbê xolac kehe. ³⁹ Om Yesu nêl vô yuu ên nêbê, “Muu lam wê lê.” Om yuu la hixôn Yesu mi la yê xumac wê Yesu yêp vac ge. Ge hiyôv manôn yuudiyuu wê hucén ge om yuu dô hixôn Yesu dì vigwe buc.

⁴⁰ Xomxo yuu wê ngô Jon via dì la hixôn Yesu ge, ngwe Andlu wê Saimon Pita li ge, ⁴¹ om Andlu la vô li Saimon dì nêl vô ên nêbê, “Xe xê Mesaia.” Mesaia ge, lê ngwe nêbê Kilisi dì kehe bêga nêbê xomxo ti wê Anutu vông i lam ge. ⁴² Mêd Andlu kô Saimon mi yuu la vô Yesu, mêd Yesu yê Saimon dì nêl vô ên nêbê, “Ông ge Saimon wê Jon nu ge, lêc a ob nêl ông lêm bê Sipas.” Lê Sipas ge, Glik via nêl bêga nêbê Pita, di kehe bêga nêbê ngidax.

⁴³ Vigwe vidiîen titige Yesu nêb ob la vigwe levac Galili om mila vô Pilip di nêl vô ên nêbê, “Lam timu vô a.” ⁴⁴ Pilip yon Andlu yuu Pita, yon ben kehe Betsaida. ⁴⁵ Mêd Pilip la myag Nataniel mi yêvô dì nêl vô ên nêbê, “Xomxo ti wê Moses kivuu kiyang lec mi i yêp vac kipihac xolac dì plopete kivuu kiyang lec hixôn ge, xe tulec i. Ge Yesu wê ma Josep vac vigwe Nasalet.” ⁴⁶ Lêc Nataniel nêl ên nêbê, “Nôn niviha ti ob val tyip vac vigwe Nasalet lêm.” Lêc Pilip nêl vô i ên nêbê, “Lam loc wê lê.” ⁴⁷ Mêd Yesu yê

wê Nataniel val vô i ge, om nêl lec i ên nêbê, “Wê, ge xomxo Islel niviha ti, wê kiyang kityooên ti o yêp vac i nilô ge lêm.”⁴⁸ Mêd Nataniel nêl vô Yesu ên nêbê, “Ông xovô a gê na?” Om Yesu nêl vô i ên nêbê, “Buc wê Pilip gên o keac ông lam lêm ge, ông le vac higuc kehe dì a xovô ông pyap.”⁴⁹ Om Nataniel nêl ên nêbê, “Xolac kehe, ông ge Anutu nu. Ông tu xe Islel nêm xomxo levac.”⁵⁰ Mêd Yesu nêl vô i ên nêbê, “Ông vông i vin ên wê a nêl vô ông ên a nêbê a xê ông le vac higuc kehe ge. Lêc timuên ông obêc wê susu ya obêc luu tiga vêl.”⁵¹ Mêd Yesu nêl hixôn ên nêbê, “A nêl hixôn nôn vô xam bê timuên xam obêc wê, lêc lag puunê obêc tax dì angela wê Anutu vông ge ob lec mi la kisii dì lop mi lôm vô Xomxo Nu.”

2

Yesu pilepac mia i tiyi xochê wain gê Kena

¹ Buc yuu la vêl dì buc wê vông yon ge xomxo vux ti ii vêx vac vigwe Kena wê yêp vac vigwe levac Galili ge, dì Yesu ta la dô hixôn.² Dì he tyuc Yesu he nue ngivihi ên nêb he i lam dô hixôn.³ Mêd xomxo num wain ma vêl, om Yesu ta la nêl vô Yesu ên nêbê, “He xen wain ma.”⁴ Lêc Yesu nêl vô i ên nêbê, “Tag, le i nêl vô a lêm. Ge yêp vô a, ên buc wê a vông ge gên yêp.”⁵ Mêd ta nêl vô nue yuac vihati ên nêbê, “Xam vông i tiyi kiyang wê Yesu ob nêl vô xam ge.”

⁶ Dêg ngidax vigê vilu dì sec ti le, wê he mi lipac vigê hixôn susu ya vac tiyi môp wê Yuda mi vông ge. Dêg tige levac mabu om dêg toto ge tiyi xochê ob kilê mia vac dêg nipwo kehe ti, me kehe ti dì vigê yuu mi too vac lêc i pup lec.⁷ Mêd Yesu nêl vô nue yuac tigee ên nêbê, “Xam loc kilê mia dì lam too vac dêg tigae dì i pup lec.” Om he la kilê mia mi lam too vac dêg tigee vihati mi i pup lec.⁸ Mêd Yesu nêl vô he ên nêbê, “Xam ka mia vac dêg nipwo dì kô mi loc vô xomxo levac ti wê viac yaêng ge.” Om he ka dì kô mi la vô xomxo levac tyo.⁹ Mia tige pilepac wain pyap mêd xomxo levac wê viac yaêng ge num lé lêc o xovô kehe lêm. Nue yuac wê ka wain tige, he xovô, lêc xomxo levac wê viac yaêng ge lungê, om keac xomxo ti wê ii vêx ge lam¹⁰ dì nêl vô i ên nêbê, “Tibii vihati mi vông wain nyen vô xomxo tax mi he num. Dì he obêc num levac ge od ob kô wain wê nyen maén ge mi vông vô he timuên. Dì ông va lax wain nyen le, lêc divông i lam timuên tyga.”

¹¹ Do levac tige Yesu vông gê Kena wê yêp vac vigwe levac Galili ge. Ge do taxlee wê Yesu vông ge, om hilung xêseac yuu xêkizêc wê i vông ge dì nue ngivihi yê dì vông i vin.¹² Pyap dêc Yesu he tae lie hixôn nue ngivihi he xôn la Kapaneam dì la dô buc ya.

Yesu tii xomxo wê vông vitevac vac Anutu xumac ngibua ge la vêl (Matyu 21:12-13; Mak 11:15-17; Luk 19:45-46)

¹³ Buc levac Pasova wê he Yuda ob xovô buc Isip ilage vô kwabo lec, om Yesu la Jelusalem¹⁴ dì la vac Anutu xumac ngibua nilô, lêc yê wê xomxo ya kô bwoc kau yuu sipsip di menac mi lam tung ên nêb tibii i kisuu dì vông i tu daa ge, di yê wê xomxo ya dô dì vông mone luuma ge.¹⁵ Om Yesu hôm yihi viiên dì tii xomxo tigee hixôn bwoc kau yuu bwoc sipsip la vêl ên xumac ngibua, dì kipyax mone wê he vông i luuma ge hixôn tevol la sea,¹⁶ dì nêl vô he wê vông vitevac lec menac ge ên nêbê, “Xam kô xam susu gee mi loc vêl, dì le i lêc vông Mag xumac i tu xochê vigwe maket

lêm.” ¹⁷ Mêd Yesu nue ngivihi xovô lec kiyang ti wê yêp vac kipihac xolac bêga ên nêbê, “A vông yuac xêkizêc ta ên a nêb ông xumac i yêp nivîha.”

¹⁸ He Yuda yê môt wê Yesu vông ge om la nêl vô i ên nêbê, “Ông vông tibêge om ông ob vông do tina ên i nêl ông kitong vô xe?” ¹⁹ Yesu nêl vô he ên nêbê, “Xam obêc dii xumac ngibua tiga vêl ge od a ob lox vac i tiyi buc yon.” ²⁰ Om he kinêg vô Yesu ên nêbê, “Xumac ngibua tiga, xomxo vông yuac lec tiyi xochbê klismas kehe yuu di vigê vilu di sec ti (46), lêc ông nêl ên ông nêbê ông ob lox xumac tige vac i tiyi buc yon bed mê?” ²¹ Lêc xumac ngibua wê Yesu nêl lec ge, ge nêl lec ici va ninivi, ²² om buc timuên wê Anutu tipi vô Yesu kidi lec vac yibêng ge, Yesu nue ngivihi xovô lec kiyang wê Yesu nêl lec xumac ngibua ge, om he vông i vin ên he nêbê kiyang wê Yesu nêl ge hixôn kiyang wê yêp vac xolac ge, ge kiyang nôn vixôhilôg.

Yesu xovô xomxo vihati nilô

²³ Yesu dô Jelusalem vô buc Pasova wê he ob xovô buc Isip ilage, di xomxo tibeac yê do levac wê i vông ge om he vông i vin. ²⁴ Lêc Yesu o vô ninya lehe vô he mi la vac kiyang wê he nêl ge kwa ngibi lêm, ²⁵ ên xovô he vihati pyap, di o kinêg xomxo ngwe kehe vô xomxo ngwe lêm. Ên ici va xovô xomxo vihati nilô la tiyi pyap.

3

Yesu keac hixôn Nikodimas

¹ Xomxo ti dô lê nêbê Nikodimas. Nikodimas ge Palisi ti di i xomxo levac wê he Yuda vông ge. ² Lêc la vô Yesu vô bucên di nêl vô i ên nêbê, “Ông gexolac kehe, di xe xovô ên xe nêbê Anutu vông ông lam. Ên do levac wê ông mi vông ge Anutu obêc dô hixôn ông lêm ge od ông obêc vông do levac tibêge lêm.”

³ Mêd Yesu nêl vô i ên nêbê, “A nêl hixôn nôn vô ông bê xomxo ti obêc vô paha lec lêm ge od ob tu Anutu nu mi la dô vac i ben lêm.” ⁴ Lêc Nikodimas nêl vô i ên nêbê, “Xomxo wê vô levac pyap ge ob vô paha lec tibêna? Obêc lax vac ta nilô di yubac i ti vac, me?”

⁵ Lêc Yesu nêl vô i ên nêbê, “A nêl hixôn nôn vô ông bê xomxo ti obêc vô paha lec ya mia hixôn Myakilôhô Ngibua lêm ge od ob tu Anutu nu mi la dô vac i ben lêm. ⁶ Xomxo kibun ga kô nue kibun ga, dom Myakilôhô Ngibua obêc vông xomxo vô paha lec ge, od vông he tu Anutu nue. ⁷ Kiyang wê a nêl ên a nêbê xam vô paha lec ge, le i lêc yetac ên kiyang tige lêm. ⁸ Lea la vac vigwe viyang viyang ge, lêc il ngô nididun pileva di kehe, il o xovô wê lam ge lêm, di ob loc tina ge, il lungên. Di môt wê Myakilôhô Ngibua vông xomxo vô paha lec ge tiyi bêge.”

⁹ Mêd Nikodimas luu i vya di kinêg ên nêbê, “Kiyang tige obêc vô nôn lec tibêna?”

¹⁰ Lêc Yesu nêl vô i ên nêbê, “Ông mi tixuu lime Islel ya xolac, lêc bêna lêc ông lungên kiyang tige kehe? ¹¹ A nêl hixôn nôn vô ông bê xe nêl kiyang wê xe xovô ge di xe nêl kitong lec susu wê xe mammôn yê ge, lêc xam o vông i vin kiyang wê xe nêl ge lêm. ¹² A nêl kiyang tixuuên lec susu kibun ga, lêc xam o vông i vin lêm. Om a obêc nêl kiyang lec susu kisii ganê ge od xam ob xovô tibêna? ¹³ Xomxo ti o lec mi la lag puunê lêm.

Xomxo Nu tibed wê lop mi lam gê lag puunê ge wê ob lec mi lax lag puunê tii vac nang. ¹⁴ Ilage Moses tul myel kinu lec xax vac vigwe mahigun

pileva. Om Xomxo Nu, tibii obêc tul lec xax tiyi bêge êno, ¹⁵ di xomxo vihati wê vông i vin i ge, he ob dô maviha luta lêc luta.”

¹⁶ Anutu xo vigwe pisiv ên xomxo kibun ga vihati luu vêl om vông nu tuc tibed lam, ên nêb xomxo obêc vông i vin i ge od he obêc yib mi la vac nipaên lêm. Nge, he ob dô maviha luta lêc luta. ¹⁷ Ên Anutu o vông nu tuc lam kibun ên nêb i lam vông myavîwen nipaên vô xomxo lêm. Nge, vông i lam ên nêb i lam hôm he lec. ¹⁸ Xomxo wê vông i vin Anutu nu ge kiyang ti o yêp vô he lêm. Lêc xomxo wê o vông i vin lêm ge he hilu nêb kiyang wê he ob yib mi la vac nipaên timuên ge, ên he o vông i vin Anutu nu tuc nôn tibed ge lêm. ¹⁹ Myavîwen wê xomxo ob kô ge, kehe bêga nêbê Yesu kô xêseac mi lam kibun ga lê, lêc xomxo xêyaa vin lec mapitoc di he xona ên xêseac, ên môp wê he vông ge nipaên. ²⁰ Xomxo vihati wê vông môp nipaên ge, he xona ên xêseac nêb he ob la vac lêm, ên he nêb xêseac ob hilung nipaên wê he vông ge lam le seac. ²¹ Di xomxo vihati wê vông môp bôbac ge he lam le vac xêseac, ên nêb xêseac i nêl he kitong bê he vông yuac ya xêkizêc wê Anutu vông ge.

Jon Lipacén nêl Yesu kehe kitong

²² Pyap dêc Yesu he nue ngivihi la vigwe levac Judia di la dô di lipac xomxo ya. ²³ Jon êno lipac xomxo gê Inon wê yêp kwabo vô Selim ge, ên mia levac yêp vac vigwe tige om xomxo la vô Jon di Jon lipac he, ²⁴ ên Helot gên o tung Jon la vac kalabuhu lêm.

²⁵ Jon nue ngivihi hixôn Yuda ti ngaênma lec môp wê mia lipacén ge.

²⁶ Om Jon nue ngivihi la vô Jon di nêl vô i ên nêbê, “Xolac kehe, xomxo ti wê dô hixôn öng ilage vô mia Jodan viulu ganê di öng nêl i kitong ge, xomxo vihati la vô xomxo tyo di i lipac he. Bêna lêc tyo vông tibêge?”

²⁷ Mêd Jon nêl lax vô he ên nêbê, “Anutu lag puunê obêc vông nôn ti vô xomxo ti lêm ge od o tiyi wê ob kô nôn ti ge lêm. ²⁸ Xacxam va ngô kiyang wê a nêl vô xam ilage ên a nêbê, ‘A o Kilisi ti wê il dô bin ge lêm, lêc Anutu vông a lam mug Kilisi môp.’ ²⁹ Xomxo ti obêc ii vêx ge od vêx tige ob tu ici va vinê, lêc li ngwe obêc dô di ngô li ngwe wê ob kô vêx tige via ge od xêyaa obêc vô niviha. Om gwêbaga, a tiyi xocbê lig ngwe ge, ên a xêgyaa vô niviha yang ên Yesu. ³⁰ Om Yesu lê i vô levac di a lêg i vô nipwo lec.”

³¹ Xomxo ti wê lam gê lag puunê ge luu xomxo vihati vêl. Ên xomxo kibun ga, kehe yêp gê kibun om ob nêl kiyang lec susu kibun ga. Dom xomxo ti wê lam gê lag puunê ge nginoo susu vihati vêl. ³² Xomxo tige nêl kiyang lec susu wê yê di ngô pyap ge, lêc xomxo ti o ngô di vông i vin kiyang wê nêl ge lêm. ³³ Lêc xomxo wê ngô di vông i vin kiyang wê i nêl ge, vông vinê wê he vông ge nêl kitong nêbê Anutu ge xomxo kiyang nôn. ³⁴ Xomxo ti wê Anutu vông i lam ge, nêl Anutu kiyang, ên Anutu vông Myakilôhô Ngibua hivun i xôn. ³⁵ Ma Anutu xêyaa vin lec nu tuc, om vông susu vihati vac i vigê. ³⁶ Xomxo ti obêc vông i vin Anutu nu ge od ob dô maviha luta lêc luta, lêc xomxo ti obêc hingoo nu tuc via ge, od ob dô maviha luta lêm, ên xêyaa myavinê wê Anutu vông ge hivun i xôn pyap.

4

Yesu keac vô Samelia vêx ti

¹ He Palisi ngô kiyang wê nêb Yesu kô xomxo tibeac dì lipac he luu wê Jon lipac ge vêl. ² Yesu o lipac xomxo ti lêm. Nge, nue ngivihi môci lipac xomxo. ³ Mêd Yesu ngô wê he Palisi ngô kiyang tige, om sea vigwe levac Judia ên nêb ob lax mi la Galili, ⁴ mêt la vô môp Samelia, ⁵ dì mila vigwe ti lê nêbê Saika wê yêp vac vigwe levac Samelia ge. Vigwe tige yêp kwabo vô kibun ti wê Jekop vông vô nu Josep ilage. ⁶ Lôva ti wê Jekop yev ilage mi mia lua vac ge yêp vac vigwe tige om xomxo lam mi kilê. Yesu mila, lêc ni ma vêl lec môp dia wê lam ge om mila dô kwabo vô mia tige. Ge tiyi xocbê hiyôv tyip kitôn.

⁷⁻⁸ Yesu vaci mila dô dì nue ngivihi la mug mi la ên nêb ob la kisuu yaên, di Samelia vêx ti val ên nêb ob kilê mia om Yesu nêl vô i ên nêbê, “Kilê mia mi lam ên a ob num.” ⁹ Lêc vêx tyo nêl vô i ên nêbê, “Ông vux Yuda di a vêx Samelia. Bêna lêc ông kitaa mia vô a?” Nêl bêge, ên Yuda yuu Samelia o mi keac vóma lêm. ¹⁰ Mêd Yesu nêl vô i ên nêbê, “Ông obêc xovô vízid wê Anutu vông ge dì ông obêc xovô xomxo ti wê nêl vô ông ên nêbê ông vông mia mi i num ge od ông obêc kitaa mia vô i dì i vông mia maviha vô ông.” ¹¹ Lêc vêx tyo nêl vô i ên nêbê, “Xomxo levac, ông nêm dêg ma, di mia tô mi lax ngibi ganê, om ông ob kilê mia maviha tige gê na? ¹² Bug Jekop vông lôva tiga vô xe, dì i hixôn nue dì i bwoc, he xôn mi num vac, lêc mêt ông luu Jekop vêlé?” ¹³ Lêc Yesu nêl vô vêx Samelia tyo ên nêbê, “Xomxo vihati wê num mia tiga, he ob xo mia tii vac. ¹⁴ Lêc xomxo ti obêc num mia wê a vông ge od ob xo mia bê ob num i tii vac lêm. Ma vêl. Ên mia wê a ob vông vô i ge obêc pituv vac i nilô dì vông i dô maviha luta lêc luta.” ¹⁵ Om vêx tyo nêl vô i ên nêbê, “Xomxo levac, ông vông mia tige vô a mi a num êdêc a xoên mia tiga i ma di a lam kilêen tui vacén i ma.”

¹⁶ Yesu nêl vô i ên nêbê, “Loc keac liyam dì muu xôn lôm.” ¹⁷ Lêc vêx tige nêl ên nêbê, “A liyag ma.” Mêd Yesu nêl vô i ên nêbê, “Ông nêl vixôhilôg ên ông nêbê ông liyam ma. ¹⁸ Ên ilage ông kô vux vigê vilu lêc sea he di vux wê dô hixôn ông gwêbaga ge, o ông liyam lêm. Om kiyang wê ông nêl ge, ông nêl nôn.” ¹⁹ Mêd vêx tyo nêl vô i ên nêbê, “Xomxo levac, ga a xovô ên a nêbê ông plopete ti. ²⁰ Xe buge lam mi kitaa vô Anutu lec kitôn tiga, lêcom xam Yuda nêl ên xam nêbê vigwe wê il ob kitaa vô Anutu ge, vigwe Jelusalem tibed.”

²¹ Mêd Yesu nêl vô i ên nêbê, “Vêx, ông vông i vin kiyang wê a ob nêl ga bê timuên ge xam obêc kitaa vô Mag lec kitôn tiga lêm, dì xam ob kitaa gê Jelusalem êno lêm. ²² Xam Samelia mi kitaa lê, lêc xam lungên xomxo wê xam mi kitaa vô i ge. Di xe Yuda, Anutu wê xe mi kitaa vô ge, xe xovô pyap, ên xomxo ti wê ob vô xomxo vêl ên nipaên ge lam vac xe Yuda. ²³ Buc ti obêc val, om gwêbaga buc tyo val pyap, om xomxo wê ob kitaa nôn ge, Myakilôhô Ngibua ob ngidu he xôn dì he ob kitaa vô Mag hixôn kiyang nôn. Ên xomxo tibêgee wê Anutu xéyaa vin lec nêb he i kitaa vô i. ²⁴ Anutu ge Myakilôhô, om xomxo obêc nêb kitaa vô i ge od Myakilôhô Ngibua i ngidu he xôn dì he i kitaa hixôn kiyang nôn.” ²⁵ Mêd vêx tyo nêl vô Yesu ên nêbê, “A xovô ên a nêbê Mesaia ti wê Anutu vinoo ge wê he nêl lê nêbê Kilisi ge obêc val. Di obêc val ge od ob nêl kiyang vihati kehe

kitong vô il.” ²⁶ Yesu nêl vô i ên nêbê, “A tyo ga mê, wê a dinêl kiyang vô ông ga.”

²⁷ Yesu nêl kiyang tige, dì nue ngivihi vena yê wê Yesu dikeac hixônvêx tige dì he yetac ên. Lêc he ti o nêl vô i lêm bê “Ông ob kô vatya? Di ông keac vô vêx tige ên va?” ²⁸ Mêd vêx tige sea dêg le dì lax mi la viyangtôv dì lax nêl vô xomxo tibeac ên nêbê, ²⁹ “Xam lam loc wê xomxo ti wê nêl kiyang a vông ilage vihati kitong. Ganê mêd Kilisi ti wê il dô bin ge yuubê?” ³⁰ Om he sea ben dì lam vô Yesu.

³¹ He gên dilam dì Yesu nue ngivihi nêl vô Yesu ên nêbê, “Xolac kehe, wa yaén lê.” ³² Lêc Yesu nêl vô he ên nêbê, “Yaén wê a vông ge dô, lêcom xam lungên.” ³³ Om nue ngivihi kinêg vóma ên nêbê, “Mêd xomxo ti vông yaén vô i?” ³⁴ Lêc Yesu nêl vô he ên nêbê, “Yaén wê ob den a ge bêga bê a ob vông kiyang yuu yuac wê xomxo ti wê vông a lam ge nêb a vông ge i loc pyap lê.” ³⁵ Xam nêl ên xam nêbê dentuc yuudiyuu obêc lam la vêl di xam ob la kô yaén nôn vac yuac. Lêc a ob nêl vô xam bê xam vêl mammôn lec mi wê yuac, ên xomxo viac he pyap tiyi wê xam ob la nêl xolac vô he ge, tiyi xocbê susu vô nôn vac yuac ge. ³⁶ Xomxo wê ob la kô nôn vac yuac ge ob kô nôn niviha lec yuac wê he vông ge dì ob kituc nôn tige la dô niviha luta lêc luta. Om xomxo wê xin vê ge hixôn xomxo wê kô nôn ge, yuu xôn xéyaa vô niviha. ³⁷ Om kiyang wê nêl ên nêbê xomxo ngwe ob xin vê di ngwe ob la kô nôn ge, kiyang nôn. ³⁸ A vông xam la ên a nêb xam kô nôn vac yuac wê xam o vông ilage lêm ge. Yuac wê xomxo mugên vông pyap ge, xam ob la kô nôn vac.”

³⁹ Tibii Samelia wê dô vac vigwe tige, he tibeac vông i vin Yesu ên wê vêx tige nêl ên nêbê, “Yesu nêl kiyang wê a vông ilage vihati kitong.” ⁴⁰ Mêd tibii Samelia la vô Yesu di la kitaa i nêb i dô hixôn he, om Yesu dô hixôn he tiyi buc yuu, ⁴¹ dì xomxo tibeac hiwocên ngô kiyang wê Yesu nêl ge om he vông i vin. ⁴² Mêd he nêl vô vêx tyo ên nêbê, “Xe o vông i vin lec ông vyam wê ông nêl ge lêm. Nge, xecxe va ngô i vya om xe xovô ên xe nêbê xomxo ti wê ob hôm xomxo kibun ga vihati lec ge, xomxo tyo tiga vixôhilôg nôn.”

Yesu vông xomxo levac ti nu vô niviha lec

⁴³ Yesu dô vac vigwe tige buc yuu dêc sea dì la Galili. ⁴⁴ Yesu vaci nêl ila ên nêbê plopete ti lie vac ici va ben ob kô i lec niviha lêm. ⁴⁵ Mêd Yesu mila Galili, dì tibii Galili hôm i lec niviha, ên he êno la yê buc ngibua gê Jelusalem om he yê môp vihati wê Yesu vông vô buc tige.

⁴⁶ Mêd Yesu lax mi la Kena wê yêp vac vigwe levac Galili ge. Kena ge vigwe wê Yesu pilepac mia tu wain vac ilage. King nu hizap ti dô vac vigwe Kapaneam, lêc nu vux ti, yidac vông. ⁴⁷ Mêd xomxo levac tyo ngô wê Yesu sea Judia dì lam dô Galili ge, om la vô Yesu dì la kitaa i ên nêb i loc Kapaneam ên loc vông i nu i vô niviha lec, ên nu vô kwabo lec wê ob yib ge. ⁴⁸ Lêc Yesu nêl vô xomxo levac tyo ên nêbê, “Xam wêê do levac obêc ma ge od xam nêb xam ob vông i vin lêm.” ⁴⁹ Mêd xomxo tyo nêl vô i ên nêbê, “Xomxo levac, lam lutibed ên a nug obêc yib.” ⁵⁰ Mêgem Yesu nêl vô i ên nêbê, “Ông lôc, ên ông num obêc vô niviha lec.” Mêd xomxo tyo vông i vin kiyang wê Yesu nêl ge dì lax. ⁵¹ Mila môp mahigun ti dì nue yuac ya val nêl vô i ên nêbê, “Num vô niviha lec.” ⁵² Mêd xomxo tyo kinêg vô he ên nêbê, “Yidac sea i lec hiyôv manôñ tina?” Om he nêl ên

nêbê, “Vihevage wê hiyôv kilê ge num ninivi vô ningigooêñ lec.” ⁵³ Mêd ma xovô nêbê hiyôv manôn tige wê Yesu nêl vô i nêbê nu vô niviha lec ge. Mêgem xomxo tige he vinê nue vihati vông i vin. ⁵⁴ Buc wê Yesu sea Judia dì lax mì la Galili ge od vông do tiga wê vông yuu ge vac vigwe Galili.

5

Yesu vông xomxo ti vô niviha lec vac mia luaên Betesda

¹ Buc ya lam la vêl mêd buc levac wê Yuda vông ge ti vô kwabo lec om Yesu la Jelusalem. ² Jelusalem ge, mia luaên ti yêp kwabo vô bwoc sipsip vuayen. Mia luaên tige, Hiblu vya nêbê Betesda, dì xumac nipwo vigê vilu le vô mia luaên tige ninya. ³ Xomxo yidac tibeac yêp vac xumac tiguee, ya manôn toc, dì ya vixa vô nipaén dì ya len vô xèlehe. [Xomxo tiguee dô bin buc wê mia obêc vô mahilevac ge, ⁴ ên buc ya Apumtau vông angela ti lam la vac mia nilô dì vông mia vô mahilevac, dì xomxo yidac ti obêc la vac mia wê vô mahilevac ge tax ge, od ninivi obêc vô niviha lec.]

⁵ Vux ti yêp vac xumac tige, lêc yidac vông i tiyi klismas kehe ti dì vigê yuu dì vixa vilu dì sec yon (38). ⁶ Mêd Yesu yê xomxo tige wê diyêp ge di xovô nêbê yidac vông i tiyi klismas tibeac, om kinêg vô i ên nêbê, “Ông ông nimnivi i vô niviha lec, me?”

⁷ Mêd xomxo tyo nêl vô i ên nêbê, “Xomxo levac, vô buc wê mia vô mahilevac ge od a lige wê ob vông a la vac mia ge ti o dô lêm, om a nêb a ob la vac mia lê, lêc xomxo le luu a vêl dì la vac mia tax.” ⁸ Om Yesu nêl vô xomxo tyo ên nêbê, “Kidi lec mi kô ông guhu lec dì loc.” ⁹ Mêd lutibed xomxo tyo ninivi vô niviha lec dì i kô i guhu lec dì la.

Buc tige, buc wê sabat ge, ¹⁰ om he Yuda nêl vô xomxo ti wê Yesu vông i vô niviha lec ge ên nêbê, “Gwêbaga buc sabat, dì kiyang yêp bêga nêbê ông ob kilê guhu lec sabat lêm.” ¹¹ Lêc xomxo tyo nêl vô he ên nêbê, “Xomxo ti wê vông a vô nigviha lec ge nêl vô a ên nêbê, ‘Hôm ông guhu lec dì loc.’” ¹² Om he kinêg vô i ên nêbê, “Xomxo letya wê nêl vô ông ên nêbê ông hôm guhu lec dì loc ge?” ¹³ Lêc xomxo tyo lungên, ên xomxo tibeac dô vac vigwe tige dì Yesu loc mì la vac he mahigun dì la.

¹⁴ Nang dì buc ngwe lêc Yesu mila tulec xomxo tyo vac Anutu xumac ngibua om nêl vô ên nêbê, “Wê lê. Ông nimnivi vô niviha lec. Om le i lêc vông nipaén ti i tii vac lêm, ên viyin levac mabu obêc val vô ông i luu ilage vêl.” ¹⁵ Mêd xomxo tige lax mì la vô he Yuda dì nêl ên nêbê, “Xomxo ti wê vông a vô nigviha lec ge Yesu.”

¹⁶ Mêgem he Yuda nêb ob vông viyin vô Yesu ên wê vông môp tige lec buc sabat ge. ¹⁷ Lêc Yesu nêl vô he ên nêbê, “Mag vông yuac lec buc vihati, dì a éno vông yuac bêge.” ¹⁸ Mêgem he Yuda yê Yesu xôn ên nêb ob hi i yib, ên wê vông sabat vô nipaén ge, lêc o sabat kiyang tibed lêm. Nge, Yesu nêl ên nêbê “Anutu ge a mag”, om Yuda yê i tiyi xochê yong i nêb yuu xôn Anutu tiyima.

Yesu nêl kiyang lec yuac wê ob vông ge

¹⁹ Mêgem Yesu nêl vô he Yuda ên nêbê, “A nêl vixôhilôg nôn vô xam bê a Anutu nu, a o tiyi wê a ob vông môp i tiyi xovôên wê aca va vông ge lêm. Nge, môp wê a ob vông ge a vông vihati tiyi môp wê Mag vông mì a xê ge. Môp wê Mag vông ge, a éno ob vông i tiyi. ²⁰ Èn Ma xêyaa vin lec nu tuc om hilung môp vihati wê i vông ge vô i, lêc do levac wê luu môp tigeee

vêl ge, Ma obêc hilung vô nu dì i vông om xam obêc yetac mabu ên do wê i vông ge. ²¹ Mag vông xomxo kidi lec vac yibên dì vông he dô mavîha, dì nu tuc obêc vông xomxo wê vinoo he ge i dô mavîha bêge êno. ²² Dì Mag ob yaxêن xomxo ti nêñ kiyang lêm. Nge, vô vac nu tuc vigê ên nêb i yaxêن xomxo vihati nêñ kiyang. ²³ Ma vông bêge ên nêb xomxo vihati i pimil nu tuc lê i tiyi xochê he pimil Ma lê ge. Xomxo ti obêc pimil nu lêm ge od tiyi xochê o pimil Ma wê vông i lam ge lê lêm.

²⁴ “A nêl hixôn nôn vô xam bê xomxo wê ngô a kiyang dì vông i vin xomxo ti wê vông a lam ge, xomxo tige ob dô mavîha luta lêc luta, dì he ob tulec myaviwen nipaêñ ti lêm, ên Anutu xovô pyap nêb ob vô he vêl ên yibên dì vông he dô mavîha luta lêc luta.

²⁵ “A nêl hixôn nôn vô xam bê buc ti obêc val om val gwêba pyap, mêgem xomxo wê dô vac môp mayibên ge he ob ngô Anutu nu vya, dì he wê ngô ge ob dô mavîha. ²⁶ Mag ge mavîha kehe, om vông mavîha wê i vông ge vô nu tuc. ²⁷ Ma vinoo nu tuc pyap ên nêb i yaxêن xomxo vihati nêñ kiyang, ên i Xomxo Nu. ²⁸ Xam o lêc yetac dì nga vigêm ên kiyang tiga lêm. Ên buc ti obêc val, dì tibii vihati wê yêp vac lôva ge obêc ngô i vya ²⁹ dì kidi mi lam, om he wê vông môp niviha ge obêc kidi lec mi dô mavîha, dì he wê vông nipaêñ ge obêc kidi lec dì kô myaviwen nipaêñ.”

Yesu nêl i kitong nêb i Anutu nu

³⁰ “A o tiyi wê a ob vông môp ti ya xovôêñ wê aca va vông ge lêm. Nge, a yaxêن xomxo nêñ kiyang tiyi xochê kiyang wê a ngô vô Mag ge. Dì a yaxêن xomxo nêñ kiyang ya môp bôbac, ên a o timu vô piyôp wê a vông ge lêm. Nge, xomxo ti wê vông a lam ge, a timu vô kiyang wê i vông ge.

³¹ “Aca va obêc nêl a kehe kitong ge od obêc tiyi lêm. ³² Lêc xomxo ti wê nêl a kehe kitong ge dô, dì a xovô ên a nêbê kiyang wê xomxo tige nêl lec a ge kiyang nôn.

³³ “Xam Yuda, xam vông xomxo la vô Jon ilage, dì Jon nêl kiyang nôn kehe kitong. ³⁴ A o xo ên a nêb xomxo kibun ga i nêl a kehe kitong lêm. Lêc a nêb Anutu i vô xam vêl om a nêl kiyang tiga kitong vô xam. ³⁵ Jon ge tiyi xochê ngwax wê linac xêseac vô xam ge, om xam xêmyaa vô niviha dì xam dô vac xêseac wê i vông ge myabo tya. ³⁶ Dì gwêbaga a lam vông yuac om yuac tige nêl a kehe kitong luu kiyang wê Jon nêl ge vêl. Ên a lam vông yuac wê Mag nêb a vông ge, om yuac tige nêl a kehe kitong nêbê Mag vông a lam. ³⁷ Dì Mag wê vông a lam ge, nêl a kehe kitong hixôn. Xam o ngô i vya lêm dì xam o wê i nôn lêm, ³⁸ dì kiyang wê i vông ge o yêp vac xam nilôm lêm, ên Mag vông a lam, lêc xam o vông i vin a lêm. ³⁹ Kiyang wê yêp vac kipihac xolac ge, xam mi kitong ên xam xo ên xam nêbê mavîha kehe luta yêp vac kiyang tige. Dì xolac tige wê nêl a kehe kitong. ⁴⁰ lêc xam nêb xam ob lam vô a êdêc dô mamvîha lêm.

⁴¹ “A o lam ên a nêb xomxo i vông lê levac vô a lêm. ⁴² Lêc a xovô ên a nêbê xam xêmyaa o vin lec Anutu lêm. ⁴³ A tu Mag manôñ mi lam vô xam, lêc xam o kô a lec niviha lêm. Dì xomxo ti obêc lam vô xam lec ici va lê ge od xam kô i lec niviha. ⁴⁴ Xam kô lêm levac vô lime vaci, dì lê levac wê Anutu tibed ob vông vô xomxo ge, xam nêb xam ob kô lêm. Om xam obêc vông i vin tibêna? ⁴⁵ Xam o lêc xo bê a ob vông kiyang vô xam vô Anutu manôñ lêm. Xomxo wê ob vông kiyang vô xam ge, Moses ti wê xam vông i vin ên xam nêbê obêc ngidu xam xôn ge. ⁴⁶ Xam obêc vông i vin kiyang

wê Moses vông ge od xam obêc vông i vin kiyang wê a vông ge hixôn, ên Moses ge wê kivuu kiyang lec a. ⁴⁷ Léc xam o vông i vin kiyang wê Moses kivuu ge lêm, om xam obêc vông i vin kiyang wê a nêl ge tibêna?”

6

Yesu vet xomxo 5,000

(*Matyu 14:13-21; Mak 6:30-44; Luk 9:10-17*)

¹ Yesu nêl kiyang tige vêl di tô mi sox la mia Galili vilu ganê. Mia tige lê ngwe nêbê Taibilias. ² Mêd xomxo tibeac hiwocên timu vô Yesu vixa mi la, ên he yê do levac wê Yesu vông xomxo yidac vô niviha lec ge. ³ Mêd Yesu he nue ngivihi lec kitôñ ti mi la dô lec. ⁴ Mêd buc ngibua wê Yuda ob yê Pasova ên xovô buc wê he sea Isip ilage vô kwabo lec. ⁵ Léc Yesu yê xomxo tibeac val om nêl vô Pilip ên nêbê, “Il ob kisuu blet gê na mi vet xomxo tigae ya?” ⁶ Yesu xovô môt wê nêb ob vông ge pyap, léc nêl kiyang tige vô Pilip ên nêb ob yaxêni.

⁷ Mêd Pilip nêl vô i ên nêbê, “Il obêc kisuu blet lec mone yul yuu (K200) mi vông nipwo tyatya vô he ge od yaêñ tige obêc tiyi he vihati lêm.” ⁸ Mêd nue ngivihi ngwe lê nêbê Andlu, wê Saimon Pita li ge

nêl ên nêbê, ⁹ “A xê xomxo nipwo ti wê kô blet vigê vilu di beac yuu, lêc yaêñ tige o tiyi xomxo tibeac tigae lêm.” ¹⁰ Mêd Yesu nêl ên nêbê, “Xam vông xomxo vihati i tô mi dô kibun lê.” Vigwe tige hisinac niviha dô om he dô kibun lec. Xomxo tigee tibeac hiwocên om vux vaci tiyi xocbê 5,000.

¹¹ He dô kibun pyap mêd Yesu hôm blet tige di kitaa lec mêd titang vô xomxo vihati. Nang dêc vông bêge vô beac hixôn, mêd xomxo vihati ya di i den he. ¹² He ya pyap, mêd Yesu nêl vô nue ngivihi ên nêbê, “Xam vilu myapipu wê he ya di i dô gee mi tung i dô kidu ti, ên ti i o loc dô sea lêm.” ¹³ Mêgem he kituc myapipu wê xomxo ya di i dô gee mi su vac sepac vigê yuu di tò mi la yuu mi i pup lec.

¹⁴ Xomxo tigee yê do levac wê Yesu vông ge om nêl ên nêbê, “Plopet ti wê he nêb ob lam kibun ge, tyo tiga vixôhilôg nôn.” ¹⁵ Mêd Yesu xovô wê he nêb he ob hôm i xôn di vông i tu he nêñ king ge, om sea he di ici va lax mi la lec kitôñ.

Yesu la lec mia luaén kisii

(*Matyu 14:22-33; Mak 6:45-52*)

¹⁶ Vigwe huc di Yesu nue ngivihi lop mi la mia luaén ninya, ¹⁷ di lec la lec dipac ti di la, ên nêb ob lax mi la Kapaneam wê yêp mia luaén vilu ganê. Di vigwe buc lêc Yesu o mila vô he decdec lêm. ¹⁸ Mêd lea levac ti val om vông mia vô mahilevac xocbê ob kipyax he vac, ¹⁹ om he hisoo mia mi la mahigun dia tyi xocbê 5 kilomita ge, lêc he yê wê Yesu lam lec mia kisii mi val kwabo vô dipac ge om he xonamabu. ²⁰ Léc Yesu nêl vô he ên nêbê, “Ga a, om xam xona ên i ma.” ²¹ Mêd he nêl vô Yesu ên nêb i lec lam lec dipac, di lutibed dipac mila le kehe vô vigwe ti wê he nêb he ob la ge.

Xomxo tibeac myag Yesu

²² Vigwe vidiiën titige, xomxo tibeac gêñ dô vô mia luaén ninya vilu ganê di dô bin Yesu, ên he xovô ên he nêbê dipac tibed sea vigwe tige vihevage di la, di Yesu nue ngivihi heche va la lec dipac tige di Yesu o la hixôn he lêm. ²³ Mêd dipac mangwe lam gê vigwe Taibilias di lam le vô vigwe ti wê

Apumtau Yesu kitaa lec blet mi xomxo ya vihevage. ²⁴ Mêd xomxo tigee yê lêc Yesu he nue ngivihi o dô lêm om he la lec dipac ti di la ên nêb ob la myag Yesu gê Kapaneam.

Yesu ge yaên wê ob vông xomxo dô maviha

²⁵ Xomxo tigee mila yêvô Yesu gê mia luaên vilu ganê di kinêg vô i ên nêbê, "Xolac kehe, ông lam ga yelacna?" ²⁶ Lêc Yesu nêl vô he ên nêbê, "A nêl hixôn nôn vô xam bê xam myag a, lêc xam o xovô do levac wê a vông ge lêc lam myag a lêm. Nge, xam xovô blet wê xam wa i den xam ge om xam lam myag a. ²⁷ Le i lêc vông yuac levac ên yaên wê ob vô nipaén ge lêm. Nge, xam vông yuac lec yaên wê xam ob kô di dô mamviha luta ya ge. Yaên tige, a, Xomxo Nu, a obêc vông vô xam, ên Mag Anutu vinoo a pyap ên nêb a vông i yuac."

²⁸ Om he nêl vô i ên nêbê, "Xe ob vông Anutu yuac ga tibêna?" ²⁹ Om Yesu luu he vya bêga nêbê, "Yuac wê Anutu vông ge bêga bê xam vông i vin xomxo ti wê Anutu vông i lam ge."

³⁰⁻³¹ Mêd he kinêg vô i ên nêbê, "Om ông ob vông do levac tina ên xe xê di vông i vinê? Ên buge ilage ya yaên mana vac vigwe mahigun pileva, tiyi xochbê kiyang wê yêp vac xolac bêga nêbê, 'Ici va vông yaên lag puunê vô he mi he ya.' Om ông ob vông do levac tibêge, me?" ³² Lêc Yesu nêl vô he ên nêbê, "A nêl vixôhilôg nôn vô xam bê Moses o vông yaên lag puunê vô xam lêm. Nge, Mag vaci wê vông yaên nôn lag puunê vô xam ge. ³³ Yaên wê Anutu vông ge, lam gê lag puunê di lam vông xomxo kibun ga dô maviha." ³⁴ Om he nêl vô i ên nêbê, "Xomxo levac, ông vông yaên tige vô xe i tiyi buc vihati ên va."

³⁵ Om Yesu nêl vô he ên nêbê, "Aca va ga, a yaên wê ob vông xomxo dô maviha ge. Xomxo ti obêc lam vô a ge od vip obêc den i tii vac nang lêm, di xomxo ti obêc vông i vin a ge od obêc xo mia ti i tii vac lêm. ³⁶ A nêl gwêba vô xam ên a nêbê xam wê a pyap lê, lêc xam o vông i vin lêm. ³⁷ Xomxo wê Anutu vinoo nêb he i tu axe ge, vihati obêc lam vô a, di xomxo ti obêc val vô a ge, od a obêc tii i lêm. ³⁸ Ên a o lop mi lam gê lag puunê ên a nêb a ob vông i tiyi xovônen wê aca va vông ge lêm. Nge, a lam ên a nêb a ob timu vô kiyang wê xomxo ti wê vông a lam ge nêl ge. ³⁹ Xomxo ti wê vông a lam ge nêb a o lêc sea xomxo wê i vinoo nêb he i tu axe ge ti i dô xel lêm. Nge, nêb a lêc tipi vô he vihati i kidi lec vô buc timuén. ⁴⁰ Ên Mag nêl kiyang yêp bêga nêbê xomxo wê yê nu tuc di vông i vin ge, he vihati obêc dô maviha luta lêc luta, di a obêc tipi vô he kidi lec vô buc timuén."

⁴¹ Mêd he Yuda ngô kiyang wê Yesu nêl ên nêbê, "Aca va yaên wê a lop mi lam gê lag puunê," om he kunac i di nêl kiyang ni nyagén lec i ⁴² di nêl ên nêbê, "Xomxo tige Yesu wê Josep nu ge, di ta yuu ma il xovô. Bêna lêc nêl ên nêbê i lam gê lag puunê?"

⁴³ Lêc Yesu nêl vô he ên nêbê, "Le i lêc ngaênma lec a lêm. ⁴⁴ Ên xomxo ti o tiyi wê ici va ob lam timu vô a ge lêm. Mag wê vông a lam ge obêc didii xomxo ti ge od obêc lam timu vô a, di a obêc tipi vô i kidi lec vô buc timuén. ⁴⁵ Kiyang yêp vac kipihac wê plopete kivuu ilage bêga nêbê, 'Anutu ob tixuu xomxo vihati.' Om xomxo vihati wê ngô Mag kiyang di kô xovônen vô i ge ob lam vô a. ⁴⁶ Ên xomxo ti o yê Mag lec manôn lêm. Nge, a wê a lam vô Anutu ge a tibed wê a xê i. ⁴⁷ A nêl hixôn nôn vô xam bê

xomxo wê vông i vin ge obêc dô maviha luta lêc luta. ⁴⁸ A ga, yaên wê ob vông xomxo dô maviha luta. ⁴⁹ Bume ilage wê ya yaên mana vac vigwe mahigun pileva ilage, he ya lêc yib. ⁵⁰ Lêc yaên wê lam gê lag puunê ge, xomxo ti obêc ya ge od ob yib lêm. ⁵¹ A ga yaên maviha wê a lop mi lam gê lag puunê. Om xomxo ti obêc ya yaên tiga ge od ob dô maviha luta lêc luta. Yaên wê a ob vông vô i ge, aca va liyôhô wê a ob vông, ên xomxo kibun ga i dô maviha.”

⁵² Mégem Yuda ngaénma lec kiyang tige dì nêl vôma ên nêbê, “Xomxo tige obêc vông i liyôhô mi il xa tibêna?”

⁵³ Om Yesu nêl vô he ên nêbê, “A nêl hixôn nôn vô xam bêga bê xam obêc wa a, Xomxo Nu, liyôhô dì num a hi lêm ge od xam ob dô mamviha lêm. ⁵⁴ Xomxo wê ya a liyôhô dì num a hi ge, he ob dô maviha luta lêc luta, dì a obêc tipi vô he kidi lec maviha vô buc timuén. ⁵⁵ Ên a liyôhô tu yaên nôn, dì a hi tu mia numén nôn. ⁵⁶ Xomxo wê ya a liyôhô dì num a hi ge, he ob dô vac a nilôg dì a ob dô vac he nilô. ⁵⁷ Mag maviha vông a lam, dì a dô magviha ya xêkizêc wê Mag vông ge. Om xomxo ti obêc ya a ge, od ob dô maviha ya xêkizêc wê a vông ge. ⁵⁸ Tiga, yaên wê lam gê lag puunê ge, lêc o tiyi xocbê yaên wê bume ya ila ila lêc yib ge lêm. Nge, yaên tiga wê xomxo obêc ya ge od ob dô maviha luta lêc luta.” ⁵⁹ Yesu nêl kiyang tige vô xomxo vac Yuda xumac lilo gê Kapaneam.

Yesu ge kiyang maviha dôén kehe

⁶⁰ Xomxo wê mi la hixôn Yesu gee he tibeac ngô kiyang tige wê Yesu nêl ge, om he nêl ên nêbê, “Kiyang tiga viyin levac, om letya tiyi wê ob ngô ge?” ⁶¹ Yesu xovô wê he nêl kiyang tibeac tibeac lec tige om nêl vô he ên nêbê, “Kiyang tige juda xam, me? ⁶² Xam obêc wê Xomxo Nu lax mi la vac vigwe ti wê dô vac ilage ge od xam obêc xo bêna? ⁶³ Myakilôhô Ngibua tibed wê ob vông xomxo dô maviha, dì xêkizêc wê xomxo vông ge ti o tiyi lêm. Kiyang wê a nêl vô xam ga ge, a nêl lec Myakilôhô Ngibua wê ob vông xomxo dô maviha ge. ⁶⁴ Lêc xam ya o vông i vin lêm.” Yesu nêl bêge, ên ilage Yesu xovô xomxo wê vông vinê obêc ma ge, dì xovô xomxo tyá wê ob vông i vac tibii vevac vigê ge pyap. ⁶⁵ Mêd Yesu nêl ên nêbê, “Kiyang yêp bêge, om a nêl gwêba vô xam ên a nêbê xomxo ti o tiyi wê ici va ob lam timu vô a ge lêm. Mag obêc vông xêkizêc vô i ge od obêc lam vô a.”

⁶⁶ Yesu nêl kiyang tige pyap mêd xomxo wê mi dô hixôn i ge tibeac sea i dì o dô hixôn i tii vac nang lêm. ⁶⁷ Om Yesu kinêg vô nue ngivihi vigê yuu dì tô mi la yuu ên nêbê, “Di xacxam va ob sea a êno dì la mê?” ⁶⁸ Lêc Saimon Pita nêl vô i ên nêbê, “Apumtau, xe ob la vô letya? Ên kiyang wê ông vông ge wê ob vông xomxo dô maviha luta lêc luta. ⁶⁹ Om xe vông i vin dì xovô ên xe nêbê ông ge xomxo ngibua wê Anutu vông ông lam ge.”

⁷⁰ Mêd Yesu nêl vô he ên nêbê, “A vinoo xam vigê yuu dì tô mi la yuu, lêcom xam ti tu Seten xe.” ⁷¹ Yesu nêl kiyang tige lec Judas wê Saimon Iskaliot nu ge. Ên Judas ge he vigê yuu dì tô mi la yuu ge ti, wê ob nêl Yesu kitong vô tibii vevac ge.

¹ Pyap dêc Yesu la vilee vac vigwe levac Galili. Ên he Yuda wê dô Judia ge nêb ob hi Yesu i yib om Yesu nêb ob la vilee vac vigwe Judia lêm. ² Mêd Yuda buc ngibua ti wê he nêb ob xovô buc wê xumac sel ge vô kwabo lec, ³ om Yesu lie so vya vô i ên nêbê, “Sea vigwe ga dî loc Judia, ên nume i yê yuac wê ông mi vông ge hixôn.” ⁴ Ên xomxo ti obêc nêb xomxo i xovô i ge od ob vông yuac xôpacên lêm. Om yuac wê ông mi vông ge, ông loc vông vô he manôn ên he tibeac i yê dî xovô.” ⁵ He ge Yesu lie, léc he o vông i vin i lêm om he nêl kiyang tibêge. ⁶ Mêd Yesu nêl vô he ên nêbê, “A buc gên o vô kwabo lec lêm, dom xam ge, xam tiyi wê xam ob la tiyi buc vihati ge. ⁷ Xomxo kibun ga xêyaa ob vô myavinê vô xam lêm. Léc he xêyaa vô myavinê vô a ên wê a nêl he nêl nipaên kitong ge. ⁸ Om xacxam va loc wê buc ngibua tige, ên a ob loc hixôn xam lêm, ên buc wê a vông ge gên o vô kwabo lec lêm.” ⁹ Yesu nêl kiyang bêge vô he dî dô Galili.

Yesu la yê buc levac gê Jelusalem

¹⁰ Yesu lie la mug mi la yê buc levac, dî Yesu vaci timu vô he vixa. Léc o la seac vô xomxo manôn lêm. Nge, xôpac ên he mi la. ¹¹ Léc he Yuda myag Yesu vô buc tige om he kinêg ên nêbê, “Xomxo tyo dô tina?” ¹² Xomxo wê dô gee he keac kiyang tibeac lec Yesu, om he ya nêl ên nêbê, “Ge xomxo niviha ti,” dî he ya nêl ên nêbê, “O xomxo niviha lêm, ên mi kityoo xomxo.” ¹³ Léc xomxo ti o nêl kiyang tige seac mi xomxo tibeac ngô lêm, ên he xona ên Yuda levac.

¹⁴ Mila vô buc levac tigee mahigun dî Yesu la vac Anutu xumac ngibua dî la nêl xolac vô xomxo. ¹⁵ He Yuda levac wê dô gee ngô Yesu kiyang di yetac mabu om nêl ên nêbê, “Xomxo tige xovô xolac tige tibêna? Ên xomxo ti o tixuu i lêm.” ¹⁶ Léc Yesu luu he vya ên nêbê, “Kiyang wê a nêl ga, o a kiyang lêm. Nge, xomxo ti wê vông a lam ge, i kiyang. ¹⁷ Xomxo ti obêc xovô nêb ob timu vô kiyang wê Anutu vông ge od ob xovô kiyang wê a nêl ga kehe bê a nêl Anutu kiyang me a nêl aca va kiyang. ¹⁸ Ên xomxo ti obêc nêl ici va kiyang ge od xovô nêb ob vông ici va lê i vô levac. Léc xomxo ti obêc vông xomxo ti wê vông i lam ge lê i vô levac ge od i xomxo kiyang nôn di kiyang kityooen ti o yêp vac i nilô lêm.

¹⁹ “Moses vông xolac vô xam ilage, léc xam ti o timu vô xolac vihati lêm. Bêna léc xam nêb xam ob hi a xibé?” ²⁰ Mêd xomxo tigee nêl vô i ên nêbê, “Letya nêb ob hi ôngê? Mêd vimwo nipaên ti dô vac ông nilôm om ông nêl kiyang tibêge.” ²¹ Léc Yesu nêl vô he ên nêbê, “Xam nga vigêm ên do levac tibed wê a vông lec sabat mi xam wê ge. ²² Om xam ngô lê. Moses nêl vô bume ilage ên nêb he i gôl nue vux ninivi. Vixôhilôg, môp tige kehe o yêp vô Moses lêm. Nge, yêp vô tivame vaci. Léc xam mi gôl nume ninivi lec sabat. ²³ Xam nêb xam ob timu vô Moses xolac om xam mi gôl nume ninivi lec sabat. Bêna léc xam kunac a ên wê a vông xomxo ti ninivi vô niviha lec vô sabat ge? ²⁴ Le i lêc yaxêن xomxo nêl kiyang vaxvax lêm. Nge, xam hivip kiyang kehe lec dî titô i yêp bôbac.”

Xomxo kinêg nêb ob xovô Yesu kehe

²⁵ Xomxo Jelusalem ya kinêg ên nêbê, “Xomxo ti wê he Yuda levac nêb ob hi i yib ge, tyo tiganê, me? ²⁶ Wê lê. Xomxo tyo nêl kiyang seac vac xomxo mahigun lê, léc xomxo levac o nêl kiyang ti vô i lêm. Mêd he xo

ên he nêb ge Kilisi tyo, me? ²⁷ Léc xomxo tyo, il xovô i ben kehe, di Kilisi wê ob val ge, il ob xovô ben kehe wê ob val vac ge lêm.”

²⁸ Om Yesu nêl xolac vac Anutu xumac ngibua di keac levac hixôn ên nêbê, “Xam nêb xam xovô a, di xam xovô a bog kehe hixôn, me? Èn a o lam ya xovôen wê a vông ge lêm. Xomxo ti wê vông a lam ge, i xomxo kiyang nôn. Xam ge xam lungên i, ²⁹ di a ga, a xovô i pyap, ên a dô hixôn i di i vông a lam.” ³⁰ Mégem xomxo tigee nêb ob hôm Yesu xôn, léc Yesu buc gên o vô kwabo lec lêm, om xomxo ti o tiyi wê ob hôm vigê lec i ge lêm. ³¹ Lêcom xomxo tibeac vông i vin nêbê Yesu ge Kilisi om he nêl ên nêbê, “Il nêd Kilisi obêc val ge od ob vông do levac luu do levac wê Yesu vông ge vêl lêm. Om Yesu ge Kilisi tyo mêt.”

He vông xêhipu la vô Yesu ên nêb he i loc hôm i xôn

³² He Palisi ngô wê xomxo nêl kiyang tibêge lec Yesu ge, om xomxo levac wê mi si daa gee hixôn he Palisi, he vông xêhipu ya la vô Yesu ên nêb he i loc hôm Yesu xôn. ³³ Léc Yesu nêl vô he ên nêbê, “A ob dô hixôn xam myabo tya, di a obêc lax mi la vô xomxo ti wê vông a lam ge. ³⁴ Xam obêc myag a, léc xam wêvôen a obêc ma, di vigwe wê a ob la dô vac ge, xam ti ob la vac lêm.” ³⁵ Mêt he Yuda levac nêl vòma ên nêbê, “Xomxo tyo nêb ob la na, léc il xêen obêc ma? Mêt ob la vô Yuda wê la dô Glik ben ge ên nêl xolac vô he Glik, me? ³⁶ Xomxo tyo nêl ên nêbê il ob myag i, léc il xêvôen obêc ma, di vigwe wê ob la dô vac ge, il ob la vac lêm. Om kiyang tige kehe tibêna?”

Kiyang lec mia maviha

³⁷ Buc levac tigee mila vô myahipu wê ob tiyôô vac ge di buc tige buc levac wê luu baba vêl ge, om Yesu kidi lec vac he mahigun di keac vya levac ên nêbê, “Xomxo ti obêc nêb num mia ge, od i lam vô a lê, ên a obêc vông mia mi i num. ³⁸ Tiyi xochê kiyang wê yêp vac xolac bêga nêbê, ‘Xomxo ti obêc vông i vin a ge od mia maviha obêc lam vac i nilô di lop mi la.’” ³⁹ Yesu nêl kiyang tige lec Myakilôhô Ngibua wê ob val vô he wê vông i vin Yesu ge. Léc buc wê Yesu nêl kiyang tige, Myakilôhô Ngibua valên gên ma, ên Yesu gên o lax mi la dô vac xêseac lag puunê lêm.

Xomxo hibu he la yuu lec Yesu

⁴⁰ Xomxo ngô kiyang tige di ya nêl ên nêbê, “Xomxo tiga, plopet ti wê il dô bin ge vixôhilôg.” ⁴¹ Di he ya nêl ên nêbê, “Ge Kilisi.” Léc he ya nêl ên nêbê, “Kilisi ob lam gê Galili lêm. ⁴² Èn kiyang yêp vac xolac bêga nêbê Kilisi kehe yêp vac Devit om obêc lam gê Betlehem vac Devit ben.” ⁴³ Mégem xomxo tigee hibu he la yuu lec Yesu, ⁴⁴ di he ya nêb ob hôm i xôn, léc xomxo ti o hôm vigê lec i lêm.

Xomxo levac wê Yuda vông ge o vông i vin Yesu lêm

⁴⁵ Mêt xêhipue lax mi la vô xomxo levac wê mi si daa gee hixôn he Palisi, di he kinêg vô xêhipue ên nêbê, “Bêna léc xam o kô i mi lamê?” ⁴⁶ Léc xêhipue nêl vô he ên nêbê, “Kiyang wê xomxo tyo mi nêl ge, xomxo ti o nêl kiyang tibêge ila lêm.” ⁴⁷ Om he Palisi nêl vô he ên nêbê, “Xomxo ge kityoo xam éno. ⁴⁸ Xomxo levac gae hixôn xe Palisi, xe ti o vông i vin xomxo tyo lêm. Ma vêl. ⁴⁹ Di xomxo tibeac wê ngô Yesu vya ge, he o vyac xovô Moses xolac lêm, om he vô nipaên pyap.”

⁵⁰ Léc Palisi ti lê nêbê Nikodimas wê la vô Yesu ilage dô hixôn he, om nêl vô lie Palisi ên nêbê, ⁵¹ “O tiyi wê il ob vông kiyang vô xomxo ti vaxvax ge lêm. Èn xolac wê il vông ge nêl ên nêbê il ob ngô xomxo nêng kiyang mi xovô môt wê i vông ge pyap tax lê.” ⁵² Léc he so vya vô i ên nêbê, “Ông ge tibii Galili ti om ông ngidu i xônê? Ông obêc kitong xolac wê yêp vac kipihac ge od ông ob xovô bê plopet ti ob lam gê Galili lêm.” ⁵³ [Pyap dêc he vihati sea di toto ge la ben.

8

He kô vêx yôdac ti mi la vô Yesu

¹ Mêd Yesu lec mi la lec kitôn Oliv, ² dì vigwe vidiiên titige lax mi la vac Anutu xumac ngibua. Mêd xomxo tibeac kituc la vô i om Yesu dô di vông xolac vô he. ³ Mêd xomxo wê xovô Moses xolac gee hixôn he Palisi, he yê vêx ti wê vông yôdac ge om kô vêx tyo mi la lax vac he mahigun. ⁴ Mêd he nêl vô Yesu ên nêbê, “Xolac kehe, vêx tiga vông môt yôdac mi xe xê. ⁵ Moses nêl vac xolac ên nêbê vêx tibêga, xomxo ob hi ya ngidax ên i yib. Om ông ob nêl bêna lec i?” ⁶ He nêl bêge, nêb ob yaxêng Yesu bêc obêc nêl kiyang ti so ge od he ob vông kiyang vô i. Léc Yesu yu kwa vac di so kibun ya vigê liyihî.

⁷ Mêd he kinêg tii vac vac vô Yesu, om Yesu kidi mi le kisii di nêl vô he ên nêbê, “Xomxo ti vac xam mahigun wê xovô nêb nipaên ti o yêp vô i lêm ge od i hôm ngidax mi nêx vêx tiga ya taxlee.” ⁸ Mêd Yesu yu kwa vac di so kibun tii vac. ⁹ Xomxo tigee ngô kiyang wê Yesu nêl ge di xovô nêl nipaên om ti le lop mi la vixun. He levac la mug dì he ba lop mi timu vô he vixa, di Yesu vaci hixôn vêx tyo wê yuu xeedô. ¹⁰ Mêd Yesu kidi mi le kisii di nêl vô vêx tyo ên nêbê, “Vêx, xomxo tigae la na? Ti dô wê ob vông kiyang vô ông ge, me?” ¹¹ Léc vêx tyo nêl vô i ên nêbê, “Xomxo levac, ti dôen ma.” Om Yesu nêl vô i ên nêbê, “Om a êno, a ob vông kiyang vô ông lêm. Ông loc, di le i lêc vông nipaên ti i tii vac lêm.”]

Yesu ge xêseac wê ob linac vô xomxo gê kibun

¹² Yesu nêl vô xomxo tigee tii vac ên nêbê, “A xêseac wê linac lec kibun. Xomxo ti obêc timu vô a ge, od ob la vac mapitoc lêm. Nge, ob dô vac xêseac wê ob vông i vô paha lec di vông i dô maviha ge.” ¹³ Om Palisi nêl vô i ên nêbê, “Ôcông va nêl ông kehe kitong om kiyang wê ông nêl ge o tiyi lêm.” ¹⁴ Mêléc Yesu nêl vô he ên nêbê, “Vixôhilôg, aca va nêl a kehe kitong, lêc kiyang wê a nêl ga, ge kiyang nôn, ên a xovô vigwe kehe wê a lam vac ge, di a xovô vigwe wê a ob lax mi la vac ge. Di xam ge, xam o xovô a bog kehe wê a lam vac ge lêm, di xam o xovô vigwe ti wê a ob lax vac ge lêm. ¹⁵ Xam yaxêng xomxo nêng kiyang ya xovôen wê xacxam vông ge, di a ga, a o yaxêng xomxo ti nêng kiyang lêm. ¹⁶ Léc a obêc nêb yaxêng xomxo ti nêng kiyang ge od a ob yaxêng i nêng kiyang ya môt bôbac, ên o aca va wê a ob yaxêng xomxo nêng kiyang ge lêm. Nge, Mag wê vông a lam ge dô hixôn a. ¹⁷ Kiyang ti yêp vac xolac wê xam vông ge bêga nêbê xomxo yuu obêc nêl kiyang tiyima lec kiyang tibed ge od kiyang wê yuu nêl ge kiyang nôn. ¹⁸ A nêl a kehe kitong di Mag wê vông a lam ge nêl a kehe kitong hixôn.”

¹⁹ Mêd he kinêg vô Yesu ên nêbê, “Mam dô gê na?” Lêc Yesu nêl vô he ên nêbê, “Xam lungên a dì xam lungên Mag êno. Xam obêc xovô a ge od xam obêc xovô Mag hixôn.” ²⁰ Yesu nêl xolac vô xomxo vac Anutu xumac ngibua, vac nilô ti wê he tung mone daa vac ge, om nêl kiyang tige hixôn vô he. Lêc xomxo ti o hôm i xôn lêm, ên buc wê i vông ge o vô kwabo lec lêm.

Yesu nêb ob lax kisii

²¹ Nang dêc Yesu nêl tii vac vô he ên nêbê, “A ob sea xam dì la, dì xam obêc myag a, lêc xam obêc wib hixôn nêm nipaên, ên vigwe wê a ob la vac ge xam obêc la vac lêm.” ²² Mêgem he Yuda nêl vôma ên nêbê, “Xomxo tige nêl ên nêb il ob la vac vigwe wê ob la dô vac ge lêm. Mêd ici va obêc hi i yib, me?” ²³ Mêd Yesu nêl vô he ên nêbê, “Xam ge kibun, dì a ga kisii ganê. Xam xomxo kibun, dì a ga, a o xomxo kibun lêm.” ²⁴ Kiyang bêge om a nêl vô xam gwêba ên a nêbê xam obêc wib hixôn nêm nipaên. Ên xam obêc vông i vin bê a Anutu nu lêm ge, od xam obêc wib hixôn nêm nipaên.”

²⁵ Om he kinêg vô Yesu ên nêbê, “Ông letya?” Lêc Yesu nêl vô he ên nêbê, “Bêna lêc a ob nêl kiyang tii vac vac vô xamê? A ga, xomxo ti wê a nêl vô xam ilage.” ²⁶ A kiyang wê a ob nêl vô xam dì yaxên xam ge tibeac yêp. Lêc xomxo ti wê vông a lam ge, i kiyang nôn om kiyang wê a ngô vô i ge, a nêl kitong vô xomxo kibun ga.”

²⁷ Kiyang wê Yesu nêl vô he ge, he o xovô bê Yesu nêl lec Ma Anutu lêm, ²⁸ om Yesu nêl vô he ên nêbê, “Buc wê xam obêc hi Xomxo Nu lec xax ge od xam obêc xovô bê a Anutu nu mê, dì xam obêc xovô bê yuac wê a vông ge a o vông ya xovônen wê aca vông ge lêm. Nge, a nêl kiyang tiyi kiyang wê Mag vông vô a ge.” ²⁹ Mag wê vông a lam ge dô hixôn a dì o sea a dô tamaén lêm, ên a vông yuac wê Mag ob yê niviha ge tiyi buc vihati.” ³⁰ Yesu nêl kiyang tige om xomxo tibeac vông i vin i.

Kiyang nôn obêc piwelac il vêl ên nipaên

³¹ Yesu nêl vô xomxo Yuda wê vông i vin i ge ên nêbê, “Xam obêc hôm a kiyang xôn pilahi mi dô vac ge od xam tu a nuge vông vinêr nôn.” ³² Xam obêc xovô kiyang nôn, dì kiyang nôn obêc piwelac xam vêl dì xam dô nimviha.” ³³ Lêc he nêl vô Yesu ên nêbê, “Xe ga Eblaham bue, om xe o la vac xomxo ti kwa ngibi ila mi tu he nue yuac lêm. Lêc bêna lêc ông nêl ên ông nêbê kiyang tige obêc piwelac xe vêl ên tibii levac wê viac xe ge?”

³⁴ Om Yesu nêl vô he ên nêbê, “A nêl hixôn nôn vô xam bê xomxo vihati wê dô vac nipaên ge, he tu nipaên tige nue yuac pyap.” ³⁵ Dì nue yuac ti o tiyi wê ob dô vac xumac luta ge lêm. Nge, xomxo levac nu vaci wê ob dô vac luta. ³⁶ Om Anutu nu obêc piwelac xam vêl ge, od xam obêc dô nimviha nôn dì nipaên ti ob pitii lec xam lêm.” ³⁷ A xovô ên a nêbê xam ge Eblaham bue, lêcom xam nêbê xam ob hi a xib, ên kiyang wê a vông ge o yêp vac xam nilôm lêm. ³⁸ Kiyang wê a nêl ge a nêl i tiyi wê a xê vô Mag ge, dì xam ge, xam vông i tiyi wê xam ngô vô mam ge.”

³⁹ Mêd he nêl vô Yesu ên nêbê, “Xe mag Eblaham.” Lêc Yesu nêl vô he ên nêbê, “Xam obêc Eblaham nue nôn ge od xam obêc vông môp i tiyi wê Eblaham vông ge. Lêc xam o vông môp tiyi wê Eblaham vông ge lêm.” ⁴⁰ A nêl kiyang nôn wê a ngô vô Anutu ge vô xam, lêc xam nêb xam ob hi a xib. Môp wê Eblaham vông ge ti o yêp bêge lêm.” ⁴¹ Xam vông môp

tiyi xocbê mam mi vông ge.” Mêd he nêl vô Yesu ên nêbê, “Xe o tifi xocbê nipwo wê ta kô vax dì ma ma ge lêm. Xe mag Anutu tibed wê dô ge.” ⁴² Lêc Yesu nêl vô he ên nêbê, “Anutu obêc xam mam vixôhilôg nôn ge od xam xêmyaa obêc vin lec a, ên a dô hixôn Anutu lêc lam. Dì a o lam i tifi xovôen wê a vông ge lêm. Nge, Anutu vông a lam. ⁴³ Xam o xovô kiyang wê a nêl ga lêm, kehe bêga nêbê xam nêb xam ob ngô a vyag lêm.

⁴⁴ “Xam mam ge Seten, om kiyang wê yêp vac mam nilô ge, xam nêb xam ob timu vô mî vông i vô nôn lec. Buc taxlee ilage Seten mi hi xomxo yib di o dô vac kiyang nôn lêm, ên kiyang nôn ti o yêp vac i nilô lêm. Di kiyang wê mi nêl ge, nêl i tifi kiyang kityooên wê yêp vô i ge, ên i xomxo kityooên wê tu kiyang kityooên kehe. ⁴⁵ Di a ga, a lam nêl kiyang nôn om xam nêb xam ob vông i vin kiyang wê a nêl ge lêm. ⁴⁶ Xam letya tifi wê xam ob nêl a nêg nipaên seac ge? A nêl kiyang nôn lê, lêc bêna lêc xam o vông i vin a lêmê? ⁴⁷ Anutu nue ob ngô kiyang wê Anutu nêl ge. Lêc xam o Anutu nue lêm, om xam o ngô i vya lêm.”

Yesu luu Eblaham vêl

⁴⁸ He Yuda luu Yesu vya ên nêbê, “Xe nêl vixôhilôg nôn ên xe nêbê ông tibii Samelia wê vimwo nipaên dô vac ông nilôm ge.” ⁴⁹ Lêc Yesu nêl ên nêbê, “Vimwo nipaên ti o dô vac a nilôg lêm. A vông Mag lê vô levac, lêc xam vông a lêg tò sea. ⁵⁰ A o nêb a ob vông a lêg i vô levac lêm, lêc xomxo ti dô wê ob vông a lêg i vô levac, dì xomxo tige wê ob yaxêne xomxo nêl kiyang. ⁵¹ A nêl hixôn nôn vô xam bê xomxo ti obêc timu vô kiyang wê a vông ge od xomxo tige yibên obêc ma vêl.”

⁵² Mêgem Yuda tigeê nêl vô Yesu ên nêbê, “Om gwêbaga xe xovô ên xe nêbê vimwo nipaên ti dô vac ông nilôm. Ên Eblaham hixôn plopete ilage, he yib mî la vêl, lêc ông nêl ên ông nêbê xomxo ti obêc timu vô kiyang wê ông vông ge od obêc yib gê kibun ga lêm. ⁵³ Mêd ông nginoo il bug Eblaham vêl, me? Ên Eblaham yib dì plopete êno yib. Di ông nêb ông ob vông ông tifi letya?”

⁵⁴ Mêd Yesu nêl vô he ên nêbê, “Aca va obêc pimil a lêg ge od obêc tifi xocbê kiyang pileva, lêc xomxo ti wê pimil a lêg ge, Mag vaci, wê xam mi nêl ên xam nêbê xam Anutu. ⁵⁵ Lêc xam o xovô i lêm. Di a ga, a xovô i. A obêc nêl bê a lungên Mag ge od a obêc xomxo kityooên tifi xocbê xam ge. Lêc a xovô i pyap om a timu vô kiyang vihati wê i vông ge.

⁵⁶ “Ilage bum Eblaham xêyaa vô niviha ên nêb ob yê buc wê a vông ge, om yê buc tige dì xêyaa vô niviha.” ⁵⁷ Lêc he Yuda nêl vô Yesu ên nêbê, “Klismas wê ông vông ge gên o mila vô kehe yuu dì vigê yuu (50) lêm, lêc bêna lêc ông nêb ông wê Eblahamê?” ⁵⁸ Mêd Yesu nêl vô he ên nêbê, “A nêl hixôn nôn vô xam bê buc wê Eblaham gên ma ge od a dô tax.” ⁵⁹ He ngô Yesu kiyang tige om he hôm ngidax ên nêb ob nêx Yesu, lêc Yesu xôpac ên he dì sea Anutu xumac ngibua dì la vixun.

9

Yesu vông xomxo ma tocên ti vô niviha lec

¹ Yesu mila, lêc yê xomxo ti wê yubac hixôn ma tocên ge. ² Mêd Yesu nue ngivihî kinêg vô Yesu ên nêbê, “Xolac kehe, letya vông nipaên lêc xomxo tige yubac hixôn ma tocên? Xomxo tige vaci vông nipaên, me ta yuu ma?” ³ Lêc Yesu nêl vô he ên nêbê, “Ge o ici va nêb nipaên, me ta

yuu ma nêñ nipaêñ wê vông i manôñ toc ge lêm. Xomxo tige dô hixôn ma tocên ên Anutu nêb ob hilung xêkizêc wê i vông ge i yêp seac lec xomxo tige. ⁴ Xomxo ti wê vông a lam ge, il ob vông yuac wê i vông ge vô vidilién xêseac, ên mapitoc obêc val dî a xib ge od xomxo ti o tiyi wê ob vông yuac ge lêm. ⁵ Buc wê a dô kibun ga ge, od xêseac wê a vông ge linac vô xomxo gê kibun.”

⁶ Yesu nêl bêge dî pisuv myaluc lec kibun dî pilepac i vô niluc dî lipac vô

xomxo matocên tyo manôñ, ⁷ dî nêl vô i ên nêbê, “Loc lipac mammôn vac mia luaêñ Siloam.” Lê Siloam ge kehe bêga nêbê vông i la. Om xomxo tyo la lipac manôñ dî manôñ seac dî i lax mi la ben.

⁸ Mêd xomxo tige lie viyangtôv hixôn xomxo wê yê wê mi kitaa mone vô xomxo ge, he nêl vóma ên nêbê, “Xomxo ti wê mi dô dî kitaa mone vô xomxo ge, ge mêd xomxo tyo tige mê, me?” ⁹ Mêd he ya nêl ên nêbê, “Ge xomxo tyo tige mê.” Lêc he ya nêl ên nêbê, “Ge o xomxo tyo lêm. Ge xomxo wê yuu manôñ tiyima ge ngwe.” Om xomxo tyo nêl vô he ên nêbê, “A ga mê.” ¹⁰ Om he kinêg vô i ên nêbê, “Vatya vông ông mammôn vô niviha lecê?” ¹¹ Mêd xomxo tyo nêl vô he ên nêbê, “Xomxo ti lê nêbê Yesu ge pilepac myaluc hixôn kibun dî lipac lec a magnôn dî nêl vô a ên nêb a la lipac magnôn vac mia luaêñ Siloam. Om a la lipac dî a magnôn vô niviha lec dî a xê vigwe.” ¹² Om he kinêg vô i ên nêbê, “Xomxo tyo dô gê na?” Lêc xomxo tyo nêl ên nêbê, “A lungên.”

¹³ Mêgem he kô xomxo ma tocên tyo mi la vô he Palisi. ¹⁴ Buc wê Yesu pilepac kibun vô nubuluc dî vông xomxo tyo manôñ vô niviha lec ge, buc sabat, ¹⁵ om he Palisi kinêg vô xomxo tyo tii vac ên nêbê, “Vatya vông ông mammôn vô niviha lec?” Om xomxo tyo nêl vô he ên nêbê, “Xomxo tige lipac kibun nubuluc lec a magnôn dî a la lipac, lêc a magnôn seac.” ¹⁶ Mêd Palisi ya nêl ên nêbê, “Xomxo tige Anutu o vông i lam lêm, ên o timu vô môp wê sabat ge lêm.” Lêc he ya nêl ên nêbê, “Xomxo tige obêc xomxo nipaêñ ge od o tiyi wê ob vông do levac tibêge lêm.” Om he hibuma dî le kidu yuu.

¹⁷ Mêgem Palisi la kinêg vô xomxo tyo tii vac nang ên nêbê, “Xomxo ti wê vông mammôn vô niviha lec ge, ông nêbê vatya lec i?” Mêd xomxo tyo nêl ên nêbê, “Ge plopete ti.”

¹⁸ He Yuda o vông i vin bê xomxo tige manôñ toc ila lêc vô niviha lec lêm, om he keac xomxo tyo ta yuu ma lam ¹⁹ di kinêg vô yuu ên nêbê, “Muu num tiga wê muu nêb yubac hixôn ma tocên mê? Vatya vông manôñ seac mi i yê vigwe?” ²⁰ Om ta yuu ma nêl ên nêbê, “Xii xovô ên xii nêbê ga xii nug wê yubac hixôn ma tocên ge. ²¹ Lêc môp wê manôñ seac dî i yê vigwe ge, xii lungên, dî xii o xovô xomxo ti wê vông i manôñ seac ge lêm. Xam loc kinêg vô ici va, ên vô levac pyap tiyi wê ob nêl kiyang kitong vô xam ge.”

²² Ta yuu ma nêl kiyang bêge, ên yuu xona ên he Yuda levac. Ên he Yuda hilu kiyang pyap ên nêbê xomxo ti obêc nêl Yesu kitong bê i Kilisi ge od he ob tii i vêl ên xumac lilo dî i loc dô ninya. ²³ He Yuda nêl bêge om xomxo tige ta yuu ma nêl ên nêbê, “Vô levac pyap om xam kinêg vô ici va.” ²⁴ Om he Palisi keac xomxo ti wê manôñ toc ilage lôm tii vac nang dî nêl vô i ên nêbê, “Ông pimil Anutu môci lê. Ên xe xovô ên xe nêbê xomxo tige nipaêñ.” ²⁵ Lêc xomxo tyo nêl vô he ên nêbê, “A lungên, xomxo tige

niviha me nipaên. Di a xovô tibed bê ilage a magnôn toc lêc gwêbaga a magnôn seac.”

²⁶ Mêd he kinêg vô i ên nêbê, “Xomxo tige vô va vô ông lêc ông mamnôn seac?” ²⁷ Lêc xomxo tyo ni nyag vô he om nêl ên nêbê, “A nêl vô xam lê, lêc xam o ngô lêm. Bêna lêc xam nêb a nêl i tii vacê? Mêd xam êno, xam nêb xam ob tu i nue hixônê?” ²⁸ Mêd he nêl kiyang nipaên lec i ên nêbê, “Ông ge, ông tu xomxo tige nu ti, di xe ga, xe tu Moses nue. ²⁹ Xe xovô ên xe nêbê Anutu nêl kiyang vô Moses, lêc xomxo tige, xe o xovô bê lam gê na?”

³⁰ Mêd xomxo tyo nêl vô he ên nêbê, “Kiyang tige obêc kehe tibêna? Ên xam nêl ên xam nêbê xam o xovô xomxo tige ben kehe lêm, lêc xomxo tige vông a magnôn seac. ³¹ Il xovô ên il nêbê xomxo wê vông môt nipaên ge, Anutu ob ngô he vya lêm. Lêc xomxo ti obêc kitaa vô Anutu di timu vô kiyang wê i vông ge od Anutu ob ngô i vya. ³² Buc taxlee ilage di i val tip lec gwêbaga, il o ngô kiyang lec xomxo ti wê yubac hixôn ma tocên lêc xomxo ngwe vông i manôn seac ge lêm. ³³ Anutu obêc vông xomxo tige lam lêm ge od o tiyi wê ob vông môt tibêge lêm.” ³⁴ Mêd he Palisi nêl vô xomxo tyo ên nêbê, “Tam kô ông hixôn nipaên, lêc ông nêb ông ob nêl kiyang vô xe?” Mêd he tii i la ninya.

He Palisi nilô vô mapitoc

³⁵ Yesu ngô wê he tii xomxo tige la ninya ge om tulec i di kinêg vô i ên nêbê, “Ông vông i vin Xomxo Nu, me?” ³⁶ Lêc xomxo tyo nêl ên nêbê, “Xomxo levac, Xomxo Nu ge letya? Ông nêl kitong vô a ên a vông i vin i.” ³⁷ Om Yesu nêl vô i ên nêbê, “Ông wê i pyap, ên xomxo tyo, a ga wê a keac vô ông mê.” ³⁸ Mêgem xomxo tyo nêl ên nêbê, “Apumtau, a vông i vin.” Mêd yev vixa kitu vô Yesu di pimil i.

³⁹ Mêd Yesu nêl ên nêbê, “A lam kibun ên a nêb a ob yaxên xomxo nilô, ên xomxo wê manôn toc di he lungê a ge he manôn i seac di he wê manôn seac ge he manôn i toc.” ⁴⁰ Palisi ya dô kwabo hixôn Yesu di ngô kiyang wê i nêl ge om nêl vô i ên nêbê, “Ông nêb xe êno mamnôn toc mê?” ⁴¹ Mêd Yesu nêl vô he ên nêbê, “Xam mamnôn obêc toc ge od nipaên ti ob yêp vô xam lêm. Lêc xam nêl ên xam nêbê xam mamnôn seac di xam xovô kiyang vihati, om nipaên levac gên yêp vô xam.”

10

Kiyang pilepacên lec xenac wê bwoc sipsip le vac ge

¹ Yesu nêl ên nêbê, “A nêl hixôn nôn vô xam bê xomxo ti obêc nêb la vac xenac wê bwoc sipsip vông ge nilô, lêc o la bôbac vô vuayen tyo lêm, di lec xenac vac bangwe ge od xomxo tige tiyi xochê xomxo yôdac me tibii vevac. ² Lêc xomxo ti wê obêc la bôbac vac vuayen wê sipsip vông ge, ge xomxo ti wê mi viac sipsip ge, ³ mêgem xomxo ti wê mi viac vuayen ge ob tax vuayen ên xomxo tige, di sipsip ob ngô xomxo tige vya wê keac mi nêl he toto lê ge om xomxo tyo ob didii he mi la xenac kehe. ⁴ Di bwoc sipsip wê i vông ge ob la xenac kehe pyap ge od xomxo tige ob la mug di sipsip timu vô i vixa mi he la, ên sipsip xovô i vya pyap. ⁵ Di sipsip o tiyi wê ob timu vô xomxo bangwe vixa ge lêm. Nge, ob pec ên i, ên he o xovô i vya lêm.” ⁶ Yesu nêl kiyang pilepacên tige vô he, lêc he o xovô kehe lêm.

Yesu ge wê viac bwoc sipsip niviha ge

⁷ Mêgem Yesu nêl tii vac vô he ên nêbê, “A nêl hixôn nôn vô xam bêga bê a ga, a tiyi xochê vuayen wê bwoc sipsip vông ge. ⁸ Xomxo vihati wê lam tax tax ge he tiyi xochê xomxo yôdac hixôn tibii vevac, lêc sipsip o ngô he via lêm. ⁹ A tiyi xochê vuayen. Xomxo ti obêc lam vô a mi la vac xenac nilô ge od ob la dô niviha, di obêc lop mi la vixun di lôm la xenac lôma ge od ob tulec yaên. ¹⁰ Tibii yôdac lam ên nêb ob vun bwoc sipsip di hi he yib di vông he vô nipaên. Di a ga, a lam ên a nêb sipsip i dô mavîha di kô vizid i luu vêl.

¹¹ “A ga, a xomxo wê a ob viac bwoc sipsip niviha ge. Xomxo wê viac sipsip niviha ge ob sea i ninivi di yib ên ngidu he xôn. ¹² Xomxo ti obêc viac sipsip nêb ob kô mone lec, lêc i o xomxo viacên nôn lêm, di sipsip o tu ixe lêm, om xomxo tige obêc yê wê noo nipaên val ge od obêc sea sipsip dô di pec mi la, di noo nipaên obêc lam nga sipsip di tii he la sea. ¹³ Kehe bêga nêbê xomxo tige viac sipsip ên nêb ob kô mone lec di o xo vigwe pisiv ên sipsip lêm.

¹⁴ “A ga, a xomxo wê a ob viac bwoc sipsip niviha ge. A xovô sipsip wê a vông ge di he xovô a, ¹⁵ tiyi xochê Mag xovô a di a xovô Mag ge, om a ob xib ên ngidu sipsip xôn. ¹⁶ A bwoc sipsip ya dô lê, lêc he gên o lam dô vac xenac tiga lêm. Om a ob la kô he mi lam tung hixôn, di he ob ngô a vyag, mègem he xôn ob dô kidu tibed di xomxo tibed ob viac he. ¹⁷ Mag xéyaa vin lec a di kehe bêga nêbê a ob vông a diluhu vac yibêñ, nang dêc a ob kidi lec magviha nang. ¹⁸ Xomxo ti o tiyi wê ob hôm a xôn di hi a xib ge lêm. Nge, aca va ob vông a diluhu vac yibêñ. Aca va xêkizêc tiyi wê a ob vông a la vac yibêñ ge, nang dêc aca va xêkizêc tiyi wê a ob kidi lec ge. Kiyang tige, Mag nêl vô a ên nêb a vông i vô nôn lec.”

¹⁹ He Yuda ngô Yesu kiyang tige om he hibu he mi le kidu yuu, ²⁰ di he tibeac nêl ên nêbê, “Xomxo tige vimwo nipaên dô vac nilô om vông i piyôp juda. Bêna lêcom xam ngô i vya?” ²¹ Lêc he ya nêl ên nêbê, “Xomxo wê vimwo nipaên dô vac he niłô ge, he ob nêl kiyang tibêge lêm. Vimwo nipaên o tiyi wê ob vông xomxo ma tocêñ manôñ i seac ge lêm.”

He Yuda yê Yesu tiyiên ma

²² Ge buc levac wê Yuda ob xovô buc wê he tax xumac ngibua Jelusalem ge. Buc tige lea yuu ningigooêñ, ²³ mêd Yesu la Anutu xumac ngibua di la vilee lec pêt myahipu ti wê he nêl King Solomon lê lec ge. ²⁴ Mêd Yuda ya la le vivac vô Yesu di nêl vô i ên nêbê, “Ông vông xe nilôm la yuu di obêc miloc vô buc tina? Ông obêc Kilisi ge od ông nêl ông kitong seac vô xe ên va.”

²⁵ Mêd Yesu nêl vô he ên nêbê, “A nêl vô xam pyap, lêc xam o vông i vin a lêm. Yuac vihati wê a vông lec Mag lê ge, nêl a kitong seac, ²⁶ lêc xam o vông i vin lêm, ên xam o tu bwoc sipsip wê a vông ge lêm. ²⁷ Sipsip wê a vông ge ngô a vyag di a xovô he, di he timu vô a vixag. ²⁸ A obêc vông he dô mavîha luta lêc luta di he ob yib lêm, di xomxo ti ob vô he vêl ên a vigêg lêm. ²⁹ Mag wê vông he vô a ge luu susu vihati vêl om xomxo ti o tiyi wê ob vô he vêl ên Mag vigê ge lêm. ³⁰ Xii xôn Mag, nôn tibed.”

³¹ Mêd he Yuda hôm ngidax nêb ob nêx Yesu ya. ³² Lêc Yesu nêl vô he ên nêbê, “A hilung yuac niviha wê Mag vông ge tibeac vô xam. Om xam wê yuac tina so lêc xam nêb xam ob nêx a ya ngidaxê?” ³³ Lêc he Yuda nêl

vô Yesu ên nêbê, “Xe ob nêx ông ya ngidax ên yuac niviha wê ông vông ge lêm. Nge, xe nêb xe ob nêx ông ên wê ông so vyam vô Anutu ge. Ên ông ge xomxo kibun ga ti, lêc ông nêb ông Anutu.”

³⁴ Mêd Yesu luu he via bêga ên nêbê, “Kiyang ti yêp vac xolac wê xam vông ge bêga nêbê, ‘A nêl ên a nêb xam ge Anutu.’ ³⁵ Anutu nêl kiyang tige vô xomxo ilage, lêc nêb he Anutu. Dì il xovô ên il nêbê xomxo ti o tiyi wê ob kitya Anutu via vêl ge lêm. ³⁶ Anutu nêb he Anutu, om bêna lêc xam nêl ên xam nêbê a so vyag vô Anutu ên wê a nêl ên a nêbê a Anutu nu ge? Ên a ga, Anutu vinoo a dì vông a lam kibun.

³⁷ “A vôngên Anutu yuac obêc ma ge od xam o lêc vông i vin a vyag lêm.

³⁸ Lêc a mi vông yuac wê Mag vông ge, om xam obêc nêb vông i vin a vyag lêm ge od xam wê yuac wê a mi vông ge dì vông i vin. Ên xam obêc vông i vin ge od xam obêc xovô bê Mag dô vac a nilôg dì a dô vac Mag nilô.” ³⁹ Mêd xomxo tigee nêb ob hôm Yesu xôn lê, lêc Yesu vô he vigê vêl di loc mi la.

⁴⁰ Mêd Yesu lax mi la mia Jodan viulu ganê tii vac nang dì la dô vac vigwe ti wê Jon lipac xomxo vac ilage. ⁴¹ Mêd xomxo tibeac la vô Yesu, dì nêl ên nêbê, “Jon o vông do levac ya lêm, lêc kiyang vihati wê Jon nêl lec xomxo tige, kiyang nôn.” ⁴² Mêgem xomxo tibeac vac vigwe tige, he vông i vin Yesu.

11

Lasalas yib

¹ Xomxo ti lê nêbê Lasalas vông yidac mi yêp vac ben gê Betani. Betani ge Malia yuu li Mata ben. ² Malia tige wê la too mia nivivea niviha lec Yesu vixa dì kitya ya nibaviluhu ge, lêc Malia li vux Lasalas vông yidac. ³ Om li vêx yuu ge vông kiyang la vô Yesu ên nêbê, “Apumtau, xomxo ti wê ông xêmyaa vin lec i ge vông yidac levac dì yêp.” ⁴ Yesu ngô kiyang tige dì nêl ên nêbê, “Yidac tige ob vông xomxo tige yib lêm. Nge, yidac tige vông, ên nêb ob vông Anutu lê i vô levac dì ob vông Anutu nu lê i vô levac êno.”

⁵ Yesu xêyaa vin lec Mata yuu li vêx dì Lasalas. ⁶ Yesu ngô wê yidac vông Lasalas ge, lêc dô vigwe wê dô vac ge tiyi buc yuu hixôn, ⁷ nang dêc nêl vô nue ngivihi ên nêbê, “Il ob lax mi la Judia i tii vac nang.” ⁸ Lêc nue ngivihi nêl vô i ên nêbê, “Xolac kehe, nyop ge, xomxo Yuda nêb ob nêx ông ya ngidax, lêc ông nêb ông ob lax mi la vigwe tige i tii vac nangé?”

⁹ Mêgem Yesu luu he via ên nêbê, “Hiyôv manôn vigê yuu dì tô mi la yuu yêp vô vidiién ti. Om xomxo ti obêc vilee vô vidiién ge od ob mwoc lêm, ên xêseac linac lec kibun. ¹⁰ Lêc obêc la vô bucên ge od ob mwoc, ên xêseac o linac vô i lêm.”

¹¹ Yesu nêl pyap, lêc nêl vô he nang ên nêbê, “Il lig Lasalas yêp, lêcom a ob la tipi vô i kidi lec.” ¹² Om Yesu nue ngivihi nêl ên nêbê, “Apumtau, ici va obêc yêp ge od obêc vô niviha lec nang.” ¹³ Kiyang tige, Yesu nêl lec wê Lasalas yib ge, lêc he so ên he nêb mêd Yesu nêl ên nêb Lasalas vaci yêp. ¹⁴ Om Yesu nêl seac vô he ên nêbê, “Lasalas yib, ¹⁵ lêc a xêgyaa vô niviha ên wê a o la dô hixôn i ge lêm, ên a xo xam ên a nêb xam vông i vin a. Om xam lam ên il ob la xê Lasalas.” ¹⁶ Mêd Tomas wê ta kô yuu li ngwe ked ge, nêl vô lie ngivihi ên nêbê, “Xam lam ên il xôn la xib hixôn Yesu.”

Yesu ge kidi lecén yuu maviha dôén kehe

¹⁷ Mêd Yesu loc mì la ên nêb ob la Betani, lêc ngô wê he lii Lasalas vac lôva dì buc yuudiyuu la vêl ge. ¹⁸ Betani yêp kwabo vô Jelusalem tiyi xocbê 3 kilomita ge, ¹⁹ om xomxo Yuda tibeac lam yê Mata yuu Malia ên wê li Lasalas yib ge, ên he nêb he ob vông yuu nilô i vô viyin maên. ²⁰ Mêd Mata ngô wê Yesu val ge om mila vô i vac môp, di Malia dô vac xumac.

²¹ Mêd Mata nêl vô Yesu ên nêbê, “Apumtau, ông obêc dô ga ge od a lig yibê obêc ma. ²² Léc a xovô ên a nêbê gwêbaga ông obêc kitaa susu ti vô Anutu ge od Anutu obêc vông i tiyi wê ông kitaa ge.” ²³ Mêd Yesu nêl vô i ên nêbê, “Lim tuc obêc kidi lec i tii vac nang.” ²⁴ Mêd Mata nêl vô i ên nêbê, “A xovô ên a nêbê obêc buc timuêñ wê xomxo vihati obêc kidi lec i tii vac ge od Lasalas ob kidi lec hixôn.” ²⁵ Om Yesu nêl vô i ên nêbê, “Kidi lecén yuu maviha dôén kehe a. Xomxo wê vông i vin a ge he obêc yib lê, lêc obêc kidi lec maviha. ²⁶ Di xomxo vihati wê dô maviha di vông i vin a ge, he yibê obêc ma. Ông vông i vin kiyang tiga, me?”

²⁷ Mêgem Mata nêl vô Yesu ên nêbê, “Apumtau, a vông i vin ên a nêbê ông ge Kili. Di ông Anutu nu, wê Anutu nêb ob vông ông lam kibun ga ge.”

Yesu byag

²⁸ Mata nêl kiyang pyap di la keac Malia lam dì lum nêl vô i ên nêbê, “Xolac kehe val, lêc nêb ông loc wê i.” ²⁹ Malia ngô kiyang tige mêd kidi lec lutibed dì la vô Yesu. ³⁰ Yesu gên o val viyangtôv lêm. Nge, gên le vac môp wê Mata mila vô i ge. ³¹ Mêd he Yuda wê val ên nêb ob vông Malia yuu Mata nilô i vô nivihä ge, he dô vac xumac lôma hixôn Malia di yê wê Malia kidi lec lutibed di la ge om he timu vô i vixa mì la, ên he xo ên he nêb mêd Malia ob la byag lec lôva.

³² Malia mila vigwe wê Yesu val le ge dì yê Yesu, om mila kwabo vô i di yev vixa kitu vô dì nêl ên nêbê, “Apumtau, ông obêc dô ga ge od a lig yibê obêc ma.” ³³ Yesu yê wê Malia he Yuda wê lam hixôn i ge byag ge, om Yesu yetac dì nilô vô viyin mabu. ³⁴ Mêd kinêg vô he ên nêbê, “Xam lii Lasalas loc yêp tina?” Mêd he nêl ên nêbê, “Apumtau, lam wê.”

³⁵ Mêgem Yesu byag, ³⁶ om Yuda tigee nêl ên nêbê, “Wê, xomxo tige xêyaa vin lec Lasalas luu vêl.” ³⁷ Léc he ya nêl ên nêbê, “Xomxo tige vông xomxo ma tocén manôn seac, lêc mêd o tiyi wê ob ngidu Lasalas xôn ên yibê i ma ge lêmê?”

Yesu tipi vô Lasalas kidi lec maviha vac yibêñ

³⁸ Yesu nilô vô viyin levac dì i mila vô lôva wê he lii Lasalas yêp vac ge. Lôva tige le vac ngidax dì he lax ngidax ti le vac lôva mya xôn. ³⁹ Mêd Yesu nêl ên nêbê, “Hôm ngidax tige vêl.” Lêc yibêñ tyo li vêx Mata nêl ên nêbê, “Apumtau, Lasalas yib mì xe yev, dì buc yuudiyuu lam la vêl, om nuhu typi.” ⁴⁰ Léc Yesu nêl vô i ên nêbê, “A nêl gwêba vô ông ên a nêbê ông obêc vông i vin ge od ông ob wê xêseac wê Anutu vông ge.” ⁴¹ Mêgem he hôm ngidax tige vêl dì Yesu lax ma la kisii di nêl ên nêbê, “Mag, a hi vixag pec ên wê ông ngô kitaaén wê a vông ge. ⁴² Di a xovô ên a nêbê tiyi buc vihati ông vô ninyam vô a vyag, lêc a nêl kiyang tiga ên a nêb xomxo wê val le gae, he i ngô dì vông i vin bê ông vông a lam.”

⁴³ Yesu nêl bêge mêd tyuc vya levac ên nêbê, “Lasalas, kidi lec mi lam.” ⁴⁴ Mêgem Lasalas kidi lec dì lam vixun lêc lam hixôn nivimihi wê he viyum

vigê yuu vixa vac ge dì nivimihi nipwo ti wê he viyum manôn vac ge hixôn, om Yesu nêl vô he ên nêbê, "Xam piwelac nivimihi vêl dì vông i loc."

*Yuda levac hilu kiyang pyap ên nêb ob hi Yesu i yib
(Matyu 26:1-5; Mak 14:1-2; Luk 22:1-2)*

⁴⁵ Yuda wê la vô Malia ge, he yê wê Yesu tipi vô Lasalas ge, om he tibeac vông i vin Yesu. ⁴⁶ Lêc he ya la vô Palisi dì la nêl môp wê Yesu vông ge kitong vô he. ⁴⁷ Mêgem Palisi hixôn xomxo levac wê mi si daa gee, he kitucma hixôn kaunsil vihati dì nêl vòmâ ên nêbê, "Il ob vông bêna? Ên xomxo tyo vông do levac tibeac, ⁴⁸ om il obêc dixê ya madnôn dì i dô ge od obêc vông do levac ya hixôn di xomxo vihati obêc vông i vin i, di tibii Lom wê viac il ge obêc val kipê xumac ngibua wê il vông ge sea di vông il vô nipaên hixôn."

⁴⁹ Lêc he ti lê nêbê Kaiapas wê tu xomxo daa sién nêl levac lec klismas tige nêl vô he ên nêbê, "Xam o xovô kiyang ti lêm, ⁵⁰ di xam o xovô môp wê ob vô niviha vô xam ge lêm. Xam ngô lê. Xomxo tibed obêc yib ên xomxo vihati ge od obêc vô niviha vô il dì tibii Lom ob lam kitya il vêl lêm." ⁵¹ Kaiapas o nêl kiyang tige ya xovôen wê ici va vông ge lêm. Nge, tu xomxo wê mi si daa gee nêl xomxo levac lec klismas tige om nêl kiyang bo tige seac lec Yesu wê ob yib ên he Yuda ge. ⁵² Lêc ob yib ên Yuda vaci lêm. Nge, ob yib ên kituc Anutu nue vihati wê dô vac vigwe vihati ge he lam dô kidu tibed.

⁵³ Vô buc tige Yuda hilu kiyang pyap nêb ob hi Yesu i yib. ⁵⁴ Om Yesu o la vilee vac Yuda mahigun ti tii vac lêm. Nge, sea vigwe tige mi la vigwe ti lê nêbê Iplem wê yêp kwabo vô vigwe mahigun pileva ge, mêd Yesu he nue ngivihi la dô vac vigwe tige.

⁵⁵ Buc levac wê Yuda ob xovô buc Pasova Isip ilage vô kwabo lec, om xomxo tibeac vac vigwe toto ge kituc la Jelusalem tax, ên nêb ob la viac he ên buc tige. ⁵⁶ Om he myag Yesu vac Anutu xumac ngibua di nêl vòmâ ên nêbê, "Xam xo bêna? Xam nêb Yesu ob yê buc tiga hixôn, me?" ⁵⁷ Xomxo levac wê mi si daa gee hixôn Palisi nêl kiyang pyap ên nêbê xomxo ti obêc xovô vigwe ti wê Yesu la dô vac ge od i lam nêl kitong vô he ên he ob la hôm Yesu xôn.

12

*Malia too mia nivivea niviha lec Yesu vixa
(Matyu 26:6-13; Mak 14:3-9)*

¹ Buc vigê vilu dì sec ti gên yêp di obêc buc Pasova, di Yesu lax mi la Betani wê tipi vô Lasalas kidi lec maviha vac yibêng. ² Mêd he myêl yaên vô Yesu, di Mata duu yaên di Lasalas dô hixôn he wê ob ya yaén hixôn Yesu ge. ³ Mêd Malia kô mia nivivea niviha vac butol ti. Mia tige he kisuu lec mone levac mabu. Mêd Malia kô mi la too lec Yesu vixa di kitya ya nîbaviluhu. Om mia nivivea tige la pup vac xumac nilô.

⁴ Lêc Yesu nue ngivihi ti lê nêbê Judas Iskaliot wê ob vông Yesu vac tibii vevac vigê ge nêl ên nêbê, ⁵ "Bêna lêc il o vông mia tige mi tibii kisuu ya mone yul yon (K300) ên il vông vô tibii wê nêl susu maên geê?" ⁶ Judas nêl bêge lêc o xo tibii wê nêl susu maên ge lêc nêl kiyang tige lêm. Ên Judas ge tibii yôdac ti lê, lêc mi viac Yesu he nue ngivihi tin wê mone mi dô vac ge om mone wê he mi tung la vac tin ge Judas mi kô ya yôdac. ⁷ Lêc

Yesu nêl vô i ên nêbê, “Vông vêx tige i dô, ên vông tixuuên lec buc wê he ob lipac mia nivivea lec a nignivi dì yev a ge. ⁸ Xomxo wê nêl susu maên ge ob dô hixôn xam buc dia, dì a ga, a ob dô hixôn xam buc dia lêm.”

Yuda levac hilu kiyang pyap nêb ob hi Lasalas i yib

⁹ Yuda tibeac ngô wê Yesu la dô Betani ge om he lam vô i, lêc he o lam nêb he ob yê Yesu vaci lêm. Nge, he nêb ob yê Lasalas wê Yesu tipi vô i kidi lec vac yibêng ge hixôn. ¹⁰ Mégem xomxo levac wê mi si daa gee hilu kiyang pyap ên nêb ob hi Lasalas i yib hixôn, ¹¹ ên Yuda tibeac xovô wê Lasalas kidi lec vac yibêng ge om sea Yuda levac dì vông i vin Yesu.

Yesu la Jelusalem tiyi xochê xomxo levac ti (Matyu 21:1-11; Mak 11:1-11; Luk 19:28-40)

¹² Mêd vigwe vidieni titige xomxo tibeac wê lam dô ên nêb ob yê buc levac ge, he ngô wê Yesu ob mila Jelusalem ge, ¹³ om he la kô xax lihi dì mila vô Yesu vac môt dì tyuc hixôn nêbê,

“Il ob pimil Anutu dì hi vixad i pec ên xomxo ti wê tu Apumtau manôn dì lam ge, ên i ge tu xomxo levac wê ob viac il Islel.”

¹⁴ Mêd Yesu la kô bwoc donki nu ti mi dô lec, tiyi xochê kiyang wê yêp vac xolac bêga nêbê,

¹⁵ “Xam xomxo Saion, xam xona ên i ma. Xam wê lê. Xam xomxo levac wê ob viac xam ge dô lec bwoc donki nu ti mi val.”

¹⁶ Vô buc tige Yesu nue ngivihi gên lungên kiyang tige kehe, lêc buc wê Yesu lax dô vac xêseac ge od he xo i lax lec kiyang tige wê yêp vac xolac ge dì xovô nêbê kiyang tige vô nôn lec vô Yesu.

¹⁷ Xomxo wê dô hixôn Yesu dì yê wê Yesu tipi vô Lasalas kidi vac lôva mi lam ge la nêl kiyang tige kitong vô xomxo tibeac. ¹⁸ Om xomxo tibeac ngô wê Yesu vông do levac tige om he mila vô Yesu vac môt. ¹⁹ Mêd Palisi nêl vôma ên nêbê, “Xam wê lê. Il nêd kiyang nôn ma, ên xomxo vihati la timu vô Yesu.”

Glik ya nêb ob yê Yesu

²⁰ Xomxo tibeac la Jelusalem ên nêb ob la kitaa vô Anutu lec buc ngibua tige lêc Glik ya la hixôn. ²¹ Om Glik tigee la vô Pilip wê ben Betsaida vac vigwe levac Galili ge, dì la nêl vô i ên nêbê, “Xomxo levac, xe ob xê Yesu.”

²² Om Pilip la nêl vô Andlu, di yuu la nêl vô Yesu. ²³ Lêc Yesu nêl vô yuu ên nêbê, “Buc wê Xomxo Nu ob kô lê levac ge vô kwabo lec pyap. ²⁴ A nêl hixôn nôn vô xam bê skom nôn ti obêc la vac kibun lêm ge od ob dô ya nôn tibed. Lêc obêc la dô vac kibun nilô ge od ob tyip mi vô nôn tibeac.

²⁵ Xomxo ti xêyaa obêc vin lec ici va ninivi ge od ninivi wê i vông ge obêc yib. Lêc xomxo ti obêc vông i vin Anutu dì yê ici va ninivi tiyi xochê susu pileva gê kibun ga ge od obêc la dô mavîha luta lêc luta. ²⁶ Xomxo ti obêc nêb vông yuac wê a vông ge od i lam timu vô a, ên vigwe wê a ob dô vac ge, a nuge yuac obêc dô hixôn a. Dì xomxo ti obêc vông yuac wê a vông ge od Mag obêc vông lê levac vô i.

Yesu nêl lec wê ob yux lec xax ge

²⁷ “Gwêbaga a nilôg vô viyin levac om a ob nêl bêna? A ob nêl bê ‘Mag, ông vô viyin tiga vêl ên a?’ Ma vêl, a ob nêl bêge lêm. Ên a lam ên a nêb a ob kô viyin tige. ²⁸ Mag, ông vông ông lêm i vô levac.” Yesu nêl bêge mêd via tí lam gê lag puunê ên nêbê, “A vông a lêg vô levac pyap dì a ob

vông i vô levac tii vac nang.” ²⁹ Lêc xomxo wê le kwabo gee ngô vy a tige om he ya nêl ên nêbê, “Deac tug,” dì he ya nêl ên nêbê, “Angela ti keac vô i.”

³⁰ Lêc Yesu luu he vy a ên nêbê, “Vya tige o lam vô a ên nêb a ngô lêm. Nge, lam ên nêb xam ngô. ³¹ Gwêbaga Anutu ob yaxênen xomxo kibun ga nêbê kiyang di ob tii Seten wê tu xomxo kibun ga nêb levac ge i la vêl. ³² Gwêbaga a gên dô kibun, lêc buc wê a obêc yux lec xax ge od a ob didii xomxo vihati lam vô a.” ³³ Yesu nêl kiyang tige ên nêb ob nêl môt wê ob yib ge kehe kitong vô he.

³⁴ Mêd xomxo tigee luu i vy a ên nêbê, “Xe ngô kiyang wê yêp vac xolac bêga nêbê Kilisi ob dô mavilha luta lêc luta. Bêna lêc ông nêb Xomxo Nu ob yux lec xaxê? Xomxo Nu ge letya?” ³⁵ Mêd Yesu nêl vô he ên nêbê, “Xêseac ob dô hixôn xam myabo tya. Om buc wê xêseac dô hixôn xam ge od xam loc vac xêseac, ên mapitoc i o lêc hivun xam xôn lêm. Ên xomxo ti obêc la vac mapitoc ge od ob lungên môt wê ob la vô ge. ³⁶ Om xam vông i vin xêseac wê dô hixôn xam ge, êdêc tu xêseac nue.” Yesu nêl kiyang tige pyap mêt sea he dì la xôpac ên he.

Yuda tibeac o vông i vin Yesu lêm

³⁷ Yesu vông do levac tibeac vô xomxo manôn mi he yê, lêc he o vông i vin i lêm. ³⁸ Om kiyang wê plopet Aisaia nêl ilage vô nôn lec. Kiyang tige yêp bêga nêbê,

“Apumtau, letya vông i vin kiyang wê xe nêl ge? Apumtau hilung xêkizêc wê i vông ge lê, lêc letya vông i vin? Xomxo ti o vông i vin lêm.”

³⁹ Xomxo tigee tiyiên ma wê ob vông i vin Yesu ge dì kehe yêp vac kiyang ngwe wê Aisaia kivuu bêga nêbê,

⁴⁰ “Anutu vông he manôn toc dì vông he piyôp vô xêkizêc, om he manôn yêen ma dì he piyôp xovônen kiyang ti ma, dì he o pilepac he bê Anutu ob vông he dô niviha lêm.”

⁴¹ Aisaia yê xêseac wê Kilisi vông ge om nêl kiyang tige lec Kilisi vaci.

⁴² Mêgem Yuda levac, he tibeac vông i vin Yesu, lêc he xona ên Palisi om he o nêl vông vienê wê he vông ge kitong seac lêm, ên he xona ên wê Palisi obêc tii he vêl ên xumac liло dì vông he la dô ninya ge. ⁴³ Ên Yuda tigee xêyaa vin lec nêb xomxo i yê he niviha, dì he o xovô nêbê Anutu i yê he niviha lêm.

Yesu kiyang wê ob yaxênen xomxo ge

⁴⁴ Yesu keac vy a levac yêp seac ên nêbê, “Xomxo ti obêc vông i vin a ge od o vông i vin aca va tibed lêm. Nge, vông i vin xomxo ti wê vông a lam ge hixôn. ⁴⁵ Di xomxo wê yê a ge od yê xomxo ngwe wê vông a lam ge hixôn. ⁴⁶ A lam dô kibun ga hixôn xêseac, ên a nêb xomxo wê vông i vin a ge, he i o lêc dô vac mapitoc nang lêm. ⁴⁷ Xomxo ti obêc ngô a kiyang lêc timu vônen obêc ma ge od a ob titô i lêm. Ên a o lam ên a nêb a ob yaxênen xomxo nêl kiyang lêm. Nge, a lam ên a nêb a ob hôm he lec. ⁴⁸ Xomxo ti obêc vô nimi vô a dì ngônen a kiyang obêc ma ge od i nêb wê ob yaxênen i ge yêp, ên kiyang wê a nêl ge obêc yaxênen i vô buc timuê. ⁴⁹ Ên kiyang wê a nêl ge a o nêl ya xovônen wê a vông ge lêm. Nge, Mag wê vông a lam ge, ici va nêl kiyang vô a ên nêb a lam nêl seac. ⁵⁰ Di a xovô ên a nêbê

kiyang wê Mag nêl ge ob vông xomxo dô maviha luta lêc luta, om kiyang wê a nêl ge a nêl vihati tiyi xocbê Mag nêl vô a ge.”

13

Yesu lipac nue ngivihi vixa

¹ Buc Pasova vô kwabo lec, om Yesu xovô nêbê buc wê ob sea kibun di lax mi la vô Ma ge val vô kwabo lec pyap. Yesu xêyaa vin lec nue wê dô kibun ga tiyi buc vihati dì i la tyip lec buc wê ob yib lec ge.

² Vigwe buc mê Yesu he nue ngivihi ya yaén mi dô. Lêc Seten vông xovô ên Judas Iskaliot wê Saimon nu ge ên nêb i nêl Yesu kitong vô tibii vevac. ³ Yesu xovô nêbê Ma vông xêkizéc vô i pyap, dì xovô nêbê i lam vô Anutu dì obêc lax mi la vô Anutu i tii vac nang. ⁴ He gên diya, lêc Yesu kidi lec dì kwax nivimihi vêl dì hôm taul dì vêx lec, ⁵ mêd too mia vac pile levac ti dì la vô nue ngivihi toto dì la lipac he vixa dì kitya ya taul ti wê vêx lec i ge. ⁶ Mêd mila vô Saimon Pita lêc Pita kinêg vô i ên nêbê, “Apumtau, ông ob lipac a vixag?” ⁷ Mêd Yesu luu i vya ên nêbê, “Gwêbaga ông lungêن môp wê a vông ga, lêc timuêñ ge ông obêc xovô.” ⁸ Lêc Pita nêl vô i ên nêbê, “Tiyien ma vêl wê ông ob lipac a vixag ge.” Mêd Yesu luu i vya ên nêbê, “A lipacêñ ông obêc ma ge od o tiyi wê ông ob dô hixôn a ge lêm.” ⁹ Om Pita nêl vô i ên nêbê, “Apumtau, obêc bêge ge od ông ob lipac a vixag pileva lêm. Nge, ông lipac a vigêng yuu bagzub hixôn.” ¹⁰ Lêc Yesu nêl vô i ên nêbê, “Xomxo wê lipac mia pyap ge ob

lipac ninivi vihati tii vac lêm. Nge, ob lipac vixa pileva, ên ninivi vihati vô paha lec. Dì xam ge, xam vô paha lec pyap, lêcom o xam vihati lêm.” ¹¹ Yesu xovô xomxo ti wê ob vông i la vac tibii vevac vigê ge om nêl ên nêbê, “Xam vô paha lec pyap, lêcom o xam vihati lêm.”

¹² Yesu lipac he vixa pyap mêd vinyum nivimihi lec nang dì lax dô dì kinêg vô he ên nêbê, “Môp wê a vông vô xam gwêbaga, xam xovô kehe, me? ¹³ Xam mi nêl a ên xam nêb a xolac kehe dì a Apumtau, om xam nêl i la tiyi, ên a bêge mège. ¹⁴ A ga Apumtau dì a xolac kehe, lêc a lipac xam vixam, om xam êno, xam lipac lime vixa. ¹⁵ Gwêbaga a hilung môp vô xam ên a nêb xam vông i tiyi xocbê a vông vô xam ge. ¹⁶ A nêl hixôn nôn vô xam bêga bê xomxo yuac ti ob luu i xomxo levac vêl lêm, dì xomxo ti wê la nêl xomxo ngwe kiyang ge ob luu xomxo ti wê vông i la ge vêl lêm. ¹⁷ Xam obêc xovô kiyang tiga mi vông i tiyi ge od xam xêmyaa obêc vô niviha.

¹⁸ “Lêc a o nêl kiyang tiga lec xam vihati lêm. Xam wê a vinoo xam mi xam tu axe ge, a xovô xam pyap. Lêc kiyang wê yêp vac xolac ge ob vô nôn lec, kiyang wê nêl bêga nêbê,

‘Xomxo ti wê ya yaén hixôn a ge kô vixa lec kisili, nêb ob kê a.’

¹⁹ Kiyang tige gên o vô nôn lec lêm, lêc a nêb a ob nêl kitong vô xam tax, ên obêc vô nôn lec timuêñ ge od xam xovô bê a xomxo tyo. ²⁰ A nêl hixôn nôn vô xam bê xomxo ti obêc hôm xomxo wê a vông he la ge lec niviha ge, od tiyi xocbê hôm a lec niviha hixôn, dì xomxo ti obêc hôm a lec niviha ge od tiyi xocbê hôm xomxo ti wê vông a lam ge lec niviha hixôn.”

*Yesu nêl xomxo ti wê ob vông i vac tibii vevac vigê ge kitong
(Matyu 26:20-25; Mak 14:17-21; Luk 22:21-23)*

²¹ Yesu nêl kiyang tige pyap mêd nilô vô viyin mabu dî i nêl kiyang seac vô he ên nêbê, “A nêl vixôhilôg nôn vô xam bêga bê xacxam ti obêc vông a vac tibii vevac vigê.” ²² Lêc Yesu nue ngivihi lungên kiyang tige kehe om yêma manôn, ên nêb mêd nêl kiyang tige lec letya? ²³ A, Jon wê Yesu xêyaa vin lec a luu vêl ge, a dô kwabo vô Yesu, ²⁴ om Saimon Pita nêx kwa vô a ên nêb a kinêg vô Yesu bê Yesu nêl kiyang tige lec letya? ²⁵ Om a du mi la kwabo vô Yesu dî kinêg vô i ên nêbê, “Apumtau, ông nêl kiyang tige lec letya?” ²⁶ Mêd Yesu nêl vô a ên nêbê, “Xomxo ti wê a ob tinyum blet vac mia mi vông vô ge, tyo tige mê.” Mêgem Yesu hôm blet ti dî tinyum vac mia di vông vô Judas wê Saimon Iskaliot nu ge.

²⁷ Judas hôm blet tige mi ya dî lutibed Seten la vac i nilô, mêd Yesu nêl vô Judas ên nêbê, “Môp wê ông nêb ông ob vông ge, ông vông lutibed.” ²⁸ He wê dô lec tevol ge, ti o xovô kiyang wê Yesu nêl vô Judas ge kehe lêm. ²⁹ He xovô ên he nêbê Judas mi viac tin wê he mone mi dô vac ge om he ya xo ên he nêbê Yesu mêd nêl vô Judas nêb i loc kisuu yaén wê he ob ya lec buc levac ge, me nêb i loc vông mone vô tibii wê nêb mone maén ge. ³⁰ Judas hôm blet tige mi ya vêl dî lop mi la vixun lutibed dî vigwe buc.

Yesu nêl xolac paha ti vô he

³¹ Judas la pyap mêd Yesu nêl ên nêbê, “Gwêbaga xêseac wê Xomxo Nu vông ge val le seac, dî Xomxo Nu vông xêseac wê Anutu vông ge val le seac hixôn. ³² Dî Xomxo Nu obêc hilung xêseac wê Anutu vông ge od Anutu vaci ob hilung xêseac wê Xomxo Nu vông ge lutibed. ³³ Xam nuge, a ob dô hixôn xam myabo tya, dî xam obêc myag a, lêc kiyang wê a nêl vô he Yuda ge, a ob nêl vô xam hixôn bêga bê vigwe wê a ob la dô vac ge, xam ti o tiyi wê xam ob la vac ge lêm. ³⁴ A ob nêl xolac paha ti vô xam bêga bê xam xêmyaa i vin lecma. A xêgyaa vin lec xam om xam xêmyaa i vin lecma i tiyi xochê a xêgyaa vin lec xam ge. ³⁵ Ên xam xêmyaa obêc vin lecma ge od xomxo vihati obêc xovô bê xam tu a nuge.”

Yesu nêl nêb Pita obêc yax i vun

(Matyu 26:31-35; Mak 14:27-31; Luk 22:31-34)

³⁶ Mêd Saimon Pita kinêg vô Yesu ên nêbê, “Apumtau, ông ob la na?” Mêd Yesu luu i vya ên nêbê, “Vigwe wê a ob la vac ge, gwêbaga o tiyi wê ông ob timu vô a vixag ge lêm. Lêc timuên ge ông obêc timu vô a vixag.” ³⁷ Om Pita nêl vô i ên nêbê, “Apumtau, bêna lêc a o tiyi wê a ob timu vô ông gwêbaga lêmê? A tiyi wê a ob xib ên ngidu ông xôn.” ³⁸ Lêc Yesu nêl vô i ên nêbê, “Ông nêb ông ob wib ên ngidu a xônê? A nêl hixôn nôn vô ông bê kokilêx obêc gên vô vya lêm dî ông ob yax a vun lu yon.”

14

Yesu ge môp wê ob la vô Anutu ge

¹ Yesu nêl vô he ên nêbê, “Xam nilôm i o lêc vô viyin lêm. Xam vông i vin Anutu, om xam vông i vin a hixôn. ² Xumac wê Mag vông ge, nilô tibeac yêp. Obêc ma ge od a obêc nêl kitong vô xam ilage lê. Lêc yêp vixôhilôg, om a ob lax ên lax viac xam bom wê xam obêc mila dô vac ge. ³ Dî a obêc viac pyap ge, od a ob lôm kô xam, ên xam loc dô hixôn a vac vigwe wê a ob dô vac ge. ⁴ Dî vigwe wê a ob la vac ge, xam xovô môp pyap.”

⁵ Léc Tomas nêl vô Yesu ên nêbê, “Apumtau, vigwe wê ông ob la vac ge, ge xe lungên, om xe ob xovô môp tige bêna?”

⁶ Om Yesu nêl vô i ên nêbê, “A ga môp, di a kiyang nôn kehe, di a maviha dôen kehe. Om xomxo ti obêc la vô Mag vô môp bangwe lêm, ên môp wê ob la vô Mag ge a tibed. ⁷ Xam obêc xovô a ge od xam obêc xovô Mag hixôn, di gwêba lêc xam xovô i, ên xam wê i pyap.” ⁸ Mêd Pilip nêl vô i ên nêbê, “Apumtau, ông hilung mam vô xe di obêc pyap.”

⁹ Léc Yesu nêl vô i ên nêbê, “Pilip, a dô hixôn xam buc xuhu dia, lêc xam gên lungên a? Xomxo wê yê a ge yê Mag. Bêna lêc ông nêb a hilung Mag vô xamé? ¹⁰ Mêd ông gên o vông i vin bê a dô vac Mag nilô di Mag dô vac a nilôg lêm, me? Kiyang wê a nêl vô xam ge, a o nêl ya xovôén wê a vông ge lêm. Nge, Mag wê dô vac a nilôg ge, a vông yuac wê i vông ge. ¹¹ Xam vông i vin bêga bê a dô vac Mag nilô di Mag dô vac a nilôg. Lêc xam obêc vông i vin kiyang tige lêm ge od xam wê yuac wê a vông ge di vông i vin.

¹² “A nêl vixôhilôg nôn vô xam bê xomxo wê vông i vin a ge ob vông do tiyi xochê a mi vông ge, di obêc vông do levac luu wê a vông ge vêl, kehe bêga nêbê a ob lax vô Mag. ¹³ Di susu vihati wê xam ob kitaa lec a lêg ge a obêc vông i vô nôn lec, ên a ob vông xêseac wê Mag vông ge i yêp seac. ¹⁴ Om xam obêc kitaa susu ti lec a lêg ge od a obêc vông i vô nôn lec.

Yesu nêl nêb ob vông Myakilôhô Ngibua i lam

¹⁵ “Xam xêmyaa obêc vin lec a ge od xam obêc timu vô xolac wê a nêl ge. ¹⁶ Di a obêc kitaa vô Mag di Mag obêc vông xomxo ngwe i lam vô xam. Xomxo tige wê ob ngidu xam xôn di dô hixôn xam luta. ¹⁷ Ge Myakilôhô Ngibua wê ob nêl kiyang nôn, lêc xomxo kibun ga o tiyi wê ob kô i lec niviha ge lêm, ên he o xovô i lêm. Lêc xam xovô i pyap, ên mi dô hixôn xam di obêc dô vac xam nilôm.

¹⁸ “A obêc sea xam dô tamaén xochê xomxo pibua ge lêm. Nge, a obêc lôm vô xam i tii vac. ¹⁹ Buc myabo tya di xomxo kibun ga ob yê a tii vac lêm, lêc xam ge, xam obêc wê a. A dô magviha om xam êno obêc dô mamviha. ²⁰ Obêc buc tige od xam obêc xovô bê a dô vac Mag nilô di xam dô vac a nilôg, di a dô vac xam nilôm. ²¹ Xomxo ti obêc ngô a kiyang di viac niviha ge od xomxo tige xêyaa vin lec a, di xomxo ti xêyaa obêc vin lec a ge od Mag xêyaa ob vin lec i di a xêgyaa ob vin lec xomxo tige di a obêc hilung a vô i.”

²² Yesu nêl bêge mêd Judas ngwe wê o Judas Iskaliot lêm ge nêl vô Yesu ên nêbê, “Apumtau, bêna lêc ông ob hilung ông vô xe di ông ob hilung ông vô xomxo kibun ga vihati lêmê? Ge kehe bêna?” ²³ Om Yesu luu i vya ên nêbê, “Xomxo ti xêyaa obêc vin lec a ge od obêc viac kiyang wê a nêl ge niviha, di Mag xêyaa obêc vin lec xomxo tige di xii Mag ob la dô hixôn i. ²⁴ Lêc xomxo wê xêyaa o vin lec a lêm ge ob viac a kiyang niviha lêm. Di kiyang wê xam ngô ge, o a kiyang lêm. Nge, Mag wê vông a lam ge, i kiyang.

²⁵ “A gên dô hixôn xam om a nêl kiyang tiga vô xam. ²⁶ Lêc xomxo ti dô wê ob ngidu xam xôn, ge Myakilôhô Ngibua wê Mag ob vông i lam lec a lêg om obêc lam tixuu xam ya kiyang vihati, di obêc vông xam piyôp yêp seac di xam xovô kiyang vihati wê a nêl vô xam ge.

²⁷ “A ob sea kiyang malehe i yêp vô xam, di kiyang malehe wê a vông ge, a ob vông vô xam. Kiyang malehe wê a vông ge o tiyi xocbê kiyang malehe wê xomxo kibun ga vông ge lêm. Om xam nibum i o lêc tipi di xam xona lêm. ²⁸ Xam ngô wê a nêl vô xam ên a nêbê, ‘A ob sea xam di la, dêc a obêc vena vô xam i tii vac.’ Xam xêmyaa obêc vin lec a ge od xam xêmyaa obêc vô niviha ên wê a ob la vô Mag ge, ên Mag ge xomxo levac luu a vêl. ²⁹ Kiyang ge gên o vô nôn lec lêm, lêc a nêl kitong vô xam tax, êdêc vô nôn lec timuén ge od xam vông i vin.

³⁰ “A ob nêl kiyang tibeac ti vô xam lêm, ên Seten wê tu xomxo kibun ga nêl levac ge ob val, lêc o tiyi wê ob pwoo a pec ge lêm. ³¹ A nêb xomxo kibun ga vihati he i xovô bê a xêgyaa vin lec Mag, om a ob vông yuac vihati i tiyi wê Mag nêl vô a ge. Om xam kidi lec ên il ob la.

15

Yesu ge tu xax wain nôn

¹ “A xax wain wê nôn ge, di Mag ge wê tu yuac kehe. ² Om ngen wê a vông ge wê o vuac nôn lêm ge, Mag ob xoo vêl, di ngen wê vuac ge, Mag ob yal mavigen vêl di pityep ên i vuac nôn tibeac. ³ Kiyang wê a nêl vô xam ge vông xam vô paha lec pyap. ⁴ Xam dô vac a nilôg di a ob dô vac xam nilôm. Ên xam obêc dô vac a nilôg lêm ge od xam ob vô nôn ti lêm, tiyi xocbê xax ngen obêc kitiv lec xax yatôv lêm ge od ob vuac nôn ti lêm.

⁵ “A ga xax wain, di xam ge ngen. Om xomxo ti obêc dô vac a nilôg di a ob dô vac i nilô ge od ob vuac nôn tibeac, lêc xam obêc sea a ge od xam o tiyi wê xam ob vông yuac niviha ti ge lêm. ⁶ Xomxo ti obêc dô vac a nilôg lêm ge od obêc tiyi xocbê xax ngen wê he hup vêl di byêx i la di i la mupac di he nêx i la vac ngwax di ngwax ya vêl ge.

⁷ “Xam obêc dô vac a nilôg di a kiyang obêc yêp vac xam nilôm ge od susu wê xam xêmyaa vin lec mi xam kitaa ge od ob vô nôn lec vô xam.

⁸ Xam obêc vô nôn tibeac ge od ob vông Mag lê vô levac di xam tu a nuge.

⁹ A xêgyaa vin lec xam tiyi xocbê Mag xêyaa vin lec a ge, om xam dô vac xêyaa vin lecên wê a vông ge nilô i tiyi buc vihati. ¹⁰ Xam obêc timu vô kiyang wê a nêl ge od xam ob dô vac xêyaa vin lecên wê a vông ge nilô, tiyi xocbê a timu vô kiyang wê Mag vông ge om a dô vac xêyaa vin lecên wê i vông ge nilô. ¹¹ A nêl kiyang tige vô xam ên a nêb xêyaa niviha wê a vông ge i loc vô xam di i pup vac xam nilôm.

¹² “Xolac wê a ob nêl vô xam ge bêga bê xam xêmyaa i vin lecma i tiyi xocbê a xêgyaa vin lec xam ge. ¹³ Xomxo ti obêc yib ên ngidu lie xôn ge od xêyaa vin lecên wê i vông ge levac luu vêl. ¹⁴ Di xam obêc timu vô kiyang wê a nêl vô xam ge od xam tu a lige nôn. ¹⁵ Ilage a nêb xam tu a nuge yuac, lêc gwêbaga a ob nêl bê xam tu a lige. Ên nue yuac o xovô môp wê he nêb xomxo levac nêb ob vông ge lêm, lêcom xam xovô a kiyang vihati pyap, ên kiyang wê a ngô vô Mag ge, a nêl vihati vô xam mi xam xovô pyap.

¹⁶ “Xam o vinoo a lêm. Nge, a vinoo xam di vông yuac vô xam ên a nêb xam loc vô nôn tibeac di nôn wê xam vông ge i yêp luta. Di xam obêc kitaa susu ti vô Mag lec a lêg ge od Mag obêc vông vô xam. ¹⁷ Om xolac wê a ob nêl vô xam ge bêga bê xam xêmyaa i vin lecma.

Xomxo kibun ga ob yê Yesu nue tiyiên ma

¹⁸ “Xomxo kibun ga obêc yê xam nipaên ge od xam xovô bêga bê he yê a nipaên tax. ¹⁹ Xam obêc tiyi xochê tibii kibun ga ge od tibii kibun ga xéyaa obêc vin lec xam tiyi xochê he lie xam. Lêc xam o tiyi xochê tibii kibun ga lêm, ên a vinoo xam vac he mahigun ên a nêb xam o tu tibii kibun ga i tii vac lêm, om he xéyaa vô nipaên vô xam. ²⁰ Xam xovô lec kiyang wê a nêl vô xam ên a nêbê, ‘Nu yuac ti ob nginoo xomxo levac wê i vông ge vêl lêm.’ Tibii tii a, om obêc tii xam êno. Di he obêc timu vô kiyang wê a nêl ge od obêc timu vô kiyang wê xam nêl ge hixôn. ²¹ Xomxo obêc vông vaxvax vô xam ên wê xam tu axe ge, ên he o xovô xomxo ti wê vông a lam ge lêm.

²² “A obêc lam nêl xolac vô he ilage lêm ge od he nêl nipaên obêc yêp vô he lêm. Lêc a lam nêl xolac vô he, om o tiyi wê he ob yax nipaên wê he vông ge ti vun lêm. ²³ Xomxo ti obêc yê a nipaên ge od tiyi xochê yê Mag nipaên hixôn. ²⁴ Do levac wê xomxo ti o vông ilage lêm ge, a obêc vông vac he mahigun lêm ge od he nêl nipaên obêc yêp vô he lêm. Lêc a lam vông mi he yê pyap, lêc he yê xii Mag nipaên. ²⁵ Môp wê he vông ge vông kiyang wê yêp vac xolac wê he vông ge ti vô nôn lec. Kiyang tige yêp bêga nêbê, ‘He xéyaa vô myavinê vô a pisiv.’

²⁶ “Lêc xomxo wê ob ngidu xam xôn ge dô hixôn Mag om a obêc vông i lam vô xam. Ge Myakilôhô Ngibua wê ob nêl kiyang nôn, om ob lam nêl a kitong vô xam. ²⁷ Di xam êno, xam ob nêl a kitong vô xomxo, ên xam dô hixôn a ilatikwê di i val tyip gwêbaga hixôn.

16

¹ “A nêl kiyang tige vô xam ên a nêb xam o lêc sea vông vinê wê xam vông ge lêm. ² Ên tibii obêc tii xam vêl ên xumac lilo di vông xam la dô ninja, di timuêñ he ob hi xam wib di so nêb he vông yuac niviha wê Anutu vông ge. ³ He ob vông môp tibêge, ên he lungêñ Mag di lungêñ a. ⁴ A nêl kiyang tiga vô xam, ên a nêb viyin tibêge obêc tulec xam timuêñ ge od xam xovô bê a nêl kiyang vô xam pyap.

Yesu nêl lec yuac wê Myakilôhô Ngibua ob vông ge

“A o nêl kiyang tibêge vô xam ilage lêm, ên a dô hixôn xam, ⁵ lêc gwêbaga a ob lax vô xomxo ti wê vông a lam ge. Lêc xam ti o kinêg a lêm bê ‘Ông ob la na?’, ⁶ ên kiyang wê a nêl vô xam gwêbaga vông xam dô hixôn nilôm viyin. ⁷ Lêc a nêl hixôn nôn vô xam bê a obêc la ge od ob vô niviha vô xam, ên a laén obêc ma ge od xomxo wê ob ngidu xam xôn ge valên obêc ma. Lêc a obêc la ge od a ob vông i lam vô xam. ⁸ Di Myakilôhô Ngibua obêc val ge od ob nêl xomxo kibun ga nêl nipaên kitong di ob nêl môp niviha kitong di ob nêl môp wê Anutu ob yaxêñ xomxo nêl kiyang ge kitong. ⁹ Om ob nêl xomxo nêl nipaên kitong bêga bê he o vông i vin a lêm. ¹⁰ Di ob nêl môp niviha kitong, ên a ob lax vô Mag di xam ob wê a tii vac lêm. ¹¹ Di ob nêl kiyang wê Anutu ob yaxêñ xomxo nêl kiyang ge kitong bêga bê Seten wê tu xomxo kibun ga nêl levac ge, Anutu yaxêñ i nêl kiyang pyap om obêc vông myaviwen vô i.

¹² “A kiyang tibeac yêp wê a nêb a ob nêl vô xam ge, lêc xam o tiyi wê xam ob ngô ge lêm. ¹³ Lêc Myakilôhô Ngibua wê kiyang nôn kehe ge obêc val ge od obêc didii xam la vac kiyang nôn. Lêc ob nêl ya xovôen wê ici va vông ge lêm. Nge, ob nêl kiyang wê ngô ge kitong vô xam, di ob nêl

kiyang yuu môp wê ob val timuên ge kitong vô xam hixôn. ¹⁴ Myakilôhô Ngibua ob vông a lêg i vô levac, ên ob kô kiyang wê a vông ge mì lam nél kitong vô xam. ¹⁵ Kiyang vihati wê Mag vông ge tu axe pyap om a nél vô xam bê Myakilôhô Ngibua ob kô kiyang vô a dì nél kitong vô xam.

Nilô viyin obêc pilepac di tu xêyaa niviha

¹⁶ “Buc myabo tya dì xam wêen a obêc ma, dì obêc buc myabo tya nang, lêc xam obêc wê a tii vac.” ¹⁷ Yesu nue ngivihi ya kinêg vóma ên nêbê, “Kiyang tige kehe bêna? Ên nél ên nêbê buc myabo tya dì il xêen i obêc ma, dì buc myabo tya nang lêc il obêc xê i tii vac. Dì nél ên nêb i ob la vô Ma. ¹⁸ Om vya wê nél ên nêbê buc myabo tya, ge kehe bêna? Il lungêن kiyang tyo kehe.”

¹⁹ Yesu xovô wê he nêb ob kinêg kiyang vô i ge, om nél vô he ên nêbê, “Kiyang wê a nél ên a nêbê buc myabo tya dì xam wêen a obêc ma, dì buc myabo tya nang lêc xam obêc wê a tii vac nang, xam dikinêgma lec kiyang tige mê? ²⁰ A nél vixôhilôg nôn vô xam bê xam obêc byag nôn, lêc tibii wê o vông i vin lêm ge ob dô hixôn xêyaa niviha. Xam obêc dô hixôn nilôm viyin lê, lêc nilôm viyin obêc pilepac dì vông xam nilôm vô niviha. ²¹ Obêc vô kwabo lec wê vêx ti nu obêc yubac ge od vêx tige dô hixôn viyin ên xovô nêbê buc wê ob yaxên myavinê ge vô kwabo lec, lêc nu obêc yubac vêl ge od ob xovô myavinê tii vac lêm. Nge, ob dô hixôn xêyaa niviha ên wê nu tige yubac vêl ge. ²² Om gwêbaga xam dô hixôn nilôm viyin, lêc a obêc xê xam tii vac nang, om xam ob dô hixôn xêmyaa niviha yang, dì xomxo ti o tiyi wê ob vô xêyaa niviha tige vêl ên xam ge lêm. ²³ Obêc vô buc timuên ge xam obêc kinêg kiyang ti vô a i tii vac nang lêm. A nél hixôn nôn vô xam bê xam obêc kitaa susu ti vô Mag lec a lêg ge od obêc vông vô xam. ²⁴ Ilage xam o kitaa susu ti lec a lêg lêm, om xam obêc kitaa ge od xam ob kô nôn dì xêmyaa obêc vô niviha yang.

Yesu pwoo nipaên kibun ga pec

²⁵ “A nél kiyang tige vô xam tiyi xocbê kiyang pilepacên. Lêc obêc timuên ge od a ob a nél kiyang pilepacên ti i tii vac vô xam lêm. Nge, a ob nél Mag kehe i yêp seac vô xam. ²⁶ Vô buc tige xam obêc kitaa vô Anutu lec a lêg. A o nél vô xam bê aca va ob kitaa vô Mag ên i ngidu xam xôn lêm, ²⁷ ên Mag vaci xêyaa vin lec xam ên wê xam xêmyaa vin lec a dì xam vông i vin ên xam nêbê a dô hixôn Mag lêc lam ge. ²⁸ Ilage a dô hixôn Mag lêc a sea Mag dì lam kibun, dì gwêbaga a ob sea kibun dì lax mi la vô Mag i tii vac.”

²⁹ Mêd nue ngivihi nél vô i ên nêbê, “Gwêbaga ông nél kiyang yêp seac dì ông o nél kiyang pilepacên lêm. ³⁰ Om gwêbaga xe xovô ên xe nêbê ông xovô kiyang vihati pyap om ông o bin dì xomxo kinêg ông tax lêm. Om xe xovô ên xe nêbê ông dô hixôn Anutu lêc lam.”

³¹ Mêd Yesu luu he vya ên nêbê, “Gwêbaga xam vông i vin a mê? ³² Xam ngô le. Buc vô kwabo lec pyap om tibii ob tii xam sea dì xam toto ge ob la bom bom dì aca va ob dô tamaên. Lêcom obêc aca va lêm, ên Mag dô hixôn a. ³³ A nél kiyang tiga vô xam ên a nêb xam dô vac a nilôg hixôn kiyang malehe. Xam obêc tulec viyin gê kibun ga, lêc xam nilôm i niviha, ên a pwoo nipaên kibun ga pec pyap.”

17

Yesu kitaa vô Anutu nêb i ngidu nue ngivihi xôn

¹ Yesu nêl kiyang tige pyap di manôñ la kisii dì i nêl ên nêbê, “Mag, buc tyo val pyap, om ông vông a lêg i vô levac, êdêc a vông ông lêm i vô levac.

² Ên ông vông xomxo vihati la vac a kwa ngibi ên ông nêb a vông he wê ông vinoo nêb he i tu axe ge vihati i dô maviha luta lêc luta. ³ Di maviha luta dôen kehe bêga nêbê xomxo ob xovô ông bê ông Anutu nôn tibed vixôhilôg, di ob xovô Yesu Kilisi wê ông vông i lam ge. ⁴ A hilung xêseac wê ông vông ge gê kibun ga, di yuac vihati wê ông nêb a vông ge, a vông i la tiyi. ⁵ Mag, ilage wê kibun gên ma ge od a dô hixôn ông vac xêseac, om gwêbaga a nêb ông vông xêseac tige vô a i tii vac nang.

⁶ “A nêl ông lêm kitong vô xomxo wê ông vinoo nêb he tu axe gê kibun ga. He ge ông nume, di ông vông he vô a. He viac ông kiyang niviha, ⁷ di gwêbaga he xovô ên he nêbê kiyang vihati wê ông vông vô a ge, lam vô ông. ⁸ Ên kiyang wê ông nêl vô a ge, a nêl kitong vô he mi he vông i vin. Di he xovô vixôhilôg nôn ên he nêbê a dô hixôn ông lêc lam, di he vông i vin ên he nêbê ông vông a lam.

⁹ “Om a kitaa lec he. A o kitaa lec xomxo kibun ga vihati lêm. Nge, a kitaa ên xomxo wê ông vinoo nêb he i tu axe ge, ên he tu ông nume pyap. ¹⁰ Xomxo vihati wê tu a nuge ge tu ông nume, di ông nume vihati tu a nuge. Di môp wê he vông ge vông a lêg vô levac. ¹¹ A ob dô kibun ga i tii vac lêm. Nge, a ob loc vô ông. Dom he ge he ob dô kibun ga. Mag, ông ngibua, om ông viac he ên he i dô vac ông lêm ti wê ông vông vô a ge nilô, di he i dô tibed tiyi xocbê u tibed ge. ¹² Buc wê a dô hixôn he ge a viac he di he dô vac ông lêm ti wê ông vông vô a ge. A viac he niviha om he ti ob la xôa ma lêm. Lêc xomxo tibed ob kô myaviwen mi la xôa ma, ên kiyang wê yêp vac xolac ge i vô nôn lec. ¹³ Gwêbaga a ob lôc vô ông, di a nêl kiyang tige gê kibun ga, ên a nêb xêyaa niviha wê a vông ge i yêp vac he nilô.

¹⁴ “A nêl ông kiyang vô he mi he vông i vin om tibii kibun ga yê he nipaên, ên xomxo vông vinên kehe o kibun ga lêm, tiyi xocbê a kehe o kibun ga lêm. ¹⁵ A o kitaa ông bê ông kô he vêl ên kibun ga lêm. Nge, a kitaa ông ên a nêb ông viac he ên xomxo nipaên Seten. ¹⁶ He kehe o kibun ga lêm, tiyi xocbê a kehe o kibun ga lêm. ¹⁷ Ông vông he i tu ngibua ya kiyang nôn. Ên kiyang wê ông vông ge, kiyang nôn. ¹⁸ Ông vông a lam dô vac xomxo kibun ga mahigun, om a vông he kô a kiyang mi la vac xomxo mahigun êno bêge. ¹⁹ A vông a diluhu vô ông ên he, ên a nêb he i tu nume ngibua nôn.

²⁰ “Lêc a o kitaa ên xomxo tigee vaci lêm. Nge, a kitaa ên tibii wê ob ngô he kiyang di vông i vin a hixôn ge. ²¹ Mag, a nêb xomxo tigee vihati, he i dô tibed. Ên ông dô vac a nilôg di a dô vac ông nilôm, om a nêb he i dô vac u nilôd, ên xomxo kibun ga he i yê di xovô bê ông vông a lam. ²² Xêseac wê ông vông ge, a vông vô he ên a nêb he vihati i dô tibed, tiyi xocbê u dô tibed ge. ²³ A dô vac he nilô di ông dô vac a nilôg, om a nêb he i dô nôn tibed, ên xomxo kibun ga he i yê di xovô bê ông vông a lam, di he i xovô bê ông xêmyaa vin lec he tiyi xocbê ông xêmyaa vin lec a ge.

²⁴ “Mag, ông vinoo xomxo tigee nêb he i tu axe om a nêb he i dô hixôn a vac vigwe wê a ob dô vac ge, ên he i yê xêseac wê a vông ge. Vô buc

wê kibun gên ma ge, ông xêmyaa vin lec a om ông vông xêseac tige vô a. ²⁵ Mag, ông xomxo hôbac. Xomxo kibun ga lungêng ông, lêc a xovô ông, dì xomxo tigee xovô nêbê ông vông a lam. ²⁶ A nêl ông lêm kitong vô he dì a ob nêl i tii vac vô he, ên môp wê ông xêmyaa vin lec a ge i yêp vac he niłô dì a dô vac he niłô hixôn.”

18

*Judas vông Yesu vac tibii vevac vigê
(Matyu 26:47-56; Mak 14:43-50; Luk 22:47-53)*

¹ Yesu kitaa pyap mêd la hixôn nue ngivihi mi he la mia Kidlon vilu ganê dì la vac yuac ti wê yevêng xax vac ge. ² Lêc Judas ti wê nêl Yesu kitong vô tibii vevac ge xovô vigwe tige, ên Yesu he nue ngivihi mi kitucma vac vigwe tige tiyi buc tibeac. ³ Om Judas kô tibii vevac Lom kidu ti di kô xêhipu wê xomxo levac daa sién hixôn he Palisi vông ge mi he la, mêd he dii ngwax dì kilê susu vevac di mila vac vigwe tige.

⁴ Yesu xovô môp wê he ob vông vô i ge vihati pyap om la kwabo vô he dì kinêng vô he ên nêbê, “Xam myag letya?” ⁵ Mêd he nêl vô i ên nêbê, “Xe myag Yesu Nasalet.” Om Yesu nêl vô he ên nêbê, “A ga mêt.” Judas wê nêb ob vông Yesu vac he vigê ge le hixôn he. ⁶ Yesu nêl ên nêbê, “A ga xomxo tyo” mêd xomxo tigee du mi lax ya nimi di vixog sea mi la yêp kibun.

⁷ Mêd Yesu kinêng vô he tii vac ên nêbê, “Xam myag letya?” Mêd he nêl vô i ên nêbê, “Yesu Nasalet.” ⁸ Mêd Yesu nêl vô he ên nêbê, “A nêl vô xam gwêba ên a nêb a ga mêt, om xam obêc myag a ge od xam vông a nuge i loc vêl lê.” ⁹ Yesu nêl kiyang tige ên nêb kiyang wê nêl ilage i vô nôn lec, kiyang ti wê nêl ên nêbê, “Xomxo wê ông vinoo ên ông nêb he i tu axe ge, a o sea ti mi i la dô xel lêm.”

¹⁰ Mêléc Saimon Pita kô yipac ti om tul vêl ên ninivi di sev xomxo levac wê mi si daa ge nu yuac ti niniva vilu hiyôv la vêl.

Nu yuac tige lê nêbê Malkas. ¹¹ Mêd Yesu nêl vô Pita ên nêbê, “Hoo yipac i lôc vac ninivi. Mia kilin wê Mag vông vô a ge, mêd a numên ob ma?”

He kô Yesu mi la vô Anas

¹² Tibii vevac tigee hixôn xomxo levac ti wê viac he ge di xêhipu wê he Yuda vông ge he hôm Yesu xôn di ku xôn ¹³ di kô mi la tax vô Anas wê Kaiapas yen ge. Kaiapas ge wê tu xomxo daa sién nêb levac lec klismas tige. ¹⁴ Kaiapas ge wê nêl vô he Yuda ilage ên nêbê, “Xomxo tibed obêc yib ên ngidu xomxo vihati xôn ge od obêc niviha.”

Pita yax Yesu vun

(Matyu 26:69-70; Mak 14:66-68; Luk 22:55-57)

¹⁵ Saimon Pita yuu li ngivihi ngwe, yuu la vô Yesu vixa. Xomxo wê mi si daa gee nêñ xomxo levac xovô nu ngivihi ngwe ge, om nu ngivihi tige la xenac lôma hixôn Yesu vac xomxo levac tige ben ¹⁶ dom Pita le vixun. Om nu ngivihi ngwe wê xovôxomxo levac tige lôm nêl vô vêx ti wê viac vuayen ge om kô Pita mi lam vac xenac lôma. ¹⁷ Mêd vêx tige nêl vô Pita ên nêbê, “Ông ge mêd xomxo tiga nue ngivihi ti?” Lêc Pita nêl vô i ên nêbê, “Ma, a o tu i nue ngivihi ti lêm.” ¹⁸ Vigwe vô ningigooen om nue yuac hixôn xêhipu vev ngwax mi nyuu, di Pita la le hixôn mi he nyuu ngwax.

*Xomxo daa sién nén levac kinéng kiyang vô Yesu
(Matyu 26:59-66; Mak 14:55-64; Luk 22:66-71)*

¹⁹ Xomxo ti wê tu xomxo daa sién nén levac ge kinéng Yesu lec nue ngivihi di kinéng kiyang wê mi nél vô xomxo ge. ²⁰ Om Yesu nél vô i ên nêbê, “Kiyang wé a mi nél ge, ge a nél i yêp seac vô xomxo vihati. Tiyi buc tibeac a la nél kiyang vac Yuda xumac lilo di a nél vac Anutu xumac ngibua wê Yuda tibeac lam mi kitucma vac ge, dì a o nél kiyang ti xôpacên lêm. ²¹ Bêna léc ông kinéng kiyang vô a? Ông kinéng vô xomxo wê ngô kiyang gee bêc a nél kiyang vatya vô he. Ên he xovô kiyang wê a nél vô he ge.”

²² Yesu nél kiyang tige dì xêhipu wê le ge ti lam pitap Yesu lia dì nél vô i ên nêbê, “Ông ob nél kiyang tibêge vô xomxo levac wê mi si daa ge lêmê.” ²³ Léc Yesu nél vô i ên nêbê, “A obêc nél kiyang ti so ge od ông nél kiyang tige bê kiyang tige so. Léc kiyang wê a nél ge obêc nôn ge, od bêna léc ông hi a pileva?” ²⁴ Yhi gên dô lec Yesu vîgê dì Anas vông i la vô Kaiapas wê tu xomxo daa sién nén levac ge.

*Pita yax Yesu vun tii vac
(Matyu 26:71-75; Mak 14:69-72; Luk 22:58-62)*

²⁵ Pita nyuu ngwax mi le, léc xomxo tigee kinéng vô i ên nêbê, “Ông ge xomxo tige nue ngivihi ti?” Léc Pita nél ên nêbê, “A o i nue ngivihi ti lêm.”

²⁶ Mêd xomxo ti wê tu xomxo daa sién nén levac ge, nue yuac ti dô. Nu yuac tige lie ti wê Pita sev ninja lihi vêl ge om nu yuac tige nél vô Pita ên nêbê, “A xê ông dô hixôn i vac yuac lôma.” ²⁷ Léc Pita yax Yesu vun tii vac dì lutibed kokilêx vô vya.

*Yesu la le vô gavman levac Pailat manôn
(Matyu 27:1-2,11-14; Mak 15:1-5; Luk 23:1-5)*

²⁸ Vô pítoc yang he sea Kaiapas ben di kô Yesu mi la gavman levac ben, léc he Yuda nêb ob la xumac lôma hixôn lêm, ên he xona nêb he obêc la vac tibii wê o Yuda lêm ge ben ge od ob pwoo he xolac vac dì o tiyi wê he ob ya vizid Pasova ge lêm. ²⁹ Om gavman levac Pailat lam vixun vô he di kinéng vô he ên nêbê, “Xam ob vông kiyang vô xomxo tiga lec kiyang tina?” ³⁰ Om he nél vô i ên nêbê, “Xomxo tige vôngên nipaên obêc ma ge od xe ob kô mi lam vô ông lêm.”

³¹ Mêd Pailat nél vô he ên nêbê, “Om xam kô mi loc dì loc yaxên i tiyi xocbê xolac wê xam vông ge.” Léc he Yuda nél vô Pailat ên nêbê, “Xam Lom vibu xe ên xam nêbê o tiyi wê xe ob hi xomxo ti i yib ge lêm.” ³² Ilage Yesu nél môt wê tibii ob hi i yib ge om kiyang wê he Yuda nél ge vông kiyang wê Yesu nél ge vông nôn lec.

³³ Mêd Pailat lax vac ben di keac Yesu la vô i, dì kinéng i ên nêbê, “Ông ge king wê he Yuda vông ge, me?” ³⁴ Léc Yesu luu i vya ên nêbê, “Ôcông va xovô kiyang tige léc kinéng, me xomxo ya nél a kitong vô ông?” ³⁵ Mêd Pailat nél vô i ên nêbê, “Bêna léc ông kinéng kiyang tiga vô a? A o Yuda ti lêm. Ông lime Yuda hixôn xomxo levac wê mi si daa gee wê he kô ông mi lam vô a. Om ông vô va lêm?”

³⁶ Léc Yesu nél vô i ên nêbê, “He wê la vac a kwa ngibi dì a tu he nén king ge, kehe o yêp gê kibun ga lêm. Ên kehe obêc yêp kibun ga ge od a nuge obêc vông vevac kisuu a lec ên nêb he Yuda i o lêc hôm a xôn lêm. Léc o bêge lêm, ên môt wê a tu he nén king ge, o yêp gê kibun ga lêm.”

³⁷ Om Pailat kinêg vô i ên nêbê, “Om ông ge king ti?” Mêd Yesu nêl vô Pailat ên nêbê, “Ôcông va nêb a king. A lam yubac gê kibun ga dì kehe bêga nêbê a ob nêl kiyang nôn i yêp seac vô xomxo. Di xomxo wê kiyang nôn yêp vac he nilô ge wê ngô a vyag.” ³⁸ Léc Pailat kinêg vô Yesu ên nêbê, “Kiyang nôn ge vatya?”

*Pailat nêl ên nêb he i tul Yesu lec xax pola
(Matyu 27:15-31; Mak 15:6-20; Luk 23:13-25)*

Pailat nêl bêge mêt lop mi lôm vixun vô he Yuda dì nêl vô he ên nêbê, “A o tulec kiyang ti lec xomxo tiga lêm.” ³⁹ Léc môp wê xam vông ge mi yêp bêga nêbê buc Pasova ge a mi piwelac xomxo ti dì vông i loc vô xam. Om xam nêb a piwelac king wê xam Yuda vông ge vêl, me?” ⁴⁰ Léc he tyuc vyac levac ên nêbê, “O xomxo tige lêm. Nge, ông vông Balabas i lôm vô xe.” Balabas ge wê mi hi xomxo dì vun he susu ge ti.

19

¹ Mêd Pailat nêl dì nue vevac kô Yesu mi la pisa i ya yihi. ² Mêd tibii vevac tigee buu kipomac yin dì tung lec Yesu bazub dì kô ngakwi hi tiyi xochê king mi vinyum ge mi la vinyum lec Yesu, ³ mêt he la le vô i manôn dì nêl vô ên nêbê, “Ông king wê Yuda vông ge, ông dô nimviha.” He nêl bêge dì pitap i lia.

⁴ Mêd Pailat lop mi lôm vixun tii vac dì nêl vô he Yuda ên nêbê, “Xam ngô lê. A ob vông xomxo tige i lôm vô xam ên xam xovô bê a o tulec kiyang ti lec i lêm.” ⁵ Mêd Yesu lop mi lam vixun, léc kipomac yin wê he buu ge dô lec bazub dì i vinyum ngakwi hi wê king vông ge lec. Om Pailat nêl vô xomxo tigee ên nêbê, “Xam wê xomxo tinê.” ⁶ Mêd xomxo levac wê mi si daa gee hixôn xêhipu yê Yesu di tyuc vyac levac nêbê, “Tul i lec xax pola. Tul i lec xax pola.” Mêd Pailat nêl vô he ên nêbê, “Om xacxam va kô i mi loc tul lec xax, ên a o tulec soën ti vô i lêm.” ⁷ Mêd he Yuda nêl vô i ên nêbê, “Xolac wê xe vông ge ti yêp bêga nêbê xomxo tige ob yib, ên yong i ên nêb i Anutu nu.”

⁸ Pailat ngô kiyang wê he nêl ge dì xona mabu, ⁹ dì lax vac ben xumac lôma dì kinêg vô Yesu ên nêbê, “Ông vac vigwe tina?” Léc Yesu vô myapilihi vô i. ¹⁰ Om Pailat nêl vô i ên nêbê, “Bêna léc ông o nêl kiyang ti vô a lêmê? Xêkizêc wê a vông ge tiyi wê a ob piwelac ông vêl, di xêkizêc wê a vông ge tiyi wê he ob tul ông lec xax. Léc mêt ông o xovô tige lêm?” ¹¹ Léc Yesu nêl vô i ên nêbê, “Anutu lag puunê obêc vông xêkizêc vô ông lêm ge od ông o tiyi wê ông ob vông susu ti vô a lêm. Om xomxo ti wê vông a vac ông vigêm ge, nipaên wê i vông ge levac mabu luu nipaên wê ông vông ge vêl.”

¹² Pailat ngô kiyang tige mêt myag môp wê nêb ob piwelac Yesu vêl ge. Léc he Yuda tyuc ên nêbê, “Ông obêc piwelac i vêl ge od ông o timu vô kiyang wê king Sisa vông ge lêm, ên xomxo ti obêc nêb i king ge od xomxo tige kô i lec vô Sisa.”

¹³ Pailat ngô kiyang tige mêt kô Yesu mi la vixun dì lax dô lec sia wê xomxo mi dô lec dì titô xomxo nêl kiyang ge. Vac he Yuda vyac, he nêl vigwe tige lê nêbê Gabata, di kehe bêga nêbê pêt ngidax. ¹⁴ Vô buc tige he Yuda viac he ên vizid Pasova wê he ob ya titige mêt hiyôv tyip kiton di Pailat nêl vô he Yuda ên nêbê, “Xam wê king wê xam vông ge lê.” ¹⁵ Léc

he tyuc ên nêbê, "Xam kô i mi loc vêl, di loc hi i lec xax pola." Mêd Pailat kinêg vô he ên nêbê, "Xam nêb a tul king wê xam vông ge lec xax pola, me?" Mêd xomxo levac wê mi si daa gee nêl vô i ên nêbê, "King wê xe vông ge, Sisa tibed di king ngwe o dô hixôn lêm." ¹⁶ Om Pailat vông Yesu la vac he vigê ên nêb he i tul i lec xax pola.

He hi Yesu lec xax pola

(*Matyu 27:32-44; Mak 15:21-32; Luk 23:26-43*)

¹⁷ Mêgem he kô Yesu mi la, mêd Yesu kilê xax pola wê he ob hi i lec ge di sea vigwe Jelusalem di mila vigwe ti wê he nêl lê vac Yuda nya nêbê Golgota, kehe bêga nêbê bazub len. ¹⁸ Mêd he tul Yesu lec xax pola vac vigwe tige, di tul tibii yuu lec xax hixôn Yesu, om Yesu yux vac mahigun di tibii yuu ge, ngwe yux vilu di ngwe yux vilu.

¹⁹ Mêd Pailat kivuu kiyang bo ti di tul lec xax hixôn. Kiyang tige nêl bêga nêbê, "YESU NASALET, KING WÊ HE YUDA VÔNG GE." ²⁰ Vigwe wê he hi Yesu lec xax ge yêp kwabo vô Jelusalem om xomxo tibeac kitong kiyang tige, ên Pailat kivuu vac Yuda nya di Lom nya di Glik nya. ²¹ Mêgem Yuda levac wê mi si daa gee nêl vô Pailat ên nêbê, "Letya nêb ông kivuu bê king wê xe Yuda vông ge? Ông kivuu bêga bê xomxo tiga vaci nêl ên nêb i king wê Yuda vông ge." ²² Lêc Pailat nêl vô he ên nêbê, "Kiyang wê a kivuu pyap ge ob yêp ya wê a kivuu ge."

²³ Tibii vevac tul Yesu lec xax pyap mêd kô i ngakwi di tung i dô kidu yuudiyuu di titang vôma di toto kô. Dom ngakwi dia wê i vông ge o duuên tiyi xochê siot yuu ngakwi baba lêm. Nge, duuên vac kwa di i la tô lec vixa. ²⁴ Om tibii vevac nêl vôma ên nêbê, "Il ob lêx nivimihi tige lêm, om il ob tide mi xê bêc letya ob kô." He nêl bêge om kiyang ti wê yêp vac kipihac xolac ge vô nôn lec, kiyang wê nêl bêga nêbê,

"He titang a ngakwi tiyi he di he tide nêb he tina wê ob kô ngakwi dia wê a vông ge."

Tibii vevac vông môtibêge.

²⁵ Vêx yuudiyuu le vac Yesu xax pola ngibi, Yesu ta yuu li vêx, di Malia wê Klopas vinê ge yuu Malia Makdala. ²⁶ Mêd Yesu yê wê ta le ge, di a Jon, wê Yesu xéyaa vin lec a ge, a le hixôn om Yesu nêl vô ta ên nêbê, "Tag, wê. Ông num le ge." ²⁷ Nang dêc nêl vô a ên nêbê, "Wê, tam le ge." Mêgem buc tige a kô Yesu ta mi i la dô hixôn a vac xumac wê a vông ge.

Yesu yib

(*Matyu 27:45-56; Mak 15:33-41; Luk 23:44-49*)

²⁸ Tige pyap mêd Yesu xovô nêbê yuac vihati pyap, om nêl ên nêbê, "A ob num mia." Yesu nêl bêge om kiyang bo ti wê

yêp vac kipihac xolac ge vô nôn lec. ²⁹ Mia kilin le vac dêg om he kô myamilumac wê le vac gwec nilô ge di tinyum vac mia kilin di kilax vac xax ti di hôm la kisii vô Yesu mya. ³⁰ Yesu num mia kilin tige pyap di nêl ên nêbê, "Pyap mëga." Nêl di kwa too di i yib.

Tibii vevac kitiv Yesu vac byeac

³¹ Buc tige, buc wê he Yuda ob viac he ên Pasova titige, ên Pasova ge da levac wê nginoo vêl ge, om he nêb xomxo ninivi i o yux lec xax pola vô buc levac lêm. Om he la nêl vô Pailat nêb tibii i loc hi he vixa i pec ên he i yib lutibed ên he ob kwax vêl. ³² Om tibii vevac la hi tibii yuu wê he hi

lec xax hixôn Yesu ge vixa pec. ³³ Dì he yê Yesu lêc yib om he o hi Yesu vixa pec lêm. ³⁴ Lêc tibii vevac ti kitiv Yesu vac byeac dì hi yuu mia lam lutibed. ³⁵ A Jon, a xê tige lec magnôn om a nêl kitong ên a nêb xam êno vông i vin. Kiyang wê a nêl ge kiyang nôn, dì aca va xovô bêga bê kiyang tige nôn vixôhilôg.

³⁶ Môp wê tibii vevac vông ge vông kiyang wê yêp vac kipihac xolac ge bo ti vô nôn lec, kiyang wê yêp bêga nêbê, “I len ti pecên obêc ma.” ³⁷ Dì kiyang ngwe yêp bêga nêbê, “Xomxo ob yê manôn lec xomxo ti wê he kitiv i ge.”

*He lii Yesu vac lôva wê le vac ngidax ge
(Matyu 27:57-61; Mak 15:42-47; Luk 23:50-56)*

³⁸ Pyap mêt Josep wê ben Alimatisa ge la kitaa Pailat ên nêb ob kô Yesu ninivi mi la yev. Josep ge vông i vin Yesu lêc o nêl kitong seac lêm, ên xona ên he Yuda. Mêt Pailat tyuc lec nêb Josep i kô Yesu ninivi om Josep la kwax Yesu ninivi vêl ên xax. ³⁹ Mêt Nikodimas ti wê la vô Yesu vô bucên ilage la hixôn, om kô xax myaluc wê nivivea nivîha ge yuu dì pilepac yuu xôn. Myaluc tige viyin mabu tiyi xocbê 30 kilo. ⁴⁰ Mêt yuu kô Yesu ninivi dì viyum vac nivimihi hixôn susu nivivea tige, tiyi xocbê môp wê Yuda mi vông vô xomxo yibên ge. ⁴¹ Yuac ti yêp kwabo vô vigwe ti wê he hi Yesu yib vac ge. Dì lôva wê he kiden vac ngidax ên nêb ob lii xomxo yibên vac ge ti yêp vac yuac tige mahigun, lêc he gên o lii yibên ti la vac lêm. ⁴² Buc tige, buc wê Yuda ob viac he ên sabat titige, dì lôva tige yêp kwabo om yuu kô Yesu ninivi mi la lii vac lôva tyo.

20

*Yesu kidi lec vac yibên
(Matyu 28:1-8; Mak 16:1-8; Luk 24:1-12)*

¹ Da pitoc yang, Malia wê ben Makdala ge loc mi la lôva, lêc yê wê ngidax titêc la ninya vêl ên lôva mya ge. ² Om tup mi lax vô Saimon Pita yuu li ngivihi ngwe wê Yesu xêyaa vin lec i ge dì nêl vô yuu ên nêbê, “He kô Apumtau vac lôva dì xe lungên vigwe wê he la lii vac ge.”

³ Mêt Pita yuu li ngivihi ngweo la nêb ob la yê vac lôva. ⁴ Yuu tup, lêc li ngivihi ngwe ge luu Pita vêl dì mila le vô lôva tax, ⁵ om kilong lôva nilô lêc yê nivimihi wê viyûmê Yesu ninivi vac ge diyêp, lêc o la vac lôva nilô lêm. ⁶ Mêt Saimon Pita mila timuê dì la vac lôva nilô mi la yê nivimihi pileva wê diyêp ge, ⁷ dì yê nivimihi ti wê he viyum Yesu bazub vac ge lêc o dô hixôn nivimihi wê he viyum Yesu nôn vac ge lêm. Nge, nivimihi tige buuê dì i la dô viyonê. ⁸ Nang dêc nu ngivihi ngwe wê mila lôva tax ge la vac lôva nilô dì la yê om vông i vin. ⁹ Lêc kiyang wê yêp vac kipihac xolac ên nêbê Yesu ob kidi lec vac yibên ge, he gên o xovô lêm. ¹⁰ Mêt nu ngivihi yuu ge lax mi la ben.

*Malia wê ben Makdala ge yê Yesu
(Mak 16:9-11)*

¹¹ Malia le kwabo vô lôva nivi dì byag. Byag di kilong lôva nilô, ¹² lêc yê angela wê viyum ngakwi kwem ge yuu dô lec vigwe wê Yesu ninivi yêp lec ge, ngwe dô vô bazub dì ngwe dô vô vixa. ¹³ Mêt yuu nêl vô Malia ên nêbê, “Ông byag ên vatya?” Om Malia nêl vô yuu ên nêbê, “He kô a Apumtau vêl dì a lungên vigwe wê he la lii vac ge.”

14 Malia nêl bêge mêt pilepac i, lêc yê wê Yesu le ge, lêc o xovô bê ge Yesu lêm. **15** Mêt Yesu nêl vô i ên nêbê, “Vêx, ông byag ên vatya? Ông myag letya?” Malia xo nêb mêt Yesu ge xomxo ti wê mi viac vigwe tige om nêl vô i ên nêbê, “Ông obêc kô xomxo tige ninivi mi la ge od ông nêl vigwe ti wê ông la lii vac ge kitong vô a, ên a ob la kô mi lôm.” **16** Mêt Yesu nêl vô i ên nêbê, “Malia.” Mêt Malia pilepac i di nêl vô Yesu vac Yuda vya bêga ên nêbê, “Labonai.” Kehe bêga nêbê xolac kehe.

17 Mêt Yesu nêl vô i ên nêbê, “Le i lêc vyax vigê lec a lêm, ên a gên o lec mi lax vô Mag lêm. Om ông lôc vô a lige di nêl vô he bê a ob lec mi lax vô a Mag di xam Mam, di a ob lax vô a Anutu di xam Anutu.” **18** Mêgem Malia Makdala lax nêl vô Yesu nue ngivihi ên nêbê, “A xê Apumtau,” di nêl kiyang wê Yesu nêl vô i ge kitong vô he.

*Yesu hilung i vô nue ngivihi
(Matyu 28:16-20; Mak 16:14-18; Luk 24:36-49)*

19 Da bucêng ge Yesu nue ngivihi kitucma mi dô, lêc he xona ên Yuda om he tung xumac lec di dô xumac lôma, mêt Yesu mila le vac he mahigun di nêl vô he ên nêbê, “Xam nilôm i vô niviha.” **20** Yesu nêl kiyang tige di hilung vigê yuu byeac piyaha vô he om he xêyaa vô niviha ên wê he yê Apumtau ge. **21** Mêt Yesu nêl tii vac vô he ên nêbê, “Xam nilôm i vô niviha. Mag vông a lam om a ob vông xam êno loc.” **22** Yesu nêl kiyang tige mêt vê myakilôhô lec he di nêl vô he ên nêbê, “Xam kô Myakilôhô Ngibua. **23** Xam obêc kitya xomxo nêñ nipaêñ vêl ge od ob la vêl, lêc xam obêc hôm xomxo nêñ nipaêñ xôn ge od ob yêp vô he.”

Tomas yê Yesu

24 Buc wê Yesu mila hilung i vô nue ngivihi ge, nue ngivihi ti lê nêbê Tomas wê ta kô yuu li ngwe ked ge o dô hixôn he lêm. **25** Om lie ngivihi ya nêl vô i ên nêbê, “Xe xê Apumtau.” Lêc Tomas nêl vô he ên nêbê, “A obêc xê bilem myayen wê le vac vigê ge, di vông vigêg la vac, di vông vigêg la vac byeac lêm ge od a ob vông i vin lêm.”

26 Da ti la vêl dêc nue ngivihi kitucma mi dô vac xumac tii vac di Tomas dô hixôn he. He dô di tung xumac lec, lêc Yesu val le vac he mahigun di nêl vô he ên nêbê, “Xam nilôm i vô niviha.” **27** Mêt nêl vô Tomas ên nêbê, “Titô vigêm i lam di wê a vigêg ga, di vông vigêm i lam vac a byeac. Ông nilôm i o vông yuu lêm. Nge, ông vông i vin.” **28** Mêt Tomas nêl vô i ên nêbê, “Ông ge a Apumtau, di ông a Anutu.” **29** Mêt Yesu nêl vô i ên nêbê, “Ông wê a om ông vông i vin mê. Lêc xomxo wê o yê a lêm lêc he vông i vin ge, he ob dô hixôn xêyaa niviha.”

Jon kivuu kipihac tiga lec kehe va?

30 Yesu vông do levac tibeac hixôn mi nue ngivihi yê, lêc a o kivuu vihati vac kipihac tiga lêm. **31** Lêc kiyang wê a kivuu vac kipihac ga, a kivuu ên a nêb xam vông i vin bê Yesu ge Kilisi ti wê Anutu vông i lam ge di i Anutu nu, ên xam obêc vông i vin ge od xam ob dô mamviha ên wê xam vông i vin Yesu ge.

¹ Yesu dô di buc mahigun ti lêc hilung i vô nue ngivihi tii vac gê mia lúaên Taibilias, om kiyang yêp bêga nêbê ² Saimon Pita dêc Tomas wê ta kô yuu li ngwe ked ge, di Nataniel wê ben Kena vac vigwe levac Galili ge, di Sebedi nu yuu, di nue ngivihi yuu hixôn, he xôn dô. ³ Mêd Saimon Pita nêl vô he ên nêbê, “A ob la hi pis.” Lêc he nêl vô i ên nêbê, “Il xôn ob la.” Om he la lec dipac di la tung leac vac mia vô bucên dia tige, lêc he o hi pis ti lêm.

⁴ Mêd vigwe vidiîen Yesu le vô mia ninya lêc nue ngivihi o xovô bê ge Yesu lêm. ⁵ Mêd Yesu kinêg vô he ên nêbê, “Xam nuge, xam kô pis ya?” Lêc he nêl vô i ên nêbê, “Ma vêl, xe o kô pis ti lêm.” ⁶ Mêd Yesu nêl vô he ên nêbê, “Xam nêx leac i loc vac mia vô dipac vilu wê vigêm hiyôv ge od xam ob tulec pis.” Om he nêx leac la vac mia di pis tibeac hiwocên vac leac, om o tiyi wê he ob pul leac i lôm ge lêm.

⁷ Mêd nu ngivihi ti wê Yesu xêyaa vin lec i ge nêl vô Pita ên nêbê, “GeApumtau.” Pita kwax siot vêl di vông yuac mi dô, lêc ngô vya wê nêbê ge Apumtau, om vinyum ngakwi lec di sox la vac mia di la vô Yesu. ⁸ Di nue ngivihi gên dô lec dipac om dipac didii leac hixôn pis di he lam. He lam dia tyá tiyi 90 mita di mîla vô mia ninya.

⁹ He lop vêl ên dipac, lêc yê wê ng wax ditum di pis yêp lec di blet dô hixôn. ¹⁰ Mêd Yesu nêl vô he ên nêbê, “Pis wê xam hi gwêbaga, xam kô ya mi lam.” ¹¹ Om Saimon Pita lec lax lec dipac nang di he didii leac lam mia ninya. Pis tigeetibeac hiwocên tiyi 153, lêc leac o tip lêm. ¹² Mêd Yesu nêl vô he ên nêbê, “Xam lam wa yaên.” Nue ngivihi xona om he ti o kinêg Yesu bê i ge letya, lêc he xovô nêbê ge Apumtau. ¹³ Mêd Yesu la hôm blet di vông vô he, dêc vông pis hixôn vô he. ¹⁴ Yesu kidi lec vac yibêñ di hilung i vô nue ngivihi lu tige wê vông yon ge.

Yesu nêl kiyang vô Pita

¹⁵ He ya pyap mêt Yesu kinêg vô Saimon Pita ên nêbê, “Saimon, Jon nu, ông xêmyaa vin lec a luu he baba vêl, me?” Mêd Pita nêl vô i ên nêbê, “Apumtau, ông xovô ên ông nêbê a xêgyaa vin lec ông.” Om Yesu nêl vô Pita ên nêbê, “Ông viac sipsip nue wê a vông ge.”

¹⁶ Mêd Yesu kinêg vô i lu ngwe hixôn ên nêbê, “Saimon, Jon nu, ông xêmyaa vin lec a, me?” Mêd Pita nêl vô i ên nêbê, “Apumtau, ông xovô ên ông nêbê a xêgyaa vin lec ông.” Om Yesu nêl vô i ên nêbê, “Ông viac sipsip wê a vông ge.”

¹⁷ Nang dêc Yesu kinêg vô Pita lu ti wê vông yon ge ên nêbê, “Saimon, Jon nu, ông xêmyaa vin lec a, me?” Pita nilô vô viyin ên wê Yesu kinêg i lu yon ên nêbê, “Ông xêmyaa vin lec a, me?” Om nêl vô Yesu ên nêbê, “Apumtau, ông xovô kiyang vihati di ông xovô ên ông nêbê a xêgyaa vin lec ông.” Om Yesu nêl vô i ên nêbê, “Ông viac sipsip wê a vông ge.”

¹⁸ “A nêl hixôn nôn vô ông bê buc wê ông gên ngivihi ge, ôcông va vêx ông let di la vigwe wê ông nêbê ông ob la ge, lêc obêc timuên wê ông ob vô kipwoc ge od ông ob titô vigêm la kisii di xomxo ngwe ob vêx let lec ông di kô ông mi la vac vigwe wê ông nêbê ông la vacên obêc ma ge.” ¹⁹ Yesu nêl kiyang tige ên nêbê ob nêl Pita nêl môp wê ob yib di vông Anutu lê i vô levac ge kitong. Nêl kiyang tige pyap dêc nêl vô Pita ên nêbê, “Lam timu vô a vixag.”

Kiyang lec nue ngivihi ti wê Yesu xêyaa vin lec i luu vêl ge

²⁰ Pita pilepac i di yê wê li ngivihi ngwe wê Yesu xêyaa vin lec i luu vêl ge timu vô yuu vixa mi val. Li ngivihi tige wê ilage he xôn dô mi ya, lêc du mi la vô Yesu di kinêg nêbê, “Apumtau, letya ob vông ông vac tibii vevac vigê?” ²¹ Pita yê li ngivihi tige om kinêg vô Yesu ên nêbê, “Apumtau, xomxo tige ob dô bêna?” ²² Lêc Yesu nêl vô Pita ên nêbê, “A obêc nêb xomxo tige i dô mavîha di a vena lê ge od ge yêp vô a. Om ông lam timu vô a vixag.”

²³ Mêd kiyang la vô Yesu nue vihati bêga nêbê nu ngivihi tige ob yib lêm. Lêc kiyang wê nêl nêbê ob yib lêm ge, Yesu o nêl bêge lêm. Nge, nêl ên nêbê, “A obêc nêb i dô mavîha di a vena lê ge od ge yêp vô a.”

²⁴ A, Jon, wê a nêl kiyang tige vihati kehe kitong di kivuu vac kipihac ga, di xe xovô ên xe nêbê kiyang wê a nêl di kivuu ge nôn.

²⁵ Yesu vông môp tibeac hixôn om a xo ên a nêbê xomxo obêc kivuu toto ge vihati vac kipihac ge od kipihac tigee obêc tibeac hiwocên hivun vigwe kibun ga ma vêl.

SINALE Yuac wê he sinale vông ge

Yesu nêl ên nêb ob vông Myakilôhô Ngibua lam

¹ Tiopilas, kipihac wê a Luk, a kivuu tax ge, a kivuu lec kiyang yuu do vihati wê Yesu vông taxlee ge ² di i val vô buc wê Yesu lec mi lax lag puunê ge. Buc tige Myakilôhô Ngibua ngidu Yesu xôn di i vông yuac vô nue ngivihi wê vinoo he taxlee ge. Pyap dêc Anutu kô i di i lax lag puunê. ³ Di buc wê Yesu kô myavinê mi yib ge, od hilung i vô nue ngivihi ên nêb he i xovô bê kidi lec vac yibên. Dô hixôn he tiyi buc kehe yuu (40) di nêl Anutu ben kehe kitong vô he. ⁴ Yesu dô hixôn he di nêl vô he ên nêbê, “Xam o lêc sea Jelusalem lêm, di xam dô bin kiyang wê a nêl vô xam ilage ên a nêb Mag Anutu obêc vông i lam vô xam. ⁵ Ilage Jon lipac xomxo ya mia, lêc gwêbaga buc vô kwabo lec wê Anutu ob lipac xam ya Myakilôhô Ngibua.” ⁶ Buc wê Yesu he nue ngivihi kitucma mi dô ge od he kinêg Yesu ên nêbê, “Apumtau, gwêbaga ông ob vông xecxe Islel tu levac di viac xecxe va xocbê ilage, me?” ⁷ Lêc Yesu nêl vô he ên nêbê, “Buc tige o yêp vô xam bê xam ob xovô lêm. Buc tige Mag vaci xovô. ⁸ Lêc Myakilôhô Ngibua obêc lam dô vac xam nilôm di vông xêkizêc vô xam, di xam ob nêl a kitong gê Jelusalem tax di i loc vac vigwe Judia vihati di i loc vigwe Samelia di i loc tiyi vigwe vihati.”

Yesu lec mi lax lag puunê (Mak 16:19-20; Luk 24:50-53)

⁹ Yesu nêl kiyang tige pyap lêc nue ngivihi yê wê Yesu lec mi la kisii di la vac viyobtoc nilô di he o yê i tii vac lêm. ¹⁰ Nue ngivihi manôn vii lec Yesu wê lec mi la kisii ge di yê xôn, di lutibed xomxo yuu val le hixôn he. Yuu vinyum ngakwi kwem, ¹¹ di yuu nêl vô he ên nêbê, “Xam xomxo Galili, xam wê mamnôn la kisii ên va? Yesu ti wê Anutu vông i lax mi la lag puunê ge obêc vena tiyi xocbê xam wê i di i lec mi lax kisii ganê ge.”

He vinoo xomxo ti le vac Judas niplêhê

¹² Yesu nue ngivihi sea kitôn Oliv di lax mi la Jelusalem wê yêp kwabo vô kitôn Oliv tiyi xocbê 1 kilomita ge. ¹³ He la Jelusalem di mila vô xumac ti wê buhu yuu ge, lêc he la dô vac ngwe kisii wê he mi dô vac ge. Xomxo tige lê bêga nêbê Pita yuu Jon di Jems yuu Andlu di Pilip yuu Tomas di Batolomyu yuu Matyu di Alpias nu Jems di Saimon Selot di Jems nu Judas. ¹⁴ Yesu nue ngivihi tige hixôn vêx ya di Malia wê Yesu ta ge di Yesu lie vux, he vihati mi kitucma di kitaa vô Anutu.

¹⁵ Di buc ti xomxo wê vông i vin Yesu ge tiyi xocbê 120, he kitucma mi dô, lêc Pita kidi mi le vac he mahigun, ¹⁶ di nêl vô he ên nêbê, “Xam lige, ilage Myakilôhô Ngibua vông Devit kivuu kiyang lec Judas wê didii xomxo mi la vô Yesu di he hôm i xôn ge. Om kiyang tige vô nôn lec. ¹⁷ Judas ge wê mi dô hixôn xe di xe xôn kô Yesu yuac tiyima.” Pita nêl bêge vô he.

¹⁸ Judas ge kô mone lec nipaên wê nêl Yesu kitong ge, di la kisuu kibun lec pyap, dêc mwoc di hi xêyaa toc mi i kipyax sea. ¹⁹ Mêd xomxo Jelusalem vihati ngô wê Judas yib ge om nêl vigwe tige lê vac he vya nêbê Akeldama. Kehe bêga nêbê kibun wê hi kipyax lec ge.

20 Pita nêl vô he nang ên nêbê, “Kiyang ti yêp vac kipihac Sam bêga ên nêbê,

‘I nêl xumac ob dô pileva dì xomxo ti ob dô vac lêm.’

Di kiyang ngwe yêp vac Sam bêga ên nêbê, ‘Xomxo ngwe ob vông yuac wê i lê lec ge.’

21-22 Xolac nêl bêge, om il ob vinoo xomxo ti ên i le vac Judas nipilêhê, ên xe xôn la nêl kiyang kitong vô xomxo bê Apumtau Yesu kidi lec vac yibêñ. Il ob vinoo xomxo ti vac he wê mi dô hixôn il tiyi buc vihati wê Apumtau Yesu dô hixôn il ge, vô buc wê Jon lipac xomxo dì i lam tyip lec buc wê Anutu kô Yesu mi i lec mi lax lag puunê ge.”

23 Pita nêl bêge om he yê xomxo yuu, Josep (lê ngwe nêbê Basabas di lê ngwe nêbê Jastas) yuu Mataias. **24** Di he kitaa vô Apumtau bêga nêbê, “Apumtau, ông xovô xomxo vihati nilô om ông nêl vô xe bê ông vinoo xomxo yuu ga ngwe na **25** wê ob le vac Judas nipilêhê dì vông yuac sinale hixôn xe ge, ên Judas sea yuac tige dì yib mi la vac ici va ben.” **26** Om he kivuu yuu lê lec ngidax yuu dì hilog lêc Mataias vôngo lam tô tax om he vông i la dô hixôn nue ngivihi vigê yuu dì tô mi la ti (11).

2

Myakilôhô Ngibua lop mi lam

1 Lec buc Pentikos xomxo wê vông i vin Yesu gee he vihati kitucma vac xumac ti mi dô, **2** lêc lutibed he ngô nididun ti xochê vigwe viyîen ge lam gê kisii, dì nididun tige lam hivun xomxo wê dô vac xumac gee ma vêl. **3** Mêd he yê xochê ngwax mahelac ge lam dô lec xomxo toto bazub. **4** Di Myakilôhô Ngibua lam la vac he vihati

nilô dì he keac xomxo toto vya tiyi xochê Myakilôhô Ngibua vông vô he ge.

5 He Yuda wê mi kitaa vô Anutu gee he tibeac dô vigwe Jelusalem. He lam vac vigwe vihati dì kitucma mi la Jelusalem. **6** He ngô nididun om he tibeac la yê, lêc ngô wê xomxo tigee keac he toto vya ge om he yetac. **7** He yetac mabu dì nêl ên nêbê, “Xomxo wê dikeac ge, he vihati lam gê Galili, **8** bêna lêc il ngô he keac vac il toto vyadê? **9** Ên il mangwe lam gê Patia dì Midia dì Ilam dì lam gê Mesopotemia yuu Judia dì Kapadosia dì Pontas dì Esia **10** dì lam gê Plisia yuu Pampilia dì Isip dì vigwe Libia viwen wê yêp kwabo vô Sailini dì il mangwe lam gê Lom, **11** dì il mangwe xomxo Yuda dì il ya tibii baba wê il timu vô Yuda môp ge, dì il mangwe lam gê Klit yuu Aleibia, lêc il vihati ngô he keac il toto vyad dì he nêl kiyang lec do levac wê Anutu vông ge vô il.” **12** He yetac dì vông he nilô juda dì he ya nêl vÔma ên nêbê, “Susu tiga kehe tibêna?” **13** Lêc xomxo ya so vya vô he vÔng vinê dì nêl ên nêbê, “Ge he num wain levac om vÔng he vô mavmav.”

Pita nêl xolac vô he

14 Pita kidi lec mi le hixôn Yesu nue ngivihi vigê yuu dì tô mi la ti dì keac vya levac vô xomxo tigee ên nêbê, “Xam lige Yuda hixôn xam vihati wê xam lam dô Jelusalem gee, a ob nêl susu tiga kehe kitong vô xam mi xam ngô lê. **15** Xam nêl ên xam nêbê xomxo tigae wain vÔng he vô mavmav, lêc o bêge lêm. Ên ga gên pitoc, 9 klok. **16** Susu tiga wê plopet Joel nêl lec ilage bêga nêbê,

¹⁷ ‘Anutu nêl ên nêbê, “Obêc buc timuên lêc a obêc vông Myakilôhô Ngibua wê a vông ge i loc hivun xomxo vihati xôn, dì nume vêx yuu vux obêc nêl kiyang seac tiyi xochê plopete ge, dì a obêc hilung kiyang kehe vihati vô nume ngivihi, dì mame kipwoc ob yê vivia lec kiyang kehe. ¹⁸ Obêc vô buc tige a ob vông Myakilôhô Ngibua i loc vô a nuge yuac vêx yuu vux vihati dì he ob nêl kiyang tiyi xochê plopete ge. ¹⁹ Dì a ob vông do levac gê kisii ganê, dì gê kibun ga hixôn, om hi yuu ngwax dì ngwaxlu levac obêc val, ²⁰ dì hiyôv ob vô mapitoc vac dì dentuc ob vô ma hi. Dì buc levac wê Apumtau vông ge ob val timuên hixôn xêseac levac. ²¹ Dì xomxo vihati wê ob kiyag nya lec Apumtau ge, Apumtau obêc hôm he lec.” ’

²² ‘Plopet Joel nêl Anutu kiyang bêge, mègem xam lige Islel, xam ngô kiyang wê a ob nêl vô xam bêga bê Yesu Nasalet ge Anutu vông i lam vông do levac yuu yuac niviha ya xêkizêc wê Anutu vông ge, dì xam wê dì xovô pyap ên xam nêbê Anutu vông i lam. ²³ Ilage Anutu xovô dì hilu kiyang pyap nêb ob vông Yesu i lam vac xam vigêm dì xam vông i vac tibii nipaêñ vigê mi he hi i yib lec xax pola. ²⁴ Lêc Anutu vô i vêl ên myavinê wê yibêñ ge dì tipi vô i kidi lec vac yibêñ, ên yibêñ o tiyi wê ob hôm i xôn ge lêm. ²⁵ Tiyi xochê kiyang wê Devit nêl lec Yesu ilage bêga ên nêbê, ‘A xê Apumtau le vô a magnôn tiyi buc vihati dì i le vô a vigêg hiyôv, om susu ti o tiyi wê obêc pwoo a pec ge lêm. ²⁶ Om vông a xêgyaa vô niviha dì a pimil Anutu vac myag, dì a nignivi ob dô bin kiyang niviha. ²⁷ Ên ông ob sea a kinug i loc dô vac vigwe yibêñ lêm, dì ông ob sea num ngibua a nignivi i loc pital lêm. ²⁸ Ông hilung môp wê a ob dô magviha ge vô a, dì ông dô hixôn a tiyi buc vihati om vông a nilôg vô niviha.’

²⁹ ‘Devit nêl kiyang bêge mègem xam lige, a ob nêl il bug Devit kitong vô xam bêga bê Devit o kivuu kiyang tige lec ici va lêm, ên ilage Devit yib mi he yev i vac lôva, dì lôva wê i vông ge le vac il mahigun gwêbaga. ³⁰ Lêc Devit ge plopet ti, om xovô kiyang wê Anutu hilu pyap vô i ên nêb obêc vông Devit bue timuên ti i tu king levac tiyi xochê Devit ge. ³¹ Devit xovô môp wê Anutu nêb ob vông timuên ge om kivuu kiyang lec wê Kilisi ob kidi lec vac yibêñ ge bêga ên nêbê, ‘Anutu ob sea i la dô vac vigwe yibêñ mi i ninivi i pital lêm.’

³² Yesu ge Anutu tipi vô i kidi lec vac yibêñ mi xe vihati xê dì xe nêl i kitong. ³³ Yesu lec mi lax lag puunê dì la dô vô Anutu vigê hiyôv, dì vông Myakilôhô Ngibua wê Ma nêl nêb ob vông ge lam vô xe om xam wê dì ngô gwêbaga. ³⁴ Devit o la lag puunê tiyi xochê Yesu la ge lêm. Lêc Devit nêl kiyang lec Yesu bêga ên nêbê,

‘Apumtau Anutu nêl vô a Apumtau bêga ên nêbê, “Ông dô vô a vigêg hiyôv, ³⁵ dì obêc timuên a obêc vông tibii wê vông vevac vô ông ge he i dô vac ông vigêm vilu kwa ngibi.” ’

³⁶ ‘Mègem xam Islel vihati, xam xovô bêga bê Yesu wê xam hi lec xax pola mi i yib ge Anutu vông i tu Apumtau dì i tu Kilisi.’ Pita nêl kiyang tige.

Xomxo tibeac vông i vin Yesu

³⁷ Xomxo tigee ngô kiyang wê Pita nêl ge, lêc kiyang tige vông he nilô hibu sea om he kinêg vô Pita he lie ên nêbê, “Xam lige, xe ob vông bêna?”

³⁸ Om Pita nêl vô he ên nêbê, “Xam vihati pilepac nilôm i vô paha lec di lipac mia lec Yesu Kilisi lê, ên i kitya xam nêm nipaên vêl. Di Anutu obêc vông Myakilôhô Ngibua i lam vô xam. ³⁹ Ên Anutu hilu kiyang pyap ilage nêb ob vông Myakilôhô Ngibua vô xam hixôn xam nume di xomxo wê dô teva ge hixôn, om ob vông vô he vihati wê il Apumtau Anutu tyuc he nêb he i lam vô i ge.”

⁴⁰ Mêd Pita nêl kiyang tibeac ya vô he di nêl xêkizêc vô he ên nêbê, “Xam viac xam niviha ên xam o lêc vông xam vô nipaên hixôn xomxo nipaên wê dô gwêbaga lêm.” ⁴¹ Mêgem he wê vông i vin Pita kiyang ge he lipac mia di la dô hixôn xomxo vông vinên. He wê lipac mia lec buc tige, he tiyi xocbê 3,000.

Môp niviha wê xomxo vông vinên vông ge

⁴² Tiyi buc vihati xomxo vông vinên ngô Yesu nue ngivihi xolac di viac niviha, di he ngiduma xôn di ya mya yêp tibed di le xêkizêc vac kitaaê.

⁴³ Anutu vông Yesu nue ngivihi vông do tibeac om xomxo vihati yê di xona. ⁴⁴ Mêd xomxo vông vinên vihati dô hixônma di susu wê he toto vông ge, he yê tiyi xocbê he vihati xe. ⁴⁵ Om susu hixôn kibun wê he vông ge, he vông mi tibii kisuu, di he kô mone mi lax titang vô lie vông vinên wê nênen susu maên gee. ⁴⁶ He nilô tibed di he kituc la vac Anutu xumac ngibua tiyi lec buc vihati, di he la ya hixôn lie vac xumac toto hixôn xêyaa niviha. ⁴⁷ He pimil Anutu tiyi buc vihati di xomxo vihati xêyaa vin lec he di yê he niviha. Mêd tiyi buc vihati Apumtau vô xomxo ya vêl ên he nênen nipaên di vông he la dô hixôn i nue vông vinên.

3

Pita yuu Jon vông xomxo ti wê vixa vô nipaên ge vô niviha lec

¹ Buc ti Pita yuu Jon la, nêb ob la kitaa vac Anutu xumac ngibua vô hiyôv manôñ 3 klok, wê he la mi kitaa lec ge. ² Lêc yuu mila vô xomxo ti wê ta kô i hixôn vixa nipaên ge. Xomxo tyo, lie mi ken i mi la tiyi lec buc vihati mi la tung i vô xumac ngibua vuayen ti wê he nêl lê nêbê vuayen niviha, ên xomxo tige mi kitaa nênen mone vô xomxo wê la vac xumac ngibua ge.

³ Xomxo tyo yê wê Pita yuu Jon mila ge om kitaa yuu ên nêb yuu i vông mone vô i. ⁴ Mêd yuu yê xomxo tyo kizêc di Pita nêl vô i ên nêbê, “Wê mam lam xii lê.” ⁵ Om tyo lax ma lec yuu, ên nêb mêd yuu ob vông susu ti vô i. ⁶ Lêc Pita nêl vô xomxo tyo ên nêbê, “A o kô mone ti lêm. Lêc susu wê dô vô a ge, a ob vông vô ông. Lec Yesu Kilisi Nasalet lê, a nêl vô ông bê ông kidi lec mi loc.” ⁷ Mêd Pita hôm lec xomxo tyo vigê hiyôv di vông i kidi lec, di lutibed vixa kitu yuu vixa pitehe voxêkizêc lec ⁸ di i sox mi la le di vilee la, mêd la vac xumac ngibua hixôn yuu di la vô sox sox di pimil Anutu. ⁹ Mêd xomxo vihati yê wê xomxo tyo vilee mi la di lôm di pimil Anutu ge, ¹⁰ di he xovô ên nêbê ge xomxo ti wê mi dô vô xumac ngibua vuayen lê nêbê vuayen niviha ge di mi kitaa susu vô xomxo ge om he yetac mabu di nga vigê ên wê tyo vô niviha lec ge.

Pita nêl xolac vac Anutu xumac ngibua

¹¹ Xomxo tyo vii lec Pita yuu Jon mêd xomxo vihati yetac di tup mi la vô yon lec xumac pêt myahipu nilô ti wê he nêl Solomon lê lec ilage. ¹² Lêc Pita yê wê he kituc lam ge om nêl vô he ên nêbê, “Xam lige Isiel, xam yetac

ên va? Bêna lêc xam wê xii kizêcê? Mêd xam so ên xam nêbê xomxo tige vô niviha lec ya xêkizêc yuu niviha wê xii vông ge, me? ¹³ Anutu ti wê Eblaham yuu Aisak dì Jekop dì il buge he Anutu, ge wê vông i nu yuac Yesu lê vô levac. Lêc xomxo tyo ti wê xam vông i la vac Pailat vigê dì Pailat nêb ob piwelac i vêl, lêc xam yax i vun vô Pailat manôn. ¹⁴ Yesu ge xomxo niviha dì i xomxo ngibua, lêc xam yax i vun di kitaa Pailat ên xam nêb i piwelac tibii nipaêñ wê hi xomxo yib ge i lôm vô xam, ¹⁵ dì xomxo ti wê maviha dôen kehe ge, xam hi i yib. Lêc Anutu tipi vô i kidi lec maviha vac yibêñ mi xe xê lec mammôn. ¹⁶ Xomxo ti wê xam wê dì xovô i ge vông i vin Yesu, om Yesu lê ngidu xomxo tige xôn dì vông i vixa vô niviha lec. Vông vinêñ wê i vông ge vông i vô niviha lec mi xam vihati wê lec mammôn.

¹⁷ “Xam lige, a xovô ên a nêbê môp wê xam hixôn xam lime levac vông vô Yesu ge, xam lungêñ môp niviha om xam vông môp tibêge. ¹⁸ Ilage Anutu vông plopete vihati he nêl kitong ên nêbê Kilisi wê Anutu vông i lam ge ob kô myavinê, om môp wê xam vông ge vông kiyang tyo vô nôn lec.

¹⁹ “Mêgem xam pilepac xam nilôm i loc vô Anutu ên i kitya xam nêm nipaêñ vêl. ²⁰ Xam obêc vông bêge ge od Apumtau obêc vông xam dô seac vêl dì xam ob kô xêkizêc, dì obêc vông Yesu Kilisi wê nêl lec xam pyap ge i lam vô xam. ²¹ Èn Yesu dô lag puunê om ob dô bin buc wê Anutu ob vông susu vihati i vô paha lec ge, tiyi kiyang wê Anutu nêl vac plopete ngibua mya ilage. ²² Moses nêl kiyang bêga ên nêbê, ‘Apumtau Anutu obêc vông xam lime ti i tu plopet tiyi xochê a ge, om xam lêc vô ninyam lehe vô kiyang vihati wê ob nêl vô xam ge. ²³ Lêc xomxo vihati wê obêc vô ninya kitu vô plopete tyo vya ge, Anutu obêc kitya he vêl, dì he ob dô hixôn Anutu nue tii vac lêm.’

²⁴ Moses nêl kiyang bêge, di plopete ilage wê nêl Anutu kiyang kitong ge, Samyuel hixôn plopet wê val timuêñ ge, he vihati nêl kiyang lec buc wê val gwêbaga mi il dô vac ge.

²⁵ “Xam ge plopete nue di kiyang wê Anutu hilu vô bume ilage ob lam vô xam hixôn, kiyang ti wê Anutu nêl vô Eblaham ên nêbê, ‘A ob vông bume timuêñ i tu xomxo kibun ga vihati nêñ vizid kehe.’ ²⁶ Om Anutu vînoo i nu yuac mi vông i lam vô xam Yuda tax, ên nêb i vô niviha vô xam dì xam toto pilepac xam dì sea môp nipaêñ.”

4

Pita yuu Jon le vô kaunsil manôn

¹ Yuu gên nêl xolac vô xomxo tigee, lêc xomxo wê mi si daa vô Anutu gee hixôn xêhipu levac ti wê mi viac Anutu xumac ngibua ge dì xomxo Sadyusi mangwe val vô yuu, ² dì he xêyaa vô myavinê vô yuu ên wê yuu tixuu xomxo ya kiyang bêga nêbê Yesu kidi lec vac yibêñ om xomxo yibêñ vihati obêc kidi lec maviha nang ge. ³ Om he kô yuu mi la tung vac xumac kalabuhu, nêb yuu i dô dì i vidii lê, ên ge vigwe huc. ⁴ Lêc xomxo wê ngô Pita kiyang gee he tibeac vông i vin, om he vux wê vông i vin ge tiyi xochê 5,000.

⁵ Di vigwe vidiiêñ he Yuda levac hixôn gyovixa di he wê xovô Moses xolac kehe gee, he xôn kitucma gê Jelusalem. ⁶ He kitucma hixôn xomxo levac wê mi si daa vô Anutu ge, Anas yuu Kaiapas dì Jon yuu Aleksanda

hixôn lie ya. Anas ge wê tu he vihati bazub. ⁷ Om he kô Pita yuu Jon mi lam lax yuu le vô he manôn dì kinêg vô yuu ên nêbê, “Muu kô xêkizêc vô letya dì muu nêl letya lê, lêc muu vông xomxo tige vô niviha lecê?”

⁸ Mêd Myakilôhô Ngibua hivun Pita xôn om Pita nêl vô he ên nêbê, “Xam xomxo levac hixôn xam gyovixa, ⁹ gwêbaga xam kinêg xii ên wê xii ngidu xomxo ti wê vixa vô nipaên ge xôn, ên xam nêb xam ob xovô bê xii vông i vô niviha lec tibêna? ¹⁰ Om xam vihati hixôn lime Islel vihati, xam xovô bêga bê xêkizêc wê Yesu Kilisi Nasalet vông ge wê vông xomxo tiga vô niviha lec mi i le vô xam mammôn. Yesu ge, xam hi i yib lec xax pola, lêc Anutu tipi vô i kidi lec vac yibê. ¹¹ Yesu ge ngidax ti wê xam xumac loxên wê ên xam nêbê nipaên ge, lêc i tu ngidax xêkizêc ti wê xumac ob le xêkizêc ya ge. ¹² Èn xomxo ngwe o tiyi wê ob hôm il lec ge lêm, ên Anutu o nêl xomxo kibun ga ti vô il ên nêb i kitya il nêd nipaên vêl lêm. Nge, Yesu tibed.”

¹³ Xomxo levac tigee, he yetac ên kiyang wê Pita yuu Jon nêl ge, ên yuu ge xomxo viyangtôv yuu dì yuu o xulac xumac ti lêm, lêc yuu nêl kiyang hixôn xêkizêc dì yuu o xona lêm. Om he xovô nêbê yuu ge wê mi dô hixôn Yesu ilage. ¹⁴ Dì he yê xomxo ti wê yuu vông i vô niviha lec ge le hixôn yuu, om he nêl kiyang ti o yêp wê ob nêl lax vô yuu ge lêm. ¹⁵ Om he nêl vô yuu nêb yuu i sea xumac kaunsil dì loc vixun. Yuu la vixun di he nêl vôma ên nêbê, ¹⁶ “Il ob vô vatya vô xomxo yuu ganê? Èn xomxo Jelusalem vihati xovô do levac wê yuu vông ge om o tiyi wê il ob yax vun ge lêm. ¹⁷ Lêc il ob le vac kiyang tige xôn, ên i o lêc vô levac mi loc vac xomxo vihati ninya lêm. Om il ob vông vibuêñ xêkizêc vô yuu bê yuu i o nêl kiyang vô xomxo lec Yesu lê i tii vac lêm.” ¹⁸ Om he keac yuu lax vô he dì nêl kiyang xêkizêc vô yuu ên nêbê, “Muu o lêc nêl kiyang lec Yesu lê lêm, dì muu o lêc tixuu xomxo lec lê tige lêm.” ¹⁹ Lêc Pita yuu Jon nêl vô he ên nêbê, “Xam ngô lê. Xii obêc sea Anutu xolac dì vông i vin kiyang wê xam nêl ge od mêd Anutu ob yê xii niviha? Xam xovô lê. ²⁰ Xii o tiyi wê xii ob dô kiyang maên ge lêm. Nge, xii ob nêl kiyang vihati wê xii ngô dì xê mammôn lec ge kitong.”

²¹ Kaunsil tigee he nêl kiyang xêkizêc vô yuu tii vac di vông yuu la. He nêb he ob vông viyin vô yuu, lêc tiyiên ma, ên xomxo vihati pîmil Anutu ên niviha wê yuu vông ge. ²² Xomxo ti wê yuu vông i vô niviha lec ge, klismas wê i vông ge kehe yuu (40).

Xomxo vông vinêñ kitaa vô Anutu

²³ He kaunsil vông Pita yuu Jon la, om yuu lax mi la vô lie vông vinêñ di lax nêl kiyang wê xomxo levac wê mi si daa vô Anutu gee hixôn he gyovixa nêl vô yuu ge kitong vô he. ²⁴ He ngô pyap dì he xôn nilô tibed di he kitaa vô Anutu bêga nêbê, “O Apumtau, ông levac wê ôcông va tung lag yuu kibun dì gwec hixôn susu vihati yang. ²⁵ Ilage Myakilôhô Ngibua wê ông vông ge vông xe bug Devit wê ông num yuac ge nêl ông kiyang bêga nêbê,

‘Bêna lêc tibii madiluhu xêyaa vô myavinê luu vêl? Bêna lêc he nêl kiyang vaxvax wê nôn maên ge? ²⁶ King kibun ga vihati viac he ên vevac, dì xomxo levac kitucma ên nêb ob vông vevac vô Apumtau Anutu hixôn Kilisi wê i vông i lam ge.’

²⁷ Kiyang tige vixôhilôg nôn, ên Helot yuu Pontias Pailat di tibii wê o Yuda lêm gee hixôn xomxo Islel ya, he xôn kitucma vac vigwe ga ên nêb ob vông viyin vô Yesu, ông num yuac ngibua wê ông vinoo i ge. ²⁸ He kitucma ên nêb ob hi Yesu, tiyi kiyang wê ông nêl pyap ilage ya xêkizêc wê ông vông ge, ên ông nêb obêc vô nôn lec timuên. ²⁹ O Apumtau, gwêbaga xe kitaa vô ông bê ông xovô kiyang viyin wê he Yuda levac nêl ge di ngidu xe xôn, ên ông nume yuac xe le xêkizêc di nêl ông xolac i yêp seac di xonaên i ma. ³⁰ Di ông vyax vigêm lec xomxo yidac ên he i vô nivîha lec, di ông vông do levac ya lec num yuac ngibua Yesu lê.”

³¹ He kitaa pyap mêt xumac ti wê he dô vac ge yoc di Myakilôhô Ngibua lam hivun he xôn di he nêl Anutu xolac hixôn xêkizêc di he o xona lêm.

Xomxo vông vinên vihati nilô yêp tibed

³² Xomxo vông vinên vihati nilô tibed di he xêyaa vin lecma, di he ti o nêl ên nêbê susu wê i vông ge, ge ici xe lêm. Nge, susu wê he toto vông ge he yê tiyi xocbê he vihati xe. ³³ Mêt Yesu nue ngivihi nêl kiyang hixôn xêkizêc nêbê Apumtau Yesu kidi lec vac yibên, di xomxo vông vinên vihati, he dô vac xêyaa vin lecên nilô. ³⁴ Di he ti, susu o ma ên he lêm, ên xomxo vihati vông kibun hixôn xumac wê he vông ge mi tibii kisuu, di he kô mone ³⁵ mi la vông vô Yesu nue ngivihi ên nêb he i titang vô xomxo wê nêl susu maên gee.

³⁶ Xomxo ti dô lê nêbê Josep, lêc Yesu nue ngivihi nêl i lê ngwe nêbê Banabas. (Lê tige kehe bêga nêbê xomxo wê mi ngidu xomxo xôn ya kiyang nivîha ge.) Josep ge Livai ti di i ben Saiplas, ³⁷ lêc Josep vông i kibun mya ti mi tibii kisuu di i kô mone mi la vông vô Yesu nue ngivihi.

5

Ananaias yuu Sapaila

¹ Xomxo ti lê nêbê Ananaias yuu vinê Sapaila, yuu vông kibun wê yuu vông ge ti mi tibii kisuu, ² lêc Ananaias vun mone viwen di kô viwen mi la vông vô Yesu nue ngivihi, di vinê xovô môp wê i vông ge. ³ Lêc Pita nêl vô i ên nêbê, “Ananaias, bêna lêc Seten dô vac ông nilôm di vông ông vun mone wê ông kô lec kibun ge viwen di ông kityoo kiyang vô Myakilôhô Ngibua? ⁴ Ilage wê tibii gên o kisuu kibun tige lêm ge, od kibun tige tu ôcông va xe. Di buc wê tibii kisuu pyap ge od mone ge ôcông va xe. Bêna lêc ông xovô môp tibêge yêp vac nilômé? Ông o kityoo xomxo lêm. Nge, ông kityoo Anutu.” ⁵ Ananaias ngô kiyang tige di vixog mi la kibun di la yib lutibed. Om xomxo wê ngô kiyang tige vihati xona mabu. ⁶ Mêt xomxo ngivihi ya lam viyum i vac nivimihi di kô mi la vixun mi la yev.

⁷ Hiyôv manôn yon lam la vêl mêt Ananaias vinê val vô Pita, lêc lungên wê liya yib ge. ⁸ Om Pita kinêg vô i ên nêbê, “Mone wê muu kô lec kibun ge, muu vông i lam vihati, me?” Mêt Sapaila luu i vya ên nêbê, “Mone vihati ge, xii vông i loc.” ⁹ Om Pita nêl vô i ên nêbê, “Bêna lêc muu liyam nêb muu ob yaxên Apumtau Myakilôhô Ngibua? Wê lê. Xomxo wê yev liyam ge vena le vô vuayen om ob lam ken ông mi la êno bêge.” ¹⁰ Lutibed vêx tyo vixog mi la kibun mi la yêp vô Pita vixa di yib, di xomxo ngivihi wê yev liya ge lamyê wê yib ge om kô mi la yev i pikeb liya. ¹¹ Om xomxo vông vinên hixôn xomxo wê ngô kiyang tigee he vihati xona mabu.

Yesu nue ngivihi vông do tibeac

¹² Yesu nue ngivihi vông do levac tibeac vac xomxo mahigun, dì xomxo vông vinên dô kidu ti dì la mi kitucma vac Anutu xumac ngibua lec pêt myahipu nilô ti wê he nêl Solomon lê lec ilage. ¹³ Mêd xomxo baba xona dì o kituc la hixôn he lêm, lêc xomxo tibeac pîmil he dì yê he nivîha, ¹⁴ dì xomxo vêx yuu vux tibeac vông i vin Apumtau dì lam dô hixôn xomxo vông vinên. ¹⁵ Mêd xomxo mi ken lie wê yidac gee mi la lii vac môp dì he yêp lec pêt, ên he xo ên he nêbê Pita obêc val ge od hinyena wê i vông ge i lam lec he dì vông he i vô nivîha lec. ¹⁶ Dì xomxo tibeac vac vigwe wê yêp kwabo vô Jelusalem ge, he kô xomxo wê yidac gee, hixôn xomxo wê vimwo nipaên dô vac he gee mi la vô Yesu nue ngivihi, dì he vihati vô nivîha lec.

Angela tax xumac kalabuhu ên Yesu nue ngivihi

¹⁷ Mêd xomxo wê mi si daa vô Anutu gee, he nêl xomxo levac hixôn he Sadyusi wê mi dô hixôn i gee he xêyaa vô nipaên vô Yesu nue ngivihi ên wê xomxo vihati pîmil he ge, ¹⁸ om he hôm Yesu nue ngivihi xôn dì tung he la vac xumac kalabuhu. ¹⁹ Om he dô dì vô bucên Apumtau vông angela ti lam tax xumac ên he dì kô he mi la vixun dì nêl vô he ên nêbê, ²⁰ “Xam lôc vac Anutu xumac ngibua dì loc nêl kiyang maviha dôen kehe kitong i yêp seac vô xomxo vihati.” ²¹ Yesu nue ngivihi ngô angela via dì kidi mi la pitoc yang dì la vac Anutu xumac ngibua dì nêl xolac vô xomxo.

Mêd xomxo daa sién li levac tyo hixôn xomxo wê mi dô hixôn i gee, he keac kaunsil wê he Yuda vông ge hixôn Yuda levac vihati lam kitucma, dì he vông xomxo ya la xumac kalabuhu ên nêb he i loc kô Yesu nue ngivihi mi lam. ²² Om xêhipue la yê xumac kalabuhu nilô, lêc Yesu nue ngivihi o dô lêm. He xôa ma om he lax nêl vô he kaunsil ên nêbê, ²³ “Xe la xê xumac kalabuhu lêc xumac vuayen tung xôn vihati di tibii viacên dile vô vuayen om xe tax vuayen mi xê xumac nilô lê, lêc xe o tulec xomxo ti xeedô lêm. Xumac nilô pileva.”

²⁴ Mêd xêhipu levac ti wê mi viac Anutu xumac ngibua ge hixôn xomxo levac wê mi si daa vô Anutu gee, he ngô kiyang tige dì nilô myag kiyang tibeac dì he kinêg vôma ên nêbê, “Kiyang tige obêc tibêna?” ²⁵ Mêd xomxo ti mila vô he dì nêl ên nêbê, “Xam wê lê. Xomxo ti wê xam tung he la vac kalabuhu gee, he la le vac Anutu xumac ngibua dì nêl xolac vô xomxo.” ²⁶ Om xêhipu levac tige hixôn xêhipu ya la kô Yesu nue ngivihi lêc hiên he ma, ên he xona ên he nêb xomxo obêc nêx he ya ngidax.

Yesu nue ngivihi xonaên ma dì nêl kiyang lec kaunsil manôn

²⁷ Mêd he kô Yesu nue ngivihi mi la lax he le vô kaunsil manôn, mêd xomxo daa sién nêl levac nêl vô he ên nêbê, ²⁸ “Xe le vac xam xôn dì nêl xêkizêc vô xam ên xe nêbê xam o lêc nêl kiyang lec Yesu lê lêm. Lêc xam o ngô kiyang wê xe nêl ge lêm, dì xam nêl kiyang tige vô levac vac vigwe Jelusalem vihati, dì xam nêb xam ob nêl kiyang kityooên lec xe bê xe hi Yesu yib.”

²⁹ Lêc Pita hixôn lie luu he via ên nêbê, “Xe ob timu vô Anutu kiyang, dì xe ob timu vô kiyang wê xomxo vông ge lêm. ³⁰ Xam hi Yesu yib lec xax pola, lêc Anutu wê buge mi kitaa vô ge tipi vô i kidi lec, ³¹ dì vông i la dô vô i vigê hiyôv, dì i tu il nêd mugên wê ob hôm il lec ge, ên nêb il Islel pilepac il dì vông nilôd i loc vô Anutu ên i kitya il nêd nipaên vêl. ³² Kiyang tige vihati, xe nêl kitong vô xomxo, dì Myakîlôhô Ngibua nêl kiyang tige hixôn.

Myakilôhô Ngibua tige Anutu vông vô xomxo wê ngô i kiyang dì timu vô ge."

³³ He kaunsil ngô Pita kiyang tige dì he xêyaa vô myavinê mabu vô Yesu nue ngivihi om nêb ob hi he yib. ³⁴ Léc xomxo kaunsil ti lê nêbê Gameliel kidi lec ên nêb ob nêl kiyang vô lie. Gameliel ge Palisi ti wê mi tixuu xomxo ya Moses xolac ge, om xomxo vihati pimil i dì vông i lê vô levac. Léc Gameliel nêl ên nêb he i vông Yesu nue ngivihi i lop mî loc vixun vêl. ³⁵ He lop mî la vixun pyap dì Gameliel nêl vô he kaunsil ên nêbê, "Xam lige Islel, môt wê xam nêb xam ob vông vô xomxo tigee, xam vyac xovô niviha lê. ³⁶ Xam xovô pyap wê ilage Tiudas yong i nêb i xomxo levac, dì xomxo tibeac tiyi 400 timu vô i vixa, lêc gavman hi i yib dì xomxo vihati wê timu vô i gee pec sea diyuac wê he vông ge tô mî la. ³⁷ Nang dêc buc wê gavman kivuu xomxo lê ge, Judas gê Galili didii xomxo tibeac la vô i, nêbê he ob vông vevac vô gavman, lêc gavman hi i yib dì xomxo wê timu vô i vixa gee pec mi moo sea. ³⁸ Om gwêbaga a ob nêl vô xam bê xam sea Yesu nue ngivihi tigee dì vông he i loc, ên yuac wê he vông ge, xomxo vaci obêc tu kehe ge od obêc vô nipaên. ³⁹ Léc Anutu obêc tu kehe ge od xam o tiyi wê xam ob le vac xôn ge lêm, ên obêc tiyi xochê xam vông vevac vô Anutu."

⁴⁰ Mêd kaunsil tigee vihati lee yuu lec Gameliel kiyang, om he keac Yesu nue ngivihi vena dì he nêl mi tibii hi he ya yihi, dì he nêl vyac xêkizêc vô he ên nêb he i o lêc nêl kiyang lec Yesu lê i tii vac lêm. Pyap dì vông he lop mî la. ⁴¹ Om Yesu nue ngivihi sea kaunsil dì lop mî la vixun hixôn xêyaa niviha, dì pimil Anutu ên wê Anutu xo nêbê he tiyi wê ob kô viyin lec Yesu lê ge. ⁴² Mêd he la nêl Yesu Kilisi xolac vô xomxo vac Anutu xumac ngibua dì la nêl vac xomxo toto ben tiyi buc vihati.

6

He vinoo xomxo vigê vilu dì sec yuu ên nêb he i ngidu Yesu nue ngivihi xôn

¹ Vô buc tige xomxo tibeac vông i vin Yesu om xomxo vông vinêô vô tibeac. Léc he vilu wê keac vyac Glik ge yê he wê keac vyac Yuda ge nipaên ên nêbê, "Xam mi vông byed vô susu vô he wê nêl susu maên gee tiyi lec buc vihati, lêc xam o vông vô vêxôv wê xe vông ge hixôn lêm." ² Om Yesu nue ngivihi vigê yuu dì tô mî la yuu keac xomxo vông vinêô vihati lam kitucma, dì nêl vô he ên nêbê, "Xe obêc sea yuac wê xe mi nêl Anutu xolac ge dì la vông byed vô susu yaên ge od tiyiên ma. ³ Om xam lige, xam vinoo xomxo vigê vilu dì sec yuu vac xam mahigun, wê xam wê he niviha dì Myakilôhô Ngibua hivun he xôn dì he piyôp niviha ge, ên il ob vông yuac tige vac he vigê mi he i vông, ⁴ ên xe wê Yesu nue ngivihi ge ob vông yuac lec kitaaén hixôn xolac nêlên."

⁵ Mêd xomxo vông vinêô vihati tyuc lec kiyang wê he nêl ge, om he vinoo Stiven yuu Pilip dì Plokolas dì Naikena dì Taimon dì Pamenas dì Nikolas. Stiven ge xomxo ti wê vông i vin Yesu xêkizêc ge dì Myakilôhô Ngibua hivun i xôn, dì Nikolas ge tibii Antiok ti lêc mi timu vô kiyang wê he Yuda vông ge. ⁶ Om he lax xomxo tigee la vô Yesu nue ngivihi manôn mi he vyax vigê lec he dì kitaa lec.

⁷ Mêd Anutu xolac vô levac dì xomxo Jelusalem tibeac vông i vin Yesu di xomxo wê mi si daa vô Anutu gee tibeac vông i vin hixôn.

He Yuda hôm Stiven xôn

⁸ Stiven ge, vizid yuu xêkizêc wê Anutu vông ge hivun i xôn, om mi vông do levac mì xomxo tibeac yê. ⁹ Lêc Yuda ya lam vô Stiven dì he ngaênma lec xolac. Xomxo tigee lam gê Sailini yuu Aleksandlia dì Silisia dì Esia lêc lam dô Jelusalem, dì he mi la vac Yuda xumac lilo ti wê nêl lê nêbê tibii piwelac he vêl. ¹⁰ Om he Stiven ngaênma lec xolac, lêc Myakilôhô Ngibua vông piyôp niviha vô Stiven om xomxo tigee tiyién ma wê ob kitya Stiven kiyang vêl ge. ¹¹ Mêd he vông xomxo ya la nêl kiyang kityooën lec Stiven bêga ên nêbê, “Xe ngô wê xomxo tige mi so vya vô Moses yuu Anutu.” ¹² He nêl bêge om he kiyang la vông xomxo levac yuu xomxo wê xovô Moses xolac gee hixôn xomxo tibeac, he nilô vô nipaên vô Stiven, om he la hôm Stiven xôn dì kô i mi la vô he kaunsil. ¹³ Dì he vông xomxo ya la nêl kiyang kityooën lec Stiven bêga ên nêbê, “Xomxo tige mi nêl kiyang nipaên lec Anutu xumac ngibua hixôn xolac wê Moses vông ge. ¹⁴ Xe ngô wê nêl ên nêbê Yesu Nasalet ob dii xumac ngibua vêl dì ob pilepac môt wê Moses vông vô il ilage vac.” ¹⁵ Mêd xomxo vihati wê dô vac kaunsil ben gee yê Stiven xêkizêc, lêc Stiven manôn tiyi xochê angela manôn.

7

Stiven nêl xolac vô he kaunsil

¹ Mêd xomxo daa sién nêl levac kinêg vô Stiven ên nêbê, “Kiyang wê he nêl lec ông ge, vixôhilôg, me?”

² Lêc Stiven nêl ên nêbê, “Xam mage lige, xam ngô lê. Vô buc ilage wê il bug Eblaham gên dô Mesopotemia dì laên vigwe Halan gên ma ge od xêseac kehe Anutu hilung i vô Eblaham ³ dì nêl vô i ên nêbê, ‘Ông sea bom di sea tame mame lime di loc vigwe ti wê a obêc hilung vô ông ge.’ ⁴ Om Eblaham sea tibii Kaldia ben dì la dô vigwe Halan. Dì buc wê Eblaham ma yib ge Anutu vông i lam vac vigwe tiga wê xam dô vac gwêbaga. ⁵ Lêc Anutu o vông kibun tiga tya vô Eblaham lêm. Nge, Anutu hilu kiyang vô i ên nêbê obêc timuên ge od obêc vông vigwe vihati i tu Eblaham hixôn bue timuên xe. Eblaham nue gên ma, lêc Anutu hilu kiyang tige tax vô i, ⁶ dì nêl hixôn ên nêbê, ‘Nume bume timuên obêc la dô vac tibii ben dì tu tibii tigee nue yuac dì he ob vông viyin vô he tiyi klismas tibeac hiwocên xochê 400, ⁷ lêc a obêc vông myaviwen vô tibii wê bume ob tu he nue yuac ge, dì obêc timuên bume ob sea tibii ben di lôm lam vac vigwe tiga tii vac di vông lilo dì kitaa vô a.’ ⁸ Nang dêc Anutu hilu kiyang vô Eblaham ên nêbê he i gôl nue vux ninivi ên i nêl kitong bê he tu Anutu nue, om buc wê Eblaham nu Aisak yubac di buc vigê vilu dì sec yon la vêl ge od Eblaham gôl Aisak ninivi. Nang dêc Aisak kô nu Jekop dêc Jekop kô nue vigê yuu di tô mì la yuu wê tu il buge ge.

⁹ “Lêc il buge xêyaa vô myavinê vô li Josep om he vông Josep mi tibii ya kisuu dì kô mi la vigwe Isip. Lêc Anutu dô hixôn Josep ¹⁰ dì ngidu i xôn vac viyin wê tibii vông vô i ge, dì vông piyôp niviha vô Josep om tibii Isip nêl king Pelo yê Josep niviha di vông i tu Isip nêl gavman levac di i viac xumac hixôn susu vihati wê Pelo vông ge.

¹¹ “He dô lêc vip levac yêp vac vigwe Isip yuu Kenan vihati, ên he xen susu yaén ma vêl, om xomxo vihati dô vac viyin levac di il buge o tulec yaén ti lêm. ¹² Lêc Jekop ngô wê yaén dô Isip ge om vông nue la Isip

taxlee. ¹³ Nang dêc he lax Isip lu ngwe tii vac di Josep nêl i kitong vô lie, di nêl vô king Pelo hixôn om Pelo xovô Josep he lie kehe. ¹⁴ Mêd Josep vông kiyang la vô ma Jekop nêbê Jekop hixôn Josep lie he nue, he vihati i loc vô i gê Isip. Xomxo tige he vihati tiyi 75, ¹⁵ mêd Jekop la dô Isip dêc yib. Nang dêc Jekop nue yib. ¹⁶ Jekop yuu Josep, nue bue kô yuu mi lax yev gê vigwe Sekem vac vigwe ti wê tibii Hemo vông mi Eblaham kisuu ya mone ilage.

¹⁷ “Xomxo Islel dô Isip di vô tibeac hiwocên mêd buc vô kwabo lec wê Anutu ob vông kiyang wê hilu vô Eblaham ilage i vô nôn lec ge. ¹⁸ He dô Isip, lêc Isip paha ti tu king om lungên Josep, ¹⁹ mêd kityoo il buge di vông viyin vô he ên nêbê he i sea nue paha i loc dô vaxvax ên he i yib. ²⁰ Vô buc tige Moses yubac, lêc Moses ge nipwo niviha ti wê Anutu yê niviha ge, om ta yuu ma viac di i dô vac xumac lôma dentuc yon, ²¹ nang dêc he kô mi la lii vô mia ninya lêc Pelo nu vêx la kô mi la viac xocbê ici va nu ge di i vô levac. ²² Mêd he tixuu Moses ya môp yuu xovôên vihati wê he Isip vông ge om Moses tiyi xocbê xomxo wê mi nêl kiyang di vông yuac niviha ge.

²³ “Klismas wê Moses vông ge kehe yuu, lêc xo ên nêb ob la yê lie Islel ²⁴ om la yê, lêc yê wê tibii Isip ti hi li Islel ti ge, om Moses nêb ob ngidu li tige xôn di ku i lu om la hi Isip tige yib. ²⁵ Moses xo ên nêbê lie Islel xovô wê Anutu vinoo i nêb i vô he vêl ên viyin ge, lêc he o xovô lêm. ²⁶ Mêd vigwe vidiûen titige Moses lax mi la vô lie lêc yê wê Islel yuu dîhima ge. Om nêb ob hi kiyang wê yuu vông ge i yib om nêl vô yuu ên nêbê, ‘Letya nêb muu hima? Ên muu ge muu lim.’ ²⁷ Lêc xomxo ngwe wê nêl vevac tax ge ngiloo Moses di nêl vô i ên nêbê, ‘Letya nêb ông ob tu xomxo levac wê xe vông di titô xe nêm kiyangê?’ ²⁸ Ông ob hi a xib tiyi xocbê ông hi Isip ti yib vihevage? ²⁹ Moses ngô kiyang tige om pec mi la di la dô tiyi xocbê tibii ba vac vigwe ti lê nêbê Midian, mêd kô vêx di nu vux yuu yubac vac vigwe tige.

³⁰ “He dô Midian klismas kehe yuu, di buc ti Moses la vac vigwe mahigun pileva ti wê yêp kwabo vô kitôn Sainai ge, lêc yê

angela ti lam vac ngwax mahelac wê tum lec xax myabo ge. ³¹ Moses yê tige di yetac om du mi la kwabo nêb ob la yê, lêc Apumtau vyâ nêl ên nêbê, ³² ‘A Anutu wê bume Eblaham yuu Aisak yon Jekop, yon Anutu a.’ Mêd Moses yetac di xona di vun manôn nêb yêen ob ma. ³³ Mêd Apumtau nêl vô i ên nêbê, ‘Piwelac su vêl ên vixam, ên vigwe wê ông le lec ge vigwe ngibua. ³⁴ A xê wê a nuge dô vac viyin levac gê Isip di a ngô wê he byag ge, om a lop mi lam ên a nêb a ob vô he vêl ên viyin tige. Om ông lam, ên a ob vông ông loc Isip.’

³⁵ “Moses ge wê lie tii i la ilage di nêl vô ên nêbê, ‘Letya vinoo ông ên nêb ông tu xomxo levac wê xe vông di titô xe nêm kiyangê?’ He nêl beige lê, lêc Anutu vông angela tige la vô Moses vac xax myabo di vông i tu he Islel nêl xomxo levac wê piwelac he vêl ên viyin ge. ³⁶ Om Moses didii he mi lam di he sea vigwe Isip, di Moses vông do levac gê Isip di vông lec Gwec Hi di vông vac vigwe mahigun pileva tiyi klismas kehe yuu.

³⁷ “Moses ge wê nêl vô he Islel ên nêbê, ‘Anutu obêc vông xam lime ti tu plopet xocbê a ge.’ ³⁸ Mêd Moses dô hixôn il buge vac vigwe mahigun

pileva dì i lec mi la lec kitôn Sainai, lêc angela nél Anutu kiyang vô i dì i kô kiyang maviha mi lôm nél vô lie dì i lam vô il gwêbaga hixôn.

³⁹ “Lêc il buge vô ninya kitu vô Moses kiyang dì pilepac nilô lax vô Isip nêb ob lax mi la, ⁴⁰ om he la nél vô Moses li Elon ên nêbê, ‘Ông sev xe anutu ya, ên he i didii il, ên Moses wê didii il gê Isip mi il lam ge, xe lungên, mêt la dô na?’ ⁴¹ Om vô buc tige he sev bulmakau nu ti kinu dì tung daa vô anutu kityooën tige dì pimil susu ti wê he vông ya vigê ge. ⁴² Om Anutu vô nimi vô he dì pilepac he nilô la vô hiyôv yuu dentuc dì pitua dì he kitaa vô, tiyi xochê kiyang wê plopet kivuu ilage mi i yêp vac kipihac bêga ên nêbê,

‘Xam Islel, xam la dô vac vigwe mahigun pileva tiyi klismas kehe yuu, lêc xam o hi bwoc sipsip yuu bulmakau ya mi si daa vô a lêm. ⁴³ Anutu kityooën ti lê nêbê Molok ge, xam kô i xumac sel mi lam hixôn, dì kô pitua kinu wê anutu kityooën lê nêbê Lepan vông ge hixôn, ên xam nêb xam ob kitaa vô, om a ob vông xam loc dô vac vigwe ti wê yêp Bebilon vilu ganê.’

⁴⁴ “Vô buc wê il buge dô vac vigwe mahigun pileva ge Anutu xumac sel yêp vac he mahigun dì nél kitong nêbê Anutu dô hixôn he. Xumac tige, he lox i tiyi kinu wê Anutu hilung vô Moses ge. ⁴⁵ Nang dêc Josua kô il buge mi he la vigwe Kenan, lêc tibii ya dô lec kibun tige om Anutu tii tibii tigee vêl di he Islel la dô lec vigwe Kenan. Lêc xumac sel tige he kô mi la hixôn dì lax i le vac he mahigun dì i la tyip vô buc wê king Devit dô ge hixôn. ⁴⁶ Mêt Anutu yê Devit niviha om Devit kitaa vô Anutu nêb ob lox xumac ti vô Anutu wê bu Jekop Anutu ge. Devit nêl bêge lê, ⁴⁷ lêc nu Solomon lox Anutu xumac tige.

⁴⁸ “Lêc Anutu wê luu vihati vêl ge ob dô vac xumac wê xomxo lox ya vigê ge lêm. Tiyi xochê plopet kiyang yêp bêga ên nêbê,

⁴⁹ ‘Anutu nêl ên nêbê, “Lag puunê ge tiyi xochê sia wê a ob dô lec ge, dì kibun ge tiyi xochê xax wê a vixag ob le lec ge. Om xam ob lox xumac ngwe bêna vô a? Dì a bog wê a ob dô seac vêl ge yêp gê na? ⁵⁰ A ga wê a vigê tung susu tigee vihati.”’

⁵¹ “Anutu kiyang yêp bêge, lêc xam piyôp xêkizêc dì xam nilôm mapitoc dì xam vô ninyam kitu, dì xam tii Myakilôhô Ngibua tiyi buc vihati. Xam vông môp tige tiyi xochê bume vông ilage. ⁵² Plopet tina wê bume o vông viyin vô he ilage lêm? He plopet ilage wê nél kitong nêbê xomxo bôbac ti obêc val ge, xam bume hi he yib mima vêl. Dì xacxam va vông xomxo tyo vac tibii vevac vigê dì hi i yib. ⁵³ Xam ge wê xam kô Anutu xolac vô angela ge, lêc xam o timu vô lêm.” Stiven nêl kiyang bêge vô he.

He nêx Stiven ya ngidax mi i yib

⁵⁴ He kaunsil ngô kiyang wê Stiven nêl vô he ge mêt he xêyaa vô myavinê mabu vô Stiven dì he nga mya xôn nêb ob hi. ⁵⁵ Lêc Myakilôhô Ngibua hivun Stiven xôn dì i lax ma lec lag, lêc yê xêseac wê Anutu vông ge dì yê Yesu le vô Anutu vigê hiyôv, ⁵⁶ om nêl ên nêbê, “Xam wê lê. A xê lag puunê tax dì Xomxo Nu le vô Anutu vigê hiyôv.”

⁵⁷ He ngô Stiven kiyang dì iac mabu dì kiyel ninya xôn ên nêb ob ngô Stiven kiyang lêm. Dì lutibed he vihati kidi lec dì la hôm Stiven xôn, ⁵⁸ dì kô mi la vigwe Jelusalem ninya nêb ob la nêx i yib ya ngidax. Om he wê vông kiyang vô Stiven gee kwax he ngakwi ngwe vêl mi la tung vô xomxo

ngivihi ti lê nêbê Sol. ⁵⁹ Mêd he nêx Stiven ya ngidax, lêc Stiven kitaa bêga nêbê, “Apumtau Yesu, ông hôm a myagkilôhô i loc vô ông.” ⁶⁰ Mêd Stiven yev vixa kitu vac dì kitaa vya levac ên nêbê, “Apumtau, le i lêc hôm he nén nipaên wê he vông ge xôn lêm.” Stiven nél bêge mêd yib.

8

Sol vông viyin levac vô xomxo vông vinên

¹ Sol xêyaa vô niviha ên wê he hi Stiven yib ge. Dì buc mahigun tige xomxo kidi mi vông viyin mabu vô xomxo vông vinên wê dô Jelusalem gee, om he vông vinên vihati pec mi la dì la dô vigwe Judia yuu Samelia, dì Yesu nue ngivihi ge he dô Jelusalem. ² Di xomxo wê mi timu vô Anutu kiyang ge, he ya kô Stiven ninivi mi la yev dì byag mabu ên wê i yib ge. ³ Lêc Sol nêb ob kitya xomxo vông vinên vihati vêl om la vac he toto ben dì la hôm vêx vuux xôn dì kô mi la tung vac xumac kalabuhu.

Xomxo la nél Yesu xolac gê Samelia

⁴ Xomxo vông vinên wê pec sea gee la vac vigwe toto dì la nél Yesu xolac kitong. ⁵ Mêd Pilip la vac vigwe ti wê yêp vac vigwe levac Samelia ge dì la nél Yesu kitong vô he ên nêbê Yesu ge Kilisi wê Anutu vông i lam ge. ⁶ Di xomxo tigee ngô kiyang wê Pilip nél ge dì yê do levac wê vông ge om vô ninya lehe vô i kiyang. ⁷ Èn xomxo tibeac wê vimwo nipaên dô vac he nilô gee, vimwo tigee iac mabu dì lam lop mi la vêl ên he, dì xomxo tibeac wê len vô xêlehe gee hixôn he wê vixa vô nipaên ge, he vô niviha lec. ⁸ Mêgem xomxo viyang tige dô hixôn xêyaa niviha.

⁹ Xomxo ti dô Samelia lê nêbê Saimon. Saimon mi yong i nêbê i xomxo levac dì mi vông pileac om xomxo Samelia yê dì yetac ên. ¹⁰ Om xomxo levac hixôn xomxo vihati he vô ninya lehe vô Saimon kiyang dì nél bêga nêbê, “Xomxo tige kô xêkizêc levac vô Anutu.” ¹¹ Dì he yetac ên do levac wê Saimon mi vông ila ila ge om he vô ninya lehe vô Saimon kiyang. ¹² Lêc Pilip la nél Anutu ben kehe kitong vô he dì nél Yesu Kilisi xolac niviha vô he, om xomxo vêx yuu vuux tibeac vông i vin dì lipac mia. ¹³ Di Saimon vông i vin hixôn dì lipac mia dì la hixôn Pilip dì yetac mabu ên do levac wê Pilip mi vông ge.

¹⁴ Mêd Yesu nue ngivihi wê dô Jelusalem gee ngô wê xomxo Samelia vông i vin Anutu xolac ge om he vông Pita yuu Jon loc mi la vô he, ¹⁵ di yuu la kitaa lec he ên nêbê Myakilôhô Ngibua i loc vô he. ¹⁶ Èn Myakilôhô Ngibua gên o la vô he lêm. He lipac mia lec Yesu Kilisi vaci lê. ¹⁷ Om yuu la vyax vigê lec he dì Myakilôhô Ngibua lam la vac he nilô.

¹⁸ Mêd Saimon yê wê Pita yuu Jon vyax vigê lec xomxo di Myakilôhô Ngibua lam la vac he nilô ge, om Saimon kô mone mi la vô yuu ¹⁹ dì la nél vô yuu ên nêbê, “Muu vông xêkizêc tige vô a hixôn êdêc a vyax vigêg lec xomxo ge od Myakilôhô Ngibua i loc vac he nilô.”

²⁰ Lêc Pita nél vô i ên nêbê, “Xêkizêc ti wê Anutu nêb ob vông pileva ge ông nêb ông ob kisuu ya mone, om ông loc dì loc xôa ma hixôn ông mone. ²¹ Ông ob vông yuac tiga hixôn xe lêm, ên ông nilôm o yêp niviha vô Anutu manan lêm. ²² Om ông pilepac ông di vô nimim vô môp nipaên wê ông vông ge, dì ông kitaa vô Apumtau ên i kitya ông nêm nipaên wê

yêp vac ông nilôm ge vêl, ²³ ên a xê wê kiyang juda juda pup vac ông nilôm di ông nêm nipaên hôm ông xôn piliji.”

²⁴ Mêd Saimon luu Pita vya ên nêbê, “Muu kitaa vô Apumtau lec a, ên nipaên wê muu nêl ge i o lêc tulec a lêm.”

²⁵ Mêd Pita yuu Jon nêl Apumtau Yesu kitong vô xomxo. Pyap di yuu la, nêb ob lax mi la Jelusalem. Om yuu la nêl Anutu xolac vac vigwe toto gê Samelia di lax mi la Jelusalem.

Pilip nêl xolac vô tibii Itiopia ti

²⁶ Apumtau vông angela ti la nêl vô Pilip ên nêbê, “Ông kidi lec di loc vô môt ngwe wê yêp vô vigê kêt wê ob sea Jelusalem di la Gasa ge.” Môt tige yêp vac vigwe mahigun pileva wê tibii dô vacên ma ge. ²⁷ Om Pilip kidi lec mi la, lêc mila tulec xomxo ti vac môt. Xomxo tige tibii Itiopia levac ti wê mi viac mone yuu susu wê he kwin Kandesî vông ge gê Itiopia. Xomxo tyo la kitaa vô Anutu gê Jelusalem, ²⁸ pyap di lax nêb ob lax ben, om dô lec pêt ti wê xôhô didii ge mêd kitong kipihac wê plopet Aisaia kivuu ilage di la vô môt mi la. ²⁹ Mêd Myakilôhô Ngibua nêl vô Pilip ên nêbê, “Loc kwabo vô xomxo tiganê di loc hixôn.” ³⁰ Om Pilip tup mi la di mila le hixôn xomxo tige di ngô wê xomxo tige dikitong Aisaia kiyang, om kinêg vô i ên nêbê, “Kiyang wê ông kitong ge, ông xovô kehe, me?”

³¹ Lêc xomxo tyo nêl ên nêbê, “Xomxo ti obêc nêl vô a ge od a ob xovô.” Om xomxo tige kitaa Pilip ên nêbê, “Ông lec lam dô hixôn a.”

³² Xolac wê xomxo tige kitong ge nêl bêga nêbê,
“He didii xomxo tige mi la tiyi xochê bwoc sipsip wê he ob kô mi la hi i yib ge, di i tiyi xochê bwoc sipsip nu ti wê he ob kiping niviluhu vêl
ge lêc xomxo tige le xôa maên di o keac ti lêm. ³³ He vông i lê vô
nipaên, di he o titô i nêl kiyang vô niviha lêm. Om letya ob nêl i
nue bue kiyang? Èn i sea kibun ga di la.”

³⁴ Mêd tibii levac tige kinêg vô Pilip ên nêbê, “Ông nêl kitong vô a bê
plopete kivuu kiyang tiga lec letya? Kivuu lec ici va, me kivuu lec xomxo
ngwe?”

³⁵ Om Pilip nêl Yesu xolac niviha wê yêp vac plopete kiyang tige yêp seac
vô xomxo tyo. ³⁶ Mêd yuu la vô môt mi la, di mila vô mia ti, om xomxo
tige nêl vô Pilip ên nêbê, “Wê lê. Mia yêp ga, om tiyi wê ông ob lipac a ge,
me?”

³⁷ [Mêd Pilip nêl ên nêbê, “Ông obêc vông nilôm la yadiluhu vô Anutu
di vông i vin ge od tiyi wê ông ob lipac mia.” Mêd tyo nêl ên nêbê, “A
vông i vin ên a nêbê Yesu Kilisi ge Anutu nu vixôhilôg.”]

³⁸ Om nêl di xôhô le di yuu lop mi la vac mia di Pilip lipac i. ³⁹ Mêd
yuu lôm tyip kehe di Apumtau Myakilôhô Ngibua hôm Pilip vêl lutibed,
om xomxo tige yê wê Pilip xôa ma ge di i la hixôn xêyaa niviha di la ben.
⁴⁰ Mêd Pilip yê lêc val dô vigwe Asdot. Mêd loc mi la vac vigwe tigee vihati
di la nêl Anutu xolac vô xomxo di mila Sisalia.

9

Sol pilepac i di vông i vin Yesu

¹ Vô buc tige Sol le nêl kiyang xêkizêc nêb ob vông viyin vô xomxo vông
vinêr di hi he yib, om la vô xomxo daa sién nêl levac ² mi la nêl vô ên nêb
i kivuu kipihac i loc vac he Yuda vac xumac lilo wê yêp vigwe Damaskas

ge. Om kivuu kipihac bêga nêbê Sol obêc tulec vêx me vux wê mi timu vô Yesu môp gee od i hôm he xôn dì kô mi loc Jelusalem di loc tung vac xumac kalabuhu.³ Mêd Sol la vô môp di mila kwabo vô Damaskas, lêc lutibed xêseac xochê deac hixelac ge lam gê kisii di lam byêx Sol manôn⁴ di i tilii mi la yêp kibun di ngô via ti lam nêl vô i ên nêbê, “Sol, bêna lêc ông vông viyin vô a?”⁵ Lêc Sol kinêg ên nêbê, “Apumtau, ông letya?” Di i nêl ên nêbê, “A Yesu wê ông vông viyin vô a.⁶ Ông kidi lec mi loc vigwe Damaskas, ên xomxo ti obêc nêl kitong vô ông lec yuac wê a nêb ông ob vông ge.”

⁷ Mêd xomxo wê dô hixôn Sol gee ngô via tige lêc he o yê xomxo ti nôn lêm om he le kiyang maên. ⁸ Mêd Sol kidi lec di vông manôn hixelac lêc manôn mapitoc, om he hôm lec Sol vigê di didii i di he la Damaskas. ⁹ Mêd Sol la dô tiyi buc yon lêc manôn dô mapitoc, di yaên yuu numên ma.

¹⁰ Xomxo wê vông i vin Yesu ge ti dô Damaskas lê nêbê Ananaias, lêc Apumtau vông vivia vô di nêl ên nêbê, “Ananaias.” Mêd Ananaias nêl ên nêbê, “Apumtau, a dô ga.” ¹¹ Mêd Apumtau nêl vô i ên nêbê, “Ông kidi di loc môp ti wê he nêl lê nêbê môp bôbac ge di loc Judas ben di loc kinêg xomxo Tasas ti lê nêbê Sol wê dô vac Judas ben di kitaa mi dô. ¹² Ên Sol yê vivia ti nêbê xomxo ti lê nêbê Ananaias ob kidi mi la vô i di la vyax vigê lec, ên i manôn i seac di i yê vigwe.”

¹³ Lêc Ananaias nêl ên nêbê, “Apumtau, a ngô wê xomxo tibeac nêl kiyang lec xomxo tige nêbê mi vông nipaên tibeac vô ông nume vông vinêng gê Jelusalem,¹⁴ di xomxo daa sién nêl levac tyuc lec xomxo tige nêb i lam vigwe ga di lam hôm xomxo wê vông i vin ông ge xôn.”

¹⁵ Lêc Apumtau nêl vô i ên nêbê, “Ông kidi lec di loc, ên xomxo tige a vinoo pyap ên a nêb i tu a nug yuac di i loc nêl a lêg vô tibii viyang viyang hixôn he king di i loc nêl vô lie Islel hixôn.” ¹⁶ Di viyin wê xomxo tige ob kô lec a lêg ge aca va obêc hilung vô.”

¹⁷ Om Ananaias loc mi la, di la vô Sol vac xumac nilô di la vyax vigê lec di nêl ên nêbê, “A lig Sol, Apumtau Yesu wê hilung i vô ông vac môp wê ông lam ge, ici va vông a lam vô ông ên nêb ông mammôn i seac di Myakilôhô Ngibua i lam hivun ông xôn.” ¹⁸ Om lutibed susu xochê makikeng ge tô mi la vêl ên Sol manôn di i manôn seac di i yê vigwe, di i kidi lec di Ananaias lipac i lec Yesu lê ên wê vông i vin ge. ¹⁹ Pyap di i ya susu yaên di vô xêkizêc lec.

Sol nêl xolac gê Damaskas

Sol dô Damaskas hixôn xomxo vông vinêng buc ya.²⁰ Om lutibed Sol la vac Yuda xumac lilo di la nêl Yesu kitong vô he bêga nêbê, “Yesu ge Anutu nu.”²¹ Om xomxo vihati wê ngô Sol kiyang gee yetac di nêl vòma ên nêbê, “Xomxo tige wê mi hi xomxo ên wê he mi kitaa vô Yesu ge. Hi gê Jelusalem di lam ga hixôn ên nêb ob lam hôm xomxo xôn di kô he mi lax vô xomxo levac wê mi si daa gee. Om mêt xomxo tyo tige.”²² Lêc Sol nêl xolac hixôn xêkizêc di nêl kiyang yêp seac nêbê Yesu ge Kilisi wê Anutu vông i lam ge, om he Yuda wê dô Damaskas gee, he o tiyi wê ob nêl kiyang ti lax vô i ge lêm.

He Yuda xêyaa vô nipaên vô Sol om Sol pec mi la

²³ Mêd buc tibeac lam la vêl lêc he Yuda kitucma di nêl kiyang mi hilu xôn nêb ob hi Sol i yib. ²⁴ Om Yuda ya la dô bin vuayen wê le vac xenac wê vivac vô vigwe Damaskas ge, om he dô bin vô bucén yuu vidiiêñ vihati ên nêb ob hi Sol i yib. Lêc Sol ngô wê he nêb ob hi i yib ge, ²⁵ om bucén ti xomxo wê mi dô hixôn Sol gee kô i mi he lec xenac tige mi la tyip kisii, mêd tung Sol vac sepac levac ti di vông i lop mi la xenac kehe di i pec mi la.

Sol la dô Jelusalem

²⁶ Sol loc mi la Jelusalem, nêb ob la dô hixôn xomxo wê vông i vin Yesu ge, lêc he vihati xona ên Sol, ên he o vông i vin nêbê Sol ge xomxo vông vinêñ ti lêm. ²⁷ Mêd Banabas kô i mi yuu la vô Yesu nue ngivihi di Banabas nêl kitong vô he lec wê Sol yê Apumtau vac môt di Apumtau nêl kiyang vô i ge di nêl lec wê Sol nêl Yesu via kitong vô tibii Damaskas di xonaêñ ma ge. ²⁸ Om Sol dô hixôn he di la vac vigwe Jelusalem vihati di nêl Apumtau lê kitong vô xomxo di o xona lêm. ²⁹ Mêd he Yuda wê keac Glik via ge, he Sol ngaênma lec Yesu xolac di he myag môt wê nêb ob hi Sol i yib ge. ³⁰ Lêc xomxo vông vinêñ ngô wê he nêb ob hi Sol yib ge om he kô Sol mi la vigwe Sisalia di vông Sol la ben Tasas.

³¹ Mêd xomxo vông vinêñ wê dô Judia yuu Galili di Samelia ge he vihati dô viyin maén di vevac ma ên he. He dô vac Apumtau vilu kwa ngibi di Myakilôhô Ngibua ngidu he xôn, om he vô xêkizêc di xomxo vông vinêñ vô tibeac hiwocêñ.

Pita vông Inias vô niviha lec

³² Pita la vilee mi la vac vigwe vihati, di buc ti lêc la yê xomxo vông vinêñ wê dô vigwe Lidia ge. ³³ Vac vigwe tige yê xomxo ti lê nêbê Inias wê len vô xêlehe di i yêp lec pêt tiyi klismas vigê vilu di sec yon ge. ³⁴ Mêd Pita nêl vô i ên nêbê, “Inias, gwêbaga Yesu Kîlisi vông ông vô nimviha lec. Om ông kidi lec mi vilun ông guhu.” Om Inias kidi lec lutibed. ³⁵ Di xomxo vihati vac vigwe Lidia yuu Salon yê di pilepac nilô la vô Apumtau di vông i vin.

Pita vông Tabita kidi lec vac yibêñ

³⁶ Vêx vông vinêñ ti lê nêbê Tabita dô Jopa. Vac Glik via he nêl vêx tige lê nêbê Dokas. Vêx tige vông môt niviha vô xomxo tiyi lec buc vihati di vông susu vô xomxo wê nêbê susu maén ge hixôn. ³⁷ Vô buc tige yidac vông i di i yib, mêd he lipac i ninivi di lii i yêp vac xumac nilô ti gê kisii. ³⁸ Mêd xomxo vông vinêñ ngô wê Pita la dô vigwe Lidia ge, lêc Lidia yêp kwabo vô Jopa om he vông vux yuu la vô Pita di yuu la nêl vô ên nêbê, “Ông lam vô xe lutibed.” ³⁹ Om Pita kidi mi la hixôn yuu di yon loc mi la Jopa, di he kô Pita mi lec mi la vac xumac nilô kisii tyo. Mêd vêxôv tibeac lam le hixôn Pita di byag, di kô nivimihi yuu ngakwi toto wê Dokas duu vac buc wê gên dô maviha ge mi hilung vô Pita. ⁴⁰ Lêc Pita vông he vihati lop mi la vixun di i yev vixa kitu vac di kitaa vô Anutu, mêd pop manôn vô vêx tyo di nêl bêga nêbê, “Tabita, ông kidi lec.” Mêd vêx tyo manôn seac di i yê Pita di kidi mi dô. ⁴¹ Mêd Pita hôm lec vigê di i kidi lec mi le kisii. Mêd Pita nêl vêxôv hixôn xomxo vông vinêñ vihati lam di hilung vêx tyo wê kidi lec maviha ge vô he. ⁴² Mêd xomxo Jopa vihati ngô wê vêx tyo kidi

lec ge om he tibeac vông i vin Apumtau. ⁴³ Mêd Pita dô Jopa buc tibeac di dô hixôn xomxo ti lê nêbê Saimon wê mi vông yuac lec bwoc ninivi ge.

10

Angela ti nêl kiyang vô Koniliyas

¹ Tibii vevac levac ti lê nêbê Koniliyas dô vigwe Sisalia. Koniliyas viac nue vevac 100 vac he kidu ti wê nêl he nêbê he Itali ge. ² Koniliyas he vinê nue vihati vông i vin Anutu dî kitaa vô Anutu tiyi lec buc vihati, dî Koniliyas mi ngidu he Yuda wê nêl susu maên gee xôn. ³ Dî buc ti xochê hiyôv manôñ yon, lêc Anutu vông angela ti lam nêl vô Koniliyas ên nêbê, "Koniliyas."

⁴ Mêd Koniliyas yê ma la angela tige di xona mabu dî kinêg ên nêbê, "Xomxo levac, vatya?" Mêd angela tige nêl ên nêbê, "Anutu ngô wê ông mi kitaa ge dî yê wê ông vông susu vô he wê nêl susu maên gee om xovô môp wê ông mi vông ge pyap. ⁵ Om ông vông xomxo ya i loc vigwe Jopa ên loc nêl Saimon wê lê ngwe nêbê Pita ge ên i lam. ⁶ Saimon Pita la dô vac Saimon ngwe ben, ngwe wê mi vông yuac lec bwoc ninivi ge ben wê yêp kwabo vô gwec ninya ge."

⁷ Angela nêl kiyang pyap vô Koniliyas dî loc mi la, mêd Koniliyas tyuc i nue yuac yuu dî lie vevac ti lam. Xomxo vevac tige, xomxo vông vinêñ ti wê mi dô hixôn Koniliyas tiyi buc vihati ge. ⁸ Mêd Koniliyas nêl angela kiyang kitong vô yon dî vông yon loc mi la Jopa.

Anutu hilung tixuuêñ ti vô Pita

⁹ Xomxo yon ge loc mi la, dî vigwe vidiiêñ titige yon mila kwabo vô Jopa. Dî hiyôv tyip kitôn lêc Pita lec mi la lec xumac kitôn kisii nêb ob la kitaa vô Anutu. ¹⁰ Dî vip den Pita om Pita nêb ob ya yaêñ, lêc he gên o viac yaêñ wê he ob ya ge lêm, om Pita xeedô, lêc tixuuêñ ti val vô i ¹¹ dî i yê ma la kisii, lêc lag puunê tax di susu ti xochê nivimihi levac ti lam gê kisii lêc lam xochê xomxo hilu yihî lec

mayahipu vihati dî vông i lam tô kibun. ¹² Lilii yuu menac di bwoc yuu myel toto dô vac nivimihi tige nilô, ¹³ mêd vyâ ti lam nêl ên nêbê, "Pita, kidi lec mi loc hi lilii tigee mi wa." ¹⁴ Lêc Pita nêl ên nêbê, "Apumtau, a xaêñ ob ma. Ên a o mi xa yaêñ wê xe vibu ên xe nêbê ningeac ge lêm." ¹⁵ Mêd vyâ tige lam tii vac nang ên nêbê, "Susu wê Anutu kitaa lec nêbê niviha ge, ông o lêc wê ên ông nêbê nipaêñ lêm." ¹⁶ Anutu nêl kiyang tige vông lu yon mêd nivimihi tige lec mi lax kisii lutibed.

¹⁷ Mêd Pita dô dî xo kiyang tibeac lec susu wê yê ge ên nêbê, "Tige kehe bêna?" Mêd xomxo yon wê Koniliyas vông yon lam ge val Jopa, mêd kinêg xumac wê Saimon vông ge vô xomxo ya dî val le vô Saimon ben vuayen, ¹⁸ di keac ên nêbê, "Saimon ti wê lê ngwe nêbê Pita ge dô ga, me?" ¹⁹ Pita xeedô dî xo susu wê yê ge, mêd Myakilôhô Ngibua nêl vô i ên nêbê, "Ngô lê. Xomxo yon val myag ông, ²⁰ om ông kidi lec dî lop mi loc vô yon dî loc hixôn yon, dî ông o lêc nilôm yuu yuu lêm, ên aca va vông yon lam."

²¹ Om Pita lop mi la vô yon dî nêl vô ên nêbê, "A Pita wê mon myag a ge. Mon lam ên vatya?" ²² Mêd yon nêl ên nêbê, "Koniliyas wê tu levac ên tibii vevac 100 ge wê vông xen lam. Koniliyas ge xomxo niviha ti wê mi kitaa vô Anutu dî xomxo Yuda vihati yê i niviha. Mêd Anutu vông angela ti lam nêl vô Koniliyas ên nêbê Koniliyas i vông kiyang i loc vô ông ên ông loc i ben dî loc nêl kiyang vô i." ²³ Mêgem Pita keac yon la xumac lôma di

viac yon, dì vidiiēn titige Pita kidi mì la hixôn yon, dì xomxo vông vinêñ Jopa he ya la hixôn mì he la.

Pita la vac Koniliias ben

²⁴ He mìla môp dì vigwe vidiiēn titige he mìla Sisalia. Di Koniliias kituc lie hixôn nippipu ya mì he lam dô vac i ben dì bin Pita. ²⁵ Mêđ Pita la vac Koniliias ben di Koniliias lam yev vixa kitu vô Pita dì pimil i. ²⁶ Lêc Pita nêl vô ên nêbê, “Kidi lec mì le kisii, ên a ga xomxo xochê ông.” ²⁷ Mêđ Pita keac vô i dì yuu la xumac lôma dì Pita yê wê xomxo tibeac kitucma mi xeedô ge.

²⁸ Mêđem Pita nêl vô he ên nêbê, “Xacxam va xovô pyap wê xolac wê xe Yuda vông ge vibu ên nêb xe ob dô hixôn xam tibii ba lêm. Lêc Anutu nêl kitong vô a ên nêb a o lêc nêl xomxo ti bê i nipaêñ lêm. ²⁹ Om gwêbaga a val i tiyi ông vyam wê ông tyuc a ge dì a o pwoo ông vyam vac lêm. Om a ob kinêg ông bê ông nêb a lam ên vatya?”

³⁰ Mêđ Koniliias nêl ên nêbê, “Nyop ge wê hiyôv manôñ mìla yon xochê hucén bêga, a dô vac xumac lôma dì kitaa vô Anutu, lêc lutibed xomxo ti lam le vô a magnôñ hixôn ngakwi kwem pileva, ³¹ dì nêl vô a ên nêbê, ‘Koniliias, Anutu ngô wê ông mi kitaa ge dì xovô susu niviha wê ông mi vông vô xomxo wê nêñ susu maen gee, ³² om ông vông xomxo i loc Jopa ên loc nêl vô Saimon wê le ngwe nêbê Pita ge ên i lam. Saimon Pita la dô vac Saimon ngwe ben, ngwe wê mi vông yuac lec bwoc ninivi ge ben wê yêp kwabo vô gwec ninya ge.’ ³³ Om a ngô kiyang tige dì vông xomxo loc lutibed vô ông, dì ông vô ninyam lehe vô a vyag dì lam vô a. Om gwêbaga xe vihati lam dô ga vô Anutu manôñ ên xe nêb xe ob ngô kiyang vihati wê Apumtau vông vô ông ge.”

Pita nêl xolac vô Koniliias he lie

³⁴ Mêđ Pita nêl vô he bêga ên nêbê, “Gwêbaga a xovô vixôhilôg ên a nêbê Anutu o yê xomxo mangwe nêb niviha dì yê mangwe nêb nipaêñ lêm. Nge, Anutu yê xomxo vihati tiyima. ³⁵ Om xomxo vac vigwe vihati gee, ti obêc xona ên Anutu dì vông môp wê niviha ge od Anutu obêc yê i niviha. ³⁶ Xam xovô xolac niviha pyap wê Anutu nêl vô xe Islel bêga ên nêbê Yesu Kilisi wê tu il vihati nêđ Apumtau ge, ge wê vông il la dô tibed hixôn Anutu vac kiyang malehe. ³⁷ Dì xam xovô ên xam nêbê buc wê Jon nêl mia lipacên kitong vô xomxo pyap ge, od xolac tige kehe le vac vigwe Galili dì i la vac vigwe Judia vihati hixôn. ³⁸ Yesu Nasalet ge, Anutu vinoo i dì vông Myakilôhô Ngibua hixôn xêkizêc levac vô i, om Yesu la vac vigwe vihati dì la ngidu xomxo xôn dì vông he wê Seten ku he xôn gee vô niviha lec, ên Anutu dô hixôn i. ³⁹ Dì yuac vihati wê Yesu vông gê Jelusalem dì vông vac xe Yuda bom vihati ge, xe xê om xe nêl kitong vô xomxo. Nang dêc he hi Yesu yib lec xax pola, ⁴⁰ dì buc yon lam la vêl lêc Anutu tipi vô i kidi lec vac yibêñ dì hilung i le seac vô xe, ⁴¹ lêc o hilung i vô Yuda vihati lêm. Nge, hilung i vô xe mangwe wê Anutu vinoo xe pyap nêbê xe nêl i kitong vô xomxo ge. Om Yesu kidi lec vac yibêñ dì xe xa dì num hixôn i. ⁴² Dì Yesu nêl vô xe ên nêbê xe nêl xolac vô xomxo di nêl bêga bê Yesu ge wê Anutu vinoo pyap ên nêb i titô xomxo yibêñ yuu maviha vihati nêñ kiyang. ⁴³ Plopete vihati nêl Yesu kitong ilage ên nêbê xomxo vihati wê vông i vin Yesu ge od Yesu lê obêc kitya he nêñ nipaêñ vêl.”

Xomxo wê o Yuda lêm gee, he kô Myakilôhô Ngibua

⁴⁴ Pita gên nêl kiyang tige vô he, lêc Myakilôhô Ngibua lam dô vac he wê ngô kiyang gee vihati nilô. ⁴⁵ Mêd he Yuda vông vinên wê lam hixôn Pita ge yê dì yetac ên wê Anutu vông Myakilôhô Ngibua tiyi xochê vizid niviha vô xomxo wê o Yuda lêm ge hixôn. ⁴⁶ Dì he Yuda ngô wê xomxo tigee keac xomxo vigwe toto ge vya dì pimil Anutu. Om Pita nêl ên nêbê, ⁴⁷ “Anutu vông Myakilôhô Ngibua vô xomxo tigee tiyi xochê vông vô il Yuda ilage, om letya tiyi wê ob le vac he xôn nêb he lipacén mia i ma?” ⁴⁸ Om Pita nêl dì he lipac mia lec Yesu Kilisi lê. Mêd he kitaa Pita nêb i dô hixôn he buc ya.

11

Pita la nêl he wê o Yuda lêm gee kitong gê Jelusalem

¹ Yesu nue ngivihi hixôn xomxo vông vinên wê dô vigwe Judia vihati gee ngô wê tibii wê o Yuda lêm ge vông i vin Anutu kiyang. ² Mêd Pita la Jelusalem, lêc he Yuda wê mi le xêkizêc lec ninivi gôlên gee kunac Pita dì nêl vô ên nêbê, ³ “Bêna lêc ông la vô tibii madiluhu wê gôlên ninivi ma ge dì wa yaén hixôn he?”

⁴ Lêc Pita nêl kiyang vihati ge kitong vô he bêga nêbê, ⁵ “A dô vigwe Jopa dì kitaa mi dô, lêc a xê tixuuën ti bêga lec susu ti xochê nivimihi levac ti lam gê lag puunê lêc lam xochê xomxo hilu yihi lec myahipu vihati dì vông i lop mi lam vô a. ⁶ Om a xê nivimihi tyo, lêc bwoc yuu lilii dì menac dì myel toto gee dô vac nilô. ⁷ Dì a ngô vya ti lam hixôn ên nêbê, ‘Pita, kidi lec mi loc hi tigee mi wa.’ ⁸ Lêc a nêl ên a nêbê, ‘Apumtau, a xaén ob ma. Ên a o mi xa yaén wê xe vibu ên xe nêbê ningeac ge lêm.’ ⁹ Lêc vya tige lam gê lag puunê tii vac nang ên nêbê, ‘Susu wê Anutu kitaa lec nêbê niviha ge, le i lêc nêl bê nipaén lêm.’ ¹⁰ Anutu nêl kiyang tige vông lu yon mêt susu tige lax mi la lag puunê. ¹¹ Mêd lutibed xomxo yon wê lam gê Sisalia wê Koniliás vông yon lam vô a ge, yon val le vô xumac wê a la dô vac ge. ¹² Om Myakilôhô Ngibua nêl vô a ên nêbê, ‘Ông loc hixôn yon dì le i lêc xo kiyang tibeac lêm.’ Om xomxo Jopa vigê vilu di sec ti ga la hixôn a dì xe xôn la Sisalia di la vac Koniliás ben. ¹³ Mêd Koniliás nêl vô xe ên nêbê i yê angela ti lam vac i ben di lam nêl vô i ên nêbê, ‘Vông xomxo i loc Jopa ên loc kô Saimon, lê ngwe nêbê Pita mi i lam, ¹⁴ ên Pita ob nêl kiyang kitong vô xam di kiyang tige obêc vô xam lime nume vêl ên nipaén dì tung xam vac niviha.’ Koniliás nêl kiyang bêge vô xe ¹⁵ dì a gên nêl kiyang vô he, lêc Myakilôhô Ngibua lam dô vac he nilô tiyi xochê lam dô hixôn il ilage. ¹⁶ Om a xovô i lax lec kiyang wê Apumtau nêl ilage ên nêbê, ‘Jon lipac xomxo ya mia pileva, lêc Anutu ob lipac xam ya Myakilôhô Ngibua.’ ¹⁷ Buc wê il vông i vin Apumtau Yesu Kilisi ilage, Anutu vông Myakilôhô Ngibua vô il tiyi xochê vizid niviha ge, dì gwêbaga Anutu vông vizid tige vô tibii tigee hixôn, om a tiyien ma wê a ob le vac Anutu kiyang tige xôn.”

¹⁸ Yuda tigee ngô Pita kiyang om he sea nilô viyin dì pimil Anutu ên nêbê, “Anutu pilepac he wê o Yuda lêm gee nilô, ên nêb he êno, he i dô maviha.”

Xomxo vông vinên paha wê dô Antiok gee

¹⁹ Vô buc wê he hi Stiven yib dì vông viyin vô xomxo vông vinên ge, xomxo vông vinên tibeac pec mi la dì la dô vac vigwe Pinisia yuu Saiplas di Antiok. Dì he nêl xolac vô xomxo vac vigwe tigee, lêc he o nêl vô xomxo

vihatî lêm. Nge, he nêl vô he Yuda vaci. ²⁰ Lêt xomxo vông vinên ya wê lam gê Saiplas yuu Sailini gee la Antiok dì la nêl Apumtau Yesu xolac kitong vô he Glik hixôn. ²¹ Mêt xêkizêc wê Anutu vông ge ngidu he xôn, om xomxo tibeac pilepac nilô la vô Apumtau di vông i vin.

²² Mêt xomxo vông vinên wê dô Jelusalem gee ngô wê tibii Antiok vông i vin xolac ge om he vông Banabas la Antiok. ²³ Banabas mila yê wê Anutu vông vizid niviha vô he Antiok ge, om xêyaa vô niviha dì i viac kiyang vô he ên nêbê he i vông i vin Apumtau hixôn nilô yadiluhu i tiyi buc vihati. ²⁴ Banabas ge xomxo niviha ti wê vông i vin xêkizêc dì Myakilôhô Ngibua hivun i xôn. Mêt xomxo Antiok tibeac pilepac he di vông i vin Apumtau.

²⁵ Mêt Banabas loc mi la Tasas ên nêb ob la myag Sol. ²⁶ Yêvô om yuu lax mi la Antiok, mêt yuu dô hixôn xomxo vông vinên Antiok tiyi klismas ti diluhu di le vông xolac vô he tibeac. Gê Antiok he nêl xomxo vông vinên lê nêbê Klisten^{*} taxlee.

²⁷ Vô buc tige plopete ya wê lam gê Jelusalem ge val Antiok. ²⁸ Mêt he ti lê nêbê Agabas le vac he mahigun di nêl kiyang ti wê Myakilôhô Ngibua nêl vô i ge ên nêbê vip levac obêc val vac vigwe viyang viyang. Agabas kiyang tige vô nôn lec vô buc timuêñ wê Klodias tu he nêñ king ge. ²⁹ Xomxo vông vinên Antiok ngô Agabas kiyang om hilu kiyang nêb he ob ngidu lie vông vinên wê dô Judia ge xôn, om xomxo toto yê lêt vông i tiyi mone wê yêp vô he ge. ³⁰ Om he kituc mone pyap di vông vô Banabas yuu Sol di yuu kô mi la vông vô gyovixa Jelusalem.

12

Helot hi Jems yib di vông Pita vac xumac kalabuhu

¹ Vô buc tige king Helot vông viyin vô xomxo vông vinên ya, ² om vông tibii la hi Jon li Jems ya yipac mi i yib. ³ Mêt Helot yê wê Yuda mangwe he xêyaa vin lec môt tibége om Helot nêl di tibii la hôm Pita xôn. He vông tige lec buc levac wê he Yuda ya blet wê yis maén ge. ⁴ Mêt he la hôm Pita xôn di kô mi la tung vac xumac kalabuhu, di tibii xêhipu vigê yuu di vixa vilu di sec ti (16) yê Pita xôn di he kidu yuudiyuu om he yuudiyuu la bin pyap, nang dêc yuudiyuu obêc la bin nang. Mêt Helot xo nêbê Pita ob dô vac kalabuhu di buc wê Yuda ob myêl vizid ên xovô buc wê bue sea Isip ilage i loc vêl lê, lêt vông Pita i loc le vô Yuda manôn ên he i ngô i nêñ kiyang. ⁵ Om xêhipu tigee viac Pita mi he dô vac xumac kalabuhu, lêt he vông vinên kitaa xêkizêc vô Anutu nêb i ngidu Pita xôn.

Angela ti kô Pita vêl ên xumac kalabuhu

⁶ Mêt Helot xo nêbê titige Pita ob la le vô he Yuda manôn, om bucêñ ge Pita yêp vac xumac kalabuhu di sen yuu ku i xôn di i yêp vac xêhipu yuu mahigun, di xêhipu ya le bin vuayen. ⁷ Lêt lutibed Anutu vông angela ti val vô Pita di xêseac linac vac xumac lôma, mêt angela vyax vigê lec Pita di tipi vô ên nêbê, "Kidi lec lutibed." Mêt lutibed sen piwelac vêl ên Pita vigê di tô mi la kibun. ⁸ Mêt angela nêl vô Pita ên nêbê, "Vêx ông let lec di su ông su lec." Om Pita vông bêge pyap di angela nêl nang ên nêbê, "Vinyum ông ngakwi ngwe kisii lec di lam timu vô a." ⁹ Om Pita kidi lec di timu vô angela vixa di yuu la. Lêt Pita lungêñ wê angela didii i vêl ên

* **11:26:** Lê Klisten tige, kehe bêga nêbê he wê tu Kilisi xe ge. "Klis" ge Kilisi di "ten" ge ixe, om he kituc lê yuu xôn di nêl ên nêbê "Klisten."

xumac kalabuhu nilô ge dì so nêb mêd yê vivia pileva. ¹⁰ Mêd yuu luu xêhipu wê tax ge vêl mi la, nang dì mila luu mahigun ngweo vêl mi la nang, dì yuu val vô vuayen ain ti wê ob sea xumac kalabuhu mi la vixun ge, léc vuayen tyo, ici va tax om yuu lop mi la vixun, dì tup vô môp mi la mahigun ti lê, léc lutibed angela sea Pita dì la.

¹¹ Mêd Pita kinu milax vac i dì i xovô ên nêbê, “Ga a xovô vixôhilôg ên a nêbê Apumtau vông angela tige lam kô a vêl ên Helot vigê dì vô a vêl ên nipaên wê he Yuda nêb ob vông vô a ge.” ¹² Pita xovô pyap om loc mi la vô Malia wê Jon ta ge ben. Jon lê ngwe nêbê Mak. Xomxo tibeac kitucma dì kitaa vô Anutu mi dô, ¹³ om Pita hi vigê lec vuayen dì vêx yuac ti lê nêbê Loda ngô om lam nêb ob tax vuayen. ¹⁴ Léc ngô Pita vyat dì xovô nêbê ge Pita om xêyaa vô nivîha yang, léc taxênuayen ma dom tup mi lax nêl vô he wê dô vac xumac lôma ge ên nêbê Pita val le vixun. ¹⁵ Léc he nêl vô ên nêbê, “Ge ông piyôp vô yacyac.” Léc vêx tige nêl xêkizêc ên nêbê, “Pita vixôhilôg.” Léc he nêl vô ên he nêbê, “Ge Pita kinu.”

¹⁶ Mêd Pita le vixun dì hi vigê lec vuayen lu lu om he la tax vuayen léc yê Pita vixôhilôg om he yetac mabu. ¹⁷ Mêd Pita vông vigê vô he nêb he dô kiyang maén, mêd nêl wê Apumtau kô i vêl ên xumac kalabuhu ge kitong vô he dì nêl ên nêbê, “Xam loc nêl a kitong vô Jems he lie vông vinêh hixôn.” Mêd Pita sea he dì la vigwe bangwe.

¹⁸ Mêd vigwe vidii di xêhipu he yê wê Pita xôa ma ge om he yetac dì nêl vòma ên nêbê, “Pita la na?” ¹⁹ Mêd Helot vông yuac lec myagê Pita léc tulecén ma, om kinêg vô he xêhipu wê viac Pita ge léc he lungén, om Helot nêl dì tibii hi he yib. Pyap mêd Helot sea vigwe Judia dì la dô Sisalia.

Helot yib

²⁰ Helot xêyaa vô myavinê vô xomxo Taia yuu Saidon, om he Taia yuu Saidon kituc la vô Helot ên nêb ob hi kiyang tige yib, ên he mi kisuu xen yaén vac vigwe wê Helot viac ge. He la viac nêl kiyang tax vô Blastas wê mi viac Helot xumac ge. Pyap mêd he la kitaa Helot, nêb i hi kiyang wê he vông ge i yib. ²¹ Mêd buc wê Helot tung ge od vunac ngakwi king lec dì la dô lec sia king dì nêl kiyang vô he vihati. ²² Mêd he wê ngô kiyang tige tyuc vyat levac ên nêbê, “Ga o xomxo kibun ti vya lêm. Nge, vya ga tiyi anutu vyat.” ²³ Léc Helot yong i dì o pimil Anutu lêm, om lutibed Apumtau vông angela ti lam hi Helot ya myel vêê om ya i nilô ma vêl dì i yib.

²⁴ Mêlêc Anutu xolac la vô levac vac vigwe tibeac.

²⁵ Mêd Banabas yuu Sol la vông mone vô gyovixa Jelusalem, pyap dêc yuu kô Jon Mak dì yon lax mi la Antiock.

13

Xomxo vông vinêh vông Banabas yuu Sol la

¹ Vac konglegesen Antiock, xomxo wê plopete dì he wê tixuu xomxo ya xolac ge, he ya dô. He lê bêga nêbê Banabas yuu Simion wê lê ngwe nêbê ninivi viliac ge, dì Lusias wê lam gê Sailini ge yuu Maneyen wê gavman levac Helot nipipu ti ge, dì Sol. ² Buc ti lêc xomxo vông vinêh vihati ngibua yaén dì kitaa vô Apumtau mi dô léc Myakilôhô Ngibua nêl vô he ên nêbê, “Xam vinoo Banabas yuu Sol ên yuu i loc vông yuac wê a ob vông vô yuu ge.” ³ Om he ngibua yaén dì kitaa vô Anutu, pyap dêc vyax vigê lec yuu dì vông yuu la.

Banabas yuu Sol la nêl Yesu xolac vac vigwe Saiplas

⁴ Myakilôhô Ngibua vông Banabas yuu Sol la, om yuu la vigwe Selusia di lec sip gê Selusia di la vigwe kitôn Saiplas wê yêp vac gwec mahigun ge. ⁵ Vac vigwe Saiplas yuu la dô vigwe Salamis di nêl Anutu xolac vac xumac lilo wê he Yuda vông ge vihati. Jon Mak dô hixôn yuu om ngidu yuu xôn vac yuac.

⁶ Mêd yon la tup vac vigwe nipwo vihati di mila vigwe ti lê nêbê Pepos. Mêd yon tulec xomxo Yuda ti lê nêbê Ba-Jisas. Ba-Jisas ge plopet kityooën ti wê mi vông viloo hixôn yevac ge, ⁷ di mi dô hixôn gavman levac ti lê nêbê Sesias Polas. Sesias Polas ge, xomxo wê xovôën niviha ge om keac Banabas yuu Sol la vô i ên nêb ob ngô Anutu xolac. ⁸ Lêc Ba-Jisas wê lê ngwe vac Glik vya nêbê Elimas ge nêl nipaên lec Banabas yuu Sol, ên nêb ob pilepac gavman levac tyo nilô ên i o lêc vông i vin Yesu lêm. ⁹ Lêc Sol wê lê ngwe nêbê Pol ge, Myakilôhô Ngibua hivun i xôn om Pol yê Elimas kizêc, ¹⁰ di nêl vô ên nêbê, “Ông Seten nu, ông vông vevac vô kiyang niviha vihati, di kiyang kityooën yuu nipaên pup lec ông nilôm. Ông juda Apumtau kiyang tiyi buc vihati. Obêc buc tina lêc ông sea kiyang kityooën wê ông mi nêl ge? ¹¹ Om wê lê. Gwêbaga Apumtau obêc hi ông di vông ông mamnôn i toc, di ông wêen vigwe ob ma di buc ya i loc vël lê.” Pol nêl bêge mêd lutibed Elimas manôñ vô mapitoc di i vô pilax pilax vigwe di myag xomxo wê ob hôm lec i vigê mì hilung môp vô i ge. ¹² Gavman levac yê tige di yetac ên Apumtau xolac di vông i vin.

Pol yuu Banabas vông yuac gê Antiok wê yêp vac vigwe levac Pisidia ge

¹³ Pol hixôn xomxo wê mi la hixôn i ge lec sip gê Pepos di la Pega vac vigwe Pampilia. Lêc Jon Mak sea he di lax mi la Jelusalem. ¹⁴ Mêd he kidi vac Pega di la Antiok wê yêp vac vigwe levac Pisidia ge. Di buc sabat ge he la vac Yuda xumac lilo di la dô. ¹⁵ Xomxo wê viac xumac lilo ge kitong xolac wê Moses he plopete kivuu ilage. Pyap dêc he nêl kiyang la vô Pol yuu Banabas ên nêbê, “Lig muu, muu obêc nêb nêl kiyang ya vô xe ên i ngidu xe xôn ge od muu nêl.” ¹⁶ Om Pol kidi lec di vigê la kisii di i nêl vô he ên nêbê,

“Xam lige Islel hixôn xam tibili ba wê xam xona ên Anutu ge, xam ngô lê. ¹⁷ Anutu ti wê il Islel vông ge vinoo mage buge ilage, di buc wê he la dô Isip tiyi xochê xomxo vitevac ge od Anutu vông he vô tibeac hiwocên. Di timuêñ Anutu vigê xêkizêc didii he vël di vông he la. ¹⁸ He la dô vigwe mahigun pîleva tiyi klismas kehe yuu, lêc Anutu o kitya he vël ên wê he pwoo i vya vac ge lêm. ¹⁹ Nang dêc Anutu kitya tibili viyang vigê vilu di sec yuu wê dô vac vigwe Kenan ge vël di vông kibun tige vô he Islel mi he dô vac i tiyi klismas 450. ²⁰ Nang dêc Anutu vinoo Islel levac di he viac lie di i val tyip vô buc wê plopet Samyuel dô ge.

²¹ “Lêc he Islel nêb he ob vinoo king wê ob viac he ge om Anutu vinoo Kis nu Sol wê kehe yêp vac Bensamin ge, di i tu king mi viac he tiyi klismas kehe yuu. ²² Lêc Anutu kitya Sol lê king vël di vông i la lec Devit. Anutu nêl lec Devit bêga ên nêbê, ‘A xê Jesi nu Devit di a xêgyaa vin lec i, ên i ge xomxo wê ob vông yuac vihati tiyi xochê a nêl ge.’

²³ “Mêd Anutu hilu kiyang nêbê Devit bue paha ti obêc lam hôm xomxo Islel lec. Om Yesu lam vông kiyang tyo vô nôn lec.

²⁴ “Di buc wê Yesu gên o lam lêm ge, Jon nêl kiyang vô he Islel vihati ên nêbê he i pilepac he di lipac mia. ²⁵ Vô kwabo lec wê Jon yuac ob pyap ge om Jon nêl ên nêbê, ‘Xam xovô ên xam nêb a letya? A o xomxo ti wê xam dô bin ge lêm. Xomxo ti obêc val timuêن, di a o niviha wê a obêc piwelac su vêl ên i vixa ge lêm.’

²⁶ “Jon nêl bêge, om xam lige wê xam tu Eblaham nue gee hixôn xam tibii ba wê xam xona ên Anutu gee, xam ngô lê. Kiyang wê Anutu nêl nêb ob hôm il lec ge, Anutu vông i lam pyap vô il. ²⁷ Ên xomxo Jelusalem hixôn he nêن xomxo levac, he o xovô Yesu lêm, di he o xovô plopete kiyang wê he mi kitong vô buc sabat ge kehe lêm. Om he vông kiyang vô Yesu nêb ob hi i yib, lêc môt wê he vông ge vông plopete kiyang vô nôn lec. ²⁸ He o tulec i nêن nipaêن ti lêm, lêc he kitaa Pailat ên nêb i hi i yib. ²⁹ He vông i tiyi kiyang vihati wê plopete kivuu lec Yesu ilage, nang dêc he kwax Yesu ninivi vêl ên xax pola di kô mi la lii vac lôva. ³⁰ Lêc Anutu tipi vô i kidi lec vac yibêن ³¹ di buc tibeac Yesu hilung i vô he wê he mi la hixôn i gê Galili mi la Jelusalem ge. Di gwêbaga xomxo tigee nêl Yesu kehe kitong vô lie Islel.

³² “Om xe ob nêl xolac niviha vô xam bêga bê kiyang wê Anutu hilu vô buge ilage, ³³ Anutu vông kiyang tige vô nôn lec vô he bue il, ên wê tipi vô Yesu kidi lec vac yibêن ge. Tiyi xocbê kiyang wê yêp vac Sam ngwe wê vông yuu lec ge bêga nêbê,

‘Ông ge a nug ông, di gwêbaga a vông ông lêm vô levac.’

³⁴ “Anutu tipi vô Yesu kidi lec vac yibêن om Yesu ob yib i tii vac mi ninivi pital lêm, tiyi xocbê kiyang wê Anutu nêl ilage ên nêbê,
‘Vizid niviha wê a nêl vô Devit ge a ob vông i vô nôn lec vô xam.’

³⁵ “Di kiyang ti yêp vac Sam ngwe bêga nêbê,

‘Ông ob sea num ngibua ninivi i loc pital lêm.’

³⁶ “Il xovô ên il nêbê Devit vông i tiyi kiyang wê Anutu nêl vô i vô buc wê dô mavîha gê kibun ga ge, lêc yib di he yev i hixôn mae bue di i ninivi pital. ³⁷ Lêc xomxo ti wê Anutu tipi vô i kidi lec vac yibêن ge ninivi o pital lêm. ³⁸ Om xam lige, xam vyac xovô kiyang wê xe nêl vô xam bêga bê xomxo tige wê ob kitya xam nêm nipaêن vêl. ³⁹ Xolac wê Moses vông ilage o tiyi wê ob kitya xam nêm nipaêن vêl ge lêm. Lêc Yesu ge, xomxo ti obêc vông i vin i ge od Anutu obêc piwelac i vêl ên nipaêن di vông i dô niviha. ⁴⁰ Om xam xona nêm di viac xam, ên kiyang wê plopete kivuu ilage i o lêc tulec xam lêm, kiyang wê nêl bêga nêbê,

⁴¹ ‘Xam wê xam so vyam vô Anutu kiyang ge, xam wê di yetac di nga vigêm vac myam, lêc xam obêc wib mi la vac nipaêن. Ên yuac ti wê a vông vô buc wê xam dô ge, xomxo obêc nêl kitong vô xam lêc xam ob vông i vin lêm.’”

⁴² Pol nêl kiyang pyap di yuu Banabas nêb ob la vixun, lêc xomxo kitaa yuu ên nêbê, “Muu lôm lec sabat ngwe timuêن ên lôm nêl kiyang tige i tii vac.” ⁴³ He vihati lop mi la vixun, mêd he Yuda hixôn tibii wê vông i vin Anutu di mi timu vô Yuda môt gee he tibeac timu vô Pol yuu Banabas vixa. Mêd yuu viac kiyang vô he ên nêbê he i dô vac vizid wê Anutu vông ge.

⁴⁴ Vô buc sabat ngwe timuêن xomxo wê dô vigwe tige vihati kitucma ên nêb ob ngô Anutu xolac. ⁴⁵ Lêc he Yuda yê wê xomxo tibeac kitucma

vô Pol yuu Banabas ge om he xêyaa vô nipaên vô yuu dì he so vya vô Pol hixôn xolac wê nêl ge. ⁴⁶ Léc Pol yuu Banabas xonaên ma dì yuu nêl kiyang xêkizêc vô he ên nêbê, “Ge niviha wê xe nêl Anutu xolac vô xam Yuda taxlee, léc xam vô nimim vô, om tiyi xocbê xam nêl ên xam nêbê xam o tiyi wê xam ob dô mamviha luta léc luta ge lêm. Om xam ngô lê. Gwêbaga xe ob sea xam dì la vô tibii wê o Yuda lêm gee, ⁴⁷ ên Apumtau nêl vô xe ên nêbê,

‘A ob vông ông loc tiyi xocbê ngwax wê ob linac vô he wê o Yuda lêm ge, dì ông ob hilung môp maviha dôen vô xomxo kibun ga vihati.’”

⁴⁸ Xomxo wê o Yuda lêm gee ngô kiyang wê Pol nêl ge dì he xêyaa vô niviha yang dì he pimil Apumtau xolac, mêd he wê Anutu vînoo he ên nêb he ob dô maviha luta léc luta gee he vihati vông i vin.

⁴⁹ Mêd Apumtau xolac la vô levac vac vigwe tigee vihati. ⁵⁰ Léc he Yuda vông vêx wê lê levac wê mi kitaa vô Anutu gee hixôn xomxo levac vac vigwe tigee he nilô kidi lec nêb ob hi Pol yuu Banabas, om he vông viyin vô yuu dì tii yuu la vêl ên he ben. ⁵¹ Om yuu lîlloo vijuva vêl ên vixa pîthe ên nêbê he i xovô bê he nêl nipaên yêp vô he. Mêd yuu loc dì la vigwe Aikoniam. ⁵² Dì xomxo vông vinêr wê dô Antiock gee he xêyaa vô niviha dì Myakilôhô Ngibua hivun he xôn.

14

Pol yuu Banabas nêl xolac gê Aikoniam

¹ Gê vigwe Aikoniam Pol yuu Banabas vông i tiyi wê yuu vông gê Antiock ge. Om yuu la vac xumac lilo wê he Yuda vông ge dì nêl kiyang hixôn xêkizêc, om Yuda hixôn tibii ba he tibeac vông i vin Yesu. ² Léc he Yuda wê o vông i vin lêm ge nêl kiyang vaxvax lec xomxo vông vinêr om vông tibii wê o Yuda lêm gee he xêyaa vô nipaên vô xomxo vông vinêr. ³ Mêd Pol yuu Banabas dô Aikoniam buc dia tyâ dì nêl Apumtau xolac hixôn xêkizêc, dì Apumtau vông xêkizêc vô yuu tiyi wê yuu ob vông do levac toto ya ge, ên nêbê xomxo i yê dì xovô bê kiyang wê yuu nêl lec xêyaa vin lecén wê Apumtau vông ge, kiyang nôn vixôhilôg. ⁴ Léc xomxo wê dô vigwe tigee hibu he la yuu, vilu vông i vin he Yuda di vilu vông i vin sinale. ⁵ Mêd he Yuda hixôn tibii ba kidi lec hixôn lie levac, ên nêb he ob vông viyin vô Pol yuu Banabas dì nêx yuu ya ngidax mi yuu i yib. ⁶ Léc yuu ngô wê he nêb ob hi yuu ge om yuu pec mi la Listla yuu Debi wê yêp vac vigwe levac Likionia ge, dì la vigwe wê yêp kwabo ge ya hixôn. ⁷ Mêd yuu nêl xolac vac vigwe tigee vihati.

Pol yuu Banabas nêl xolac gê Listla

⁸ Xomxo vux ti dô vigwe Listla, léc ta kô i dì vixa vô xêlehelehe dì o mi vilee ti lêm. Mi dô kizêc. ⁹ Mêd xomxo tyo ngô kiyang wê Pol nêl ge mêd Pol yê i xêkizêc dì xovô nêbê tyo vông i vin tiyi wê ob vông i vô niviha lec ge, ¹⁰ om nêl vya levac ên nêbê, “Ông kidi lec mi le kisii.” Mêgem tyo lec lutubid dì vilee mi la.

¹¹ Tibii tibeac yê wê Pol vông xomxo tige vô niviha lec ge om he tyuc vac Likionia vya ên nêbê, “Anutu tu xomxo manôn dì lop mi lam vô il.”

¹² Om he nêl he anutu kibun ga yuu lê lec Banabas yuu Pol, om nêl lê Sus lec Banabas dì nêl lê Hemis lec Pol, ên Pol ge wê mi nêl kiyang tibeac.

¹³ Xumac ngibua wê Sus vông ge yêp kwabo vô vigwe tige ninya. Mêd

xomxo wê mi si daa vô Sus ge ti la kô bwoc levac vux ya hixôn ngaola di kô mî la vô vuayen ên xomxo nêb ob hi bwoc levac mî tung daa vô yuu.
¹⁴ Lêc Banabas yuu Pol ngô kiyang tige om yuu nilô viyin di yuu lêx ngakwi wê yuu vông ge sea di tup mî la le vac xomxo mahigun di nêl via levac ên nêbê, ¹⁵ “Xamê, bêna lêc xam vông môp tibêge? Xii ga xomxo kibun ga xocbê xam ge. Lêc xii lam ên xii nêb xii ob nêl kiyang niviha vô xam bê xam sea susu nôn maên tige di pilepac nilôm i loc vô Anutu mavîha wê tung lag yuu kibun di gwec hixôn susu vihati yang ge. ¹⁶ Vixôhilôg, vô buc ilage xomxo vac vigwe vihati vông i tiyi xovôén wê heche va vông ge, di Anutu o le vac xôn lêm. ¹⁷ Lêc Anutu o xôpac ên xomxo di vông he lungên i lêm. Nge, vông môp niviha vô il, xocbê vông lun lam gê kisii di vông yaên vô nôn tibeac, om vông yaên tiyi xam di vông xam xêmyaa vô niviha.”

¹⁸ Yuu nêl kiyang tige vô he, lêc he vô xêkizêc nêb he ob tung daa vô yuu, om yuu nêl kiyang tige tii vac vac om he o tung daa vô yuu lêm.

He nêx Pol ya ngidax

¹⁹ Mêd Yuda ya lam gê Antiok yuu Aikoniam di val pilepac xomxo nilô om he nêx Pol ya ngidax di didii i mî la vigwe ninyawehe ên he xo ên he nêb Pol yib. ²⁰ Lêc xomxo vông vinên val le ngivina Pol di i kidi lec di lax viyangtôv, di vigwe vidiiên ge yuu Banabas la vigwe Debi.

²¹ Yuu nêl xolac vô tibii Debi di he tibeac vông i vin. Pyap dêc yuu lax mi la Listla yuu Aikoniam di Antiok tii vac nang. ²² Yuu ngidu xomxo vông vinên xôn ya kiyang di nêl kiyang xêkizêc vô he ên nêbê, “Xam le xêkizêc vac vông vinên di xam o lêc sea lêm. Il ob kô viyin tibeac tax êdêc la dô vac Anutu ben timuên.” ²³ Mêd vac vigwe vihati yuu vinoo gyovixa wê ob viac xomxo vông vinên ge mêd yuu ngibua yaên di kitaa lec he vihati ên nêb Anutu ti wê he vông i vin ge i viac he.

Polyuu Banabas lax mi la Antiok vac vigwe levac Silia

²⁴ Pol yuu Banabas la vîlee vac vigwe Pisidia di la vac vigwe levac Pampilia ²⁵ di la nêl Anutu xolac vô tibii Pega. Pyap dêc loc mî la Atelia, ²⁶ di lec sip di lax mi la Antiok. Antiok ge wê ilage xomxo vông yuu vac Anutu vigê nêb i viac yuu di yuu vông yuac. Mêd yuu vông yuac tyo pyap om yuu lax mi la Antiok. ²⁷ Yuu val Antiok mêd kituc xomxo vông vinên di nêl yuac vihati wê Anutu ngidu yuu xôn ge kitong vô he di nêl hixôn ên nêbê, “Gwêbaga Anutu vông tibii wê o Yuda lêm ge he ngô xolac hixôn di vông i vin.” ²⁸ Mêd yuu dô buc ya hixôn xomxo vông vinên tigee.

15

Xomxo vông vinên kitucma gê Jelusalem

¹ He Yuda wê dô Judia gee he ya la Antiok di la nêl vô xomxo vông vinên bêga nêbê, “Xam obêc gôl nimnivi tiyi xolac wê Moses vông ilage lêm ge od o tiyi wê Anutu ob kô xam lec ge lêm.” ² He nêl bêge lêc Pol yuu Banabas yê kiyang tige tiyiên ma om he ngaênma levac lec kiyang tige. Om xomxo vông vinên vinoo Pol yuu Banabas hixôn xomxo ya ên nêb he i loc Jelusalem vô Yesu nue ngivihi yuu gyovixa ên he i titô kiyang wê he ngaênma lec ge.

³ Xomxo vông vinên vông he la, om he la môp Jelusalem di la vac vigwe toto vac Pinisia yuu Samelia di he nêl lec wê tibii wê o Yuda lêm gee tibeac

pilepac nilô di vông i vin Yesu ge kitong vô xomxo vông vinên, om he wê ngô kiyang tige, he xêyaa vô niviha.

⁴ Mêđ he mila tyip Jelusalem di xomxo vông vinên hixôn Yesu nue ngivihi di gyovixa, he kô Pol yuu Banabas he lie lec niviha. Mêđ Pol yuu Banabas nél yuac vihati wê yuu vông di Anutu ngidu yuu xôn ge kitong vô he. ⁵ Lêc Palisi ya wê vông i vin Yesu ge he kidi lec di nél ên nêbê, “Xomxo vông vinên wê o Yuda lêm gee, xam gôl he ninivi di nél vô he bê he i timu vô xolac wê Moses vông ge.”

⁶ Mêgem Yesu nue ngivihi hixôn gyovixa kitucma ên nêb ob viac kiyang tige. ⁷ He nél kiyang tibeac lec kiyang tige, pyap dêc Pita kidi lec di nél vô he ên nêbê, “Xam lige, xam xovô pyap ên xam nêbê ilage Anutu vinoo a vac xam mahigun ên nêb a la nél xolac vô tibii wê o Yuda lêm gee ên he i ngô di vông i vin. ⁸ Mêđ Anutu wê xovô il vihati nilôd ge vông Myakilôhô Ngibua vô he tiyi xocbê vông vô il Yuda ilage. Om il xovô ên il nêbê Anutu yê he niviha. ⁹ Di Anutu o vông môt bangwe vô il Yuda di vông bangwe vô he tibii ba lêm. Nge, he vông i vin om Anutu vông he vô paha lec. ¹⁰ Di bêna lêc xam nêb xam ob yaxên Anutu? Moses xolac vông viyin vô buge ilage di il gwêbaga hixôn, di il o tiyi wê il ob kilê viyin tige lêm. Di bêna lêc xam nêb xam ob lii viyin tige lec he wê o Yuda lêm ge hixôn? ¹¹ Il vông i vin ên il nêbê xêyaa vin lecén wê Apumtau Yesu vông ge ob vông il dô madviha di he êno ob dô maviha.”

¹² Pita nél bêge mêđ Yesu nue ngivihi hixôn gyovixa dô kiyang maên di ngô kiyang wê Pol yuu Banabas nél ge, om yuu nél lec do levac wê Anutu ngidu yuu xôn di yuu la vông vac tibii madiluhu ben ge.

¹³ Yuu nél kiyang pyap mêđ Jems nél ên nêbê, “Xam lige, xam ngô kiyang wê a ob nél ge. ¹⁴ Saimon Pita nél vô xam gwêba ên nêbê taxlee Anutu xo tibii wê o Yuda lêm ge ên nêb ob vinoo he ya tu i nue. ¹⁵ Di kiyang wê he plopete kivuu ilage nél kiyang tige bêga nêbê,

¹⁶ ‘Apumtau nél ên nêbê, “Timuên ge a obêc vena, di Devit xumac wê kipê ge a ob vena lox paha vac. Di susu wê vô nipaên vac xumac ge, a ob viac vô i tii vac. ¹⁷ Om he wê o Yuda lêm ge, he ob vông yuac lec myagên Apumtau. He ge wê a vinoo he ên a nêb he i tu a nuge.”

¹⁸ Kiyang tige Apumtau via wê nél ilage mi i yêp.’

¹⁹ “Mêgem xovôen wê a vông ge bêga nêbê il ob vông viyin tibeac vô tibii ba wê pilepac he ge lêm. ²⁰ Lêc il ob kivuu kipihac i loc vô he bêga bê he i kol he ên yaên wê xomxo tung i tu daa vô anutu kityooên ge, di he i o lêc vông môt yôdac vêx yuu vux lêm, di he i ya lilii wê he ngibina kwa di hi dô vac nilô ge lêm, di he yaên hi i ma. ²¹ Èn kiyang wê yêp vac Moses xolac ge, xomxo mi nél xolac tige vac vigwe vihati di xomxo mi kitong xolac tige vac xumac lilo tiyi buc sabat vihati. Môt tige yêp ilage di i val tyip lec gwêbaga hixôn.”

Yesu nue ngivihi hixôn gyovixa vông kipihac la vô tibii vông vinên wê o Yuda lêm gee

²² Mêgem Yesu nue ngivihi hixôn gyovixa hixôn xomxo vông vinên vihati nêb ob vinoo lie ya ên vông he i loc hixôn Pol yuu Banabas mi loc Antiok. Om he vinoo Judas wê lê ngwe nêbê Basabas ge yuu Sailas, ên yuu ge xomxo levac wê he Yuda vông ge. ²³ Yuu kô kipihac wê Yesu nue ngivihi hixôn gyovixa kivuu bêga nêbê, “Yesu nue ngivihi hixôn gyovixa

kivuu kipihac tiga dì vông i loc vô xam tibii Antiok yuu Silia dì Silisia wê xam vông i vin Yesu gee. ²⁴ Xe ngô wê xomxo ya kidi vac xe mahigun di loc juda xam nilôm ya kiyang dì vông xam nilôm vô viyin. Lêc xe o vông he loc vô xam lêm. ²⁵ Mégem xe kitucma dì hilu kiyang bêga ên xe nêbê xe ob vinoo xomxo yuu i loc vô xam hixôn il lig Pol yuu Banabas wê xe xêmyaa vin lec yuu ge. ²⁶ Pol yuu Banabas o xona ên wê xomxo nêb ob hi yuu yib lec Yesu Kilisi lê ge lêm. ²⁷ Om xe vông Judas yuu Sailas loc vô xam dì yuu ob nêl kiyang tiga hixôn vô xam. ²⁸ Myakilôhô Ngibua dô hixôn xe dí xe hilu kiyang bêga ên xe nêbê xe ob vông viyin tibeac vô xam lêm. Dom môt wê xam ob timu vô ge bêga bê ²⁹ xam kol xam ên susu yaén wê xomxo kô mi la tung i tu daa vô anutu kityooen ge, dì xam waén hi i ma, dì xam o wa lili wê xomxo ngibina kwa dì hi dô vac nilô ge lêm, dì xam o lêc vông yôdac vêx yuu vux lêm. Xam obêc sea môt nipaên tige, od obêc niviha. Vidiên xam. Xam dô niviha.”

³⁰ Mêt xomxo vông vinên vông he la mêt he mîla Antiok di kituc xomxo vông vinên vihati dì vông kipihac tyo vô he. ³¹ He kitong kipihac pyap dì he xêyaa vô niviha ên kiyang niviha wê yêp vac kipihac ge. ³² Judas yuu Sailas ge plopete yuu om yuu nêl kiyang tibeac mangwe vô he ên nêb i ngidu he xôn dì he i vông i vin xêkizêc. ³³ Mêt Judas yuu Sailas dô Antiok buc dia hixôn he. Pyap dêc lie Antiok nêl kiyang niviha vô yuu di vông yuu lax vô he Jelusalem wê vông yuu lam ge. ³⁴ [Lêc Sailas nêb ob dô Antiok om dô.] ³⁵ Mêt Pol yuu Banabas dô Antiok, dì yuu hixôn xomxo tibeac mangwe nêl Apumtau xolac kitong vô he Antiok.

Pol yuu Banabas seama

³⁶ Buc ya la vêl dì Pol nêl vô Banabas ên nêbê “U ob lax mi la vô lige wê u la nêl Apumtau xolac vac he ben ilage, dì tup vac he mi xê bêc he dô niviha, me?” ³⁷ Mêt Banabas nêb Jon Mak i loc hixôn yuu, ³⁸ lêc Pol nêl ên nêbê, “Jon Mak sea u gê Pampilia ilage dì o vông yuac ti hixôn u lêm, om ob la hixôn u lêm.” ³⁹ Om yuu nêlma lec kiyang tige dì seama, om Banabas kô Mak dì yuu lec sip mi la vigwe Saiplas, ⁴⁰ dì Pol kô Sailas ên nêb yuu ob la, om lie vông vinên vông yuu vac Apumtau vigê ên nêb i viac yuu. ⁴¹ Mêt yuu la vac vigwe Silia yuu Silisia vihati dì ngidu xomxo vông vinên xôn.

16

Timoti la hixôn Pol

¹ Pol kidi vac Antiok di la Debi yuu Listla mi la tulec xomxo vông vinên ti lê nêbê Timoti. Timoti ta ge vêx Yuda ti wê vông i vin Yesu ge, dì ma ge tibii Glik ti. ² Mêt Timoti lie vông vinên vac vigwe Listla yuu Aikoniam gee nêl i kitong nêbê i xomxo niviha. ³ Mégem Pol nêb Timoti i loc hixôn i om kô Timoti mi la gôl ninivi tiyi môt wê he Yuda vông ge. Pol xo he Yuda dì vông môt tige, ên he Yuda vac vigwe tige vihati, he xovô wê Timoti ma ge tibii Glik. ⁴ Mêt he la tup vac vigwe vihati di nêl kiyang wê Yesu nue ngivihi hixôn gyovixa hilu gê Jelusalem ge kitong vô xomxo vông vinên ên nêb he i timu vô. ⁵ Om xomxo vông vinên vac konglegesen vihati vông i vin xêkizêc di naba levac wê he vông ge le lec mi la kisii tiyi buc vihati.

Pol yê vivia lec wê xomxo Masedonia tyuc i ge

⁶ Myakilôhô Ngibua le vac he xôn ên nêb he i o nêl xolac vô tibii Esia lêm, om he la tup vac vigwe Plisia yuu Galesia. ⁷ Mêd he mila vigwe Misia dì xo nêb he ob la vigwe Bitinia, lêc Myakilôhô Ngibua wê Yesu vông ge le vac he xôn nêb he locên Bitinia i ma. ⁸ Mêgem he luu Misia vêl dì la Tloas. ⁹ Mêd vô bucên tige Pol yê vivia ti nêbê xomxo Masedonia ti le kisii di kitaa i ên nêbê, “Ông sox lam Masedonia ên lam hôm xe lec.” ¹⁰ Pol yê vivia tige pyap mêt lutibed a, Luk, hixôn he, xe myag môp wê xe ob la Masedonia ge, ên xe xovô ên xe nêbê Anutu keac xe ên nêb xe la nêl xolac vô tibii viyang tiganê.

Pol la vigwe Pilipai di Lidia vông i vin

¹¹ Mêgem xe lec sip gê Tloas di la bôbac vô vigwe Samotles. Mêd xe xêp di vidiién xe kô sip mi la Niapolis. ¹² Mêd xe sea Niapolis di mila vigwe levac Pilipai wê yêp vac vigwe levac Masedonia ge. Vigwe tige tibii Lom viac. Xe dô vigwe tige buc ya, ¹³ dì buc sabat xe sea vigwe nilô dì mila vô mia ên xe xo ên xe nêb mêt vigwe wê xomxo mi kitaa lec ge yêp vô mia tige. Mêgem xe mila vô vêx ya wê kitucma mi xeedô ge, om xe la dô hixôn he di nêl xolac vô he. ¹⁴ Vêx ti lê nêbê Lidia ngô kiyang tige. Lidia lam gê vigwe Taiataila di mi vông yuac bisnis lec nivimihi hi. Lidia mi kitaa vô Anutu di Apumtau pilepac i nilô dì i vô ninja vô kiyang wê Pol nêl ge. ¹⁵ Mêd Lidia hixôn xomxo wê mi dô hixôn i ge he vihati lipac mia. Mêd Lidia nêl vô xe ên nêbê, “Xam obêc wê bêc a vông i vin Apumtau nôn ge od xam lam dô vac a bog.” Nêl kiyang xêkizêc vô xe om xe la dô hixôn i.

Pol yuu Sailas la dô vac xumac kalabuhu gê Pilipai

¹⁶ Buc ti xe nêb xe ob la vigwe ti wê xomxo mi kitaa vac ge, lêc xe mila tulec vêx yuac ti vac môp. Vêx tige, vimwo nipaên dô vac nilô dì nêl kiyang vihati kitong om xomxo wê vêx tige vông yuac vô he ge, he kô mone levac lec kiyang wê vêx tige mi nêl ge. ¹⁷ Mêd vêx tige timu vô xe hixôn Pol vixam di tyuc ên nêbê, “Tibii tigae, Anutu ti wê luu baba vêl ge nue yuac, om he lam nêl môp wê Anutu ob vô xam vêl ên nipaên ge kitong vô xam.” ¹⁸ Vêx tyo nêl kiyang tibêge tiyi buc tibeac om Pol ni nyag vô i di pop di nêl vô vimwo nipaên ên nêbê, “A nêl lec Yesu Kilisi lê bêga bê ông lop mi loc vêl ên vêx tige.” Mêgem lutibed vimwo nipaên lop mi la vêl ên vêx tige.

¹⁹ Mêd xomxo levac wê vêx tige vông yuac vô he ge he yê dì xovô nêbê he ob kô mone ti tii vac lêm, om he hôm Pol yuu Sailas xôn dì kô yuu mi la vô xomxo levac vac vigwe wê he mi kitucma vac ge. ²⁰ He kô yuu mi la vô gavman levac manôn dì nêl vô he ên nêbê, “Xomxo yuu ga, Yuda yuu. Yuu lam il bed ga nêb ob vông il vô nipaên. ²¹ Om yuu nêl kiyang ya lec môp wê gavman vibu ên nêb il Lom ob timu vô lêm ge.” ²² Mêd tibii wê lam kitucma gee vihati so vya vô Pol yuu Sailas, dì gavman levac tigeelêx yuu nêngakwi dì nêl ên nêb xomxo i pisa yuu. ²³ Mêd he hi yuu mi yuu kô myavinê levac, pyap dêc vông yuu la vac xumac kalabuhu di nêl xêkizêc vô xomxo ti wê mi viac xumac kalabuhu ge ên nêb i yê yuu xôn. ²⁴ Mêd xomxo tige ngô kiyang wê he nêl xêkizêc vô i ge, om kô yuu mi la tung vac xumac nilô wê yêp mahigun ge di ving yuu vixa xôn ya plang.

²⁵ Vô vivuaên mahigun Pol yuu Sailas kitaa di vông lilo vô Anutu, di tibii vihati wê dô vac xumac kalabuhu gee he ngô hixôn. ²⁶ Lêc lutibed ngiyêg levac ti val di xumac kalabuhu yoc, di lutibed vuayen vihati tax di sen wê

dô lec tibii kalabuhu vigê gee tul vêl ên he. ²⁷ Om tibii ti wê viac xumac kalabuhu ge kidi lec, lêc yê wê vuayen vihati tax mì la le myadongên ge, dì xo ên nêbê tibii kalabuhu pec mì la, om loc hôm yipac nêb ob hi ici va yib. ²⁸ Lêc Pol keac vya levac vô i ên nêbê, “Hiên ông i ma, ên xe vihati dô.” ²⁹ Om xomxo tyo keac dì he dii ngwax mì lam, dì i tup mì la vô Pol yuu Sailas vac xumac lôma dì la yev vixa kitu vô yuu hixôn ni yetacên. ³⁰ Mêd kô yuu mi la vixun dì kinêg vô yuu ên nêbê, “Xomxo levac muue, a ob vông bêna êdêc Anutu i hôm a lec?”

³¹ Om yuu nêl lax vô i ên nêbê, “Ông vông i vin Apumtau Yesu dì Anutu ob hôm ông lec hixôn vinême nume.” ³² Mêd yuu nêl Apumtau xolac vô xomxo tige hixôn xomxo vihati wê mi dô vac i ben gee. ³³ Vô buc tibed tige xomxo tige kô yuu mì la lipac yuu ninivi wê tibii hi i vô kityax ge. Di Pol yuu Sailas lipac xomxo tige hixôn vinê nue vihati. ³⁴ Pyap dêc xomxo tyo kô yuu mi la vac ben xumac lôma dì la vông yaên vô yuu, dì he vinê nue vihati xêyaa vô niviha ên wê he vông i vin Anutu ge.

³⁵ Vigwe vidiiê titige gavman levac vông nue xêhipu val dì he nêl ên nêbê, “Ông piwelac xomxo yuu ge dì vông yuu i loc.” ³⁶ Om xomxo wê viac xumac kalabuhu ge la nêl vô Pol ên nêbê, “Gavman levac vông kiyang lam ên nêbê muu loc, om muu loc hixôn xêmyaa niviha.”

³⁷ Lêc Pol la nêl vô xêhipu ên nêbê, “Xii ga tibii Lom yuu, lêc he hi xii vô xomxo tibeac manôn dì vông xii la dô vac kalabuhu vidaaên. Dì he o tulec soën wê xii vông ge ti lêm, dì gwêbaga he nêb he ob vông xii la kiyang maén. Ge o tiyi lêm. Om heche va i lam kô xii mì loc.”

³⁸ Mêd xêhipu lax nêl kiyang tige vô gavman levace om he ngô dì xona mabu ên bo ti wê nêl ên nêbê yuu ge tibii Lom yuu. ³⁹ Om he la nêl kiyang malehe vô yuu ên nêbê, “Xe vông i so vô muu,” mêd kô yuu mì he la vixun dì nêl vô yuu ên nêbê, “Muu sea vigwe ga dì loc.” ⁴⁰ Pol yuu Sailas sea kalabuhu dì la vac xumac Lidia vông, dì yuu yê lie vông vinên dì nêl kiyang wê ob ngidu he xôn ge ya vô he, pyap dì yuu la.

17

Xomxo Tesalonaika nêb ob hi Pol yuu Sailas

¹ Pol yuu Sailas sea vigwe Pilipai dì la vigwe Ampipolis dì la vigwe Apolonia. Nang dì yuu mila vigwe Tesalonaika. Xumac lilo wê he Yuda vông ge ti le vac vigwe tige, ² om Pol la vac xumac tige tiyi xocbê mi la vac ya ilage, om la vac xumac tige lu yon lec buc sabat dì he Yuda nêlma lec kiyang wê yêp vac kipihac xolac ge. ³ Mêd Pol nêl xolac kehe kitong vô he dì nêl ên nêbê, “Kilisi ti wê xam dô bin ge, Anutu tyuc lec nêb ob kô myavinê dì yib dì kidi lec mavîha vac yibê. Om Yesu wê a nêl i kitong vô xam gwêbaga ge, ge Kilisi tyo tige.” ⁴ Mêd xomxo wê ngô kiyang gee he ya vông i vin kiyang wê Pol nêl ge om he timu vô Pol yuu Sailas vixa, dì tibii Glik wê mi kitaa vô Anutu gee hixôn tibii levac vinêe, he tibeac vông i vin hixôn.

⁵ Lêc he Yuda xêyaa vô myavinê vô yuu om he la kô tibii nipaên wê mi dô vax vac vigwe tigee mêd he kituc xomxo tibeac dì he xôn vông nididun levac vac vigwe Tesalonaika, dì la ka bua ên xumac wê Jeson vông dì myag Pol yuu Sailas ên nêb ob kô yuu mi la vô xomxo levac. ⁶ Lêc he o yêvô yuu lêm, om he didii Jeson hixôn lie vông vinên ya mì la vô gavman levac wê

viac vigwe Tesalonaika ge, dì nêl vô he ên nêbê, “Xomxo yuu wê la vac vigwe vihati mi la vông xomxo vô nipaên ge yuu val dô ga vac il bed.⁷ Dì Jeson ga kô yuu mi la vac i ben di he pwoo king Sisa kiyang vac dì nêl ên nêbê king ngwe dô lê nêbê Yesu.”⁸ Mêd gavman levac hixôn xomxo vihati ngô kiyang tige dì yetac mabu.⁹ Mêd he nêl vô Jeson he lie ên nêb he i kisuu kot, pyap dì he la.

Pol yuu Sailas la vigwe Belia

¹⁰ Vô bucên tige xomxo vông vinên vông Pol yuu Sailas la, dì yuu la vigwe Belia. Yuu mila Belia mêd la vac xumac lilo wê he Yuda vông ge.¹¹ He Yuda wê dô Belia gee he vô ninya lehe vô xolac luu Yuda wê dô Tesalonaika gee vêl, om he hôm kiyang wê yuu nêl ge lec niviha dì he mi kitong kiyang wê yêp vac kipihac xolac ge tiyi lec buc vihati ên nêb ob xovô bê kiyang wê yuu nêl ge, ge kiyang nôn, me?¹² Mêgem he Yuda tibeac, he vông i vin, di Glik levac wê dô hixôn he gee, vêx yuu xôn vux tibeac vông i vin hixôn.¹³ Lêc he Yuda wê dô Tesalonaika gee ngô wê Pol la nêl Anutu xolac gê Belia ge, om he la Belia dì la nêl kiyang vaxvax ya vô he Belia om vông he yetac dì xêyaa vô myavinê vô Pol.¹⁴ Om lutibed xomxo vông vinên vông Pol la gwec ninya dì Sailas yuu Timoti dô Belia.¹⁵ Mêd xomxo wê la hixôn Pol ge kô i mi la Atens, pyap dì he lax mi la ben Belia, lêc Pol vông kiyang vô he nêbê Sailas yuu Timoti i loc lutibed vô i.

Pol nêl xolac vô tibii Atens

¹⁶ Pol dô bin Sailas yuu Timoti gê Atens, lêc yê wê anutu kityooê tibeac dô vac vigwe tige om vông i nilô vô viyin.¹⁷ Mêgem Pol la vac xumac lilo wê he Yuda vông ge di he Yuda hixôn tibii ba wê vông i vin Anutu ge, he Pol nêlma lec xolac. Di buc vihati Pol la nêl kiyang vô xomxo wê kitucma mi dô lec wetôv ge.¹⁸ Om tibii wê vông i vin kiyang ti nêbê Epikulian ge hixôn he wê vông i vin kiyang wê nêbê Stoik ge he Pol ngaénma lec kiyang, dì he ya nêl lec Pol ên nêbê, “Xomxo ti wê nêl kiyang vaxvax ge nêb ob nêl kiyang vatya vô ilé?” Di he ya nêl ên nêbê, “Mêd ob nêl kiyang lec anutu wê xomxo ya vông.” He nêl bêge, ên he ngô xolac wê Pol nêl lec Yesu wê kidi lec vac yibén ge.¹⁹ Om he kô Pol mi la vô kaunsil wê mi kitucma lec kitôn Aliopagas ge, dì he nêl vô Pol ên nêbê, “Xe ob ngô kiyang paha wê ông nêl vô xomxo ya ge.²⁰ Ên kiyang wê ông nêl ge, xe ngô di yaxên lêc ge kiyang ba ti wê xe lungên ge, om ông nêl kiyang tyo kehe kitong ên xe ngô.”²¹ Tibii Atens hixôn tibii wê la dô hixôn he gee, he mi kitucma tiyi buc vihati ên he nêb he ob ngô kiyang paha di nêl kiyang paña. Di he o vông yuac ti hixôn lêm. Nge, he dô vac môp tige tibed.

²² Om Pol kidi mi la le vac he kaunsil mahigun dì nêl vô he ên nêbê, “Xam tibii Atens. A xê wê xam vông yuac levac lec kitaaê vô anutu ya,²³ ên a tup vac vigwe wê xam vông ge dì a xê anutu wê xam mi kitaa vô ge, di a xê alta ti wê kiyang yêp lec bêga nêbê, ‘Alta tiga anutu wê xe lungên ge, ixe.’ Om Anutu tige wê xam lungên lêc xam mi kitaa vô ge, a ob nêl i kitong vô xam.

²⁴ “Anutu tige wê tung kibun hixôn susu vihati yang, dì i ge Apumtau wê viac lag yuu kibun om ob dô vac xumac wê xomxo lox ya vigê ge lêm.²⁵ Anutu ge, susu ti o ma ên i lêm, dì xomxo ti ob vông yuac ên ngidu i xôn lêm. Ên ici va vông myakilôhô hixôn maviha vô xomxo di vông susu tibeac vô he.²⁶ Taxlee Anutu tung xomxo tibed di xomxo vô tibeac lec,

mêd Anutu vông mì he dô lec kibun ga kidu kidu dì ici va vông buc vô he dì vông yôg vac kibun wê he ob dô lec ge. ²⁷ Anutu nêb xomxo vihati i vông yuac lec myagén i ên he obêc tulec i. Lêc Anutu o dô teva ên il lêm. ²⁸ Anutu ge wê vông xêkizéc vô il dì il dô madviha dì il vilee mì la dì lôm. Tiyi xocbê xam lime wê piyôp levac ge nêl ên nêbê, ‘Il vihati tu i nue.’ ²⁹ Il ga Anutu nue om il ob nêl bê Anutu ge tiyi xocbê susu wê xomxo vaci piyôp xovô, dì he tixuu lec gol yuu silva dì ngidax ge lêm. ³⁰ Ilage xomxo o xovô Anutu lêm, lêc Anutu o nêl kiyang ti lec he lêm. Lêc gwêbaga Anutu nêl kiyang vô xomxo vac vigwe vihati ên nêbê he i pilepac he. ³¹ Èn Anutu vinoo buc ti pyap, om obêc yaxên xomxo vihati nêl kiyang i yêp bôbac vô buc tige. Anutu vông yuac tige vac xomxo ti vigê om tipi vô xomxo tyo kidi lec maviha vac yibén, ên nêbê xomxo vihati i xovô bê Anutu vinoo xomxo tige vixôhilôg.”

³² Xomxo tigee ngô kiyang wê Pol nêl lec xomxo ti wê kidi lec maviha vac yibén ge, om he ya nêl kiyang manôn nipaén ya lec Pol, lêc he ya nêl ên nêbê, “Buc ti xe ob ngô kiyang tige i tii vac nang.” ³³ Pyap dêc Pol sea he dì la. ³⁴ Lêc xomxo ya vông i vin kiyang wê Pol nêl ge dì timu vô i vixa. He wê vông i vin ge ti lê nêbê Daionisias wê kaunsil vac vigwe Aliopagas ge ti, yuu vêx ngwe lê nêbê Damalis, dì xomxo ya hixôn.

18

Pol la vông yuac vac Kolin

¹ Pol sea Atens di la Kolin, ² dì mila tulec Yuda vux ti lê nêbê Akwila wê ben kehe Pontas ge. Ilage Akwila yuu vinê Plisila dô Lom wê yêp vac vigwe levac Itali ge, lêc king Klodias nêl ên nêbê he Yuda he i sea Lom. Om yuu sea Lom di la dô Kolin. Buc ya lam la vêl di Pol mila vô yuu, ³ lêc yê yuac wê yuu vông ge tiyi xocbê yuac wê i vông ge, om la dô hixônyuu di yon duu xumac sel di tibii kisuu. ⁴ Mêd buc sabat vihati Pol la vac xumac lilo wê he Yuda vông ge mì la nêl kiyang tibeac vô he, ên nêbê he Yuda hixôn tibii ba he i vông nilô i loc vô Yesu dì vông i vin.

⁵ Mêd Sailas yuu Timoti lam gê Masedonia dì val vô Pol, dì Pol nêl xolac vô he Yuda tiyi lec buc vihati dì nêl vô he ên nêbê, “Yesu ge Kîlisi wê Anutu vinoo i pyap ge.” ⁶ Lêc he Yuda pwoo Pol vya vac dì so vya vô i om Pol liloo vijuva vêl ên ngakwi wê i vông ge ên nêbê he i xovô nêl nipaén wê he vông ge, dì nêl vô he ên nêbê, “Xam obêc wib mì la vac nipaén ge od ge myaviwen wê xacxam va vông, ên a o vông nipaén ti vô xam lêm. Om gwêbaga a ob sea xam di la nêl xolac vô tibii madiluhu wê o Yuda lêm gee.” ⁷ Mêgem Pol sea he mì la dô vac tibii ti ben lê nêbê Tisias Jastas. Tisias ge mi kitaa vô Anutu, dì i xumac le kwabo vô xumac lilo wê he Yuda vông ge. ⁸ Dì xomxo levac ti wê mi viac he Yuda xumac lilo ge lê nêbê Klispas hixôn vinêe nue vông i vin Apumtau, dì tibii Kolin tibeac ngô xolac wê Pol nêl ge dì vông i vin dì lipac mia.

⁹ Vô bucén ti Anutu vông vivia ti lam vô Pol bêga nêbê, “Xonaén i ma. Ông nêl xolac dì le i o dô xôa maén lêm. ¹⁰ Èn a dô hixôn ông, om xomxo ti o tiyi wê ob vông ông vô nipaén ge lêm, ên xomxo wê tu a nuge ge tibeac dô vac vigwe tiga.” ¹¹ Om Pol dô Kolin tiyi klismas ti dì dentuc vigê vilu di sec ti, dì tixuu tibii Kolin ya Anutu xolac.

¹² Vô buc wê Galio tu gavman levac dì viac vigwe Glik ge he Yuda tibeac kitucma dì la hôm Pol xôn dì kô mì la vông kiyang vô ¹³ dì nêl ên nêbê, “Xomxo tiga tixuu xomxo lec môp kitaaën lê, léc la môp bangwe dì o tiyi xocbê xolac wê xe vông ge lêm.” ¹⁴ Mêd Pol nêb ob nêl kiyang, léc gavman levac Galio nêl vô he Yuda ên nêbê, “Xam Yuda, xomxo tiga obêc pwoo kiyang wê gavman vông ge vac, me obêc vông môp nipaén ya ge od a ob ngô kiyang wê xam nêl ge. ¹⁵ Léc xam lam kinêg a lec kiyang hixôn lê dì xolac wê xacxam va vông ge, om xacxam va kô xam kiyang mì loc viac, ên a ob ngô kiyang tibêge lêm.” ¹⁶ Mêd Galio tii he vêl ên kot, ¹⁷ dì he la hôm xomxo levac wê mi viac Yuda xumac lilo ge ti lê nêbê Sostenis xôn dì kô mì la hi vô gavman levac Galio manôn dì Galio yê lêc o nêl kiyang ti lec lêm.

Pol lax mi la Antiok wê yêp vac vigwe levac Silia ge

¹⁸ Pol dô Kolin buc ya, nang dêc sea xomxo vông vinên tigee, dì Pol hixôn Plisia yuu Akwila yon la Senklia ên nêb ob lec sip mì la Silia. Gê Senklia Pol hilu kiyang ti vô Anutu om kiping bazub lihi. ¹⁹ Yon mila Epesas, dì Pol sea yuu dô dì la vac xumac lilo wê he Yuda vông ge dì la nêl kiyang vô he. ²⁰ Mêd he nêl vô Pol ên nêb i dô hixôn he buc ya, léc Pol nêl nêb ob la. ²¹ Om buc wê ob sea he ge od nêl vô he ên nêbê, “Anutu obêc tyuc lec ge od a obêc vena vô xam tii vac.” Pyap dì Pol sea he dì la lec sip mì la. ²² La lec sip mì la Sisalia, léc sip mila le dì i lop vêl ên sip dì la Jelusalem mì la keac vô xomxo vông vinên. Pyap dì i loc mì la Antiok.

Apolos nêl xolac gê Epesas

²³ Mêd Pol dô Antiok buc ya, nang dêc kidi vac Antiok dì la tup vac vigwe wê yêp vac vigwe levac Galesia yuu Plisia ge, dì la nêl kiyang vô xomxo vông vinên ên nêb i ngidu he xôn.

²⁴ Yuda ti lê nêbê Apolos wê ben Aleksandlia ge mila dô Epesas. Apolos ge mi nêl kiyang niviha dì xovô kiyang vihati wê yêp vac kipihac xolac ge. ²⁵ Ilage xomxo nêl Apumtau Yesu môp kitong vô Apolos mì i xovô dì i nilô kidu i nêb ob timu vô xolac vihati, om Apolos nêl Yesu kitong bôbac vô xomxo, léc môp mia lipacén ge, xovô wê Jon lipac xomxo ge tibed. ²⁶ Mêd Apolos la nêl xolac vac xumac lilo wê he Yuda vông ge dì xonaén ma, dì Plisia yuu Akwila ngô kiyang wê Apolos nêl ge, om kô i mì la vac yuu ben dì la nêl Anutu môp yuu xolac wê Apolos lungén ge vihati kitong vô i. ²⁷ Mêd Apolos nêb ob la vigwe Glik dì lie vông vinên Epesas tyuc lec nêb i loc. Om he kivuu kipihac ti dì vông i la vô xomxo Glik ên nêbê he i kô Apolos lec niviha. Mêgem Apolos mila Glik, dì xomxo wê Anutu xêyaa vin lec he mì he vông i vin gee, Apolos ngidu he xôn. ²⁸ Apolos he Yuda ngaénma lec xolac vô xomxo tibeac manôn, léc Apolos nêl kiyang hixôn xekizêc om hi he nêl kiyang tô mì la. Ên Apolos nêl kiyang wê yêp vac kipihac xolac ge kitong vô he om vông xovôén vô he ên nêbê Yesu ge Kilisi wê Anutu vinoo pyap ge.

19

Pol la nêl xolac gê Epesas

¹ Apolos dô Kolin dì vô buc tige Pol la tup vac vigwe kitôn dì mila Epesas. Dì mila tulec xomxo vông vinên ya ² dì kinêg vô he ên nêbê, “Buc wê xam

vông i vin taxlee ge, Myakilôhô Ngibua lam dô hixôn xam, me?” Lêc he nêl ên nêbê, “Xe o ngô kiyang ti lec Myakilôhô Ngibua lêm.”³ Om Pol kinêg vô he ên nêbê, “Om xam lipac mia tina?” Lêc he nêl ên nêbê, “Xe lipac mia tiyi wê Jon vông ge.”

⁴ Mêd Pol nêl ên nêbê, “Ilage Jon lipac xomxo wê pilepac he di vô nimi vô nipaên ge, di nêl vô he ên nêbê he i vông i vin xomxo ti wê ob val timuén ge. Xomxo tige Yesu.”⁵ Xomxo tige ngô kiyang wê Pol nêl ge om he lipac mia lec Apumtau Yesu lê.⁶ Mêd Pol vyax vigê lec he di Myakilôhô Ngibua lam hivun he xôn di vông he keac vac tibii toto via wê he lungêng ge di he nêl kiyang tiyi xocbê plopet ge.⁷ Xomxo tige vigê yuu di tô mi la yuu.

⁸ Mêd Pol la vac xumac lilo wê he Yuda vông ge di la nêl Anutu xolac vô xomxo hixôn xêkizêc di xonaên ma. Pol nêl Anutu ben kehe kitong vô he. Pol vông môp tibêge tiyi dentuc yon.⁹ Lêc xomxo ya nilô xêkizêc om he o vông i vin kiyang wê Pol nêl ge lêm, di he la nêl kiyang nipaên lec môp wê Yesu vông ge vô xomxo tibeac manôn. Mêgem Pol hixôn xomxo vông vinêng sea he di la dô vac xumac wê Tilanas mi tixuu xomxo vac ge, di Pol viac kiyang niviha vô xomxo tiyi buc vihati.¹⁰ Pol vông môp tibêge tiyi lec klismas yuu, om Apumtau xolac la vô he Yuda hixôn he Glik wê dô vac vigwe levac Esia ge vihati.

Kiyang lec Siva nue vux

¹¹ Anutu vông xêkizêc vô Pol om Pol vông do levac tibeac,¹² om xomxo kô Pol nivimihi wê ka bazub ya ge hixôn i nêng ngakwi ya mi la vông vô xomxo wê yidac ge di he vô niviha lec, di xomxo wê vimwo nipaên dô vac he nilô ge, vimwo nipaên pec mi la vêl ên he.

¹³ Yuda ya mi vilee vac vigwe viyang viyang di la tii vimwo nipaên vêl ên xomxo, di he ya tixuu nêb ob nel Apumtau Yesu lê di tii vimwo nipaên vêl lec Yesu lê. Om he nêl bêga nêbê, “Yesu ti wê Pol nêl i kitong ge, xe nêl vô ông lec i lê bêga bê ông lop mi loc vêl ên xomxo tige.”¹⁴ Xomxo levac wê mi si daa vô Anutu ge ti lê nêbê Siva, nue vux vigê vilu di sec yuu vông môp tibêge,¹⁵ lêc vimwo nipaên nêl vô he ên nêbê, “A xovô Yesu di a xovô Pol, lêc xam ge letya?”¹⁶ Mêd xomxo ti wê vimwo nipaên dô vac i nilô ge hôm he xôn di hi he ninivi vô nipaên di lêx he ngakwi sea, om he sea xumac tige di pec mi la xêtuac.¹⁷ Mêd he Yuda hixôn he Glik wê dô Epesas gee vihati ngô kiyang tige om he xona mabu di pimil Apumtau Yesu lê.¹⁸ Mêgem xomxo vông vinêng tibeac lam nêl he nêng nipaên wê mi vông ge kitong seac,¹⁹ di he wê mi vông yevac ilage kituc he kipihac yevac lam di si lec ngwax vô xomxo vihati manôn. Kipihac tige, he kisuu lec mone levac tiyi xocbê 50,000 kina.²⁰ Mêgem Apumtau xolac la vô levac vac vigwe tibeac.

Tibii Epesas vô nididun levac lec he anutu Atemis

²¹ Pyap dêc Myakilôhô Ngibua vông xovôen vô Pol, om Pol nêl ên nêbê, “A ob la tup vac vigwe Masedonia yuu Glik di la Jelusalem. Pyap di a ob la Lom hixôn.”²² Mêd Pol vông Timoti yuu Elastas wê yuu mi ngidu i xôn ge yuu la Masedonia, di Pol dô myabo tya gê Esia.

²³ Vô buc tige xomxo ya vông vevac vô môp wê Apumtau vông ge di vông nididun levac.²⁴ Èn xomxo ti dô Epesas lê nêbê Demitlias wê mi vông yuac lec silva. Demitlias vông xumac nipwo ya silva tiyi xocbê xumac ngibua

wê anutu kityooên Atemis vông ge. Demitlias he nue yuac kô mone mabu lec yuac tige,²⁵ om Demitlias kituc nue yuac hixôn tibii wê mi vông yuac tibege lam di nêl vô he ên nêbê, “Xame, xam xovô wê il kô mone mabu lec yuac wê il mi vông ge.²⁶ Lêc xam wê di ngô wê Pol val pilepac xomxo tibeac nilô di he vông i vin kiyang wê nêl ge. Ên Pol nêl ên nêbê anutu wê xomxo vông ya vigê ge, ge o Anutu nôn lêm. Pol lam nêl kiyang tige vac il bed di nêl vac vigwe levac Esia vihati hixôn.²⁷ Om kiyang wê Pol nêl ge ob vông yuac bisnis wê il vông ge lê vô nipaên, di xumac ngibua wê anutu Atemis vông ge, xomxo ob yê tiyi xocbê xumac pileva. Atemis ge il anutu vêx wê il Esia hixôn xomxo vac vigwe vihati mi kitaa vô ge, lêc Pol kiyang ob vông lê levac wê Atemis vông ge vô nipaên.”

²⁸ Xomxo tigee ngô kiyang wê Demitlias nêl ge om he xêyaa vô myavinê di he tyuc via levac ên nêbê, “Atemis wê il Epesas vông ge i vêx levac.”²⁹ Mêd tyucêne tige la vac vigwe Epesas vihati om tibii vihati vông didun levac di tup mi la hôm Gaias yuu Alistakas xôn di didii yuu di he la vac vigwe wê he mi kitucma vac ge. Yuu ge Masedonia yuu wê mi la hixôn Pol ge.³⁰ Pol nêb ob la vac tibii wê kitucma gee mahigun, lêc xomxo vông vinên le vac xôn nêb i locen i ma.³¹ Dêc gavman Esia mangwe wê Pol nipiup ge he vông kiyang la vô Pol nêbê i loc vacen kitucmaen i ma.

³² Mêd xomxo wê kitucma gee, he tibeac o xovô kitucmaen tige kehe lêm, om he piyôp juda di he ya tyuc kiyang bangwe di ya tyuc kiyang baba ya.³³ Om Yuda ya kô lie ti lê nêbê Aleksanda mi la tung vac tibii kitucmaen mahigun ên nêbê i nêl kiyang vô he, om Aleksanda vông vigê la kisiî ên nêb ob nêl kiyang.³⁴ Lêc xomxo tigee yê Aleksanda di xovô nêbê ge Yuda ti, om he vihati tyuc via yêp tibed ên nêbê, “Atemis wê il Epesas vông ge i vêx levac.” Mêd he tyuc via tibege tiyi hiyôv manôn yuu.

³⁵ Mêd xomxo levac wê mi kivuu kiyang wê he Epesas vông ge ti lam keac lec he di he dô kiyang maen, di i nêl vô he ên nêbê, “Xam Epesas, bêna lêc xam tyuc via lec Atemis? Xomxo vihati xovô ên nêbê il Epesas viac xumac ngibua wê Atemis vông ge di il viac ngidax ngibua wê tô gê kisiî ganê mi lam ge hixôn.³⁶ Xomxo ti tiyien ma wê ob pwoo kiyang tige vac, om xam dô didun maen, di xam o lêc vông môt nipaen decdec lêm.³⁷ Xam kô xomxo yuu ge mi lam, lêc yuu o vun susu ti vac xumac ngibua lêm, di yuu o so via vô anutu wê il vông ge lêm.³⁸ Om Demitlias he nue yuac obêc nêb vông kot vô xomxo ti ge, od buc wê xomxo ob vông kot lec ge yêp, di gavman levac dô, om he i loc vông kiyang vô gavman levac ên i titô he nêl kiyang.³⁹ Lêc kiyang wê xam vông ge ya obêc gên yêp ge od buc wê kitucmaen ge xam nêl kiyang tige di il hi i yib.⁴⁰ Ên môt wê il vông gwêbaga tiyi wê il ob tulec myaviwen levac, ên il lam kitucma mi vông didun levac, lêc gavman obêc kinêg kitucmaen tiga kehe vô il ge, od o tiyi wê il ob nêl kiyang ti lax vô he ge lêm.”⁴¹ Xomxo levac nêl bêge vô he di vông he toto la.

20

Pol la tup vac vigwe Masedonia yuu Glik

¹ Nididun wê Epesas vông ge tiyôô, di Pol keac xomxo vông vinên kituc lam vô i di viac kiyang vô he ên nêb i ngidu he xôn. Pyap dêc pul he vigê di sea he di la Masedonia. ² Mêd Pol tup vac vigwe Masedonia vihati di

nêl kiyang tibeac vô xomxo vông vinên ên nêb i ngidu he xôn. Pyap dì i la Glik ³ dì la dô dentuc yon. Nang dêc Pol nêb ob lec sip mi la Silia, léc he Yuda wê dô Glik ge hilu kiyang xôn nêb ob hi Pol i yib om Pol xo nêb ob lax mi la Masedonia. ⁴ Xomxo wê la hixôn Pol ge he lê nêbê Sopata wê ma Pilas wê lam gê Belia ge, dì Alistakas yuu Sekandas wê yuu lam gê Tesalonaika ge, dì xomxo Debi ti lê nêbê Gaias, dì Timoti, dì Tikkas yuu Tlopimas wê yuu lam gê vigwe levac Esia ge. ⁵ Xomxo tigee la dô bin xe gê Tloas. ⁶ Di xe dô dì da levac wê Yuda mi ya blet wê yis maén ge lam la vêl, mêd xe lec sip gê Pilipai dì la, dì buc vigê vilu lam la vêl lêc xe mila Tloas dì dô da ti gê Tloas.

Pol vông Yutikas kidi lec maviha

⁷ Xe kitucma lec da ên xe nêb xe ob xa yaên dì xa pasa hixôn, mêd Pol nêl xolac vô xe ên nêb vidiién titige ob sea xe dì la, om nêl xolac dia dì i la dì la vivuaên mahigun. ⁸ Xe kitucma vac xumac nilô wêyêp kisii ge dì lam tibeac tum vac. ⁹ Mêd xomxo ngivihi ti lê nêbê Yutikas la dô lec xumac vuayen nipwo kisii, mêd Pol nêl kiyang dia om Yutikas manôñ yêp dì i yêp nilô ma om tô lec vuayen nipwo tige dì la kibun. Xumac nilô tige yêp kisii dì nilô ti yêp vac mahigun dì ti yêp ngibi. Om he lop mi la yê ngivihi tige lêc yib. ¹⁰ Mêd Pol lop mi la vô xomxo tyo dì le ni xocêñ kisii dì hôm lec vigê dì nêl vô he ên nêbê, “Xam o vô viyin lêm, ên ga dô maviha.” ¹¹ Mêd Pol lec mi lax kisii dì lax ya hixôn xomxo vông vinên. Pyap dì i nêl kiyang dia vô he dì vigwe vidii lec, dì sea he dì la. ¹² Mêd ngivihi tyo dô maviha dì he kô mi lax ben hixôn xêyaa niviha.

Pol sea Tloas di la Mailitas

¹³ Mêd xe lec sip gê Tloas mi la mug mi la vigwe Asos, ên Pol nêl nêb ob la kibun mi la Asos dì xe xôn obêc lec sip gê Asos. ¹⁴ Om Pol mila vô xe gê Asos, dì xe kô i lec sip dì xe xôn la Mitilini. ¹⁵ Nang dêc xe sea Mitilini mi la, dì vigwe vidiién titige xe mila kwabo vô vigwe Kaios, dì xe xêp dì vigwe vidiién xe mila Semos dì vidiién xe mila Mailitas. ¹⁶ Xe luu vigwe Epesas vêl, ên Pol nêb ob dô vigwe levac Esia buc tibeac lêm, ên xo nêb ob la lutibed ên la yê buc Pentikos gê Jelusalem.

Pol nêl kiyang vô gyovixa Epesas

¹⁷ Vac vigwe Mailitas Pol vông kiyang la vô gyovixa Epesas nêb he i loc vô i. ¹⁸ Om he mila dì Pol nêl vô he ên nêbê, “Xam xovô môp yuu yuac wê a lam vông vac xam mahigun vô buc wê a val Esia taxlee ge hixôn buc vihati wê a dô hixôn xam ge. ¹⁹ Dì buc tibeac he Yuda hilu kiyang xôn nêb ob vông viyin vô a, om a dô vac viyin tibeac, dì a lêg vô nipwo lec, lêc a vông yuac wê Apumtau vông vac a vigêg ge. ²⁰ Di a o yax kiyang ti vun ên xam lêm. Nge, a nêl kiyang wê ob ngidu xam xôn ge vihati yêp seac vô xam. A tixuu xam vac kitucmaén dì a loc tixuu xam vac xam toto bom hixôn. ²¹ Dì buc tibeac a nêl kiyang xêkizêc vô xam Yuda hixôn xam tibii ba ên a nêbê xam pilepac nilôm i loc vô Anutu dì xam vông i vin il lig Apumtau Yesu. ²² Om xam ngô lê. Gwêbaga Myakilôhô Ngibua nêl vô a nêb a la Jelusalem, lêc viyin wê xomxo ob vông vô a gê Jelusalem ge, a lungén. ²³ Vac vigwe vihati wê a la dô vac ge Myakilôhô Ngibua nêl kitong vô a ên nêbê a ob kô viyin dì tibii ob tung a vac xumac kalabuhu. ²⁴ Lêc a nêb a ob vông yuac vihati wê Apumtau Yesu vông vô a ge i loc tiyi lec

myahipu dì a o xo a nignivi lêm. Yuac wê a ob vông ge a ob nêl vízid niviha wê Anutu vông ge kitong vô xomxo.

²⁵ “Xam xovô bê ilage a loc tup vac xam dì loc nêl Anutu ben kehe kitong vô xam, lêc gwêbaga a xovô ên a nêbê xam obêc wê a magnôn tii vac lêm. ²⁶ Om a ob nêl kiyang xêkizêc vô xam bêga bê xam ti obêc wib mi la vac nipaên ge od kiyang ti o yêp vô a lêm. ²⁷ Èn a o yax kiyang ti vun ên xam lêm. Nge, a nêl kiyang wê Anutu vông ge vihati kitong vô xam. ²⁸ Om xam viac xam dì xam viac Anutu nue vihati, ên Myakilôhô Ngibua vinoo xam nêb xam viac he. Xam viac he i niviha, ên Apumtau kisuu he ya hi wê ici va vông ge. ²⁹ A xovô ên a nêbê a ob sea xam dì a ob la, dì timuén xomxo nipaên ya obêc lam vac xam mahigun di lam vông xam vô nipaên tiyi xochê noo vimen la hi bwoc sipsip ge. ³⁰ Di xacxam va ya obêc kidi vac xam mahigun di nêl kiyang kityooên vô xam dì didii xam mi lax timu vô he vixa. ³¹ Om xam viac xam niviha, dì xam xovô bê tiyi klismas yon a dô hixôn nilög viyin yuu byagê, lêc a nêl Anutu xolac vô xam tiyi bucênu yuu vidiién vihati.

³² “Di gwêbaga a ob tung xam vac Anutu vigê dì xam dô vac kiyang xêyaa vin lecén wê Anutu vông ge. Èn kiyang tige tiyi wê ob vông xam le xêkizêc, dì ob vông vízid wê Anutu nêb ob vông vô il vihati wê il tu i nue ge vô xam hixôn.

³³ “A o kitaa gol yuu silva hixôn nivimihi vô xomxo ti lêm. ³⁴ Xam xovô ên xam nêbê aca va vigê vông yuac dì a tulec susu wê ngidu a xôn dì ngidu xomxo wê dô hixôn a ge xôn. ³⁵ Yuac vihati wê a vông ge nêl kitong vô xam bêga nêbê il ob vông yuac xêkizêc ên i ngidu xomxo wê he nêl xêkizêc ma ge xôn. Di il ob xovô kiyang wê Apumtau Yesu nêl bêga nêbê xomxo ti obêc vông susu vô xomxo ngwe ge od xêyaa ob vô niviha luu môt wê ob kô susu vô xomxo ngwe ge vêl.”

³⁶ Pol nêl kiyang tige pyap dì yev vixa kitu vac dì he gyovixa kitaa. ³⁷ Pyap dì he vihati byag mabu dì kiva Pol xôn dì pul i vigê. ³⁸ Di he nilô vô viyin levac ên kiyang wê Pol nêl vô he ên nêbê, “Xam obêc wê a magnôn tii vac lêm.” Mêd he kô Pol mi la tung lec sip.

21

Pol lec sip nêb ob la Jelusalem

¹ Mêd xe lec sip dì sea he dì mila bôbac vô vigwe Kos, dì vigwe vidiién ge xe kidi mi la vigwe Los, dì xe sea Los dì mila Patala. ² Mêd xe tulec sip ngwe wê ob la vigwe Pinisia ge om xe lec sip tige dì la. ³ Mêd xe mila kwabo vô vigwe Saiplas wê yêp vô xe vigêm kêd ge dì xe luu Saiplas vêl dì la Taia vac vigwe levac Silia. Mêd tibii tul kupac vêl ên sip, ⁴ dì xe lop vêl ên sip dì la myag xomxo vông vinê vac vigwe tige lêc xe tulec he ya om xe la dô hixôn he da ti. Myakilôhô Ngibua vông xovôên vô he om he nêl vô Pol ên nêbê, “Locén Jelusalem i ma.” ⁵ Mêd buc wê xe dô hixôn he ge tiyôô om he vông vinê vihati hixôn vinêe nue, xe xôn sea he ben dì la gwec ninya, mêd xe vihati yev vixam kitu vac dì kitaa, ⁶ pyap dì xe pulma vigêm dì xe lec sip dì he lax mi la ben.

Agabas nêl kiyang vô Pol

⁷ Xe sea Taia dì mila Tolemes, dì xe la vô xomxo vông vinê wê dô vigwe tige dì keac vô he dì dô hixôn he buc tibed. ⁸ Dêc vigwe vidiién ge xe sea

Tolemes di la Sisalia, di mila dô hixôn sinale Pilip vac i ben. Pilip ge xomxo wê Yesu nue ngivihi vinoo he vigê vilu di sec yuu gê Jelusalem ilage ên nêb he i ngidu Yesu nue ngivihi xôn ge.⁹ Pilip nue vêxwo yuudiyuu dô wê he mi nêl Anutu xolac ge.

¹⁰ Xe dô Sisalia buc ya la vêl mêd plopet ti lê nêbê Agabas kidi gê Judia di val Sisalia vô xe,¹¹ di val hôm Pol let di ku ici va vigê yuu vixa xôn ya, di nêl ên nêbê, “Myakilôhô Ngibua nêl bêga nêbê he Yuda wê dô Jelusalem ge obêc ku xomxo ti wê i let tiga xôn tiyi bêga, di he obêc vông i la vac tibii wê o Yuda lêm ge vigê.”

¹² Xe ngô kiyang tige om xe wê xe la hixôn Pol ge, hixôn he wê dô vac vigwe tige xe kitaa Pol ên xe nêbê, “Locên Jelusalem i ma.”¹³ Lêc Pol nêl vô xe ên nêbê, “Bêna lêc xam byag di vông a nilôg vô viyin? A o xona ên wê tibii ob ku a xôn ge lêm. Di he obêc hi a xib gê Jelusalem ge od ge pyap. A obêc xib lec Apumtau lê.”¹⁴ Xe nêl kiyang tibeac vô Pol, lêc o ngô lêm, om xe sea vyam wê xe nêl ge di nêl bêga bê, “Anutu i vông i tiyi wê xovô ge.”

Pol nêl yuac kitong vô gyovixa gê Jelusalem

¹⁵ Buc ya lam la vêl mêd xe kô xe susu lec ên xe nêb xe ob la Jelusalem.¹⁶ Dêc xomxo vông vinên Sisalia ya la hixôn xe di xe la Jelusalem, di he kô xe mi la vac Neson ben wê xe ob xêp vac ge. Neson ge xomxo Saiplas ti wê vông i vin Yesu ilage.¹⁷ Xe mila Jelusalem di lige vông vinên wê dô Jelusalem gee kô xe lec hixôn xêyaa niviha.

¹⁸ Di vigwe vidiién ge xe hixôn Pol la xê Jems, di gyovixa Jelusalem vihati la dô hixôn.¹⁹ Mêd Pol pul he vigê di nêl kiyang lec yuac vihati wê Anutu ngidu i xôn di i la vông vac tibii wê o Yuda lêm gee ben.

²⁰ He gyovixa ngô kiyang wê Pol nêl ge om he pimil Anutu di nêl vô Pol ên nêbê, “Lige, ông xovô bê Yuda tibeac xocbê 1,000 ge he vông i vin Yesu, lêc he timu vô xolac wê Moses vông ge hixôn.”²¹ Di xomxo ya nêl kiyang kityooên vô he ên nêbê ông la nêl kiyang vô he Yuda wê la dô vac tibii ba ben gee ên ông nêbê he i sea Moses xolac di sea môt wê ob gôl nue ninivi ge di sea môt wê he Yuda mi vông ge.²² Om il ob vông bêna? Ên gwêbaga he Yuda ob ngô wê ông val dô ga.²³ Om ông vông i tiyi kiyang wê xe ob nêl vô ông bêga bê xe lige yuudiyuu dô wê he hilu kiyang ti vô Anutu ge.²⁴ Om ông loc hixôn he di xam loc vông i tiyi môt wê yêp vac Moses xolac ge wê ob kitya xam nêm nipaên vêl di xam vô paha lec, di ông vông mone vô he, ên he i loc kiping bazub lihi. Ông vông môt bêge, ên xomxo vihati i yê wê ông timu vô Moses xolac ge di he i xovô bê kiyang wê xomxo kityoo lec ông ge nôn maên.

²⁵ “Di tibii vông vinên wê o Yuda lêm ge, ilage il hilu kiyang di vông kipihac ti la vô he ên il nêbê he i kol he ên susu yaên wê tibii vông i tu daa vô anutu kityooên ge, di he yaên hi i ma, di he i o ya lilii wê he ngibina kwa di hi dô vac nilô ge lêm, di he i xona ên môt yôdac vêx yuu vux.”²⁶

²⁶ He nêl bêge vô Pol, om Pol kô xomxo yuudiyuu tigee di vigwe vidiién titige he xôn la timu vô môt wê ob kitya he nêl nipaên vêl ge, pyap di he la vô xomxo wê mi si daa ge vac Anutu xumac ngibua di la nêl buc wê he ob vô paha lec di he toto ob vông daa vô Anutu ge kitong vô he.

He Yuda la hôm Pol xôn vac xumac ngibua

²⁷ He dô dì buc vigê vilu di sec yuu vô kwabo lec wê ob tiyôô ge, lêc he Yuda wê lam gê Esia gee yê wê Pol la dô vac Anutu xumac ngibua ge, om he vông xomxo tibeac nilô juda sea di he la hôm Pol xôn, ²⁸ di tyuc vya levac ên nêbê, "Xam lige Islel, xam lam hixôn xe, ên xomxo tiga wê mi la vac vigwe vihati dì la so vya lec il Islel hixôn Moses xolac di xumac ngibua tiga. Di gwêbaga xomxo tiga vông môp nipaên bêga bê kô tibii wê o Yuda lêm ge mi he lam vac Anutu xumac ngibua ga om vông xumac tyo vô nipaên." ²⁹ He nêl bêge, ên he yê wê Pol la vîlee vac Jelusalem hixôn Tlopimas wê tibii Epesas ti ge, om he so nêbê mêd Pol kô Tlopimas mi yuu la vac Anutu xumac ngibua nilô.

³⁰ Om xomxo Jelusalem vihati xêyaa vô myavinê vô Pol di he kitucma mi la hôm Pol xôn vac Anutu xumac ngibua di kô i mi la vixun di tung vuayen lec lutibed.

³¹ Mêd xomxo tigee hi Pol ên nêb ob hi i yib, lêc kiyang la vô Lom levac ti wê viac tibii vevac vihati ge ên nêbê xomxo Jelusalem vihati kitucma di vông nididun levac. ³² Om tibii levac tige kô tibii vevac levac ya hixôn he nue vevac dì he la lutibed di mila le vac xomxo mahigun. Mêd xomxo yê wê he val ge om he sea Pol di hiên ma. ³³ Mêd tibii levac tige nêl vô nue vevac ên nêbê he i loc hôm Pol xôn di ku i xôn ya sen yuu. Mêd tibii levac nêl ên nêbê, "Xomxo tiga letya? Di i vô va lêc xam hi?" ³⁴ Lêc xomxo ya tyuc kiyang ngwe di he ya tyuc kiyang bangwe, di he tyuc vac nididun levac om tibii levac tige o ngô kiyang wê he tyuc ge niviha lêm, om nêl vô nue vevac ên nêb he i kô Pol mi loc vac xumac wê he vông ge. ³⁵⁻³⁶ Om he kô Pol mi la lec peb, lêc xomxo tibeac timu vô he vixa di tyuc ên nêbê, "Hi i yib." Om tibii vevac tigee hôm Pol kisii di kô mi la.

Pol nêl i kehe kitong vô he Yuda

³⁷ He nêb he ob kô Pol mi la xumac lôma, lêc Pol nêl vô tibii vevac levac tige vac vya Glik ên nêbê, "A ob nêl kiyang ti vô ông." Mêd tibii vevac tyo nêl vô Pol ên nêbê, "Ông xovô vya Glik. ³⁸ A so ên a nêbê mêd ông Isip ti wê ông vông vevac vô gavman ilage di i kô tibii 4,000 hixôn he yipac di didii he mi la vac vigwe myadongên." ³⁹ Mêd Pol nêl vô i ên nêbê, "A ga Yuda ti di a bog vigwe levac Tasas wê yêp vac vigwe Silisia ge. Om a kitaa ông bê ông tyuc lec di a nêl kiyang ya vô xomxo tigae." ⁴⁰ Mêd tibii levac tige lee yuu om Pol le lec peb di vông vigê la kisii di xomxo vihati dô kiyang maén, mêd Pol nêl kiyang vô he vac Yuda vya.

22

¹ Pol nêl vô he bêga nêbê, "Xam mage lige, a ob nêl a kehe kitong om xam ngô." ² He ngô wê Pol keac vac Yuda vya ge om he dô kiyang maén, di Pol nêl vô he ên nêbê,

³ "A ga Yuda ti di a yubac gê Tasas vac vigwe levac Silisia, lêc a lig gê Jelusalem di Gameliel tixuu a ya Moses xolac vihati wê il buge timu vô ge om a vông i vin Anutu xêkizêc di vông yuac wê i vông ge tiyi xochê xam vông gwêbaga. ⁴ Di a vông viyin levac vô xomxo wê vông i vin Yesu ge ên a nêb a ob hi he i yib, di a ku he vêx yuu vux xôn di tung he vac xumac kalabuhu. ⁵ Xomxo daa sién nêl levac hixôn kaunsil vihati xovô môp wê a vông ilage, om he tiyi wê ob nêl a kitong. Mêd he kivuu kipihac vô he Yuda wê dô Damaskas ge di a kô mi la Damaskas ên a nêb a ob hôm

xomxo vông vinêñ wê dô vigwe tige xôn dî kô he mi lam Jelusalem ên he i lam kô myavînê.

Pol nêl kiyang lec wê vông i vin Kîlisi ge

⁶ “A loc mi la di a mila kwabo vô Damaskas vô vidiiên wê hiyôv tyip kitôn ge, lêc lutibed xêseac ti lam gê kisii dî lam byêx a magnôn, ⁷ dî a tilii mi la xêp kibun, dî a ngô vya ti lam nêl vô a ên nêbê, ‘Sol, bêna lêc ông vông viyin vô a?’ ⁸ Lêc a kinêg ên a nêbê, ‘Apumtau, ông letya?’ Di i nêl vô a ên nêbê, ‘A Yesu Nasalet wê ông vông viyin vô a ge.’ ⁹ Mêd xomxo wê dô hixôn a gee yê xêseac lê, lêc he o ngôvô xomxo ti wê keac vô a ge vya lêm.

¹⁰ “Mêd a kinêg ên a nêbê, ‘Apumtau, a ob vông bêna?’ Lêc Apumtau nêl vô a ên nêbê, ‘Ông kidi lec mi loc Damaskas, ên xomxo ti obêc nêl yuac wê Anutu nêbê ông ob vông ge kitong vô ông.’ ¹¹ Xêseac tige byêx a magnôn di a o xê susu ti lêm, om he wê dô hixôn a gee hôm lec a vigêg di didii a di xe la Damaskas.

¹² “Xomxo ti lê nêbê Ananaias dô Damaskas. Ananaias viac Moses xolac vihati dî timu vô niviha om he Yuda wê dô Damaskas gee yê ên nêb i xomxo niviha. ¹³ Mêd Ananaias lam le vô a magnôn di nêl ên nêbê, ‘A lig Sol, mammôn i seac.’ Dêc lutibed a magnôn seac di a xê Ananaias. ¹⁴ Di i nêl vô a ên nêbê, ‘Anutu wê il buge vông ge vinoo ông ên nêb ông xovô kiyang wê i vông ge di ông wê xomxo niviha tyo wê ici va nêl kiyang vô ông vac mya ge, ¹⁵ ên ông obêc kô kiyang wê ông wê di ngô ge mi la nêl kitong vô xomxo vihati. ¹⁶ Om ông diabin vatya? Kidi lec mi loc lipac mia, di ông kitaa vô Apumtau ên i kitya ông nêm nipaên vêl.’

Pol nêl kiyang lec wê Anutu vông i la vô tibii madiluhu ge

¹⁷ “Mêd a lôm Jelusalem di la kitaa vac Anutu xumac ngibua, lêc a xê vivia ti bêga nêbê ¹⁸ Apumtau nêl kiyang ti vô a ên nêbê, ‘Ông sea Jelusalem dî loc lutibed, ên ông obêc nêl a kitong vô xomxo ge od he ob vông i vin lêm.’ ¹⁹ Mêd a nêl ên a nêbê, ‘Apumtau, he xovô wê ilage a la vac xumac lilo vihati dî a la hôm xomxo wê vông i vin ông ge xôn di a hi he. ²⁰ Di buc wê he hi Stiven wê mi nêl ông kiyang ge od a le hixôn di viac he wê nêx Stiven ya ngidax ge nêñ ngakwi, dî a xê môp wê he vông ge ên a nêbê niviha.’ ²¹ Lêc Apumtau nêl vô a ên nêbê, ‘Ông loc ên a ob vông ông loc môp dia vô tibii madiluhu wê o Yuda lêm gee.’”

Xomxo levac Lom ti viac Pol

²² He Yuda ngô kiyang wê Pol nêl ge, dî i val vô kiyang ti wê nêb ob la vô tibii ba ge lêc he yê tiyiên ma om he tyuc vya levac ên nêbê, “Hi xomxo tige i yib. Xomxo tibêge ob dô mavilha lêm.” ²³ He tyuc levac di nêx nivimili kisii dî hôm víjuva mi nêx i la kisii hixôn. ²⁴ Om tibii vevac tige nêl vô nue vevac ên nêbê, “Xam kô Pol mi loc vac il bed xumac lôma dî loc hi i ya yihi, ên i nêl kiyang wê Yuda tyuc lec i ge kehe vô il mi il ngô.” ²⁵ Om he ku Pol vigê xôn ya let, lêc Pol kinêg vô tibii vevac ti wê le kwabo ge ên nêbê, “Xolac wê gavman vông ge yêp ên nêbê xam obêc hi xomxo Lom ti tax dêc i vông kot timuên ge od obêc la tiyi, me?”

²⁶ Tibii tige ngô kiyang wê Pol nêl ge om lax nêl vô tibii vevac levac ên nêbê, “Ông ob vông bêna vô xomxo tige? Ên xomxo tige Lom ti.” ²⁷ Om xomxo levac tige la vô Pol di kinêg vô i ên nêbê, “Ông nêl kitong vô a bê

Ông Lom ti vixôhilôg, me?” Om Pol nêl ên nêbê, “Vixôhilôg, a xomxo Lom ti*.” ²⁸ Mêd tibii levac tige nêl vô Pol ên nêbê, “A vông mone levac la vô gavman, om a dô tiyi xocbê xomxo Lom.” Lêc Pol nêl ên nêbê, “Di a mô, a o bêge lêm, ên tag kô a di a Lom ti.” ²⁹ Mêd nue vevac wê nêb ob hi Pol ge ngô kiyang tige om xona di sea Pol lutibed, di tibii vevac levac tige ngô wê Pol Lom ti lêc he ku i xôn ge, om xona.

³⁰ Tibii levac tige nêb ob ngôvô kiyang wê he Yuda nêl lec Pol ge kehe, om vigwe vidiiên ge piwelac sen vêl ên Pol dì vông kiyang la vô Yuda levac wê mi si daa gee hixôn kaunsil vihati ên nêbê he i lam kitucma, mêd tibii vevac levac tyo kô Pol mi lam lax vô he manôn.

23

Pol nêl kiyang vô kaunsil wê he Yuda vông ge

¹ Pol manôn la vô he kaunsil dì nêl kiyang vô he nêbê, “Xam lige, môt wê a vông ilage dì i val tyip gwêbaga, Anutu yê nêb a o vông ti so lêm.”

² Mêd xomxo daa sién nêl levac lê nêbê Ananaias ngô Pol kiyang, om nêl vô xomxo wê le kwabo vô Pol ge ên nêbê, “Pitap i mya.” ³ Lêc Pol nêl vô Ananaias ên nêbê, “Ông tiyi xochê xax wê xomxo lipac pên lec kisii lêc nilô pital ge, om Anutu obêc hi ông, ên ông nêb ông ob titô a kiyang ya Moses xolac lê, lêc ông pwoo Moses xolac vac ên wê ông nêl dì xomxo hi a ge.”

⁴ Mêd xomxo wê le hixôn Pol ge nêl vô i ên nêbê, “Letya nêb ông nêl kiyang nipaên lec xomxo levac wê mi si daa vô Anutu ge?” ⁵ Mêd Pol nêl ên nêbê, “Xam lige, a xovô kiyang wê yêp vac kipihac xolac bêga nêbê, ‘Xam o lêc nêl kiyang nipaên lec xomxo levac wê viac xam ge lêm.’ Lêc a o xovô bê xomxo tige xomxo levac wê mi si daa ge lêm om a nêl kiyang bêge lec i.”

⁶ Pol xovô nêbê he ya Sadyusi di he ya Palisi om keac levac vô he kaunsil ên nêbê, “Xam lige, mag ge Palisi dì a ga Palisi, dì a vông i vin ên a nêbê xomxo yibên obêc kidi lec tii vac, lêc gwêbaga xomxo vông kiyang vô a lec kiyang tige.” ⁷ Pol nêl bêge om he Palisi yuu Sadyusi kunacma di le kidu yuu, ⁸ ên he Sadyusi nêl nêbê xomxo yibên ob kidi lec i tii vac lêm, di he nêl ên nêbê angela di xomxo kinu o dô lêm. Lêc he Palisi vông i vin kiyang tigee vihati. ⁹ Om he nêlma levac dì higac vôma di he Palisi wê tixuu xomxo ya Moses xolac gee he ya kidi lec dì nêl ên nêbê, “Xe o tulec soén ti vô xomxo tige lêm. Angela hixôn xomxo kinu mêt lam nêl kiyang vô i.” ¹⁰ He kunacma mabu yocê om xomxo vevac levac tyo xona nêbê he ob titê Pol vôma lêc yib, om nêl vô nue vevac ên nêbê, “Xam loc kô Pol vac he mahigun dì kô mi loc vac xumac wê il vông ge.”

¹¹ Vô bucén hig ge Apumtau lam le vô Pol manôn di nêl ên nêbê, “Ông xonaên i ma, ên ông nêl a kitong gê Jelusalem om ông obêc la nêl a kitong gê Lom hixôn.”

He Yuda hilu kiyang nêb ob hi Pol i yib

¹² Vigwe vidiiên he Yuda kitucma di hilu kiyang bêga nêbê, “Il ob hi Pol i yib, om il ob ngibua susu yaên hixôn mia numên dì i loc tyip lec buc wê

* ^{22:27:} Pol ge xomxo Lom ti vixôhilôg, ên yubac vac vigwe Tasas vac vigwe levac Silisia wê Lom viac ge. Lêc Pol ge Islele ti, ên ta yuu ma ge xomxo Islele yuu.

il ob hi Pol i yib ge.” ¹³ He wê hilu kiyang tige tiyi xocbê kehe yuu (40). ¹⁴ Mêd he la vô xomxo levac wê mi si daa gee hixôn he Yuda levacé dì nêl vô he ên nêbê, “Xe vihati hilu kiyang bêga ên xe nêbê xe ob xa yaén ti lêm dì i loc tyip lec buc wê xe ob hi Pol i yib ge. ¹⁵ Om xam hixôn kaunsil, xam vông kiyang i loc vô xomxo vevac levac tyo bê i kô Pol mi lam vô xam ên xam ob ngôvô kiyang kehe, di xe ob viac xe pyap dì obêc val môp mahigun ti dì xe ob hi i yib.”

¹⁶ He nêl bêge, lêc Pol viwa ngivihi ti ngô wê he nêb ob hi Pol i yib ge om la vac tibii vevac ben dì la nêl kiyang tige kitong vô yihi. ¹⁷ Om Pol keac tibii vevac levac ti val dì nêl vô i ên nêbê, “Kô xomxo ngivihi tiga mi loc vô xomxo levac wê viac tibii vevac ge ên ob nêl kiyang ti vô i.” ¹⁸ Om tibii tige kô i mi la vô tibii vevac levac tyo di nêl vô i ên nêbê, “Pol ti wê il hôm i xôn ge keac a la vô i ên nêb a kô xomxo ngivihi tiga mi lam vô ông, ên xomxo ngivihi tiga ob nêl kiyang ti vô ông.”

¹⁹ Mêd xomxo levac tige kô ngivihi tyo mi yuu la le viyonên di kinêg vô i ên nêbê, “Ông ob nêl kiyang vatya vô a?” ²⁰ Om ngivihi tyo nêl vô i ên nêbê, “He Yuda hilu kiyang xôn nêbê he ob vông kiyang i lam vô ông ên nêb titige ông kô Pol mi loc vô he kaunsil. He kityoo ên he nêb he ob ngô i nêl kiyang kehe i tii vac. ²¹ Om ông o lêc ngô he vya lêm, ên he lie 40 dô vac môp ên nêb ob hi Pol i yib, ên he hilu kiyang bêga nêbê he ob ngîuba yaén hixôn numên dì i loc tyip lec buc wê he ob hi Pol i yib ge. Dì gwêbaga he dô bin ông nêb ông tyuc lec kiyang wê he nêl ge.” ²² Mêd tibii vevac levac tyo vông ngivihi tige lax mi la di nêl kiyang xêkizêc vô i nêbê, “Ông o lêc nêl kitong vô xomxo ti bê ông lam nêl kiyang tige vô a lêm.”

Tibii vevac levac vông Pol la vô gavman levac Piliks

²³ Mêd tibii vevac levac tige keac nue yuu wê mila le ngiduên wê i vông ge lam dì nêl vô yuu ên nêbê, “Muu kô xomxo vevac 200 hixôn xomxo vevac 70 wê ob lec xôhô gee dì xomxo 200 wê ob kô yii ge, di xam loc Sisalia vô bucén lec hîyôv manôn xocbê 9 klok. ²⁴ Dì xam viac xôhô ya ên Pol i dô lec ti, di xam viac i nivaha dì kô i mi loc vô gavman levac Piliks.” ²⁵ Dì tibii levac tige kivuu kipihac ti vô Piliks bêga nêbê,

²⁶ “A, Klodias Lisias, a kivuu kipihac tiga vô ông gavman levac Piliks. Vidiién nivaha i loc vô ông. ²⁷ Xomxo tiga, he Yuda hôm i xôn dì hi i ên nêb ob hi i yib, lêc a ngô wê i Lom ti ge, om a hixôn nuge vevac, xe la kô i vêl ên he Yuda vigê. ²⁸ A nêb a ob ngô kiyang wê he nêl lec xomxo tige kehe, om a kô i mi la vô kaunsil wê he Yuda vông ge. ²⁹ Mêd a ngô kiyang wê he nêl lec i ge, lêc kiyang tige tiyi xocbê xolac wê heche va vông ge, di a xovô ên a nêbê kiyang tige o tiyi wê il ob tung i la vac kalabuhu dì hi i yib ge lêm. ³⁰ Nang dêc xomxo ti lam nêl kitong vô a ên nêbê he Yuda hilu kiyang nêb he ob hi xomxo tige i yib, om a vông i loc vô ông lutibed. Dì a nêl vô he Yuda wê vông kiyang vô i ge ên a nêbê he i loc nêl kiyang wê he nêl lec i ge vô ông.” Kipihac nêl bêge.

³¹ Mêd nue vevac vông i tiyi wê tibii levac tige nêl vô he ge om he kô Pol dì la bucén dì mila vigwe Antipatlis. ³² Dì vigwe vidiién tibii vevac wê la kibun gee hixôn he wê kô yii ge lax mi la ben, di he wê dô lec xôhô gee la hixôn Pol mi he la. ³³ He mila Sisalia mêd vông kipihac vô gavman levac Piliks di vông Pol la hixôn. ³⁴ Mêd Piliks kitong kipihac tyo dì kinêg vô

Pol ên nêbê, “Ông lam vac vigwe levac tina?” Om Pol nêl ên nêbê, “A bog Silisia.” ³⁵ Mêd Piliks nêl ên nêbê, “Xomxo wê nêl kiyang lec ông ge obêc val ge od a ob ngô kiyang wê ông vông.” Pyap mêd nêl vô nue vevac ên nêb he i kô Pol mî loc tung vac gavman xumac wê Helot lox ilage dì he i yê i xôn.

24

He Yuda vông kiyang vô Pol

¹ Buc vigê vilu lam la vêl dêc Ananaias wê xomxo daa sién nêl levac ge hixôn Yuda levac ya dì xomxo ti wê ob nêl xomxo nêl kiyang vô gavman ge lê nêbê Tetalas, he la vô gavman levac Piliks ên he nêb he ob vông kiyang vô Pol. ² Om Piliks keac Pol lam di Tetalas nêl kiyang kityooën ya lec Pol bêga nêbê, “Xomxo levac Piliks, ông viac xe niviha om xe dô nimviha di vevac ti o tyip vac xe bom lêm, di ông kitya môp nipaên vêl di vông xe dô vac môp niviha wê ob vô niviha vô xe ge. ³ Om môp tige vông xe xêmyaa vô niviha dì xe hi vixam ên ông tiyi buc vihati.

⁴ “A ob nêl kiyang dia vô ông lêm, lêc a kitaa ông bê ông xêmyaa i vô niviha dì ông ngô kiyang bo ti wê a ob nêl vô ông ga. ⁵ Xomxo tige, xe xê ên xe nêb i xomxo judaên, ên la vông Yuda vac vigwe vihati he nilô juda dì he o dô niviha lêm, dì xomxo kidu ti wê nêbê Nasalet ge ici va tu he nêl xomxo levac. ⁶ Dêc nêb ob vông Anutu xumac ngibua i vô nipaên om xe la hôm i xôn. [Ên xe nêb xe ob vông kiyang vô i lec kiyang wê yêp vac Moses xolac ge, ⁷ lêc tibii vevac levac Lisisas val tii xe sea dì kô Pol mi la, ⁸ di nêl ên nêbê xomxo wê nêb ob vông kiyang vô Pol ge, he i lam nêl kiyang vô ông.] Om ông obêc kinêg xomxo tyo ge od ông obêc ngô kiyang wê xe nêl lec i ge vihati vac i mya.”

⁹ Tetalas nêl bêge di Yuda vihati ngidu i kiyang xôn di nêl ên nêbê kiyang vihati ge vixôhilôg nôn.

Pol nêl kiyang vô Piliks

¹⁰ Mêd Piliks too kwa vô Pol ên nêb i nêl i kiyang, om Pol nêl ên nêbê, “A xovô wê ông viac kiyang wê xe Yuda vông ge vac ilage dì i val tyip gwêbaga hixôn, om a xêgyaa niviha ên wê a ob nêl kiyang wê a vông ge vô ông. ¹¹ Ông obêc kinêg vô xomxo ya ge od he ob nêl vô ông bê a la Jelusalem di la kitaa vô Anutu dì buc vigê yuu dì tô mî la yuu lam la vêl di i val gwêbaga. ¹² Di he Yuda o yê wê xe ngaênma lec kiyang ya vac xumac ngibua ge lêm, dì a o kituc xomxo tibeac vac xumac liло me lec wetôv di vông he xêyaa vô myavinê lêm. ¹³ Kiyang kityooën wê he nêl lec a ge, he o tiyi wê he ob nêl kiyang kehe kitong mî ông xovô bê kiyang nôn lêm.

¹⁴ “Lêc a ob nêl a kitong seac bêga bê kiyang wê he Yuda yê tiyiên ma ge, vixôhilôg, a mî timu vô. Lêc a timu vô môp tige dì a kitaa vô Anutu wê buge mi kitaa vô ilage, di a vông i vin Moses xolac hixôn plopete kiyang wê yêp vac kipihac ge vihati. ¹⁵ Di a vông i vin di dô bin kiyang wê nêl ên nêbê xomxo vihati, nipaên yuu xôn niviha, obêc kidi lec mavîha tii vac. Di he Yuda éno vông i vin kiyang tige mî dô bin. ¹⁶ Om a vông môp niviha tiyi buc vihati ên a nêb a nilôg i yêp niviha, di Anutu hixôn xomxo he i yê a niviha.

¹⁷ “A la dô klismas ya la vêl vac vigwe ya, nang dì a la Jelusalem ên a nêb a ob vông mone vô lige Yuda wê nêl susu maên gee dì a nêb a ob

tung daa vô Anutu. ¹⁸ A viac môp tige om a timu vô môp wê ob vông a vô paha lec ge, pyap dì he Yuda yê wê a la vac Anutu xumac ngibua ge. Xomxo tibeac o dô hixôn a dì vô nididun levac lêm, ¹⁹ léc he Yuda wê lam gê Esia ge he val hôm a xôn. Xomxo tige, a nêg kiyang ti obêc yêp vô he ge od he i lam nêl vô ông dì obêc niviha. ²⁰ Léc obêc ma ge od xomxo wê dô gae he i nêl a nêg soën wê he tulec vô buc wê a la le vô he kaunsil manôn ge. ²¹ Kiyang tibed wê a le vô kaunsil manôn dì a nêl bêga ên a nêbê, ‘A vông i vin ên a nêbê Anutu obêc tipi vô xomxo yibén kidi lec i tii vac om gwêbaga xam vông kot vô a lec kiyang tige tibed.’”

²² Pol nêl bêge, léc Piliks xovô kiyang yuu môp wê xomxo vông vinên vông ge om nêl vô he Yuda ên nêbê, “Xam dô dì xomxo levac Lisias obêc val ge od a obêc titô kiyang wê xam vông ge.” ²³ Mêd Piliks nêl vô tibii vevac tige ên nêbê, “Viac Pol niviha dì ông wê i xôn dì i o lêc dô kizêc lêm, dì ông o lêc vibu lie wê nêb ob lam vông susu ya vô i ge lêm.”

Pol dô vac xumac kalabuhu tiyi klismas yuu

²⁴ Buc ya la vêl dêc Piliks yuu vinê Dlusila keac Pol lam vô yuu. Dlusila ge Yuda vêx ti. Om yuu ngô kiyang wê Pol nêl lec môp wê xomxo ob vông i vin Yesu Kilisi ge kehe kitong. ²⁵ Dêc Pol nêl kiyang lec môp niviha hixôn môp wê xomxo ob kol he ên nipaên ge di nêl lec wê Anutu obêc titô xomxo nêl kiyang vô buc timuên ge. Piliks ngô kiyang tige dì xona om nêl vô Pol ên nêbê, “Kiyang pyap om ông loc, dì obêc buc ngwe nang dì a obêc keac ông lôm i tii vac.” ²⁶ Dêc Piliks xo vac nilô ên nêbê mêd Pol obêc vông mone ya vô i om keac Pol la vô i tiyi buc tibeac di yuu keac mi dô.

²⁷ Klismas yuu lam la vêl dêc Posias Pestas la kô vigwe wê Piliks vông ge. Di Piliks xo nêbê he Yuda i yê i niviha, om sea Pol dô vac kalabuhu dì i loc mi la.

25

Pol nêl nêbê king Sisa ob ngô kiyang wê i vông ge

¹ Pestas val dô vac vigwe wê ob viac ge dì buc yon la vêl dì i sea Sisalia di la Jelusalem. ² Mêd xomxo levac wê mi si daa vô Anutu gee hixôn lie levac ya he la vô Pestas di so kiyang lec Pol dì nêl vô Pestas ên nêbê, ³ “Xe kitaa ông bê ông vông Pol i lam Jelusalem.” He nêl bêge ên he nêb Pol obêc val vô he vac môp mahigun ti ge od he ob hi i yib. ⁴ Léc Pestas nêl vô he ên nêbê, “Pol la dô kalabuhu gê Sisalia, di a ob dô buc myabo tya di a ob la Sisalia. ⁵ Om xam levac ya lam hixôn a, ên i nêl soën ya obêc yêp ge od xam vông kot vô i.”

⁶ Om Pestas dô hixôn he tiyi buc vigê vilu dì sec yon me buc vigê yuu dêc la Sisalia. Di vigwe vidiiên Pestas la dô vac xumac kot dì nêl vô nue ên nêb he i loc kô Pol mi lam. ⁷ Pol val dì he Yuda wê lam gê Jelusalem gee le hixôn Pol di so kiyang tibeac lec i. Léc kiyang wê he nêl ge, nôn ti o yêp vac lêm. ⁸ Mêd Pol nêl vô he ên nêbê, “A o nêl kiyang nipaên ti lec xolac wê il Yuda vông dì Anutu xumac ngibua di Lom gavman lêm.”

⁹ Pestas ngô kiyang tige lêc xo nêb he Yuda i yê i niviha om nêl vô Pol ên nêbê, “Ông obêc nêb ông ob la Jelusalem ge od a ob ngô kiyang wê ông vông ge gê Jelusalem.” ¹⁰ Léc Pol nêl ên nêbê, “Xumac wê a le vac ga, king Sisa xumac wê ob ngô kiyang wê a vông. Ông xovô pyap bê a o vông soën ti vô he Yuda lêm. ¹¹ A nêg soën ti obêc yêp tiyi wê xam ob hi a xib

lec ge od pyap, lêc kiyang wê he Yuda nêl lec a ge nôn obêc ma ge od xam ti tiyiên ma wê xam ob vông a la vac he vigê ge. A nêl bêga bê king Sisa ob ngô kiyang wê a vông ge i tii vac nang.” ¹² Mêd Pestas he nue kaunsil viac kiyang vòma, pyap dêc Pestas la nêl vô Pol ên nêbê, “Ông nêb ông ob la vô Sisa, om ông loc vô Sisa ên i ngô kiyang wê ông vông ge.”

Pestas nêl Pol kiyang kitong vô Aglipa

¹³ Buc ya la vêl di Yuda gavman levac ti lê nêbê king Aglipa yuu li vêx Benaisi mila Sisalia nêb yuu ob la yê Pestas. ¹⁴ Yuu dô buc ya lam la vêl di Pestas nêl Pol kiyang kitong vô king Aglipa bêga nêbê, “Ilage Piliks tung xomxo ti la kalabuhu lêc sea i dô di la, ¹⁵ di buc wê a la Jelusalem ge he Yuda levac wê mi si daa gee hixôn lie levac ya he nêl vô a ên nêb a titô kiyang wê i vông ge. ¹⁶ Lêc a nêl vô he ên a nêbê môp wê xe Lom vông ge ti o yêp wê xe ob vông myaviwen vô xomxo ti vaxvax ge lêm. Xomxo ti kiyang obêc yêp vô i ge od ob la le hixôn xomxo wê vông kiyang vô i ge di ici va ob nêl kiyang wê i vông ge kitong.

¹⁷ “Om he Yuda lam ga hixôn a, di a o val dô seac vêl lêm. Nge, vigwe vidiiên a la dô vac xumac kot di nêl mi he kô Pol mi lam vô a. ¹⁸ Mêd he Yuda kidi lec nêb ob vông kiyang vô Pol, di a xo ên a nêbê he ob nêl soên levac ti lec Pol, lêc he o nêl lêm, ¹⁹ di he nêl kiyang lec môp wê he Yuda mi kitaa vô Anutu ge di nêl lec xomxo ti lê nêbê Yesu wê yib lêc Pol nêbê xomxo tige kidi lec, om he vông kot vô Pol lec kiyang tige. ²⁰ A nêb a ob xovô kiyang tige kehe, lêc a piyôp ob la tiyi lêm. Om a nêl vô Pol ên a nêbê, ‘Ông obêc nêb ông ob la Jelusalem ge od a ob ngô ông nêm kiyang gê Jelusalem.’ ²¹ Lêc Pol nêb ob dô kalabuhu dêc king Sisa vaci obêc ngô kiyang wê i vông ge. Om a nêl vô a nuge vevac ên a nêb he i viac Pol niviha di i miloc vô buc wê a obêc vông i loc vô king Sisa ge.” ²² Pestas nêl bêge di Aglipa nêl vô Pestas ên nêbê, “Aca va ob ngô xomxo tige nêl kiyang.” Om Pestas nêl ên nêbê, “Titige ông ob ngô i nêl kiyang.”

²³ Mêd vigwe vidiiên Aglipa yuu li Benaisi val hixôn vunac vunac, di yuu hixôn tibii vevac levac ya di tibii Sisalia levac ya la vac xumac kitucmaên. Di Pestas nêl di tibii vevac kô Pol mi lam. ²⁴ Mêd Pestas nêl ên nêbê, “King Aglipa, hixôn xam vihati wê xam val dô hixôn xe gee, xam wê xomxo tiga. Ên he Yuda wê dô ga hixôn he wê dô Jelusalem gee, he vihati so vya vô i di nêl vya levac vô a ên nêb a hi i yib. ²⁵ Lêc a o tulec kiyang ti tiyi wê il ob hi i yib lec ge lêm. Di ici va nêb king Sisa vaci ob ngô kiyang wê i vông ge, om a nêb a ob vông i loc vô king Sisa. ²⁶ Lêc a o tulec kiyang soên ti vô i wê a ob kivuu kipihac i loc vô il xomxo levac Sisa ge lêm. Om king Aglipa, a kô xomxo tige mi lam vô ông hixôn xam vihati ên a nêb il xôn vihati ob ngô kiyang wê i vông ge di il obêc tulec kiyang ya vô i ge od a ob kivuu vac kipihac. ²⁷ Ên a xo ên a nêbê a obêc vông xomxo ti i loc vô Sisa, lêc a obêc nêl kiyang ti wê xomxo vông kot vô i ge kitong lêm ge, od ge tiyiên ma.”

¹ Mêd Aglipa nêl vô Pol ên nêbê, “Ông nêl ông kiyang ên xe ob ngô.” Om Pol vigê la kisii dì i nêl i kiyang kitong bêga nêbê, ² “King Aglipa, gwêbaga a xêgyaa vô niviha ên wê a ob nêl kiyang wê he Yuda

so lec a ge kitong vô ông, ³ ên ông xovô môp wê xe Yuda vông ge vihati hixôn kiyang wê xe mi nêlma lec ge, om a kitaa ông bê ông ngô kiyang wê a ob nêl ga dì ông nim i o lêc ma lec lêm.

⁴ “He Yuda vihati xovô ên he nêbê ilage wê a gên nipwo dì i lam tyip gwêbaga, a dô hixôn lige vac xe bom dì a la dô Jelusalem. ⁵ He Yuda xovô a ilage om he obêc nêbê nêl a kitong ge od he ob nêl bê a mi timu vô môp wê xe Palisi vông ge vihati niviha. Xe Palisi ge, xe vông yuac levac lec môp kitaa hixôn môp ya luu Yuda vông môp ya vêl. ⁶ Lêc gwêbaga he vông kiyang vô a dì a lam le vô ông mamnôn ên wê a vông i vin dì a dô bin kiyang wê Anutu hilu vô buge ilage nêbê obêc vô nôn lec timuênen ge. ⁷ He Yuda wê hipu vigê yuu dì tô mi la yuu ge he vông i vin kiyang tige dì he kitaa xêkizêc vô Anutu tiyi bucên yuu vidiiênen vihati dì dô bin kiyang tige. King Aglipa, a ênô vông i vin kiyang tige, lêc gwêbaga he Yuda vông kiyang vô a lec kiyang tige. ⁸ Bêna lêc xam ya xo ên xam nêbê Anutu o tiyi wê ob tipi vô xomxo vac yibênen ge lêmê?

⁹ “Ilage a xo ên a nêbê a obêc vông Yesu Nasalet lê vô nipaênen ge od obêc niviha, ¹⁰ om a la vông môp tibêge gê Jelusalem. Dì xomxo levac wê mi si daa gee tyuc lec, nêb a la kô xomxo wê vông i vin Yesu ge mi lam tung he i loc vac kalabuhu, dì buc wê he hilu kiyang nêb he ob hi xomxo vông vinênen i yib ge od a tyuc lec. ¹¹ Dì buc tibeac a la vông viyin vô he vac xumac lilo, ên a nêb he i sea vông vinênen wê he vông ge dì nêl kiyang nipaênen lec Yesu. A xêgyaa vô myavinê levac vô he, om a la vông viyin levac vô he wê dô teva ge hixôn.

Pol nêl kiyang lec wê vông i vin Kilisi ge

¹² “Mêgem xomxo levac wê mi si daa gee tyuc lec nêb a la Damaskas om he vông a la. ¹³ A mîla môp ti dì hiyôv tyip kitôn, lêc xêseac wê luu hiyôv vêl ge ti lam gê kisii ganê di linac lec a hixôn xomxo wê la hixôn a gee. ¹⁴ Mêd xe vihati tilii mi la xêp kibun, dì a ngô kiyang ti vac vya Yuda bêga nêbê, ‘Sol, bêna lêc ông vông viyin vô a? Môp tibêge tiyi xochê ông hi vixam lec xax manôn di vông myavinê vô ôcông va.’ ¹⁵ Mêd a kinêg ên a nêbê, ‘Apumtau, ông letya?’ Dì Apumtau nêl vô a ên nêbê, ‘A Yesu wê ông vông viyin vô a ge. ¹⁶ Om ông kidi mi le kisii, ên gwêbaga a hilung a vô ông ên a nêb ông tu a nug yuac dì ông ob nêl kiyang wê a hilung vô ông hixôn kiyang wê a ob nêl vô ông timuênen ge kitong vô xomxo. ¹⁷ A ob vô ông vêl ên he Yuda hixôn he tibii ba vigê. Dì a ob vông ông loc vô tibii wê o Yuda lêm ge, ¹⁸ ên ông vông he manôn i seac dì vông he i sea môp mapitoc dì lam dô vac xêseac, dì he i sea xêkizêc wê Seten vông ge dì lôm vô Anutu dì vông i vin a, ên Anutu i kitya he nêl nipaênen vêl dì he i dô hixôn xomxo wê Anutu vinoo he pyap ge.’

Pol nêl i yuac xolac kitong vô Aglipa

¹⁹ “King Aglipa, a ngô kiyang tige lam gê kisii, dì a o vô ninyag kitu vô lêm. ²⁰ Nge, a la nêl xolac vô xomxo Damaskas tax, nang dêc a la nêl gê Jelusalem dì a nêl vac vigwe Judia vihati, dì a la nêl vô tibii wê o Yuda lêm gee ya hixôn. A nêl bêga vô he ên a nêbê, ‘Xam pilepac xam dì vông nilôm i loc vô Anutu dì xam vông niviha ên i nêl kitong bê xam pilepac xam

vixôhilôg.’ ²¹ A nêl xolac bêge, om he Yuda la hôm a xôn vac Anutu xumac ngibua, nêb ob hi a xib. ²² Léc Anutu ngidu a xôn tiyi buc vihati di i val tyip gwêbaga, om a le vô xam mammôn di a nêl kiyang tiga vô xomxo wê viddaaén di he wê lê levac ge vihati. Kiyang wê a nêl ge, a nêl i tiyi kiyang wê Moses he plopete nêl ilage nêb obêc vô nôn lec timuên ge. ²³ Kiyang bêga nêbê, ‘Kilisi wê Anutu vông i lam ge obêc kô myavinê di yib, lêc obêc kidi lec vac yibê, di mug xomxo vihati di obêc nêl xêseac wê i vông ge kitong vô he Islel hixôn he wê o Islel lêm ge.’”

Pol nêl vô Aglipa nêb i vông i vin Kilisi

²⁴ Pol nêl kiyang bêge, lêc gavman levac Pestas keac levac lec i ên nêbê, “Pol, ông mav. Ông kô xovôrône tibeac om vông ông piyôp juda.” ²⁵ Léc Pol nêl ên nêbê, “Xomxo levac Pestas, a o mav lêm. Kiyang wê a nêl ge kiyang nôn di a piyôp yêp om a nêl kiyang niviha. ²⁶ Di king Aglipa xovô kiyang tige vihati pyap, om a nêl kitong vô i di a o xona ên i lêm. A xovô ên a nêbê kiyang tige vihati, Aglipa ngô di yê pyap, ên kiyang ti o yêp xôpacên lêm. ²⁷ King Aglipa, ông vông i vin plopete kiyang, me? A xovô ên a nêbê ông vông i vin.”

²⁸ Léc Aglipa nêl vô Pol ên nêbê, “Kwabo yang tya ga di ông nêb a vông i vin Kilisi?” ²⁹ Léc Pol nêl vô i ên nêbê, “Obêc buc kwabo me buc dia ge od obêc tiyi. Léc a kitaa vô Anutu ên a nêbê ông hixôn xam vihati wê xam ngô kiyang wê a nêl ge, xam tiyi xochê aca va lê, lêc sen wê ku a ge ob ku xam xôn lêm.”

³⁰ Pol nêl bêge mêt king Aglipa yuu li vêx Benaisi di gavman levac Pestas hixôn xomxo wê dô hixôn he gee, he vihati kidi lec ³¹ mi la vixun, di la nêl vôma ên nêbê, “Xomxo tige o vông nipaên ti tiyi wê il ob tung i vac kalabuhu me hi i yib ge lêm.” ³² Mêt king Aglipa nêl vô Pestas ên nêbê, “Xomxo tige obêc nêl bê Sisa i ngô kiyang wê i vông ge lêm ge od tiyi wê ông ob piwelac i vêl ên kalabuhu.”

27

Tibii vông Pol lec sip ên nêb i loc Lom

¹ Xe nêl kiyang pyap ên xe nêb xe ob la Lom wê yêp vac vigwe levac Itali ge, om he vông Pol hixôn tibii kalabuhu ya vac Lom levac ti lê nêbê Julias vigê nêb i kô he mi loc. Tibii tige tu levac ên tibii vevac 100 wê king Sisa vông ge. ² Mêt xe lec sip ti wê tibii Adlamitiam vông ge. Sip tige ob la le vac vigwe toto wê yêp vô gwec ninya vac vigwe levac Esia ge. Om xe lec sip mi la, di Alistakas wê lam gê Tesalonaika vac vigwe levac Masedonia ge la hixôn xe. ³ Di vigwe viduién titige xe mila Saidon. Mêt Julias yê Pol niviha om tyuc lec nêb Pol i loc yê lie wê dô Saidon ge ên he i vông yaén vô i. ⁴ Di xe sea Saidon mi la, lêc lea levac hôm sip xôn, om xe la hixôn kitôn Saiplas, ên xe nêbê i kisuu lea lec ên xe. ⁵ Mêt sip kô xe mi xe la gwec mahigun di xe luu vigwe levac Silisia yuu Pampilia vêl, di xe la Maila wê yêp vac vigwe levac Lisia ge.

⁶ Di Julias ngô wê sip ti lam gê Aleksandria di ob la Itali ge, om xe la lec sip tige. ⁷ Xe lum la tiyi buc ya di xe mila kwabo vô vigwe Naidas, lêc lea levac hôm sip xôn om tiyiên ma wê xe ob la bôbac ge, om xe la vô kitôn Klit nimi di luu vigwe Salmoni vêl di la. ⁸ Lea soo xe la ninya di xe xulac

vô gwec ninya Klit dì mila vigwe ti lê nêbê ‘Gwec Ninya Malehe’ wê yêp kwabo vô vigwe Lasia ge.

⁹ Buc tibeac la vêl dì buc wê he Yuda ngibua yaén ge tiyôô vac, om xe xovô ên xe nêbê buc wê gwec ob vô nipaén ge val om Pol nêl vô xe ên nêbê, ¹⁰ “Xame, a xovô ên a nêbê il obêc lec sip mi la nang ge od obêc vô viyin levac vô il dì obêc vông sip hixôn susu vihati vô nipaén dì il obêc xib hixôn.” ¹¹ Léc tibii levac Julias o vông i vin Pol vya lêm. Nge, vông i vin xomxo ti wê kô sip ge hixôn xomxo ti wê tu sip kehe ge vya. ¹² Vigwe tige o niviha tiyi wê sip ob le vac vô buc lea ge lêm, om xomxo wê la lec sip tige he tibeac xo ên he nêbê he ob sea vigwe tige dì la, dì obêc mila vigwe Piniks ge od he ob le vigwe tige dì lea i tip loc vêl lê. Piniks ge vigwe ti wê yêp vac vigwe Klit ge wê sip ob le niviha vac ge.

Lea levac vông gwec vô nipaén

¹³ Lea val malehe tya, om he xo ên he nêbê xe ob la tiyi xocbê he nêl ge, om xe lec sip dì pul anka lôm vac sip dì xe xulac vô Klit gwec ninya mi la. ¹⁴ Xe la myabo tya, lêc lea levac lam gê Klit ¹⁵ dì lam vông sip mya la vaxvax, om tiyiên ma wê sip ob la bôbac ge, om xe vông lea vaci kô sip. ¹⁶ Mêd xe mila kitôn nipwo ti lê nêbê Koda, dì kitôn tige kisuu lea lec ên xe, mêd he vông yuac levac lec pulên dipac wê sip didii ge, ¹⁷ mêd he pul i lam lec sip, pyap dì he ku sip xôn vac mahigun ya yihi, ên he xona ên he nêb lea obêc hibu sip. Dì he xona ên he nêb lea ob kô sip mi la tulec ngidax wê yêp vac gwec nilô kwabo vô vigwe Applika ge, om he vilun sel dì sip xoc gwec pileva. ¹⁸ Mêd lea lam xêkizêc om vigwe vidiiên he hôm kupac wê sip kô gee mi nêx sea vac gwec. ¹⁹ Dì vigwe vidii nang dêc he hôm susu xocbê sel yuu yihi yuubê ge dì nêx i la vac gwec hixôn. ²⁰ Buc tibeac la vêl, dì xe xêên hiyôv yuu pitua ma, dì lea viyiiên ge o tip la lêm, om xe xo ên xe nêbê, “Ga il ob xib mima vêl.”

²¹ Buc tibeac he o ya yaén ti lêm, mêd Pol le vac he mahigun dì nêl vô he ên nêbê, “Xame, xam obêc ngô kiyang wê a nêl ge dì il dô Klit ge od il ob tulec viyin levac tiga lêm dì kupac ob la vac gwec lêm. ²² Léc gwêbaga a ob nêl vô xam bê xam nilôm i o vô viyin lêm, ên xam ti obêc wib lêm, dêc sip tibed ge wê obêc vô nipaén. ²³ Èn vô bucén Anutu ti wê a tu i nu dì a mi kitaa vô ge vông angela ti lam le kwabo vô a, ²⁴ dì nêl bêga nêbê, ‘Pol, xonaên i ma, ên ông obêc la le vô Sisa manôn. Anutu ngô kitaaên wê ông vông ge om he vihati wê dô lec sip tiga, ti ob yib lêm.’ ²⁵ Angela nêl kiyang tige vô a, om xam lige, xam xonaên i ma, ên a vông i vin Anutu om a xovô ên a nêbê kiyang tige obêc vô nôn lec tiyi xocbê nêl vô a ge. ²⁶ Léc lea levac ob hisoo sip hixôn il dì il ob la lec kitôn ti.”

²⁷ Lea levac vông xe la vac gwec levac Edlia dì xe dô tiyi da yuu la vêl, dì vivuaên mahigun tibii wê kô sip ge yaxén nêbê sip val vô kwabo vô gwec ninya. ²⁸ Om he hilu ain viyin ti lec yihi dì tung i la vac gwec nilô dì hôm i lôm mi yê, lêc gwec gên madia tiyi xocbê 40 mita ge, dì xe la tya nang, dì he tung vac mi yê, lêc gwec madia tiyi xocbê 30 mita. ²⁹ Mêd he xona ên he nêb sip ob la tulec ngidax levac wê le kehe vô gwec ninya ge, om he vông anka yuudiyuu la vac gwec vô sip viwen timuên ên nêb i hôm sip xôn dì he kidu nêbê vigwe i vidii lutibed. ³⁰ Mêd he wê kô sip gee nêb he ob pec mi la om he hôm dipac dì vông i tô mi la vac gwec dì kityoo nêbê he ob kô anka ya mi la tung vac gwec vô sip viwen mugên ên i hôm sip

xôn. ³¹ Lêc Pol nêl vô tibii levac Julias hixôn i nue vevac ên nêbê, “Xomxo tigee ob dô vac sip lêm ge od xam xôn obêc wib mima.” ³² Om tibii vevac tigee la kitov yihi vêl ên dipac tige di gwec kô mi la.

³³ Vô kwabo lec wê vigwe ob vidii ge mêd Pol nêl vô he vihati ên nêbê, “Il dô vac viyin levac tiyi da yuu la vêl dì il o xa yaên ti lêm. ³⁴ Om a nêl xêkizêc vô xam bê xam kô yaên mi wa ên i ngidu xam xôn dì xam vô xêkizêc. Xam ngô lê. Xam ob tulec viyin ti lêm. Nge, xam vihati, xam ob dô niviha.” ³⁵ Pol nêl bêge mêd hôm blet ti dì kitaa vô Anutu vô he vihati manôñ, dì hibu mi ya. ³⁶ Om he vihati xêyaa vô niviha dì he ya yaên. ³⁷ Mêd xe wê xe dô vac sip tigee naba tiyi xocbê 276. ³⁸ He ya i den he dêc nêx wit nôn wê dô vac sip ge la vac gwec, ên nêb sip i vô viyin maén lec.

Sip vô nipaên

³⁹ Vigwe vidii vêl di he yê ma la kitôn ti wê le vac gwec mahigun ge, lêc he lungêñ vigwe tige. Lêc he yê vigwe ti wê sip ob la le vac ge wê luda niviha ge, om he xo ên he nêb obêc tiyi ge od he ob vông sip i loc le lec luda tige. ⁴⁰ Om he kitov yihi vêl ên anka di anka la yêp vac gwec, dì he piwelac yihi vêl ên stia wê mi popêñ sip ya ge, dì he yu sel ti la lec xax vô sip mugêñ ên he nêb lea i lam vihi lec dì kô sip mi loc kehe. ⁴¹ Om xe la, lêc sip la tulec luda wê le vac gwec nilô ge mêd sip viwen mugêñ la ving vac luda di le, dì gwec vuac mi lam hi sip viwen timuêñ hibu sea. ⁴² Mêd tibii vevac tigee xo ên he nêbê he ob hi xomxo kalabuhu gee i yib, ên ti i o lêc xoc gwec mi loc kehe dì pec mi loc lêm. ⁴³ Lêc tibii vevac levac tige nêb ob ngidu Pol xôn dì i dô niviha om le vac he xôn nêb he hiên tibii i ma. Mêd nêl vô he wê xovô gwec xocêñ gee nêbê he i sox vac gwec dì xoc mi loc mug di loc le kehe. ⁴⁴ Di nêl vô he baba nêbê he i yêp lec plang me sipmyahipu wê hibu sea ge di xoc gwec mi loc kehe. Om xe vông bêge di lam kehe di xe vihati dô niviha.

28

Pol dô Molta

¹ Xe lam dô kehe di ngô wê he nêl vigwe tige lê nêbê Molta. ² Mêd tibii vigwe tige vông niviha vô xe, ên lun val di vigwe vô ningigooêñ lê, lêc he vev ngwax vô xe di xe vihati nyuu. ³ Mêd Pol la vilu ngwax myapipu ên nêb ob vev lec ngwax, lêc ngwax nux myel ti di i lam nga Pol vigê miyux lec. ⁴ Mêd tibii Molta yê wê myel tige diyux lec Pol vigê ge, om he nêl vôme ên nêbê, “Xomxo tige mêd hi xomxo ti yib lêc o yib vac gwec lêm di val ga, lêc anutu ti wê vông myaviwen ge nêb i ob dô maviha lêm, om ob yib.” ⁵ Lêc Pol liloo myel tige la vac ngwax, dì dô niviha di o yaxêñ myavinê ti lêm. ⁶ Mêd xomxo tigee dô di yê Pol xôn ên nêb mêd Pol vigê obêc vuac di obêc yib lutibed, om he dô mi yaxêñ xuhu dia nêb mêd susu ti obêc vông i vô nipaên, lêc he o yê ti lêm om he pilepac vyâ di nêl ên nêbê Pol ge anutu ti.

⁷ Mêd tibii Molta nêñ xomxo levac ti lê nêbê Pablias, kibun wê i vông ge yêp kwabo vô vigwe tige, om Pablias kô xe mi xe la dô vac i ben di i viac xe niviha tiyi buc yon. ⁸ Lêc Pablias ma vông yidac ngwax tum di yaa xèlehe om yêp xumac lôma, mêd Pol la vô i di la kitaa di vyax vigê lec i, di i vô niviha lec. ⁹ Pol vông bêge om tibii Molta wê yidac gee vihati lam vô Pol di i vông he vô niviha lec. ¹⁰ Om tibii tigee viac xe niviha, di buc

wê xe ob sea he di la ge, he kô susu yaên ya mi lam tung vac sip ên nêb i ngidu xe xôn vac môp.

Pol sea Molta di la Lom

¹¹ Xe dô Molta di dentuc yon lam la vêl, mêt xe lec tibii Aleksandlia vông sip wê val le Molta vô buc lea ge, di xe la. Sip tige, anutu Sus nue yuu kinu le lec sip viwen mugên. ¹² Mêt xe la di mila vigwe Sailakyus di la dô buc yon. ¹³ Di xe sea Sailakyus di mila vigwe Lisiam, di vigwe vidiién titige lea val om kô xe mi xe la, di vigwe vidii nang di xe mila vigwe Pyutilai. ¹⁴ Vac vigwe tige, xe la tulec xomxo vông vinêna om he nêl xe xôn nêbê xe dô hixôn he da ti, om xe dô da ti vêl, nang di xe loc mi la ên xe nêb xe ob la Lom. ¹⁵ Lêc xomxo vông vinêna Lom ngô wê xe val ge om he ya lam vô xe vac Maket Apias di he ya lam vô xe vac vigwe ti lê nêbê Xumac Pasandia Yon. Pol yê he om Pol xêyaa vô niviha di i pimil Anutu.

¹⁶ Mêt xe xôn val vigwe Lom mêt gavman Lom tyuc lec nêb Pol vaci ob dô vac xumac ti, di tibii vevac ti ob dô hixôn i di yê i xôn.

Pol nêl Yesu xolac gê Lom

¹⁷ Buc yon la vêl, mêt Pol keac Yuda levac wê dô Lom gee lam om he lam kitucma di Pol nêl vô he ên nêbê, "Xam lige, a o vông ti so vô lige Yuda lêm, di a o nêl kiyang nipaên ti lec môt wê buge vông ge lêm. Lêc he hôm a xôn gê Jelusalem di vông a la vac he Lom vigê. ¹⁸ Mêt he Lom ngô kiyang wê a vông ge vihati, lêc he o tulec soén ti lec a wê he ob hi a xib lec ge lêm, om he nêb he ob piwelac a, ¹⁹ lêc he Yuda le vac xôn nêb tiyién ma om a nêg môt ti o yêp lêm, om a nêl ên a nêbê king Sisa vaci ob ngô kiyang wê a vông ge. Lêc ge od tiyi xocbê a ob vông kot vô lige Yuda lec kiyang ti lêm. ²⁰ Om gwêbaga a keac xam lam ên a nêb a ob xê xam di nêl kiyang tige kitong vô xam. A vông i vin di a bin kiyang ti wê il Yuda vihati dô bin ge, lêc he ku a xôn ya sen tiga ên wê a vông i vin kiyang tige."

²¹ Mêt he Yuda levac nêl vô Pol ên nêbê, "Il lige Judia ti o vông kipihac lam mi nêl ông kiyang vô xe lêm, di he ti o val nêl ông nêm nipaên ti vô xe lêm. ²² Lêc xe nêb xe ob ngô vô ông nilôm bôbac di ôcông va ob nêl vac myam, ên xe ngô wê xomxo vac vigwe vihati nêl kiyang nipaên lec xam xolac ba wê xam vông i vin Yesu ge."

²³ He nêl bêge om he Pol tung buc ti di buc tige xomxo tibeac la vô Pol vac xumac wê mi dô vac ge. Mêt Pol nêl xolac vô he vô pitoc yuu vidiién di i la vigwe bucên hixôn, om nêl Anutu ben kehe kitong vô he, di nêl Moses he plopete vyâ kitong ên nêb he i xovô bê Moses he plopete nêl kiyang tige lec Yesu. ²⁴ Om he wê ngô xolac wê Pol nêl ge, he ya vông i vin di ya vông vinêna ma. ²⁵ Om he nêlma lec kiyang tige di lop mi la vixun, lêc taxlee ge od Pol nêl kiyang vô he bêga nêbê, "Myakilôhô Ngibua nêl kiyang nôn vô plopet Aisaia lec buge ilage bêga nêbê,

²⁶ Ông loc nêl vô xomxo viyang tige bêga bê, "Xam ob ngô kiyang, lêc xam ob xovô kehe lêm, di xam ob wê, lêc xam ob wê susu ti lêm."

²⁷ Xomxo tigee nilô xêkizêc di he ninja vô kitu di he manôn toc om he manôn o yê susu ti lêm, di he ninja o ngô kiyang ti lêm, di he o xovô kiyang ti kehe lêm, om he ob vông nilô lam vô a ên a vông he vô niviha lec lêm."

²⁸ Anutu nêl bêge, om xam xovô bêga bê kiyang wê Anutu nêl ên nêbê ob vô il vêl ên nipaên ge, Anutu vông i la pyap vô tibii wê o Yuda lêm ge, ên he ge wê ob ngô kiyang tige dì vông i vin.” ²⁹ [Pol nêl kiyang tige pyap dì he Yûda la nêlma mabu lec kiyang tige.] ³⁰ Mêd Pol kisuu xumac ti mi dô vac tiyi klismas yuu, dì xomxo obêc mila vô i ge od mi viac he niviha, ³¹ dì nêl Anutu ben kehe kitong vô he dì tixuu he ya Apumtau Yesu Kilisi xolac. Pol nêl kiyang yêp seac vô xomxo dì xonaên ma, dì he o vibu i lêm.

LOM Kipihac wê Pol kivuu vô tibii Lom ge

Pol nêl i yuac sinale kehe kitong

¹ A, Pol, a kivuu kipihac ga vô xam Lom. A ga Yesu Kilisi nu yuac ti wê Anutu vinoo a nêb a tu sinale ti dì nêl i xolac ge.

² Xolac tiga, Anutu nêl vô plopete ilage mi he kivuu i yêp vac kipihac ngibua. ³ Xolac tiga nêl lec Anutu nu Yesu wê lam tu xomxo gê kibun ga, vac hipu wê Devit vông ge, ⁴ lêc Yesu ge xomxo xêseac pileva ti, om Anutu tipi vô i kidi lec mavîha vac yibén ên nêb xomxo i xovô bê Yesu ge Anutu nu wê xomxo xêkizêc. Yesu Kilisi ge il nêd Apumtau. ⁵ Mêd Anutu vông vizid vô xe lec Yesu tibed om vông yuac sinale vô xe ên nêb xe vông Kilisi lê i vô levac. Anutu vông bêge ên nêbê xomxo vac vigwe viyang viyang ge i ngô xolac di vông i vin di vông i vô nôn lec. ⁶ Di xam êno, Anutu tyuc xam ên nêb xam tu Yesu Kilisi xe.

⁷ Mêgem a kivuu kipihac ga vô xam tibii Lom wê Anutu xêyaa vin lec xam di i tyuc xam nêbê xam tu i nue ge. Il Mag Anutu yuu Apumtau Yesu Kilisi, yuu i vông vizid hixôn kiyang malehe i loc ngidu xam xôn.

Pol nêb ob la yê tibii Lom

⁸ A ob nêl kiyang vô xam tax bêga bê tibii nêl vông vinên wê xam vông ge vô levac vac vigwe vihati, om a hi vixag pec ên xam vô Anutu lec Yesu Kilisi lê. ⁹ A ga wê a vông nilôg la yadiluhu vô Anutu yuac di a nêl nu tuc xolac kitong, om Anutu vaci xovô wê a mi xo xam vac kitaâen tiyi lec buc vihati ge. ¹⁰ Lêc a gên o loc vô xam ila ti lêm, mêgem a mi kitaa vô Anutu ên a nêbê Anutu obêc tyuc lec ge od i lêc hilung môp wê a ob loc vô xam ge. ¹¹ Ên a nilôg kidu a ên nêb a loc xê xam, ên vông vizid wê Myakilôhô Ngibua vông ge ya vô xam ên i ngidu vông vinên wê xam vông ge xôn. ¹² Kehe bêga, a nêb vông vinên wê a vông ge i ngidu xam xôn, di xam êno, vông vinên wê xam vông ge i lêc ngidu a xôn, ên vông vinên wê il vông ge i ngidu il vihati xôn.

¹³ Xam lige, a nêb xam xovô bê buc tibeac a nêb a ob loc vô xam lê, lêc kiyang yuu yuac tibeac hôm a xôn om a o tiyi wê a ob loc ge lêm. Om a nêb a ob loc vông xolac vô xam ên i vô nôn vac xam mahigun i tiyi xocbê a la vông vac tibii baba ben ge. ¹⁴ A yuac yêp wê a ob nêl xolac vô tibii viyang viyang, om a ob nêl vô he Glik wê he xovô kiyang tibeac gee di he madiluhu êno, di a ob nêl vô tibii wê piyôp niviha gee di nêl vô he wê piyôp maên gee hixôn. ¹⁵ Mêgem a nilôg kidu a nêb a nêl xolac kitong vô xam Lom hixôn.

Anutu xolac ge xêkizêc

¹⁶ A nig ob yoc ên Anutu xolac lêm, ên xolac tiga xêkizêc wê Anutu vông ge, tiyi wê xomxo ti obêc vông i vin xolac ge od Anutu obêc kitya i nêb nipaêñ vêl dì tung i lôm lam dô vac xêseac nilô. Kiyang tige val vô xe Yuda tax dêc la vô tibii madiluhu timuêñ. ¹⁷ Ên xolac tiga nêl Anutu môp yêp seac bêga ên nêbê Anutu ob yê xomxo nêb he xomxo niviha, kehe

lec wê he vông i vin Kilisi ge, tiyi xocbê kiyang wê yêp vac xolac bêga ên nêbê, "Xomxo ti obêc vông i vin ge, od Anutu obêc yê i nêbê i xomxo niviha wê ob dô maviha ge."

Kiyang yêp vô xomxo vihati ên wê he vông nipaên ge

¹⁸ Il xovô ên il nêbê Anutu xêyaa vô myavinê vô xomxo nipaên om ici va obêc vông myaviwen vô he lec nipaên wê he vông ge, ên he vô nimi vô Anutu dì vông môp nipaên luu vêl, om nipaên wê he vông ge kitya kiyang nôn vêl ên he nilô. ¹⁹ Anutu ob vông myaviwen vô he, ên môp wê Anutu vông ge ti o yêp xôpacêni mi he lungêni lêm. Nge, vihati yêp seac tiyi wê xomxo ob yê di xovô ge, ên Anutu vaci hilung vô he. ²⁰ Vô buc mugêni ilage wê Anutu tung lag yuu kibun ge di i lam tyip gwêbaga hixôn, xomxo obêc yê susu wê Anutu tung ge od ob xovô bê Anutu ge Anutu nôn dì i xêkizêc wê ob yêp luta lêc luta ge. Vixôhilôg, xomxo o tiyi wê ob yê Anutu lec manôn ge lêm, lêc susu wê Anutu tung ge wê ob vông xovôen vô xomxo, om xomxo ti o tiyi wê ob nêbê i lungêni Anutu ge lêm.

²¹ Ên he xovô Anutu lê, lêc he o pimil Anutu lê dì nêl bê i Anutu lêm, di he o hi vixa pec ên vizid wê i vông ge lêm. Nge, he piyôp vô judajuda di he vyac xovôen ma, om vông he nilô vô mapitoc. ²² He yong he nêbê he tibii xovôen, lêc he tiyi xocbê tibii piyôp maén. ²³ He vô nimi vô Anutu maviha wê yibêni ob ma ge, di la yev vixa kitu vô anutu mayibêni wê xomxo sev i tiyi xocbê xomxo yuu menac di liliu yuu myel hixôn susu mayibêni mangwe. ²⁴ He vông môp nipaên bêge, mégem Anutu sea he di he nilô didii he mi la vac môp ningeac om he vông he ninivi vô nipaên lec môp tibêgee. ²⁵ Xomxo tigee sea Anutu kiyang nôn dì vông i vin kiyang kityooen. Méd he sea Anutu wê tu susu viyang viyang ge kehe ge di la yev vixa kitu vô di kitaa vô susu wê Anutu tung ge. Lêc Anutu ge maviha kehe mégem il ob pimil i lê i vô levac di i yêp luta lêc luta. Nôn.

²⁶ Xomxo vông môp nipaên tibêge, mégem Anutu sea he di he la vac môp nipaên wê he nilô kidu he nêb he ob vông ge, om vêx sea môp wê ob kô vux ge di vông môp nipaên vòma. ²⁷ Di he vux êno sea môp niviha wê ob kô vêx ge, di he nilô kidu lec nêb he ob la vô vux vaci, om he vux vông môp nipaên vòma, mégem heche va kô myaviwen nipaên tiyi môp wê he vông ge.

²⁸ He nêb he ob xovô Anutu vac piyôp wê he vông ge lêm, mégem Anutu sea he di he timu vô môp nipaên wê heche va piyôp xovô ge. ²⁹ Mégem xomxo tigee vông môp nipaên viyang viyang ge pup vac he nilô, om he doma vô xomxo susu, di he doma vô môp nipaên nêb he ob vông xomxo i vô nipaên, di he yê xomxo wê he susu tibeac ge nipaên, di he hi xomxo yib, di he xêyaa vô myavinê vòma, di he nêl kiyang kityooen, di he nêb he ob vông xomxo vihati i vô nipaên, di he yê xomxo nêni soén di keac lec i la ninya ninya, ³⁰ di he nêl kiyang kityooen lec xomxo, di he vô nimi vô Anutu, di he yong he di kô he lêc, di he piyôp la tulec môp paha wê ob vô nipaên ge mangwe hixôn, di he pwoo tae mae vya vac, ³¹ di he piyôp vô judajuda, di he nêl kiyang lê, lêc he o vông kiyang vô nôn lec lêm, di he xêyaa o vin lec lie lêm, di he o xo vigwe pisiv ên xomxo ti lêm. ³² Xomxo tigee xovô kiyang wê Anutu nêl ên nêbê xomxo obêc vông môp nipaên tibêgee ge od tiyi wê he ob yib lec nipaên wê he vông ge. He xovô kiyang

tige lê, lêc he o sea môp nipaên wê he mi vông ge lêm, dì he nêñ nipaên ti yêp hixôn bêga nêbê he pimil xomxo wê vông nipaên gee hixôn.

2

Anutu obêc yaxêñ xomxo vihati ge nêñ kiyang timuêñ

¹ Xam wê xam vô nilôm vô xomxo ya ên xam nêb he tibii nipaên ge, xam o tiyi wê xam ob yax nipaên wê xam vông ge vun lêm. Ên môp nipaên wê xam vô nilôm vô he ge yêp vô xam êno hixôn, om xam obêc vô nilôm vô he ge od xocbê xam vô nilôm vô xacxam va ge êno. ² Il xovô ên il nêbê Anutu obêc vông myaviwen nipaên vô xomxo wê vông môp nipaên tibêgee, dì Anutu môp wê ob yaxêñ he dì titô he ge od obêc la tiyi. ³ Xame, xam vô nilôm vô tibii lec môp nipaên wê he mi vông ge, lêc xam êno môp nipaên yêp vô xam, lêcom xam so ên xam nêbê mêd myaviwen wê Anutu vông ge obêc tulec xam hixôn lêm. ⁴ Anutu vông môp niviha vô xam luu vêl, om dô bin xam buc xuhu dia dì o vông myaviwen ti vô xam lutibed lêm. Lêc mêd xam wê Anutu môp niviha tige xocbê kiyang pileva ti? Anutu vông niviha vô xam ên nêb xam xovô dì pilepac xam, lêc mêd xam o xovô lêm? ⁵ Xam nilôm yen xêkizêc ta di xam o pilepac xam lêm, om ge tiyi xocbê xam kituc nipaên wê xam vông ge vô levac vô xam. Mêgem obêc vô buc timuêñ wê Anutu obêc titô xomxo nêñ kiyang ge od obêc vông myaviwen vô xam lec nipaên wê xam vông ge. ⁶ Ên Anutu obêc vông myaviwen vô xomxo vihati i tiyi môp wê he toto mi vông gee. ⁷ Om xomxo wê le xêkizêc vac môp niviha di myag môp wê he ob dô hixôn Anutu vac xêseac di kô lê levac ge, od Anutu obêc vông xomxo tigee dô maviha luta lêc luta. ⁸ Dom he wê xovô heche va dì vô nimi vô kiyang nôn dì la vac môp wê nipaên ge od Anutu xêyaa obêc vô myavinê vô he di kitya he vêl. ⁹ Mêgem xomxo tigee, viyin levac obêc hivun he xôn dì he ob kô myavinê levac luu vêl lec nipaên wê he vông ge, om myaviwen ob tulec xomxo nipaên vihati, he Yuda hixôn tibii baba ya. ¹⁰ Di xomxo wê mi vông môp niviha ge, Anutu obêc tung he la dô vac xêseac gê lag puunê di vông lê levac vô he di he ob dô vac kiyang malehe nilô, om obêc vông vô xomxo wê niviha ge vihati, he Yuda hixôn tibii baba ya. ¹¹ Ên Anutu obêc yaxêñ xomxo vihati tiyima, om xomxo vihati obêc la le vô Anutu manôn, dì i yaxêñ môp wê he toto vông ge.

¹² Tibii madiluhu wê lungêñ Moses xolac ge, he obêc vông nipaên ge od Anutu ob titô he nêñ kiyang ya Moses xolac lêm. Nge, heche va obêc yib vîdaaén lec nipaên wê he vông ge. Di Yuda wê he xovô Moses xolac ge, he obêc vông nipaên ge od Anutu ob titô he ya Moses xolac wê he mi ngô ge. ¹³ Lêc xomxo obêc ngô Moses xolac pileva ge od o tiyi wê Anutu ob yê niviha ge lêm. Nge, xomxo wê vông xolac tyo vô nôn lec ge wê Anutu ob yê he niviha. ¹⁴ Tibii madiluhu o xovô Moses xolac lêm, lêc heche va piyôp vinoo kiyang ya tiyi xocbê kiyang wê yêp vac Moses xolac ge, om kiyang tige tiyi xocbê heche va xolac wê yêp vô he ge. ¹⁵ Om môp wê he vông ge nêñ kitong ên nêbê xolac wê Anutu vông vô Moses ge yêp vac he nilô êno, di heche va nilô le yaxêñ môp vilu vilu, om môp ya he nêbê niviha dì ya he nêbê nipaên. Om môp tige nêñ kitong hixôn ên nêbê xolac yêp vac he nilô. ¹⁶ Mêgem Anutu obêc yaxêñ xomxo nêñ kiyang vô buc timuêñ di ob vông yuac vac Yesu Kilisi vigê dì Yesu ob yaxêñ kiyang vihati wê yêp

xôpacêñ vac xomxo nilô ge dì titô. Kiyang tige yêp vac xolac nilô mi a nêl vô xomxo.

Yuda yong he lec Moses xolac ên nêb ob vô niviha vô he

¹⁷ Xame, xam wê xam nêbê xam lêm Yuda ge, xam hôm Moses xolac xôn ên xam nêbê ob vô niviha vô xam, dì xam yong xam ên xam nêbê xam ge Anutu nue xam. ¹⁸ Xam xovô môp wê Anutu xéyaa vin lec ge pyap, ên xomxo tixuu xam ya Moses xolac om xam xovô môp niviha. ¹⁹⁻²⁰ Xam xo ên xam nêbê xovôên hixôn kiyang nôn yêp vac xolac wê Moses vông ge nilô. Om xam mi nêl ên xam nêbê, “A tiyi wê a ob hilung môp niviha vô xomxo wê matocêñ ge, dì a ob hilung xêseac vô he wê dô vac mapitoc ge. Dì a tiyi wê a ob tixuu he wê gên o xovô lêm ge, dì he wê tiyi xochê xomxo nipwo ge.” ²¹ Vixôhilôg, xam mi tixuu xomxo dì vông xovôên vô he, lêc bêna lêc xam o vông xovôên vô xacxam va lêmê? Xam mi nêl xolac vô xomxo ên xam nêbê he i o lêc vông yôdac vô xomxo susu lêm, lêc mêd xam êno, xam mi vông yôdac vô xomxo susu hixôn. ²² Di xam mi nêl vô xomxo ên xam nêbê, “Le i lêc vông yôdac vêx yuu vux lêm,” lêc mêd xacxam va mi vông hixôn. Di xam nêbê xam xêmyaa o vin lec anutu mayibên lêm, lêc bêna lêc xam la vun susu vac xumac ngibua wê tibii madiluhu vông ge? ²³ Xam yong xam ên xam nêbê xam xovô Anutu xolac pyap, lêcom xam o timu vô xolac mi vông i vô nôn lec lêm, om ge tiyi xochê xam vông Anutu lê vô nipaên, ²⁴ tiyi xochê kiyang wê yêp vac kipihac xolac bêga ên nêbê, “Tibii wê o Yuda lêm ge yê môp nipaên wê xam Yuda mi vông ge om so vya vô Anutu.”

Yuda môp wê mi gôl ninivi ge o vô niviha vô he lêm

²⁵ Xam obêc timu vô xolac wê Anutu nêl vô Moses ge od môp wê gôlên ninivi ge ob vô niviha vô xam, lêc xam obêc pwoo xolac vac ge od môp wê xam mi gôl nimnivi ge, tiyi xochê xam vông lec kisii dì xam o xovô Anutu lêm. ²⁶ Di tibii madiluhu wê gôlên ninivi ma ge obêc timu vô Anutu xolac ge od Anutu ob yê he niviha tiyi xochê xomxo wê gôl ninivi ge. ²⁷ Xam Yuda, Anutu xolac yêp vac kipihac wê xam vông ge om xam gôl nimnivi tiyi, lêc xam o vông xolac tyo vô nôn lec lêm. Mêgem tibii wê ninivi gôlên ma ge obêc timu vô Anutu xolac ge od môp wê he vông ge obêc nêl xam kitong seac bêga bê xam tibii nipaên. ²⁸ Môp wê ninivi ge ti o yêp wê ob nêl Yuda kitong nêbê he Yuda nôn ge lêm. Di môp ninivi gôlên ge, kehe o yêp vac ninivi gôlên pileva lêm. ²⁹ Xomxo wê Yuda nôn ge, kehe yêp vac wê he vông nilô la yadiluhu vô Anutu ge, di môp wê ob nêl he kitong nêbê he Anutu nue nôn ge, kehe o yêp vac môp ninivi gôlên ge lêm. Nge, ge yuac wê Myakilôh Ngibua vông vac he toto nilô. Xomxo tibêgee ob kô lê levac ge od ob kô lê levac vô xomxo kibun ga lêm. Nge, obêc kô lê levac vô Anutu môci.

3

Anutu nêl Yuda nén nipaên yêp seac vô he manôñ

¹ Om xomxo Yuda nginoo tibii madiluhu vêl lec vatya? Di môp ninivi gôlên ge ob vô niviha vô he lec vatya? ² Xam wê. Yuda tulec vizid levac luu xomxo baba ge vêl. Vizid taxlee bêga nêbê Anutu vinoor he dì nêl i xolac vô he nêb he i viac. ³ Lêc he ya o vông i vin xolac tige lêm. Om obêc bêna? Mêd môp wê he vông ge obêc vông Anutu sea i kiyang wê nêl vô

he ge, me? ⁴ Ma vêl. Anutu ob sea i kiyang ti lêm. Ên il vihati yang obêc nêl kiyang kityooên, dom Anutu tibed ge wê obêc nêl kiyang hixôn nôn, tiyi xocbê kiyang wê nêl lec Anutu mi i yêp vac xolac bêga ên nêbê, “Kiyang wê ông nêl vô xomxo ge, he obêc ngô dì xovô nêbê niviha, dì he ti obêc nêbê vông kiyang ti vô ông ge od ông kiyang nôn obêc nginoo he vêl.”

⁵ Môp nipaên wê il vông ge obêc nêl môt niviha wê Anutu vông ge kehe kitong vô xomxo ge, od il ob nêbê va? Il ob nêl bê môt wê Anutu ob vông myaviwen vô xomxo lec nêl nipaên ge, mêd Anutu vông i so, me? Kiyang tiga a nêl i tiyi xomxo piyôp wê mi nêl ge. ⁶ Lêc kiyang tibêge kiyang kityooên. Ên môt wê Anutu vông ge tiyiên obêc ma ge od o tiyi wê ob yaxênen xomxo nêl kiyang ge lêm. ⁷ Xomxo ya nêl ên he nêbê kiyang kityooên wê he mi timu vô ge obêc vông Anutu kiyang nôn yêp seac dì vông i lê i vô levac, om Anutu o tiyi wê ob nêl bê he xomxo nipaên dì vông myaviwen vô he ge lêm. ⁸ He ya nêl ên he nêbê, “Om il ob vông môt nipaên i luu vêl, ên niviha obêc val lec tige.” Kiyang tibêge o tiyi lêm. Lêc xomxo ya so vya lec a ên nêbê a mi nêl kiyang tibêge. Om xomxo tibêgee obêc tulec myaviwen nipaên tiyi môt nipaên wê he mi vông ge.

Xomxo kibun ga vihati dô vac nipaên

⁹ Om il ob nêbê va? Xe Yuda nginoo xomxo baba vêl, me? Ma vêl. Ên a nêl pyap vô xam ên a nêbê xe Yuda hixôn xam tibii ba, il xôn vihati dô vac nipaên nilô. ¹⁰ Tiyi xocbê xolac nêl bêga ên nêbê,

“Xomxo wê Anutu ob yê nêb he xomxo niviha ge, ti dôen ma. ¹¹ Dì xomxo piyôp niviha ti o dô lêm, dì xomxo wê nêb ob myag Anutu mi la tulec nôn ge, ti o dô lêm. ¹² Ên xomxo vihati vô nimi vô Anutu dì la vac môt nipaên nilô, om he ti o vông môt niviha ti lêm. Ma vêl. ¹³ He mya mi nêl kiyang nipaên tiyi xocbê lôva wê xomxo yibêna yêp vac ge lêc mya tax dì nuhu lam ge, om he mya mi nêl kiyang kityooên, dì kiyang nipaên wê he nêl ge la vông xomxo vô nipaên tiyi xocbê myel mya kilin wê nga xomxo ge. ¹⁴ He mi nêl vya lôt xomxo ên nêb i yib vêl. ¹⁵ He tup lutibed ên nêb he ob la hi xomxo i yib. ¹⁶ Dì môt wê he vông ge vông xomxo vô nipaên dì vông he dô vac viyin. ¹⁷ He lungén môt wê ob dô vac kiyang malehe ge, ¹⁸ dì he o xona ên Anutu lêm.” Xolac nêl bêge.

¹⁹ Il xovô ên il nêbê kiyang wê yêp vac xolac ge Anutu nêl vô xomxo wê dô vac xolac nilô ge ên nêb he i timu vô, lêc il o timu vô vihati lêm, om xomxo ti o tiyi wê ob nêl vô Anutu bê i xomxo niviha wê timu vô xolac vihati ge lêm. Nge, xomxo kibun ga vihati tiyi wê ob tulec myaviwen vô Anutu manônen ge. ²⁰ Ên xomxo obêc nêb timu vô xolac wê Anutu nêl vô Moses ge od môt ge o tiyi wê ob vông Anutu yê he niviha ge lêm, ên xolac wê Moses vông ge nêl kitong vô il ên nêbê il tibii nidpaên.

Xomxo wê vông i vin Yesu ge, Anutu ob yê nêb he xomxo niviha

²¹ Gwêbaga môt wê Anutu ob yê xomxo nêb he xomxo niviha ge lam yêp seac. Môt tige, kehe o yêp vac Moses xolac lêm, lêc Moses xolac hixôn plopete kiyang nêl lec môt tige hixôn. ²² Môt yêp bêga ên nêbê xomxo ti obêc vông i vin Yesu Kilisi ge od Anutu ob yê nêb i xomxo niviha wê

nipaên ti o yêp vô i ge lêm. Di Anutu ob vông vô xomxo wê vông i vin ge vihati tiyima, ên xomxo ngwe o bangwe di ngwe bangwe lêm. ²³ Nge, il vihati yang, il vông môp nipaên, om il o tiyi wê il ob tulec xêseac wê Anutu vông ge lêm. ²⁴ Léc Anutu xo vígwe písiv ên il om vông vízid levac vô il bêga ên nêbê vông Yesu Kilisi lam vô il vêl ên nipaên, om Anutu yê il nêbê il xomxo niviha. Lêc il o kisuu ya susu ti lêm. Nge, Anutu vông pileva vô il lec yuac niviha wê Yesu Kilisi vông ge. ²⁵ Anutu vông Yesu lam yib mi kipyax i hi sea ên nêbê xomxo i vông i vin Yesu, ge od Anutu obêc kitya he nêni nipaên vêl. Anutu vông Yesu lam ên nêb môp wê ob yê xomxo nêb niviha ge i yêp seac vô xomxo, ên ilage Anutu yê nipaên wê xomxo vông ge, lêc o vông myaviwen vô he lêm. Nge, hôm xôn mi i yêp. ²⁶ Léc gwêbaga Anutu kitya il nêd nipaên vêl lec Yesu Kilisi, om il ob xovô bê Anutu ge xêseac pileva di niviha kehe, di xomxo wê vông i vin Yesu ge Anutu ob yê he tiyi xochê xomxo niviha.

²⁷ Om môp ti yêp wê il ob kô il lec ge, me? Môp ti o yêp bêge lêm. Mêil il ob kô il lec ên wê il timu vô xolac wê Moses vông ge, me? Ma vêl. Ên Anutu yê il niviha lec vông vinêr wê il vông ge, om o tiyi wê il ob yong il ge lêm. ²⁸ Ên il xovô ên il nêbê môp wê Anutu ob yê xomxo niviha ge, kehe o yêp vac xolac wê Moses vông ge lêm. Nge, kehe yêp vac wê xomxo obêc vông i vin Yesu Kilisi ge.

²⁹ Il ob nêl bê Anutu tu Yuda vaci Anutu di o tu tibii baba Anutu lêm, me? Ma vêl. Tibii wê o Yuda lêm ge, Anutu tu he Anutu hixôn. ³⁰ Vixôhilôg nôn, Anutu tibed, om tibii Yuda wê ninivi gôlén ge obêc vông i vin ge od Anutu ob yê he niviha, di tibii baba wê gôlén ninivi ma gee obêc vông i vin ge od Anutu ob yê he niviha éno. ³¹ Léc môp wê il vông i vin Yesu ge ob kitya Moses xolac vêl lêm. Nge, il ob hôm Moses xolac xôn mi i yêp hixôn.

4

Anutu yê Eblaham niviha ên wê vông i vin ge

¹ Om il ob nêl kiyang bêna lec il bug Eblahamé? ² Anutu obêc yê Eblaham niviha lec wê vông yuac niviha ge od Eblaham obêc tiyi wê ob yong i ge, lêc o tiyi wê ob yong i vô Anutu manôn ge lêm. ³ Ên kiyang yêp vac kipihac xolac bêga ên nêbê, "Eblaham vông i vin Anutu om Anutu yê vông vinêr wê i vông ge, nêb i xomxo niviha." ⁴ Il xovô ên il nêbê yuac wê yêp vô il gê kibun ga, xomxo ti obêc vông yuac di kô mone lec ge, od mone wê i kô ge, tibii o vông pileva vô i lêm. Nge, vông lec yuac wê i vông ge. ⁵ Xomxo môp bêge yêp, lêc môp wê Anutu vông ge o ngwe bêge lêm. Ên Anutu o yê yuac wê xomxo vông ge nêbê i xomxo niviha lêm. Nge, ob yê wê xomxo vông i vin ge di nêl ên nêb i xomxo niviha lec môp vông vinêr tibed. Ên Anutu ge wê kitya il nêd nipaên vêl di yê il tiyi xochê xomxo wê nipaên ti o yêp vô il lêm ge. ⁶ Devit éno nêl kiyang lec xomxo wê Anutu yê nêbê he xomxo niviha ge, ên nêbê he hi vixa pec ên wê Anutu yê he niviha ge, lêc kehe o yêp vac yuac niviha wê he vông ge lêm. ⁷ Om Devit kiyang yêp bêga ên nêbê,

"Xomxo wê Anutu kitya he nêni nipaên vêl di hi i yib ge, he ob dô hixôn xêyaa niviha. ⁸ Di xomxo wê Anutu o hôm he nêni nipaên xôn lêm ge, od he ob dô hixôn xêyaa niviha."

⁹ Om kiyang tige yêp vô xomxo tina? Mêd yêp vô he Yuda wê gôl ninivi ge vaci, me yêp vô xomxo wê gôlên ninivi ma ge hixôn? Ge nêl lec xomxo vihati. Èn kiyang yêp bêga ên nêbê, “Vông vinê wê Eblaham vông ge, Anutu yê ên nêbê i xomxo niviha.” ¹⁰ Om xam xovô lê. Vô buc tina Anutu yê Eblaham nêbê i xomxo niviha? Ge nêl vô buc wê Eblaham gôl ninivi pyap ge, me nêl vô buc wê ninivi gôlên gên ma ge? Ge nêl vô buc wê Eblaham gôlên ninivi gên ma ge. ¹¹ Èn buc wê ninivi gôlên gên ma ge od Eblaham vông i vin Anutu tax di Anutu yê nêbê i xomxo niviha. Pyap dêc gôl ninivi timuên ên nêbê môp ninivi gôlên i nêl kitong bê Anutu yê Eblaham nêbê i xomxo niviha ên wê vông i vin ge. Mêgem tibii wê ninivi gôlên ma gee, lêc he vông i vin Anutu di Anutu yê he niviha, om Eblaham tiyi xocbê he bu. ¹² Di xomxo wê gôlên ninivi gee, he êno tiyi xocbê Eblaham bue. Lêc o nêl kiyang lec ninivi gôlên pileva mô lêm. Nge, nêl lec he wê gôl ninivi di vông i vin tiyi xocbê Eblaham vông i vin vô buc wê gên o gôl ninivi lêm ge.

Kiyang wê Anutu hilu vô Eblaham ge ob vô nôn lec vô xomxo wê vông i vin ge

¹³ Ilage Anutu hilu kiyang vô Eblaham he bue ên nêbê ob vông kibun vihati vô he. Lêc kiyang tige Anutu o hilu vô Eblaham ên wê mi timu vô xolac ge lêm. Nge, hilu vô Eblaham ên wê vông i vin Anutu om Anutu yê nêbê i xomxo niviha ge. ¹⁴ Èn kiyang wê Anutu hilu pyap ge obêc vô nôn lec vô xomxo ên wê he mi timu vô Moses xolac ge, od vông vinê wê he vông ge obêc pileva, di kiyang wê Anutu hilu vô he ge, he ob yê tiyi xocbê kiyang pileva. ¹⁵ Il xovô ên il nêbê xomxo ti obêc pwoo Moses xolac vac ge od ob tulec myaviwen. Xolac yêpêñ obêc ma ge od o tiyi wê il ob nêl bê xomxo pwoo kiyang vac ge lêm. Lêc xolac yêp, om vông xovôñen vô il.

¹⁶ Om kiyang wê Anutu hilu vô Eblaham ge ob vô nôn lec vô xomxo wê vông i vin ge, ên vizid wê Anutu hilu ge, Anutu nêb ob vông pileva vô Eblaham bue vihati. Lêc ob vông vô xomxo wê mi timu vô Moses xolac ge vaci lêm. Nge, ob vông vô xomxo vihati wê vông i vin xocbê Eblaham ge. Eblaham ge xocbê il vihati bug mugên, ¹⁷ tiyi xocbê kiyang wê Anutu nêl vô Eblaham mi i yêp vac xolac bêga ên nêbê, “A vinoo ông tu xomxo vihati bu.” Mêgem kiyang tige vô nôn lec mi yêp vô Anutu. Anutu ti wê Eblaham vông i vin i ge, ge wê ob tipi vô xomxo yibêñ kidi lec maviha, di i wê ob nêl susu wê gên ma ge vihati ob lam le seac.

¹⁸ Anutu nêl vô Eblaham ên nêbê, “Bume obêc vô tibeac hiwocêñ.” Eblaham ngô kiyang tige di vông i vin ên nêbê obêc vô nôn lec. Môp ti o yêp wê kiyang ob vô nôn lec ge lêm, lêc Eblaham vông i vin xêkizêc di yaxêñ kiyang. Mêgem Eblaham tiyi xocbê xomxo tibeac, kinu i.

¹⁹ Eblaham vô kipwoc di klismas wê i vông ge vô kwabo lec 100 di vinê Sela êno vô vêxta om yuu o tiyi wê yuu ob kô nue ti ge lêm. Eblaham xo bêge lê, lêc vông vinê wê i vông ge yêp xêkizêc ta, ²⁰ di o sea vông vinê wê i vông ge lêm. Di nilô o la yuu lec kiyang wê Anutu hilu vô i ge lêm. Nge, vông i vin xêkizêc ta di pimil Anutu, ²¹ ên Eblaham xovô vinux yang ên nêbê, “Anutu tiyi wê ob vông kiyang wê hilu vô a ge ob vô nôn lec.” ²² Mêgem Anutu yê vông vinê wê Eblaham vông ge nêb Eblaham xomxo niviha.

²³ Kiyang yêp vac xolac bêga ên nêbê, “Anutu yê nêb i xomxo niviha.” Kiyang tige o nêl lec Eblaham tibed lêm. ²⁴ Nge, nêl lec il xôn vihati, ên nêb il obêc vông i vin Anutu wê tipi vô il lig Apumtau Yesu kidi lec vac yibêñ ge, od Anutu ob yê il nêb il xomxo niviha. ²⁵ Ên Anutu vông Yesu lam yib ên il nêd nipaên, di Anutu tipi vô Yesu kidi lec vac yibêñ ên nêb ob yê il tiyi xocbê il xomxo niviha.

5

Anutu yê ên nêb il xomxo niviha

¹ Il vông i vin Yesu om Anutu yê nêb il xomxo niviha, mêgem il lig Apumtau Yesu Kilisi vông Anutu xêyaa myavinê tip la di tung il la dô vac xêyaa vin lecên wê Anutu vông ge. ² Yesu vaci didii il mi la tung vac vizid yuu malehe mi il dô vac gwêbaga, di il vông i vin ên il nêbê obêc buc timuêñ ge od il ob la dô vac xêseac hixôn Anutu, om gwêbaga il ob dô di yaxêñ buc tige hixôn xêdyaa niviha. ³ Lêc il ob hi vixad i pec ên kiyang tige mô lêm. Nge, il ob hi vixad i pec ên viyin wê ob val vô il ge hixôn. Ên il xovô ên il nêbê viyin tige ob vông il le xêkizêc, ⁴ di il obêc le xêkizêc vac viyin ge od il ob tiyi xocbê xomxo wê Anutu yaxêñ he, lêc he le xêkizêc om Anutu yê nêbê niviha ge, di Anutu obêc yê il niviha ge od il ob vông i vin di yaxêñ vizid wê Anutu obêc vông vô il timuêñ ge. ⁵ Di il obêc vông i vin mi yaxêñ vizid tige ge od vông vinêñ wê il vông ge obêc viddaaén lêm, ên Anutu obêc vông i vô nôn lec timuêñ. Il xovô bêge, ên Myakilôh Ngibua wê Anutu vông i lam vô il ge vông xêyaa vin lecên wê Anutu vông ge lam hivun il xôn.

⁶ Ilage il xêkizêc o tiyi wê ob vô il vêl ge lêm, lêc vô buc gwêbaga Kilisi lam yib, ên nêb ob kitya il wê il vô nimid vô Anutu ge nêd nipaên vêl. ⁷ Môp wê il xomxo vông ge bêga nêbê xomxo ti ob yib mi kisuu xomxo niviha ti lec lêm. Lécom mêt xomxo ti ti tiyi wê ob vông he vac yibêñ ên kisuu xomxo niviha lec. ⁸ Dom môt wê Anutu vông ge yêp bêga ên nêbê yê wê il gên dô vac nipaên nilô ge, om vông Yesu lam yib ên nêb ob ngidu il xôn, om môp tige nêl kitong seac bêga nêbê Anutu xêyaa vin lec il luu vêl. ⁹ Yesu hi vông Anutu yê il niviha di kitya il nêd nipaên vêl om il xovô vinux ên il nêbê Yesu ob vô il vêl ên xêyaa myavinê wê Anutu ob vông vô il timuêñ ge. ¹⁰ Ên ilage Anutu yê il tiyi xocbê tibii wê vông vevac vô i ge, lêc nu tuc Yesu lam yib om vông kisoac ên il di vông il lax dô hixôn ma Anutu. Il dô hixôn Anutu, om il xovô vinux ên il nêbê maviha wê Yesu vông ge obêc vông il la dô madviha di ob vô niviha vô il luu vêl. ¹¹ Dêc kiyang o tibed ge lêm. Il ob hi vixad i pec ên Anutu ên wê il lig Apumtau Yesu Kilisi didii il lax dô hixôn ma Anutu hixôn kiyang malehe ge.

Adam vông xomxo dô vac môp yibêñ, di Kilisi vông xomxo dô vac môp mayîha

¹² Il xovô bêga ên il nêbê xomxo tibed wê nêbê Adam ge pwoo kiyang vac, om môp nipaên tige vô levac gê kibun, di nipaên tige didii il vac yibêñ, om yibêñ sox vac sox vac mi la hivun xomxo vihati xôn, ên xomxo vihati vông môp nipaên. ¹³ Anutu gên o vông xolac vô Moses lêm di nipaên yêp lec kibun tax, lêc xolac gên ma, om o tiyi wê ob nêl nipaên totô ge lêm. ¹⁴ Lêc môp wê yibêñ ge yêp vô xomxo vihati vô buc wê Adam vông ge di i lam tyip vô buc wê Moses vông ge hixôn. Vixôhilôg, xomxo tigee he

ya o pwoo Anutu kiyang vac tiyi xocbê Adam ge lêm, lêcom he vihati yib hixôn.

Adam ge tixuu lec xomxo ngwe wê val timuên ge,¹⁵ lêc nipaên wê Adam vông ge o tiyi xocbê vizid wê Anutu vông vô il ge lêm. Ên xomxo tibed vông nipaên om xomxo vihati ob yib, lêc Anutu xo vigwe pisiv ên il om vông vizid niviha lam hivun il tibeac xôn lec Yesu Kilisi nôn tibed. Om il kô vizid tibeac luu vêl, lêc il o kisuu ya susu lêm. Nge, Anutu vông pileva vô il.¹⁶ Om vizid wê Anutu vông pileva vô il ge, nôn o tiyi xocbê nôn wê yêp vac nipaên wê Adam vông ge lêm. Ên Adam vông môt nipaên om Anutu yaxên lêc nêbê xomxo ob yib mi la vac nipaên. Dom xomxo wê timuên gee he pwoo Anutu kiyang vac, lêc Anutu xo vigwe pisiv ên he dì vông vizid yuu malehe vô he bêga nêbê kitya he nén nipaên vêl dì yê nêb he xomxo niviha.¹⁷ Ilage Adam vông môt nipaên, om môt yibên hivun xomxo kibun ga vihati xôn ên wê xomxo tige tibed vông nipaên ge. Lêc môt niviha wê xomxo tibed Yesu Kilisi vông ge luu môt nipaên wê Adam vông ge vêl. Ên Anutu vông vizid levac vô xomxo om kitya he nén nipaên vêl dì yê nêb he xomxo niviha lec yuac wê Yesu vông ge, om xomxo obêc vông i vin Yesu ge od he ob kô lê levac dì dô maviha luta lêc luta.

¹⁸ Xomxo tibed wê nêbê Adam ge wê vông môt nipaên ilage, om myaviwen nipaên wê i vông ge tulec xomxo vihati hixôn, lêc xomxo tibed Yesu Kilisi vông môt niviha, om Anutu kitya xomxo vihati nén nipaên vêl dì vông he dô maviha.¹⁹ Xomxo tibed ge pwoo kiyang vac, om vông xomxo tibeac dô vac nipaên. Lêc xomxo ngwe bed Yesu Kilisi wê vô ninya lehe vô Anutu kiyang mi vông i vô nôn lec, om môt tige vông Anutu yê xomxo tibeac nêb he xomxo niviha.

²⁰ Anutu vông xolac vô Moses, ên nêb i nêl xomxo nén nipaên i yêp seac, mêgem môt wê xomxo pwoo xolac vac ge vô levac vô he, lêc xêyaa vin lecén yuu malehe wê Anutu vông ge, levac mabu luu vêl.²¹ Vixôhilôg, môt nipaên hivun xomxo vihati yang xôn dì he dô vac môt mayibên, lêc gwêbaga vizid levac wê Anutu vông ge lam hivun il xôn, om Anutu kitya il nêd nipaên vêl dì yê il ên nêb il xomxo niviha wê il ob dô madviha luta lêc luta. Vizid wê Anutu vông ge kehe lec il lig Apumtau Yesu Kilisi nôn tibed.

6

Il xib hixôn Kilisi

¹ A nêl gwêba ên a nêbê vizid wê Anutu vông ge luu nipaên wê il vông ge vêl, om il ob nêl kiyang bêna? Il ob vông môt nipaên i luu vêl êdêc Anutu xêyaa i vin lec il luu vêl dì i kitya il nêd nipaên vêl, me?² Ma vêl. Ên il sea môt nipaên la vêl pyap om il ob timu vô môt tigee i tii vac lêm.³ Buc wê il lipac mia lec Yesu Kilisi lê ge od tiyi xocbê il xib hixôn Yesu. Lêc mêt xam lungên kiyang tige?⁴ Buc wê il lipac mia ge od tiyi xocbê il xib hixôn Kilisi mi la vac lôva, lêc xêkizêc yuu xêseac wê Mag Anutu vông ge tipi vô Kilisi kidi lec maviha, om vông il kidi lec madviha hixôn dì dô vac môt paha.

Il dô madviha hixôn Kilisi

⁵ Il xib hixôn Kilisi, om il ob xovô bêga hixôn bê il ob kidi lec madviha tiyi xocbê Kilisi kidi lec maviha ge.⁶ Il xovô ên il nêbê il nilôd nipaên yib

hixôn Kilisi lec xax pola, mêtgem xêkizêc wê il nilôd nipaên vông ge tip la vêl, om nipaên ti ob hôm il xôn nang lêm. ⁷ Èn xomxo wê yib ge, môp nipaên ti o tiyi wê ob ku he xôn ge lêm.

⁸ Il xib hixôn Kilisi pyap, mêtgem il vông i vin ên il nêbê il ob dô madviha hixôn Kilisi. ⁹ Èn il xovô ên il nêbê Kilisi kidi lec maviha vac yibê dî obêc yib i tii vac nang lêm, ên xêkizêc wê yibê vông ge ob hôm i xôn lêm. ¹⁰ Yesu yib lu tibed, om kitya il nêd nipaên vêl, dî gwêbaga dô maviha hixôn Anutu. ¹¹ Mêtgem xam xovô bêga bê xam êno o dô vac xêkizêc wê nipaên vông ge tii vac nang lêm, mêd gwêbaga xam dô mamviha hixôn Anutu lec yuac wê Yesu Kilisi vông ge.

Il ob timu vô môp niviha

¹² Mêtgem xam o lêc vông xam vac môp nipaên lêm, dî xam o lêc timu vô môp nipaên wê xam nilôm kidu xam ên ge lêm. ¹³ Xam o lêc vông nimnivi i loc vac môp vilu wê nipaên ge lêm. Xam vông nilôm i loc diluhu vô Anutu, ên xam tiyi xocbê xomxo wê kidi lec vac yibê mi dô maviha ge, om xam vông xam i loc yadiluhu vô Anutu, dî dô vac môp niviha. ¹⁴ Môp nipaên o tiyi wê ob hôm xam xôn ge lêm. Èn xam o dô vac xolac wê Moses vông ge kwa ngibi lêm. Nge, xam dô vac vizid wê Anutu vông ge kwa ngibi.

¹⁵ Il o dô vac Moses xolac kwa ngibi lêm. Nge, il dô vac vizid wê Anutu vông ge. Om il obêc nêb va lec môp tige? Tiyi wê il ob vông môp wê nipaên ge, me? Ma vêl. ¹⁶ Om xam wê lê. Xam obêc la vac xomxo ti kwa ngibi dî vô ninyam lehe vô kiyang wê i nêl ge od xam tu xomxo tige nue yuac. Om xam obêc la vac môp nipaên kwa ngibi dî tu môp nipaên nue yuac ge od xam obêc wib. Lêc xam obêc la vac Anutu kwa ngibi dî vông i kiyang vô nôn lec ge od xam obêc kô nôn niviha wê Anutu ob yê xam nêb xam xomxo niviha ge. ¹⁷ Om il ob hi vixad i pec ên Anutu, ên ilage xam dô vac môp nipaên kwa ngibi, lêc gwêbaga xam dô vac Anutu xolac kwa ngibi dî xam vô ninyam lehe vô xolac dî hôm xôn mi i yêp vac nilôm. ¹⁸ Anutu vô xam vêl ên môp nipaên wê hôm xam xôn ilage, dî xam tu Anutu nue yuac wê xam ob vông môp niviha ge. ¹⁹ Il ga xomxo kibun wê il o vyac xovô Anutu kiyang lêm, om kiyang wê a nêl lec nue yuac ge, a nêl i tiyi xocbê il mi nêl ge, ên a nêb i vông xovôênn vô xam. Om kiyang yêp bêga nêbê ilage xam vông nilôm yuu nimnivi la vac môp wê ningeac yuu nipaên ge dî xam pwoo Anutu kiyang vac luu vêl, om xam dô tiyi xocbê môp nipaên nue yuac xam. Lêc gwêbaga, xam dô tiyi xocbê Anutu nue yuac, om xam vông nilôm yuu nimnivi i loc vô môp niviha dî xam tu xomxo ngibua lec.

²⁰ Vô buc ilage wê xam tu môp nipaên nue yuac ge, xam o dô vac môp niviha kwa ngibi lêm. ²¹ Môp wê xam mi vông ilage, xam kô nôn niviha lec môp tige, me? Ma vêl, xam o kô nôn niviha lec môp tige lêm. Èn môp tibége ob vô nôn nipaên bêga bê xomxo ob yib lec, om gwêbaga xam nim yoc ên môp nipaên wê xam mi vông ilage. ²² Lêc Anutu vô xam vêl ên nipaên wê ku xam xôn ilage dî xam tu Anutu nue yuac, om xam kô nôn niviha bêga nêbê xam tu xomxo ngibua dî xam ob dô mamviha luta lêc luta. ²³ Èn môp nipaên ob vông myaviwen nipaên vô xomxo bêga bê he ob yib. Lêc vizid wê Anutu vông pileva vô il ge bêga ên nêbê il lig Apumtau Yesu Kilisi lam yib ên il nêd nipaên om il ob dô madviha luta lêc luta.

Il o dô vac Moses xolac kwa ngibi lêm

¹ Xam lige, a ob nêl kiyang ti vô xam lec Moses xolac wê xam mi ngô ge. Kiyang yêp bêga nêbê xomxo wê dô vac Moses xolac kwa ngibi ge, od ob dô vac i tiyi buc wê dô maviha ge dì i la tyip vô buc wê ob yib ge, lêc obêc yib ge od ob dô vac Moses xolac kwa ngibi i tii vac lêm. Môp tige xam xovô pyap. ² Môp wê yêp kibun ga bêga nêbê vêx ti obêc kô vux ge od xolac nêl kitong ên nêbê vêx i dô hixôn liya i tiyi buc wê ob dô maviha ge. Lêc liya obêc yib ge od xolac wê nêl nêbê i dô vac liya kwa ngibi ge ob tip vac. ³ Xolac nêl bêge, om liya obêc gên dô maviha dì vêx la kô vux paha ge, od xomxo ob nêl vêx tige nêbê vêx yôdac. Lêc liya obêc yib ge od xolac wê vêx la vac liya kwa ngibi ge tip vac, om vêx tige obêc kô vux ti ge od o tiyi xochê vông môp yôdac ge lêm. Nge, ge tiyi môp niviha.

⁴ Om xam lige, kiyang tige nêl kiyang tixuuêñ lec il, ên Kilisi yib om tiyi xochê il xib hixôn i dì il o dô vac Moses xolac kwa ngibi lêm. Dì gwêbaga il dô vac xomxo ngwe kwa ngibi. Ge a nêl lec Kilisi ti wê Anutu tipi vô i vac yibêñ mi i kidi lec maviha, ên nêbê il vông i vin dì il dô vac môp niviha wê Anutu vông ge. ⁵ Ilage il timu vô môp tiyi wê icil va xovô ge, lêc kiyang wê yêp vac Moses xolac ge vông nipaêñ wê yêp vac il nilôd ge kidu il om il vông môp nipaêñ. Dì nipaêñ vông yuac vac il nidniî om vông il tulec nôn wê yibêñ ge. ⁶ Lêc il xib hixôn Kilisi om Anutu piwelac il vêl ên Moses xolac wê ku il xôn ge, om gwêbaga il ob vông yuac wê Anutu vông ge. Lêc il ob vông i tiyi môp tikwê wê yêp vac Moses xolac ge lêm. Nge, il ob vông i tiyi môp paha wê Myakilôhô Ngibua vông ge.

Nipaêñ vông il la vac yibêñ

⁷ Om il ob nêbê va lec Moses xolacê? Il ob nêl bê xolac ge nipaêñ, me? Ma vêl, ên Moses xolac ge wê nêl môp nipaêñ kitong mi i yêp seac vô il. Om xolac nêl bêga ên nêbê, “Le i lêc doma vô xomxo ngwe susu lêm.” Xolac nêlên bêge obêc ma ge od xomxo ob so ên nêb môp madoêñ ge niviha. ⁸ Xolac nêl môp madoêñ kitong yêp seac, om nipaêñ wê yêp vac il nilôd ge vông môp madoêñ viyang viyang ge vô levac vac il nilôd. Xolac obêc ma ge od xêkizêc wê nipaêñ vông ge obêc yêp lêm. Lêc xolac yêp om nipaêñ vông yuac vac il nilôd. ⁹ Ilage a lungêñ xolac om a so ên a nêb mêd a dô niviha. Nang dêc a xovô xolac wê nêl môp nipaêñ kitong ge, om môp nipaêñ vông yuac vac a nilôg dì a xovô ên a nêbê a xomxo mayibêñ. ¹⁰ Ilage Anutu vông xolac vô xomxo ên nêb obêc timu vô ge od ob dô maviha. Lêc xolac tige o vông a dô magviha lêm. Nge, xolac tiyi xochê hi a xib. ¹¹ Ên nipaêñ pilepac kiyang niviha wê yêp vac xolac ge vac dì kityoo a, om vông a la vac môp yibêñ. ¹² Om il ob xovô bêga bê Anutu xolac ge ngibua, dì kiyang toto wê yêp vac xolac ge, niviha dì bôbac hixôn xêseac pileva.

¹³ Om il ob nêl bêna lec xolacê? Il ob nêl bê kiyang niviha tige hi il xib, me? Ma vêl. Nipaêñ möci wê hi il xib. Ên nipaêñ pilepac xolac niviha vac dì vông il la vac môp yibêñ, om môp nêl nipaêñ kitong i yêp seac, dì xolac vông xovôen vô il bêga nêbê nipaêñ ge nipaêñ vixôhilôg nôn mêge.

Nipaêñ ku xenac kisuu il lec

¹⁴ Il xovô ên il nêbê xolac ge, Myakilôhô Ngibua wê Anutu vông ge tu kehe, lêc a ga xomxo kibun wê a dô vac nipaên nilô. ¹⁵ Om môp wê a mi vông ge, a o xovô kehe lêm. Ên môp niviha wê a nêb a ob vông ge, a vôngên ma. Di môp nipaên wê a xona ên ge od a vông. ¹⁶ Lêc a xona ên môp nipaên wê a vông ge, om vông xovôên vô a ên nêbê Moses xolac wê vibu môp nipaên tige nêl kiyang nôn. ¹⁷ Lêc ge aca va o vông môp nipaên ge lêm. Nge, nipaên wê yêp vac a nilôg ge môci vông. ¹⁸ A xovô ên a nêbê a ga tibii kibun om môp niviha ti o yêp vac a nilôg lêm. Om a nêb a ob vông môp niviha lê, lêc a o vông i la tiyi lêm. ¹⁹ Om môp niviha wê a nêb a ob vông ge, a vôngên ma, di môp nipaên wê a nêb a vôngên obêc ma ge, od a vông. ²⁰ Om môp nipaên wê a vông ge, ge o aca va vông lêm. Nge, nipaên wê yêp vac a nilôg ge môci vông.

²¹ Mêgem môp yêp bêga nêbê a nêb a ob vông môp niviha lê, lêc nipaên le vac môp xôn. ²² Vixôhilôg, a xêgyaa vin lec Anutu xolac tiyi buc vihati, ²³ lêc nipaên yêp vac a nilôg hixôn om vông vevac vô kiyang niviha wê yêp vac a nilôg ge, mêgem môp nipaên tige ku a xôn tiyi xocbê a dô vac kalabuhu ge. ²⁴ A obêc bêna timuénê? A ga, a dô hixôn viyin levac, om letya obêc vô a vêl ên môp yibêng tige? ²⁵ A ob hi vixag i pec ên Anutu, ên wê vông il lig Apumtau Yesu Kilisi lam vô il vêl ên nipaên.

Mêgem môp yêp bêga nêbê a nilôg hixôn a piyôp kidu a nêb a timu vô Anutu xolac, lêc nipaên wê yêp vac a nilôg ge vông a la vac môp wê nipaên ge.

8

Kilisi kitya il ned nipaên vêl di vông Myakilôhô Ngibua lam dô hixôn il

¹ Mêgem il wê il vông i vin Yesu Kilisi ge, myaviwen wê xomxo ob kô lec nêbê nipaên ge, ti ob tulec il lêm. ² Ên ilage il dô vac môp nipaên yuu yibêng, lêc Myakilôhô Ngibua vô il vêl di vông il dô madviha hixôn Yesu Kilisi. ³ Il kibun ga, il tibii nidpaên om xolac wê Moses vông ge o tiyi wê ob vô il vêl ên nipaên ge lêm. Xolac wê Moses vông ge o tiyi lêm, lêc Anutu vaci vô il vêl. Ên Anutu nêb ob kitya nipaên vêl om vông ici va nu tuc lam kibun di i lam kô ninivi kibun xochê il xomxo kibun ga, di Anutu vông myaviwen wê il vông ge la vô i mi i kilê. ⁴ Anutu vông bêge, ên nêb il timu vô môp niviha wê xolac nêl ge di vông i vô nôn lec. Om il ob la vô môp nipaên wê yêp vô icil va ge lêm. Nge, il ob la vô môp wê Myakilôhô Ngibua vông ge.

⁵ Ên xomxo wê dô vac môp nipaên kibun ga ge, od he vông nilô la vô môp kibun ga, lêc xomxo wê dô vac môp wê Myakilôhô Ngibua vông ge, he vông piyôp hixôn nilô yen vihati yang la vô môp wê Myakilôhô Ngibua vông ge. ⁶ Ên xomxo obêc vông nilô la vô môp kibun ga ge od obêc yib, lêc xomxo obêc vông nilô yen la vô môp wê Myakilôhô Ngibua vông ge od ob dô maviha hixôn kiyang malehe. ⁷ Ên xomxo wê vông nilô la vô môp kibun ga ge od tiyi xochê vông vevac vô Anutu, ên kehe bêga nêbê xomxo tibêge o dô vac xolac wê Anutu vông ge kwa ngibi lêm, di ici va o tiyi wê ob la vac xolac kwa ngibi ge lêm. ⁸ Mêgem xomxo wê timu vô môp nipaên kibun ga ge o tiyi wê he ob vông môp wê Anutu ob yê niviha ge lêm.

⁹ Lêc xam o dô vac môt nipaên kibun ga lêm. Nge, xam dô vac môt wê Myakilôhô Ngibua vông ge, ên Myakilôhô Ngibua dô vac xam nilôm. Lêc xomxo ti, Myakilôhô Ngibua wê Kilisi vông ge obêc dô vac i nilô lêm ge od ob tu Kilisi nu lêm. ¹⁰ Xam nimnivi obêc yib lec nipaên, lêc Kilisi obêc dô vac xam nilôm ge od xam kinum obêc dô maviha, ên wê Anutu yê xam nêbê xam xomxo niviha ge. ¹¹ Anutu tipi vô Yesu Kilisi kidi lec vac yibêñ, om Myakilôhô Ngibua wê Anutu vông ge obêc dô vac xam nilôm ge od Anutu obêc vông Myakilôhô Ngibua tipi vô xam nimnivi wê ob yib ge kidi lec maviha nang.

Myakilôhô Ngibua vông il tu Anutu nue

¹² Xam lige, il nilôd obêc kidu il ên nipaên ge od le i lêc vông i vô nôn lec lêm. ¹³ Ên il obêc dô vac môt wê il nilôd nipaên xovô ge od il ob xib. Lêc il obêc ngiloo môt nipaên la vêl ya xêkizêc wê Myakilôhô Ngibua vông ge od il ob dô madviha.

¹⁴ Xomxo wê timu vô môt wê Myakilôhô Ngibua vông ge, he tu Anutu nue. ¹⁵ Ên Anutu o vông Myakilôhô Ngibua vô il ên nêb il dô i tiyi xochê xomxo wê nipaên hôm he xôn di he xona ge lêm. Nge, Myakilôhô Ngibua wê Anutu vông vô il ge vông il tu Anutu nue nôn, di xêkizêc wê Myakilôhô Ngibua vông ge vông il keac vô Anutu ên il nêbê, “Mag.” ¹⁶ Myakilôhô Ngibua nêl kitong vac il nilôd ên nêbê il Anutu nue. ¹⁷ Il ge Anutu nue, om vizid wê nu tuc Yesu kô vô ma Anutu ge, il obêc kô hixôn. Ên il obêc kô myavinê tiyi xochê Kilisi ge od il ob la dô vac xêseac hixôn Kilisi timuên.

Il ob dô vac xêseac timuên

¹⁸ A xovô ên a nêbê viyin wê il tulec gê kibun ga, ge o susu levac ti lêm. Ge susu pileva. Dom xêseac wê Anutu ob vông vô il timuên ge, levac luu vêl. ¹⁹ Om kibun hixôn susu vihati yang wê Anutu tung ge, he dô bin buc timuên wê Anutu ob vông xêseac vô nue il ge. ²⁰ Ên susu vihati ge vô nipaên di o vô nôn niviha lêm. Lêc susu vaci o nêb ob dô bêge lêm. Nge, Anutu ku he xôn nêb he i dô bin buc wê ob val timuên ge. ²¹ Ên gwêbaga susu kibun ga dô vac nipaên hixôn pitalên, om tiyi xochê Anutu ku he xôn, lêc obêc buc timuên ge od Anutu obêc piwelac he vêl di vông he la dô vac niviha hixôn i nue, di nipaên ti ob hôm he xôn i tii vac lêm.

²² Il xovô ên il nêbê susu wê Anutu tung ge vihati dô vac viyin yuu myavinê om iac, tiyi xochê vêx wê nu ob yubac om yaxêñ myavinê ge, om môt ge yêp ili di val tyip lec gwêbaga hixôn. ²³ Lêc o susu kibun vaci wê yaxêñ myavinê ge lêm. Nge, il êno, il yaxêñ myavinê. Vixöhilôg, Anutu vông vizid taxlee vô il bêga, wê vông Myakilôhô Ngibua lam dô hixôn il, lêc il gên dô vac viyin kibun ga, om il dô bin buc wê Anutu obêc vông il nidnivi kidi lec di vông il dô tiyi xochê i nue ge. ²⁴ Anutu vô il vêl ên nipaên om il dô bin kiyang wê Anutu nêb ob vô nôn lec vô il ge. Ên kiyang tige obêc vô nôn lec pyap ge od il ob dô bin kiyang tige lêm. Ên susu wê il xê madnôn lec nôn pyap ge od o tiyi wê il ob dô bin ge lêm. ²⁵ Lêc kiyang wê gên o vô nôn lec lêm ge, il ob dô bin di il nid ob ma lec lêm, ên il vông i vin ên il nêbê obêc vô nôn lec timuên.

²⁶ Xêkizêc wê il vông ge o tiyi lêm, lêc Myakilôhô Ngibua môci ngidu il xôn. Ên il o vyac xovô kiyang wê il ob kitaa vô Anutu ge lêm, om Myakilôhô Ngibua kô il myad mi la nêl ên nêb Anutu i ngidu il xôn. Lêc

vya ti wê Myakilôhô Ngibua kô mi la ge nginoo kiyang wê xomxo nêl ge vêl. ²⁷ Anutu ge wê xovô kiyang vihati wê yêp vac xomxo nilô ge om ob xovô kitaaén wê Myakilôhô Ngibua vông ge kehe, ên Myakilôhô Ngibua kitaa tiyi xocbê xovôén wê Anutu vông ge ên nêb Anutu i ngidu nue il xôn.

²⁸ Il xovô ên il nêbê il wê il xêdyaa vin lec Anutu ge, niviha yuu xôn viyin obêc tulec il, lêc Anutu obêc vông vihati i vô nôn niviha vô il, ên il ga wê Anutu xovô pyap nêb ob kô il ge, om tyuc il lam. ²⁹ Ên xomxo wê Anutu xovô he pyap ilage ge, Anutu vinoo he nêb he i tu xomxo tiyi xochê nu tuc Yesu ge, êdêc Yesu i tu xochê he li tuc di he i tu xochê Yesu lie. ³⁰ Di xomxo wê Anutu vinoo he ge od tyuc he nêb he i tu i nue, di xomxo wê Anutu tyuc he ge od kitya he nêb nipaên vêl di yê he nêb he xomxo niviha, di xomxo wê Anutu yê he nêb he xomxo niviha ge od vông he la dô vac xêseac wê i vông ge.

Xêyaa vin lecén wê Anutu vông ge ob sea il lêm

³¹ Anutu môp wê vông vô il ge bêge, om il ob nêb va? Anutu ge wê ob ngidu il xôn, om xomxo ti o tiyi wê ob vông il vô nipaên ge lêm. ³² Anutu o xona ên wê ob vông nu tuc lam kibun ge lêm. Nge, vông i lam ên nêb i hôm il lec. Anutu vông ici va nu tuc lam, om il ob xovô hixôn bêga bê Anutu obêc vông vizid tibeac mangwe lam pileva hixôn vô il.

³³ Xomxo wê Anutu vinoo he mi he tu i nue ge, letya ob so kiyang ti lec he? Xomxo ti tiyiên ma, ên Anutu vaci yê he nêbê he xomxo niviha wê nipaên ti o yêp vô he ge lêm. ³⁴ Om letya ob nêl nêbê xomxo vông vinên ob kô myaviwen nipaên? Xomxo ti o tiyi wê ob nêl ge lêm, ên Yesu Kilisi yib mi kidi lec maviha nang, di lax dô vô Anutu vigê hiyôv di kitaa vô Anutu ên nêb i ngidu il xôn.

³⁵ Môp tinae wê ob vô il vêl ên xêyaa vin lecén wê Kilisi vông ge? Môp ti o yêp lêm. Ên il obêc tulec viyin yuu myavinê, di tibii ob vông viyin vô il, me vip ob den il, di il nêd ngakwi ob ma, me susu ya ob vông il vô nipaên, di xomxo ob vông vevac vô il ge od susu tigee o tiyi wê ob vô il vêl ên xêyaa vin lecén wê Yesu Kilisi vông ge lêm. ³⁶ Vixôhilôg, il ob tulec viyin, i tiyi xochê kiyang wê yêp vac xolac bêga nêbê,

"Anutu, xe tu ông nume, om tiyi lec buc vihati xomxo nêb ob hi xe xib lec vông vinên wê xe vông ge. He yê xe tiyi xochê bwoc sipsip wê he ob hi i yib ge."

³⁷ Kiyang nêl bêge, lêc viyin ge susu vidaaén. Ên Yesu xêyaa vin lec il di vông xêkizêc vô il, om il ob yax mang vô viyin wê ob tulec il ge di le xêkizêc ya vông vinên. ³⁸ Ên a xovô vinux ên a nêbê susu ti o tiyi wê ob vô il vêl ên xêyaa vin lecén wê Anutu vông ge lêm. Om il obêc xib me il obêc dô madviha ge od xêyaa vin lecén wê Anutu vông ge ob sea il lêm. Di angela wê dô kisii ganê hixôn xomxo levac kibun ga, di susu wê dô gwêbaga hixôn susu wê ob val timuên, di xêkizêc wê susu viyang viyang ge vông, ³⁹ di susu wê dô vac lag hixôn susu wê dô lec kibun, di susu yaya hixôn, susu tigee vihati o tiyi wê ob vô il vêl ên xêyaa vin lecén wê Anutu vông ge lêm. Ên il dô vac xêyaa vin lecén wê Anutu vông ge lec yuac wê il lig Apumtau Yesu Kilisi vông ge.

Pol nilô vô viyin ên wê lie Islel vô nimi vô Yesu ge

¹ A ga Kilisi nu a, om kiyang wê a ob nêl vô xam ge o kiyang kityooên lêm. Nge, a nêl kiyang nôn, dì Myakilôhô Ngibua ngidu kiyang wê yép vac a nilôg ge xôn, ² om a nêl kiyang bêga ên a nêbê a nilôg vô viyin levac dì a dô hixôn viyin tiyi buc vihati ên a lige Islel. ³ Ên a nêb Anutu i vô a lige wê xe kehe tibed ge vêl, om a nêb obêc tiyi ge od a ob kilê myavinê lec nipaên wê he vông ge dì Kilisi i kitya a vêl ên i ngidu a lige xôn. ⁴ Ên xomxo Islel ge, Anutu vinoo he nêb i nue, dì xêkizéc hixôn xêseac wê Anutu vông ge lam le seac vô he mi he yê, dì Anutu hilu kiyang vô he di vông xolac vô he, dì nêl môt wê he ob si daa dì kitaa vô Anutu ge, dì hilu kiyang ya hixôn vô he, ⁵ dì he ge wê he pum lec Eblaham yuu Aisak dì Jekop wê he bue taxlee ge, dì Yesu lam tu xomxo gê kibun ga ge od kehe yép vac Islel. Kilisi ge Anutu, dì ici va tu susu vihati kehe, om il ob pimil i lê i vô levac dì i yêp luta lêc luta. Nôn.

Anutu ob vinoo xomxo ya, ya xovôên wê ici va vông ge

⁶ Vixôhilôg, xomxo Islel vô nimi vô Anutu kiyang, lêc kiyang wê Anutu hilu vô he ge o tiyi wê ob sea he ge lêm. Ên kiyang tige obêc vô nôn lec vô he Islel nôn. Lêc xomxo wê kô lê Islel ge, he ya o tu Anutu nue Islel nôn lêm. ⁷ Dì xomxo wê pum lec Eblaham ge, he ya o tu Eblaham nue nôn lêm, xochê kiyang wê Anutu nêl vô Eblaham bêga ên nêbê, “He kidu ti wê nêbê num Aisak bue ge, heche va ob tu ông nume.” ⁸ Kiyang tige kehe bêga nêbê nipwo wê Eblaham vaci kô ya xovôên wê i vông ge, he o tu Anutu nue lêm. Lêc nu Aisak wê Eblaham kô tiyi kiyang wê Anutu hilu vô i ge od Anutu yê nêbê Eblaham nu nôn. ⁹ Kiyang wê Anutu hilu vô Eblaham ge bêga nêbê, “Buc wê a vinoo pyap ge, a obêc lôm lam i tii vac, dì vinêm Sela obêc kô num ti.”

¹⁰ Nang dêc Anutu nêl kiyang ngwe vô Lebeka lec nu Jekop yuu Iso. Nu yuu ge, yuu ma Aisak wê il bug. ¹¹ Nu yuu gên o yubac lêm, om yuu gên o vông môt niviha me nipaên ti lêm. Lêc Anutu xovô nêb ob vinoo nu yuu ngwe i tiyi xochê xovôên wê ici va vông ge, om o dô mi yê môt wê yuu vông ge lêc vinoo ngwe lêm. Nge, vinoo ngwe tax, dì nu yuu gên o yubac lêm ¹² od Anutu nêl kiyang tax vô Lebeka ên nêbê, “Num tuc ob young yuac vac num môn kwa ngibi.” ¹³ Om kiyang yép vac xolac bêga ên nêbê, “A xêgyaa vin lec Jekop, lêc Iso ge a xêgyaa o vyac vin lec i lêm.”

¹⁴ Om il ob nêb va? Il ob xê Anutu môt wê vinoo xomxo ge ên il nêb tiyien ma, me? Ma vêl. ¹⁵ Ên kiyang wê Anutu nêl vô Moses ge yép bêga nêbê, “A obêc nêb vông niviha vô xomxo ti ge od a ob vông vô i, dì a obêc nêb xo vigwe pisiv ên xomxo ti ge od a obêc xo vigwe pisiv ên i.” ¹⁶ Om il ob xovô bêga bê Anutu obêc vinoo xomxo ti ge od o kehe lec xovôên hixôn yuac niviha wê xomxo tige vông ge lêm. Nge, Anutu vaci xo vigwe pisiv ên xomxo tige om vinoo. ¹⁷ Tiyi xochê kiyang wê Anutu nêl vô Pelo mi i yêp vac xolac bêga ên nêbê, “A vông lê levac vô ông di vông tixuu tibeac vô ông, ên a nêbê xêkizéc wê a vông ge i yêp seac dì xomxo tibeac i yê di nêl a lêg i vô levac vac vigwe vihati.” ¹⁸ Om il ob xovô bêga bê Anutu obêc nêb xo vigwe pisiv ên xomxo ti ge od obêc xo vigwe pisiv

ên i, dì obêc nêb vông xomxo i hingoo kiyang wê i nêl ge od xomxo tige obêc hingoo kiyang wê i vông ge.

Anutu xêyaa myavinê hixôn xêyaa vin lecén

¹⁹ Mêd xam ti obêc nêl vô a bê, “Anutu vông xomxo ya hingoo i kiyang om bêna lêc Anutu ob nêl bê nipaên yêp vô heê? Xomxo ti tiyiên ma wê ob le vac Anutu kiyang xôn ge.” ²⁰ Lêc a ob nêl vô xam bê xomxo letya wê ob luu kiyang vô Anutu ge? Dêg kibun o tiyi wê ob kunac xomxo ti wê pitii i ge dì nêl bê “Bêna lêc ông

pitii a tibéga?” ge lêm. ²¹ Èn xomxo ti wê pitii dêg ge ob pitii i tiyi xovôen wê ici va vông ge, om hôm kibun nipwo ti dì pitii dêg yuu, ngwe tiyi xocbê dêg niviha dì ngwe tiyi dêg nipaên. Lêc môt pîtige tiyi.

²² Dì môt wê Anutu vông ge yêp bêga wê nêl lec dêg. Èn Anutu nêb ob hilung xêyaa myavinê hixôn xêkizêc wê i vông ge i yêp seac. Om dêg nipaên wê Anutu xêyaa vô myavinê vô he nêb ob kitya he vêl ge, Anutu o vông myaviwen vô he lutibed lêm. Nge, hôm he nêb nipaên xôn mi i yêp dia. ²³ Anutu vông bêge, ên nêb ob vông xêseac wê i vông ge lam hivun dêg niviha xôn. Dêg tigee wê Anutu pitii ên nêb ob xo vigwe pisiv ên he dì vông he i dô vac xêseac wê i vông ge. ²⁴ Dêg niviha ge tiyi xocbê il wê Anutu tyuc il. Il ya xomxo Yuda, lêc Anutu o tyuc xomxo Yuda vaci lêm. Nge, tibii wê o Yuda lêm gee tibeac hixôn.

²⁵ Tiyi xocbê Anutu via wê yêp vac kipihac wê plopet Hosea kivuu ge bêga nêbê,

“Xomxo wê he o tu a nuge ilage lêm ge, od a ob nêl bê a nuge he hixôn, dì xomxo wê a xêgyaa o vin lec he ilage lêm ge od a xêgyaa ob vin lec he hixôn. ²⁶ Dì vigwe ti wê he dô vac dì a nêl vô he ên a nêbê he o a nuge lêm ge, od vac vigwe tige a ob nêl bê, ‘A, Anutu magviha, nuge he.’”

²⁷ Nang dêc plopet Aisaia kivuu kiyang lec xomxo Islel mi i yêp bêga ên nêbê,

“Xomxo Islel obêc vô tibeac hiwocêni tiyi xocbê luda wê dô vô gwec ninya ge, lêc Anutu obêc kô he yuu bed mi la vô i. ²⁸ Èn Apumtau obêc yaxêni xomxo vihati nêb kiyang lec buc timuên dì vông myaviwen lutibed vô he.”

²⁹ Mêd Aisaia nêl kiyang ngwe tii vac nang ên nêbê, “Apumtau wê xêkizêc kehe ge obêc kitya il buge vihati vêl ilage ge od gwêbaga il obêc ma, tiyi xocbê tibii Sodom yuu Gomola ge.”

Xomxo Islele o vông i vin Kilisi lêm

³⁰ Om il ob nêl bêna? Il ob xovô bêga bê xomxo wê o Islel lêm gee, he nilô yen o myag môt niviha wê Anutu ob yê nêb he xomxo niviha ge lêm, lêc he vông i vin Kilisi om Anutu yê he nêb he xomxo niviha. ³¹ Dì xomxo Islel timu vô xolac wê Moses vông ge dì vông yuac levac lec, ên nêb Anutu i yê he niviha, lêc môt wê he vông ge o tiyi lêm. ³² Môt wê he vông ge o tiyi lêm, ên he o nêl ên he nêbê Anutu i yê he niviha lec vông vinên lêm. Nge, he so ên he nêbê yuac wê he vông ge obêc vông Anutu yê he nêb he tibii niviha, dì he o vông i vin Yesu lêm. Om Yesu ge tiyi xocbê ngidax wê he vinux vixa lec, ³³ tiyi xocbê kiyang wê yêp vac xolac bêga nêbê,

“Xam wê lê. Vac vigwe Saion a ob lax ngidax ti wê xomxo obêc vinux vixa lec dì tili ge. Lêc xomxo ti obêc vông i vin ngidax tige ge od vông vinên wê i vông ge obêc pileva lêm. Nge, ob vô niviha vô i.”

10

Môp wê xomxo Islel dô vac ge o vô niviha vô he lêm

¹ Xam lige, a nêb Anutu i vô a lige Islel vêl ên he nêb nipaên, om a kitaa vô Anutu ên he tiyi lec buc vihati. ² A xovô môp wê he vông ge om a nêl he kitong ên a nêbê he xêyaa vin lec nêb he ob timu vô Anutu kiyang lê, lêc he o vyac xovô môp wê Anutu vông ge lêm. ³ Ên môp wê Anutu ob yê xomxo nêb he xomxo niviha lec vông vinên ge, he Islel lungên môp tige, om he o la vac môp tige kwa ngibi lêm. Nge, he dô vac môp wê timu vô Moses xolac ge ên nêb Anutu i yê he niviha lec môp tige. ⁴ Lêc Kilisi hi xolac wê Moses vông ge tip la vêl, om gwêbaga xomxo obêc vông i vin Kilisi ge od Anutu ob yê he nêb he xomxo niviha.

Anutu nêb xomxo vac vigwe vihati i vông i vin Kilisi

⁵ Ilage Moses kivuu kiyang lec môp wê Anutu ob yê xomxo niviha ên wê he timu vô Moses xolac ge, om kiyang yêp bêga nêbê, “Xomxo ti obêc timu vô kiyang tigae vihati ge od ob vông he dô maviha.” ⁶⁻⁷ Lêc môp wê Anutu ob yê xomxo nêb he xomxo niviha lec vông vinên ge o bêge lêm. Ên kiyang yêp bêga nêbê, “Le i lêc xo vac nilô bêga bê, ‘Letya ob lec mi la lag puunê?’ , di le i lêc nêl bê, ‘Letya ob la vac vigwe yibênenê?’ ” Le i lêc nêl bêge lêm, ên Kilisi lop mi lam kibun pyap di kidi lec vac yibênen pyap. ⁸ Om kiyang wê nêl lec môp vông vinên ge yêp vac xolac bêga nêbê, “Anutu xolac yêp vô xam pyap, tiyi wê xam ob xovô vac piyôp di nêl vac myam ge.” Kiyang tige nêl lec xolac wê xe mi nêl vô xam ên xe nêbê xam vông i vin ge. ⁹ Om xomxo ti obêc nêl Yesu kitong seac vac mya bêga ên nêbê, “Yesu ge Apumtau” di obêc vông i vin nêbê Anutu tipi vô Yesu kidi lec vac yibênen ge od Anutu obêc kitya i nêb nipaên vêl. ¹⁰ Ên il obêc vông i vin ge od Anutu ob yê il nêb il xomxo niviha, di il obêc nêl vông vinên kitong i yêp seac vac myad ge od Anutu ob kitya il nêd nipaên vêl di vông il dô vac niviha.

¹¹ Di kiyang ti yêp vac xolac bêga nêbê, “Xomxo ti obêc vông i vin Yesu ge od vông vinên wê i vông ge obêc pileva lêm. Nge, ob vô niviha vô i.” ¹² Kiyang tige nêl lec xomxo vihati yang, ên Anutu ob yê xomxo Yuda hixôn tibii ba vihati tiyima, ên Apumtau ge xomxo vihati yang, he Apumtau, om obêc vông vizid niviha vô xomxo vihati wê he kiyag vyâ lec i ge. ¹³ Tiyi xochê kiyang wê yêp vac xolac bêga ên nêbê, “Xomxo ti obêc kiyag vyâ lec Apumtau ge od Apumtau obêc vô i vêl ên nipaên di vông i dô vac niviha.”

¹⁴ Lêc xomxo obêc vông i vin Yesu lêm ge od he obêc kiyag vyâ lec i bêna? Di he obêc ngô Yesu kiyang lêm ge, od he ob vông i vin bêna? Di xomxo obêc la nêl kiyang tige vô he lêm ge, od he ob ngô kiyang tige bêna? ¹⁵ Di Anutu obêc vông xomxo la nêl xolac lêm ge, od xomxo ob nêl xolac tibêna? Ên kiyang yêp vac xolac bêga nêbê, “Xomxo obêc kô xolac mi lam nêl vô il ge od niviha yang.”

Islel ngô xolac lê, lêc he o vông i vin lêm

¹⁶ Xomxo Islel ngô xolac lê, lêc he tibeac o vông i vin lêm, tiyi xocbê kiyang wê plopet Aisaia kivuu mi i yêp vac xolac bêga nêbê, “Apumtau, xomxo vihati ge, he o vông i vin kiyang wê xe nêl ge lêm.” ¹⁷ Om il ob xovô bêga bê xomxo obêc vông i vin ge od kehe bêga nêbê he ngô xolac, dì xolac wê he ngô ge, xomxo nêl Kilisi kitong vô he.

¹⁸ Om a ob kinêg vô xam bêga bê xomxo Islel ge, he ngô xolac, me he ngôôn ma? He ngô pyap ila, ên kiyang yêp vac xolac bêga nêbê, “Xomxo kô xolac mi la nêl vac vigwe viyang viyang, dì kiyang wê he nêl ge la tiyi kibun myahipu vihati yang.”

¹⁹ Om a ob kinêg kiyang ngwe hixôn vô xam bêga bê xomxo Islel ge, he lungên xolac tige, me? He o lungên lêm. Nge, he xovô pyap, lêc he o vông i vin lêm. Om Anutu nêl kiyang vô he Islel mi i yêp vac kipihac wê Moses kivuu ilage bêga nêbê,

“Tibii madiluhu gee, xam wê he tiyi xocbê xomxo pileva wê piyôp maên ge, lêc a ob vông he tu a nuge dì vông vizid vô he, om xam obêc wê he nipaên dì kunac he.”

²⁰ Nang dêc Aisaia nêl Anutu vya yêp seac bêga ên nêbê, “Xomxo wê o myag a ilage lêm ge, od gwêbaga he xovô a, dì xomxo wê o kinêg a lêm ge, od a hilung a vô he.”

²¹ Lêc Anutu nêl kiyang lec xomxo Islel bêga ên nêbê, “A tyuc he tiyi buc vihati ên a nêb he i lam vô a, lêc he vô ninya kitu vô a dì pwoo a vyag vac.”

11

Anutu xo vigwe pisiv ên Islel vilu bed

¹ Om a ob kinêg vô xam bêga bê Anutu ngiloo i nue Islel vihati vêl, me? Ma vêl. Xam wê lê. A ga, a êno xomxo Islel ti wê a pum lec Eblaham dì a kehe yêp vac Bensamin. ² Anutu o ngiloo nue Islel wê vinoo he ilage lêm. Kiyang wê Ilaija nêl vô Anutu mi i yêp vac kipihac xolac ge, xam mêd lungên, me? Ên Ilaija kitaa vô Anutu dì nêl lie Islel nêl nipaên kitong bêga ên nêbê, ³ “Apumtau, he hi ông nume plopete yib dì dii ông alta wê ob si daa lec ge vêl. Lêc a tibed gên dô om he myag a ên nêb ob hi a xib.” ⁴ Dì Anutu nêl kiyang tina vô Ilaija? Anutu nêl vô i ên nêbê, “O ôcông tibed lêm. Ên a nuge 7,000 gên dô wê a vinoo he pyap ge wê he o yev vixa kitu vô anutu mayibê Bal ge lêm.”

⁵ Om môp tibêge yêp gwêbaga hixôn, ên gwêbaga he Islel viwen dô wê Anutu nue ge, ên Anutu xo vigwe pisiv ên he dì vinoo he. ⁶ Lêc Anutu o vinoo he ên yuac niviha wê he vông ge lêm. Nge, ici va vinoo he tiyi xocbê vông vizid pileva vô he ge. Ên Anutu obêc vông vizid vô he lec yuac niviha wê he vông ge od obêc tiyi xocbê he kisuu ya yuac niviha wê he vông ge. Lêc o ngwe bêge lêm. Nge, Anutu vaci vông pileva vô he.

⁷ Om il ob xovô bêga bê xomxo Islel myag môp wê Anutu ob yê he niviha lec ge, lêc he o tulec lêm. He vilu bed wê Anutu vinoo he ge, he tulec. Dom he tibeac vô ninya kitu vô Anutu kiyang, ⁸ tiyi xocbê kiyang wê yêp vac xolac bêga nêbê,

“Anutu vông he nilô tiyi xocbê he yêp ge om he manôn o yê susu ti lêm, dì he ninya o ngô kiyang ti lêm, om he dô lung lung dì i val tyip lec gwêbaga hixôn.”

⁹ Nang dêc Devit êno nêl kiyang lec he Islel bêga nêbê,
“Vizid wê he myêl mi ya ge, i tiyi xocbê pulac wê he ob vac ge, me xocbê
lôva wê he ob tô di vac kipêd ge, me leac wê ob ku he xôn ge, ên i
vông myaviwen vô he. ¹⁰ Di he manôn i toc, ên he i o lêc yê vigwe
lêm, di viyin levac i tulec he di he i kilê tiyi buc vihati.”

Anutu ob kô he wê o Islel lêm ge vêl

¹¹ Xomxo Islel o vông i vin Yesu lêm, om tiyi xocbê he tô mi la, om a ob
kinêg vô xam bê he ob tô mi la dô xel, me? Ma vêl. Ên he pwoo kiyang
vac, om Anutu vông vizid la vô tibii ba di vô he vêl ên he nêni nipaên.
Mêgem xomxo Islel obêc yê vizid niviha wê Anutu vông vô tibii ba ge od
obêc vông he nilô yen yetac di he ob lôm vô Anutu. ¹² Xomxo Islel pwoo
kiyang vac, mêgem Anutu vông vizid levac la vô tibii viyang viyang, om
he Islel vihati obêc pilepac he di lôm vô Anutu ge od Anutu ob vông vizid
levac lax mi la vô he vihati luu vêl.

¹³ A ob nêl kiyang ti vô xam wê xam o Islel lêm ge. Anutu vînôo a nêb a
nêl xolac vô xam wê o Islel lêm ge, om a xêgyaa niviha ên yuac tige, ¹⁴ ên
a nêb mêt a lige Islel ob yetac ên vizid wê xam kô vô Anutu ge di he ya ob
pilepac he di lôm vô Anutu ên i ngidu he xôn. ¹⁵ Anutu ngiloo Islel vêl di
la vô tibii ba ên nêb he i tu i nue, om Anutu obêc vông he Islel lax tu i nue
nang ge od obêc tiyi xocbê Anutu tipi vô he kidi lec maviha vac yibê.

¹⁶ Xomxo ti obêc kô blet nipwo ti mi la kitaa lec ge od blet vihati ge tu
Anutu xe. Di xomxo ti obêc kô xax ngilôhô ti mi la kitaa lec ge od xax
ngen vihati ge tu Anutu xe. Kiyang tige nêl lec xomxo Islel, ên Anutu nêl
vô Eblaham ilage nêbê i tu ixe, om Eblaham bue tivae ob tu Anutu xe
hixôn.

¹⁷ Di a ob nêl kiyang pilepacen ti lec xax oliv. Ên xomxo Islel ge tiyi
xocbê xax oliv wê Anutu vaci tung he ge, di xam wê xam o Islel lêm ge,
xam tiyi xocbê xax oliv wê vimen ge. Mêt Anutu xoo ngen ya vêl ên xax
wê ici va tung ge, di la kô xax ngen wê vimen ge di lam yev lec di ku xôn.
Om xam dô di kô vizid wê xomxo Islel vông ge tiyi xocbê xax ngen kô hizi
vô xax yatôv ge. ¹⁸ Om xam o lêc wê ngen wê Anutu xoo vêl ge nipaên
lêm, di xam o yong xam lêm. Ên xam ge ngen pileva dom xam o viac xax
ngilôhô lêm. Nge, xax ngilôhô viac xam.

¹⁹ Lêc mêt xam ya obêc nêl bêga bê, “Xe ga, Anutu xoo ngen ya vêl ên
nêb ob yev xe la le vac he niplêhê.” ²⁰ Xam nêl vixôhîlôg, ên Anutu xoo
he Islel vêl ên wê he o vông i vin lêm ge di yev xam la le vac he niplêhê
ênn wê xam vông i vin ge. Lêc xam o lêc yong xam lêm. Nge, xam viac
xam di xona nêm. ²¹ Ên Islel ge tiyi xocbê ngen wê nôn ge, lêc Anutu o
vông he le lêm. Nge, xoo he vêl. Om xam obêc sea vông vinêng ge od
Anutu obêc vông xam le lêm. Nge, obêc xoo xam vêl hixôn êno. ²² Om
xam wê lê. Anutu ge wê ob vông vizid vô xomxo di obêc vông myaviwen
nipaên vô xomxo êno. Om xomxo wê vông môp nipaên ge, Anutu ob vông
myaviwen nipaên vô he, lêc xam mô ge, Anutu vông vizid vô xam. Om
xam dô vac vizid tige nilô, ên xam obêc sea ge od Anutu obêc xoo xam vêl.
²³ Di xomxo Islel obêc pilepac he di vông i vin ge od he ob lax le vac xax
tige i tii vac, ên Anutu tiyi wê ob yev he lax le vac niplêhê ge. ²⁴ Xam tibii
ba, ilage xam dô tiyi xocbê xax oliv wê vimen ge ngen, lêc Anutu xoo xam

vêl di yev xam le vac xax xumac wê xam o le vac ilage lêm. Om Anutu tiyi wê obêc kô Islel wê xoo vêl ge mi lax yev vac xax oliv wê he le vac ilage.

He Islel obêc pilepac he di vông i vin tii vac

²⁵ Xam lige, kiyang wê yêp xôpacên ilage, a nêb a ob nêl kitong vô xam, êdêc xam o lêc yong xam di nêl bê xam xovô kiyang vihati lêm. Om kiyang wê yêp xôpacên ilage bêga nêbê, xomxo Islel vô ninya kitu vô Anutu kiyang, di obêc mila vô buc wê tibii ba tibeac obêc pilepac he mi la vô Anutu ge od Islel vông môp wê vô ninya kitu vô Anutu kiyang ge obêc tip la vô buc tige, ²⁶ di Anutu obêc vô he Islel vihati vêl. Tiyi xochê Anutu vya wê yêp vac xolac bêga nêbê,

“Xomxo ti wê ob hôm xomxo lec ge obêc val vac vigwe Saion, di obêc vô xomxo wê Jekop bue tivae ge vêl ên he nênpipaén. ²⁷ Di a ob kitya he nênpipaén vêl, tiyi xochê kiyang wê a hilu vô he ge.”

²⁸ Xomxo Islel o vông i vin Yesu xolac lêm, om tiyi xochê he vông vevac vô Anutu di Anutu yê he nipaén, om Anutu vông vizid loc vô xam wê tibii ba ge. Lêc Anutu xêyaa vin lec Islel ên wê vînoo he ilage, om xovô kiyang wê hilu vô he bue ilage, di o sea he lêm. ²⁹ Ên Anutu obêc vînoo xomxo di vông vizid vô he ge od obêc hôm i kiyang xôn di ob sea lêm.

³⁰ Xam wê xam o Islel lêm ge, ilage xam pwoo Anutu kiyang vac, lêc gwêbaga Anutu xo vigwe pisiv ên xam, ên he Islel pwoo kiyang vac, om Anutu vông xêyaa vin lecén wê i vông ge loc vô xam. ³¹ Gwêbaga he Islel pwoo Anutu kiyang vac, lêc obêc timuên ge od xêyaa vin lecén wê Anutu vông ge ob la vô he tiyi xochê val vô xam gwêbaga. ³² Ên Anutu yê wê xomxo vihati pwoo i kiyang vac ge om vông he vihati dô tiyi xochê he dô vac kalabuhu ge. Anutu vông bêge, ên nêb obêc xo vigwe pisiv ên he vihati timuên.

Il ob pimil Anutu lê

³³ Piyôp yuu xovôên wê Anutu vông ge, levac mabu luu vêl. Xomxo ti o tiyi wê ob xovô piyôp wê Anutu vông ge kehe lêm, di ti o tiyi wê ob xovô môp wê i vông ge kehe êno lêm. ³⁴ Tiyi xochê kiyang wê yêp vac xolac bêga nêbê,

“Letya xovô kiyang wê yêp vac Apumtau piyôp ge? Di letya vông xovôên vô i? ³⁵ Di letya vông susu ti vô Anutu tax ên nêb i lêc vông vacê? Ma vêl.”

³⁶ Anutu vaci tu susu vihati yang ge kehe, om susu vihati yang ge tiyi xochê ici va xe, wê ob vông i lê i vô levac. Om il ob pimil i lê i vô levac di i yêp luta lêc luta. Nôn.

12

Il ob vông icil va vô Anutu i tiyi xochê daa

¹ Xam lige, Anutu xo vigwe pisiv ên il di vông vizid levac vô il, om a nêl vô xam bê xam vông xam i loc yadiluhu vô Anutu i tiyi xochê daa ngibua wê maviha ge, ên Anutu i yê niviha. Ên xam obêc vông môp tibêge ge od môp tige tiyi xochê xam hi vixam pec ên Anutu di pimil i lê. ² Di xam o lêc timu vô môp xochê xomxo kibun ga mi vông ge lêm. Xam vông piyôp yuu nilôm i loc vô Anutu, ên i pilepac xam nilôm yuu piyôp i vô paha lec,

êdêc xam xovô môp wê Anutu xêyaa vin lec nêb il timu vô ge, ên môp tige niviha yuu xêseac tiyi wê ob vông Anutu xêyaa vô niviha vô il ge.

Il ob vông yuac ya xovôên wê Anutu vông vô il ge

³ Anutu vông yuac sinale vô a tiyi xochê vizid niviha ge, om a nêb a ob nêl vô xam vihati bêga bê xam o lêc xo bê xam ge tibii levac me tibii niviha i luu vêl lêm. Xam vyac xovô xam lê, dì xam toto ge yaxêng vông vinêng wê Anutu vông vô xam ge dì xovô yuac wê xam ob vông ge. ⁴ Ên il xovô ên il nêbê xomxo tibed, lêc ninivi toto. Lêc vihati o vông yuac tibed lêm. Nge, toto ge he vông yuac wê yêp vô he ge. ⁵ Dì il ga, il tiyi xochê ngang ngang tibeac, lêc Kilisi vông il lax tu ninivi nôn tibed. Om il ngang toto ge, il ob vông yuac di ngiduma xôn dì i tu ninivi nôn tibed.

⁶ Anutu vông xovôên hixôn yuac toto vô il tiyi xochê vizid wê vông pileva vô il ge, om il toto ge il ob vông yuac ya. Dì Anutu obêc vông xovôên vô xomxo ti nêb i nêl xolac ge, od xomxo tige i nêl xolac i tiyi xochê vông vinêng wê yêp vô i ge. ⁷ Dì Anutu obêc vông xovôên vô xomxo ti ên nêb i ngidu lie xôn ge, od i xovô yuac wê ob ngidu lie xôn ge. Dì Anutu obêc vông xovôên vô xomxo ti ên nêb i tixuu lie ya xolac ge od i vông yuac wê ob tixuu lie ge. ⁸ Dì Anutu obêc vông xovôên vô xomxo ti nêb i ngidu vông vinêng wê lie vông ge xôn ge od i ngidu lie xôn niviha. Dì xomxo ti obêc vông susu vô lie ge od i vông tibeac vô he. Dì xomxo ti obêc kô yuac wê ob viac lie ge od i xêyaa i vin lec yuac tige. Dì xomxo ti obêc xo vigwe pisiv ên xomxo di ngidu he xôn, hixôn xêyaa niviha.

Il ob dô vac môp xêyaa vin lec maên

⁹ Xam xêmyaa i vin lec lime hixôn nôn, dì xam o lêc kityoo lêm. Xam xona nêm dì vô nîmim vô môp nipaên dì hôm môp niviha xôn mi i yêp pililihi. ¹⁰ Xam xêmyaa i vin lec lime vông vinêng i tiyi xochê xam xêmyaa vin lec lime wê xam hi tibed ge, dì xam toto ge pimil lime dì ngidu he xôn.

¹¹ Xam nim i o lêc ma ên yuac wê yêp vô xam ge lêm. Nge, xam vông yuac vô Apumtau ya xêkizêc wê Myakilôhô Ngibua vông ge.

¹² Kiyang wê xam vông i vin mi dô bin ge, xam bin hixôn xêmyaa niviha. Dì xam le xêkizêc vac viyin wê xam ob tulec ge. Dì xam o lêc sea môp kitaa ên lêm. Nge, xam kitaa i tiyi buc vihati.

¹³ Dì lime vông vinêng nêng susu obêc ma ên he ge od xam ngidu he xôn. Dì xomxo viyang bangwe obêc val vac xam bom ge, od xam viac he i niviha.

¹⁴ Dì xomxo obêc vông xam vô nipaên ge od xam o lêc kitaa vô Anutu bê i vông myaviwen vô he lêm. Nge, xam kitaa vô Anutu ên i vông niviha vô he.

¹⁵ Lime obêc dô hixôn xêyaa niviha ge od xam xêmyaa i vô niviha hixôn he, dì he obêc byag ge od xam byag hixôn he.

¹⁶ Xam viac lime i niviha, i tiyi xochê xam viac xacxam va niviha ge. Dì xam o lêc yong xam dì nêl bê xam tibii levac lêm. Nge, xam dô hixôn xomxo wê o kô lê levac lêm ge. Dì xam o lêc yong xam dì nêl bê xam piyôp levac lêm.

¹⁷ Xomxo ti obêc vông nipaên vô xam ge od le i lêc vông nipaên i luu nipaên lêm. Xam timu vô môp wê xomxo vihati ob yê dì xovô nêbê niviha ge. ¹⁸ Môp obêc yêp ge od xam viac kiyang vômea dì dô malehe hixôn xomxo vihati. ¹⁹ Xam lige, xam o lêc vông nipaên i luu nipaên lêm. Xam

vông myaviwen nipaên i loc vac Anutu vaci vigê. Ên Apumtau nêl kiyang mì i yêp vac kipihac bêga nêbê, “Aca va tibed wê a obêc vông myaviwen vô xomxo i luu nipaên wê he vông ge.”²⁰ Om xam vông i tiyi kiyang wê yêp vac xolac bêga nêbê, “Xomxo wê yê xam tiyiên ma ge, vip obêc den he ge od xam vông yaên vô he, dì he obêc nêb num mia ge od xam vông mia vô he mì he num. Ên xam obêc vông bêge vô he ge od he ob xo i lax lec nipaên wê he vông ge dì ni ob yoc ên he.”²¹ Môp nipaên i o lêc vông xam vô nipaên lêm. Nge, xam dô vac môp niviha wê ob ngînoo môp nipaên vêl ge.

13

I ob la vac gavman kiyang kwa ngibi

¹ Xam vihati, xam dô vac gavman kwa ngibi. Ên gavman wê viac xam ge, heche va o vinoo he lêm. Nge, Anutu vaci tung he di vông xêkizêc vô he. ² Om xomxo ti obêc pwoo kiyang wê gavman vông ge vac ge od tiyi xochê he pwoo Anutu kiyang vac hixôn, om xomxo tibêge ob kô myaviwen nipaên, ên Anutu vaci tung gavman. ³ Xomxo wê dô vac môp niviha ge ob xona ên gavman lêm. Dom xomxo wê vông môp nipaên ge, od ob xona ên gavman nêbê gavman obêc vông myaviwen vô he. Om xam obêc nêb xam xona ên ma ge od xam dô vac môp niviha ên gavman i pimil xam. ⁴ Ên gavman viyang viyang tu Anutu nue yuac wê ob ngidu xam xôn dì vông xam dô nimviha ge. Lêc xam obêc vông môp nipaên ge od xam xona ên he, ên xêkizêc wê yêp vô he ge, he o kô vidaa ên lêm. Nge, Anutu vông vô he ên nêb he i tu i nue yuac wê ob vông myaviwen luu nipaên wê xomxo vông ge. ⁵ Mêgem xam vô ninyam lehe vô gavman kiyang. Lêc xam o lêc vông ên wê xam xona ên myaviwen nipaên ge vaci lêm. Nge, xam vông lec kehe bêga bê xam nilôm kidu xam nêb môp tibêge niviha.

⁶ Mone wê il mi vông vô gavman ge, kehe yêp vac kiyang tige hixôn, ên gavman viyang viyang ge he tu Anutu nue yuac wê ob viac yuac wê Anutu vông vô he ge. ⁷ Mêgem xam vông mone yuac toto ge i loc vô gavman tiyi xochê he nêb xam vông vô he ge. Dì he wê kô lê gavman di viac xam ge, xam pimil he dì loc vac he kwa ngibi.

Môp xêyaa vin lecên ob vông xolac vô nôn lec

⁸ Le i lêc kô lime ti susu di myaviwen i yêp dia lêm. Ên môp tibed wê yêp bêga nêbê il xêdyaa i vin lecma i yêp i loc buc dia. Ên xomxo ti xêyaa obêc vin lec xomxo ge od tiyi xochê vông xolac wê Anutu nêl vô Moses ge vô nôn lec. ⁹ Ên xolac wê Moses vông ge nêl bêga nêbê, “Le i lêc vông yôdac vêx yuu vux lêm”, dì “le i lêc hi xomxo i yib lêm,” dì “le i lêc vông yôdac vô xomxo susu lêm,” dì “le i lêc doma vô xomxo susu ya lêm.” Lêc xolac tige hixôn xolac baba, he xôn vihati yang ge, kehe tibed bêga nêbê ông xêmyaa i vin lec lime baba i tiyi xochê ông xêmyaa vin lec ôcông va ge. ¹⁰ Ên xomxo ti xêyaa obêc vin lec xomxo ngwe ge od obêc vông i vô nipaên lêm. Om xomxo ti obêc dô vac môp xêyaa vin lecên ge, od tiyi xochê vông xolac wê Moses vông ge vihati vô nôn lec.

¹¹ Mêgem xam lêc dô vac môp tibêgee, ên xam xovô buc wê il dô vac gwêbaga pyap, om xam sea yêpêni dì kidi lec. Ên ilage wê il vông i vin taxlee ge, buc wê Anutu ob kô il mi la tung vac ben ge gên yêp teva, lêc

gwêbaga, buc tige vô kwabo lec. ¹² Om vô kwabo lec wê mapitoc ob tip vac dì vigwe ob vídii. Om il ob sea môp mapitoc di la le vac xêseac, êdêc vông vevac vô nipaên. ¹³ Om il ob dô vac môp bôbac tiyi xocbê xomxo wê la vac xêseac wê hiyôv vông ge. Om il ob num dì vô mavmav dì vông môp vaxvax wê nipaên ge hixôn lêm, dì il ob vông môp yôdac vêx yuu vux lêm, dì il ob kunacma di xêma nipaên dì do mad vô lige susu lêm. ¹⁴ Il ob timu vô môp yuu yuac wê Apumtau Yesu Kilisi vông ge, dì il ob timu vô môp nipaên wê yêp vac il nilôd ge lêm.

14

Il ob yaxêñ môp wê lige vông vinêñ vông ge lêm

¹ Xomxo wê vông i vin Yesu pyap lêc vông vinêñ wê he vông ge gên o vô xêkizêc lec lêm ge, od xam vông he lam dô vac xam mahigun, di xam o lêc ngaênma lec kiyang yaya wê xomxo tigee vông ge lêm. ² Èn xomxo ya vông i vin xêkizêc om he xovô ên he nêbê susu yaên vihati ge niviha tiyi wê he ob ya ge. Lêc xomxo wê vyac xovôén xolac ma ge, he víbu nêbê he ob ya bwoc liyôhô lêm. ³ Om xomxo wê mi ya susu yaên vihati ge, he i o lêc yê xomxo wê mi ngibua bwoc liyôhô ge nipaên lêm, di xomxo wê mi ngibua bwoc ge, he i o lêc yê xomxo wê mi ya susu vihati ge dì nêl bê he vông i so lêm, ên Anutu kô he ge êno la tu ixe. ⁴ Bêna lêc xam nêb xam ob vông kiyang vô xomxo ngwe nue yuacé? Xomxo tigee, Apumtau tu he nêñ levac om obêc yaxêñ môp wê he vông ge dì nêl bê tiyi me tiyiên ma. Lêc môp wê he vông ge obêc tiyi, ên Apumtau vaci ob ngidu he xôn di vông he le xêkizêc.

⁵ Xomxo ya nêl ên he nêbê buc ya levac i luu buc baba vêl, di xomxo ya nêl ên he nêbê buc vihati ge tiyima. Om xam toto yaxêñ lê, di xam vyac xovô môp wê xam ob timu vô ge dì hôm xôn pilihî mi i yêp vac xam piyôp. ⁶ Èn xomxo wê vínoo buc ya nêbê buc ge levac ge, he vông ên he nêbê he ob pimil Apumtau lec buc tige. Di xomxo wê mi ya susu yaên vihati ge, he vông ên nêbê he ob pimil Apumtau lê om he pimil Anutu ên yaên vihati di ya. Di xomxo wê mi ngibua yaên ya ge, he vông ên he nêb he ob pimil Apumtau, om he êno pimil Anutu ên yaên wê he mi ya ge.

⁷ Il ob xovô bêga bê il obêc dô madviha ge od il o xovô icil va lêm, me il obêc xib ge od il o xovô icil va lêm. ⁸ Èn buc wê il dô madviha ge od il ob vông Apumtau lê i vô levac, di il obêc xib ge od il ob vông Apumtau lê i vô levac hixôn. Om il obêc dô madviha me il obêc xib ge od il ob tu Apumtau xe. ⁹ Èn Kilisi yib di kidi lec maviha om kehe bêga nêbê tu xomxo wê dô maviha hixôn he wê yib ge nêñ Apumtau.

¹⁰ Bêna lêc xam yaxêñ môp wê lime vông ge di nêl ên xam nêbê tiyiên ma, di bêna lêc xam wê lime ya nipaênê? Èn il vihati obêc la le vô Anutu manôn di ici va ob yaxêñ môp wê il toto vông ge. ¹¹ Tiyi xocbê kiyang wê Apumtau nêl di i yêp vac xolac bêga nêbê,

“A nêl hixôn nôn ên a nêbê xomxo vihati yang ob yev vixa kitu vô a, di nêl a kitong seac bêga bê a ga Anutu nôn.”

¹² Om il ob xovô bêga bê il toto obêc nêl môp wê il vông gê kibun ga kehe kitong vô Anutu vô buc timuên.

Il ob vông lige vô nipaên lec môp wê il vông ge lêm

¹³ Om il ob sea môp wê il ob xê lige ngwe tiyiên ma ge, dì il ob xovô môp bêga bê môp wê ob vông lige sea vông vinên wê he vông ge dì vông he la vac môp wê he yê nêbê nipaên ge, il ob vông môp tibêge lêm. ¹⁴ Apumtau Yesu vông xovôên vô a om a xovô ên a nêbê yaên ti o nipaên tiyi wê ob vông il vô nipaên ge lêm. Lêc xomxo ti obêc yê susu yaên tiyi xochê nipaên ge od ob ya lêm, ên obêc ya ge od obêc vông i vô nipaên. ¹⁵ Om ông obêc wa yaên ti wê lim tige ngibua ge od obêc vông lim tige nilô vô viyin, om môp wê ông vông ge o tiyi xocbê ông xêmyaa vin lec lim tige lêm. Kilisi yib ên xomxo tige hixôn, om xam viac xam ên yaên wê xam mi wa ge, êdêc yaên i o lêc vông lim tige i vô nipaên lêm. ¹⁶ Om môp wê xam wê ên xam nêbê niviha ge, xam viac xam êdêc xomxo i o lêc yê môp tige nipaên lêm. ¹⁷ Èn môp wê il tu Anutu nue dì la vac i kwa ngibi ge, kehe o yêp vac yaên yuu numên lêm. Nge, kehe bêga nêbê il dô vac môp niviha yuu kiyang malehe dì xêyaa niviha wê Myakilôhô Ngibua vông ge. ¹⁸ Om xomxo obêc tu Kilisi nue yuac dì dô vac môp tigee ge od Anutu ob yê he niviha dì xomxo êno ob pimil he.

¹⁹ Mêgem il ob timu vô môp wê xêyaa vin lec maên ge di dô vac kiyang malehe nilô, dì il ob ngiduma xôn vac vông vinên. ²⁰ Om yaên wê xam mi wa ge i o lêc vông yuac wê Anutu vông ge i vô nipaên lêm. Vixôhilôg, yaên vihati ge niviha tiyi wê il ob xa ge, lêc yaên wê xam mi wa ge obêc vông lime la vac môp wê he yê nêbê tiyiên ma ge od môp wê xam vông ge, xam vông i so. ²¹ Om il ob timu vô môp bêga bê il ob xa bwoc me il ob num wain me il ob vông môp vae vae, lêc môp tigee obêc vông lige nilô vô viyin ge od il ob sea môp tibêge i loc yêp xel dì vôngên i ma. ²² Om môp yaên yuu numên yuu bêge, xam toto xovô môp wê xam ob timu vô ge, lêc môp ge ông sea i loc vô Anutu vaci. Èn xomxo ti obêc timu vô môp wê yê nêbê niviha ge, dì nilô yuu piyôp obêc vông kiyang vô i lec môp tige lêm ge od xomxo tige ob dô hixôn xêyaa niviha. ²³ Lêc xomxo ti obêc ya yaên ti hixôn nilô yuu ge od ge vông i so, ên xomxo tige o ya hixôn nilô tibed lêm. Nge, ya hixôn xonaên. Èn môp wê xomxo nêb ob vông ge, he obêc vông hixôn nilô yuu ge od ge nipaên.

15

Il ob timu vô môp wê Kilisi vông ge

¹ Il wê il vông i vin xêkizêc ge, il ob ngidu lige wê gên o vông i vin xêkizêc lêm ge xôn dì kilê viyin wê he vông ge. Dì il ob vông môp wê ob vô niviha vô icil va ge lêm. ² Nge, il toto ob vông môp wê ob vô niviha vô lige vông vinên, ên i ngidu vông vinên wê he vông ge xôn, ên he i le xêkizêc. ³ Èn môp wê Kilisi vông ge, o vông ên nêb i vô niviha vô ici va lêm. Nge, môp wê i vông ge, tiyi xochê kiyang wê yêp vac xolac bêga nêbê, “Kiyang nipaên wê xomxo nêl lec Anutu ge, he nêl lec a hixôn.” ⁴ Kiyang vihati wê xomxo kivuu mi i yêp vac kipihac xolac ge, Anutu nêl ên nêbê i vông xovôên vô il dì vông il le xêkizêc vac vông vinên dì bin buc wê il ob tulec vizid vô Anutu ge. ⁵ Anutu ti wê ngidu xomxo xôn dì vông he le xêkizêc vac vông vinên ge, i ngidu xam xôn dì vông xam nilôm i yêp tibed i tiyi xochê môp wê Yesu Kilisi vông ge, ⁶ êdêc xam vihati hi vixam i pec ên Anutu, wê il lig Apumtau Yesu Kilisi ma ge.

Kilisi xolac lam vô he Yuda hixôn tibii ba

⁷ Xam hôm lime lec niviha i tiyi xocbê Kilisi hôm il lec niviha ge, êdêc xam vông Anutu lê i vô levac. ⁸ A nêl bêga vô xam ên a nêbê Kilisi lam tu Yuda nén xomxo yuac di hôm he lec, ên nêb ob vông kiyang wê Anutu hilu vô bue ilage i vô nôn lec, ên he Yuda i xovô bê Anutu kiyang ge kiyang nôn. ⁹ Dì Kilisi nêb ob vông xomxo wê o Yuda lêm ge he êno i pimil Anutu ên wê i vông vizid vô he ge, tiyi xocbê kiyang wê yêp vac xolac bêga nêbê, “A ob pimil ông lêm vac tibii madiluhu mahigun, dì a ob vông lilo dì hi vixag i pec ên ông.”

¹⁰ Dì kiyang ngwe yêp vac xolac bêga hixôn nêbê,
“Xam wê xam o Yuda lêm ge, xam xêmyaa i vô niviha hixôn Anutu nue Yuda.”

¹¹ Dì kiyang ti yêp vac xolac hixôn bêga nêbê,
“Xam tibii ba, xam pimil Apumtau lê, dì xomxo vihati yang i hi vixa i pec ên Apumtau.”

¹² Dì plopet Aisaia kivuu kiyang ti lec Kilisi mi i yêp bêga nêbê,
“Xomxo ti obêc val vac he kidu ti wê nêb Jesi bue ge, dì xomxo tige ob tu tibii baba nêb king hixôn dì viac he, om he baba ob vông i vin dì dô bin buc wê xomxo tige ob vông he vô niviha lec ge.”

¹³ Nôn wê xam dabin ge, Anutu tu kehe, om obêc ngidu xam xôn dì vông xêyaa niviha hixôn kiyang malehe i lam pup vac xam nilôm ên wê xam vông i vin ge. Dì xêkizêc wê Myakilôhô Ngibua vông ge i ngidu xam xôn, ên xam le pilihi vac vông vinê dì bin nôn wê xam ob tulec timuên ge.

Pol xêyaa vô niviha ên yuac sinale wê vông ge

¹⁴ Xam lige, aca va xovô pyap ên a nêbê xam dô vac môp niviha, dì xovônen niviha pup vac xam nilôm tiyi wê xam ob vông xovônen vô lime vông vinê ge. ¹⁵ Lêc kiyang ya wê a kivuu vô xam ge, a kivuu xêkizêc dì a o xona lêm, ên a nêb xam piyôp i yêp seac. A vông bêge, ên Anutu vông vizid vô a ¹⁶ nêb a tu i nu yuac ti dì la nêl Yesu Kilisi kitong vô xomxo madiluhu. Om yuac wê a vông ge tiyi xocbê xomxo si daa vô Anutu ge, ên a la nêl Anutu xolac vô tibii wê o Yuda lêm gee, ên a nêb Myakilôhô Ngibua i vông he i tu xomxo ngibua tiyi xocbê daa wê Anutu ob yê niviha ge.

¹⁷ Yesu Kilisi ngidu a xôn om a xêgyaa vô niviha ên yuac wê a mi vông vô Anutu ge. ¹⁸ Om a ob nêl lec yuac baba lêm. Nge, a ob nêl lec wê Kilisi ngidu a xôn dì vông xêkizêc vô a om a didii tibii wê o Yuda lêm gee mi la vô Anutu ên a nêb he i vô ninya lehe vô Anutu xolac. Om yuac tige, a vông ya kiyang wê a mi nêl vô he ge, hixôn môp wê a mi vông vac he mahigun ge, ¹⁹ dì Anutu vông xêkizêc vô a om a vông do levac ya hixôn, dì xêkizêc wê Myakilôhô Ngibua vông ge ngidu a xôn. Mêgem a nêl Kilisi xolac vac vigwe Jelusalem dì vigwe yaya hixôn mi i la tiyi vigwe Ililikam. ²⁰ A vông yuac bêge, ên a nêb a ob la nêl xolac vô tibii madiluhu wê gên o ngô Yesu xolac lêm ge, ên a nêb a ob la vông yuac vac vigwe wê xomxo la nêl xolac pyap vac ge lêm, ên ge obêc tiyi xocbê a la lox xumac lec xomxo ngwe teac kisii ge. ²¹ Om a nêb a ob vông i tiyi xocbê kiyang wê yêp vac xolac bêga nêbê,
“Xomxo wê gên o ngô Kilisi lê lêm ge, he ob yê i, dì he wê gên o ngô i xolac lêm ge, he ob ngô dì xovô.”

Pol nêb ob la vigwe Lom yuu Spêñ

²² Buc tibeac ge, yuac hôm a xôn om a o tiyi wê a ob loc vô xam ge lêm.
²³ Tiyi klismas tibeac ge, a nêb a ob loc xê xam, lêc a o loc lêm. Di gwêbaga a vông yuac vac vigwe tigae vihati pyap, ²⁴ om a nêb a ob loc vô xam. Om buc wê a ob la vigwe Spêñ ge, od a ob miloc vô xam taxlee, dì il dô buc ya ên i vông a xêgyaa i vô niviha. Pyap dêc xam ngidu a xôn vac môp ên a la Spêñ.

²⁵ Lêc gwêbaga a ob la Jelusalem ên la ngidu lige wê Anutu nue gee xôn.
²⁶ Èn xomxo vông vinê vac vigwe Masedonia yuu Glik ga nêl kiyang pyap di kituc mone ên nêb ob vông i loc Jelusalem ên i loc ngidu he Yuda vông vinê wê nén susu maên ge xôn. ²⁷ Heche va nêb he ob vông mone tige vô he Yuda, lêc mone tige wê he obêc hi myaviwen wê he Yuda kô xolac mi la nêl vô he ilage. Vizid wê Anutu vông vô he Yuda ge la vô tibii baba hixôn di vông he kinu hixôn nilô vô niviha lec, om gwêbaga he tibii baba ob vông vizid wê ninivi xe ge i la vô he Yuda ên i ngidu he xôn.

²⁸ Om a ob kô mone wê he Masedonia yuu Glik kituc pyap ge dì kô mi la vông vô xomxo Jelusalem, di yuac tige obêc pyap ge od a ob miloc vô xam di la Spêñ. ²⁹ Di a xovô ên a nêbê a obêc loc vô xam ge od a obêc miloc hixôn vizid wê Kilisi vông ge ên i hivun xam xôn.

³⁰ Xam lige, xam tu il lig Apumtau Yesu Kilisi xe di dô vac xêyaa vin lecén wê Myakilôhô Ngibua vông ge, om a nêl vô xam bê xam ngidu a xôn ya kitaaêñ. Xam kitaa xêkizêc vô Anutu ên i ngidu a xôn ³¹ di i vô a vêl ên xomxo Judia wê hingoo Yesu xolac ge. Di mone wê a ob kô mi la vông vô xomxo vông vinê Jelusalem ên a nêb i ngidu he xôn ge, xam kitaa vô Anutu ên he xêyaa i vin lec mone tige di he i yê niviha. ³² Anutu obêc lee yuu ge od a obêc miloc vô xam hixôn xêgyaa niviha di loc dô seac vêl hixôn xam. ³³ Mêgem Anutu ti wê kiyang malehe kehe ge, i dô hixôn xam vihati. Kiyang nôn.

16

Pol nêl vidiiêñ wê i vông ge la vô xomxo Lom

¹ A ob nêl vêx Pibi kitong vô xam, ên Pibi ge il lig vêx vông vinê wê mi vông yuac vac kongle gesen wê dô vigwe Senklia ge. ² Om Pibi obêc val vô xam ge od xam hôm i lec niviha ên wê i vông i vin Apumtau ge, ên môp tibêge môp niviha wê il xomxo vông vinê ob vông vômea ge. Di viyin obêc tulec i ge od xam ngidu i xôn, ên i ge wê mi ngidu xe xomxo tibeac xôn.

³ Xam nêl vidiiêñ i loc vô Plisila yuu liya Akwila, wê xen xôn vông yuac wê Yesu Kilisi vông ge. ⁴ Èn yuu ge wê yuu ngidu a xôn om tibii hôm yuu xôn nêb ob hi yuu yib, lêc he o hi yuu yib lêm. Om a hi vixag i pec ên yuu, lêc o aca va tibed lêm. Nge, tibii vông vinê wê o Yuda lêm ge, he êno, he vihati hi vixa pec ên yuu hixôn. ⁵ Om xam nêl vidiiêñ i loc vô he vông vinê wê mi kitucma vac yuu ben ge.

Di xam nêl vidiiêñ i loc vô Epinitas wê a xêgyaa vin lec i ge, ên i ge wê vông i vin taxlee vac vigwe Esia ge.

⁶ Di xam nêl vidiiêñ i loc vô Malia wê vông yuac levac ên nêb ob ngidu xam xôn ge.

7 Dì xam nêl vidiién i loc vô Andlonikas yuu Junias. Yuu ge a lige Yuda wê xen xôn dô vac kalabuhu lec xolac wê xen mi nêl ge. Yuu vông i vin tax, dì a vông i vin timuên, dì sinale viyang viyang xovô yuu nêb yuu xomxo niviha.

8 Dì xam nêl vidiién i loc vô a lig vông vinê Amplietas wê a xêgyaa vin lec i ge.

9 Dì xam nêl vidiién i loc vô Eban wê mi vông Kilisi yuac hixôn il ge. Di xam nêl vidiién i loc vô Stekis hixôn, ên i ge wê a xêgyaa vin lec i.

10 Dì xam nêl vidiién i loc vô Apelis wê vông i vin Kilisi nôn.

Dì xam nêl vidiién i loc vô Alistobyulas hixôn he wê dô vac i ben ge.

11 Dì xam nêl vidiién i loc vô Helodion wê a lig Yuda ti.

Dì xam nêl vidiién i loc vô Nasisas hixôn xomxo vac i ben wê he vông i vin Apumtau ge.

12 Dì xam nêl vidiién i loc vô vêx yuu Tlaipina yuu Tlaiposa wê yuu vông yuac levac vô Apumtau ge.

Dì xam nêl vidiién i loc vô Pesis wê a xêgyaa vin lec i nôn ge, ên i ge wê vông yuac tibeac vô Apumtau.

13 Dì xam nêl vidiién i loc vô Lugas wê vông i vin xêkizêc dì vông yuac vô Apumtau ge, dì ta êno hixôn, ên i ge tiyi xochê a tag.

14 Dì xam nêl vidiién i loc vô Asinklitas, Pligon, Hemis, Patlobas, dì Hemas, hixôn lie vông vinê wê dô hixôn he ge.

15 Dì xam nêl vidiién i loc vô Pilologas yuu Julia, dì Nelias hixôn li vêx, dì Olimpas, hixôn lie vông vinê vihati wê dô hixôn he ge.

16 Xam pulma vigêm ên i nêl xam kitong bê xam xêmyaa vin lecma.

Konglegesen vac vigwe gae vihati nêl vidiién i loc vô xam.

Pol nêl kiyang lec xomxo wê xolac kityooén ge

17 Xam lige, a nêl vô xam bê xam viac xam ên xomxo wê nêl xolac so xolac wê xam ngô ilage, ên kiyang tibêge ob vông xam le kityê kityê dì ngaênma lec xolac dì obêc vông xam sea vông vinê wê xam vông ge, om xam le teva ên he. **18** Ên xomxo tigee o vông nilô la vô il lig Apumtau Kilisi lêm. Nge, he vông nilô la vô môp nipaên wê heche va xovô ge, dì he mi nêl kiyang hizi niviha yang vô xomxo om kityoo he wê vyac xovôén ma gee. **19** Môp wê xam vông ge vông a nilôg vô niviha, ên xomxo viyang viyang ge xovô ên he nêbê xam timu vô Yesu xolac. Lêc gwêbaga a nêb a ob nêl vô xam bê xam lêc vyac xovô môp wê niviha ge dì xam o lêc xo môp wê nipaên ge lêm. **20** Dì buc vô kwabo lec wê Anutu ti wê kiyang malehe kehe ge ob kê Seten la vac xam kwa ngibi dì hi i hibu sea lutibed.

Vizid yuu xêyaa vin lecén wê il lig Apumtau Yesu vông ge i loc vô xam vihati.

Xomxo wê dô hixôn Pol ge nêl vidiién la vô xomxo Lom

21 Timoti wê mi vông yuac hixôn a ge dì Lusias yuu Jeson hixôn Sosipata, wê a lige Yuda ge, he nêl vidiién vô xam.

22 Dì a Tetias, wê a kivuu Pol mya wê nêl ga, a nêl vidiién vô xam ên wê il xôn vông i vin Apumtau lê ge.

23 Dì Gaias nêl vidiién vô xam. Gaias ge wê viac a niviha vac ben, dì mi viac xomxo vông vinê tibeac hixôn.

Elastas wê mi viac mone wê gavman mi kô vac vigwe ga ge yuu Kwotas wê il lig ge, yuu nêl vidiién vô xam.

²⁴ [Vizid yuu xêyaa vin lecên wê il lig Apumtau Yesu Kilisi vông ge i loc viac xam. Nôn.]

Il ob pimil Anutu ên vông i lê i vô levac

²⁵ Anutu tiyi wê ob vông xam le xêkizêc vac xolac wê a mi nêl ge. Xolac tiga nêl lec Yesu Kilisi. Xolac tige yêp xôpacênl atikwê, lêc gwêbaga Anutu vông i lam yêp seac. ²⁶ Di Anutu wê dô luta ge nêl om xe la nêl kiyang wê plopete kivuu ilage vô tibii viyang viyang ge vihati, ên xe nêb plopete kiyang i nêl xolac kitong i yêp seac vô he ên he i ngô di vông i vin. ²⁷ Anutu tibed ge i xovôôn kehe, om il ob xovô yuac wê Yesu Kilisi vông ge di il ob pimil Anutu lê i vô levac di i yêp luta lêc luta. Kiyang nôn.

1 KOLIN

Kipihac taxlee wê Pol kivuu vô tibii Kolin ge

1 A Pol wê Anutu vaci vinoo a ên nêb a tu sinale wê Yesu Kilisi vông ge. A hixôn a lig Sostenis **2** xii kivuu kipihac tiga vôxam wê xam tu Anutu nue vông vinên mi dô vac vigwe Kolin ge, ên Anutu vinoo xam ên nêb xam tu xomxo ngibua nôn lec yuac wê Yesu Kilisi vông ge di xam tu i nue, hixôn xomxo vac vigwe vihati wê he kiyag vya lec il Apumtau Yesu Kilisi ge, ên Yesu Kilisi ge xomxo levac wê he vông ge di il êno vông ge hixôn. **3** Il mag Anutu yuu Apumtau Yesu Kilisi i vông vizid hixôn kiyang malehe i loc dô hixôn xam.

Pol pimil Anutu

4 A pimil Anutu ên xam tiyi buc vihati, ên wê Anutu vông vizid niviha vô xam lec yuac wê Yesu Kilisi vông ge. **5** Anutu vông vizid toto ge vô xam ên nêb xam nêl kiyang niviha di xovô kiyang vihati. **6** Èn ilage xe nêl Kilisi kitong vô xam di xam hôm kiyang tige xôn pilahi mi i yêp vac xam nilôm, **7** om gwêbaga vizid toto wê Myakilôhô Ngîbua vông ge, ti o ma ên xam lêm, di xam dô bin buc wê il lig Apumtau Yesu Kilisi ob vena le seac vô il ge. **8** Di il lig Apumtau Yesu Kilisi vaci ob ngidu xam xôn di xam le pilahi, om buc wê Kilisi ob vena lec ge, od xam nêm soën ti ob yêp i tii vac vô xam lêm. **9** Anutu tyuc xam ên nêb xam ob dô xêmyaa niviha hixôn nu tuc Yesu Kilisi wê il Apumtau ge, di Anutu ob vông i tiyi kiyang wê nêl ge di ob kityoo kiyang ti lêm.

Konglegesen Kolin hibu sea

10 Xam lige, a nêl kiyang xêkizêc vô xam lec il lig Apumtau Yesu Kilisi lê bêga bê xam dô hixôn kiyang tibed, di xam o lêc hibu xam sea lêm. Nge, xam nilôm yuu piyôp i yêp tibed. **11** Xam lige, xomxo wê Klowi lie ge ya nêl vô a ên nêbê xam ngaênma lec kiyang di xam xêmyaa vô myavinê vôma. **12** Kehe bêga nêbê xam ya nêl ên xam nêbê xam timu vô Pol, di xam ya nêl ên xam nêbê xam timu vô Apolos,

di ya nêl ên nêbê xam timu vô Pita, di ya nêl ên nêbê he timu vô Kilisi. **13** Bêna lêc xam nêl tibêge? Kilisi ge xam hibu sea, me? Di a, Pol, a xib lec xax ên xam, me? Di xam lipac mia lec a lêg, me? **14** A pimil Anutu ên wê a o lipac xam tibeac lêm. Nge, a lipac Klispas yuu Gaias, yuubed. **15** Om o tiyi wê xomxo ti ob nêl bê xam lipac mia lec a lêg ge lêm. **16** Vixôhilôg, a lipac Stepanas he vinê nue hixôn. Di a mêt lipac xomxo ya hixôn, lêc a o xovô lêm. **17** Èn Kilisi o vông a la ên nêb a la lipac xomxo lêm. Nge, vông a la ên nêb a la nêl xolac vô xomxo. Lêc a o nêl xolac tiyi xocbê xomxo hixôn piyôp levac mi nêl ge lêm, ên obêc bêge ge od kiyang wê nêl ên nêbê Kilisi yib lec xax ge obêc tiyi xocbê kiyang pileva wê nôn maén ge.

Kilisi ge xêkizêc yuu xovônen wê Anutu vông ge

18 Kiyang wê nêl ên nêbê Kilisi yib lec xax ge, xomxo wê xôa obêc ma ge yê kiyang tige tiyi xocbê kiyang pileva. Dom il wê Anutu vô il vêl ge, il xovô ên il nêbê kiyang wê nêl lec wê Yesu yib lec xax pola ge, ge xêkizêc

wê Anutu vông ge. ¹⁹ În Anutu nêl kiyang mi i yêp vac xolac bêga ên nêbê,

“Xomxo wê kô piyôp levac ge, a ob vông he piyôp i vô nipaên, dì xomxo wê xovô kiyang tibeac ge, a ob kitya he nêl piyôp vêl.”

²⁰ Xolac nêl bêge, om xomxo wê piyôp levac ge, dì xomxo wê xovô kipihac vihati ge hixôn he wê mi ngaênma lec kiyang ge, il ob nêb va lec xovôên wê he vông ge? În Anutu nêl pyap ên nêbê xovôên wê xomxo kibun ga vông ge, vidaaên dì nôn ma.

²¹ Anutu ge piyôp levac om vông môt bêga ên nêbê xovôên wê xomxo kibun ga vông ge o tiyi wê ob vông he xovô Anutu ge lêm. Om xolac wê xe mi nêl ge, xomxo yê tiyi xochê kiyang pileva lê, lêc Anutu nêl ên nêbê xomxo obêc vông i vin kiyang tige ge od Anutu obêc vô he vêl ên he nêl nipaên. ²² Xomxo Yuda nêb he ob yê do levac di tibii Glik vông yuac levac ên nêb ob tulec piyôp levac. ²³ Lêc xe ga, xe mi nêl lec wê Kilisi yib lec xax ge, om he Yuda yê kiyang tige nipaên, nêbê tiyiên ma, dì he Glik yê nêbê kiyang tige, nôn ti o yêp vac lêm. ²⁴ Lêc il wê Anutu tyuc il ge, Yuda hixôn tibii baba ge, il xovô ên il nêbê Kilisi ge xêkizêc yuu xovôên wê Anutu vông ge. ²⁵ În Anutu piyôp wê xomxo yê nêb piyôp yacyac ge luu piyôp wê xomxo kibun ga vông ge vêl, di Anutu xêkizêc wê xomxo yê nêbê xêkizêc ma ge, ge luu xêkizêc wê xomxo vông ge vêl.

²⁶ Xam lige, xam xovô i lôc lec môt wê xam dô vac ilage vô buc wê Anutu vinoo xam mi xam tu i nue ge, ên xam tibeac o tulec piyôp levac gê kibun ga lêm, dì xam tibeac o kô xêkizêc gê kibun ga lêm, dì xam tibeac o kô lêm levac gê kibun ga lêm. Nge, xam titi kô lêm levac. ²⁷ Lêc xomxo wê xomxo kibun ga yê nêbê he piyôp maên ge, od Anutu vinoo he ên nêb he i vông xomxo wê piyôp levac ge, he ni i yoc ên he, dì xomxo wê xomxo kibun ga yê nêbê he nêl xêkizêc ma ge, od Anutu vinoo he ên nêb he i vông xomxo wê nêb he xêkizêc ge ni i yoc ên he. ²⁸ Dì xomxo wê xomxo kibun ga yê nipaên nêbê he xomxo pileva ge, od Anutu vinoo he ên nêb he i vông xomxo wê kô lê levac ge, he i dô i tiyi xochê xomxo wê o kô lê levac lêm ge. ²⁹ Anutu vông bêge, ên nêb xomxo ti ob yong i vô i lêm.

³⁰ Anutu vông xam la dô hixôn Yesu Kilisi. În Kilisi ge wê hilung piyôp wê Anutu vông ge yêp seac vô il, dì Kilisi vaci vô il vêl ên il nêd nipaên, di Anutu yê il nêb il xomxo niviha lec yuac wê Kilisi vông ge, di Kilisi vông il dô vac môt vilu wê niviha ge. ³¹ Om il ob vông i tiyi xochê kiyang wê yêp vac xolac bêga ên nêbê “Xomxo ti obêc nêb pimil ge od i pimil Apumtau vaci.”

2

Pol nêl kiyang lec wê Kilisi yib lec xax ge

¹ Xam lige, ilage wê a loc nêl Anutu xolac kitong vô xam ge, od a o yong a di nêl kiyang tiyi xochê xomxo wê piyôp levac yuu xovôên nivihaiva ge lêm. ² În a xovô bêga tax ên a nêbê buc wê a ob dô hixôn xam ge, od a ob xovô kiyang tibed. Ge kiyang wê nêl lec Yesu Kilisi di nêl lec wê Yesu yib lec xax ge, dì a ob nêl kiyang ya hixôn lêm. ³ Dì buc wê a dô hixôn xam ge, xêkizêc wê a vông ge ma, om a dô hixôn xonaên di nignivi yetac. ⁴ Mêd kiyang yuu xolac wê a nêl vô xam ge, a o nêl ya piyôp niviha wê ob vông xam pilepac xam ge lêm. Nge, Myakilôhô Ngibua vông xêkizêc vô

a dì ngidu kiyang wê a nêl ge xôn. ⁵ A vông yuac tibêge, ên a nêb vông vinên wê xam vông ge, kehe i o léc yêp vac piyôp yuu xovôen wê xomxo kibun ga vông ge lêm. Nge, kehe i yêp vac xêkizêc wê Anutu vông ge.

Myakilôhô Ngibua vông piyôp vô il

⁶ Xomxo wê vông i vin Anutu xolac xêkizêc ge, xe mi nêl xolac hixôn xovôen niviha vô he, lêc xovôen tige o tiyi xocbê xovôen kibun ga lêm, dì o tiyi xocbê xovôen wê xomxo levac kibun ga vông ge lêm, ên he xôa obêc ma. ⁷ Xovôen wê xe mi nêl ge, ge xovôen wê Anutu vông ge. Xovôen tige yêp xôpacên ilage, lêc buc wê Anutu gên o tung lag yuu kibun lêm ge od Anutu nêl pyap nêbê xovôen tige obêc vông il la dô vac xêseac wê i vông ge. ⁸ Lêc xomxo levac kibun ga, he o xovô piyôp wê Anutu vông ge lêm. He obêc xovô ge od he ob hi Apumtau wê xêseac kehe ge yib lec xax lêm. ⁹ Lêc piyôp wê Anutu vông ge tiyi xocbê kiyang wê yêp vac xolac bêga ên nêbê

“Susu wê xomxo manôn o yê lêm di xomxo ninya o ngô lêm di xomxo piyôp o xovô lêm ge, ge wê Anutu viac pyap ên nêb obêc vông vô xomxo wê he xêyaa vin lec i ge.”

¹⁰ Kiyang tige yêp xôpacên lê, lêc Anutu vông Myakilôhô Ngibua lam ên nêb i nêl kiyang tige kitong i yêp seac vô il. Ên Myakilôhô Ngibua xovô kiyang vihati yang om xovô kiyang vihati wê yêp xôpacên vac Anutu nilô ge.

¹¹ Xomxo ti o tiyi wê ob xovô kiyang wê yêp vac xomxo ngwe nilô ge lêm. Nge, xomxo vaci piyôp ob xovô kiyang wê yêp vac ici va nilô ge. Om Anutu tiyi bêge êno, ên xomxo ti o xovô kiyang wê yêp vac Anutu nilô ge lêm. Nge, Myakilôhô Ngibua wê Anutu vông ge vaci wê xovô Anutu piyôp. ¹² Xe o kô xovôen kibun ga ti lêm. Nge, Anutu vông Myakilôhô Ngibua wê i vông ge lam vô il, ên nêb i vông xovôen vô il ên il xovô vizid vihati wê Anutu vông pileva vô il ge. ¹³ Xe mi nêl vizid tige kitong vô xomxo, lêc xe o kô xovôen tige vô xomxo kibun ga lêm. Nge, xe nêl i tiyi xovôen wê Myakilôhô Ngibua vaci vông vô xe ge, om xe nêl kiyang wê Myakilôhô Ngibua vông ge kitong vô xomxo wê Myakilôhô Ngibua dô vac he nilô ge.

¹⁴ Lêc xomxo wê Myakilôhô Ngibua o dô vac he nilô lêm ge, od he ob vông i vin kiyang wê Myakilôhô Ngibua vông ge lêm, ên he ob ngô kiyang ge tiyi xocbê kiyang vîdaaén, dì he o tiyi wê ob xovô kehe ge lêm, ên Myakilôhô Ngibua vaci wê ob nêl kiyang tige kitong vô xomxo. ¹⁵ Xomxo wê Myakilôhô Ngibua dô vac he nilô ge tiyi wê ob yaxêni kiyang vihati ge, lêc xomxo kibun ga o tiyi wê ob yaxêni xomxo wê Myakilôhô Ngibua dô vac he nilô ge lêm. ¹⁶ Ên kiyang yêp vac kipihac xolac bêga ên nêbê “Letya xovô piyôp wê yêp vô Apumtau ge dì obêc tixuu i ya kiyang?”

Xolac nêl bêge, lêc xe ga, piyôp wê Kilisi vông ge yêp vac xe nilôm pyap.

3

Xomxo wê tu Anutu nue yuac ge

¹ Xam lige, buc wê a loc dô hixôn xam ilage, a o tiyi wê a ob nêl kiyang vô xam tiyi xocbê a ob nêl vô xomxo wê timu vô Myakilôhô Ngibua ge lêm. Nge, a nêl kiyang tiyi xocbê a ob nêl vô xomxo wê dô hixôn nilô yen kibun ga ge, ên xam dô tiyi xocbê nume nipwo wê gên o xovô Kilisi kiyang niviha ge lêm. ² Mégem a vet xam ya lul pileva, dì a o vet xam ya yaén

xêkizêc ti lêm, ên xam gên o tiyi wê xam ob wa yaén xêkizêc ge lêm. Di gwêbaga hixôn, xam gên o tiyi lêm,³ ên xam gên dô vac môp kibun ga. Gwêbaga a ngô wê xam xêmyaa vô nipaên vô lime di xam ngaênma lec kiyang, om môp tige nêl xam kitong ên nêbê xam gên timu vô môp kibun ga tiyi xocbê tibii madiluhu ge.⁴ Ên xam ya pimil Pol di nêl ên nêbê xam timu vô Pol, di xam ya pimil Apolos di nêl ên nêbê xam timu vô Apolos, lêc môp tige tiyi xocbê môp wê tibii kibun ga mi vông ge.

⁵ Om xam xovô lê. Apolos ge letya? Di a Pol, a letya? Xii ga, xii xomxo yuac pileva wê Anutu vông yuac toto vô xii ge, om xii loc vông yuac vac xam mahigun di xam vông i vin Kilisi. ⁶ Om ge tiyi xocbê a loc xin vê vac yuac, nang dêc Apolos loc pivux ya mia, lêc Anutu ge wê vông vê tyip mi vô levac. ⁷ Om xomxo wê xin vê ge hixôn xomxo wê pivux ya mia ge, yuu tiyi xocbê xomxo pileva, lêc Anutu tibed ge wê lê levac, ên i ge wê vông vê tyip mi vô levac. ⁸ Xomxo ti wê xin vê ge hixôn xomxo wê pivux ya mia ge, yuu tiyima, om Anutu ob vông nôn vô yuu xôn i tiyi yuac wê yuu toto vông ge. ⁹ Ên xe ga, xe tu Anutu nue yuac, di xam tiyi xocbê yuac yaén wê Anutu vông ge.

Anutu nue yuac tiyi xocbê xomxo xumac loxên

Xam tiyi xocbê xumac wê Anutu vông ge.¹⁰ Ên Anutu vông vizid hixôn piyôp vô a tiyi xocbê xomxo wê xumac loxên ge, om a loc yev teac vac xam bom, di xomxo ya ob lox xumac lec kisii. Om xomxo wê ob lox xumac ge, a nêl vô he ên a nêbê he i viac he êdêc lox xumac niviha lec teac kisii. ¹¹ Ên teac wê le pyap ge, ge Yesu Kilisi, om o tiyi wê xomxo ob yev teac paha ngwe hixôn ge lêm. ¹² Xomxo wê ob lox xumac lec teac kisii ge, he ob lox ya gol me silva me ngidax niviha me xax me hêx,¹³ om yuac wê he toto vông ge ob yêp seac timuên vô buc wê Kilisi ob vena lec ge, ên buc tige ob val hixôn ngwax, om Anutu ob yaxên xomxo toto nêñ yuac ya ngwax mi yê bêc yuac wê he vông ge nipaên me niviha.¹⁴ Om xumac wê xomxo lox lec teac kisii ge, ngwax yaén obêc ma di i le niviha ge, od xomxo tige ob kô nôn niviha lec.¹⁵ Lêc ngwax obêc ya xumac wê xomxo ti lox ge od xomxo tige ob kô nôn niviha lec yuac wê i vông ge lêm. Xomxo vaci ob dô niviha, ên Anutu obêc hôm i vêl ên ngwax tiyi xocbê xomxo hôm susu vêl vac ngwax ge.

Xomxo vông vinên tiyi xocbê xumac ngibua wê Anutu vông ge

¹⁶ Xam ngô lê. Xam ge, Anutu xumac ngibua xam, di Myakilôh Ngibua dô vac xam nilôm. Lêc mêd xam lungên kiyang tige?¹⁷ Xomxo ti obêc vông Anutu xumac ngibua vô nipaên ge, od Anutu obêc kitya xomxo tige vêl, ên Anutu xumac ge ngibua, di xumac tige xacxam va.

Il ob pimil xomxo kibun ga lêm

¹⁸ Xomxo ti i o lêc kityoo i lêm. Xam ti obêc nêbê xam kô piyôp yuu xovôên kibun ga pyap ge od xomxo tige i sea piyôp wê i vông ge di i dô i tiyi xocbê xomxo wê piyôp maên ge lê, êdêc tulec piyôp nôn timuên.¹⁹ Ên piyôp yuu xovôên kibun ga, Anutu yê tiyi xocbê piyôp yacyac. Tiyi xocbê kiyang wê yêp vac kipihac xolac bêga ên nêbê

“Xomxo wê piyôp levac ge Anutu ob ku he xôn ya kiyang kityooên wê heche va vông ge tiyi xocbê he vac pulac.”

²⁰ Di kiyang ngwe yêp bêga nêbê

"Apumtau xovô ên nêbê xovôên wê xomxo piyôp levac vông ge tiyi xochê susu vidaaên."

²¹ Mêgem le i lêc pîmil xomxo kibun ga lêm. Ên susu vihati ge xam xe, ²² om a Pol xii Apolos dì Pita, dì susu kibun ga vihati, dì maviha dôêñ, dì yibêñ, dì susu wê dô gwêbaga, hixôn susu wê ob val timuêñ ge, vihati tu xam xe. ²³ Dì xam tu Kilisi xe, dì Kilisi tu Anutu xe.

4

Anutu vaci ob yaxêñ nue yuac wê i vông ge

¹ Mêgem xam lêc wê xe i tiyi xochê Kilisi nue yuac wê Anutu vông kiyang xôpacêñ wê i vông ge vac xe viégem ên nêb xe viac dì nêl kitong i yép seac vô xam. ² Dì xomxo wê ob viac yuac ge kiyang yép bêga nêbê he i viac yuac i niviha. ³ Lêc xam, me xomxo ya obêc yaxêñ yuac wê a vông ge dì nêl bê niviha me nipaêñ ge od ge yép vô xam. Dì aca va obêc yaxêñ yuac wê a vông ge lêm. ⁴ Vixôhilôg, a xovô ên a nêbê soêñ ti o yép vô a lêm, lêcom a o tiyi wê a ob nêl bê a xomxo niviha ge lêm. Ên Apumtau vaci wê ob yaxêñ a. ⁵ Om xam o lêc yaxêñ xomxo lutibed dì nêl bê he vông niviha me nipaêñ lêm. Nge, xam vông i yép dì buc wê Apumtau ob vena lec ge lê, ên susu wê dô xôpacêñ vac mapitoc, hixôn kiyang wê yép xôpacêñ vac xomxo nilô ge, Anutu obêc vông i lam yép seac vihati, dì Anutu vaci obêc vông myaviwen vô xomxo vihati tiyi yuac wê he toto vông ge.

Xomxo Kolin yong heche va

⁶ Xam lige, kiyang vihati wê a nêl ge a nêb a ob ngidu xam xôn om a tixuu kiyang tige lec xii Apolos, ên a nêb xam ngô dì xovô dì timu vô kiyang wê yép vac kipihac xolac ge, dì le i lêc timu vô môp ba ya hixôn lêm. Om a nêl vô xam bê xam o lêc yong xomxo ti lê bê niviha dì wê xomxo ngwe bê nipaêñ lêm. ⁷ Ên letya nêl vô ông nêb ông xomxo levacê? Dì piyôp wê ông vông ge, ông kô vô letya? Piyôp hixôn vizid vihati ge, ông kô vô Anutu tibed, om bêna lêc ông yong ông dì nêl ên ông nêb ôcông va tu piyôp tige kehe?

⁸ Xam so ên xam nêb mêd xam tulec vizid vihati pyapê? Om susu ti o ma ên xam lêmê? Xam mêd luu xe vêl dì kô lêm levac mi la dô lec sia king pyap, me? Xam obêc tu xomxo levac ge od obêc niviha, ên a nêb xe ob tu levac hixôn xam ên il xôn ob kô lêd levac tiyima. ⁹ A xo ên a nêbê Anutu vông xe sinale lax timuêñ tiyi xochê xomxo vidaaên ge, ên xe dô tiyi xochê xomxo vông kiyang vô xe pyap ên nêb ob hi xe xib, om he vông xe la le vô xomxo vihati hixôn angela manôn. ¹⁰ Xomxo kibun ga yê xe tiyi xochê xomxo piyôp maên ên wê xe timu vô Kilisi ge, dom xam ge, xam nêb xam timu vô Kilisi om xam kô piyôp levac. Xe ga, xe nêm xêkizêc ma, dì xam ge, xam nêbê xam xêkizêc yêp. Xomxo hi vixa ên xam nêb xam xomxo levac, dì xe ga, xomxo yê xe nipaêñ nêb xe xomxo pileva. ¹¹ Ilage dì i val tyip gwêbaga, xe o dô vac niviha ti lêm. Ên vip den xe dì xe kwam liyêè ên mia, dì xe nêm ngakwi ma ên xe, dì xomxo hi xe ya vigê, dì xe nêm xumac wê xe ob dô vac ge ma, ¹² dì xe vông yuac levac ya vigêm, lêc xomxo obêc so vya vô xe ge od xe kitaa vô Anutu ên xe nêb i ngidu he xôn, dì xomxo obêc vông viyin vô xe ge od xe o vông viyin ti lax vô he lêm. Nge, xe kilê viyin wê he vông vô xe ge. ¹³ Dì xomxo nêl kiyang

nipaên lec xe, lêc xe nêl kiyang malehe lax vô he. Tiyi buc vihati dì i val tyip gwêbaga hixôn, he yê xe tiyi xochê susu yacyac wê xomxo ob nêx i la ge hixôn susu ningeac kibun ga.

Pol nêl nêb xomxo Kolin i timu vô i vixa

¹⁴ Kiyang wê a kivuu ga, a o kivuu ên a nêb i vông xam nim i yoc lêm. Ên a xêgyaa vin lec xam tiyi xochê a nuge xam om a nêb a ob vông xovôên vô xam. ¹⁵ Ên xomxo wê ob viac xam dì tixuu xam ya Kilisi xolac ge mêd he tibeac hiwocên, lêc xam mame o tibeac lêm. Nge, a tibed wê a nêl Yesu Kilisi xolac vô xam dì xam vông i vin om a tiyi xochê xam mam a. ¹⁶ Mêgem a nêl kiyang xêkizêc vô xam bêga bê xam timu vô a vixag. ¹⁷ A nêb xam vông bêga om a vông Timoti loc vô xam. Timoti ge, a nug vông vinêñ wê a xêgyaa vin lec i ge, dì i wê viac Apumtau yuac niviha, om Timoti ob nêl a môt wê a mi timu vô Kilisi ge kitong vô xam tii vac. Môt tige wê a mi nêl vô xomxo vông vinêñ vac vigwe vihati.

¹⁸ Xam ya xo ên xam nêbê mêd a lôc vôen xam ob ma, om xam yong xam. ¹⁹ Lêc Apumtau obêc lee yuu ge od a ob lôc vô xam lutibed dì yaxêñ xomxo wê yong he ge. Lêc a ob yaxêñ kiyang wê he nêl ge lêm. Nge, a ob yaxêñ xêkizêc wê he vông ge. ²⁰ Ên môt wê xomxo ob tu Anutueue mi la vac i kwa ngibi ge, kehe o yêp vac kiyang pileva lêm. Nge, kehe yêp vac xêkizêc wê Anutueue vông ge. ²¹ Mêgem xam nêb a vông môt ngwe na vô xamê? Xam nêb a lôc hixôn viyi ên titô xam ya, me xam nêb a xo vigwe pisiv ên xam dì lôc hixôn kiyang malehe?

5

Môt yôdac vêx yuu vux yêp vac konglegesen Kolin

¹ Xomxo ya nêl vô a ên nêbê môt yôdac vêx yuu vux yêp vô xam bêga nêbê xomxo ti vông yôdac vô ma vinê, lêc o ta wê kô i ge lêm. Môt tige nipaên nôn, wê tibii madiluhu o mi vông ge lêm. ² Bêna lêc xam yong xam? Xam sea môt wê xam yong xam ge, dì xam nim i yoc ên xam dì xam byag, dì xam tii xomxo ti wê vông môt nipaên tige i loc vêl.

³ A ga, a nignivi dô teva ên xam, lêc a nilôg mi xo xam, om a yaxêñ kiyang wê xomxo tige vông ge pyap, tiyi xochê a dô hixôn xam ge. ⁴ Om a nêl bêga vô xam bê xam kitucma lec Apumtau Yesu lê dì xam xovô a kiyang i tiyi xochê a dô hixôn xam ge, dì xêkizêc wê il lig Apumtau Yesu vông ge ob dô hixôn xam, ⁵ om xam vông xomxo tige i loc vac Seten vigê ên i vông i ninivi i vô nipaên, êdêc xomxo tige kinu i loc dô niviha vô buc wê Apumtau Yesu ob vena lec ge.

Pol nêl ên nêbê he i tii xomxo nipaên i loc vêl

⁶ Xam yong xacxam va, lêc môt tibêge o niviha lêm. Yis nipwo tyá tiyi wê ob vông blet vihati vuac mi vô levac ge, lêc mêd xam o xovô lêm?

⁷ Xam tiyi xochê blet wê yis maên ge, om xam hôm yis vêl, êdêc xam dô i tiyi xochê blet niviha wê yis maên ge, ên Kilisi yib dì kitya il nêd nipaên vêl pyap, tiyi xochê bwoc sipsip wê he hi i yib lec buc Pasova ilage. ⁸ Om il ob sea môt nipaên viyang viyang i tiyi xochê he Yuda nêx yis la xel lec buc Pasova dì ya blet pileva wê yis maên ge, dì il ob dô hixôn nilôd tibed dì nêl kiyang nôn vôma, i tiyi xochê blet wê yis maên ge.

⁹ Kipihac wê a kivuu i loc vô xam ilage, a nêl vô xam ên a nêbê xam o lêc dô hixôn xomxo wê mi vông môp yôdac vêx yuu vux ge lêm. ¹⁰ Kiyang tige, a o nêl lec tibii madiluhu wê vông yôdac vêx yuu vux, dì he wê mi doma, dì he wê mi vun xomxo susu, dì he wê yev vixa kitu vô anutu kityooên ge lêm. Ên xam obêc nêb xam ob dô hixôn tibii madiluhu lêm ge od xam ob la na? Ên xomxo tigee dô vac vigwe vihati. ¹¹ Lêc kiyang wê a kivuu ge kehe bêga nêbê xomxo ti wê nêl nêb il lig vông vinêni ti ge obêc dô vac môp yôdac vêx yuu vux, me obêc doma vô xomxo ngwe susu, me obêc yev vixa kitu vô anutu kityooên, me obêc so vya vô xomxo, me obêc num mi vô mavmav, me obêc vun xomxo ngwe susu ge, od xam o dô hixôn xomxo tibêgee lêm, dì xam o lêc wa hixôn he lêm. ¹²⁻¹³ Tibii wê o vông i vin lêm ge, a o tiyi wê a ob yaxêni he ge lêm. Ên Anutu vaci obêc yaxêni he. Lêc lime vông vinêni ge, xacxam va ob yaxêni he. Om xam tii xomxo ti wê vông môp yôdac vêx yuu vux ge i loc vêl ên xam.

6

Xam o lêc vông kiyang vô lime vông vinêni lêm

¹ Xam ti kiyang obêc yêp vô lime ngwe ge om bêna lêc xam luu lime vông vinêni vêl di kô kiyang mi la vô tibii madiluhu ên xam nêb he i titô xam nêm kiyangê? ² Il wê Anutu nue ge, il obêc yaxêni xomxo kibun ga nêni kiyang timuên, lêc xam mêt lungêni tige? Xam obêc titô xomxo vihati nêni kiyang timuên, lêc mêt xam o tiyi wê xam ob titô xacxam va kiyang nipiwo ge lêmê? ³ Xam ngô lê. Il obêc titô angela nêni kiyang timuên, om môp kibun ga, ge tiyi wê il ob titô éno mêtge. ⁴ Om kiyang obêc yêp lec susu kibun ga ge od bêna lêc xam kô mi la vô tibii wê madiluhu ge ên xam nêb he i titô xam nêm kiyangê? ⁵ A nêl kiyang bêge vô xam ên a nêb i vông xam nim i yoc ên xam. Xam lime piyôp wê ob yaxêni lime nêni kiyang ge, ti mêt o dô vac xam mahigun lêmê? ⁶ Ên lime vông vinêni ya vông kiyang vô lie, lêc he kô kiyang tige mi la vô tibii wê vông vinêni maén ge ên nêb he i titô.

⁷ Môp wê xam kô lime ngwe mi la kiyang ge, ge xam vông i so. Môp wê niviha ge bêga nêbê lime ti obêc vông nipaên vô xam ge od xam o lêc nêl lêm. Dì lime ti obêc vun xam nêm susu ti ge od xam o le vac i xôn lêm. ⁸ Xam o timu vô môp niviha bêge lêm. Nge, xacxam va vông môp nipaên vô lime dì vun he nêni susu.

⁹ Xam ngô lê. Xomxo nipaên ti ob la dô vac Anutu ben lêm, lêc mêt xam o xovô tige lêm? Xam nilôm i o lêc kityoo xam lêm. Ên xomxo wê vông môp yôdac vêx yuu vux dì xomxo wê yev vixa kitu vô anutu kityooên, dì xomxo wê vông môp iimaên vô nipaên, dì vux wê vông môp nipaên vô vux vaci, ¹⁰ dì xomxo wê vun xomxo susu, dì xomxo madoên, dì xomxo wê mi num mi vô mavmav, dì xomxo wê nêl kiyang nipaên lec xomxo, dì xomxo wê vô xomxo ngwe susu vêl ge, xomxo tibêgee o tiyi wê ob la dô vac Anutu ben ge lêm. ¹¹ Ilage xam ya mi timu vô môp tibêgee, lêc Anutu lipac xam vô paha lec dì vinoo xam nêb xam tu i nue dì yê xam nêb xam xomxo niviha. Anutu vông bêge lec Apumtau Yesu Kilisi yuu Myakilôhô Ngibua wê Anutu vông ge.

Il ob vông il nidnivi i pimil Anutu

¹² Xomxo ya nêl ên he nêbê môp vihati niviha tiyi wê il ob vông ge. He nêl vixôhilôg, lêc môp ya ob vô niviha vô il lêm. Môp vihati ge tiyi wê a ob vông ge lê, lêc a ob vông môp ti i viac a lêm. ¹³ Xomxo ya nêl ên he nêbê yaén dô ên il xêdyaa dì il xêdyaa dô ên yaén. He nêl vixôhilôg, lêc Anutu obêc vông yuu xôn xôa obêc ma timuên. Dì il nidnivi ge, Anutu o tung ên nêb il vông môp yôdac vêx yuu vux lêm. Nge, il nidnivi ob tu Apumtau xe, dì Apumtau ob ngidu il nidnivi xôn. ¹⁴ Anutu tipi vô Apumtau Yesu kidi lec vac yibén, om obêc tipi vô il kidi lec vac yibén êno ya xêkizêc wê i vông ge.

¹⁵ Il hixôn Kilisi tiyi xocbê ninivi nôn tibed, lêc mêt xam o xovô lêmê? Tiyi wê il ob hôm Kilisi ninivi mya ti vêl dì vông i tu vêx yôdac ninivi mya ti, me? Ma vêl, môp tibêge o tiyi lêm. ¹⁶ Vux ti obêc la dô hixôn vêx yôdac ti ge od yuu ob tiyi xocbê nôn tibed, lêc mêt xam o xovô tige lêm? Ên kiyang wê yêp vac kipihac xolac ge nêl bêga ên nêbê, “Yuu ob tu ninivi nôn tibed.” ¹⁷ Lêc xomxo ti obêc vông i vin Apumtau ge od yuu xôn ob dô nôn tamaén tibed. ¹⁸ Mêgem xam xona nêm ên môp yôdac vêx yuu vux. Ên môp nipaên viyang viyang wê xomxo vông ge ob vông he vô nipaên, lêc môp yôdac vêx yuu vux ge wê ob vông xomxo nilô yuu ninivi vihati vô nipaên. ¹⁹ Xam nimnivi ge tiyi xocbê xumac ngibua wê Myakilôhô Ngibua ob dô vac ge, lêc mêt xam o xovô tige lêm? Anutu vông Myakilôhô Ngibua lam dô vac xam nilôm. Om xacxam va o tu xam kehe lêm, ²⁰ ên Anutu kisuu xam ya susu levac mabu yocêñ mi xam tu ixe, om xam nimnivi i pimil Anutu ya môp wê xam vông ge.

7

Kiyang lec môp iimaén

¹ Kiyang wê xam kinêg vô a vac kipihac ge, a ob nêl vô xam. Kiyang bêga nêbê xomxo ti obêc dô pileva dì iiên vêx obêc ma ge od obêc niviha. ² Lêc môp yôdac vêx yuu vux yêp, om vux toto ge, he i kô vêx dì vêx toto ge, he i kô vux. ³ Dì vux i o lêc kol ninivi ên vinê lêm. Dì vinê êno i o lêc kol ninivi ên liya lêm. ⁴ Ên vêx o tu ici va ninivi kehe lêm. Nge, liya tu vinê ninivi kehe. Dì vux êno o tu ici va ninivi kehe lêm. Nge, vinê tu liya ninivi kehe. ⁵ Om xam wê xam iima ge, muu o lêc kol nimnivi ênma lêm. Vixôhilôg, muu xôn obêc nêl kiyang i yêp tibed ên muu nêb muu ob vông mahigun vac dì kitaa vô Anutu ge od obêc niviha. Lêc muu obêc kitaa pyap ge od muu xôn kitucma tii vac nang, ên muu ob dô teva ênma xuhu dia ge od muu o tiyi wê muu ob viac nimnivi niviha ge lêm di Seten ob yaxêñ muu dô vông muu vac môp nipaên. ⁶ Kiyang wê a nêl ga, a o nêl ên a nêb xam vihati ob timu vô ge lêm. Ge yêp vô xam toto, om xam ti obêc nêb timu vô ge od i timu vô. ⁷ A nêb xomxo vihati obêc dô pileva tiyi xocbê a ge od obêc niviha, lêc Anutu vông xêkizêc hixôn xovôên vô xomxo toto, om ya ob iima dì ya iimaén ob ma.

⁸ A ob nêl kiyang ti vô xam ngivihi yuu vêxwo wê xam gên o iima lêm ge hixôn xam vêxôv bêga bê xam obêc dô pileva tiyi xocbê a ge od obêc niviha. ⁹ Lêc xam tiyiên ob ma wê xam ob viac nimnivi niviha ge od xam iima, ên xam ob dô pileva ge od nilô ngaêñ ob vông xam vô nipaên, om xam iima ên dô niviha.

¹⁰ A ob nêl kiyang bo ti vô xomxo wê iimaên ge, lêc o aca va kiyang lêm. Nge, Apumtau kiyang, om a nêl kiyang xêkizêc bêga bê vêx i o lêc sea liya lêm. ¹¹ Lêc obêc sea ge od i dô pileva di i o lêc loc kô vux ngwe lêm. Lêc obêc nêb dô pileva lêm ge od i lôc vô liya ên yuu i titô kiyang wê yêp vac yuu mahigun di kitucma i tii vac. Di vux êno i o lêc sea vinê lêm.

¹² Nang di a ob nêl kiyang ti vô xam ya. Lêc kiyang ga o Apumtau via lêm. Nge, aca va nêl bêga ên a nêbê vux wê vông i vin ge ti obêc kô vêx wê madiluhu ge ngwe, lêc vinê obêc lee yuu nêb ob dô hixôn liya ge od liya i o lêc sea vinê lêm. ¹³ Di vêx wê vông i vin ge ti obêc kô vux wê madiluhu ge ngwe, lêc liya obêc lee yuu nêb ob dô hixôn vinê ge, od vinê i o lêc sea liya lêm. ¹⁴ Ên vux wê madiluhu ge obêc dô hixôn vinê wê vông i vin ge od tiyi xochê yuu xôn tu Anutu xe. Di vêx wê madiluhu ge obêc dô hixôn liya wê vông i vin ge od tiyi xochê yuu xôn tu Anutu xe. Ên obêc ma ge od xomxo tige nue ob dô tiyi xochê tibii madiluhu ge, lêc o bêge lêm. Ên he nue tu Anutu xe hixôn. ¹⁵ Lêc vêx wê madiluhu ge obêc nêb sea liya wê vông i vin Kilisi ge od i sea, di vux wê madiluhu ge obêc nêb sea vinê wê vông i vin ge od i sea. Ên kiyang ti o yêp wê ob ku xomxo vông vinê tige xôn ge lêm. Ên Anutu tyuc il nêb il ob dô vac kiyang malehe. ¹⁶ Ông vêx, ông tiyi wê ông ob didii liyam mi loc vô Anutu ge, me? Ông o xovô lêm. Di ông vux, ông tiyi wê ông ob didii vinêm mi loc vô Anutu ge, me? Ông lungên.

Il ob dô vac môt yuu yuac wê il dô vac di Anutu tyuc il ge

¹⁷ Apumtau vông môt yuu yuac toto vô xomxo toto, om môt yuu yuac wê xam dô vac vô buc wê Anutu tyuc xam ilage od xam tup vô gwêbaga hixôn. A mi nêl kiyang tibêge vô xomxo vac konglegesen vihati. ¹⁸ Om xomxo ti obêc gôl ninivi pyap, lêc Anutu tyuc i nêb i tu i nu ge od xomxo tige ob lax duu ninivi xôn tii vac lêm. Di xomxo ti obêc dô di ninivi gôlên ma, lêc Anutu tyuc i nêb i tu i nu ge od i o lêc gôl ninivi lêm. ¹⁹ Ên môt wê ninivi gôlên hixôn môt wê gôlên ninivi ma ge, yuu xôn tiyi xochê susu pileva. Di môt nôn tibed wê nêb il viac Anutu xolac niviha di timu vô ge.

²⁰ Xam lêc dô vac môt yuu yuac i tiyi xochê xam dô vac ilage di Anutu tyuc xam nêb xam tu i nue. ²¹ Om xam wê xam tu xomxo ya nue yuac pileva xochê kalabuhu ge dêc Anutu tyuc xam nêb xam tu i nue ge, od xam nilôm i o lêc vô viyin ên yuac wê xam dô vac ge lêm. Lêc xomxo levac wê viac ông ge obêc nêb ông sea yuac tige ge od ông sea. ²² Ên xomxo wê tu xomxo ngwe nu yuac pileva ge, Apumtau obêc tyuc i nêb i tu i nu ge od Anutu ob yê xomxo tige tiyi xochê o dô vac xomxo ngwe kwa ngibi ge lêm. Di xomxo wê o dô vac xomxo ngwe kwa ngibi lêm ge, Kilisi obêc tyuc i nêb i tu i nu ge od obêc dô tiyi xochê Kilisi nu yuac. ²³ Anutu kisuu xam ya susu levac mi xam tu i nue, om xam o lêc sea Anutu di loc vac xomxo ngwe kwa ngibi vidaa lêm. ²⁴ Xam lige, môt yuu yuac wê xam dô vac ilage di Anutu tyuc xam ge, xam lêc dô vac gwêbaga hixôn Anutu.

Kiyang lec xomxo wê iimaên ma ge

²⁵ Vêx yuu vux wê gên o iima lêm ge, Apumtau o nêl kiyang ti vô a lec he lêm, lêc a ob nêl i tiyi xovôen wê a vông ge, ên Apumtau xo vigwe pisiv ên a di vông xovôen vô a, om kiyang wê a nêl ge niviha tiyi wê xam ob

vông i vin ge. ²⁶⁻²⁷ Buc gwêbaga il dô vac viyin levac, om a xo bêga ên a nêbê xam wê xam ii vêx ge, xam o lêc myag môp wê xam ob sea vêx ge lêm. Di xam wê xam dô pileva ge, xam o lêc nêb ii vêx lêm. Nge, xam toto dô i tiyi xocbê xam dô gwêbaga. ²⁸ Lêc ông obêc ii vêx ti ge od ông o vông nipaên ti lêm. Di vêxwo ti obêc kô vux ti ge, ge o nipaên lêm. Lêc xomxo wê iima ge obêc xo yuac tibeac om a xo ên a nêb viyin tibêge i o lêc tulec xam lêm.

²⁹ Xam lige, a nêl bêga ên a nêbê buc vô kwabo lec, om buc wê gên yêp ge, xomxo wê ii vêx ge, he i vông yuac vô Anutu i tiyi xocbê xomxo wê iiên vêx ma ge. ³⁰ Di xomxo wê byag ge, he i dô i tiyi xocbê he o byag lêm, di xomxo wê dô hixôn xêyaa niviha ge he i dô i tiyi xocbê he xêyaa o niviha lêm. Di xomxo wê kisuu susu ge, he i dô i tiyi xocbê he nêb susu maên ge. ³¹ Di xomxo wê vông yuac ên susu kibun ga ge, he i dô i tiyi xocbê he o vông nilô la vô susu kibun ga lêm. Ên môp yuu susu wê dô lec kibun ga ge xôa obêc ma.

³² A nêl bêge, ên a nêb xam dô hixôn nilôm niviha, di nilôm i o lêc loc vô môp yuu susu kibun ga lêm. Vux wê o ii vêx lêm ge tiyi wê he ob vông nilô la diluhu vô Anutu yuac ên nêb ob vông môp wê Anutu xêyaa vin lec ge. ³³ Lêc xomxo wê ii vêx ge ob vông nilô la vô môp yuu susu wê ninivi xen ge hixôn, ên nêb ob vông vinê xêyaa i vô niviha, ³⁴ om nilô la yuu. Di vêxwo hixôn vêx wê o kô vux lêm ge, he ob vông nilô la vô yuac wê Anutu vông ge, ên he nêb he ninivi yuu nilô yen i dô ngibua. Lêc vêx wê ii vux ge ob vông nilô la vô môp yuu susu wê ninivi xen ge hixôn ên nêb ob vông liya xêyaa i vô niviha. ³⁵ A nêl kiyang tige vô xam ên a nêb i ngidu xam xôn di xam dô nimviha. Di a ob le vac xam xôn lêm. Nge, a nêb xam dô niviha di vông nilôm i loc diluhu vô Apumtau.

³⁶ Xomxo ti obêc xo nêb i vông môp soén, ên wê nu vêx vô vêxwo pyap tiyi wê ob kô vux ge di nu vêx êno nêb ob kô vux, lêc ma gên o lee yuu lêm ge od ma i timu vô môp wê i xovô ge di vông nu vêx tige i kô vux, ên môp ii maên o nipaên lêm. ³⁷ Lêc ma obêc xo vac nilô nêbê i nu vêx ob dô gilon di kôen vux obêc ma, di susu ti o le vac môp xôn lêm ge od i lêc timu vô xovôên wê yêp vac i nilô ge di nu vêx i dô gilon ge od obêc niviha. ³⁸ Mègem ma tyo obêc vông nu vêx kô vux ge od niviha, lêc ma obêc nêb vông nu vêx dô pileva di iiên vux ob ma ge od ge niviha yang.

³⁹ Vêx ti liya obêc gên dô ge od xolac nêl bêga ên nêbê i dô hixôn liya di seaên liya i ma, lêc liya obêc yib di vêx tige obêc nêb kô vux paha ngwe nang ge od i kô vux tiyi xovôên wê i vông ge. Lêc i kô vux wê yuu xôn timu vô Apumtau xolac ge. ⁴⁰ Lêc xovôên wê a vông ge bêga nêbê vêxôv tige obêc dô pileva di kôen vux obêc ma ge od obêc dô hixôn xêyaa niviha yang. Di a ga, a xovô ên a nêbê Myakilôhô Ngibua wê Anutu vông ge dô hixôn a om vông xovôên niviha vô a.

8

Bwoc liyôhô wê tibii vông i tu daa vô anutu kityooên ge

¹ A ob nêl kiyang lec môp wê ob yaên bwoc wê tibii vông i tu daa vô anutu

kityooên ge. Vixôhilôg, il vihati tulec piyôp pyap, lêc piyôp ge pileva wê obêc vông il yong il, lêc môp wê ob ngidu il xôn ge, môp xêyaa vin lec maên. ² Xomxo ti obêc yong i nêb i xovô kiyang vihati pyap ge od xovôên

wê i vông ge o tiyi lêm. ³ Lêt xomxo ti xêyaa obêc vin lec Anutu ge od Anutu xovô xomxo tige nêb tu ixe.

⁴ Om kiyang lec môt wê ob yaén bwoc liyôhô wê tibii vông i tu daa vô anutu kityooên ge, il xovô ên il nêbê anutu kityooên o susu nôn lêm, ên Anutu nôn tibed wê dô. ⁵ Vixôhilôg, susu wê xomxo vînôo nêb anutu, di susu wê he vînôo nêb xomxo levac ge, tibeac dô kibun ga di dô kisii ganê, ⁶ lêt il ga, il xovô ên il nêbê Anutu ge tibed, wê il mag, di ici va tu susu vihati kehe, om il ob vông i lê i vô levac. Xomxo levac nôn tibed, ge Apumtau Yesu Kilisi, wê i tu susu vihati kehe di ici va vông il lax tu ixe.

⁷ Anutu kityooên ge o susu nôn ti lêm, lêt xomxo vông vinê ya o vyac xovô kiyang tige lêm. Ên ilage he mi timu vô anutu kityooên, di he mi ya bwoc wê tibii vông vô anutu kityooên ge, lêt gwêbaga he xo ên he nêbê he obêc ya bwoc tige ge od ob vông he nilô vô ningeac di Anutu ob yê he nêb he xomxo nipaên. ⁸ Lêt Anutu ob yê môt wê il xa yaén ge di nêl bê il xomxo niviha me nipaên lêm. Om il xaén obêc ma ge od Anutu ob yê il nipaên lêm, di il obêc xa yaén ge od il ob kô lê levac vô Anutu lec môt tige lêm.

⁹ Lêt xam viac xam di xona nêm, ên xam tiyi wê xam ob wa yaén tige lê, lêt xomxo wê gên o vông i vin xêkizêc lêm ge obêc yê wê xam wa ge od obêc vông he nilô vô nipaên. ¹⁰ Xam wê xam xovô ge, xam ti obêc la vac xumac wê anutu kityooên vông ge di la dô mi wa, di xomxo wê o vông i vin xêkizêc lêm ge obêc yê wê ông la wa yaén wê tibii vông i tu daa vô anutu kityooên ge od xomxo tige nilô obêc kidu i nêb i ya yaén tige hixôn. ¹¹ Om tige tiyi xochê piyôp wê xam vông ge vông lim tige wê o vông i vin xêkizêc lêm ge vô nipaên. Lim tige Kilisi yib ên i êno, lêt xam vông i vô nipaên. ¹² Xovôên wê he vông ge myabo, om xam obêc vông beige ge od tiyi xochê xam vông he sea vông vinê wê he vông ge. Môt tibêge tiyi xochê xam vông nipaên vô Yesu Kilisi. ¹³ Mêgem yaén wê a ob xa ge obêc vông a lige ti vô nipaên ge od a ob xa yaén tige i tii vac lêm, ên a nêb a ob vông a lig tige i vô nipaên lêm.

9

Pol nêl xolac di o kô susu lec yuac wê i vông ge lêm

¹ Mêd môt ti yêp wê ob le vac a xôn ge, me? Ti o yêp lêm. Mêd a o sinale nôn lêm, me? A ga, a sinale nôn, wê a xê il lig Apumtau Yesu lec magnôn. Di yuac wê a vông vô Apumtau ge yuac tige nôn xam wê vông vinê ge. ² Xomxo ya nêl ên he nêbê a o sinale ti lêm, lêt xam xovô ên xam nêbê a ga sinale, ên a nêl xolac vô xam mi xam vông i vin Apumtau, om tiyi xochê môt wê xam vông i vin ge nêl kitong nêbê a sinale nôn.

³ Xomxo ya obêc vông kiyang vô a lec yuac sinale wê a mi vông ge od a mi luu kiyang beige vô he ên a nêbê, ⁴ Mêd xe o tiyi wê xe ob kô xom yaén hixôn numên vô xomxo vông vinê ge lêmê? ⁵ Di Pita hixôn Apumtau Yesu lie di sinale baba kô vinêe wê vông i vin ge mi he xôn la vîlee vac yuac, di xam lee yuu ên xam nêbê niviha, lêt mêd xam nêb xe o tiyi wê xe ob timu vô môt tibêge hixôn lêm ge, me? ⁶ Mêd xii Banabas, xicxii va o tiyi wê xii ob sea yuac ninivi xen ge lêm, me? ⁷ Xam xovô lê. Tibii vevac ob kisuu xen yaén yuu ngakwi wê ob viac heche va ge, me? Ma vêl. Di

xomxo ti obêc xin wain vac yuac ge od ici va tiyi wê ob yul nôn ya mì ya, dì xomxo ti obêc viac bwoc kau ge od ici va ob gig lul mì num.

⁸ Kiyang wê a nêl ga, mêd a nêl i tiyi kiyang kibun ga, me? Lêc kiyang ga yêp vac kipihac xolac hixôn. ⁹ Èn kiyang wê Anutu nêl vô Moses ge yêp bêga nêbê, “Bwoc levac ti obêc vông yuac vô ông di kê wit ge od le i lêc ku mya xôn lêm. Nge, i kê wit dì ya nôn hixôn.” Kiyang tige, Anutu o nêl lec bwoc vaci lêm. ¹⁰ Nge, Anutu nêl kiyang tige lec xe hixôn, ên xomxo wê vông yuac lec kibun ên nêb ob xin vê ge hixôn xomxo wê ob yul nôn ge, yuu xôn vông yuac levac ên nêb yuu ob kô nôn timuên. ¹¹ Xe loc nêl xolac vô xam tiyi xocbê xe xin vê wê kinu xen ge vac xam nilôm, om xe obêc kô nôn wê ninivi xen ge ya hixôn vô xam ge od ge tiyi. ¹² Èn xomxo ya kô susu wê ninivi xen ge ya vô xam, lêc xe ga, xe tiyi wê xe ob kô susu i luu vêl vô xam.

Xe tiyi wê xe ob kô susu ninivi xen ge vô xam lê, lêc xe nêb xe ob kô lêm, om xecxe va vông yuac ên susu wê ob ngidu xe nimnivi xôn ge, ên xe nêb xe ob le vac Kilisi xolac xôn ên xam lêm. ¹³ Xomxo wê vông yuac vac Anutu xumac ngibua ge, he kô xen yaêñ vac xumac ngibua, dì he wê mi si daa vô Anutu lec alta ge, he mi kô bwoc wê he mi si ge vilu mì la ya. ¹⁴ Môp yêp bêge, om Apumtau nêl kiyang xêkizêc bêga nêbê xomxo wê nêl xolac ge ob kô susu wê ob ngidu he xôn ge vô xomxo wê he la nêl xolac vô he ge.

¹⁵ Lêc a o kô susu bêge ti vô xam lêm. Di kiyang wê a kivuu ga, a o kivuu ên a nêb a ob kô susu ya vô xam ge lêm. Ma vêl. Om vip obêc den a dì a xib ge od pyap, ên a xêgyaa vô nivîha ên wê a o kô susu ti vô xam ge lêm. Mêgem a ob kitaa susu ti vô xam lêm, ên obêc vô xêyaa nivîha tige vêl ên a. ¹⁶ A mi nêl xolac vô xomxo, lêc o tiyi wê a ob yong a ên wê a mi nêl xolac ge lêm. Èn Anutu vaci vông yuac vô a nêb a nêl xolac, om a nêlên obêc ma ge od a ob tulec myaviwen. ¹⁷ Aca va obêc nêb vông yuac tige ge od tiyi wê a ob kô nôn nivîha lec yuac tige. Lêc o bêge lêm, ên Anutu vaci vông yuac tige vac a vigêg om a ob vông. ¹⁸ Om nôn vatya wê a obêc kô ge? A kô nôn bêga bê a kô yuac nivîha wê a ob nêl xolac pileva vô xomxo dì a ob kô susu ti vô he lêm. Èn a tiyi wê a ob kô susu vô he ge lê, lêc a nêb a ob kô lêm.

Pol tu xomxo vihati nu yuac

¹⁹ A o tu xomxo ti nu yuac pileva lêm. Lêc aca va nêb a ob tu xomxo vihati nu yuac, ên a nêb a ob didii he tibeac i loc vô Kilisi. ²⁰ Om buc wê a dô hixôn xomxo Yuda ge od a dô vac môp tiyi xocbê he Yuda mi dô vac ge, ên a nêb a ob didii he i loc vô Kilisi. A o dô vac Moses xolac kwa ngibi lêm, lêc a obêc dô hixôn xomxo wê dô vac Moses xolac kwa ngibi ge, od a dô tiyi xocbê a dô vac xolac wê Moses vông ge kwa ngibi hixôn, ên a nêb a ob didii he i loc vô Kilisi. ²¹ Dì a obêc dô hixôn xomxo ba wê o xovô Moses xolac lêm ge, od a dô tiyi xocbê he dô ge, ên a nêb a ob didii he mi lôm vô Kilisi. Lêc a o sea Anutu xolac lêm. Nge, a hôm Kilisi xolac xôn pilahi. ²² Dì a ob dô hixôn xomxo wê o vông i vin xêkizêc lêm ge od a dô tiyi xocbê he ge, ên a nêb a ob ngidu he xôn ên he i vông i vin xêkizêc. Om a ob dô hixôn xomxo viyang toto ge od a mi dô vac môp tiyi xocbê he mi dô vac ge ên a nêb a ob didii he ya mi lôm vô Kilisi. ²³ A vông môp

bêge, ên a nêb a ob vông xolac i vô levac êdêc tulec vizid wê xolac vông ge ya hixôn.

Il ob tup xêkizêc ên kô nôn niviha timuêñ

²⁴ Il xovô bê xomxo obêc nêb tup mi nginoo ma ge od he vihati tup, lêc xomxo tibed obêc nginoo dì kô nôn. Om xam tup xêkizêc êdêc nginoo dì kô nôn niviha. ²⁵ Dì xomxo wê nêb ob tup mi nginoo ge, he tixuu he niviha tiyi buc vihati dì he o vông nilô la vô susu ngwe hixôn lêm. He vông bêge ên he nêb he obêc nginoo ên kô nôn kibun ga, lêc nôn kibun ga ge wê obêc pital lutibed dì xôa obêc ma. Lêc nôn wê il ob tup ên ge, wê obêc yêp luta. ²⁶ Om a ga, a tup lêc a o tup mi la vaxvax lêm. Nge, a tup mi la bôbac. Dì a vông tiyi xochê xomxo wê mi hi xomxo ya vigê ge, lêc a o hi vigêg la pisiv lêm. ²⁷ A tixuu nignivi lec viyin ên a nêb i tup vô môp niviha, ên a obêc nêl xolac vô xomxo ya dì obêc timuêñ ge lê, lêc Anutu obêc ngiloo a vêl dì a o kô nôn lêm.

10

Il ob la vac môp nipaêñ lêm

¹ Xam lige, a nêb xam xovô wê ilage Moses didii xe buge Islel mi he la vac vigwe myadongêñ ge, om viyôbtoc yêp kisii mêt didii he vihati, dì gwec tip lax yêp viwen viwen dì he vihati la vac mahigun wê kwpêñ ge dì la kehe vilu ganê. ² Om viyôbtoc yuu xôn gwec ge, tiyi xochê he vihati lipac mia dì timu vô Moses xolac. ³ Dì he xôn vihati ya yaêñ wê Anutu Myakilôhô Ngibua vông vô he ge. ⁴ Dì he xôn num mia wê Anutu Myakilôhô Ngibua vông vô he ge. Mia tige lam vac ngidax ti wê la hixôn he ge. Ngidax tige, ge Kilisi. ⁵ Lêc Anutu xêyaa vô myavinê vô he tibeac ên nipaêñ wê he vông ge om kitya he vêl vac vigwe myadongêñ.

⁶ Kiyang tige ob vông xovôêñ vô il bêga bê il ob do mad vô môp nipaêñ i tiyi xochê he vông ilage lêm. ⁷ Om xam o lêc yev vixam kitu vô anutu kityooêñ tiyi

xochê he ya vông ge lêm. Kiyang yêp vac xolac bêga nêbê, “He Islel dô mi ya dì num, pyap dêc kidi lec mi yoo vô anutu kityooêñ.” ⁸ Dì il ob vông môp yôdac vêx yuu vux i tiyi xochê he ya vông ge lêm, ên he tibeac hiwocêñ tiyi xochê 23 tausen ge vông nipaêñ om yîb mima vêl lec buc tibed. ⁹ Dì il ob yaxêñ Apumtau i tiyi xochê he ya vông ilage lêm. Ên he yaxêñ Anutu om myel nga he dì he yib. ¹⁰ Dì xam o lêc kunac Anutu dì nêl kiyang tibeac lec i tiyi xochê he Islel ya nêl ilage lêm. Ên he kunac Anutu dì nêl kiyang tibeac lec i om angela vevac ti lam hi he yib.

¹¹ Môp vihati wê he Islel vông ilage ob vông xovôêñ vô il, om xomxo kivuu mi i yêp vac kipihac ên nêb il xê dì xona ên môp nipaêñ, ên buc myahipu vô kwabo lec. ¹² Om xomxo ti obêc xo nêb i le xêkizêc pyap ge od i viac i niviha ên gec lêc tô madia. ¹³ Môp wê tulec xam ên nêb ob yaxêñ xam ge, môp tibêge wê ob tulec il vihati tiyima. Lêc Anutu ob vông i tiyi kiyang wê hilu pyap ge dì ob sea il lêm, om yaxêñ wê ob tulec il ge Anutu obêc vông i nginoo il vêl lêm. Nge, obêc hilung môp vô il bêga bê ob vông xêkizêc vô il ên nipaêñ i o lêc pwoo il pec lêm.

Il o tiyi wê il ob timu vô Anutu hixôn vimwo nipaêñ ge lêm

¹⁴ Xam lige wê a xêgyaa vin lec xam ge, xam vô nimim vô anutu kityooên di pec ên môp tibêge. ¹⁵ Xam piyôp niviha om a ob nêl kiyang vô xam di xam yaxêñ kiyang wê a ob nêl ge. ¹⁶ Kap wain wê il kitaa lec dì num vac ge tiyi xocbê Kilisi hi kituc il la tu nôn tibed. Di blet wê il hibu mi xa ge, tiyi xocbê Kilisi ninivi kituc il tu nôn tibed. ¹⁷ Blet tige nôn tibed di il xôn vihati, il xa blet tige, om il dô tiyi xocbê nôn tibed.

¹⁸ Xam xovô lec môp wê he Islel mi vông ge. Ên he obêc tung daa vô Anutu lec alta dì ya viwen ge od tiyi xocbê he hixôn Anutu wê i alta tige, he tu nôn tibed. ¹⁹ Kiyang wê a nêl ga, kehe lec vatya? Mêd a nêl ên a nêbê anutu kityooên hixôn yaêñ wê tibii vông i tu daa vô anutu kityooên ge, ge susu nôn ti, me? ²⁰ Ma vêl, ge o susu nôn ti lêm. Susu wê tibii madiluhu vông i tu daa vô anutu kityooên ge he o vông vô Anutu lêm. Nge, he vông vô vimwo nipaêñ. Om a nêb xam o lêc kituc loc dô nôn tibed hixôn vimwo nipaêñ lêm. ²¹ Ên o tiyi wê xam ob num vac kap wê Apumtau vông ge, nang dêc la num vac kap wê vimwo nipaêñ vông ge hixôn lêm. Di o tiyi wê xam ob wa yaêñ wê Apumtau vông ge, nang dêc la wa yaêñ wê vimwo nipaêñ vông ge hixôn lêm. ²² Lêc mêd xam nêb xam ob vông Apumtau xêyaa i vô myavinê, me? Xêkizêc wê xam vông ge mêd luu xêkizêc wê Anutu vông ge vêl, me?

Il ob pimil Anutu lê i tiyi buc vihati

²³ Xam ya nêl ên xam nêbê môp vihati niviha tiyi wê il ob vông ge. Xam nêl vixôhilôg lê, lêc môp ya ob vô niviha vô il lêm. Di môp vihati niviha tiyi wê il ob vông ge lê, lêc môp ya ob ngidu vông vinêñ wê il vông ge xôn lêm. ²⁴ Xomxo ti i o lêc xovô môp wê ob vô niviha vô ici va ge lêm. Nge, i xovô môp wê ob vô niviha vô he xôn lie vihati ge.

²⁵ Xam obêc nêb kisuu bwoc liyôhô vac stua ge od le i lêc kinêg bê “Bwoc tiga wê tibii vông i tu daa vô anutu kityooên ge, me?” Le i lêc kinêg bêge lêm. Nge, xam kisuu mi wa. ²⁶ Ên kiyang yêp vac xolac bêga nêbê, “Susu vihati wê dô lec kibun ga, Anutu tu kehe.”

²⁷ Tibii wê o vông i vin lêm ge ti obêc nêb ông loc wa hixôn i, di ông obêc nêb la ge od ông loc, di ông wa yaêñ vihati wê ob vông vô ông ge, di ông o lêc xo kiyang tibeac lec di kinêg lec yaêñ tige lêm. ²⁸ Lêc xomxo ti obêc nêl vô ông bê “Yaêñ tiga, he vông i tu daa vô anutu kityooên” ge od ông xovô xomxo wê nêl kiyang tige di ông xovô viyin wê yêp lec yaêñ ge. ²⁹ Vixôhilôg, ông tiyi wê ông ob wa yaêñ tige, lêc vô viyin vô xomxo ti wê nêl yaêñ kitong vô ông ge, om ông o lêc wa yaêñ tige lêm.

Aca va tiyi wê a ob xa lê, lêc xomxo ngwe wê o vông i vin xêkizêc lêm ge obêc yê a nipaêñ ên wê a xa ge, om o niviha lêm. ³⁰ A obêc pimil Anutu ên yaêñ tige di xa lê, lêc xomxo tige obêc yê di nêl kiyang nipaêñ lec a lec yaêñ tige om o niviha lêm.

³¹ Mêgem xam obêc wa di num, me xam obêc vông môp vae vae hixôn ge od xam vông môp tigee vihati ên pimil Anutu lê i vô levac. ³² Di xam xovô he Yuda hixôn he Glik, hixôn Anutu nue vông vinêñ vihati, di xam vông môp wê he ob yê niviha ge, di xam o lêc didii he loc vac môp nipaêñ lêm. ³³ A ga, môp vihati wê a vông ge, a vông ên a nêb xomxo vihati i yê niviha. Di a o vông môp tige ên a nêb i vô niviha vô aca va lêm. Nge, a vông ên a nêb i vô niviha vô xomxo tibeac, ên he i pilepac he vô Anutu di Anutu i vô he vêl ên he nêb nipaêñ.

11

¹ Mêgem xam timu vô a vixag dì vông môp i tiyi xocbê a vông ge, ên a timu vô Kilisi vixa dì vông môp tiyi xocbê Kilisi vông ge.

Môp wê ducêni nivimihi lec bazub xôn ge

² A hi vixag pec ên xam ên wê xam xovô a, dì kiyang wê a nêl vô xam ge xam hôm xôn pilihi dì timu vô. ³ Lêc a nêb xam xovô kiyang bêga bê Kilisi tu vux vihati bazub, dì vux vihati tu viné bazub, dì Anutu tu Yesu bazub. ⁴ Om vux ti obêc duc nivimihi lec bazub xôn dì kitaa me nêl Anutu xolac ge od ob vông ni yocên vô ici va bazub. ⁵ Lêc vêx ti obêc kitaa me obêc nêl Anutu xolac lêc o duc nivimihi lec bazub xôn lêm ge od ob vông ni yocên vô ici va bazub, tiyi xocbê vêx nipaén wê pul bazub lihi vêl ge. ⁶ Vêx ti ob duc nivimihi lec bazub xôn lêm ge od i kiping bazub lihi vô myabo. Lêc môp wê obêc kiping bazub vô myabo hixôn môp wê ob pul bazub ge obêc vông i ni yoc, om i duc nivimihi lec

bazub xôn mô. ⁷ Lêc vux i o lêc duc nivimihi lec bazub xôn lêm, ên Anutu tung vux tiyi xocbê ici va, nêb i hilung xêseac wê Anutu vông ge, dom vêx ob hilung xêseac wê vux vông ge. ⁸ Ên ilage Anutu o hôm vêx ninivi mi vông i lax tu vux lêm. Nge, hôm vux ninivi dì vông i lax tu vêx. ⁹ Dì Anutu o tung vux ên nêb i ngidu vêx xôn lêm. Nge, tung vêx ên nêb i ngidu vux xôn. ¹⁰ Môp yêp bêge, mêgem vêx ob duc nivimihi lec bazub ên i nêl kitong bê i dô vac liya kwa ngibi, ên angela i yê hixôn. ¹¹ Lêc môp wê Apumtau vông ge ob xovô vux vaci dì lungên vêx lêm, me ob xovô vêx vaci dì lungên vux lêm. Nge, yuu xôn ob ngiduma xôn. ¹² Ên taxlee vêx lam vac vux, lêc gwêbaga vêx kô nue vux om xocbê vux lam vac vêx. Lêc xomxo vihati ge Anutu tu kehe.

¹³ Om xacxam va yaxên lê. Vêx ti obêc kitaa vô Anutu lêc o duc nivimihi lec bazub xôn lêm ge od obêc tiyi, me tiyiên obêc ma? ¹⁴ Môp wê il mi vông ge nêl kitong vô il bêga nêbê vux ti bazub lihi obêc dia ge od o tiyi lêm. ¹⁵ Lêc vêx bazub lihi obêc dia ge od tiyi xocbê vunacêni niviha, ên Anutu vaci vông vêx bazub lihi dia nêb i hivun he bazub xôn. ¹⁶ Xomxo ti obêc nêb ngaén a lec kiyang tiga ge od i xovô bêga bê xe hixôn konglegesen wê Anutu nue ge, xe vihati mi vông môp bêge.

Xomxo Kolin vông môp pasa yaén vô nipaén

¹⁷ Kiyang wê a ob nêl vô xam ge, a ob pimil xam lêm. Ên kitucmaén wê xam vông ge o vô niviha vô xam lêm, dì môp nipaén ya yêp vac hixôn. ¹⁸ Kiyang taxlee bêga nêbê buc wê xam kitucma mi wê da ge od xam o dô mya tibed lêm. Nge, xam wêma nipaén om xam dô kidu kidu. Xomxo ya nêl tibêge vô a dì a vông i vin kiyang tige mangwe. ¹⁹ Vixôhilôg, môp yêp bêga nêbê xam hibuma sea dì dô kidu kidu, ên xomxo wê vông i vin nôn ge he i le seac ên xam xovô he. ²⁰ Lêc buc wê xam kitucma ge, xam o wa pasa wê Apumtau vông ge niviha lêm. ²¹ Ên yaén wê xam toto kô mi lam ge xam wa lutibed, om lime ya dô vip dì xam ya wa mi num levac mi vô mavmav. ²² Bêna lêc xam vông môp tibêge vac kitucmaén? Xam nêm xumac wê xam ob wa dì num vac ge mêd ma, me? Xam mêd wê Anutu nue vông vinêni tiyi xocbê xomxo pileva, dì xam vông he wê xen yaén ma ge ni yoc. Om a ob nêb va vô xamê? Xam so ên xam nêb mêd a ob pimil xam lec môp tibêge? Ma vêl. A ob pimil xam lec môp tibêge lêm.

Pol nêl lec wê Yesu vông pasa vô nue ngivihi ge

²³ Kiyang wê a nêl vô xam ilage, Apumtau vaci nêl vô a. Kiyang bêga nêbê vô buc wê Judas vông Yesu Kilisi la vac tibii vevac vigê ge, Yesu hôm blet, ²⁴ dì kitaa lec mêd hibu di nêl ên nêbê, “Ga a liyôhô wê a vông ên a nêb i ngidu xam xôn. Xam vông i tiyi xocbê a vông vô xam ga di xovô a.” ²⁵ He ya pyap, mêd Yesu hôm kap dì kitaa lec dì nêl ên nêbê, “Mia wain tiga a hi wê ob vông kiyang paha wê Anutu hilu ge vô nôn lec. Buc wê xam ob num ge od xam vông i tiyi xochê a vông ge di xovô a.” ²⁶ Om buc wê xam ob wa blet di num wain ge od xam ob nêl kitong bêga bê Apumtau yib ên il, om xam vông bêge dì i loc tyip vô buc wê Apumtau ob vena lec ge.

Xomxo ti obêc vông pasa vô nipaên ge od ob kô myaviwen nipaên lec

²⁷ Mêgem xomxo ti ob viac i niviha lêm di ob ya Apumtau liyôhô di num Apumtau hi pileva ge od tiyi xocbê vông Apumtau liyôhô yuu hi vô nipaên, om ob kô myaviwen nipaên lec. ²⁸ Om xomxo toto ge i yaxêñ he di viac he, pyap dêc ya blet dì num vac kap. ²⁹ Ên xomxo ti obêc ya dì num vaxvax dì o xovô Apumtau ninîvi niviha lêm ge od ob kô myaviwen levac lec nêñ nipaên wê i vông ge. ³⁰ Xam mi vông môp bêge, om xam tibeac tulec viyin wê xam nimnivi vô xêlehe di yidac vông xam, di xam ya wib. ³¹ Lêc il toto obêc yaxêñ il niviha ge od Anutu ob vông myaviwen tulec il lêm. ³² Lêc Anutu obêc vông myaviwen nipaên vô il ge od vông ên nêb ob titô il, ên il o kô myaviwen nipaên hixôn xomxo nipaên kibun ga lêm.

³³ Om xam lige, xam obêc kitucma ên nêb wa pasa ge od xam dô binma. ³⁴ Dì xomxo ti, vip ob den i ge od i ya yaêñ vac ben lê, ên kitucmaêñ wê xam vông ge i o lêc vô nipaên dì xam kô myaviwen lec lêm.

Kiyang ya gên yêp om a obêc miloc vô xam lê, lêc titô.

12

Myakilôhô Ngibua vông xovôêñ toto vô xomxo

¹ Xam lige, a nêb a ob nêl xovôêñ niviha wê Myakilôhô Ngibua vông vô xomxo ge kitong vô xam, ên xam xovô. ² Xam xovô ên xam nêbê buc wê xam gên dô mamdiluhu dì lungêñ xolac ge, od xam nilôm vông xam la vô anutu kityooêñ wê mayibêñ ge. ³ Om a nêb a ob vông xovôêñ vô xam bêga bê Anutu Myakilôhô Ngibua obêc dô hixôn xomxo ti ge od o tiyi wê ob nêl kiyang nipaên ti lec Yesu lê ge lêm. Di Myakilôhô Ngibua obêc dô hixôn xomxo ti lêm ge od o tiyi wê ob nêl bê Yesu ge Apumtau ge lêm. Ên Myakilôhô Ngibua vaci wê ob ngidu xomxo xôn di i nêl bê Yesu ge Apumtau.

⁴ Myakilôhô Ngibua vông xovôêñ toto vô xomxo, lêc Myakilôhô Ngibua nôn tibed. ⁵ Di yuac wê il ob vông ge toto, lêc il vông yuac vô Apumtau nôn tibed. ⁶ Di piyôp toto yêp wê il ob vông yuac ya ge, lêc Anutu nôn tibed wê vông xêkizêc vô xomxo vihati ên nêb he i vông yuac ya ge. ⁷ Myakilôhô Ngibua vông xêkizêc wê i vông ge vô xomxo toto ên nêb he toto i vông yuac dì i vô niviha vô xomxo vihati. ⁸ Om Myakilôhô Ngibua vông xêkizêc vô xomxo ya tiyi wê he ob nêl xolac hixôn piyôp niviha vô xomxo ge, di Myakilôhô Ngibua nêl xolac kehe kitong vô xomxo ngwe ên nêb i nêl hixôn nôn vô lie. ⁹ Di Myakilôhô Ngibua vông xêkizêc vô xomxo ti tiyi wê ob vông i vin xêkizêc ge, di Myakilôhô Ngibua vông xêkizêc vô xomxo ti tiyi

wê ob vông xomxo yidac vô niviha lec ge. ¹⁰ Dì xomxo ti kô xêkizêc tiyi wê ob vông do levac ge, dì ti tiyi wê ob nêl Anutu xolac yêp seac vô xomxo ge, dì ti tiyi wê ob yaxên kiyang yuu môp vihati dì xovô bê niviha me nipaên, dì ti tiyi wê ob nêl kiyang vac via xôpacêng ge*, dì ti tiyi wê ob nêl via tige kehe kitong yêp seac ge. ¹¹ Xovôêng tigee vihati yêp vô Myakilôhô Ngibua nôn tibed, dì ici va titang vô xomxo toto ya xovôêng wê i vông ge.

Il nidnivi toto ge kitucma dì la tu nôn tibed

¹² Xomxo ninivi ge tibed, dì vigê yuu vixa dì manôn yuu ninya yuubê ge dô. Lêc vihati ge kitucma dì tu ninivi nôn tibed. Dì Kilisi êno tiyi bêge, ¹³ ên il vihati lipac mia ya Myakilôhô Ngibua nôn tibed om il tu nôn tibed. Il mangwe Yuda dì il mangwe tibii Glik, dì il ya tu xomxo nue yuac pileva dì il ya o tu xomxo ti nue yuac lêm, lêc il xôn vihati ge, il kô Myakilôhô Ngibua tibed.

¹⁴ Il xovô ên il nêbê xomxo ninivi o tibed lêm. Nge, mya toto dô. ¹⁵ Om xomxo ti vixa obêc nêl bê, "A o vigê lêm, om a o tu ninivi mya ti lêm." Obêc nêl bêge ge od ge kityoo nêñ, ên i ge ninivi mya ti. ¹⁶ Dì xomxo ti ninya obêc nêl bêga bê, "A o manôn lêm, om a o tu ninivi mya ti lêm." Obêc nêl bêge ge od ge kityoo nêñ, ên i ge ninivi mya ti. ¹⁷ Ên il nidnivi vihati obêc manôn ge od il ob ngô kiyang tibêna? Dì il nidnivi vihati obêc ninya ge od il ob yaxên susu nivîea tibêna? ¹⁸ Lêc môp o yêp bêge lêm, ên Anutu vaci tung ninivi toto ge vihati tiyi xovôêng wê ici va vông ge. ¹⁹ Ninivi vihati obêc dô mya tibed ge od ninivi nôn tyo obêc tibêna? ²⁰ Lêc môp o yêp bêge lêm. Ên ninivi toto ge kitucma dì la tu nôn tibed.

²¹ Dì xomxo ti manôn tiyiên ma wê ob nêl vô vigê bêga bê, "Ông loc dô xel, ên aca va tiyi wê a ob dô nigviha ge." Dì bazub êno tiyiên ma wê ob nêl vô vixa bêga bê, "Ông loc dô xel, ên aca va tiyi wê a ob dô nigviha ge." ²² Ên il nidnivi mya ti wê il xê ên il nêbê xêkizêc ma ge obêc ma ge od il nidnivi ob niviha lêm. ²³ Dì il nidnivi mya ti wê il xê ên il nêbê o niviha vêl lêm ge od il vunac vô niviha, dì il nidnivi mya ti wê il xê dì il nid yoc ên ge od il viac niviha. ²⁴ Lêc il nidnivi mya ti wê il xê ên il nêbê niviha ge, il o vông bêge vô he lêm, ên he ge niviha pyap. Anutu tung ninivi mya titi dô kidu tibed, dì ninivi ya wê il xê ên il nêbê pileva ge od Anutu vông lê levac vô he. ²⁵ Anutu vông bêge ên nêbê ninivi i o lêc hibu he sea lêm. Nge, ninivi mya toto ge, he i viacma niviha dì ngiduma xôn i tiyima. ²⁶ Om ninivi mya ti obêc tulec myavinê ge od ninivi vihati obêc yaxên myavinê tige hixôn. Dì ninivi mya ti obêc kô lê levac ge od ob vông xêyaa niviha vô he vihati.

²⁷ Xam tiyi xochê ninivi wê Kilisi vông ge, dì xam toto tiyi xochê ninivi mya titi wê Kilisi ninivi vông ge. ²⁸ Om Anutu vông yuac vac xomxo vông vinêñ toto vigê ên nêbê he i vông. Anutu vinoo he wê sinale ge taxlee, nang dêc vinoo xomxo wê ob nêl xolac ge, nang dêc vinoo xomxo wê ob tixuu lie ya xolac ge. Nang dêc vinoo xomxo ya hixôn nêbê he wê ob vông do levac, dì xomxo wê ob vông xomxo yidac vô niviha lec, dì xomxo wê ob ngidu lie xôn, dì xomxo wê ob viac yuac vihati, dì xomxo wê ob nêl kiyang

* ^{12:10:} Kiyang bo ti wê nêbê xomxo ya kô xovôêng tiyi wê ob nêl kiyang vac via xôpacêng ge, kiyang tige o nêl lec xomxo kibun ga viyang ti via lêm. Nge, nêl lec angela via me via lag puunê ti, lêc Myakilôhô Ngibua vaci vông vac xomxo mya mi he nêl lê, lêc he o xovô via tige kehe lêm. Nge, he mya vaci nêl.

vac via xôpacên. ²⁹ Om il vihati ge, il ob tu sinale, me? Di il vihati ob nêl xolac vô xomxo, me? Di il vihati ob tixuu lige ya xolac, me? Di il vihati ob vông do levac, me? ³⁰ Di il vihati ob vông xomxo yidac i vô niviha lec, me? Di il vihati ob keac vac via xôpacên, me? Di il vihati ob nêl via tige kehe kitong, me? Ma vêl. Xomxo toto ge, he ob kô he yuac bôbac. ³¹ Lécom xam vông nilôm i loc xêkizêc vô yuac nôn wê ob luu baba vêl ge.

Om a ob nêl môp wê luu môp yuu yuac vihati vêl ge kitong vô xam.

13

Môp xêyaa vin lecên

¹ A obêc keac xomxo toto via di keac angela via hixôn, lêc a xêgyaa obêc vin lec xomxo lêm ge od a tiyi xocbê kileng kileng yuu xax kitivén wê tyuc pileva ge. ² Wê a obêc nêl Anutu xolac yêp seac, di a obêc xovô Anutu kiyang wê yêp xôpacên ge vihati kehe, di xovô kiyang vihati kehe hixôn, di a obêc vông i vin xêkizêc tiyi wê a ob nêl di kitôn i hiyal mi loc ge, lêc a xêgyaa obêc vin lec xomxo lêm ge od a tiyi xocbê xomxo pileva. ³ Di a obêc vông susu wê a vông ge vihati la vô xomxo wê susu maên ge, di a obêc vông nignivi mi xomxo si lec ngwax ge, lêc a xêgyaa o vin lec xomxo lêm ge, od môp tigee ob vô niviha vô a lêm.

⁴ Môp xêyaa vin lecên yêp bêga nêbê xomxo ti xêyaa obêc vin lec xomxo ge od ni ob nyag decdec di i vông myaviwen nipaên i luu nipaên wê he vông ge lêm. Xomxo wê xêyaa vin lec xomxo ge od ob vông môp niviha vô he. Di xomxo ti xêyaa obêc vin lec xomxo ngwe ge od ob yê xomxo tige nipaên lec susu tibeac wê i vông ge lêm. Di xomxo wê xêyaa vin lec xomxo ge ob yong i di kô i lec vô he lêm. ⁵ Di xomxo ti xêyaa obêc vin lec xomxo ge od ob vông xomxo ni nyag vô i lêm, di ob xovô môp wê ob vô niviha vô ici va ge lêm. Di xêyaa ob vô myavinê vô xomxo lutibed lêm, di ob hôm nipaên wê xomxo vông vô i ge xôn lêm. ⁶ Di xomxo tige ob hi vixa pec ên môp nipaên lêm. Nge, ob hi vixa pec ên môp niviha tibed. ⁷ Xomxo ti xêyaa obêc vin lec xomxo ge od ob xona ên myavinê wê ob tulec i ge lêm. Nge, ob vông i vin kiyang vihati di ob dô bin nôn niviha wê ob val timuên ge di ob le xêkizêc vac viyin wê tulec i ge.

⁸ Môp xêyaa vin lecên o tiyi wê ob tip vac ge lêm. Nge, ob yêp dia. Môp wê xomxo nêl Anutu xolac hixôn môp wê xomxo keac via xôpacên ge ob tiyôô vac, di môp wê xomxo kô xovôên lec kiyang ge ob tiyôô vac hixôn. ⁹ Gwêbaga xovôên wê il vông ge, il xovô bo titi, di xolac wê il nêl ge, il o nêl vihati yêp seac lêm. ¹⁰ Lêc obêc timuên ge od susu wê niviha nôn ge ob val, om susu wê o niviha vêl lêm ge obêc tiyôô vac. ¹¹ Buc wê a gên dô nipwo ge od a keac tiyi xocbê nipiwo keac ge. Di piyôp yuu xovôên wê a vông ge tiyi xocbê he nipiwo ge. Lêc buc wê a lig ge od a sea môp wê he nipwo vông ge. ¹² Kiyang tige nêl lec il. Èn gwêbaga il o xê susu vihati dô seac lêm, tiyi xocbê il xê madnôn vac deac mapitoc ge, lêc obêc timuên ge, od il obêc xê Anutu nôn lec madnôn. Di gwêbaga xovôên wê il vông ge myabo, di obêc timuên ge il ob xovô Anutu hixôn i kiyang vihati i tiyi xocbê Anutu xovô il ge. ¹³ Om môp yon wê ob yêp luta ge bêga nêbê môp vông vinê, di môp wê ob dô binê vizid niviha wê ob val timuên ge, hixôn môp xêyaa vin lecên. Lêc môp ti wê luu vêl ge môp xêyaa vin lecên.

14

Môp wê ob nêl xolac yêp seac ge luu môp wê ob nêl kiyang vac via xôpacên ge vêl

¹ Xam lêc timu vô môp xêyaa vin lecén. Di xam xêmyaa i vin lec yuac niviha wê Myakilôhô Ngibua ob vông vô xam ge, lêc yuac ti wê luu vêl ge bêga nêbê xam nêl Anutu xolac vô xomxo. ² Èn xomxo ti obêc nêl kiyang vac via xôpacên ge* od tiyi xocbê o keac vô xomxo kibun ga lêm. Nge, nêl vô Anutu vaci. Èn xomxo wê ngô kiyang tige ob xovô kehe lêm, ên xomxo tige nêl kiyang wê xôpacên ge ya xêkizêc wê Myakilôhô Ngibua vông ge. ³ Lêc xomxo ti obêc nêl Anutu xolac yêp seac ge od xolac wê i nêl ge ob ngidu vông vinêr wê xomxo vông ge xôn, di ob tipi vô he ên nêb he i timu vô môp niviha, di ob vông he nilô vô viyin maén. ⁴ Xomxo ti obêc nêl kiyang vac via xôpacên ge, od ob ngidu vông vinêr wê ici va vông ge xôn. Lêc xomxo ti obêc nêl Anutu xolac yêp seac vô xomxo ge od ob ngidu xomxo vông vinêr vihati ge xôn. ⁵ A nêl xam vihati obêc keac vac via xôpacên ge od obêc niviha. Lêc xam vihati obêc nêl Anutu xolac vô xomxo ge od obêc niviha luu vêl. Èn môp wê xomxo nêl xolac yêp seac vô xomxo ge luu môp wê xomxo keac vac via xôpacên ge vêl. Èn xomxo ti obêc keac vac via xôpacên ge lêc o nêl kiyang tige kehe yêp seac hixôn lêm ge od o tiyi wê ob ngidu xomxo vông vinêr xôn ge lêm. ⁶ Xam lige, a obêc loc vô xam lêc nêl kiyang vac via xôpacên ge od ob ngidu xam xôn tibêna? Lêc a ob nêl kiyang wê Anutu nêl vô a ge kehe kitong vô xam, di a ob vông xovôen ya vô xam, di a ob nêl xolac yêp seac vô xam, di a ob tixuu xam ya kiyang ya ge od môp tibêgee wê ob ngidu xam xôn.

⁷ Susu ya xocbê pijôg yuu gita ge tiyi bêge êno. Èn xomxo obêc hi niviha lêm ge od il ob xovô via ti wê tyuc ge tibêna? ⁸ Di vuac obêc tyuc via yacyac ge od xomxo vevac ob viac he niviha lêm. ⁹ Om xam tiyi bêge êno. Èn xam obêc nêl kiyang vô xomxo vac via ba wê he lungên ge od he ob xovô kiyang tige kehe tibêna? Kiyang wê xam obêc nêl ge obêc nididun pileva xocbê lea ge.

¹⁰ Vixôhilôg, xomxo via tibeac yêp kibun ga, di via ti o nididun pileva lêm. Nge, xomxo ngô di xovô kehe, ¹¹ lêc a obêc lungên kiyang wê xomxo nêl vac via bangwe ge od xomxo tige ob yê a xocbê tibii ba ti di a êno ob xê i tiyi xocbê tibii bangwe. ¹² Xam êno, xam tiyi bêge. Xam nêb xam ob kô xovôen hixôn xêkizêc wê Myakilôhô Ngibua vông ge, om a ob nêl vô xam bê xam nilôm i loc vô xovôen wê ob ngidu lime vông vinêr xôn ge.

¹³ Mêgem xomxo ti obêc kô xovôen vô Myakilôhô Ngibua tiyi wê ob keac vac via xôpacên ge, od i kitaa vô Anutu, ên i vông xovôen vô i tiyi wê ob nêl kiyang tige kehe kitong i yêp seac ge. ¹⁴ Xam xovô lê. A obêc kitaa vô Anutu vac via xôpacên ge od tiyi xocbê a kinug vaci kitaa di a piyôp o xovô kitaaen tige hixôn lêm. ¹⁵ Om a ob vông bêna lec môp tige? A ob vông môp bêga, a obêc kitaa ge od a kinug obêc kitaa di a piyôp ob xovô hixôn. Di a obêc vông liô ge od a kinug ob vông di a piyôp ob xovô hixôn. ¹⁶ Èn ông kinum vaci obêc pimil Anutu vac via xôpacên ge od xomxo ti wê ngô kitaaen wê ông kitaa ge o tiyi wê ob lee yuu hixôn ge

* ^{14:2:} ông wê 1 Kolin 12:10.

lêm, ên o xovô kiyang tige kehe lêm. ¹⁷ Kitaaêñ wê ông pimil Anutu vac vya xôpacêñ ge niviha, léc o tiyi wê ob ngidu xomxo tige xôn ge lêm.

¹⁸ A pimil Anutu ên wê a nêl kiyang vac vya xôpacêñ tiyi buc vihati luu xam vêl ge, ¹⁹ léc a ob nêl kiyang vac kitucmaén wê xomxo mia lipacêñ vông ge od a ob nêl kiyang xuhu dia vac vya xôpacêñ lêm. Nge, a ob nêl kiyang bo ti hixôn piyôp, ên i vông xovôñ vô he.

²⁰ Xam lige, xam o léc xovô kiyang xocbê he nippipwo xovô ge lêm. Vixôhilôg, môp wê nipaêñ ge, xam o léc xovô môp tibêge lêm, i tiyi xocbê nippwo wê xovôñ ma ge. Léc kiyang nôn ge, od xam xovô niviha i tiyi xocbê xomxo levac wê xovôñ ge. ²¹ Kiyang yêp vac kipihac xolac bêga ên nêbê,

“Apumtau nêl bêga nêbê, ‘Kiyang wê a ob nêl vô xomxo tige ge, a ob vông tibii wê vya bangwe ge he i kô kiyang tige mi loc nêl vô he, di he ob ngô lê, léc he ob vông i vin kiyang tige lêm.’”

²² Xolac nêl bêge, om il ob xovô bêga bê môp wê xomxo ob nêl kiyang vac vya xôpacêñ ge od Anutu o hilung vô xomxo vông vinêñ ên nêb he i ngô lêm. Nge, hilung vô tibii madiluhu nêb he i ngô. Di môp wê xomxo ob nêl Anutu xolac ge, Anutu o vông ên nêb tibii madiluhu i ngô lêm. Nge, vông ên nêb xomxo vông vinêñ i ngô.

²³ Om xam vihati vac konglegesen obêc kitucma di keac vac vya xôpacêñ, di tibii madiluhu ya obêc val dô hixôn xam di ngô vya wê xam keac ge od he ob nêl bê xam vô mavmav. ²⁴ Léc xam vihati obêc dô di nêl Anutu xolac, léc tibii madiluhu me tibii wê xovôñ ma ge ti obêc val dô hixôn xam di ngô xolac wê xam nêl ge od xolac wê xam nêl ge obêc kitiv i nilô di i xovô nêñ nipaêñ wê yêp vô i ge, ²⁵ di kiyang wê yêp xôpacêñ vac i nilô ge obêc lam yêp seac, om xomxo tige obêc yev vixa kitu vô Anutu di pimil i nêbê, “Vixôhilôg nôn, Anutu dô vac xam mahigun.”

Kiyang lec lilo hixôn xolac nêlén

²⁶ Om xam lige, il ob vông môp bêna? Buc wê xam ob kitucma ge od yuac yêp vô xam vihati, om xam ti obêc vông lilo, di ti ob tixuu xam ya xolac, di ti ob nêl Anutu xolac di ti ob nêl kiyang vac vya xôpacêñ di ti ob pilepac kiyang tige. Xam vông môp tige vihati ên i ngidu vông vinêñ wê xam vông ge xôn. ²⁷ Di xomxo ya obêc nêb nêl kiyang vac vya xôpacêñ ge od xomxo yuu me yon ob nêl ge od i pyap, di yon xôn ob nêl kiyang lutibed lêm. Nge, yon toto ob nêl, nang dêc ti pilepac. ²⁸ Léc xomxo wê ob pilepac vya tige obêc ma ge, od xomxo wê nêb ob nêl kiyang vac vya xôpacêñ ge i dô kiyang maen vac kitucmaén, di buc wê ici va obêc dô ge od i nêl vac vya tige vô Anutu.

²⁹ Di xomxo yuu me yon ob nêl Anutu xolac, di xomxo wê dôen ge he i yaxêñ xolac wê yon nêl ge. ³⁰ Di xomxo ti ob dô léc Anutu vông kiyang vô i nêb i nêl ge od xomxo ti wê dinêl xolac ge i tiyôô di xomxo ngwe ge i nêl kiyang nang. ³¹ Xam obêc vông môp bêge ge od xam toto ob nêl xolac vôma ên vihati i xovô di le xêkizêc vac vông vinêñ. ³² Xomxo wê mi nêl Anutu xolac ge, he i viac heche va niviha lê di nêl xolac, ³³ ên Anutu o vông môp judajuda ge vô lêm. Nge, nêb il dô vac kiyang malehe.

Xam timu vô môp i tiyi xocbê xomxo vông vinêñ vac konglegesen vihati mi timu vô ge. ³⁴ Môp bêga nêbê xam obêc kitucma mi wê da ge od vêx i dô kiyang maen, di he i o léc nêl kiyang ti lêm. Nge, he i dô vac vux

kwa ngibi dì ngô kiyang wê he ob nêl ge, i tiyi xocbê Moses xolac nêl ge. ³⁵ Dì vêx ti obêc lungêن kiyang ti kehe ge od i kinêg vô liya vac ben xumac lôma. Ên vêx obêc nêl kiyang vac kitucmaên ge od o tiyi lêm. ³⁶ Xam nêb va? Xam nêb xam tu Anutu xolac kehe, me? Dì xolac val vô xacxam va di o val vô xomxo ya hixôn lêm, me?

³⁷ Xomxo ti obêc xo nêb i tiyi wê ob nêl Anutu xolac ge, me obêc xo nêb kô xovôen vô Myakilôh Ngibua ge, od i lêc xovô bê kiyang wê a kivuu ga, Apumtau vông ên nêb il vông i tup vô. ³⁸ Lêc xomxo ti obêc vông i vin kiyang tiga lêm ge od xam o lêc vông i vin bê i xomxo xolac nêlén lêm.

³⁹ Mêgem xam lige, xam nilôm i loc vô môp wê xam ob nêl Anutu xolac ge, di xam o lêc le vac môp xôn ên xomxo wê nêb ob nêl kiyang vac vya xôpacên ge lêm. ⁴⁰ Môp gee vihati, xam viac niviha ên i yêp bôbac.

15

Kilisi yib dì kidi lec nang

¹ Xam lige, a nêb xam xovô xolac wê a nêl vô xam ilage. Xolac tige xam ngô dì vông i vin mi timu vô gwêbaga. ² Om xam obêc vông i vin nôn dì hôm xolac xôn pilahi ge od Anutu ob vô xam vêl ên nipaên dì xam ob la dô mamviha.

³ Kiyang taxlee wê luu kiyang baba vêl ge, a ngô dì a nêl ila vô xam bêga ên a nêbê Kilisi yib ên il nêd nipaên, tiyi xocbê xolac nêl ilage. ⁴ Dì he lii i la vac lôva, dì buc yon la vêl di i kidi lec vac yibêñ tiyi xocbê xolac nêl ilage. ⁵ Dêc hilung i vô Pita, nang dêc hilung i vô Yesu nue ngivihi vigê yuu dì tô mi la yuu. ⁶ Dêc hilung i vô lie tibeac vô buc tibed. Xomxo tigee naba nginoo 500, lêc he mangwe yib dì he tibeac gên dô gwêbaga. ⁷ Nang dêc hilung i vô Jems dì hilung i vô sinale vihati.

⁸ Timuêñ yang tyo ge, od hilung i vô aca va mi a xê, lêc a tiyi xocbê nipwo wê ta o kô i lec i buc bôbac ge lêm. ⁹ Ên sinale vihati luu a vêl dì a o nigviha tiyi wê a ob kô lê sinale tige lêm, ên ilage a vông viyin levac vô Anutu nue vông vinêñ. ¹⁰ Lêc Anutu xo vigwe pisiv ên a om vông yuac sinale vô a mi a vông dì dô gwêbaga. Lêc vizid tyo, nôn o ma lêm, ên a vông yuac xêkizêc luu sinale baba vêl. Lêc o aca va wê vông yuac tige lêm. Ên Anutu vông vizid hivun a xôn dì a vông yuac ya. ¹¹ Om yuac tige a vông, me sinale baba vông, lêc xe xôn nêl xolac tibed ge vô xam om xam ngô dì vông i vin.

Xomxo yibêñ obêc kidi lec

¹² Xe mi nêl ên xe nêbê Anutu tipi vô Yesu kidi lec vac yibêñ, lêcom bêna lêc xam ya nêl ên xam nêbê xomxo yibêñ ob kidi lec i tii vac lêmê?

¹³ Kiyang wê xam nêl ên xam nêbê xomxo yibêñ obêc kidi lec lêm ge obêc nôn ge od Kilisi êno o kidi lec vac yibêñ ilage lêm. ¹⁴ Di Kilisi obêc kidi lec vac yibêñ lêm ge od kiyang wê xe nêl ge ob pileva, dì vông vinêñ wê xam vông ge êno ob pileva. ¹⁵ Obêc bêge ge od kiyang wê xe nêl lec Anutu ge obêc kityooêñ, ên xe mi nêl ên xe nêbê Anutu tipi vô Kilisi kidi lec vac yibêñ. Lêc kiyang wê nêl ên nêbê xomxo yibêñ obêc kidi lec lêm ge obêc nôn ge od Anutu ob tipi vô Kilisi kidi lec vac yibêñ êno lêm. ¹⁶ Ên Anutu obêc tipi vô xomxo yibêñ kidi lec mavîha lêm ge od o tiyi wê ob tipi vô Kilisi vac yibêñ êno ge lêm. ¹⁷ Anutu obêc tipi vô Kilisi kidi lec lêm ge od

vông vinêñ wê xam vông ge obêc kityooêñ, dì xam ob gên dô vac nipaêñ, ¹⁸ dì xomxo wê vông i vin Kilisi lêc yib ge xôa ma hixôn. ¹⁹ Il vông i vin dì dô bin Kilisi. Lêc xomxo yibêñ obêc kidi lec lêm ge od kiyang tige obêc ngidu il xôn gê kibun ga vaci dì nôn obêc ma timuêñ, om obêc bêna vô il timuêñ?

²⁰ Lêc kiyang o yêp bêge lêm. Ên Anutu tipi vô Kilisi vixôhilôg, om Kilisi kidi lec mugêñ vac yibêñ, om il ob xovô bêga bê xomxo yibêñ vihati ob kidi lec timuêñ. ²¹ Xomxo vihati obêc yib ge, kehe yêp vô xomxo ti wê vông nipaêñ taxlee ge, dì xomxo vihati ob kidi lec vac yibêñ ge, kehe yêp vô xomxo ngwe. ²² Ên xomxo wê pum lec Adam ge vihati obêc yib, dì xomxo wê vông i vin Kilisi ge vihati obêc kidi lec maviha. ²³ Lêc xomxo vihati ge obêc kidi lec maviha lec he buc, ên Kilisi kidi lec tax, om il ob xovô bêga bê buc timuêñ wê Kilisi obêc vena lec ge, od il wê il tu i nue ge il ob kidi lec nang.

²⁴ Om buc tige wê susu vihati yang ob tiyôô vac, dì Kilisi obêc kitya xêkizêc wê gavman hixôn xomxo levac vông ge vêl dì xêkizêc vihati yang ge ob la vêl, pyap dì Yesu obêc vông xomxo hixôn susu vihati lax vac ma Anutu vigê nêb i viac. ²⁵ Ên Kilisi ob viac xomxo hixôn susu vihati dì i loc tyip vô buc wê xomxo wê vông vevac vô i ge ob la vac i vixa kwa ngibi ge. ²⁶ Kilisi obêc kitya xomxo tigee vihati vêl, dì kitya yibêñ vêl lec myahipu timuêñ. ²⁷ Kiyang yêp vac xolac bêga nêbê, “Anutu vông xomxo hixôn môp vihati yang la vac i kwa ngibi.” Il xovô ên il nêbê kiyang tige nêl lec wê Anutu vông xomxo hixôn môp vihati la vac Kilisi kwa ngibi ge, lêc Anutu tibed wê o la vac Kilisi kwa ngibi hixôn lêm. ²⁸ Vihati obêc la vac Kilisi kwa ngibi, nang dêc Anutu nu vaci obêc la vac ma kwa ngibi, dì Anutu vaci ob tu levac dì viac vihati.

²⁹ Kiyang tige obêc kityooêñ ge od bêna lêc xomxo ya lipac mia vac xomxo yibêñ niplihê? Ên xomxo yibêñ obêc kidi lec tii vac lêm ge od bêna lêc xomxo lipac mia ên nêb i ngidu xomxo yibêñ xônê? ³⁰ Dì xe ga, xomxo vông viyin vô xe tiyi buc vihati. Lêc xomxo obêc kidi lec vac yibêñ lêm ge od bêna lêc xe kîlê viyinê? ³¹ Xam lige, a xêgyaa vô niviha yang ên xam ên wê xam vông i vin il lig Apumtau Yesu Kilisi ge. Om a nêl hixôn nôn vô xam bêga bê tiyi buc vihati a dô vac viyin tiyi xochê a ob xib ge. ³² Gê Epesas ga, xomxo vông vevac vô a tiyi xochê bwoc vimen ge. A obêc nêl i tiyi xovôêñ kibun ga ge od a ob a nêl bêga bê viyin tige ob vô niviha vô a lêm. Dì xomxo yibêñ obêc kidi lec i tii vac lêm ge od il ob vông i tiyi kiyang wê xomxo nêl ên he nêbê, “Il ob xa dì num dì dô vaxvax, ên vô kwabo lec wê il ob xib dì la vêl.”

³³ Xame, le i lêc vông i vin kiyang kityooêñ tibêge lêm. Ên il ob dô hixôn xomxo nipaêñ ge od he ob vông môp niviha wê il vông ge vô nipaêñ. ³⁴ Xam sea piyôp judajuda dì xam viac piyôp i yêp niviha. Dì xam sea môp nipaêñ wê xam vông ge, ên xam ya gên o xovô Anutu lêm, om a nêl kiyang tiga vô xam ên a nêb i vông xam nim i yoc.

Ninivi yibêñ wê obêc kidi lec ge obêc bangwe

³⁵ Lêc xam ya obêc kinêg bêga bê, “Xomxo yibêñ obêc kidi lec tibêna? Dì ninivi wê he vông ge obêc tiyi vatya?” ³⁶ Ông xomxo piyôp maên, ông xovô bê ông obêc xin susu vê ge od obêc la dô vac kibun nipwo tya dêc tyip timuêñ. Lêc xinêñ obêc ma ge od ob tyip maviha lêm. ³⁷ Dì susu vê

wê ông xin ge, o tiyi xocbê yatôv yuu lihi ge lêm. Nge, ông xin nôn pileva, xocbê skom vê dì susu vê ya.³⁸ Léc Anutu vông vê tige tyip hixôn yatôv yuu lihi tiyi xocbê ici va xovô ge, om vê toto ge obêc tyip hixôn yatôv yuu lihi toto.

³⁹ Dì susu maviha wê dô kibun ga ge vihati, ninivi o tiyima lêm. Nge, he ninivi toto. Om xomxo vaci, ninivi ba ti, dì bwoc vaci ninivi ti, dì menac ninivi ti, dì beac vaci ti. ⁴⁰ Dì susu ya le lec lag dì ya dô gê kibun, léc vunac vunac wê he vông ge o tiyima lêm. Nge, susu wê le lec lag ge, vunac vunac wê he vông ge viyonê dì wê dô lec kibun ga, viyonê. ⁴¹ Om xêseac wê hiyôv vông ge vaci, dì xêseac wê dentuc vông ge bangwe, dì xêseac wê pitua vông ge vaci ti, dì byac luu vông ge vaci ti. Om pitua toto ge, xêseac wê he vông ge toto.

⁴² Kiyang tige nêl lec xomxo yibêñ wê ob kidi lec timuên ge. Ên xomxo ninivi wê yevêñ ge ob pital, léc ninivi wê ob kidi lec vac yibêñ ge obêc pital lêm. ⁴³ Dì ninivi wê yevêñ ge o susu niviha ti lêm, léc ninivi wê ob kidi lec ge od nôn niviha hixôn xêseac. Dì ninivi wê yevêñ ge xêlehelehe, léc ninivi wê obêc kidi lec ge xêkizêc ta. ⁴⁴ Dì ninivi wê yevêñ ge, ge ninivi kibun. Léc ninivi wê ob kidi lec ge, ge kinu wê ob la dô maviha vac Anutu ben ge.

Ninivi kibun dô, dì kinu ge êno ninivi dô. ⁴⁵ Kiyang yêp vac kipihac xolac bêga nêbê, “Adam taxlee ge tu xomxo mi dô maviha.” Dì Adam ngwe timuên i Anutu nôn wê ob vông xomxo dô maviha luta. ⁴⁶ Môp wê il kinud ob dô maviha ge o val tax lêm. Nge, môp wê il dô madviha gê kibun ga val tax, dêc môp wê kinu ob dô maviha ge val timuên. ⁴⁷ Xomxo ngwe wê taxlee ge, xomxo kibun ga wê Anutu hôm kibun mi pitii ya ge, dì xomxo ngwe wê timuên ge lam gê lag puunê. ⁴⁸ Om il xomxo kibun ga, il tiyi xocbê xomxo ngwe wê Anutu hôm kibun mi pitii ya ge, dì xomxo wê ob la dô lag puunê ge ob tiyi xocbê xomxo ngwe wê lam gê lag puunê ge. ⁴⁹ Gwêbaga il dô tiyi xocbê xomxo ngwe wê kibun ga ge, léc obêc timuên ge od il ob dô tiyi xocbê xomxo ngwe wê lam gê lag puunê ge.

⁵⁰ Xam lige, a ob nêl bôbac vô xam bê il nidnivi kibun ga o tiyi wê ob la dô vac Anutu ben ge lêm. Me susu wê ob pital ge o tiyi wê ob la dô hixôn susu wê pitalen obêc ma ge lêm. ⁵¹ Xam ngô lê. A ob nêl kiyang xôpacén ti kitong vô xam bêga bê il ga, il ya xibêñ obêc ma, léc il vihati nidnivi obêc pikwê paha lutibed ⁵² vô buc timuên wê vuac ob tyuc ge. Vuac obêc tyuc dì xomxo yibêñ obêc kidi lec maviha vac yibêñ dì he ob pital i tii vac lêm, dì il xôn nidnivi obêc pilepac manôn viyonêñ ti. ⁵³ Om il nidnivi wê pitalen ge obêc pilepac dì obêc pital i tii vac lêm, dì il nidnivi wê yibêñ ge obêc yib i tii vac lêm. Nge, ob dô maviha luta léc luta. ⁵⁴ Vô buc tige il nidnivi pitalen obêc pilepac dì pitalen obêc ma, dì il nidnivi yibêñ obêc pilepac dì yibêñ obêc ma, om obêc vông kiyang wê yêp vac kipihac xolac ge vô nôn lec, kiyang wê nêl ên nêbê, “Anutu vông vevac vô yibêñ ge nginoo vêl om kitya yibêñ vihati vêl. ⁵⁵ Om xêkizêc ti wê yibêñ vông ge dô tina? Di myavinê wê yibêñ vông ge dô tina?” ⁵⁶ Myavinê wê yibêñ vông ge, kehe yêp vac môp nipaên wê xomxo mi vông ge. Di xêkizêc wê môp nipaên vông ge, kehe yêp vac Moses xolac. ⁵⁷ Léc il ob hi vixad i pec ên Anutu, ên Anutu vông il lig Apumtau Yesu Kilisi lam ên il, om lam vông vevac vô môp nipaên hixôn yibêñ mi kitya vêl om vông il dô vac xêkizêc wê i vông ge.

⁵⁸ Xam lige wê a xêgyaa vin lec xam ge, xam le xêkizêc vac vông vinên dì xam o léc xona mi le teva lêm. Nge, xam vông Apumtau yuac xêkizêc i tiyi buc vihati, ên xam xovô pyap bê yuac wê il vông vô Apumtau ge, il o vông pileva lêm. Nge, vihati obêc vô nôn lec.

16

Mone wê ob ngidu Anutu nue xôn ge

¹ A ob nêl kiyang lec mone wê il ob kituc di vông i la vô xomxo vông vinên Jelusalem ên i ngidu he xôn ge. Xam vông i tiyi xochê a nêl vô konglegesen toto vac vigwe levac Galesia ge. ² Lec da vihati ge, xam toto wê mone wê xam tulec vac da tige di tung viwen i dô viyonên dì bin buc wê a obêc miloc ge, êdêc buc wê a obêc miloc ge od xam o léc myag mone lêm. ³ Ên a ob miloc ge od xam vinoo lime ya, dì a ob kivuu kipihac di vông vô he, ên he i kô hixôn mone tige mi loc Jelusalem. ⁴ Lêc a obêc xo ên a nêb a ob la hixôn he ge od xe xôn ob la.

Pol nêb ob la yê he Kolin

⁵ A nêb a ob la tup vac vigwe levac Masedonia, om a ob la xê he vêl tax dêc miloc vô xam. ⁶ Dì a ob dô hixôn xam buc ya, om a lungên, mêd a ob dô dì buc lun yuu viyîen i loc vêt lê, dì a obêc nêb la vigwe ya ge od xam obêc ngidu a xôn. ⁷ A obêc miloc vô xam ge od a nêb a ob sea xam lutibed lêm. Apumtau obêc tyuc lec ge od a ob dô hixôn xam buc xuhu dia tyu. ⁸ Lêc a nêb a ob dô Epesas ga dì buc Pentikos i lam loc vêt lê, ⁹ ên vuayen tax ên a di yuac tibeac yêp tiyi wê a ob vông ên i vô nôn niviha. Lêcom xomxo wê nêb ob vông yuac i vô nipaên ge tibeac dô hixôn.

¹⁰ Timoti obêc miloc vô xam ge od xam viac i niviha ên i dô hixôn nilô niviha, ên Timoti vông Apumtau yuac tiyi xochê a vông ge. ¹¹ Om xam o léc wê i tiyi xochê xomxo pileva ti dì vô nimim vô i lêm. Dì buc wê ob sea xam ge od xam vông i lôm hixôn kiyang malehe vô a, ên a hixôn lige ya, xe dô bin i.

¹² Il lig Apolos ge, a nêl nginong ên a nêb i kô lige ya mi he i loc vô xam lê, lêc Apolos xêyaa o vin lec wê nêb ob loc decdec ge lêm, om ob dô lê, dì obêc xovô buc ti ge od ob miloc vô xam.

Pol nêl kiyang myahipu ya

¹³ Xam viac xam niviha dì le xêkizêc ya vông vinên. Dì xam o léc xona lêm. Nge, xam dô i tiyi xochê xomxo wê xêkizêc ge. ¹⁴ Môp vihati wê xam ob vông ge, xam xêmyaa i vin lecma di xam vông.

¹⁵ Xam lige, xam xovô Stepanas he vinéue wê he vông i vin taxlee vac vigwe levac Glik, dì he xôn vông nilô la tibed vô yuac wê ob ngidu lie vông vinên xôn ge. Om a ob nêl vô xam bê ¹⁶ xam vô ninyam lehe vô xomxo tibêgee, hixôn xomxo vihati wê vông yuac hixôn he ge.

¹⁷ A xêgyaa vô niviha ên wê Stepanas yuu Potyunetas yon Akaikas val vô a ge, ên xam o tiyi wê xam ob lam ge lêm, lêc tiyi xochê yon tu xam mammôn mi val vô a, ¹⁸ om yon vông a nilôg vô viyin maén tiyi xochê he vông xam nilôm vô viyin maén ge. Om xam kô xomxo tibêgee lec niviha.

¹⁹ Konglegesen wê dô vac vigwe levac Esia ge vihati nêl vidiiêñ vô xam. Dì Akwila yuu vinê Plisila hixôn xomxo vông vinên wê mi kitucma vac yuu ben ge nêl vidiiêñ niviha vô xam lec Apumtau lê. ²⁰ Xomxo vông

vinên ga vihati nêl vidliên vô xam. Xam pulma vigêm ên i nêl kitong bê xam xêmyaa vin lecma.

²¹ Kiyang myahipu timuên tya ga, a Pol, aca va kivuu ya vigêg di a nêl vidliên vô xam.

²² Xomxo ti xêyaa obêc vin lec Apumtau lêm ge od Apumtau i vông myaviwen nipaên vô i di tii i vêl. O Apumtau, ông lamê.

²³ Xêyaa vin lecên yuu vizid wê Apumtau Yesu vông ge i viac xam. ²⁴ A xêgyaa vin lec xam vihati lec Yesu Kilisi lê. Kiyang nôn.

2 KOLIN

Pol kivuu kipihac wê vông yuu ge la vô tibii Kolin

¹ A Pol wê Anutu viinoo a nêb a tu sinale wê Yesu Kilisi vông ge. A hixôn il lig Timoti, xii kivuu kipihac tiga i loc vô Anutu nue xam wê xam dô vac vigwe Kolin ge, hixôn xam wê xam dô vac vigwe levac Glik vihati ge. ² Il mag Anutu yuu Apumtau Yesu Kilisi i vông vizid hixôn kiyang malehe i loc dô hixôn xam.

Pol pimil Anutu ên wê ngidu i xôn vac viyin ge

³ Il ob hi vixad i pec ên Anutu wê il lig Apumtau Yesu Kilisi ma ge, ên Anutu ge wê xo vigwe pisiv ên xomxo vihati, di ici va wê ob vông xomxo nilô vô viyin maén. ⁴ Om viyin vihati wê tulec xe ge, Anutu vông xe nilôm vô viyin maén, ên nêb xomxo ya obêc tulec viyin ya ge od xe tiyi wê xe ob vông he nilô vô viyin maén ge, tiyi xocbê Anutu vông xe nilôm vô viyin maén ge. ⁵ Viyin yuu myaviné wê Yesu kilê ilage val vô xe gwêbaga hixôn, lêc Yesu ngidu xe xôn di vông xe nilôm vô viyin maén. ⁶ Om xe obêc kilê viyin ya ge od kehe bêga nêbê xe nêb xam nilôm i vô viyin maén di Anutu i vô xam vêl ên nipaên. Anutu obêc vông xe nilôm vô viyin maén ge od ob vông xam nilôm vô viyin maén, om buc wê xam ob tulec viyin tiyi xocbê xe tulec ge od xam le xêkizêc di kilê viyin vihati hixôn nilôm niviha. ⁷ Xe xovô ên xe nêbê xam obêc le xêkizêc vac viyin. Ên xam kilê viyin hixôn xe, om xe xovô ên xe nêbê Anutu ob vông xam nilôm i vô viyin maén tiyi xocbê vông xe nilôm vô viyin maén ge.

⁸ Xam lige, xe nêb xe ob nêl viyin wê xe kilê vac vigwe levac Esia ge kitong vô xam, ên xam xovô. Ên viyin tige levac mabu yocén luu xe vêl om vông xe xovô bêga ên xe nêbê xe obêc xib. ⁹ Om xe xo viyin vac nilôm bêga ên xe nêbê xe tiyi xocbê xomxo wê tibii tung buc pyap ên nêb ob hi xe xib ge. Lêc viyin levac tige val vô xe ên nêb xe o vông nilôm i loc vô xêkizêc wê xecxe va vông ge lêm. Nge, xe nilôm i loc vô Anutu tibed, ên xêkizêc wê Anutu vông ge ob tipi vô xomxo yibên kidi lec maviha ge. ¹⁰ Viyin tige levac mabu tiyi wê ob hi xe xib ge, lêc Anutu vô xe vêl ên viyin tyo, di obêc vô xe vêl ên viyin wê obêc tulec xe timuên ge hixôn. Om xe vông i vin xêkizêc ên xe nêbê viyin vihati wê ob tulec xe ge, Anutu ob vô vêl ên xe di vông xe dô niviha. ¹¹ Om xam ngidu xe xôn ya kitaaën, ên Anutu i ngô kitaaën wê xam tibeac vông ge di ngidu xe xôn, êdêc xomxo tibeac i yê di hi vixa i pec ên Anutu.

Pol o kityoo he Kolin lêm

¹² Xe hi vixam pec ên môp wê xe mi vông ge, ên Anutu vông yuac vac xe nilôm om xe vông môp bôbac hixôn nilôm niviha. Di xe o vông ya xovô kibun ga lêm. Nge, vizid wê Anutu vông ge ngidu xe xôn di xe vông yuac ya. Om xe nilôm xovô bêga ên xe nêbê xe vông môp tibêge vac xomxo viyang viyang mahigun, di buc wê xe dô hixôn xam ge, od xe vông môp niviha tibêgee luu vêl. ¹³⁻¹⁴ Di kipihac vihati wê a kivuu vô xam ge, a o yax kiyang ti vun ên xam lêm. Nge, a kivuu kiyang vihati yêp seac tiyi wê xam ob kitong di xovô kehe ge. Xam xovô kiyang ya pyap, lêc tibeac xam

gên o xovô lêm, om a xovô ên a nêbê xam xovô kiyang i loc tiyi vihati, édêc buc wê Apumtau Yesu ob vena ge od xam hi vixam i pec ên xe i tiyi xochê xe hi vixam pec ên xam ge.

¹⁵ Ilage a xovô ên a nêbê xam wê yuac wê a vông ge niviha, om a nêb a ob lôc vô xam tax, ên vông xam xêmyaa i vô niviha lu yuu. ¹⁶ A nêb a ob milôc vô xam tax, nang dêc la Masedonia, pyap dêc vena vô xam i tii vac, ên xam ngidu a xôn vac môt dì a la Judia. ¹⁷ A nêb a ob la lê, lêc a laén ma, om xam xo bêna? Kiyang wê a nêl vô xam ge, mêd a nêl hixôn nilôg yuu yuu, me? Ge o bêge lêm. Ên môt wê a nêb a ob vông ge, a o nêl kiyang tiyi xochê tibii ya mi nêl ge lêm. Ên vya wê lee yuu ên nêb ob vông ge, dì ngwe wê nêbê obêc ma ge, he nêl yuu xôn vaxvax. Lêc a o vông bêge lêm. ¹⁸ Anutu ge wê kiyang nôn kehe om a nêl hixôn nôn bêga bê kiyang wê xe mi nêl vô xam ge, xe o lee yuu ên xe nêb “Xe ob vông”, me nêl ngwe nêb “ob ma”, xe o nêl yuu xôn vaxvax lêm. ¹⁹ Ên xen Sailas yuu Timoti, xen nêl Yesu Kilisi wê Anutu nu ge kitong vô xam, dì xam xovô ên xam nêbê Kilisi ob nêl kiyang yuu vaxvax lêm. Nge, nêl kiyang nôn tibed. ²⁰ Ên kiyang wê Anutu hilu ge Yesu vông vihati vô nôn lec, om il xovô kiyang wê Yesu vông ge dì il lee yuu ên il nêb kiyang nôn, om il pîmil Anutu lê vô levac. ²¹ Anutu vaci vông xêkizêc vô xe hixôn xam om il xôn le xêkizêc hixôn Kilisi, dì ici va vînoo il ên nêb il vông i yuac, ²² dì vông Myakilôhô Ngibua lam dô vac il nilôd tiyi xochê il dô vac xenac tibit wê byêxên dop kisuu il lec ge, ên nêb il tu i nue pyap. Anutu vông Myakilôhô Ngibua tiyi xochê vông vizid taxlee, ên nêb il xovô bê obêc vông vizid vihati vô il timuên.

Pol nêl kiyang wê o la Kolin lêm ge kehe kitong

²³ Anutu xovô a nilôg pyap om a obêc kityoo kiyang ge od i nêl a nêg nipaên i yêp seac dì vông myaviwen vô a. Lêc a o kityoo lêm. Nge, a nêl kiyang hixôn nôn ên a nêbê a o lôc vô xam lutibed lêm, ên a nêb a ob lôc nêl kiyang xêkizêc vô xam dì vông xam nilôm i vô viyin lêm. ²⁴ Xe o tiyi wê xe ob kidu xam lec môt vông vinêng ge lêm, ên xam le xêkizêc vac vông vinêng pyap, om xe nêb xe ob ngidu xam xôn, ên xam dô hixôn xêmyaa niviha.

2

¹ A xo vac nilôg ên a nêbê a ob milôc vô xam ên vông xam nilôm i vô viyin i tii vac lêm. ² Ên a obêc vông xam nilôm vô viyin ge od letya ob vông a xêgyaa vô niviha? Ên xam obêc dô hixôn nilôm viyin ge od o tiyi wê xam ob vông a xêgyaa vô niviha ge lêm. ³ A xo bêge, om a kivuu kipihac ti mi vông i loc vô xam ila, ên a nêb xam lêc pilepac xam, ên buc wê a obêc miloc vô xam ge od xam o lêc vông a nilôg i vô viyin lêm. Ên xam ge wê xam ob vông a xêgyaa vô niviha, om a xovô ên a nêbê a obêc dô hixôn xêgyaa niviha ge od ob vông xam xêmyaa vô niviha hixôn. ⁴ Lêc buc wê a kivuu kipihac tige vô xam ilage od a kivuu hixôn nilôg viyin levac dì a byag hixôn. A o kivuu kipihac tige ên a nêb a ob vông xam nilôm i vô viyin lêm. Nge, a nêb a ob vông xovôên vô xam bê a xêgyaa vin lec xam luu vêl.

Xam kitya lim ti wê vông nipaên ilage nêl nipaên vêl

⁵ Xam lim ti wê vông môp nipaên ilage, môp wê i vông ge o vông a tibed nilôg vô viyin lêm. Nge, vông xam vihati nilôm vô viyin hixôn. Lêc a nêb a ob vông xomxo tige ni i yoc lêm om a ob nêl kiyang tibeac lec i lêm.

⁶ Èn xomxo tige kô myaviwen vô xam tibeac lec nipaên wê i vông ge, om ge pyap. ⁷ Om gwêbaga xam xêmyaa i vin lec i di xam kitya nipaên wê i vông ge vêl di nêl kiyang malehe vô i, ên obêc dô hixôn nilô viyin levac ge od obêc vông i vô nipaên. ⁸ Mêgem a nêl vô xam bê xam vông môp nivîha vô i, ên i xovô bê xam xêmyaa vin lec i.

⁹ Kipihac wê a kivuu vô xam ilage, a kivuu ên a nêb a ob yaxên xam bêc xam obêc vô ninyam lehe vô kiyang wê a nêl ge vihati, me? ¹⁰ Xam obêc kitya xomxo ti nêl nipaên vêl ge od a êno ob kitya nipaên tige vêl. Nipaên ti obêc yêp di a obêc kitya vêl ge od a le vô Kilisi manôn di kitya vêl ên a nêb i vô nivîha vô xam. ¹¹ Èn il kityaên nipaên tige vêlên obêc ma ge od Seten ob kityoo il di vông il la vac môp nipaên, ên piyôp wê Seten vông ge il xovô pyap.

Pol nilô vô viyin ên he Kolin

¹² Ilage wê a la vigwe Tloas ge od Apumtau tax vuayen ên a tiyi wê a ob nêl Kilisi xolac kitong vô he lê, ¹³ lêc a nilôg vô viyin, ên a lig Taitas o val nêl xam kiyang kitong vô a lêm, om a sea he Tloas di la vigwe Masedonia di la bin Taitas.

¹⁴ Lêc gwêbaga a hi vixag pec ên Anutu, ên wê Kilisi vông vevac vô nipaên mi nginoo, om didii xe la vac nivîha hixôn i, di vông xe la nêl Kilisi kitong vac vigwe vihati ên nêb xomxo vihati i xovô, tiyi xocbê susu nivivea nivîha la vac vigwe vihati mi xomxo yaxên ge. ¹⁵ Èn Anutu yê xe tiyi xocbê susu nivivea wê Kilisi vông ge, om nivivea tige la vac xomxo mahigun, he wê Anutu ob vô he vêl ge di he wê ob yib mi la vac nipaên ge. ¹⁶ Lêc he wê ob yib mi la vac nipaên ge ob yaxên nivivea tige tiyi xocbê nivivea nuhu wê ob nux he yib ge, di he wê Anutu ob vô he vêl ge ob yaxên nivivea tige tiyi xocbê nivivea nivîha wê ob vông he dô maviha ge. Om letya tiyi wê ob vông yuac tige? ¹⁷ Xomxo tibeac nêl xolac tiyi xocbê yuac bisnis wê he ob kô mone lec ge, lêc xe o vông môp tibêge lêm. Nge, xe nêl xolac ya nilôm tibed di xe o nêl kiyang kityooën ya hixôn lêm. Èn xe tu Kilisi nue om xe le vô Anutu manôn di nêl xolac wê Anutu vông vô xe ên nêb xe nêl vô xomxo vihati ge.

3

Xomxo Kolin tiyi xocbê kipihac wê ob nêl Pol he sinale yuac kitong ge

¹ Kiyang wê a kivuu ga, ga xe kô xe lec vô xam, me? Ma vêl. Di môp wê xomxo ya mi vông ge, wê he kô kipihac wê xomxo kivuu mi pimil he vac ge, xam nêb xe kô kipihac tibêge vô xomxo ya mi lam hilung vô xam, me? Di xam nêb xe kô kipihac tibêge vô xam ên i nêl xe kitong vô xomxo ya, me? ² Xacxam va tiyi xocbê xe kipihac wê ob nêl xe kitong vô xomxo ge. Anutu kivuu kiyang tige yêp vac xe nilôm, om xomxo vihati xovô kipihac tige di kitong. ³ Èn xam le seac tiyi xocbê kipihac wê Kilisi kivuu di vông vô xe ên nêb xe viac ge. Lêc o kivuu ya kilipi lêm. Nge, kivuu ya Myakilôhô Ngibua wê Anutu maviha vông ge. Di o kivuu lec ngidax pitehe ti lêm. Nge, kivuu vac xomxo nilô.

⁴ Xe nêl kiyang bêge, ên Kilisi ngidu xe xôn dì xe vông i vin Anutu om xe nêl. ⁵ Xe o tiyi wê xe ob nêl bê xecxe va vông yuac ti ge lêm. Nge, Anutu ngidu xe xôn om xe vông yuac. ⁶ Ên Anutu vaci vông xêkizêc vô xe tiyi wê xe ob nêl kiyang paha wê hilu vô il ge kitong vô xomxo. Kiyang paha tige o tiyi xocbê Moses xolac wê yêp vac kipihac ge lêm. Nge, ge kiyang wê Myakilôhô Ngibua vông ge. Ên Moses xolac ge nêl xomxo nêni nipaên yêp seac om tiyi xocbê hi he yib, lêc Myakilôhô Ngibua môci vông il dô madviha.

Kiyang paha wê Anutu hilu ge nginoo Moses xolac tikwê vêl

⁷ Xolac wê Anutu kivuu lec ngidax dì vông vô Moses ge, Anutu vông i lam hixôn xêseac, om xêseac tige linac lec Moses manôn dì byêx lie Islel manôn om he o tiyi wê ob yê i manôn ge lêm, nang déc xêseac tyo la vêl. Xolac wê Anutu vông vô Moses ge vông xovôên vô xomxo bêga nêbê he ob yib lec nêni nipaên, lêc xolac tige lam hixôn xêseac. ⁸ Om il ob xovô bêga bê kiyang paha wê Myakilôhô Ngibua vông ge, xêseac wê i vông ge levac luu xolac tikwê wê Moses vông ge vêl. ⁹ Ên xolac tikwê nêl ên nêbê xomxo nêni nipaên yêp om he ob kô myaviwen lec, lêc xolac tige lam hixôn xêseac. Di xolac paha wê nêl ên nêbê Anutu yê xomxo niviha lec yuac wê Kilisi vông ge, val hixôn xêseac levac luu vêl. ¹⁰ Om xêseac wê val hixôn xolac tikwê ge tip la, ên xêseac wê val timuêng ge luu xêseac ngwe wê lam tax ge vêl. ¹¹ Ên xolac tikwê wê tip la ge lam hixôn xêseac lê, lêc xolac paha wê ob yêp luta ge, xêseac luu vêl.

¹² Xe vông i vin di dô bin buc wê kiyang tige vihati ob vô nôn lec ge. Om xe nêl kiyang vihati yêp seac vô xam, ¹³ dì xe o vông xocbê Moses vông ilage lêm. Ên ilage Moses manôn xêseac ta lêc vun xôn ya nivîmîhi ên nêb Islele i o yê wê xêseac ob tip la ge lêm. ¹⁴ He Islele ge, piyôp xêkizêc. Vac ilage dì i val tyip lec gwêbaga hixôn, om he obêc kitong xolac tikwê ge od tiyi xocbê nivîmîhi tige vun he manôn xôn om o tiyi wê he ob xovô kiyang tige kehe lêm. Ên Kilisi tibed ge wê ob kwax nivîmîhi tige vêl. ¹⁵ Vixôhîlôg, buc vihati dì i val vô gwêbaga, he obêc kitong Moses xolac ge od tiyi xocbê nivîmîhi yux vac he piyôp xôn. ¹⁶ Lêc xomxo ti obêc pilepac i mì lax vô Apumtau ge od Apumtau ob kwax nivîmîhi tige vêl ên i piyôp. ¹⁷ Apumtau ge Myakilôhô Ngibua om Myakilôhô Ngibua wê Apumtau vông ge obêc dô vac xomxo ti nilô ge od ob piwelac kiyang yuu môp wê ku i xôn ge vêl di i dô vac niviha. ¹⁸ Om il vihati ga, susu ti o vun il madnôn xôn lêm, om xêseac wê Apumtau vông ge linac lec il tiyi xocbê deac wê hixelac dì linac lec xomxo vihati ge. Xêseac linac lec il tiyi buc vihati om Myakilôhô Ngibua wê Apumtau vông ge vông yuac vac il nilôd dì pilepac il lax tiyi xocbê Apumtau vaci ge.

4

Pol he sinale vông yuac dì tulec viyin hixôn

¹ Anutu xo vigwe pisiv ên xe dì vông yuac sinale tige vô xe, om xe nim o ma lec yuac tige lêm. ² Nge, xe vô nîmim vô môp xôpacén wê nipaên ge, dì xe o kityoo xomxo ya kiyang lêm, dì xe o kô kiyang baba ya mî lôm juda vac Anutu xolac hixôn lêm. Nge, xe nêl kiyang nôn kitong vô xomxo, ên xe nêbê he i ngô dì xovô bê yuac wê xe vông vô Anutu manôn ge, xe

vông niviha. ³ Xolac wê xe nêl ge, kehe obêc yêp xôpacên vô xomxo ya ge, od yêp xôpacên vô he wê obêc yib mi la vac nipaén ge. ⁴ Xomxo tigee o vông i vin lêm, ên Seten wê mi kityoo xomxo kibun ga ge le vac he piyôp xôn mi i vô mapítoc, om o tiyi wê xêseac wê xolac vông ge ob linac vac he nilô ge lêm. Xolac tige nêl xêseac wê Kilisi vông ge kitong, ên Kilisi tiyi xochbê Anutu vaci. ⁵ Kiyang wê xe nêl ge, xe o yong xe lêm. Nge, xe nêl Yesu kitong bêga ên xe nêbê Yesu Kilisi ge Apumtau. Di xe ga, xe tu xam nume yuac lec Yesu lê. ⁶ Lec buc taxlee ilage Anutu nêl ên nêbê, "Xêseac i linac vac mapítoc." Di gwêbaga Anutu vông xêseac wê i vông ge lam linac vac il nilôd, om il xovô xêseac wê Anutu vông ge wê linac lec Kilisi manôn.

⁷ Xêseac tige tiyi xochbê vizid niviha yang, lêc Anutu tung i la vac xê nilôm tiyi xochbê tung vac dêg wê o xêkizêc lêm ge nilô, ên nêb xomxo i yê di xovô bê xêkizêc levac tige o yêp vô xe lêm. Nge, lam vô Anutu tibed. ⁸ Viyin viyang viyang ge vihati tulec xe tiyi buc tibeac, lêc o pwoo xe pec lêm. Viyin tige vông xe piyôp vô judajuda di xe xo kiyang tibeac lê, lêc o vông xe piyôp vô nipaén lêm. ⁹ Di xomxo tibeac tii xe nêb ob vông myavinê vô xe, lêc Anutu o sea xe lêm. Di he hi xe lê, lêc he o hi xe vinux lêm. ¹⁰ Xe kilê yibêñ wê Yesu vông ge lec nimnivi tiyi buc vihati, ên maviha wê Yesu vông ge i lam yêp seac di ngidu xe nimnivi xôn. ¹¹ Xomxo vông myavinê vô xe tiyi buc vihati ên nêb ob hi xe xib ên wê xe nêl Yesu xolac ge, lêc môp yêp bêga, ên nêb xomxo i yê xe nimnivi mayib yib di xovô bê maviha wê Yesu vông ge ngidu xe nimnivi xôn. ¹² Om xe dô tiyi xochbê xe ob xib ge, lêc môp tige ngidu xam xôn di vông xam dô mamviha.

¹³ Xe timu vô môp vông vinêñ tiyi xochbê kiyang wê yêp vac kipihac xolac bêga ên nêbê, "A vông i vin Anutu om a nêl i kiyang kitong." Xe êno vông i vin om xe nêl Anutu kiyang kitong yêp seac, ¹⁴ ên xe xovô ên xe nêbê Anutu tipi vô Apumtau Yesu kidi lec vac yibêñ om obêc tipi vô xe êno kidi lec vac yibêñ tiyi xochbê Yesu ge, di ob vông xe hixôn xam, il xôn la le vô Anutu manôn. ¹⁵ Viyin vihati wê xe kilê ge ob vô nôn niviha vô xam, êdêc vizid wê Anutu vông ge i loc vô xomxo tibeac di he i hi víxa i pec ên Anutu di yong i lê i vô levac.

Viyin kibun ga ob vô nôn niviha timuêñ

¹⁶ Xe xovô kiyang tige, om xe nim o ma lec yuac wê xe vông ge lêm. Vixôhilôg, xe kilê viyin tibeac om vông xe nimnivi vô xêlehe sea, lêc xe nilôm mô, Anutu ngidu xôn di vông i vô paha lec tiyi buc vihati. ¹⁷ Viyin tige obêc vô nôn niviha vô xe timuêñ bêga bê xe ob la dô vac xêseac nilô luta lêc luta. Xêseac tige levac mabu luu viyin kibun ga vêl. Om viyin wê tulec xe ge, xe xê tiyi xochbê susu pileva wê ob yêp dia lêm ge. ¹⁸ Om xe mammôn o la vô susu wê il xê ya madnôn ge lêm. Nge, xe mammôn la vô susu wê il madnôn yêen ma ge. Ên susu wê il madnôn yê ge ob dô myabo tyá di xôa ob ma. Dom susu wê il madnôn yêen ma ge ob yêp luta lêc luta.

5

Pol nilô vô niviha ên wê ob la dô hixôn Kilisi gê lag puunê ge

¹ Xe xovô ên xe nêbê xe nimnivi kibun ga tiyi xochbê xumac wê ob yêp myabo tyá di pital mi tô sea ge, om xumac tige obêc dii sea ge od xumac ngwe yêp lag puunê wê Anutu ob vông vô xe ge. Xumac tige, xomxo o lox

ya vigê lêm. Nge, Anutu vaci lox om ob yêp luta lêc luta. ² Lêc gwêbaga xe dô hixôn nimnivi kibun ga, om xe dô hixôn viyin dì vô zidzid, ên xe nêb xe ob dô vac xe xumac lag puunê tiyi xochê xe vinyum ngakwi lec nimnivi xôn ge. ³ Ên xe obêc vinyum lec ge od xe ob dô nimnivi pileva lêm. ⁴ Lêc gwêbaga xe gên dô hixôn nimnivi kibun ga tiyi xochê xe dô vac xumac wê ob dii sea ge, om xe nilôm vô viyin dì xe dô hixôn nilôm byagên. Lêc xe o nêl ên xe nêbê xe ob sea nimnivi kibun ga di dô ya kinum pileva lêm. Nge, xe nêb xe ob vinyum nimnivi lag puunê lec, ên ninivi maviha tige i vông ninivi mayibêni i vixôl vêl. ⁵ Anutu vaci viac xe ên nêb xe la dô mamviha timuén, di vông Myakilôhô Ngibua lam vô xe ên nêb xe xovô bê kiyang tige vihati ob vô nôn lec vô xe.

⁶ Om xe dô hixôn nilôm niviha tiyi buc vihati, di xe xovô ên xe nêbê xe nimnivi kibun ga tiyi xochê xe bom wê xe dô vac ge om xe gên dô teva ên Apumtau ben. ⁷ Gwêbaga xe o xê Apumtau manôn lêm, lêcom xe vông i vin i kiyang dì dô vac môp vông vinên. ⁸ Om xe dô hixôn nilôm niviha, di xe xêmyaa vin lec ên xe nêb xe ob sea nimnivi kibun ga dì la dô niviha hixôn Apumtau vac i ben. ⁹ Lêcom xe obêc dô hixôn Apumtau vac i ben, me xe ob gên dô teva ge od xe xêmyaa vin lec ên xe nêb xe ob vông môp wê Apumtau ob yê niviha ge. ¹⁰ Ên obêc buc timuén ge od il vihati ob la le vô Kilisi manôn dì i yaxêñ môp wê il vông vô buc wê il dô hixôn niđnivi kibun ga ge dì il toto obêc kô myaviwen tiyi niviha yuu nipaén wê il vông ge.

Pol nêl he sinale yuac kitong

¹¹ Xe xona ên Apumtau om xe vông yuac ên xe nêb xomxo i vô ninya lehe vô xolac dì vông i vin. Môp wê xe vông ge vihati yêp seac vô Anutu mi i xovô pyap, di a xo ên a nêbê xam êno xovô xe hixôn. ¹² Xe o nêl kiyang tibêge ên xe nêb xe ob yong xe vô xam lêm. Nge, xe nêl ên xe nêb xacxam mô xovô dì hi vixam i pec ên xe, ên obêc bêge ge od xam obêc tiyi wê xam ob nêl kiyang lax vô xomxo wê so vya vô xe dì kô he lec ên môp wê he vông ge, lêc kiyang nôn o yêp vac he nilô lêm. ¹³ Xomxo ya obêc nêb xe vông yuac tiyi xochê piyôp yacyac ge od pyap, ên xe vông ên xe nêbê Anutu lê i vô levac. Dì xe obêc vông ya piyôp niviha ge od xe vông ên xe nêb i vô niviha vô xam. ¹⁴ Ên Kilisi xêyaa vin lec xe, om xêyaa vin lecén tige kidu xe dì xe vông yuac, ên xe xovô ên xe nêbê xomxo tibed yib ên il vihati, om tiyi xochê il vihati xib hixôn. ¹⁵ Yesu yib ên xomxo vihati, ên nêb il wê il dô madviha ge, il o lêc xovô icil va lêm. Nge, nêb il xovô xomxo ti wê yib dì kidi lec maviha ên il ge dì vông yuac wê ob vông i lê vô levac ge.

¹⁶ Om xe ob tixuu xomxo lec môp wê xomxo vông ge lêm. Vixôhilôg, ilage xe tixuu Kilisi lec môp wê xomxo vông ge, lêc gwêbaga xe xovo i om xe ob vông môp tibêge i tii vac lêm. ¹⁷ Xomxo ti obêc vông i vin dì tu Kilisi xe ge od Anutu obêc vông xomxo tige nilô vô paha lec. Xam ngô lê. Môp tikwê tip la, dì môp paha val gwêbaga.

¹⁸ Anutu vaci tu môp tigee vihati kehe, om ici va vông Kilisi lam hi kiyang wê yêp vac il Anutu mahigun ge yib di kituc il lam dô nôn tibed hixôn Anutu, dì vông kiyang malehe vac xe vigêm ên nêb xe la nêl kitong vô xomxo ên he i dô vac kiyang malehe nilô. ¹⁹ Kiyang malehe tige bêga nêbê Anutu vông Kilisi lam ên nêb ob hi kiyang wê yêp vac il Anutu

mahigun ge i yib. Om Anutu o hôm nipaên wê il vông ge xôn lêm. Nge, kitya vihati vêl. Dì vông yuac vac xe vigêm ên nêb xe nêl kiyang malehe kitong vô xomxo. ²⁰ Om xe tu Kilisi manôñ dì nêl i kiyang, om tiyi xochê Anutu vaci nêl kiyang vô xomxo vac xe myam, om xe nêl kiyang lec Kilisi lê bêga ên xe nêbê “Xam loc kwabo vô Anutu ên i vô malehe vô xam.” ²¹ Kilisi o vông môt nipaên ti lêm, lêcom Anutu kituc il nêd nipaên vihati la lec Kilisi dì i yib ên il. Anutu vông bêge ên nêb ob yê il niviha lec yuac wê Kilisi vông ge.

6

Sinale kilê viyin lec yuac wê he vông ge

¹ Xe wê xe vông yuac hixôn Anutu, om xe ob nêl kiyang vô xam bêga bê Anutu xo vigwe pisiv ên xam di vông vizid niviha vô xam, om le i lêc sea vizid tige i loc yêp lêm. ² Ên Anutu kiyang yêp vac kipihac xolac bêga ên nêbê,

“Vô buc niviha wê a xo vigwe pisiv ên xam ge, om a vô ninyag vô xam vyam, di buc wê a nêb a ob vô xam vêl ge om a ngidu xam xôn.”

Anutu nêl bêge, om xam wê lê. Gwêbaga buc niviha tyo mê. Dì buc wê Anutu ob vô il vêl ge, val gwêbaga.

³ Xe nêb xomxo ti i o lêc nêl kiyang nipaên lec yuac wê xe vông ge lêm, om xe o vông môt wê xomxo ob yê tiyiên ma ge lêm. ⁴ Nge, môt vihati wê xe vông ge xe vông ên xe nêb i nêl xe kitong bê xe ga Anutu nue yuac, om buc wê xe tulec viyin ya, me susu ma ên xe, me xomxo vông viyin ya vô xe ge od xe le xêkizêc dì kilê viyin tigee vihati. ⁵ Xomxo hi xe di vông xe la dô vac kalabuhu, di xomxo tií xe ên

nêb ob hi xe vô nipaên, di xe vông yuac levac, di xe o xêp niviha ti lêm di xe dô vip. ⁶ Lêc xe nilôm xêseac, di xe dô hixôn xovôen niviha, di xe o kunac xomxo lutibd lêm, di xe vông môt niviha vô xomxo vihati, di Myakilôhô Ngibua vông xêkizêc vô xe di xe xêmyaa vin lec xomxo nôn yang. ⁷ Xe nêl kiyang nôn di vông yuac ya xêkizêc wê Anutu vông ge, di môt niviha wê xe vông ge tiyi xochê susu vevac wê xe hôm vac vigêm vilu vilu di vông vevac ya ge. ⁸ Xomxo mangwe yê xe niviha di kô xe lec, di mangwe yê xe nipaên. Di xomxo ya nêl kiyang nimi lec xe di ya pimil xe vô xomxo ya. Xomxo ya nêl ên nêbê xe tibii kityooen, lêc kiyang wê xe mi nêl ge nôn. ⁹ Xomxo ya lungêñ xe, lêc xomxo tibeac xovô xe pyap. Xe dô tiyi xochê xe xib ge lê, lêc xe gên dô mamviha. Anutu vông myavinê vô xe nêb ob titô xe, lêc o hi xe xib lêm. ¹⁰ Xe nilôm vô viyin lê, lêc xe xêmyaa vô niviha tiyi buc vihati. Di xe dô tiyi xochê xomxo wê nêñ susu maen ge, lêc xe vông vizid tibeac vô xomxo tibeac. Xe nêm susu ma, lêc susu vihati tu xe xe.

¹¹ Xam Kolin, kiyang wê yêp vac xe nilôm ge, xe nêl vihati yêp seac vô xam, di xe vông nilôm loc diluhu vô xam. ¹² Xe o kol xe ên xam lêm. Nge, xe xêmyaa vin lec xam. Lêc xam ge, xam kol xam ên xe. ¹³ Om a nêl vô xam tiyi xochê ma nêl vô nue ge, bêga bê xam tax vuayen ên nilôm di vông i loc yadiluhu vô xe.

Il tiyi xochê Anutu xumac ngibua

¹⁴ Xomxo wê o vông i vin Kilisi lêm ge, xam o lêc kituc lec he mi vông yuac i yêp tibed lêm. Ên niviha yuu nipaên, yuu o tiyi wê yuu xêyaa ob

vin lecma ge lêm. Di xêseac o tiyi wê ob yêp hixôn mapitoc ge lêm. ¹⁵ Xam xovô lê. Kilisi yuu Seten, yuu xôn ob vông yuac tiyima, me? Di xomxo wê vông i vin Yesu ge hixôn xomxo wê vông vinên maên ge, yuu xôn ob dô ya xovôên tibed, me? Ma vêl. ¹⁶ Anutu xumac ngibua hixôn xumac wê anutu kityooêng vông ge, yuu xôn tiyima, me? Xam xovô bê il tu xumac ngibua wê Anutu mavîha vông ge, tiyi xocbê kiyang wê Anutu nêl mi i yêp bêga ên nêbê,

“A ob dô vac he mahigun di tup vac he, di a ob tu he Anutu, di he ob tu a nuge.”

¹⁷ Mégem Anutu nêl hixôn bêga ên nêbê,
“Xam sea he di loc dô viyonêng, di le i lêc hôm susu ningeac hixôn lêm, ên aca va ob kô xam di viac xam niviha. ¹⁸ A ob tu xam mam, di xam ob tu a nuge vêx yuu vux. Apumtau xêkizêc kehe nêl kiyang tiga.”

7

¹ Xam lige wê a xêgyaa vin lec xam ge, Anutu hilu kiyang tige vô il, om môp ningeac wê ob vông il nidnivi yuu nilôd vô nipaêng ge, il ob sea vihati i yêp xel, di vông nilôd i vô paha lec. Om il ob xona ên Anutu di tup vô môp bôbac tibed êdêc tu xomxo niviha nôn.

He Kolin pilepac he om vông Pol nilô vô niviha

² A nêl vô xam bê xam xêmyaa i vin lec xe, ên xe o vông soêng ti vô xomxo ti lêm, di xe o vông xomxo ti vô nipaêng lêm, di xe o kityoo xomxo ti di vô i susu vêl lêm. ³ A o nêl kiyang tiga ên a nêb a ob titô xam lêm. Ên a nêl pyap gwêba ên a nêbê xe xêmyaa vin lec xam, om xe obêc dô mamviha hixôn xam, me xe obêc xib hixôn xam ge od pyap. ⁴ A nêl kiyang vihati yêp seac vô xam, di a hi vixag pec ên xam. A dô vac viyin levac, lêc xam vông a nilôg vô viyin maên om a dô hixôn xêgyaa niviha yang.

⁵ Buc wê xe val dô vigwe levac Masedonia ge od xe kilê viyin tibeac di xe nimnivi o dô seac vêl lêm. Nge, viyin viyang viyang hivun xe xôn, ên xomxo tibeac vông vevac vô xe, di xe nilôm xona. ⁶ Lêc Anutu ge wê ob vông xomxo wê nilô vô viyin ge, he nilô vô viyin maên, om vông xe nilôm vô viyin maên ên wê vông Taitas val vô xe ge. ⁷ Taitas val vô xe, om vông xe nilôm vô viyin maên, lêc o môp tige tibed lêm. Nge, xam vông Taitas nilô vô viyin maên mi i val tixuu kiyang wê ngô vô xam ge vô xe, om kiyang tige vông xe nilôm vô viyin maên hixôn. Ên Taitas nêl ên nêbê xam nilôm kidu xam ên xam nêb xam ob wê a, di xam nilôm byag ên wê xam vông viyin vô a ge, di xam nilôm kidu xam ên xam nêb xam ob ngidu a xôn, om kiyang tige vông a xêgyaa vô niviha yang.

⁸ A xovô ên a nêbê kipihac wê a kivuu vô xam ilage vông xam nilôm vô viyin, lêc a nilôg o vô viyin ên kipihac tige lêm. Vixôhilôg, ilage a nilôg vô viyin ên wê kipihac tige vông xam nilôm vô viyin ge, lêc viyin tige o yêp vô xam xuhu dia lêm. Nge, yêp myabo tya di tiyôô. ⁹ Om gwêbagaa a xêgyaa vô niviha, lêc o vô niviha ên wê a vông xam nilôm vô viyin ge lêm. Nge, vô niviha ên wê viyin tige vông xam pilepac xam ge. Ên Anutu vaci vông xam nilôm vô viyin, om kiyang wê xe nêl ge ti o vông xam vô nipaêng lêm. ¹⁰ Ên nilô viyin wê Anutu vông vô xomxo ge vông he pilepac he di Anutu vô he vêl ên nipaêng di vông he dô vac vizid, om il nilôd ob vô viyin lec môp tibêge lêm. Lêc nilô viyin wê xomxo kibun ga vông ge ob

vô nôn niviha lêm. Nge, ob hi he yib. ¹¹ Om xam wê lê. Anutu vông xam nilôm vô viyin, lêc viyin tige vô nôn niviha tibeac vô xam bêga bê xam nilôm kidu xam ên xam nêb xam ob titô nêm kiyang, dì xam xêmyaa vô myavinê vô môt nipaên dì xam xona ên Anutu. Dì xam nilôm kidu xam ên nêb xam ob wê a, dì xam vông yuac xêkizêc ên xam nêb xam ob titô xomxo ti wê vông nipaên ge dì vông myaviwen vô i. Môt tigee vihati nêl xam kitong bêga ên nêbê xam titô kiyang tige pyap, om nipaên ti o yêp vô xam lêm.

¹² Om kipihac wê a kivuu vô xam ilage, a o kivuu vô xomxo ti wê vông môt nipaên ge lêm. Dì a o kivuu vô xomxo ti wê xomxo tige vông i vô nipaên ge lêm. Nge, a kivuu vô xam vihati ên a nêb i vông xovôên vô xam vô Anutu manôn bêga bê xam xêmyaa vin lec xe nôn.

¹³ Om môt wê xam vông ge vông xe nilôm vô viyin maên. Xe nilôm vô viyin maên dì xe nilôm vô niviha hixôn. Ên xe xovô wê xam vihati vông Taitas nilô vô viyin maên ge om vông xe nilôm vô niviha hixôn. ¹⁴ Ên ilage a kô xam lêm lec vô Taitas manôn dì xam o vông a nig yoc ên kiyang tige lêm, ên xam vông kiyang tigee vihati vô nôn lec. Kiyang vihati wê a nêl vô xam ilage vixôhilôg nôn, dì kiyang vihati wê a kô xam lêm lec vô Taitas manôn ge kiyang nôn vixôhilôg. ¹⁵ Buc wê Taitas loc vô xam ge od xam vihati kô i lec hixôn xonaen dì nim yetacê dì xam vô ninyam lehe vô kiyang wê i nêl ge, om gwêbaga Taitas xovô môt niviha wê xam vông vô i ge dì i xêyaa vin lec xam luu vêl. ¹⁶ Dì a ga, a xovô ên a nêbê xam obêc dô vac môt niviha tiyi buc vihati, om a xêgyaa vô niviha ên xam.

8

Pol nêl kiyang lec mone wê ob ngidu xomxo Judia xôn ge

¹ Xam lige, a ob nêl he konglegesen vac vigwe levac Masedonia ge kitong vô xam, ên xêyaa vin lecên wê Anutu vông ge vô nôn niviha vac he mahigun. ² Viyin levac tulec he tiyi buc vihati, lêc he kilê viyin hixôn xêyaa niviha. Dì he nêl susu ma, lêc he vông nilô la vô môt wê ob ngidu xomxo wê susu ma ên he ge xôn. ³ A xovô môt wê he vông ge om a nêl bêga vô xam ên a nêbê heche va nêb he ob tung mone ya, om he tung mone tiyi xochê wê dô vô he ge, lêc he tung mone ya la luu vêl hixôn. ⁴ Dì he nêl xe xêkizêc ên he nêb xe kô mone wê he tung ge mi la hixôn mone wê konglegesen viyang viyang kituc ên nêb ob vông i loc ngidu Anutu nue wê dô Judia ge xôn. ⁵ Ilage xe xo ên xe nêbê he Masedonia ob vông mone ya, lêc he vông xe yetac ên wê he o vông môt tige tibed lêm. Nge, taxlee he vông heche va la diluhu vô Apumtau dì vông he la vac xe kwa ngibi tiyi môt wê Anutu nêl ge.

⁶ Konglegesen Masedonia vông môt tibêge, om xe nêl vô Taitas ên xe nêl i loc vô xam, ên vông yuac niviha wê loc nêl vô xam ilage i vô nôn lec. ⁷ Môt wê niviha ge vihati vô levac vac xam mahigun, om xam vông i vin xêkizêc ta dì nêl Yesu xolac, dì xam xovô kiyang vihati, dì xam vông nilôm la diluhu vô Anutu yuac dì xam xêmyaa vin lec xe. Om a nêl vô xam bêga bê môt wê ob ngidu xomxo xôn ya mone ge i vô levac vac xam mahigun hixôn.

⁸ A nêb a ob kidu xam lec môt tige lêm. Nge, a ob nêl he Masedonia môt kitong vô xam ên a nêbê he vông nilô la vô môt niviha tige, om a nêb

a ob yaxên bê xêyaa vin lecén wê xam vông ge obêc vô nôn niviha tibêge, me? ⁹ Xam xovô vizid wê il lig Apumtau Yesu Kilisi vông ge pyap. Ên Yesu dô vac xéseac hixôn vizid vihati, lêc nêb ob ngidu il xôn om lam tu xochê xomxo wê nên susu maén ge, ên nêb môp wê lam tu xochê xomxo wê nên susu maén ge i vông il tulec vizid tibeac.

¹⁰ Om a ob nêl vô xam i tiyi xovôén wê aca va vông ge bêga bê xam vihati obêc tung mone pyap ge od obêc niviha. Ên xam xovô yuac tige taxlee ên xam nêb xam ob vông, di klismas ngwe tax, xam vông mone mangwe. ¹¹ Om a ob nêl vô xam bê gwêbaga xam kituc mone ya hixôn ên yuac tige i pyap. Ilage xam nilôm kidu xam ên nêb xam ob vông yuac tige, om gwêbaga xam nilôm i kidu xam di xam tung mone i tiyi xochê wê dô vô xam ge, ên yuac tige i pyap. ¹² Xomxo ti obêc nêb tung mone di obêc tung i tiyi xochê wê dô vô i ge od Anutu ob yê niviha. Xomxo ya ob vông levac di ya ob vông nipwo, lêc Anutu ob yê vihati niviha. Ên Anutu nêb xomxo toto i tung mone i tiyi xochê wê dô vô he ge.

¹³ A o nêl ên a nêb xam vông mone levac vô xomxo ên he i dô niviha di xam dô nipaên lêm. Nge, a nêb xam vihati dô nimviha i tiyima. ¹⁴ Gwêbaga xam nêm susu tibeac dô, om xam vông ya i loc ngidu he wê susu ma ên he ge xôn, êdêc susu obêc ma ên xam vô buc timuën di he vông tibeac obêc dô ge od he i vông ya vô xam ên i ngidu xam xôn. Ên obêc bêge ge od xam vihati ob dô tiyima. ¹⁵ Tiyi xochê kiyang wê yêp vac xolac bêga ên nêbê, "Xomxo wê tulec yaén tibeac ge, yaén tiyi he di o luu vêl lêm, di he wê tulec nipwo tyá ge o myag yaén ti lêm."

Taitas yon li yuu ob loc vô he Kolin

¹⁶ A hi vixag pec ên wê Anutu vông Taitas xêyaa vin lec xam tiyi xochê a xêgyaa vin lec xam ge. ¹⁷ Om kiyang wê a nêl vô Taitas ên a nêb i loc yê xam ge, Taitas tyuc lec, di i ci va nilô kidu i hixôn ên nêb ob loc vô xam. ¹⁸ Di il lig vông vinên ti ob loc hixôn Taitas. Xomxo tige vông yuac xolac om xomxo vac konglegesen vihati xovô i di pimil i. ¹⁹ Lêc he o pimil i ya kiyang pileva lêm. Nge, konglegesen vihati vinoo i, ên nêb i loc hixôn xe di xe xôn kô mone mi la vông vô lige vông vinên Judia wê nên susu maén ge. Yuac tige, xe vông ên xe nêb xe ob vông Apumtau lê i vô levac, om xe nêb xomxo i yê di xovô bê xe vông nilôm la vô yuac wê ob ngidu xomxo xôn ge.

²⁰ Mone mabu tige, xe nêb xomxo ti i o lêc so kiyang lec xe lec mone tige lêm, om xe ob vông xomxo tige i loc hixôn. ²¹ Ên xe nêb xe ob vông yuac niviha vô Anutu vaci lêm. Nge, xe nêb xomxo i yê yuac wê xe ob vông ge niviha hixôn.

²² Om xe ob vông il lig ti i loc hixôn yuu. Xomxo tige, xe yaxên tiyi buc tibeac, lêc vông yuac viyang viyang ge xêkizêc, di gwêbaga xomxo tige nilô kidu i di vô nibu nibu nêb ob loc vô xam, ên xovô xam pyap ên nêb xam obêc vông yuac niviha. ²³ Taitas ge xam xovô pyap bê i wê xii xôn vông yuac lec xam ge. Di lig yuu ge, yuu tu konglegesen vihati manôñ di vông yuac wê ob vông Kilisi lê vô levac ge. ²⁴ Om xam xêmyaa i vin lec yon di xam viac yon i niviha, ên konglegesen vihati i yê mi xovô bê kiyang wê xe pimil xam ge kiyang nôn.

Môp wê ob ngidu Anutu nue xôn ge

¹ Xam xovô pyap lec mone wê il ob vông i la ngidu Anutu nue Judia xôn ge, om a ob kivuu kiyang ti i tii vac vô xam lêm. ² Èn a xovô pyap ên a nêbê xam nilôm kidu xam ên xam nêb xam ob vông yuac tige, om a pimil xam vô he Masedonia bêga ên a nêbê, “Xomxo vac vigwe levac Glik hilu kiyang pyap lec klismas ngwe tax ên he nêb he ob tung mone.” He Masedonia ngô kiyang tige dì xovô wê xam nilôm kidu xam ên yuac tige om vông he tibeac xêyaa vin lec yuac tige ên he nêb he ob vông hixôn. ³ Om gwêbaga a nêb a ob vông lig yon i loc vô xam, om xam viac mone pyap i tiyi xochê kiyang wê a nêl vô he Masedonia ge, ên kiyang wê a mi yong xam vô he ge, he i o lêc yê tiyi xochê kiyang nôn maên lêm. ⁴ Èn he Masedonia ya obêc loc hixôn a timuên dì xe obêc xê wê xam gên o tung mone pyap lêm ge od obêc vông a nig yoc dì vông xam nim yoc hixôn ên wê a yong xam pileva vô he ge. ⁵ A xo bêge, om a nêb lig yon i loc mug vô xam, ên viac mone wê xam nêl pyap ên xam nêb xam ob vông ge, édêc buc wê xe obêc miloc vô xam ge od xe ob xê wê xam kituc mone pyap hixôn nilôm niviha dì xam o vông ên wê xomxo kidu xam nginong ge lêm.

⁶ Xam xovô bêga bê xomxo ti obêc xin vê yuu ge od ob kô nôn yuutyabed. Dì xomxo ti obêc xin vê tibeac ge od ob kô nôn tibeac luu vêl. ⁷ Om xam toto vông mone i tiyi xochê xam nilôm xovô ên xam nêb xam ob vông ge. Dì xam o lêc vông hixôn nilôm viyin lêm. Di le i lêc vông ên wê xomxo kidu xam ge lêm. Èn Anutu xêyaa vin lec xomxo wê tung mone hixôn nilô niviha ge. ⁸ Anutu tiyi wê ob vông vizid vihati hivun xam xôn, om obêc vông susu wê ob ngidu xam xôn ge vô xam i tiyi buc vihati dì obêc vông vô xam i luu vêl tiyi wê xam ob vông yuac niviha ya ge. ⁹ Tiyi xochê kiyang wê yêp vac xolac bêga ên nêbê,

“Xomxo ti wê titang i susu vô xomxo wê nênsusu maên ge, môp niviha wê i vông ge ob vô nôn niviha dì ob yêp luta.”

¹⁰ Anutu ge wê vông susu vê vô xomxo mì he la xin, dì vông vê tige vô nôn tibeac mì xomxo ya, om Anutu obêc vông susu vê vô xam dì vông i vô tibeac, di ob vông môp niviha wê xam vông ge vô nôn tibeac. ¹¹ Anutu obêc vông susu tibeac vô xam tiyi buc vihati, tiyi wê xam ob vông susu tibeac vô xomxo wê nênsusu maên ge. Om mone wê xam vông ge xe obêc kô mì la vông vô xomxo ge od ob vông he hi vixa pec ên Anutu. ¹² Om yuac niviha wê xam vông ge ob ngidu Anutu nue wê nênsusu maên ge xôn dì ob vô nôn niviha hixôn bêga bê ob vông he tibeac hi vixa pec ên Anutu. ¹³ Èn môp wê xam ngidu lime vông vinênsusu xam ge ob nêl xam kitong vô xomxo, om he ob xovô wê xam vông i vin Kilisi xolac dì vông i vô nôn lec ge, di he ob yê wê xam vông mone levac vô he hixôn xomxo baba ge, om he ob pimil Anutu ên xam. ¹⁴ Di he ob xovô bê xêyaa vin lecên wê Anutu vông ge vô levac vô xam, om he xêyaa ob vin lec xam di he ob kitaa vô Anutu lec xam. ¹⁵ Il ob hi vixad i pec ên Anutu, ên wê vông vizid levac mabu ti vô il ge. Kiyang wê il nêl ge o tiyi wê ob nêl vizid tige kehe ge lêm, ên vizid tige niviha yang luu vêl.

10

Pol piwelac kiyang viyin vél ên i

1 Xomxo ya nél ên he nêbê buc wê a dô hixôn xam ge od a xona om a mi nél kiyang malehe vô xam, léc buc wê a dô teva ên xam ge od a kivuu kiyang xékizêc vô xam. He nél bêge, léc a Pol, a nél a ob nél kiyang malehe vô xam tiyi xochbê Kilisi vông ge. **2** Om a ob kitaa xam bê xam viac xam niviha, êdêc buc wê a obêc miloc vô xam ge od a ob nél kiyang xékizêc vô xam lêm. Léc a nél a ob nél kiyang xékizêc vô xomxo wê nél xe mi timu vô môt kibun ga ge. **3** Vixôhilôg, xe dô kibun ga, léc vevac wê xe vông ge o tiyi xochbê vevac kibun ga lêm. **4** Èn xe vông vevac vô môt nipaên, léc xe o vông vevac ya susu kibun ga lêm. Nge, xe vông vevac ya xékizêc wê Anutu vông ge tiyi wê xe ob dii xumac xékizêc wê Seten vông ge vél. **5** Om xovôên wê xomxo vaci vông ge, hixôn kiyang wê xomxo yong he dì le vac môt xôn ên xomxo wê nél ob xovô Anutu ge, xe hi kiyang tibêge vihati tô sea, om kiyang vihati ge, xe vông i la vac Kilisi kwa ngibi. **6** Xe viac xe dì bin xam, ên xe nél xam obêc la vac Kilisi kiyang vihati kwa ngibi ge od xe ob vông myaviwen vô he wê vô ninya kitu vô Kilisi kiyang ge.

7 Xam xovô kiyang wê yêp vô xam mamnôn ge lêm. Xomxo ti obêc xovô nél i tu Kilisi xe pyap ge od i xovô bêga bê xe êno tu Kilisi xe tiyi xochbê i ge. **8** Apumtau vông xékizêc vô xe ên nél xe ngidu vông vinê wê xam vông ge xôn, dì xe o vông xam vô nipaên lêm. Om a obêc kô xe lec ên yuac sinale wê xe vông ge od a nig ob yoc ên kiyang tige lêm. **9** Xam o léc xovô bêga bê a kivuu kipihac ge vô xam ên a nél i vông xam yetac di xona lêm. **10** Èn xomxo ya nél ên he nêbê, “Kipihac wê Pol mi kivuu vô xe ge, kivuu kiyang viyin hixôn xékizêc, léc wê lam dô hixôn xe ge od dô i tiyi xochbê xomxo wê xékizêc ma ge di i kiyang tiyi xochbê kiyang pileva.” **11** Om xomxo wê nél kiyang tibêge ge, he i xovô bê buc wê a obêc miloc dô hixôn xam ge od a obêc vông i tiyi xochbê kiyang wê a kivuu vac kipihac vô xam ge.

12 Xomxo wê yong he ge, xe ob nél bê xe tiyi xochbê he ge lêm, di xe xona ên wê xe ob tixuu xe lec he ge. Èn heche va yaxên he ya xovôên wê he va vông ge, di he tixuu he lec heche va, om he tiyi xochbê xomxo piyôp maén. **13** Di xe ga, xe nél xe ob yong xe i luu vél lêm. Nge, xe ob yong xe lec yuac wê Anutu vông vac xe viégem mì xe vông i tup vô di miloc vô xam ge. **14** Xe obêc miloc vô xam ilage lêm ge, od obêc tiyi xochbê xe kiyil yôg wê Anutu vông vô xe ge di yong xe vidaaén. Léc o bêge lêm, ên xe kô Kilisi xolac mì loc nél vô xam taxlee. **15** Om xe o kiyil yôg di yong xe lec yuac wê xomxo ngwe vông ge lêm. Xe xo ên xe nêbê vông vinê wê xam vông ge i vô xékizêc, ên yuac wê xe vông vac xam mahigun ge i vô levac di i loc tiyi yôg wê Anutu vông vô xe ge. **16** Èn obêc bêge ge od xe ob la nél xolac vô tibii madiluhu wê dô nimi ge hixôn, di xe ob yong xe lec yuac wê xomxo ngwe vông ge lêm.

17 Kiyang yêp bêga ên nêbê, “Xomxo ti obêc nél pimil ge od i pimil Apumtau.” **18** Èn xomxo ti obêc pimil ici va ge od ob kô lê levac lêm. Léc Apumtau obêc pimil i ge od ob kô lê levac.

11

Pol nêl sinale kityooên nêl môp kitong

¹ A xo ên a nêb a ob yong a tya tax, om xam vông a nêl. ² A nêl bêge, ên a xêgyaa vin lec xam tiyi xochê Anutu xêyaa vin lec xam nêb xam tu ixe, ên a nêl pyap ên a nêb xam ob ii vux ti. Vux tyo ge Kilisi, om a ob vông xam vô i tiyi xochê vêxwo niviha ti. ³ Lêc a xona ên wê xomxo obêc kityoo xam tiyi xochê myel nipaên kityoo Iv ya kiyang yacyac ilage, ên kiyang tibêge obêc vông xam piyôp vô nipaên di vông xam sea môp wê xam vông nilôm la diluhu vô Kilisi tibed ge. ⁴ Ên xomxo ya miloc vô xam di nêl kiyang lec Yesu, lêc o nêl i tiyi kiyang wê xe nêl vô xam ilage lêm. Di he nêb he ob vông Myakilôhô Ngibua vô xam, lêc o Myakilôhô Ngibua nôn wê xam kô ilage lêm. Di he nêl xolac ba ya vô xam wê o tiyi xochê xolac wê xam vông i vin ilage lêm, lêcom xam ngô di vông i vin lutibed.

⁵ Xam ngô lê. A xovô ên a nêbê xomxo wê xam yong he ên xam nêbê he sinale levac ge, he o luu a vêl lêm. ⁶ Mêd a nêl kiyang xochê xomxo paha ti, lêc xovôênen wê a vông ge o nipwo tya lêm. Nge, môp vihati wê a vông ge, a vông hixôn xovôênen niviha mi xam wê pyap.

⁷ Buc wê a loc nêl xolac vô xam ge od a o kô mone ti lec yuac tige lêm, ên a nêb a ob vông xam lêm i vô levac, om môp tige vông a vô nipwo lec. Xam nêb a vông ge nipaênen? ⁸ Konglegesen ya vông mone lam vô a ên nêb ob ngidu a xôn di a vông yuac vac xam mahigun, om môp tige tiyi xochê a vô he mone vêl ên a nêb i ngidu xam xôn. ⁹ Buc wê a dô hixôn xam di susu ya ma ên a ge od a o kitaa susu ti vô xam lêm. Ên il lige vông vinênen ya kidi gê Masedonia di val vông susu wê ma ên a ge ya vô a. A viac a niviha, om a ob viac a niviha bêge di a ob vông viyin vô xam lêm. ¹⁰ Kiyang nôn wê Kilisi vông ge yêp vac a nilôg om a nêl hixôn nôn ên a nêbê a o kitaa susu ti vô xam lêm, di xomxo vac vigwe levac Glik vihati ge ti o tiyi wê ob le vac môp xôn ên kiyang tige lêm. ¹¹ A nêl kiyang tige lec kehe vatya? Mêd a xêgyaa o vin lec xam lêm, me? Ma vêl, Anutu vaci xovô wê a xêgyaa vin lec xam ge.

¹² Xomxo ya nêb ob yong he di nêl bê he mi vông yuac tiyi xochê xe mi vông ge. Om a ob le vac môp xôn ên he, di vông yuac i tiyi xochê a vông ilage, di a ob kô susu ti vô xam lêm. ¹³ Xomxo tigee, sinale kityooên, lêc he viyum he vac kiyang wê Kilisi nue sinale vông ge, di nêl kiyang kityooên vô xomxo. ¹⁴ Xam o lêc yetac ên môp tibêge lêm. Ên Seten vaci obêc viyum i vac kiyang niviha tiyi xochê angela xêseac vông ge, ¹⁵ om Seten nue yuac obêc viyum he vac môp niviha wê Anutu nue yuac vông ge, om xam o lêc yetac ên môp tibêge lêm. Obêc timuênen ge od xomxo tibêgee ob kô myaviwen nipaên lec yuac wê he vông ge.

Pol nêl viyin wê tulec i ge kitong

¹⁶ A nêl gwêba di a ob nêl i tii vac vô xam bê xam o lêc xo bê a xomxo piyôp yacyac lêm. Lêc xam obêc xo bêge ge od pyap. Om xam ngô kiyang wê a ob nêl ga, ên a êno ob yong a nipwo tya. ¹⁷ Kiyang wê a ob nêl ga, Apumtau o nêl ên nêb a nêl tibêge lêm. Lêc a ob yong a tiyi xochê xomxo piyôp yacyac ti. ¹⁸ Xomxo tibeac yong he lec môp kibun ga, om a êno, a ob yong a lec môp tibêge hixôn. ¹⁹ Xam nêb xam piyôp levac lê, lêc xam mi ngô kiyang wê xomxo piyôp yacyac mi nêl ge. ²⁰ Ên xomxo ya vông

xam tu he nue yuac pileva di vun susu wê xam vông ge, dì vông xam vô nipaên, mi pitap xam mamnôn dì kô he lec vô xam, lêc xam o le vac he xôn lêm. ²¹ Xêkizêc wê xe vông ge ti o yêp tiyi wê xe ob vông môp bêge vô xam ge lêm. Lêc mêd xam so ên xam nêb xe nim ob yoc ên wê xe o vông môp bêge vô xam lêm ge?

A ob nêl kiyang i tiyi xochbê xomxo piyôp yacyac ge. Xomxo ti obêc yong i lec môp wê i vông ge od a êno tiyi wê a ob yong a lec môp wê a vông ge. ²² Xomxo ti obêc nêb i Hiblu ge od a êno, a Hiblu. Di ti obêc nêb i Islel ge od a êno a Islel. Di ti obêc nêb i kehe Eblaham ge od a êno kehe yêp vac Eblaham. ²³ Di he obêc nêbê he Kilisi nue yuac ge od a êno Kilisi nu yuac. Lêc a obêc nêl kiyang i tiyi xomxo yacyac ti ge od a ob nêl bê a ga Kilisi nu yuac wê a luu he vêl ge. Ên a vông yuac levac nginoo he vêl, dì a la kalabuhu buc tibeac luu he vêl, dì tibii hi a vô nipaên buc tibeac luu he vêl. Di buc tibeac, vô kwabo lec wê a ob xib. ²⁴ He Yuda hi a ya let buc vigê vilu om he mi hi a lu 39 lec buc titi. ²⁵ Di tibii hi a ya viyi lu yon, dì buc ti xomxo nêx a ya ngidax, dì sip vô nipaên lu yon dì a la vac gwec, dì lu ti gwec kô a mi vîlee vô vidiién ngwe dì bucén ngwe. ²⁶ Di a la môp dia tiyi buc tibeac, om susu wê vông a vô nipaên ge tibeac, xochbê mia butac, dì tibii yôdac, dì a lige Yuda hixôn tibii madiluhu ya nêb ob vông a vô nipaên, dì a tulec viyin vac vigwe levac hixôn vigwe mahigun pileva dì vac gwec, dì buc ya, xomxo wê kityoo nêb he xomxo vông vinêng ge nêb ob vông a vô nipaên. ²⁷ Di a vông yuac levac om a nignivi vô myavinê sea, dì a o xêp niviha vô bucén lêm. Buc tibeac vip den a, lêc yaên hixôn mia ma ên a, dì lea hi a ên a nêg ngakwi ma.

²⁸ Lêc o viyin tibêge vaci mô lêm. Ên buc vihati a xo konglegesen vihati ên a nêb a ob viac he niviha, om kiyang tige vô viyin levac vô a. ²⁹ Ên xomxo ti obêc vông i vin xêkizêc lêm ge od a êno ob dô i tiyi xochbê a o xêkizêc lêm. Di nipaên obêc pwoo xomxo ti pec ge od obêc vông a xêgyaa vô myavinê.

³⁰ A obêc yong a ge od a ob yong a lec môp wê nêl a kitong ên nêbê a o xêkizêc lêm. ³¹ Il lig Apumtau Yesu ma Anutu xovô pyap ên nêbê kiyang wê a nêl ga, a o kityoo lêm. Il ob pimil Anutu lê i vô levac dì i yêp luta lêc luta.

³² Buc wê a dô vigwe Damaskas ge, hizap levac wê King Aletas vông ge, vông nue la viac môp Damaskas nêb ob hôm a xôn, ³³ lêc lige ya tung a vac sepac nilô dì vông a lop vac vuuyen nipwo wê le vac xenac levac ge dì a lop mi la xenac kehe dì pec mi la ên hizap levac vigê.

12

Pol nêl vivia wê yê ge kitong

¹ A obêc yong a ge od ob vô niviha vô a lêm, lêc xomxo ya ge, he yong he vô xam, om a êno ob yong a lec vivia hixôn kiyang wê Apumtau hilung vô a ge. ² Xomxo wê vông i vin Kilisi ge ti dô, lêc Anutu kô i mi la lag puunê ti wê vông yon ge. Ge ilatikwê dì klismas vigê yuu dì tô mi la yuudiyyu la vêl. Xomxo tige ninivi la, me ninivi dô dì kinu vaci la, ge a lungén. Anutu vaci yê. ³ A xovô ên a nêbê xomxo tige, Anutu kô i mi la lag puunê. Ninivi mêd la hixôn me kinu vaci la, ge a lungén, dì Anutu tibed xovô. ⁴ Gê lag puunê xomxo tige ngô kiyang ya, lêc o tiyi wê ob nêl kiyang tige kitong

lêm, ên kiyang tige Anutu nêl xôn nêb nêl kitongên i ma. ⁵ A tiyi wê a ob yong xomxo tige, lêc a ob yong aca va lêm. A obêc nêb yong a ge od a ob nêl bêga bê a o xomxo xêkizêc lêm, di a ob yong a lec tige tibed. ⁶ Vixôhilôg, a obêc nêb yong a ge od a ob nêl kiyang i tiyi xocbê xomxo yacyac mi nêl ge lêm. Nge, kiyang wê a ob nêl ge, a ob nêl kiyang nôn. Lêc a ob yong a tibêge lêm, ên a nêb xomxo ti i o lêc ngô kiyang wê a ob kô a lec ge di nêl bê a xomxo niviha lêm. Nge, a nêb xomxo i yê môp wê a mi vông ge di ngô kiyang wê a mi nêl ge di xovô a.

Pol ninivi tulec myavinê

⁷ Vivia wê Anutu hilung vô a ge, niviha yang, lêc Anutu nêl ên nêb a o lêc yong a lec vivia tige lêm, om vông myavinê ti vô a xocbê yin vac a nignivi. Myavinê tige tiyi xocbê Seten nu yuac ti lam hi a, ên Anutu nêb a o lêc kô a lec lêm. ⁸ Om a kitaa vô Apumtau lu yon, ên a nêb i vông myavinê tige i tip loc vêt ên a, ⁹ lêc Apumtau nêl vô a ên nêbê, “A ob vô vêt lêm, ên xêyaa vin lecên wê a vông ge tiyi ông pyap, di xêkizêc wê a vông ge ob vô levac vô xomxo xêlehelehe.” Apumtau nêl bêge vô a, om a ob dô hixôn xêgyaa niviha di hi vixag i pec ên wê a nêg xêkizêc ma ge, ên xêkizêc wê Kilisi vông ge i hivun a xôn. ¹⁰ Om a nêg xêkizêc obêc ma di xomxo obêc nêl kiyang nipaên vô a, di a obêc tulec viyin ya, di xomxo obêc nêb vông a vô nipaên, di a obêc kilê viyin viyang viyang lec Kilisi lê ge od a xêgyaa ob vô niviha, ên buc wê a dô xêlehelehe ge od Kilisi ngidu a xôn di a dô xêkizêc.

Pol nêb ob ngidu vông vinêwê he Kolin vông ge xôn

¹¹ Kiyang wê a nêl ga, a nêl i tiyi xocbê xomxo yacyac ge, lêc xam vông a nêl kiyang tibêge, ên xam obêc pimil a ge od niviha, lêc xam vôngên ma om aca va kô a lec vô xam. Vixôhilôg, a xomxo pileva ti, lêc sinale levac levac o luu a vêt lêm. ¹² A dô hixôn xam di kilê viyin hixôn xêgyaa niviha, di a vông do levac wê ob nêl sinale kitong ge, om a vông do levac viyang viyang ya xêkizêc wê Anutu vông ge. ¹³ Om môp tina wê a la vông vac konglegesen ya di a o vông vac xam mahigun lêmê? Môp tibed wê a o vông vac xam mahigun lêm ge bêga nêbê a o kô susu ti vô xam pileva lêm. Om xam kitya a nêg nipaên tige vêt!

¹⁴ A viac a pyap om a ob lôc vô xam lu ti hixôn wê ob vông lu yon ge, di a ob kitaa susu ti vô xam lêm. Ên a nêb a ob kô susu wê xam vông ge lêm. Nge, a nêb a ob viac xam i tiyi xocbê mae viac nue ge. Ên nue nipwo ob kituc susu ên i ngidu tae mae xôn lêm. Nge, tae mae, he ob kituc susu di ngidu nue xôn. ¹⁵ Om a obêc vông aca va hixôn susu vihati ên i ngidu xam xôn ge od a ob vông hixôn xêgyaa niviha. A xêgyaa vin lec xam luu vêt, lêc mêd xam xêmyaa o vin lec a nipwo tyá lêmê?

¹⁶ Xam ya nêl ên xam nêbê, “Vixôhilôg, Pol o kô susu wê xe vông ge ti vô xe mammôn lêm, lêc Pol ge xomxo kityooêm om mêd kityoo xe di vô xe susu ya vêt.” ¹⁷ Xam wê lê. Xomxo wê a vông i loc vô xam ge, mêd a vông he ya loc kityoo xam di vô xam susu ya vêt, me? ¹⁸ A vông Taitas hixôn li ngwe, yuu loc vô xam, om mêd Taitas kityoo xam di vô susu ya vêt ên xam, me? Myakilôhô Ngibua wê dô hixôn xii Taitas ge, mêd o tibed lêmê? Mêd xii xôn o timu vô môp tibed lêmê?

¹⁹ Xam mêt xo ên xam nêbê xe kivuu kiyang ga ên xe nêb xe ob titô kiyang wê xe vông ge di yong xe vô xam mammôn. Lêc o bêge lêm. Ên xe tu Kilisi nue yuac om xe nêl kiyang tige vô Anutu manôn. Xam lige, kiyang ga vihati xe kivuu ên xe nêb xe ob ngidu vông vinên wê xam vông ge xôn. ²⁰ Ên a xona ên a nêbê buc wê a obêc loc vô xam ge, mêt a ob miloc xê wê xam o tup vô môp wê a xovô ge lêm, di kiyang wê a ob nêl vô xam ge, a ob nêl tiyi xochê kiyang wê xam nêb a nêl vô xam ge lêm. A xona ên a nêb a obêc xê wê xam kunacma di wêma nipaên, di xêmyaa vô myavinê vôma, di xam vông vevac vôma, di xam nêl kiyang nipaên lecma, di nêl kiyang nimi, di kô xam lec, di vông môp vaxvax. ²¹ A xona ên buc wê a obêc miloc vô xam tii vac ge, ên a Anutu mêt obêc vông a nig yoc ên nipaên wê xam vông ge, di a nilôg obêc vô viyin levac ên wê lime tibeac o pilepac he di sea môp nipaên wê he vông ge lêm. Môp nipaên bêga nêbê môp ningeac di môp yôdac vêx yuu vux, di môp vaxvax.

13

Pol nêl vô he Kolin ên nêb he i viac he i niviha

¹ Gwêbaga a ob loc vô xam lu ti hixôn wê ob vông lu yon ge. Xomxo yuu me yon obêc nêl kiyang ti timu vôma vixa lec xomxo ti nêl nipaên ge od il ob yaxê kiyang tige. ² Ilage a loc dô hixôn xam lu yuu di a nêl vô he wê vông môp nipaên ge hixôn xam baba ên a nêb a obêc vông myaviwen vô xam. Di gwêbaga a dô teva ên xam, lêc a ob nêl i tii vac vô xam bê a obêc milôc vô xam ge od a ob xo vigwe pisiv ên he wê vông môp nipaên ge lêm. ³ Xacxam va nêb xam ob xovô bê Kilisi nêl kiyang vac a myag, me? Om xam obêc xovô lec môp wê a vông ge. Ên Kilisi o tiyi xochê xomxo xêlehelehe ge lêm. Nge, vông yuac hixôn xêkizêc vac xam mahigun. ⁴ Vixôhilôg, he hi Yesu yib lec xax pola tiyi xochê xomxo wê xêkizêc ma ge, lêc gwêbaga Yesu dô maviha ya xêkizêc wê Anutu vông ge. Di xe êno, xe timu vô Kilisi vixa om xe dô tiyi xochê xomxo xêlehelehe ge, lêc xêkizêc wê Anutu vông ge vông xe dô mamviha hixôn Kilisi om xe hilung xêkizêc tige vô xam.

⁵ Xam toto yaxênilôm di xovô bê xam vông i vin Kilisi nôn, me xam o vông i vin lêm. Xacxam va dô di yaxê. Yesu Kilisi dô vac xam nilôm, lêc mêt xam o xovô lêm? Xam obêc yaxê bê xam o vông i vin lêm ge od xam o tu Kilisi nue nôn lêm. ⁶ Di a xovô ên a nêbê xam obêc yaxê xe ge od xam ob xovô bê xe vông i vin nôn. ⁷ Xe kitaa vô Anutu ên xe nêb i ngidu xam xôn di xam sea môp nipaên vihati. Xe o nêl ên xe nêbê xomxo i yê môp wê xam vông ge di pimil xe lec yuac wê xe vông vac xam mahigun ge lêm. Nge, xe nêb xam vông môp wê niviha ge, di xomxo obêc yaxê xe lêc nêb yuac wê xe vông ge tiyiên ma ge od pyap. ⁸ Lêc xe o tiyi wê xe ob vông kiyang nôn i vô nipaên ge lêm. Nge, xe ob ngidu kiyang nôn xôn. ⁹ Om xe nêm xêkizêc obêc ma di xam obêc le xêkizêc ge od ob vông xe xêmyaa vô niviha. Om xe kitaa vô Anutu tiyi buc vihati ên xe nêb vông vinên wê xam vông ge i lêc xêkizêc. ¹⁰ Gwêbaga a dô teva di kivuu kipihac tiga vô xam, ên a nêb xam pilepac xam di buc wê a ob miloc vô xam ge od a ob nêl kiyang myagpilihi vô xam lêm. Ên Apumtau vông xêkizêc vô a ên nêb a ngidu vông vinên wê xam vông ge xôn, di o vông xêkizêc vô a ên nêb a vông xam vô nipaên lêm.

Kiyang myahipu ya

¹¹ Xam lige, a ob nêl kiyang myahipu timuên bêga bê xam titô xam kiyang i yêp niviha, dì xam ngô kiyang wê a nêl ga, dì xam nilôm i yêp tibed, dì xam dô vac kiyang malehe nilo. Xam obêc vông bêge ge od Anutu wê xêyaa vin lecén dì kiyang malehe kehe ge ob dô hixôn xam.

¹² Xam pulma vigêm ên i nêl kitong bê xam xêmyaa vin lecma. Lime vông vinên vihati ga nêl vidiiên vô xam.

¹³ Apumtau Yesu Kilisi i vông vizid niviha vô xam, dì xêyaa vin lecén wê Anutu vông ge i viac xam, dì Myakilôhô Ngibua i titup xam xôn dì hivun xam vihati xôn.

GALESIA Kiyang wê Pol kivuu vô tibii Galesia ge

1 A, Pol, a sinale ti, lêc xomxo ti o vinoo a nêb a kô yuac sinale lêm, di xomxo ti o vông a lam vac yuac tiga lêm. Nge, Yesu Kilisi yuu Ma Anutu wê tipi vô Yesu kidi lec vac yibên ge, yucyuu va vinoo a nêb a vông yuac sinale. **2** Om a hixôn lige wê dô hixôn a ge, xe kivuu kipihac tiga di vông i loc vô xam vông vinê vac konglegesen toto wê yêp vac vigwe levac Galesia ge.

3 Xêyaa vin lecên yuu kiyang malehe wê Mag Anutu yuu il lig Apumtau Yesu Kilisi vông ge i viac xam. **4** Kilisi timu vô môp wê il Mag Anutu nêb i vông ge, om lam yib lec il nêd nipaên ên nêb ob vô il vêl ên môp nipaên kibun ga wê xomxo dô vac ge. **5** Mêgem il ob pimil Anutu lê i vô levac di i yêp luta lêc luta. Nôn.

Kilisi xolac ge tibed

6 Xame, a yetac mabu ên môp wê xam vông ge. Ên Anutu tyuc xam nêb xam tu i nue lec vizid wê Kilisi vông ge om xam vông i vin, lêc lutibed xam sea Anutu di la vac xolac bangwe. **7** Vixôhilôg, Yesu xolac tibed ge wê nôn, di kiyang baba ge o xolac nôn lêm. Lêc a nêl kiyang tige ên wê xomxo ya nêb ob pilepac Kilisi xolac i loc bangwe ge, om he la juda xam piyôp. **8** Lêc a ob nêl vô xam bê xe ti, me angela lag kisiinê ti obêc nêl xolac vô xam so xolac wê xe nêl vô xam ilage, od xomxo tige obêc kô myaviwen nipaên. **9** A nêl pyap vô xam di a ob nêl i tii vac vô xam bê xomxo ti obêc nêl xolac vô xam, lêc o nêl xolac tiyi xochê xolac wê xam ngô mi vông i vin ilage lêm ge, od xomxo tige obêc kô myaviwen lec nipaên wê i vông ge.

10 Kiyang wê a nêl ga, a nêl ên a nêb xomxo i yê a niviha, me a nêb Anutu i yê a niviha? A o vông ên a nêb xomxo i pimil a lêm. Ên a obêc nêb xomxo i pimil a ge od o tiyi wê a ob tu Kilisi nu yuac ti ge lêm.

Pol nêl i yuac sinale kitong

11 Xam lige, a ob nêl kitong vô xam bê xolac wê a nêl vô xam ilage, kehe o yêp vô xomxo kibun ga ti lêm. **12** Ên a o ngô vô xomxo ti lêm, di xomxo ti o nêl kitong vô a lêm. Nge, Yesu Kilisi vaci nêl kitong vô a.

13 Xam ngô mi xovô lec môp wê a vông ilage. Ên buc wê a timu vô Yuda vông môp ge, od a vông vevac vô Anutu nue vông vinê ên a nêb a ob kitya he vêl. **14** Di a vông nilôg la diluhu vô buge Yuda vông môp ên a nêb a ob timu vô môp wê he mi vông ge vihati, om a timu vô buge môp luu lige wê xe xôn lig tiyima ge vêl.

15 A môp bêge, mêtêc buc wê a gên dô vac tag xêyaa ge, od Anutu nêb ob vông niviha vô a, om vinoo a pyap ên nêb a tu i nu yuac ti. Mêgem buc wê Anutu vaci xovô ge **16** od hilung nu tuc Yesu vô a ên nêb a la nêl Yesu xolac kitong vô tibii madiluhu wê o Yuda lêm ge. Lêc buc tige, a o la kinêg xolac kehe vô xomxo ti lêm, **17** di a o la Jelusalem vô sinale wê

vông xolac tax ge ti lêm. Nge, a la dô vigwe Alebia, nang dêc lôm la vigwe Damaskas.

¹⁸ A dô klismas yon lam la vêt dì a lec mi la Jelusalem ên a nêb a ob la xê Pita, om a la dô hixôn i da yuu, ¹⁹ dì a o xê sinale baba hixôn lêm. Jems tibed wê il Apumtau Yesu li timuên ti ge, a xê i manôn. ²⁰ Kiyang wê a kivuu ga, o kiyang kityooën lêm. Nge, a le vô Anutu manôn dì nêl kiyang nôn vô xam.

²¹ Nang dêc a loc mì la vac vigwe levac Silia yuu Silisia, ²² om vô buc tige konglegesen toto vac vigwe Judia ge gên o yê a magnôn lêm. ²³ Dì he xovô bo tibed wê xomxo mi nêl ên nêbê, "Xomxo ti wê mi vông myavinê vô il ilage ên nêb ob kitya Yesu xolac vêt ge, gwêbaga nêl xolac tyo vô xomxo ên nêb he i vông i vin." ²⁴ He Judia ngô wê Anutu vông niviha vô a ge om he pimil Anutu.

2

Pol nêl i yuac kitong vô xomxo levac levac Jelusalem mi he ngô niviha

¹ Klismas vigê yuu dì tô mi la yuudiyuu (14) lam la vêt, dêc xii Banabas nêb xii ob lax mì la Jelusalem, om xii kô Taitas hixôn mì xen la. ² Anutu nêl vô a nêb a la Jelusalem om a la. A mila dô hixôn he Yuda levac vaci dì nêl xolac wê a la vông vô tibii wê o Yuda lêm ge kitong vô he. A nêl kitong vô he ên a nêb he i ngô dì tyuc lec, êdêc yuac wê a vông ilage di vông gwêbaga hixôn ge nôn i o ma lêm. ³ Om he tyuc lec yuac wê a la vông ge, dì Taitas wê lam hixôn xii ge, ge tibii Glik ti, lêc he o nêl nêb i gôl ninivi tiyi môp wê Yuda mi vông ge lêm. ⁴ Vixôhilôg, xomxo ya nêb Taitas i gôl ninivi lê, lêc he ge xomxo kityooën wê lam dô vac xe mahigun ên nêb he ob yê xe xôn ên pilepac môp niviha wê xe dô vac ge i vô nipaên. Ên Yesu Kîlisi piwelac il vêt ên Yuda vông môp wê ku il xôn ge dì vông il dô nidviha, lêc xomxo tigee nêb ob vông il lax mì la vac Yuda vông môp i tui vac, tiyi xocbê ob vông il lax dô vac kalabuhu ge. ⁵ He nêl bêge lê, lêc xe o tyuc lec kiyang wê he nêl ge lêm, ên xe nêbê kiyang nôn wê yêp vac xolac ge i yêp luta vô xam.

⁶ Mêd he Yuda levac ngô a kiyang lêc nêb ge pyap, dì he o nêl kiyang ba ya hixôn vô a lêm. Xomxo tigee he lê levac, lêc a xê he tiyi xocbê he o lê levac lêm, ên Anutu yê xomxo vihati tiyima. ⁷ Xomxo levac tigee o nêl kiyang ya vô a hixôn lêm, ên he xovô ên he nêbê Anutu vông a la ên nêb a la nêl xolac vô tibii wê o Yuda lêm ge i tiyi xocbê nêl vô Pita nêb i nêl xolac vô xomxo Yuda ge. ⁸ He xovô bêge, ên xêkizêc wê Anutu vông ge ngidu a xôn dì a la nêl xolac vô tibii ba, tiyi xocbê ngidu Pita xôn dì i nêl xolac vô he Yuda ge. ⁹ Mêgem xomxo levac yon, Jems yuu Pita dì Jon, yon xovô ên nêbê Anutu vông yuac tige vô a, mêgem yon pul xii Banabas vigêm hixôn xêyaa niviha, dì xe xôn hilu kiyang ên xe nêbê xe xôn ob vông yuac xolac, lêc xii Banabas ob la vô tibii ba, dì yon ob dô hixôn he Yuda. ¹⁰ Lêc yon nêl kiyang ti vô xii bêga ên nêbê xii ngidu he lie vông vinên wê nênsususmaen ge xôn. Môp tibêge wê a xê niviha om a vông nilôg la dilihu vô yuac tibêge.

Pol nêl Pita nênsusmaen kitong

¹¹ Buc wê Pita la dô Antiok ge, od a kunac i dì nêl i nênsusmaen vô i manôn. ¹² Pita vông môp bêga, wê dô Antiok ge od mi la vô tibii vông vinên wê o

Yuda lêm ge mì la mi ya hixôn he, lêc Jems lie vông vinên ya mila Antiok om Pita xona ên he, ên he nêl ên he nêbê tibii wê o Yuda lêm ge he i gôl ninivi i tiyi xochê he Yuda ge. Pita xona ên he, om sea môp wê la mi ya hixôn tibii vông vinên wê o Yuda lêm ge. ¹³ Mêd Yuda vông vinên wê dô Antiok ge, Pita didii he mi la vac môp tige dêc Banabas la hixôn. ¹⁴ Mêd a val xê môp wê he vông ge, lêc a xovô ên a nêbê he o vông môp ge niviha tiyi kiyang nôn wê xolac nêl ge lêm, om a nêl vô Pita vac he vihati mahigun ên a nêbê, “Ông ge Yuda ti, lêc ông o timu vô môp wê il Yuda vông ge lêm. Nge, ông la vô tibii baba môp. Lêc môp wê ông vông gwêbaga, tiyi xochê ông nêl ên ông nêbê tibii ba i timu vô Yuda vông môp hixôn. Letya nêb ông vông môp tibêge?” A nêl kiyang tibêge vô Pita.

Yuda hixôn tibii ba, Anutu yê he niviha ên wê he vông i vin Kilisi ge

¹⁵ Vixôhilôg, il ga xomxo Yuda wê mage buge ge Yuda, di il o tibii ba wê madiluhu ge lêm. ¹⁶ Lêc il xovô ên il nêbê môp wê il ob timu vô Moses xolac ge o tiyi wê ob vông il le niviha vô Anutu manôn ge lêm. Nge, xomxo ti obêc vông i vin Yesu Kilisi ge, od môp tige Anutu ob yê nêbê i xomxo niviha. Om il Yuda, il êno vông i vin Yesu Kilisi ên il nêb Anutu i yê il ên nêb il xomxo niviha. Di il ob nêl bê Anutu i yê il niviha lec wê il mi timu vô Moses xolac ge lêm, ên Anutu ob yê xomxo ti niviha ên wê viac Moses xolac niviha ge lêm. ¹⁷ Il sea Moses xolac di vông i vin Kilisi ên il nêb Anutu i yê il niviha. Lêc môp wê il sea Moses xolac ge vông il dô tiyi xochê tibii madiluhu wê lungên Moses xolac ge, om il ob nêl bê Kilisi vông il la vac môp nipaên, me? Ma vêl, il ob nêl bêge lêm. ¹⁸ A sea Moses xolac ên a xovô ên a nêbê o tiyi wê ob vông a le niviha vô Anutu manôn ge lêm. Om a obêc lax timu vô Moses xolac tii vac ge od obêc nêl a kitong bê a xomxo nipaên. ¹⁹ A o tiyi wê a ob timu vô Moses xolac vihati ge lêm, om xolac tige o tiyi wê ob vông a la dô magviha ge lêm. Mêgem gwêbaga a o dô vac xolac tige kwa ngibi lêm, ên a nêb a ob timu vô Anutu tibed di vông yuac wê i vông ge. Ge tiyi xochê a xib lec xax hixôn Kilisi, ²⁰ om gwêbaga a o dô magviha ya xêkizêc wê aca va vông ge lêm. Nge, a dô magviha ya xêkizêc wê Kilisi vông ge. Di môp yuu yuac vihati wê a vông mì dô vac gwêbaga, a vông nilôg la diluhu vô Kilisi wê Anutu nu ge, ên Kilisi ge wê xêyaa vin lec a di i yib lec a nêg nipaên. ²¹ Om a nêb a ob ngiloo Anutu vizid vêl di lax vac Moses vông xolac i tii vac lêm. Ên Moses xolac obêc vông Anutu yê il niviha ge, od yibên wê Kilisi yib lec xax ge obêc tiyi xochê susu pîleva.

3

Kiyang yuu, ngwe lec Moses xolac di ngwe lec vông vinên

¹ Xam Galesia, xam piyôp maén! Ên a nêl Yesu Kilisi môp wê lam yib lec xax pola ge kitong vô xam mì xam ngô tiyi xochê xam wê lec mammôn ge, lêc bêna lêc xam piyôp vô judajuda? ² Om a ob kinêg kiyang tibed vô xam bêga bê Myakilôhô Ngibua loc dô vac xam nilôm lec kehe bêna? Mêd loc dô vac xam nilôm ên wê xam timu vô Moses xolac ge, me? Ma vêl, Myakilôhô Ngibua loc dô vac xam nilôm ên wê xam ngô Yesu xolac mì vông i vin ge. ³ Lêc mêd xam piyôp ma om xam nêb xam ob timu vô môp tibêge? Ên xêkizêc wê Myakilôhô Ngibua vông ge, ge wê vông xam

tu Anutu nue ge, lêcom bêna lêc gwêbaga xam nêb xam ob vông yuac ya xêkizêc wê xacxam va vông ge? ⁴ Viyin levac wê xam kô lec vông vinên ge, mêd xam kilê pileva? Lêc a xovô ên a nêbê xam o kilê pileva lêm. ⁵ Môp wê Anutu vông Myakilôhô Ngibua lam vô xam di vông do levac vac xam mahigun ge, ge vông lec kehe bêna? Mêd vông ên wê xam timu vô Moses xolac ge, me? Ma vêl, vông ên wê xam ngô Yesu xolac mi vông i vin ge.

⁶ Xam xovô lec Eblaham wê kiyang nêl kitong mi i yêp vac xolac bêga nêbê, “Eblaham vông i vin Anutu xêkizêc om Anutu yê vông vinên wê i vông ge di nêl nêb Eblaham ge xomxo niviha.” ⁷ Mêgem xam xovô bêga bê xomxo wê vông i vin Anutu ge, ge wê tu Eblaham nue bue nôn. ⁸ Èn ilage Anutu xovô nêbê obêc timuên ge od obêc yê tibii wê o Yuda lêm ge niviha ên wê he vông i vin Yesu ge, om buc wê kiyang tyo gên o vô nôn lec lêm ge, od Anutu nêl kiyang vô Eblaham tax mi i yêp vac kipihac xolac bêga ên nêbê, “A obêc vông vizid niviha vô xomxo kibun ga vihati lec ông.” ⁹ Mêgem xomxo vihati wê vông i vin Anutu ge, he ob kô vizid niviha tiyi xocbê Anutu vông vô Eblaham ilage ên wê vông i vin ge.

¹⁰ Lêc xomxo wê xo ên nêb he ob timu vô Moses xolac êdêc dô maviha ge od he ob tulec myaviwen nipaên, ên kiyang yêp vac Moses xolac bêga ên nêbê, “Xomxo wê o timu vô xolac ga vihati yang mi vông i vô nôn lec lêm ge od he ob yib mi la vac nipaên.” ¹¹ Di kiyang ngwe yêp vac xolac bêga ên nêbê, “Xomxo wê vông i vin Anutu ge, ge wê Anutu ob yê ên nêb he xomxo niviha wê ob dô maviha.” Mêgem kiyang tige ob vông xovôen vô il bêga bê Anutu o yê xomxo niviha ên wê he timu vô Moses xolac ge lêm. ¹² Èn môp wê xomxo timu vô Moses xolac ge, di ngwe wê xomxo vông i vin Kilisi ge, yuu xôn o tiyima lêm. Èn kiyang yêp vac xolac bêga ên nêbê, “Xomxo ti obêc viac Moses xolac vihati niviha ge od obêc la dô maviha.”

¹³ Moses xolac nêl kitong nêbê il ob kô myaviwen lec nipaên wê il vông ge. Mêlec Kilisi vô il vêl ên myaviwen tige, ên ici va kô myaviwen nipaên wê il vông ge, tiyi xocbê kiyang wê yêp vac Moses xolac bêga nêbê, “Xomxo wê yux lec xax ge, ge wê kô myaviwen nipaên vô Anutu.” ¹⁴ Anutu vông bêge, ên nêb vizid niviha wê hilu vô Eblaham ge i vô nôn lec vô tibii ba hixôn ên wê he vông i vin Yesu Kilisi ge, di nêl ên nêb Myakilôhô Ngibua wê Anutu nêb ob vông i lam ge, i lam dô hixôn il ên wê il vông i vin ge.

Moses xolac o tiyi wê ob kitya Anutu kiyang wê hilu vô Eblaham ge vêl lêm

¹⁵ Xam lige, kiyang wê a ob nêl ga, a ob tixuu lec il kibun ga vông môp, xocbê xomxo ngwe obêc hilu kiyang vô xomxo ngwe di yuu xôn lee yuu di kivuu lec kipihac mi i yêp ge od xomxo ti o tiyi wê ob pwoo kiyang tige vac, me kivuu kiyang ya hixôn ge lêm. ¹⁶ Kiyang tige tiyi xocbê Anutu hilu vô Eblaham ên nêb ob vông vô i hixôn i bue timuên ti ge. Kiyang tige, Anutu o nêl ên nêb ob vông vô Eblaham bue vihati lêm. Nge, ob vông vô bu timuên tibed. Ge nêl lec Yesu Kilisi. ¹⁷ Mêgem kiyang wê a nêl lec xomxo yuu wê hilu kiyang ge, kehe bêga nêbê Anutu hilu kiyang vô Eblaham ilage ên nêb obêc vô nôn lec timuên. Pyap mêd klismas tibeac hiwocên xocbê 430 ge lam la vêl di Anutu vông xolac vô Moses timuên. Om xolac wê Anutu vông vô Moses ge o tiyi wê ob kitya kiyang wê Anutu

hilu vô Eblaham ge vêl ge lêm. ¹⁸ Èn vizid niviha wê Anutu hilu pyap nêb ob vông ge, Anutu obêc vông vô xomxo ên wê he timu vô Moses xolac ge od obêc kiyang wê Anutu hilu vô Eblaham ge vêl. Lêc o bêge lêm, ên vizid wê Anutu nêb ob vông ge, Anutu vông i tiyi kiyang wê hilu vô Eblaham ge.

Yuac wê Moses xolac vông ge

¹⁹ Mêgem Anutu vông xolac vô Moses, kehe lec vatya? Kehe bêga nêbê Anutu hilu kiyang vô Eblaham pyap, dêc vông xolac vô Moses hixôn timuên, ên nêb xolac i hilung xomxo nêni nipaên i yêp seac. Om Anutu nêl ên nêb Moses vông xolac i yêp di i miloc vô buc wê Eblaham bu tyo obêc val lec ge. Xomxo tige wê Anutu hilu kiyang vô Eblaham ên nêb obêc vông i lam ge. Moses xolac tige, Anutu vaci o nêl vô xomxo lêm. Nge, Anutu vông angela lam nêl xolac tige vô Moses, pyap dêc Moses lam nêl vô he Islel. ²⁰ Dom kiyang wê Anutu hilu vô Eblaham ge, xomxo ti o kô kiyang tige mi la nêl lêm. Nge, Anutu vaci tibed wê nêl i kiyang.

²¹ Om Moses xolac ob vông vevac vô kiyang wê Anutu hilu pyap ge, me? Ma vêl. Èn Moses xolac obêc vông il dô madviha ge od Anutu obêc yê il nêb il xomxo niviha ên wê il timu vô xolac tige. ²² Lêc o bêge lêm, ên xolac nêl bêga nêbê nipaên hivun xomxo vihati xôn tiyi xochê he dô vac kalabuhu ge. Môp yêp bêge, ên Anutu nêb xomxo obêc vông i vin Yesu Kilisi ge od ob kô nôn niviha wê Anutu hilu pyap nêb obêc vông vô he wê vông vinêng ge.

²³ Lêc buc wê kiyang vông vinêng gên o val lêm ge, om Moses xolac ku il xôn tiyi xochê il dô vac kalabuhu ge, di i val vô buc wê kiyang vông vinêng val le seac pyap. ²⁴ Mêgem yuac wê Moses xolac vông ge bêga nêbê yê il xôn di diidii il mi la vô Kilisi ên nêb Anutu i yê il niviha ên wê il vông i vin Kilisi ge. ²⁵ Gwêbaga buc wê il ob vông i vin Kilisi ge val pyap om il ob dô vac Moses xolac kwa ngibi di i viac il i tii vac nang lêm.

²⁶ Xam vihati tu Anutu nue pyap ên wê xam vông i vin Yesu Kilisi ge. ²⁷ Di xam lipac mia lec Kilisi lê om xam xôn Kilisi tiyima. ²⁸ Di xam vihati tu nôn tibed ên wê xam vông i vin Yesu Kilisi ge. Om il ob xê il i tiyi xochê kidu kidu lêm, xochê Yuda yuu tibii ba, di xomxo pileva yuu xomxo wê lê levac ge, di vêx yuu vux toto ge lêm. Èn il vihati ga, il tiyima. ²⁹ Xam tu Kilisi xe, mêgem xam tiyi xochê Eblaham nue bue wê xam obêc kô vizid niviha wê Anutu hilu vô Eblaham ge.

4

Il tu Anutu nue nôn

¹ Kiyang wê a ob nêl ge bêga bê xomxo ti ma obêc nêl i lê lec susu vihati pyap, lêc xomxo tyo gên dô nipwo ge od ob dô tiyi xochê xomxo yuac ti, ² di ob dô vac xomxo ngwe kwa ngibi di he i viac i hixôn susu vihati wê ma nêl i lê lec ge di i miloc vô buc wê ma tung ge. ³ Di il ga, il tiyi lec bêge. Èn ilage il dô tiyi xochê xomxo wê gên nipwo ge, ên il dô vac môp yuu xovôôn kibun ga kwa ngibi. ⁴ Lêc buc wê Anutu vinoo pyap ge om vông nu tuc lam kibun mi vêx ti kô i di i timu vô Moses vông xolac, ⁵ ên nêb ob piwelac il vêl ên Moses xolac wê ku il xôn ge di vông il tu Anutu nue.

⁶ Il tu Anutu nue pyap, mêgem Anutu vông Myakilôhô Ngibua wê nu Yesu vông ge lam dô vac il nilôd om il keac ên il nêbê, "Mag." ⁷ Mêgem

xam xovô bêga bê xam ob tu nue yuac tii vac nang lêm. Ên xam tu Anutu nue nôn, om xam ob kô vizid wê Anutu nêl i nue lê lec ge.

Tibii Galesia vông Pol nilô vô viyin

⁸ Vô buc ilage, xam lungên Anutu om xam dô vac anutu mayibên wê nôn maên ge kwa ngibi. ⁹ Lêc gwêbaga xam xovô Anutu pyap, me a ob nêl ngwe hixôn bêga bê Anutu xovô xam pyap. Lêc bêna lêc xam vông xam lax vac môt wê nôn maên di o xêkizêc lêm ge? Xam nêb xam ob lax mi la vac kalabuhu i tii vac nang, me? ¹⁰ Ên xam pimil buc levac yuu da déc dentuc paha yuu klismas paha ên xam nêbê Anutu i yê xam nêb xam xomxo niviha. ¹¹ Om a xo xam di a nilôg viyin, ên a nêb mêd yuac levac wê a vông vac xam mahigun ge, mêd a vông pileva di nôn ma.

¹² Xam lige, a o dô vac Moses xolac kwa ngibi lêm, om a kitaa xam bê xam dô i tiyi xochê a dô ge. Ên ilage a dô tiyi xochê xam dô ge. Ilage xam o vông nipaên ti vô a lêm. ¹³ Ên xam xovô pyap ên xam nêbê ilage yidac vông a di a o tiyi wê a ob la tup vac vigwe ge lêm, om a dô hixôn xam di vông xolac vô xam taxlee. ¹⁴ Mêd yidac tige vông yuac levac vô xam, lêc xam o xona ên a lêm, di xam o vô nîmim vô a lêm. Nge, xam kô a lec niviha tiyi xochê xam kô angela ti lec, me xam kô Yesu Kilisi vaci lec ge. ¹⁵ Lêc gwêbaga xam xêmyaa niviha tyo yêp gê tina? Vixôhilôg, a xovô ên a nêbê ilage xam xêmyaa vin lec a luu vêl, om xam vông xam nilôm la yadiluhu vô a. ¹⁶ Lêc gwêbaga, mêd xam wê a nipaên ên wê a nêl kiyang nôn vô xam ge, me?

¹⁷ Xomxo ya la pimil xam di nêl kiyang niviha vô xam ên nêbê xam vông i vin he vya, lêc he o vông hixôn nilô niviha lêm. Nge, he nêb he ob vô xam vêl ên a, ên xam pimil heche va. ¹⁸ Vixôhilôg, môt wê xomxo ob pimil xam di nêl kiyang niviha vô xam ge, he obêc vông hixôn nilô niviha ge od obêc niviha, tiyi wê he ob vông lec buc vihati, buc wê a dô hixôn xam ge di buc wê a dô hixônê xam ma ge. ¹⁹ Xam nuge, xam vông a nilôg vô viyin levac nang, tiyi xochê vêx ti wê nu ob yubac ge om dô vac viyin ge. Om a ob kilê viyin tige di i loc tyip lec buc wê xam obêc vông xam la diluhu vô Kilisi ge. ²⁰ Xame, a obêc dô hixôn xam ge od a ob nêl kiyang bôbac wê ob vô niviha vô xam ge, lêc a o dô hixôn xam lêm, om a nilôg xo kiyang tibeac ên a nêb a ob ngidu xam xôn ya vatya?

Kiyang pilepacên lec Hega yuu Sela

²¹ Om xam wê xam nêb xam ob dô vac Moses xolac kwa ngibi ge, xam nêl lê. Xam xovô kiyang wê xolac tige nêl ge, me? ²² Ên kiyang yêp vac Moses xolac bêga nêbê Eblaham nu yuu, lêc vêx wê vông yuac vô Eblaham ge lê nêbê Hega kô ngwe, di vinê Sela kô ngwe. ²³ Om nu ngwe wê vêx yuac kô ge, kô i tiyi xovôên wê xomxo vông ge, di nu ngwe wê vinê Sela kô ge, kô i tiyi kiyang wê Anutu hilu vô Eblaham ge. ²⁴⁻²⁵ Kiyang ga, kiyang pilepacên lec vêx yuu ge. Ên vêx yuu ge tixuu lec kiyang yuu wê Anutu hilu vô xomxo ge. Om vêx ngwe wê Hega ge, tiyi xochê kiyang ngwe wê Anutu vông vô Moses lec kitôn Sainai vac vigwe Aleibia ge, om Hega nu ge wê ob vông yuac pileva vô xomxo ge. Hega ge tiyi xochê vigwe Jelusalem gwêbaga, ên xomxo Jelusalem dô vac Moses xolac kwa ngibi tiyi xochê he tu tibii yuac pileva ge. ²⁶ Di vêx ngwe wê Sela ge tiyi xochê Jelusalem paha ngwe wê yêp kisii ganê. Il dô nidviha di il o dô tiyi xochê tibii yuac pileva

ge lêm, om Sela ge tiyi il tag. ²⁷ Tiyi xocbê kiyang wê yêp vac xolac bêga ên nêbê,

“Ông vêx wê ông o kô nipwo ti lêm ge, ông xêmyaa i vô niviha. Di ông vêx wê ông o yaxên myavinê wê nipwo kê ông ge lêm, ông pimil di vô didun hixôn xêmyaa niviha. Èn ông vêx wê ông le môô ge, nume obêc tibeac luu vêx wê dô hixôn liya ge nue vêl.” Xolac nêl bêge.

²⁸ Xam lige, xam tiyi xocbê Aisak wê ta Sela kô i tiyi kiyang wê Anutu hilu ge, ên xam tu Anutu nue tiyi xocbê kiyang wê hilu pyap ên nêb ob vô nôn lec ge. ²⁹ Léc Hega nu Ismael wê ta kô i tiyi xovôen wê xomxo kibun ga vông ge, vông vevac vô Sela nu Aisak wê ta kô i tiyi xocbê kiyang wê Myakilôhô Ngibua nêl ge. Mêd môt tibêge yêp gwêbaga hixôn. ³⁰ Mêlec xolac nêl bêna lec kiyang tige? Kiyang yêp bêga nêbê,

“Tii vêx yuac tige yuu nu i loc vêl, ên vêx yuac tige nu lê ob lec susu wê ma Eblaham vông ge ti lêm. Nge, Sela nu Aisak lê ob lec susu wê Eblaham vông ge.”

³¹ Om xam lige, il ob xovô bê il o tiyi xocbê vêx wê vông yuac pileva ge nue lêm. Nge, il tu vêx wê Eblaham vinê bôbac ge nue.

5

Kilisi piwelac il vêl pyap om il ob viac ned môt i niviha

¹ Kilisi piwelac il vêl ên Moses xolac ên nêb il o dô vac kwa ngibi i tii vac lêm. Mêgem xam le pilahi, di le i lêc vông xomxo i lii viyin lec xam i tii vac lêm.

² Xam ngô lê. A, Pol, a ob nêl vô xam bê xam obêc nêb xomxo i gôl xam nimnivi ge od yuac wê Kilisi vông ge ob vô niviha vô xam lêm. Ma vêl.

³ Om a ob nêl vô xam i tii vac bê xam obêc tyuc lec ên xam nêb xomxo i gôl xam nimnivi i tiyi xocbê kiyang wê yêp vac Moses xolac ge, od kiyang yêp bêga nêbê xam lêc timu vô môt wê Moses xolac nêl ge vihati hixôn.

⁴ Léc xam wê xam nêb xam ob timu vô Moses xolac ên Anutu i yê xam niviha ge, ge xam tax xam tip vêl ên Kilisi di vô xam vêl ên vizid wê Anutu vông ge. ⁵ Léc il ga, il vông i vin ya xêkizêc wê Myakilôhô Ngibua vông ge, om il dô bin wê Anutu ob yê il nêb il xomxo niviha ge. ⁶ Om il wê il vông i vin Yesu Kilisi ge, il ob xê môt ninivi gôlén yuu môt ninivi gôlén maén i tiyi xocbê susu pileva. Èn môt wê nôn ge bêga nêbê vông vinê wê il vông ge ob vô nôn niviha bêga bê il xêdyaa i vin lecma.

⁷ Xame, ilage xam dô nimviha vac môt vông vinê. Léc gwêbaga kiyang tina wê le vac xam xôn di vông xam sea kiyang nônê? ⁸ Piyôp tibêge o lam vô Anutu lêm, ên Anutu ge wê tyuc xam nêb xam tu i nue. ⁹ Yis nipwo tya tiyi wê ob vông blet vuac miî vô levac ge, tiyi xocbê kiyang kityooen wê xomxo ti nêl ge obêc vô levac di hivun xomxo vihati xôn. ¹⁰ Léc a vông i vin ên a nêbê Apumtau obêc ngidu xam xôn di xam ob vông i vin kiyang wê a nêl ga, di kiyang ba ge, xam ob sea i loc yêp xel. Di xomxo ti wê loc juda xam piyôp ge, a lungén, ge xomxo levac me xomxo pileva, léc a ob nêl bêga bê obêc kô myaviwen lec nêni nipaén wê i vông ge.

¹¹ Xam lige, a obêc nêl vô xomxo bê he i gôl ninivi ge od he Yuda obêc vông viyin ti vô a lêm. Èn a obêc nêl bê he i gôl ninivi ge od kiyang wê a nêl lec wê Yesu yib lec xax ge ob vông he yê a nipaén lêm. Léc kiyang

tige o tibêge lêm, om he yê a nipaên dî vông viyin vô a. ¹² Om xomxo wê loc juda xam piyôp ge, a nêb he i loc gôl ninivi vihati vêl.

¹³ Xam lige, vixôhilôg, Anutu piwelac xam vêl ên xolac wê Moses ge di vông xam dô nimviha. Léc xam o lêc xo bêga bê, “Gwêbaga xe dô vac niviha di kiyang ti o hôm xe xôn lêm, om xe ob vông môp vaxvax i tiyi xocbê xovôen wê xe vông ge”, xam o lêc xo kiyang tibêge lêm. Xam xêmyaa i vin lec lime vihati di xam vông môp wê ob ngidu he xôn ge. ¹⁴ Ên xolac vihati yang wê Anutu nêl vô Moses ge, kehe levac tibed bêga nêbê, “Ông xêmyaa i vin lec xomxo vihati i tiyi xocbê ông xêmyaa vin lec ôcông va ge.” ¹⁵ Léc xam xêmyaa obêc vô myavinê vóma di xam vông nipaên vóma ge od xam xona nêm, ên xam obêc kitya xam vihati vêl.

Môp wê Myakilôhô Ngibua vông ge hixôn môp nipaên wê xomxo nilô xovô ge

¹⁶ Mêgem a ob nêl vô xam bê xam timu vô môp wê Myakilôhô Ngibua vông ge, di xam o lêc timu vô môp nipaên wê xacxam va xovô ên nêb xam ob vông ge lêm. ¹⁷ Ên môp nipaên wê xomxo nilô xovô ge vông vevac vô Myakilôhô Ngibua, di môp wê Myakilôhô Ngibua nêb il vông ge vông vevac vô môp nipaên wê xomxo xovô ge, om yuu vông vevac vóma, om môp wê xam nêb xam ob vông ge, xam o tiyi wê xam ob vông ge lêm. ¹⁸ Léc xam obêc dô vac môp wê Myakilôhô Ngibua vông ge od xam ob dô vac Moses xolac kwa ngibi lêm.

¹⁹ Xam xovô pyap bê môp nipaên wê xomxo vaci xovô ge yêp bêga nêbê yôdac vêx yuu vux, nilô ngaên yôdac vêx yuu vux, di vông yôdac vaxvax, ²⁰ di vông nilô la vô anutu kityooën, di vông yevac, di xêyaa vô nipaên vóma, di vông vevac vóma, di yetac ên xomxo ngwe susu, di kunacma, di vông môp wê ob vô niviha vô heche va ge, di yêma nipaên mi dô kidu kidu, ²¹ di yêma tiyiên ma, di num levac mi vô mavmav di yoo di vông lilo yacyac, di vông môp nipaên toto ge tibeac hixôn. A nêl vô xam ilage di a ob nêl vô xam gwêbaga i tui vac nang bê xomxo wê mi vông môp nipaên tibêgee ge ob la dô hixôn Anutu vac i ben lêm.

²² Dom môp wê Myakilôhô Ngibua vông ge ob vô nôn lec bêga bê môp xêyaa vin lec maên, di xêyaa niviha, di kiyang malehe, di vông niviha vac nipaên, di vông niviha vô xomxo mi ngidu he xôn, di timu vô môp niviha tiyi buc vihati, ²³ di nêl kiyang malehe vô xomxo, di viac he niviha ên môp nipaên vihati. Môp niviha tibêgee, kiyang ti o vibu môp tibêgee lêm. ²⁴ Il wê il tu Yesu Kilisi xe ge, il hi nilôd yuu xovôen nipaên wê kidu il ge lec xax pola mi i yib mi la vêl.

²⁵ Myakilôhô Ngibua vông il dô madviha, mêtgem il ob timu vô môp wê Myakilôhô Ngibua vaci vông ge. ²⁶ Om il ob yong icil va lêd lêm, di il ob vông lige ni i nyag vô il lêm, di il ob xê lige ngwe nipaên lec he susu lêm.

6

Il ob ngidu lige wê kilê viyin ge xôn

¹ Xam lige, lime vông vinên ti obêc vông môp nipaên ti ge od xam wê xam mi timu vô môp wê Myakilôhô Ngibua vông ge, xam lum nêl kiyang malehe vô i di kô i mi lôm vac môp niviha. Di xam toto ge, xam xona nêm, ên Seten i o lêc didii xam vac môp nipaên hixôn lêm. ² Di viyin obêc tulec lime ti ge od xam kilê viyin hixôn i, ên môp tibêge wê ob vông Kilisi xolac

vô nôn lec. ³ Xomxo ti obêc yong i nêb i xomxo levac ge od ge kityoo nên, ên i o xomxo levac lêm. ⁴ Om xomxo toto ge he i yaxêñ môp yuu yuac wê he vông ge bê niviha me nipaêñ. Ên obêc vông bêge ge od he xêyaa ob vô niviha lec yuac niviha wê he toto vông ge, di he ob tixuu môp wê he vông ge lec môp wê xomxo ya vông ge lêm. ⁵ Ên il toto ge vihati, Anutu obêc yaxêñ yuac wê il vông ge.

⁶ Om xomxo wê mi nêl xolac vô xam ge, xam vông susu niviha wê xam vông ge ya vô he ên i ngidu he xôn.

⁷ Xam o lêc xo bê xam ob kityoo Anutu lêm. Ên xomxo ti o tiyi wê ob kityoo Anutu ge lêm. Ên xomxo obêc xin vê ge od ob kô nôn i tiyi vê wê xin ge. ⁸ Om xomxo ti obêc timu vô môp nipaêñ wê ici va xovô ge od ob kô nôn nipaêñ bêga nêbê obêc yib mi la vac vigwe nipaêñ, lêc obêc timu vô môp niviha wê Myakilôhô Ngibua vông ge od obêc kô nôn niviha wê Myakilôhô Ngibua vông ge bêga nêbê ob la dô maviha luta lêc luta. ⁹ Om il nid ob ma lec môp niviha wê il ob vông ge lêm. Ên il obêc vông yuac xêkizêc di il nid obêc ma lêm ge od il obêc kô nôn niviha lec timuêñ. ¹⁰ Mêgem môp obêc yêp wê il ob vông niviha vô xomxo ge od il ob vông, lêc il ob vông niviha vô lige vông vinêñ i luu vêl.

Pol kiyang timuêñ wê ici va kivuu ya vigê ge

¹¹ Xam wê a kiyang wê a kivuu levac levac ga. Ga aca va kivuu ya vigêg vô

xam. ¹² Om xam ngô lê. Xomxo wê kidu xam nêb xam gôl nimnivi ge, he vông ên he nêb xomxo i pimil he di vông lê levac vô he lec môp kibun ga. He vông bêge, ên he xo ên he nêbê he obêc nêl lec wê Kilisi yib lec xax pola ge od tibii obêc vông viyin vô he. ¹³ Xomxo tigee gôl he ninivi lê, lêc he o timu vô môp vihati wê Yuda vông ge lêm. Lêc he nêb he ob gôl xam nimnivi, ên kô lê levac lec wê xam vông i vin he vya di gôl nimnivi ge. ¹⁴ Di a ga, a ob yong a lec kiyang tibed bêga nêbê il Apumtau Yesu Kilisi yib lec xax pola, om ge tiyi xocbê môp yuu xovôêñ kibun ga yib lec xax hixôn, om ti o tiyi wê ob ku a xôn ge lêm, di a êno xê môp tige tiyi xocbê susu mayibêñ ge. ¹⁵ Om môp ninivi gôlêñ yuu ninivi gôlêñ maêñ, yuu xôn susu pileva, lêc kiyang tibed wê nôn ge bêga nêbê Anutu vông il vô paha lec. ¹⁶ Om xam wê xam vông i vin kiyang tiga ge, kiyang malehe yuu xêyaa vin lecén i hivun xam xôn, hixôn he Islele wê Anutu nue nôn ge.

¹⁷ Om xomxo ti i o lêc vông viyin vô a lec kiyang tige i tii vac lêm, ên viyin wê xomxo vông vô a lec Yesu lê ge, piyaha yêp lec a nignivi pyap.

¹⁸ Xam lige, vizid niviha yuu xêyaa vin lecén wê il Apumtau Yesu Kilisi vông ge i viac xam. Kiyang nôn.

EPESAS Kipihac wê Pol kivuu vô tibii Epesas ge

¹ A, Pol wê Anutu vinoo a ya xovôên wê ici va vông ge ên nêb a tu Yesu Kilisi nu sinale ti. A kivuu kiyang tiga vô xam Epesas wê xam tu Anutu nue dì xam vông i vin Yesu Kilisi ge. ² Mag Anutu yuu Apumtau Yesu Kilisi, yuu i vông vizid niviha hixôn kiyang malehe i lam dô hixôn xam.

Anutu vông vizid niviha vô il

³ Il ob pîmil Anutu wê il lig Apumtau Yesu Kilisi ma yuu Anutu. Il tu Kilisi nue, om Anutu vông vizid kisii ganê vihati vô il ên nêb he i ngidu il xôn. ⁴ Taxlee ilage wê Anutu gên o tung lag yuu kibun lêm ge od vinoo il pyap lec yuac wê Kilisi ob vông ge ên nêb il tu xomxo ngibua wê nipaên ti ob yêp vô il lêm ge. ⁵ Anutu xêyaa vin lec il, om ilage ici va vinoo il pyap ên nêb il tu i nue lec yuac wê Yesu Kilisi vông ge. Anutu vông bêge ya xovôên wê ici va vông ge. ⁶ Om il ob pîmil Anutu ên vizid niviha yang wê vông pileva vô il ge. Anutu vông vizid tige vô il lec yuac wê nu tuc vông vô il ge. Anutu xêyaa vin lec nu tuc.

⁷ Anutu xo vigwe pisiv ên il luu vêl, om vô il vêl ên il nêd nipaên ya Yesu hi di kitya il nêd nipaên vêl. ⁸ Om wê xo vigwe pisiv ên il ge, ge vizid niviha wê Anutu vông i lam hivun il xôn, di Anutu vông piyôp hixôn xovôên vihati vô il. ⁹ Ilage Anutu xovô yuac wê Kilisi ob vông ge, lêc yuac tige yêp xôpacên vô Anutu vaci. Dêc timuên lêc Anutu vông i tiyi xovôên wê yêp vô i ge om hilung xovôên tige lam yêp seac vô il ên nêb il xovô. ¹⁰ Xovôên wê yêp vô Anutu ge bêga nêbê buc wê Anutu vinoo pyap ge od obêc kituc xomxo hixôn susu vihati wê dô lec kibun di wê dô vac lag ge lam dô vac Kilisi kwa ngibi di i ob tu he nêb bazub.

¹¹ Anutu vông ya xovôên wê i vông ge om vinoo il ên nêb il tu i nue lec yuac wê Kilisi vông ge. Ên Anutu obêc nêl kiyang ti ge od obêc vông i vô nôn lec xocbê kiyang wê yêp ilage. ¹² Anutu vông xolac mug lec xe Yuda taxlee di vinoo xe ên nêb xe pîmil Anutu wê xêseac kehe ge.

¹³ Xam êno, xam ngô Anutu kiyang nôn. Kiyang tige kiyang niviha wê nêl bêga ên nêbê Kilisi vô il vêl ên il nêd nipaên. Xam ngô di vông i vin Kilisi di tu i nue, om Anutu vông i tiyi kiyang wê hilu pyap ilage di vông Myakilôhô Ngibua lam dô vac xam nilôm tiyi xocbê Anutu vinoo xam pyap. ¹⁴ Myakilôhô Ngibua dô vac il nilôd, om vông xovôên vô il bêga nêbê Anutu ob kô il mi il la dô hixôn i. Di Myakilôhô Ngibua obêc dô vac il nilôd di i loc tyip lec buc timuên wê il ob la vô Anutu ge di ob sea il lêm. Om il ob xovô vizid wê Anutu vông vô il ge di pîmil i lê i vô levac.

Pol kitaa vô Anutu ên nêbê i vông xovôên vô tibii Epesas

¹⁵ A ngô wê xam vông i vin Apumtau Yesu di xam xêmyaa vin lec xomxo vông vinên vihati ge, ¹⁶ om a pîmil Anutu tiyi buc vihati ên xam di a o sea lêm, di a mi kitaa vô Anutu ên a nêb i ngidu xam xôn. ¹⁷ Anutu ge il Apumtau Yesu Kilisi Anutu i di il Mag wê xêseac kehe ge. Om a kitaa vô Anutu ên a nêbê i vông xovôên niviha wê i vông ge vô xam di nêl i kiyang kehe i yêp seac vô xam ên xam ngô di xovô Anutu. ¹⁸ A kitaa ên a nêb Anutu i vông xam piyôp i yêp seac ên xam xovô nôn niviha wê Anutu nêl

ên nêb obêc vông vô xam ge, dì xam xovô vizid niviha vihati wê Anutu nêl xam lêm lec pyap mi i dô bin xam wê xam tu i nue ge. ¹⁹ Dì a kitaa vô Anutu ên a nêbê i vông xovôên vô xam ên xam xovô bêga bê xêkizêc wê Anutu vông ge i ngidu il wê il vông i vin ge xôn. Xêkizêc wê Anutu vông ge luu xêkizêc vihati vêl, om il o tiyi wê il ob yaxêni mi xovô ge lêm. Xêkizêc levac tige vông yuac vac il nilôd, ²⁰ dì Anutu tipi vô Kilisi kidi lec maviha vac yibêni ya xêkizêc tige dì vông i la dô vô Anutu vigê hiyôv gê kisii ganê. ²¹ Mêgem gwêbaga Kilisi tu levac mi nginoo xomxo levac kibun ga vêl, dì nginoo angela hixôn vimwo nipaên vihati vêl, dì nginoo susu hixôn xomxo vihati vêl, di kô lê levac dì nginoo xomxo lê levac vihati vêl, he wê dô gwêbaga hixôn he wê ob dô timuên ge. ²² Anutu vông xomxo yuu susu vihati la dô vac Kilisi kwa ngibi, dì vông Kilisi tu xomxo vông vinêni vihati bazub. ²³ Kilisi hixôn xomxo vông vinêni vihati tiyi xocbê nôn tibed, lêc Kilisi tu bazub. Dì Kilisi viyum xomxo hixôn susu vihati xôn di ici va tiyi lec vihati, dì i dô vac xomxo vông vinêni nilô hixôn.

2

Anutu tipi vô il dô madviha hixôn Kilisi

¹ Ilage xam mi vông môp nipaên yuu soên viyang viyang ge, mêgem xam dô tiyi xocbê xam wib dì la dô teva ên Anutu. ² Vô buc tigee xam la dô vac môp kibun ga, dì timu vô môp wê Seten vông ge. Seten ge wê tu vimwo nipaên vihati nêni levac, dì gwêbaga i vông yuac vac he wê pwoo Anutu kiyang vac ge nilô. ³ Ilage il vihati dô tiyi xocbê xomxo tibêgeê dì timu vô môp nipaên kibun ga, dì vông môp nipaên tiyi xocbê il nilôd kidu il ên nêb il vông ge, di il vông môp nipaên tiyi xocbê il nidnivi yuu piyôp xovô ên nêb il vông ge. Om Anutu xêyaa vô myavinê vô il hixôn xomxo nipaên vihati ên nêb obêc kitya il vêl.

⁴⁻⁵ Ilage môp nipaên wê il vông ge vông il dô teva ên Anutu tiyi xocbê il xib. Lêc Anutu xo vigwe pisiv ên il luu vêl, dì xêyaa vin lec il luu il nêd nipaên vêl, om vông il dô madviha hixôn Kilisi. Môp tibed wê Anutu xo vigwe pisiv ên il ge, ge wê vô il vêl ên il nêd nipaên. ⁶ Anutu tipi vô il kidi lec madviha hixôn Kilisi dì il tu Kilisi xe, om vông il lêd vô levac hixôn Yesu Kilisi gê kisii ganê. ⁷ Anutu vông bêge ên nêb xomxo vihati wê dô gwêbaga hixôn he wê obêc dô timuên ge, he i xovô bêga bê Anutu vông vizid niviha vô il. Vizid niviha tige bêga nêbê Anutu xo vigwe pisiv ên il dì vông Yesu Kilisi lam vô il vêl ên il nêd nipaên. Om vizid niviha tige luu vizid vihati yang vêl. ⁸ Il vông i vin Kilisi om Anutu xo vigwe pisiv ên il dì vô il vêl ên il nêd nipaên. Lêc Anutu o vông vizid tige vô il ên môp niviha ti wê il vông ge lêm. Nge, vông pileva vô il. ⁹ Èn il nêd yuac niviha ti yêpêni ma wê ob kisuu Anutu ên i kitya il nêd nipaên vêl ge. Om xomxo ti o tiyi wê ob yong i vô Anutu ge lêm. ¹⁰ Anutu vaci tung il vihati dì vông il vô paha lec, lec yuac wê Kilisi vông ge, ên nêb il timu vô môp niviha vihati wê i viac pyap ila ên nêb il ob la vac ge.

Kilisi kituc xomxo viyang yuu tu nôn tibed

¹¹ Xam Epesas ge, xam o xomxo Yuda lêm. Nge, xam tibii ba. Xe Yuda, xe mi gôl nimnivi, ên môp tige wê Anutu vông vô xe Yuda ge. Om xe mi nêl kiyang lec xam bêga ên xe nêbê xam ge xomxo wê gôlên nimnivi ma ge. Om xam xovô bê ilage xam gên dô mamdiluhu. ¹² Vixôhilôg, ilage xam

le teva ên Kilisi, dì xam dô ninya ên xe Islel. Di Anutu hilu kiyang ên nêb obêc vông vizid niviha vô xe Yuda, lêc o nêl bêga vô xam tibii ba hixôn lêm. Xam dô kibun ga, lêc xam o dô bin susu niviha ti wê ob val vô xam timuên ge lêm, dì xam lungên Anutu. ¹³ Ilage xam dô teva ên Anutu, lêc Kilisi lam yib dì kipyax i hi sea ên nêb ob didii xam lôm vô Anutu. Om gwêbaga xam lam dô kwabo vô Anutu lec yuac wê Yesu Kilisi vông ge. ¹⁴ Èn Kilisi vaci tu il nêd malehe kehe. Ilage xe Yuda hixôn xam tibii ba, il xêdyaa vô nipaên vôma. Om môp wê il xêdyaa vô nipaên vôma ge tiyi xocbê xenac levac ti wê le vac il mahigun, om xe Yuda dô vilu dì xam tibii ba dô vilu. Lêc Yesu lam yib ên il vihati, mègem dii xenac tige vêl dì vông xe Yuda hixôn xam tibii ba il xôn dô kidu tibed, ¹⁵ ên Yesu kitya Moses xolac hixôn kiyang yuu môp wê yêp vac ge vihati vêl. Yesu vông bêge ên nêb ob kituc xe Yuda hixôn xam baba dì vông il tu nôn paha tibed, om vông il xêma niviha mi dô vac kiyang malehe nilô. ¹⁶ Yesu yib lec xax ên nêb ob vông il vihati tu nôn tibed dì didii il xôn mi la vô Anutu. Om kitya môp wê il xêma nipaên ge vêl. ¹⁷ Kilisi lam nêl kiyang niviha vô il bêga nêbê ob vông il vihati dô vac kiyang malehe nilô. Om lam nêl kiyang bêge vô xam tibii ba wê ilage xam dô teva ên Anutu ge, dì nêl vô xe Yuda wê xe dô kwabo vô Anutu ge hixôn. ¹⁸ Xe Yuda hixôn xam tibii ba ge, Myakilôhô Ngibua tibed tax vuayen ên môp wê il xôn ob la vô Anutu ge lec Kilisi tibed.

¹⁹ Mègem gwêbaga xam o dô tiyi xocbê tibii ba wê vitevac ge lêm. Nge, xam tu Anutu nue pyap dì lam kituc lec xe Yuda hixôn xomxo vông vinên vihati. ²⁰ Il vihati tiyi xocbê xumac wê Anutu lox ge. Om Yesu Kilisi vaci tiyi xocbê teac wê le vac kibun dì xumac le lec ge, dì xe sinale hixôn plopete, xe tiyi xocbê xax wê le lec teac ge. Dì xam ge tiyi xocbê xax malecên wê le lec pêt ngibi ge. ²¹ Dì Yesu vaci ngidu xumac tige xôn, om xumac yêp niviha di le xêkizêc. Anutu vaci lox xumac tige om obêc vô levac dì tu Apumtau xumac ngibua. ²² Xam éno vông i vin Yesu, om Anutu vilu vô il vihati dô tibed om il xôn vihati tu Anutu xumac ngibua wê Anutu hixôn Myakilôhô Ngibua ob dô vac ge.

3

Pol nêl xolac vô tibii ba wê o Yuda lêm ge

¹ Anutu vông xe Yuda hixôn xam tibii ba tu nôn tibed. Lêc tibii tung a Pol, a lam dô vac xumac kalabuhu ên wê a nêl Yesu Kilisi xolac vô xam wê xam o Yuda lêm ge. ² A xovô ên a nêbê xam ngô kiyang lec wê Anutu vông vizid vô a ge. Anutu vông vizid vô a bêga nêbê a loc vô xam tibii ba dì nêl xêyaa vin lecén wê i vông ge kitong vô xam. ³ Ilage vizid wê Anutu vông ge yêp xôpacên. Mêđ gwêbaga Anutu nêl mi i yêp seac vô a dì a xovô. Om ga tiyi kiyang myabo wê a kivuu vô xam ilage. ⁴ Mègem xam obêc kitong kipihac tiga od xam obêc xovô bê piyôp wê a vông ge nêl kiyang xôpacên lec Kilisi yêp seac. ⁵ Vô buc taxlee ilage Anutu o nêl kiyang xôpacên tige yêp seac vô xomxo ti lêm, lêc gwêbaga Anutu vông Myakilôhô Ngibua lam nêl kiyang tige kehe kitong vô xe sinale hixôn he plopete wê Anutu vinoo xe én nêb xe vông i yuac ge. ⁶ Om kiyang tige bêga nêbê Anutu kituc xe hixôn xam tu nôn tibed pyap, om nôn niviha vihati wê Anutu nêb obêc vông vô xe Yuda ge od obêc vông vô xam éno hixôn. Di kiyang vihati wê Anutu hilu ilage ên nêb obêc vô nôn lec vô xe

Yuda ge, od kiyang tige obêc vô nôn lec vô xam baba hixôn, ên xam vông i vin xolac niviha wê Yesu Kilisi vông ge.

⁷ Anutu vông vizid niviha vô a dì vinoô a ên nêb a loc nêl xolac niviha vô xam. Om vông xêkizêc wê i vông ge vô a ên nêb xêkizêc tige i ngidu a xôn dì a vông yuac. ⁸ A ga, a o levac lêm. Nge, Anutu nue vihati ge nginoo a vêl. Mêlêc Anutu vông vizid niviha vô a bêga nêbê a loc nêl xolac vô xam tibii ba. Xolac tige nêl vizid niviha vihati wê Kilisi vông ge kitong. Lêc du piyôp o tiyi wê il ob xovô vihati ge lêm. ⁹ Anutu ge wê tung susu lag yuu kibun vihati, dì ilage môp wê Anutu nêb ob vông ge yêp xôpacên vac i piyôp dì i val tyip gwêbaga. Lêc gwêbaga Anutu vông yuac vô a ên nêb a loc nêl kiyang xôpacên tige i yêp seac vô xomxo vihati. ¹⁰ Anutu nêl kiyang xôpacên tige yêp seac vô xomxo vông vinêng vihati ên nêb he levac levac hixôn xêkizêc kisii ganê, he i yê dì xovô bê Anutu piyôp levac luu vihati vêl. ¹¹ Buc taxlee ilage Anutu nêb ob vông yuac tibêge tiyi xocbê xo mi yêp lec Apumtau Yesu Kilisi ên nêb Kilisi ob vông ge. ¹² Mêgem gwêbaga il vông i vin Kilisi, om Kilisi vông môp vô il wê il ob la vô Anutu ge dì il ob xona lêm. ¹³ Om a kitaa xam bê myavinê levac wê a kô ên wê a ngidu xam xôn ge, xam nilôm i o lêc vô viyin ên myavinê tige lêm. Ên myavinê wê a kilê lec xam ge ob vông xam lêm vô levac.

Pol kitaa vô Anutu ên tibii Epesas

¹⁴ Mag Anutu kituc xe Yuda hixôn xam baba ge lam dô kidu tibed, om a yev vixag kitu vô Mag dì pimil i lê. ¹⁵ Anutu nêl lê tibed lec he wê dô lag puunê gee hixôn il wê il dô kibun ga ge. ¹⁶ Om a kitaa vô Anutu bêga bê xêseac niviha wê yêp vô i ge i lam ngidu xam xôn, dì i vông Myakilôhô Ngibua wê i vông ge i dô vac xam nilôm dì xam le xêkizêc ta. ¹⁷ Dì a kitaa vô Anutu ên a nêbê i vông Kilisi i lam dô vac xam nilôm ên wê xam vông i vin i ge, dì i vông môp xêyaa vin lecên i vô levac vô xam ên xam le xêkizêc ya, i tiyi xocbê xax ngilôhô la vac kibun dì hôm yatôv xôn dì i le pilili ge. ¹⁸ Ên xam obêc le xêkizêc vac môp xêyaa vin lecên ge od xam hixôn xe vông vinêng vihati ge, il xôn obêc xovô môp xêyaa vin lecên wê Yesu vông ge. Xêyaa vin lecên wê Yesu vông ge levac dì dia nginoo la vêl di viyum vihati ge xôn, ¹⁹ dì luu xovônen wê il vông ge vêl. Om a kitaa vô Anutu bêga bê i vông xovônen vô xam ên xam xovô xêyaa vin lecên wê Kilisi vông ge, dì xêkizêc yuu xovônen dì vizid niviha vihati wê Anutu vông ge i lam hivun xam xôn. ²⁰ Xêkizêc wê Anutu vông ge vông yuac vac il nilôd, om il obêc xo susu ti, me il obêc kitaa susu ti vô i ge od Anutu tiyi wê obêc vông vô il i luu wê il xovô me il kitaa vô i ge vêl. ²¹ Om il xomxo vông vinêng vihati, il wê il dô gwêbaga hixôn he wê ob dô timuên gee, il obêc pimil Anutu lec yuac wê Yesu Kilisi vông ge i yêp luta lêc luta. Kiyang nôn.

4

Il hixôn Kilisi tiyi xocbê nôn tibed

¹ A ga, tibii tung a lam dô vac xumac kalabuhu ga ên wê a nêl Apumtau xolac vô xam ge. Ilage Anutu tyuc xam ên nêb xam tu i nue, om a ob nêl kiyang vô xam bêga bê xam viac môp vihati i yêp niviha i tiyi xocbê Anutu nêb il ob timu vô ge. ² Om môp niviha wê Anutu vông vô il ge bêga nêbê xam pilepac xam dì vô nipwo lec, dì xam lum nêl kiyang vóma, dì le i lêc

vông nipaên vô xomxo wê vông viyin vô xam ge lêm. Nge, xam xêmyaa i vin lec lime dì xam kilê viyin wê he vông vô xam ge.³ Môp malehe wê Myakilôhô Ngibua vông ge kisuu il lec dì vông il le nôn tibed. Mêgem xam vông yuac xêkizêc dì hóm môp malehe xôn pilahi ên i ngidu xam xôn.⁴ Il vihati tu nôn tibed, dì Myakilôhô Ngibua tibed, dì Anutu tyuc il vihati ên nêb il vông nilôd i loc vô nôn tibed wê i obêc vông vô il timuên ge.⁵ Il Apumtau tibed, dì vông vinên wê il vông ge tibed, dì il lipac mia lec lê tibed,⁶ dì il Mag Anutu tibed. Anutu tu il vihati nêd levac, dì ngidu il vihati xôn, dì dô vac il vihati nilôd.

⁷ Kilisi titang vizid toto ge vô il ya xovôên wê i vông ge ên nêb ob vông vô il.⁸ Mêgem kiyang wê yêp vac kipihac xolac ge vô nôn lec. Kiyang tige nêl bêga ên nêbê,
“Buc wê i lec mi lax kisii ganê ge od didii tibii wê vông vevac vô i lêc i nginoo he vêl ge mi la hixôn, dêc titang vizid toto vô xomxo.”

⁹ Kiyang nêl bêge, om bo ti wê nêbê lec mi la kisii ganê ge, kehe nêbê va? Kehe nêl bêga ên nêbê ilage i sea ben lag kisii ganê di lop mi lam kibun ga dì la vac kibun nilô.¹⁰ Om xomxo tyo wê lop mi lam kibun ga ge wê lec mi lax kisii ganê tui vac nang dì luu lag vêl, om dô i nêx lec lag yuu kibun vihati.¹¹ Di Kilisi vông vizid yuu xovôên toto vô xomxo ên nêb he i vông he yuac ya. Om vông yuac sinale vô xomxo ya, dì vông yuac plopete vô xomxo ya, dì vông yuac xolac nêlén vô xomxo ya ên nêb he i loc nêl xolac vô tibii madiluhu, dì vông yuac pasto vô xomxo ya ên nêb he i viac xomxo vông vinên dì tixuu he ya xolac.¹² Kilisi vông yuac tigee vô xomxo ya ên nêb he i ngidu il xomxo vông vinên vihati xôn dì il vông yuac wê Kilisi vông vô il ge i yêp niviha. Il hixôn Kilisi tiyi xochê nôn tibed. Om yuac wê il vông ge ob vông nôn tige vô levac dì ngidu vông vinên wê il vông ge xôn.¹³ Mêgem yuac tige i vô levac vô il dì i loc vô buc wê il xomxo vông vinên vihati obêc le xêkizêc vac vông vinên, dì kô xovôên tibed lec Anutu nu tuc, dì il ob tu xomxo niviha tiyi xochê Kilisi ge.¹⁴ Mêgem il ob dô tiyi xochê nue nipwopwo ge lêm. Ên xomxo kityooên obêc tixuu nipwo ya xolac ba ti, me dìdii he mi la vac môp kityooên ge od ob vô pilepac pilepac vô he tiyi xochê gwec vuac di pilepac dipac dì lea vô pop pop vô dipac la dì lôm ge. Om il ob dô tiyi xochê nipwopwo tibêgee lêm.¹⁵ Nge, il ob dô tiyi xochê xomxo levac dì nêl kiyang hixôn nôn vôma di xêdyaa i vin lecma, ên il obêc timu vô môp tibêgee ge od il ob le pilahi hixôn Kilisi wê tu il badzub ge.¹⁶ Il hixôn Kilisi tiyi xochê nôn tibed, lêc Kilisi tu bazub dì il ge tiyi xochê vixa yuu vigê dì manôn yuubê. Di bazub vông ngang vihati kitucma dì tu nôn tibed. Om ngang toto obêc vông he yuac toto niviha ge od nôn tige ob dô niviha dì lig mi vô levac dì ob vô xêkizêc lec ya môp xêyaa vin lecên.

Xomxo vông vinên ob tup vô môp paha

¹⁷ A ob nêl kiyang ti vô xam. A tu Apumtau manôn om a nêl xêkizêc vô xam bêga bê le i lêc vông môp i tiyi xochê tibii madiluhu vông ge lêm, ên he vông nilô la vô môp vaxvax wê nôn ti yêp vacên ma ge,¹⁸ dì mapitoc hivun he piyôp xôn. He lungên Anutu dì he nêb he ob ngô kiyang nôn lêm, om he dô ninyawehe ên maviha dôen wê Anutu vông ge.¹⁹ He ni o yoc ên môp nipaên wê he mi vông ge lêm. Nge, he vông he la diluhu vô môp yôdac vêx yuu vux, dì he doma vô môp ningeac vihati.

²⁰ Mêlêc Kilisi o dìdii xam vac môp tibêgee lêm. ²¹ Nge, a xovô ên a nêbê ilage xam ngô kiyang lec Kilisi, di xomxo tixuu xam ya Yesu kiyang nôn. ²² Kiyang tige nêl bêga ên nêbê ilage xam mi timu vô môp nipaên wê xomxo ngwe vông ge, om kityoo xam dì didii xam la vac môp nipaên wê xam nimnivi xovô ge. Lêc môp nipaên tigee wê ob kitya xam vêl. Om xam sea môp wê xomxo nipaên tige vông ge i loc yêp xel. ²³ Di xam pilepac nilôm yuu piyôp i vô paha lec, ²⁴ di xam hôm môp wê xomxo paha ngwe vông ge lec. Môp wê xomxo tige vông ge ngibua di xêseac nôn tiyi xocbê Anutu vaci.

²⁵ Mêgem xam sea kiyang kityooên i loc yêp xel di nêl kiyang nôn vÔma, ên il vihati tu nôn tibed pyap. ²⁶ Xam xêmyaa obêc vô myavinê vÔma ge od xam viac xam, ên xêyaa myavinê i o lêc vông xam loc vac nipaên lêm. Di le i lêc dô hixôn xêyaa myavinê di hiyôv i hoo loc hixôn lêm, ²⁷ ên xam obêc tax vuayen vô Seten di i ob dìdii xam la vac môp nipaên. ²⁸ Xomxo wê mi vông yôdac vô xomxo ngwe susu ge i o lêc vun xomxo susu i tii vac lêm. Nge, ici va vigê i vông yuac niviha êdêc kisuu susu lec di vông ya vô xomxo wê nôn susu maên ge. ²⁹ Le i lêc nêl kiyang nipaên lêm. Nge, xam nêl kiyang niviha wê ob ngidu xomxo xôn ge ên i vô niviha vô he wê ob ngô kiyang ge. ³⁰ Le i lêc vông viyin vô Myakilôhô Ngibua wê Anutu vông ge lêm, ên Myakilôhô Ngibua lam dô vac il nilôd tiyi xocbê il tu Anutu nue om vông xovôen vô il bêga nêbê il ob la dô hixôn Anutu timuên. ³¹ Xam sea môp nipaên wê xam xêmyaa vô nipaên vô xomxo ngwe ge, di môp kunacmaên, di môp xêyaa myavinê, di môp higacê, di môp wê xam nêl kiyang nipaên lec xomxo ge, di sea môp nipaên vihati i loc yêp xel. ³² Xam vông niviha vÔma di xo vigwe pisiv ênma, di xomxo ti obêc vông nipaên vô xam ge od xam kitya i nôn nipaên vêl i tiyi xocbê Anutu kitya xam nêm nipaên vêl lec Yesu Kilisi lê ge.

5

Il dô vac xêseac om il ob timu vô môp niviha

¹ Anutu kitya xam nêm nipaên vêl di xêyaa vin lec xam, di xam tu i nue. Om a nêl vô xam bêga bê xam timu vô môp wê Anutu hilung vô xam ge, ² di xam timu vô môp xêyaa vin lec maên i tiyi xocbê Kilisi wê xêyaa vin lec il om yib ên il nêd nipaên ge. Kilisi vông ici va tu daa wê Anutu yê niviha ge, tiyi xocbê ilage xomxo si daa wê nivivea niviha ge ên nêb Anutu i yê niviha.

³ Le i lêc timu vô môp yôdac vêx yuu vux di môp ningeac lêm, di xam o vông nilôm i loc vô susu vax vax lêm, di le i lêc keac lec môp nipaên tibêgee lêm. Ên il Anutu nue il, om o tiyi wê il ob nêl kiyang lec môp nipaên tibêgee lêm. ⁴ Le i lêc nêl kiyang yôdac lecma lêm, di le i lêc nêl kiyang xêlila lec kiyang nipaên lêm, di le i lêc nêl kiyang vidaaêñ wê nôn maên ge lêm, ên kiyang tibêgee tiyiên ma, om xam sea i loc yêp xel di xam pimil Anutu. ⁵ Xacxam va xovô pyap bêga bê xomxo wê vông môp yôdac vêx yuu vux ge, me vông môp ningeac, me vông nilô la vô susu vaxvax ge, he obêc la dô vac Anutu yuu Kilisi ben lêm. Di a nêl vô xam bê xomxo wê vông nilô la vô susu vaxvax ge, he tiyi xocbê he yev vixa kitu vô anutu kityooên.

⁶ Xam viac xam, ên xomxo kityooên obêc val nêl kiyang vidaaêñ vô xam ên nêb ob didii xam mi la vac môp nipaên ge od xam o lêc ngô kiyang wê

he vông ge lêm. Ên Anutu xêyaa vô myavinê vô xomxo wê pwoo i kiyang vac di timu vô môt nipaên tibègee. ⁷ Mêgem xam dô teva ên xomxo wê vông môt nipaên bêgee, ⁸ ên ilage xam dô vac mapitoc, léc gwêbaga xam tu Apumtau nue, om xam dô vac xêseac. Mêgem xam timu vô môt wê xomxo xêseac vông ge, ⁹ ên xomxo obêc dô vac xêseac ge od ob timu vô môt niviha yuu bôbac di dô vac kiyang nôn hixôn. ¹⁰ Di xam myag môt wê Apumtau obêc yê nêb niviha ge. ¹¹ Xomxo wê mi dô vac mapitoc ge, he mi timu vô môt wê ob vô nôn niviha lêm ge, om le i lêc timu vô he lêm. Nge, xam nêl he nêb nipaên kitong vô he. ¹² Léc a ob nêl kiyang lec môt wê he vông mi i yêp xôpacên ge lêm, ên ob vông ni yocêñ vô a. ¹³ Léc xêseac obêc linac lec môt yuu susu vihati ge od he ob dô seac di ti ob dô vac mapitoc lêm. Ên susu vihati wê xêseac tige linac lec ge, he tiyi xochê xêseac nôn. ¹⁴ Mêgem kiyang ti yêp bêga ên nêbê,

“Ông wê ông wêp ge, ông kidi lec mamvîha di sea môt mayibêñ, ên xêseac wê Kilisi vông ge i linac vô ông.”

¹⁵ Om xam viac xam ên môt wê xam timu vô ge, di xam o lêc dô i tiyi xomxo wê lungêñ Anutu ge lêm. Nge, xam dô i tiyi xochê xomxo wê xovô Anutu ge, ¹⁶ di xam xovô môt niviha wê Anutu vông ge i tiyi buc vihati, di xam o sea buc ti i yêp vidaaén lêm, ên buc gwêbaga il dô vac viyin. ¹⁷ Mêgem xam o dô i tiyi xochê xomxo wê piyôp maêñ ge lêm. Nge, xam xovô môt wê Anutu vông vô xam ên nêb xam timu vô ge.

¹⁸ Le i lêc num mia xêkizêc di i vông xam piyôp i vô yacyac lêm, ên môt tibêge ob vông xam vô nipaên. Om xam sea môt tibêge di lam dô vac Myakilôhô Ngibua kwa ngibi ên i hivun xam xôn. ¹⁹ Om kiyang wê xam keac vómâ ge, xam keac di vông lilo wê pimilêñ Anutu ge, hixôn lilo daa, di lilo wê Myakilôhô Ngibua vông vô xam ge, di xam vông lilo vô Apumtau vac myam di vông vac nilôm hixôn, ²⁰ di i tiyi buc vihati xam pimil Anutu lec il lig Apumtau Yesu Kilisi lê ên viyin yuu niviha vihati wê val vô xam ge.

Kiyang lec môt iimaêñ

²¹ Xam pimil Kilisi di kô i lec, di xam loc dô vac lime vông vinêñ kwa ngibi i tiyi xochê môt wê Kilisi hilung vô xam ge. ²² Xam vêx, xam ngô kiyang wê liyame nêl ge di loc vac he kwa ngibi i tiyi xochê xam ngô Anutu kiyang di la vac i kwa ngibi ge, ²³ ên liyame ge tu xam bamzub tiyi xochê Kilisi tu il wê il vông i vin ge badzub. Il hixôn Kilisi tu nôn tibed, di Kilisi vaci vô il vêl ên il nêb nipaên. ²⁴ Il wê il vông i vin ge, il dô vac Kilisi kwa ngibi, om xam vêx êno, xam loc vac kiyang wê liyame vông ge kwa ngibi i tiyi buc vihati.

²⁵ Xam vux, xam xêmyaa i vin lec vinême i tiyi xochê Kilisi xêyaa vin lec il xomxo vông vinêñ vihati, om lam yib lec il nêb nipaên, ²⁶ ên nêb ob lipac il vô paha lec ya mia hixôn xolac wê ici va vông ge, di vông il vông vinêñ vihati il tu i nue. ²⁷ Kilisi vông bêge ên nêb ob vông il tu xomxo niviha wê ningeac yuu byepacêñ ti me susu nipaên ti ob dô hixôn il lêm. Nge, il ob tu xomxo ngibua wê judaêñ ti ob yêp hixôn il lêm ge. ²⁸ Kilisi vông bêge, mêgem xam vux, xam xêmyaa i vin lec vinême i tiyi xochê xam xêmyaa vin lec xacxam va nimnivi ge. Vux ti xêyaa obêc vin lec vinê ge od tiyi xochê xêyaa vin lec ici va, ²⁹ ên xomxo ti ob vông myavinê vô ici va ninivi lêm. Nge, ob vet ninivi di viac niviha tiyi xochê Kilisi viac

xomxo vông vinêni vihati niviha ge, ³⁰ ên il tiyi xochê Kilisi vixa yuu vigê di manôn yuubê, om il hixôn Kilisi tiyi xochê nôn tibed. ³¹ Kiyang yêp vac xolac bêga nêbê,

“Mêgem vux ti obêc kô vêx ge od ob sea ta yuu ma di la dô hixôn vinê, di yuu ob tu nôn tibed.”

³² Xolac nêl bêge, lêc kiyang ga kehe yuu. Kehe ngwe wê levac ge nêl lec Kilisi hixôn xomxo vông vinê. ³³ Di ngwe nêl lec môt wê vêx hixôn vux iimaên ge, om xam vux, xam toto xêmyaa i vin lec vinême i tiyi xochê xam xêmyaa vin lec xacxam va nimnivi ge. Di xam vêx, xam pimil liyame lê dì kô he lec.

6

Kiyang lec nue hixôn tae mae

¹⁻² Xam nuge, xam tu Apumtau xe, om xam vô ninyam lehe vô tame mame kiyang, ên ge môt bôbac wê xolac nêl ilage bêga ên nêbê, “Xam hôm tame mame lê lec dì ngô he kiyang.” Xolac tige Anutu hilu taxlee bêga ên nêbê, ³ “Xam obêc vô ninyam lehe vô kiyang wê tame mame nêl ge od xam obêc dô nimvîha dì dô mamvîha buc dia gê kibun ga.” Anutu nêl bêge ilage.

⁴ Xam mae, le i lêc kunac nume i luu vêl mi vông he xêyaa i vô myavinê vô xam lêm. Nge, xam viac he i niviha dì titô he dì tixuu he ya Apumtau xolac.

Kiyang lec xomxo levac hixôn nue yuac

⁵ Xam wê xam tu xomxo levac nue yuac ge, xam loc vac kiyang wê xomxo levac vông ge kwa ngibi, di xona ên he dì xam nilôm i o lêc vông yuu lêm. Nge, xam nilôm i loc tibed vô yuac wê xam ob vông ge, di xam timu vô xomxo levac via i tiyi xochê xam timu vô Kilisi via ge. ⁶ Le i lêc kityoo di hi xomxo levac manôn lec ya yuac lêm, ên ge tiyi xochê xam nêb xomxo i yê xam niviha. Om xam vông xam yuac kibun ga i yêp niviha i tiyi xochê xam vông yuac niviha vô Kilisi ge od ge tiyi xochê xam vông ya xovôên wê Anutu vông ge. ⁷ Xam vông xam yuac kibun ga hixôn xêmyaa niviha, di vông yuac vô xomxo kibun ga i tiyi xochê xam vông yuac vô Anutu. ⁸ Xam xovô bê xomxo ti obêc vông i yuac i yêp niviha ge od Apumtau ob vông nôn niviha vô i. Om Apumtau obêc vông nôn niviha vô he wê tu xomxo levac nue yuac ge di ob vông vô he wê lê levac ge hixôn.

⁹ Xam xomxo levac wê xam viac nume yuac ge, xam vông niviha vô nume yuac, di le i lêc higac di vông he i xona lêm, ên xam xovô bê Apumtau wê dô kisii ganê ge tu xam nêm levac di tu nume yuac nêl levac êno, di Apumtau o yê il mangwe levac di mangwe nipwo lêm. Nge, yê il vihati tiyima.

Susu vevac wê Anutu vông vô il ge

¹⁰ A ob nêl kiyang xêxuhu ya hixôn bêga bê xam tu Apumtau xe pyap, om xam le pilihu ya xêkizêc wê Apumtau vông vô xam ge. ¹¹ Xam vinyum susu vevac wê Anutu vông vô xam ge lec xam nimnivi xôn di le xêkizêc di vông vevac vô Seten di pwoo kiyang kityooên wê i vông ge i pec. ¹² Èn il o vông vevac vô xomxo kibun ga lêm. Nge, il vông vevac vô vimwo nipaên hixôn angela nipaên di Seten he nue yuac hixôn xêkizêc levac wê viac mapitoc ge. ¹³ Om xam vinyum susu vevac wê Anutu vông vô xam

ge lec xam nimnivi xôn, dì buc nipaên wê Seten nêb obêc vông vevac vô xam ge od xam ob le xêkizêc vac vevac dì nginoo Seten vêl mi le pilihi.

¹⁴ Mêgem xam le xêkizêc dì vinyum susu vevac wê Anutu vông vô xam ge lec. Susu vevac tigee bêga bê xam vêx Anutu kiyang nôn i tiyi xochê let, dì xam vinyum môt niviha i kisuu xam lec i tiyi xochê ngakwi xêkizêc wê kisuu xam pikopac lec ge. ¹⁵ Anutu xolac niviha nêl ên nêbê Anutu vông il la dô vac kiyang malehe nilô, om xam nêl xolac tige mi le xêkizêc vac i tiyi xochê su wê xam su lec vixam xôn ge. ¹⁶ Om xam vinyum susu vevac tigee lec xam nimnivi xôn, di xam hôm vông vinêñ wê xam vông ge xôn pilihi i tiyi xochê êê wê kisuu xam lec ge, êdêc Seten obêc byêx yii wê ngwax tum lec ge lam ge od i lam selac lec vông vinêñ wê xam vông ge dì xam le niviha. ¹⁷ Xam xovô pyap ên xam nêbê Anutu vô il vêl ên il nêd nipaên, om xam hôm xovôñ tige xôn pilihi i tiyi xochêxam tung kilung xêkizêc ta lec bamzub ên nêb i kisuu bamzub lec ge. Xam hôm yipac levac wê Myakilôhô Ngibua vông ge. Yipac tige Anutu xolac nôn. ¹⁸ Xam kitaa vô Anutu i tiyi buc vihati ya xêkizêc wê Myakilôhô Ngibua vông vô xam ge, dì xam kitaa lec môt toto wê xam vông ge. Xam viac xam dì hôm môt kitaaén xôn pilihi dì seaén i ma, dì xam kitaa lec xomxo vông vinêñ vihati ên Anutu i ngidu he xôn. ¹⁹ Dì xam kitaa vô Anutu lec a êno bêga bê Anutu i ngidu a xôn ên a xonaén ên xomxo ti i ma dì a myag i vô viyin maên dì a nêl xolac wê yêp xôpacêñ ilage i yêp seac. ²⁰ A ga wê Anutu vông a la nêl xolac, om gwêbaga tibii tung a lam dô vac xumac kalabuhu ga ên wê a nêl xolac ge. Mêgem xam kitaa vô Anutu bêga bê i vông xêkizêc vô a ên a xonaén i ma dì a nêl Anutu xolac vô xomxo vihati i tiyi xochê yuac wê Anutu vông vô a ge.

Kiyang viwen timuén

²¹ Tikkas ob nêl a kitong vô xam dì nêl yuac wê a vông vac vigwe ga kitong êno. Tikkas ge il lig vông vinêñ ti wê il xêdyaa vin lec i ge, dì i vông yuac niviha vô Apumtau ge. ²² Om a vông i loc vô xam ên a nêb i loc nêl kitong bê xe dô tibêna vac xumac kalabuhu ga, ên i vông xam nilôm i vô viyin maên.

²³ Mag Anutu yuu Apumtau Yesu Kilisi, yuu i vông kiyang malehe hixôn xêyaa vin lecêñ dì vông vinêñ nôn i loc vô xam wê a lige ge. ²⁴ Vizid niviha wê Anutu vông ge i loc vô xomxo vihati wê xêyaa vin lec il lig Apumtau Yesu Kilisi tiyi buc vihati dì ob tiyôô vac lêm.

PILIPAI **Kipihac wê Pol kivuu vô tibii Pilipai ge**

¹ A, Pol, hixôn Timoti, xii ga Yesu Kilisi nue yuac. Xii kivuu kipihac ga mi vông i loc vô xam vihati gê vigwe Pilipai, xam gyovixa dì xam wê xam vông yuac vac konglegesen ge hixôn xam vihati wê xam vông i vin Yesu Kilisi ge.

² Il Mag Anutu hixôn Apumtau Yesu Kilisi yuu i vông vizid niviha hixôn kiyang malehe i hivun xam xôn.

Pol pimil Anutu ên tibii Pilipai

³ Tiyi buc vihati wê a mi xo xam ge od a pimil Mag Anutu ên xam, ⁴ di buc vihati wê a kitaa vô Anutu lec xam ge od a kitaa hixôn xêgyaa niviha ⁵ ên wê xam vông yuac xolac hixôn a taxlee di i lam tyip gwêbaga hixôn ge. ⁶ Om a xovô ên a nêbê Anutu vông yuac niviha vac xam nilôm, om ob vông yuac vac xam nilôm i tiyi buc vihati di i loc tyip lec buc wê Yesu Kilisi obêc lop mi lôm ge. ⁷ Om môt wê a xêgyaa niviha ên xam ge, ge môt bôbac, ên a xo xam yêp vac nilôg lec buc vihati, ên xam mi ngidu a xôn om Anutu vông vizid niviha vô il tiyi buc vihati, gwêbaga wê a lam dô vac xumac kalabuhu ge hixôn buc wê a dô vixun di a nêl xolac vô xomxo ên a nêb he i xovô bê Anutu xolac ge kiyang nôn. ⁸ Anutu yê wê a vông nilôg hixôn piyôp vihati ge loc vô xam, ên Yesu Kilisi vông a xêgyaa vin lec xam vihati.

⁹ Di a kitaa vô Anutu ên a nêbê i vông môt xêyaa vin lecên wê xam vông ge i vô levac, di i vông xovôen levac hixôn piyôp niviha vô xam, ¹⁰ tiyi wê xam ob yaxên môt vihati nêb niviha me nipaên ge. Om timuên wê Kilisi obêc vena ge od xam obêc dô niviha di kiyang ti ob yêp vô xam lêm, ¹¹ di môt niviha wê xam vông ge ob vô nôn niviha vô xam i luu vêl ya xêkizêc wê Yesu Kilisi vông ge. Om xomxo ob yê di pimil Anutu di vông i lê i vô levac.

Wê Pol dô vac kalabuhu gê Lom ge od ngidu xolac xôn

¹² Xam lige, a nêb a ob nêl kitong vô xam ên xam xovô bêga bê gwêbaga a lam dô vac xumac kalabuhu lê, lêc viyin tiga o le vac xolac xôn lêm. Nge, vông xolac vô levac, ¹³ om tibii vevac wê bin xumac kalabuhu ga hixôn gavman levac Sisa ben ge, he vihati hixôn xomxo baba xovô nêbê tibii tung a lam dô vac xumac kalabuhu ga ên wê a mi nêl Yesu Kilisi kitong vô xomxo ge. ¹⁴ Ilage lige vông vinêl ya xona ên wê he ob nêl xolac ge ên he nêbê mêd tibii ob vông viyin vô he ên xolac. Lêc gwêbaga he tibeac yê di xovô bê Apumtau ngidu a xôn vac kalabuhu, mêtgem gwêbaga he le xêkizêc di nêl Anutu xolac di xonaên ma.

¹⁵ Vixôhilôg, he ya xêyaa vô nipaên ên wê a lêg vô levac ge, om he nêl Kilisi xolac ên nêb xomxo i yê he niviha di vông he lê i vô levac nginoo a vêl. Lêc he ya nêl xolac di o xo bêge lêm. ¹⁶ Nge, he xêyaa vin lec a om he nêl xolac kitong ên he xovô ên he nêbê tibii vông a lam dô vac kalabuhu ga ên wê a ngidu xolac xôn ge. ¹⁷ Lêc he wê a nêl tax ge he nêb tibii i yê he di vông he lê i vô levac ên yuac xolac, om he nêl Kilisi kitong, di he o nêl xolac hixôn nilô tibed lêm. Nge, he nêl xolac ên he nêb he ob vông a

lêg i tô di vông a nilôg i vô viyin vac xumac kalabuhu ga. ¹⁸ Léc a ob nêl kiyang ti lec wê he vông ge lêm. Ên xomxo ya nêl Kilisi kitong hixôn nilô niviha di ya nêl hixôn nilô nipaên. Léc he vihati nêl Yesu Kilisi kitong yêp seac, om a nilôg vô niviha.

¹⁹ Vixôhilôg, a nilôg vô niviha gwêbaga di ob vô niviha timuêñ hixôn, ên a xovô ên a nêbê xam mi kitaa lec a, di Myakilôhô Ngibua wê Yesu Kilisi vông ge mi ngidu a xôn om ob vô a vêl ên viyin tiga. ²⁰ Om a xo vinux yang di a dô bin wê Anutu ob ngidu a xôn, di a ob vông nipaên ti wê a nig ob yoc ên ge lêm. Nge, a nêb a ob le xêkizêc vac vông vinêñ gwêbaga tiyi xocbê a le xêkizêc ilage, di a ob xona ên xomxo ti lêm. A vông bêge ên a nêb a obêc dô magviha me a obêc xib ge od a ob vông Kilisi lê i vô levac. ²¹ Wê a dô magviha ga ge od a vông nilôg la yadiluhu vô Kilisi, léc wê a obêc xib ge od a obêc kô vizid niviha luu vizid wê kibun ga vêl. ²² Léc wê a gên dô magviha ga ge od a vông yuac niviha wê ob vô nôn niviha ge. Om môp yuu xôn niviha. Ngwe wê a ob dô magviha di ngwe wê a ob xib ge. Om a obêc timu vô ga ngwe na? Ge a lungêñ. ²³ A nilôg vô yuu. A xêgyaa vin lec wê a ob xib di la dô hixôn Kilisi. Môp ngwe ga luu ngwe wê dôen mavîha ge vêl. ²⁴ Léc wê a obêc dô magviha lec kibun ga ge od ge wê a ob ngidu xam xôn. ²⁵ A xovô kiyang tige pyap om a nêl bêga ên a nêbê a ob dô magviha lec kibun ga ên dô hixôn xam di ngidu xam xôn ên xam léc vông i vin xêkizêc ta di dô hixôn xêmyaa niviha. ²⁶ Mêgem buc wê a obêc loc dô hixôn xam ge od ge wê xam xêmyaa ob vô niviha di xam ob pimil Yesu Kilisi ên wê a vena vô xam ge.

Xomxo Pilipai hixôn Pol vông vevac ya xolac

²⁷ A nêl vô xam bêga bê môp vihati wê xam nêb xam ob vông ge, xam vông i tiyi wê Kilisi xolac nêl ge. Om a obêc loc vô xam di xê môp wê xam vông ge, me a obêc dô teva di ngô kiyang lec môp vihati wê xam vông ge, od a nêb a ob xovô wê xam le xêkizêc ta hixôn nilôm tibed di vông vevac ya xolac hixôn piyôp tibed ên xam nêb xomxo i ngô di vông i vin. ²⁸ Di a nêb a ob xovô wê xam o xona ên xomxo wê vông vevac vô xolac ge lêm. Ên xam obêc xona ên he lêm ge od obêc vông xovôen vô he bê Anutu obêc kitya he vêl timuêñ, dom xam ge xam ob dô niviha. Ên Anutu vaci wê ob vông xam dô niviha hixôn i ge. ²⁹ Ên Anutu nêl Kilisi lê i vô levac, om vông môp yuu vô xam ên nêb xam timu vô. Ngwe wê xam vông i vin Kilisi ge, di ngwe wê xam ob kilê viyin lec Kilisi lê ³⁰ di vông vevac ya xolac ge. Ilage xam wê vevac wê a vông ya xolac ge di gwêbaga xam ngô wê a gên dîvông vevac ya xolac tibêge. Om il xôn ob vông i yêp tibed.

2

Il ob pilepac il di vô nipwo lec

¹ Xam dô vac Kilisi vigê vilu kwa ngibi om vông xam dô niviha. Di Kilisi xêyaa vin lec xam om xam dô malehe, di Myakilôhô Ngibua dô hixôn xam di ngidu xam xôn. Di xam xêmyaa mi vin lecma di xam mi xo vigwe vô pisiv ênma. ² Vixôhilôg, xam mi vông môp niviha bêgee om a xêgyaa vô niviha. Om a ob nêl vô xam bêga bê xam timu vô môp mangwe gae hixôn bêga bê xam piyôp i tibed, di xam timu vô môp xêyaa vin lecén tibed, di nilôm i tibed, di xam vông i vinma kiyang. Xam obêc vông bêge ge od ob

vông a xêgyaa vô niviha yang. ³ Le i lêc xo xacxam va lêm dì le i lêc yong xam lêm. Nge, xam pilepac xam dì vô nipwo lec dì wê xomxo vihati i tiyi xochê he nginoo xam vêl ge. ⁴ Le i lêc viac xacxam va susu yuu yuac lêm. Nge, xam viac xomxo vihati susu yuu yuac êno dì ngidu he xôn.

Kilisi pilepac ici va dì vô nipwo lec

⁵ Xam timu vô piyôp i tibed xochê Yesu Kilisi xo ge. ⁶ Èn Yesu Kilisi yuu ma Anutu dô nôn tibed lê, lêc Yesu o hôm môp wê yuu ma dô tiyima ge pililihi lêm. ⁷ Nge, ici va sea lê levac wê i vông ge dì lam yubac gê kibun ga xochê xomxo kibun ga ti dì vông yuac tiyi xochê xomxo wê vidaaên ge ti. ⁸ Yesu tu xochê xomxo kibun ti, dì pilepac ici va tu xochê nipwo dì la vac Anutu kiyang kwa ngibi dì vông i tiyi wê Anutu nêl ge dì i la tyip lec buc wê yib ge. Vixôhilôg, yib lec xax pola. ⁹ Mêgem Anutu vông Yesu tu levac nginoo xomxo vihati vêl, dì vông lê wê nginoo lê vihati vêl ge vô i. ¹⁰ Anutu vông lê levac vô Yesu ên nêb xomxo wê dô kisii ganê ge dì he wê dô kibun ga ge, hixôn he wê yib dì la yêp vac kibun nilô ge, he vihati ob ngô Yesu lê dì yev vixa kitu vô i, ¹¹ dì nêl kitong i yêp seac bêga bê, “Yesu Kilisi ge il nêd Apumtau.” Obêc bêge ge od Mag Anutu lê ob vô levac.

Il ob dô xochê xêseac ge vac xomxo mahigun

¹² Yesu vông yuac vihati i tiyi wê Anutu nêl ge, mêtgem xam lige wê a xêgyaa vin lec xam ge, xam vông i tiyi wê Yesu vông ge. Ilage wê a dô hixôn xam ge, xam ngô a kiyang dì vông i tiyi wê a nêl ge. Lêc gwêbaga a lam dô teva ên xam, om a ob nêl vô xam bêga bê xam ngô kiyang di vông i tiyi wê a nêl ge i luu wê xam vông lec buc wê a dô hixôn xam ge vêl. Anutu vô xam vêl ên xam nêm nipaên, om xam vông i yuac xêkizêc ên yuac i vô nôn lec, di xam xona ên Anutu di xam nim i yoc ên môp nipaên. ¹³ Xam tiyi wê xam ob vông bêge, ên Anutu vông yuac vac xam nilôm, om ob vông xam xo môp yuu yuac wê i yê niviha ge, di ob vông xam timu vô.

¹⁴ Yuac vihati wê xam ob vông ge, le i lêc so vya vô yuac tige dì nêl kiyang tibeac lec lêm. ¹⁵ Xam sea môp tibêge êdêc nipaên ti i o lêc yêp vô xam lêm. Nge, xam tu xomxo wê niviha ge, ên Anutu nue ge wê nipaên ti o yêp vac he nilô lêm. Èn xomxo kibun ga wê dô hixôn xam gwêbaga ge, he ge xomxo nipaên wê dô vac mapitoc, ên he sea môp niviha dì timu vô môp nipaên. Om xam dô vac he mahigun tiyi xochê lam ên i vông xêseac vô he, ¹⁶ dì xam nêl Anutu kiyang wê ob vông he dô mavîha ge kitong vô he. Xam obêc vông bêge ge od buc timuên wê Kilisi obêc vena ge od a xêgyaa ob vô niviha ên xam, dì a ob xovô bêga bê yuac wê a vông vac xam mahigun ge, a o vông pisiv lêm, dì a yuac o tô mi la lêm.

¹⁷ Vông vinên wê xam vông ge tiyi xochê daa wê xam vông vô Anutu ge. Om tibii obêc hi a xib dì kâpyax a hi sea ên wê a nêl xolac vô xam ge od pyap, ên obêc tiyi xochê a êno vông daa vô Anutu. Om a xêgyaa ob vô niviha, di il xôn nilôd ob dô niviha. ¹⁸ Mêtgem a nêl vô xam bêga bê xam êno, xam xêmyaa i vô niviha, di xam dô hixôn nilôm niviha i tiyi xochê a ge.

Pol nêl Timoti yuac kitong vô tibii Pilipai

¹⁹ Apumtau Yesu obêc tyuc lec ge od a ob vông Timoti i loc vô xam Pilipai lutibed, ên i yê yuac wê xam vông ge, dêc lôm nêl kitong vô a, ên vông a

xégyaa i vô niviha. ²⁰ Xomxo ngwe xocbê Timoti ge o dô hixôn a lêm. Nge, Timoti tibed wê mi xo xam tiyi xocbê a mi xo xam ên a nêb a ob ngidu xam xôn ge. ²¹ Xomxo ya ge he mi xo heche va yuac yuu ninivi, di o xo Yesu Kilisi yuac lêm. ²² Dì Timoti mô ge, xam xovô ên xam nêbê xomxo niviha, ên mi ngidu a xôn vac yuac xolac tiyi xocbê nu ti ngidu ma xôn ge. ²³ Mêgem a nêb a ob vông Timoti i loc vô xam. Lêc gwêbaga a lungên môp wê gavman levac ob vông vô a ge. A ob yaxên lê, di vông Timoti i loc vô xam timuên. ²⁴ Lêc a xo ên a nêbê Apumtau obêc piwelac a vêl ên kalabuhu ga, om a êno obêc loc vô xam lutibed.

Pol nel Epaplodaitas yuac kitong

²⁵ Ilage xam vông il lig vông vinê Epaplodaitas lam vô a ên xam nêb i kô xam mammôn dì lam ngidu a xôn. Om i lam dô hixôn a dì xii xôn vông yuac, dì xii vông vevac ya xolac. Lêcom a xovô ên a nêbê a ob vông Epaplodaitas i lôc mi loc vô xam i tii vac nang, ²⁶ ên xam ngô wê yidac vông i ilage lêcom xam lungên wê yidac ma ge, om xam obêc dixo i. Mêgem vông Epaplodaitas nilô vô viyin dì i dixo xam êno. ²⁷ Vixôhilôg nôn, ilage i vông yidac levac tiyi wê ob yib ge. Mêlêc Anutu xo vigwe pisiv ên i om vông i vô niviha lec. Dì Anutu xo vigwe pisiv ên a êno, ên nêb viyin tige i o hivun a xôn lêm. ²⁸ Om a xo vinux ên a nêb a ob vông i lôc mi loc vô xam i tii vac nang, ên xam wê dì xêmyaa i vô niviha, dì i vông a nilôg i vô viyin maén. ²⁹ Mêgem buc wê obêc lôc mi loc vô xam ge od xam kô i lec niviha hixôn xêmyaa niviha dì pimil Apumtau lê. Dì xam vông xomxo vihati wê tiyi xocbê Epaplodaitas gee lê i vô levac, ³⁰ ên Epaplodaitas ge vông Kilisi yuac, lêc yidac levac vông i om vô kwabo lec wê ob yib ge, lêc o xo ici va lêm. Nge, xovô nêbê xam nêb i kô xam mammôn dì lam ngidu a xôn, om nêb ob vông yuac tige i ma lê.

3

Xomxo wê vông i vin Kilisi ge wê Anutu yê niviha

¹ Xam lige, a nêb a ob nêl kiyang xêxuhu ya hixôn bêga bê xam xêmyaa i niviha ên Apumtau. A nêl kiyang bêge vô xam ilage pyap, lêc a nilôg o vô viyin ên wê a ob kivuu kiyang tige i tii vac vô xam ge lêm, ên kiyang tige ob ngidu xam xôn.

² Xam viac xam ên xomxo nipaên wê tiyi xocbê noo vimen ge, ên he mi vông môp nipaên, dì xam xona nêm ên he Yuda wê ninivi gôlên ge. He gôl he ninivi ên nêb ob vông xovôên vô xomxo bê he Anutu nue. ³ Lêc he o Anutu nue lêm. Nge, il ga il tu Anutu nue nôn. Lêc il o tu Anutu nue ên wê il timu vô Yuda vông môp dì gôl il nidnivi ge lêm. Nge, il wê il tu Anutu nue ge wê Myakilôhô Ngibua ngidu il xôn dì il vông lilo vô Anutu, dì vông Yesu Kilisi lê vô levac ge, dì il xovô bê Yuda vông môp kibun ga o tiyi wê ob vông Anutu yê il niviha ge lêm. ⁴ Lêc xomxo ya timu vô Yuda vông môp kibun ên he so ên he nêb mêd môp tigee ob vô he vêl ên he nêb nipaên. Om a obêc nêb a ob vông i vin i tiyi he ge od môp kibun wê vông a lêg vô levac ge ob nginoo wê he vông ge vêl. ⁵ Èn a ga, a Islel ti, ên a pum lec Bensamin wê Islel kehe vigê yuu dì yuu tô mi la (12) ge ti, dì a tag yuu mag ge Hiblu, om a êno Hiblu ti. A yubac, dêc buc vigê viulu dì sec yon lam la vêl, mêd ge wê tag yuu mag gôl a nignivi tiyi môp wê xe Yuda mi vông ge. Dì a kô yuac Palisi wê a mi viac môp wê Moses xolac vông ge

vihat. ⁶ Dì a xo vinux ên a nêb môp vihati wê Moses vông ge tô vacên i ma, dì a so ên a nêbê xomxo wê vông i vin Yesu ge sea Moses xolac, om a vông viyin yuu myavinê vô he. Léc xomxo ti obêc nêb yaxên môp wê a vông ge od obêc nêl bê a timu vô Moses xolac vihati om nipaên ti o yêp vô a lêm. ⁷ Môp tigee wê a vông ilage vông a lêg vô levac. Léc gwêbaga a sea môp tigee vihati di xê tiyi xochê môp pileva ge, di a vông nilôg la yadiluhu vô Kilisi. ⁸ Vixôhilôg, a sea Yuda môp yuu yuac wê vông a lêg vô levac ge vihati yang, di gwêbaga a xovô a Apumtau Yesu Kilisi vaci ên a xovô ên a nêbê i luu môp yuu xovôên kibun ga vihati vêl. A nêb a ob timu vô Yesu, om a sea môp baba ge vihati di xê xochê myapipu vidaaen ge ên a nêb a ob hôm Kilisi tibed pilihi, ⁹ di dô hixôn i. Ilage a xo bêga ên a nêb Moses xolac wê a mi timu vô ge ob vông Anutu yê a niviha di nêl bê a xomxo bôbac ti. Léc gwêbaga a o xo bêge lêm. Nge, a xo ên a nêbê Anutu ob yê a niviha di nêl bê a xomxo bôbac ên wê a vông i vin Kilisi ge. Om môp tibed wê Anutu ob yê xomxo niviha ge, ge môp vông vinên. ¹⁰ A nêb a ob xovô Kilisi vaci, di xovô xêkizêc wê i vông ge. Ên Kilisi kidi lec maviha vac yibén om xêkizêc wê i vông ge yêp seac, om a nêb a ob xovô xêkizêc tige. Dì a nêb a ob kilê viyin i tiyi xochê i kilê ge. Yesu kilê viyin mi yib lec, om Anutu ob nêbê a êno timu vô bêge ge od a ob kilê viyin di xib êno. ¹¹ A ob vông bêge ên a nêb a êno ob kidi lec magviha vac yibén.

Pol tup mi la vô yôg wê xomxo ob nginoo lec ge

¹² A xo ên a nêbê a tu ngibua xochê Kilisi ge lêm, me a o xo ên a nêbê a vông môp vihati tiyi xochê Kilisi vông ge lêm. Lêcom Kilisi vông a tu i xe, om a divông yuac xêkizêc ên a nêb a ob tu ngibua xochê i ge. ¹³ Xam lige, a xovô ên a nêbê a gên o tu ngibua xochê Kilisi ge lêm. Xovôên wê a vông ge tibed bêga bê a ob xovô môp wê a mi vông ilage lêm. Nge, a ob xovô môp wê a ob timu vô gwêbaga mô, di vông yuac xêkizêc êdêc kô vizid niviha timuén. ¹⁴ Om tiyi xochê a tup ên a nêb a ob la vô yôg wê xomxo ob nginoo lec ge êdêc kô non. Om nôn wê a nêb a ob kô ge, ge wê Anutu ob tyuc a la dô hixôn i ge, ên wê a vông i vin Yesu Kilisi ge.

¹⁵ Il vihati wê il xovô Kilisi di timu vô i ge, il piyôp i tibed i tiyi kiyang wê a nêl ga. Léc xam obêc xo kiyang ba ge od Anutu obêc nêl kitong di titô wê so ge. ¹⁶ Lêcom le i lêc sea xovôên niviha wê xam kô pyap ge lêm. Nge, xam hôm xôn pilihi yang.

¹⁷ Xam lige, xam tup vô môp vihati i tiyi môp wê a vông ge, di xovô xomxo wê timu vô môp niviha vihati wê xe vông vac xam mahigun mi xam wê pyap ilage. ¹⁸ Ilage a nêl xomxo nipaên kitong vô xam tiyi buc tibeac, di gwêbaga a ob nêl he kitong vô xam i tii vac nang, di a magluc tyip ên wê he tibeac vông vevac vô Kilisi xolac wê nêl ên nêbê i yib lec xax pola ge. ¹⁹ He timu vô môp wê heche va xovô ge, om ge tiyi xochê he yev vixa kitu vô anutu ba. Dì he xêyaa vin lec môp nipaên wê ob vông xomxo ni yoc ge, lêc he ni o yoc ên môp tigee lêm. Dì he mi xo susu kibun ga, om obêc timuén ge od Anutu obêc kitya he vêl. ²⁰ Dom il vông vinên ge, il bed wê Anutu ben kisii ganê, di il dô bin Apumtau Yesu Kilisi wê vô il vêl ên il nêd nipaên ge, ên obêc kidi vac ben kisii ganê di lop mi lôm i tii vac nang. ²¹ Buc wê Kilisi obêc vena ge od obêc pilepac il nidnivi kibun tiyi xochê ici va ninivi wê niviha yang ge ya xêkizêc wê i vông ge. Xêkizêc wê i vông ge tiyi wê ob vông xomxo yuu susu vihati la dô vac i kwa ngibi.

4

Pol viac kiyang niviha vô tibii Pilipai

¹ Xam lige, xam xovô ên xam nêbê Yesu obêc vena, om a nêl vô xam bê xam le xêkizêc hixôn Apumtau. A xêgyaa vin lec xam, dì a xo xam nginong ên a nêb a ob xê xam i tii vac nang, ên xam mi vông a xêgyaa vô niviha dì vông a lêg vô levac ên wê xam vông i vin Anutu xolac ge.

² A ob nêl kiyang vô vêx yuu, Yuodia yuu Sintiki, wê yuu dô vac xam mahigun ge. Om a ob nêl vô muu bêga bê muu sea môt wê muu kunacma ge dì xovô Apumtau dì vông nilôm i loc tibed vô i. ³ Dì a nêl vô xomxo ti wê xii vông yuac tibed ilage bêga bê ông ngidu vêx yuu ge xôn, ên ilage yuu hixôn Klemen dì xomxo ya wê vông yuac hixôn a ge, he vihati ngidu a xôn vac yuac xolac, dì he lê yêp vac Anutu kipihac mavîha wê nêl he wê obêc dô mavîha luta lêc luta ge lê kitong.

⁴ A nêl vô xam vihati bêga bê xam xêmyaa i vô niviha ên Apumtau i tiyi buc vihati. A ob nêl vô xam i tii vac nang bêga bê xam xêmyaa i vô niviha.

⁵ Xam lum nêl kiyang vô xomxo vihati ên he i ngô dì xovô bê xam mi dô vac malehe. Buc wê Apumtau obêc vena lec ge vô kwabo lec. ⁶ Xam nilôm i lêc vô viyin ên susu me viyin ti lêm. Nge, xam kitaa vô Anutu lec susu vihati wê xam nêb xam ob kô ge dì kitaa lec viyin vihati wê val vô xam ge. Xam kitaa vô Anutu dì hi vixam i pec dì pimil i, ⁷ ên xam obêc vông bêge ge od môt malehe wê Anutu vông ge ob vông xam piyôp yuu nilôm la tibed vô Yesu Kilisi. Môt malehe wê Anutu vông ge luu xovôên wê xomxo toto vông ge vêl.

⁸ Xam lige, a ob nêl kiyang ngwe vô xam i tii vac nang. Xam xovô môt tigae bêga bê môt wê nôn ge, dì môt wê piyôp niviha vông ge, dì môt wê bôbac ge, dì môt wê o ningeac lêm ge, dì môt wê xêseac ge, dì môt wê xam lêm ob yêp niviha ge, dì môt wê vông xomxo vô niviha ge, dì môt vihati wê il xovô ên il nêbê niviha ge. Môt tigee vihati xam xovô i luu vêl dì hôm xôn mi i yêp vac xam nilôm. ⁹ Môt vihati wê a tixuu xam ya mi xam xovô pyap ge, dì môt wê a nêl mi xam ngô ge, dì môt wê a mi vông vac xam mahigun di xam wê ge, xam lêc timu vô môt tigee vihati, ên xam obêc vông bêge ge od Anutu wê kiyang yuu môt malehe kehe ge obêc dô hixôn xam.

Tibii Pilipai vông mone la vô Pol

¹⁰ Ilage xam xo ên xam nêb xam ob ngidu a xôn ya mone lê, lêc xam tiyiên ma. Lêc gwêbaga xam tiyi wê xam ob ngidu a xôn ge dì om xam xo a tii vac nang dì ngidu a xôn ya mone, om a xêgyaa vô niviha yang dì a pimil Apumtau. ¹¹ A o nêl ên a nêbê susu ma ên a lêm. Ên a xovô pyap ên a nêbê niviha me nipaén obêc val vô a ge od pyap, ge a xêgyaa ob vô niviha. ¹² A tiyi wê a ob dô susu maén ge, dì a tiyi wê a ob tulec susu tibeac ge. A xovô wê yaén tibeac ge dì a xovô wê dôén vip ge. A xovô môt wê tulec ên susu ge dì môt wê susu maén ge. Vac niviha yuu nipaén ge a xovô môt wê a xêgyaa ob vô niviha tiyi buc vihati ge. ¹³ Kilisi vông xêkizêc wê i vông ge vô a, om a tiyi wê a ob le xêkizêc vac viyin yuu xôn niviha di vông yuac wê i vông vô a ge vihati.

¹⁴ Lêc xam vông môt niviha vô a ên wê xam ngidu a xôn ên viyin wê tulec a ge. ¹⁵ Xam Pilipai, xacxam va xovô pyap ên xam nêbê buc taxlee

wê a kô yuac xolac dì sea vigwe Masedonia ge od konglegesen ngwe o ngidu a xôn lêm. Nge, xacxam va ngidu a xôn dì vông mone vô a ên nêb il ngiduma xôn ên yuac i yêp niviha. ¹⁶ Dì buc wê a la dô vac vigwe Tesalonaika ge od xam vông mone lam vô a lu yuu. ¹⁷ Léc a o xo mone me susu ên a nêb xam vông i lam vô a lêm. Nge, a xo xam môci ên a nêb môp niviha tige wê xam mi vông ge i vô levac di vô nôn niviha ên i vông xam lêm i vô levac. ¹⁸ Ilage xam vông mone vô Epaplodaitas ên xam nêb i kô mi lam vông vô a ên a kô. Om mone wê xam vông i lam vô a ge tiyi a dì luu wê a nêb a ob kô

ge vêl. Om susu ti o ma vô a lêm. Mone wê xam vông i lam vô a ge tiyi xochê daa wê nivivea niviha wê xam vông vô Anutu ge. Om Anutu ob yê daa tige niviha dì kô hixôn xêyaa niviha. ¹⁹ Il nêd Anutu ge tu susu niviha vihati yang kehe. Om xam susu ti obêc ma ge od Anutu ob vông vô xam i tiyi wê xam nêb xam ob kô ge, ên wê xam tu Yesu Kilisi xe ge. ²⁰ Om il ob pimil il Mag Anutu i yêp luta lêc luta. Kiyang nôn.

Pol kiyang timuên

²¹ A nêl vidiiên vô xam vihati wê xam tu Yesu Kilisi xe ge. Dì lige vông vinên vihati wê dô hixôn a ga, he êno nêl vidiiên vô xam. ²² Xomxo vông vinên wê vông yuac vac king Sisa ben ge he mi xo xam nginong, om he êno nêl vidiiên vô xam, dì xomxo vông vinên vihati wê dô vac vigwe tiga ge nêl vidiiên vô xam.

²³ Vizid niviha wê Apumtau Yesu Kilisi vông ge i viac xam vihati.

KOLOSI Kipihac wê Pol kivuu vô tibii Kolosi ge

¹ A Pol wê Anutu vinoo a ya xovôên wê ici va vông ge ên nêb a tu Yesu Kilisi nu sinale ti. Il lig Timoti dô hixôn a, ² dì xii kivuu kipihac tiga vô xam Kolosi wê xam tu Anutu nue ge. Xam ge xii lige wê xam vông i vin Kilisi.

Il Mag Anutu i vông vizid niviha hixôn kiyang malehe i lam hivun xam xôn.

Pol xéyaa vô niviha ên tibii Kolosi

³ Tiyi buc vihati wê xii Timoti kitaa lec xam Kolosi ge, xii pimil Anutu wê il lig Apumtau Yesu Kilisi ma ge, ⁴ ên xii ngô wê xam vông i vin Yesu Kilisi di xam xêmyaa vin lec xomxo vông vinên vihati. ⁵ Ilage Anutu xolac niviha wê kiyang nôn ge val vô xam mi xam ngô. Xolac tige nêl bêga ên nêbê Anutu viac vizid hixôn nôr niviha vihati pyap gê lag puunê ên nêb ob vông vô xam timuên. Om môp vông vinên hixôn môp xéyaa vin lecên wê xam vông ge kehe bêga nêbê xam xovô dì xam bin vizid hixôn nôn niviha tigee. ⁶ Ilage xolac val vô xam mi xam ngô dì xovô kiyang nôn wê nêl kitong lec xéyaa vin lecén wê Anutu vông vô xam ge. Om gwêbaga xolac tige vô levac vac xam mahigun, dì la vô levac vac vigwe vihati dì vô nôn niviha vô xomxo tibeac. ⁷ Epaplas kô xolac mi loc nêl kitong vô xam Kolosi taxlee mi xam xovô. Epaplas ge Anutu nu yuac tiyi xocbê xii ge, dì xii xêmyaa vin lec i, dì i le vac xii nimpilêhê mi nêl xolac dì viac Kilisi yuac niviha, ⁸ dì Epaplas val nêl kitong vô xii lec môp xéyaa vin lecén wê Myakilôhô Ngibua vông vô xam mi xam timu vô ge.

Pol kitaa lec tibii Kolosi

⁹ Mêgem vô buc taxlee wê xii ngô kiyang lec môp niviha wê xam mi vông ge dì i val tyip gwêbaga hixôn, xii kitaa lec xam tiyi buc vihati di xii nim o ma lec kitaaên lêm. Nge, xii kitaa vô Anutu lec xam bêga ên xii nêbê i vông xovôên vô xam ên xam xovô môp niviha vihati wê Anutu xovô nêb xam ob vông ge, dì i vông xovôên levac hixôn piyôp niviha wê Myakilôhô Ngibua vông ge i dô vac xam nilôm dì hivun xam xôn. ¹⁰ Xam obêc kô xovôên wê Myakilôhô Ngibua vông ge od xam ob timu vô môp wê Apumtau nue vông ge, dì Anutu ob yê xam niviha, di xam ob vông yuac niviha wê ob vô nôn niviha ge, di xam ob xovô Anutu di xovôên tige ob vô levac vô xam. ¹¹ Xii kitaa vô Apumtau xêkizêc kehe lec xam bêga ên xii nêbê i vông xêkizêc vô xam êdêc xam le xêkizêc dì kilê viyin vihati hixôn xêmyaa niviha, ¹² dì xam pimil il Mag Anutu. Anutu nêb xam tiyi wê xam ob kô nôn niviha vihati wê nêl xam lêm lec ge tiyi xocbê xomxo vông vinên vihati wê dô vac xêseac ge ob kô. ¹³ Anutu vô il vêl ên xêkizêc yuu mapitoc wê Seten vông ge dì tung il la dô vac xêkizêc yuu xêseac wê Anutu nu tuc vông ge. Nu tuc ge wê Anutu xéyaa vin lec i, ¹⁴ dì i vô il vêl ên il nêd nipaên dì kitya il nêd nipaên vêl.

Anutu nu tuc hixôn yuac wê i vông ge

¹⁵ Il o xê Anutu lec madnôn lêm, lêc Anutu nu tuc ge tiyi xocbê Anutu vaci, dì i tu mugên ên susu vihati wê Anutu tung ge. ¹⁶ Èn nu tuc tu susu

lag yuu kibun vihati yang kehe, dì tung susu wê il xê hixôn susu wê il xêên ma ge vihati êno, om ici va tung he angela wê xêkizêc dì lê levac ge hixôn xomxo levac vihati. Anutu nu tuc tung susu vihati yang ên nêb he i pimil i lê dì vông yuac i tiyi xovôen wê i vông ge. ¹⁷ Nu tuc dô taxlee dì susu vihati ge ti o dô hixôn i lêm. Nge, ici va tung susu vihati, om gwêbaga he dô ya xêkizêc wê ici va vông ge. ¹⁸ Kilisi hixôn il xomxo vông vinên vihati tiyi xochê nôn tibed, lêc Kilisi tu il badzub. Kilisi ge mugên, dì ici va xomxo taxlee wê kidi lec maviha vac yibén ge, om tu xomxo hixôn susu vihati bazub dì ti o luu i vêl lêm. ¹⁹ Mêgem Anutu xovô nêb ob vông maviha yuu xêkizêc wê i vông ge vihati vô nu tuc, om vông i hivun nu tuc xôn. ²⁰ Ilage Anutu yê il hixôn susu lag yuu kibun vihati tiyi xochê il vông vevac vô i. Lêc Anutu nêb ob vilu vô xomxo hixôn susu vihati ge i loc dô vac i kwa ngibi. Om vông nu tuc lam yib lec xax pola dì kipyax i hi sea, om nu tuc vông kisoac mi le vac il Anutu mahigun dì hi ni nyagên wê Anutu vông vô il ge.

²¹ Ilage xam dô teva ên Anutu, dì xam piyôp vông vevac vô Anutu, dì xam mi vông môp nipaên. ²² Lêc Kilisi lam yib lec xax pola, om vông kisoac mi le vac il Anutu mahigun dì hi ni nyagên wê Anutu vông vô il ge. Kilisi vông bêge ên nêb ob kô il mi il la le vô Anutu manôn ên Anutu i yê il tiyi xochê xomxo ngibua wê il nilôd vô paha lec dì nipaên ti o yêp vô il lêm. ²³ Xam obêc nêb Anutu i yê xam tibêge ge od xam hôm môp vông vinên xôn pilahi, dì le xêkizêc, dì susu ti i o lêc vông xam sea môp wê xam bin nôn niviha wê xam ob kô timuên ge lêm. Xolac nêl nôn niviha kitong vô xam mi xam ngô ilage. Xolac tige, xomxo la nêl vô xomxo kibun ga vihati, dì a Pol, a tu xolac tige nu yuac.

Pol ngidu tibii Kolosi xôn

²⁴ Gwêbaga tibii ya vông viyin yuu myavinê vô a ên wê a ngidu xam xôn ya xolac ge. Lêc a xêgyaa vô niviha, ên myavinê ya wê o la lec Kilisi hixôn lêm ge, ya gên yêp. Om a ob kô vihati lec nignivi ên i ngidu xam wê xam vông i vin ge xôn. Ên il hixôn Kilisi tiyi xochê nôn tibed. ²⁵ Anutu vaci vinoo a ên nêb a tu xomxo vông vinên nu yuac ti wê a ob ngidu xam xôn ge, om vông yuac vô a ên nêb a la nêl Anutu xolac vihati kitong i yêp seac. ²⁶ Vô buc vihati ilage Anutu xolac wê nêl Yesu kitong ge yêp xôpacên om xomxo vihati yang lungên. Lêc gwêbaga, Anutu vông xolac tige lam yêp seac vô il wê il vông i vin Yesu ge. ²⁷ Anutu nêb ob nêl kitong vô il ên il xovô bêga bê kiyang wê yêp xôpacên ilage ge kiyang niviha yang tiyi wê obêc ngidu xomxo vihati ge xôn. Om nêl kiyang tige kitong vô xam wê xam o Yuda lêm gee êno. Kiyang xôpacên tige nêl ên nêbê Kilisi dô hixôn xam, om xam dô bin buc wê Kilisi obêc tung xam la dô vac xêseac wê i vông ge. ²⁸ Xe nêl Kilisi kitong i yêp seac, dì xe tixuu xomxo toto ya xovôen vihati, dì xe viac kiyang niviha vô he. Xe vông yuac tibêge ên xe nêb xe ob kô he toto mi la le vô Anutu manôn ên Anutu i yê he i tiyi xochê xomxo wê xovô Kilisi pyap ge. ²⁹ Om yuac tibêge yuac levac wê a vông ya xêkizêc levac wê Kilisi vông vô a ge.

¹ A nêb xam xovô bêga bê a vông yuac levac ên a nêb a ob ngidu xam Kolosi di tibii Leodisia hixôn xomxo vông vinên vihati wê o yê a magnôn lêm ge xôn. ² Om a vông yuac levac ên a nêb xam nilôm i vô niviha di xam xêmyaa i vin lecma, di xam kô xovôên levac ên xovôên tige i vông xam le xêkizêc vac vông vinên di i vô nôn niviha vô xam. Di a nêb xam xovô Anutu kiyang wê yêp xôpacên ge kehe, ên kehe ge Kilisi vaci. ³ Èn piyôp yuu xovôên niviha wê Anutu vông ge vihati yêp vô Kilisi vaci.

⁴ A nêl kiyang tiga vô xam ên a nêb xomxo ti i o kityoo xam ya kiyang hizi lêm. ⁵ A dô teva lêc a xo xam tiyi xocbê a dô hixôn xam ge, om a nilôg vô niviha ên wê xam vông môp niviha di vông i vin Kilisi xêkizêc ta ge.

Xam dô hixôn Kilisi di hôm i xôn pilahi

⁶ Xam vông i vin Apumtau Yesu Kilisi pyap, om xam lêc timu vô i vixa, ⁷ di hôm Kilisi xôn xêkizêc i tiyi xocbê xax ngilôhô la hôm kibun xôn ge, di xam le xêkizêc hixôn Kilisi i tiyi xocbê xumac le lec teac kisii mi le pilahi. Om xam le xêkizêc ya vông vinên wê xe tixuu xam ya ilage. Di xam pimil Anutu i tiyi buc vihati.

⁸ Xam viac xam niviha, ên xomxo ya nêb ob kityoo xam di ku xam xôn ya kiyang vaxvax wê ob vô nôn niviha lêm ge. Kiyang wê he mi nêl ge he nêl tiyi xocbê bue vông ilage, tiyi xocbê môp yuu xovôên wê yêp gê kibun ga. Di he o nêl kiyang nôn wê Kilisi vông ge ti lêm.

⁹ Xam xovô pyap ên xam nêbê Kilisi ninivi tiyi xocbê xomxo kibun ga, lêc Anutu vông xêkizêc yuu xovôên wê i vông ge vihati hivun Kilisi xôn, om yuu xôn tiyima. ¹⁰ Di xam dô hixôn Kilisi om Anutu vông maviba dôen nôn hivun xam xôn. Kilisi ge wê luu xomxo wê piyôp levac ge hixôn xêkizêc vihati ge vêl. ¹¹ Xomxo Yuda mi gôl he ninivi ên he nêb i nêl kitong bê he tu Anutu nue. Di xam êno tu Anutu nue, lêc xam o gôl nimnivi lêm. Nge, xam vông i vin Kilisi om Kilisi lipac xam nilôm vô paha lec di vông xam sea môp nipaên wê xam nimnivi xovô ge, om ge nêl kitong nêbê xam tu Anutu nue. ¹² Môp wê xam lipac mia ge tiyi xocbê xam wib hixôn Kilisi, di dô vac lôva hixôn i, di kidi lec mamviha vac yibén hixôn i, ên xam vông i vin ên xam nêbê xêkizêc wê Anutu vông ge vông Yesu kidi lec maviba vac yibén. ¹³ Ilage xam vông môp nipaên viyang viyang ge di timu vô môp kibun wê xam nilôm xovô ge. Om xam dô tiyi xocbê xam wib di la dô teva ên Anutu. Lêc Anutu kitya xam nêm nipaên vêl om vông xam dô mamviha hixôn Kilisi. ¹⁴ Xolac wê Anutu vông vô Moses ge nêl il nêd nipaên kitong. Lêc Anutu hi il nêd nipaên vihati la lec xax hixôn Kilisi, om il wê il vông i vin ge, Anutu kitya il nêd nipaên vêl di vông xolac tikwê wê Moses vông ge tip la vêl. ¹⁵ Môp yibén wê Kilisi vông ge vông xêkizêc wê Seten he nue yuac vông ge tip la vêl, om Kilisi nginoo Seten he nue yuac vêl di vông xomxo yê he tiyi xocbê susu vidaaën.

Xam wib hixôn Kilisi

¹⁶ Kilisi kitya xam nêm nipaên vêl, om le i lêc ngô kiyang wê xomxo ya kidu xam ên nêb xam timu vô ge lêm. Èn môp wê he nêl ge môp kibun, xocbê môp yaên yuu numên, di môp lec klismas paha hixôn dentuc paha di da vihati. ¹⁷ Môp tigee tixuuên pileva, ên he tixuu lec môp wê ob val timuên ge. Lêc Kilisi ge nôn vixôhilôg. ¹⁸ Xomxo ya yong he ên nêb he yê vivia, di yong he ên nêb he vông heche va vô nipwo lec di yev vixa kitu vô angela. Lêc xam vibu he di ngôen he kiyang i ma. Èn he so ên he

nêbê môp wê he vông ge luu xam vông môp vêl. Lêc he yong he pileva, ên piyôp wê he vông ge la timu vô môp kibun ga, ¹⁹ dì he o hôm Kilisi xôn piliih lêm. Il hixôn Kilisi tiyi xochê xomxo nôn tibed, lêc Kilisi tu il badzub. Di bazub viac nôn vihati dì vông kilôhô hixôn len di ninivi vihati kitcumta tu nôn tibed di lig mi vô levac ya xêkizéc wê Anutu vông ge.

²⁰ Xam wib pyap hixôn Kilisi om xam sea môp kibun ga vihati. Bêna lêc xam lax vông môp tiyi xochê xomxo kibun ga ge? Bêna lêc xam la vac xolac baba wê nêl bêga ên nêbê, ²¹ “Le i lêc hôm susu tigee lêm, dì le i lêc ya yaén tigee lêm, dì le i lêc vyax vigêm lec susu tigee lêm.” ²² Susu wê xolac baba nêl lec ge, il ob vông yuac ya, lêc he xôa obêc ma timuên. Xomxo kibun ga heche va nêl kiyang lec susu tigee. ²³ Dì he kitaa vô angela, dì he yê heche va nipaên di vông he ninivi vô nipaên. Môp tigee hi xomxo manôñ lec om he so nêb môp niviha. Lêc môp tigee o tiyi wê ob vông he kol he ninivi ên nipaên ge lêm.

3

Anutu tipi vô il kidi lec madviha hixôn Kilisi

¹ Anutu tipi vô xam kidi lec mamviha hixôn Kilisi, om xam vông nilôm i loc vô nôn niviha wê yêp lag puunê ge. Ên Kilisi tu il nêd levac mi la dô lag puunê vô Anutu vigê hiyôv. ² Xam vông piyôp i loc dîluhu vô nôn niviha wê yêp lag puunê ge, dì le i lêc vông piyôp i loc vô susu kibun ga lêm. ³ Ên xam wib hixôn Kilisi, om Kilisi hôm maviha dôen wê xam vông ge mi viac i yêp niviha, dì kehe yêp vô Anutu. ⁴ Kilisi ge maviha dôen wê il vông ge kehe, om vô buc timuên wê Kilisi obêc lop mi lôm le seac ge od xam êno obêc lam le pikeb i vac xêseac wê i vông ge.

Il vô paha lec

⁵ Xam obêc kô xêseac wê Kilisi vông ge, om xam lêc sea môp kibun ga wê yêp vac xam nilôm ge i loc yêp xel. Môp nipaên tigee bêga nêbê môp yôdac vêx yuu vux, môp ningeac, môp yôdac viyang viyang wê xam nimnivi xovô ge, môp nipaên wê xam nilôm kidu xam ên nêb xam vông ge, dì môp wê xam wê xomxo ngwe susu di nilôm yetac ên ge, ên môp tige tiyi xochê xam yev vixam kitu vô anutu kityooên. ⁶ Anutu xêyaa vô myavinê vô xomxo wê vông môp nipaên tibêgee, om obêc vông myaviwen nipaên vô he. ⁷ Ilage xam dô hixôn xomxo wê mi vông môp nipaên tibêgee om xam mi timu vô môp nipaên tibêgee vihati.

⁸ Lêc gwêbaga a ob nêl vô xam bê xam sea môp nipaên vihati i loc yêp xel. Môp nipaên bêga nêbê môp kunacmaên, dì môp xêyaa myavinê, dì môp wê xam nêb xam ob vông xomxo ngwe vô nipaên ge, dì môp wê xam nêl kiyang nipaên lec xomxo ge, dì môp wê kiyang yacyac tyip vac xam myam dì vông xam ngilooma dì pipingma ge. ⁹ Le i lêc nêl kiyang kityooên vôma lêm, ên ilage xam sea môp nipaên wê yêp vac xam nilôm ge la vêl, ¹⁰ dì xam vô paha lec pyap, ên Anutu vaci wê vông xam nilôm vô paha lec ge, dì Anutu ob vông yuac vac xam nilôm i tiyi buc vihati ên xam xovô i dì dô i tiyi xochê ici va ge. ¹¹ Om xomxo Glik dì xomxo Yuda, dì he wê gôl ninivi ge, hixôn he wê o gôl ninivi lêm ge, dì tibii madiluhu, dì xomxo vimen wê dô vac nita ge, dì xomxo wê vông yuac vidaaën vô xomxo ge, hixôn he wê viac heche va yuac ge, Kilisi yê il vihati tiyima, ên Kilisi vaci wê tu il vihati kehe dì i dô hixôn xomxo vihati.

Môp niviha wê il ob timu vô ge

¹² Anutu vinoo xam pyap ên nêb xam tu i nue, dì i xêyaa vin lec xam. Mêgem xam lêc timu vô môp niviha bêga bê xam xo vigwe pisiv ên xomxo, dì vông niviha vô he, dì xam pilepac xam mi vô nipwo lec, dì xam lum nêl kiyang malehe vô xomxo, dì le i lêc vông nipaên vac nipaên lêm. ¹³ Nge, lime ti obêc vông nipaên vô ông ge od ông kitya i nêm nipaên vêl dì vông niviha vô i. Ên il Apumtau kitya xam nêm nipaên vêl, om xam êno, xam kitya lime nêm nipaên vêl. ¹⁴ Dì xam xêmyaa i vin lecma, ên môp xêyaa vin lecma ên wê ob vông môp niviha vihati ngiduma xôn dì ob vông xam dô kidu tibed. ¹⁵ Kilisi tyuc il ên nêb il tu nôn tibed dì dô vac kiyang malehe nilô. Om xam vông kiyang malehe wê Kilisi vông ge i yêp vac nilôm ên i viac xam, dì xam pimil Anutu i tiyi buc vihati. ¹⁶ Xam hôm Kilisi kiyang xôn pilihî mi i yêp vac nilôm dì xam xovô i niviha. Dì xam tixuu lime ya xolac di viac kiyang niviha vôma ya xovô ên niviha vihati. Xam pimil Anutu vac nilôm dì vông lilo wê pimil ên i lê ge hixôn lilo da, dì lilo wê Myakilôhô Ngibua vông vô xam ge. ¹⁷ Dì kiyang vihati wê xam ob nêl ge hixôn yuac vihati wê xam ob vông ge, od xam nêl xam kiyang dì vông xam yuac vihati lec Apumtau Yesu lê, dì xam pimil il Mag Anutu hixôn lec Yesu lê.

Kiyang lec vux hixôn vinêe nue

¹⁸ Xam vêx gee, xam loc vac liyame vông kiyang kwa ngibi, ên môp tibêge tiyi wê Apumtau nêbê vêx ob vông ge. ¹⁹ Xam vux gee, xam xêmyaa i vin lec vinême, dì le i lêc vông nipaên vô he lêm.

²⁰ Xam nuge, xam vô ninyam lehe vô kiyang vihati wê tame mame nêl ge dì loc vac he kwa ngibi, ên Apumtau ob yê môp tibêge nêb niviha. ²¹ Dì xam mae, le i lêc vông nume nilô i vô nipaên dì he xêyaa i vô myavinê lutibed vô xam lêm, ên xam ob vông he nilô vô viyin dì he ob xo ên nêb xam xêmyaa o vyac vin lec he lêm.

Kiyang lec xomxo levac hixôn nue yuac

²² Xam wê xam tu xomxo levac nue yuac ge, xam loc vac kiyang vihati wê xomxo levac nêl ge kwa ngibi. Le i lêc kityoo dì hi xomxo levac manôn lec ya yuac lêm, ên ge tiyi xocbê xam nêb xomxo i yê xam niviha. Om xam nilôm i o lêc vông yuu lêm. Nge, xam nilôm i loc tibed vô yuac wê xam ob vông ge, dì xam xona ên Apumtau. ²³ Dì yuac vihati wê xam vông ge, xam vông ya nilôm tibed dì nim i o lêc ma lêm, ên tiyi xocbê xam o vông yuac vô xomxo kibun ga ti lêm. Nge, xam vông yuac vô Apumtau. ²⁴ Xam xovô bê xam obêc vông xam yuac i yêp niviha ge od vô buc timuên Apumtau obêc vông nôn niviha wê nêl xam lêm lec ge vô xam, ên yuac wê xam mi vông ge, xam vông vô Apumtau Yesu Kilisi. ²⁵ Lêc xomxo wê vông môp nipaên ge, Anutu obêc vông myaviwen vô he lec nipaên wê he toto vông ge, ên Anutu obêc yê xomxo mangwe levac dì mangwe nipwo lêm. Nge, yê il vihati tiyima.

4

¹ Xam xomxo levac wê viac nume yuac ge, xam vông niviha vô he di viac he niviha. Xam xovô bê xam êno, xam nêm levac dô kisii ganê dì yê môp wê xam vông ge.

Kiyang lec mōp kitaaēn hixōn xolac nēlēn

² Xam hôm mōp kitaaēn xôn pilihi i tiyi buc vihati dì seaēn i ma. Wê xam obêc kitaa ge od xam vông piyôp i loc vô kitaaēn vaci, dì xam pimil Anutu ya kitaaēn. ³ Dì xam kitaa vô Anutu lec xe êno bêga bê Anutu i ngidu xe xôn di hilung mōp vô xe ên xe nêl Kilisi kiyang wê yêp xôpacên ilage i yêp seac. Gwêbaga tibii tung a lam dô vac xumac kalabuhu ga ên wê a nêl xolac ge. ⁴ Om xam kitaa lec

a, ên buc wê a obêc nêl Kilisi xolac ge od a nêl xolac i yêp seac, ên yuac tige wê Anutu vông vac a vigêg.

⁵ Môp wê xam vông vac tibii madiluhu mahigun ge, xam vông ya xovôen niviha i tiyi buc vihati dì xam o sea buc ti i loc vidaaēn lêm. ⁶ Kiyang vihati wê xam ob nêl ge, xam nêl kiyang niviha wê ob vô nôn niviha ge. Ên xam obêc nêl bêge ge od xam ob tiyi wê xam ob luu kiyang niviha vô xomxo toto ge.

Pol vông Tikikas yuu Onisimas la vô tibii Kolosi

⁷ Tikikas ob nêl a kitong vô xam. Tikikas ge il lig vông vinêñ ti wê il xêdyaa vin lec i ge, dì i xomxo ti wê vông yuac niviha ge dì vông Apumtau yuac hixôñ xe. ⁸ Om a vông i loc vô xam ên a nêb i loc nêl kitong bê xe dô tibêna vac xumac kalabuhu ga, ên i vông xam nilôm i vô viyin maén. ⁹ Dì a vông Onisimas i loc hixôñ Tikikas. Onisimas ge xam Kolosi lime ti dì il lig vông vinêñ ti wê vông Anutu yuac niviha ge, dì il xêdyaa vin lec i. Om yuu Tikikas ob nêl kitong vô xam lec viyin yuu niviha wê tulec a vac vigwe ga.

Kiyang viwen timuêñ

¹⁰ Alistakas wê lam dô vac xumac kalabuhu ga hixôñ a ge nêl vidiiêñ vô xam, dì Mak wê Banabas ngidê ge êno nêl vidiiêñ vô xam. Mak obêc miloc vô xam ge od xam kô i lec niviha i tiyi xocbê kiyang wê a vông i loc vô xam ilage. ¹¹ Dì Jisas wê lê ngwe nêbê Jastas ge nêl vidiiêñ vô xam. Xomxo Yuda tibeac vông i vin Yesu, lêc Alistakas, Mak, di Jastas, yonbed wê yon vông yuac hixôñ a mi xe nêl Anutu xolac vô tibii tibeac. Dì yon ge wê yon ngidu a xôn di vông a nilôg vô viyin maén.

¹² Epaplas nêl vidiiêñ vô xam. Epaplas ge xam Kolosi lime ti wê tu Yesu Kilisi nu yuac, di i kitaa vô Anutu lec xam tiyi buc vihati nêb Anutu i vông xam le xêkizêc vac vông vinêñ wê xam vông ge, dì i vông xovôen vô xam ên xam xovô mōp niviha vihati wê Anutu xovô ên nêb xam vông ge. ¹³ A xovô pyap om a nêl kitong vô xam bêga bê Epaplas vông yuac levac ên nêb ob ngidu xam Kolosi hixôñ tibii Leodisia dì he Hilapolis xôn. ¹⁴ Il docta Luk wê il xêdyaa vin lec i ge hixôñ Dimas, yuu nêl vidiiêñ vô xam.

¹⁵ Xam nêl vô lime vông vinêñ vac vigwe Leodisia bê a nêl vidiiêñ vô he. Dì xam nêl vô vêx ti lê nêbê Nimpa hixôñ xomxo vông vinêñ wê he kitucma mi yê da vac i ben ge bêga bê a nêl vidiiêñ vô he êno. ¹⁶ Xam obêc kitong kipihac tiga pyap ge od xam vông i loc vô konglezes vac vigwe Leodisia ên he i kitong êno. Dì kipihac wê a vông i la vô he Leodisia ge, he i vông i lam vô xam Kolosi ên xam êno kitong. ¹⁷ Xam nêl vô Akipas bêga bê, “Ông viac yuac wê Apumtau vông vô ông ge dì vông yuac tige i vô nôn niviha.”

18 A, Pol, a kivuu kiyang tiga ya vigêg dì a nêl vidiiên vô xam. Xam lêc xovô wê a gên dô vac xumac kalabuhu ga. Vizid niviha wê Anutu vông ge i dô hixôn xam vihati.

1 TESALONAIKA

Kipihac tax ngwe wê Pol kivuu vô tibii Tesalonaika ge

¹ A, Pol, xen Sailas yuu Timoti, xen kivuu kiyang ga vô xam Tesalonaika wê xam vông i vin Mag Anutu yuu Apumtau Yesu Kilisi ge.
Vizid niviha di kiyang malehe i hivun xam xôn.

Xomxo Tesalonaika vông i vin xêkizêc di dô vac Anutu môp bôbac

² Xe mi pimil Anutu tiyi buc vihati ên xam, di xe mi kitaa vô Anutu lec xam, ³ di xe xovô môp niviha wê xam vông ge, om xe mi nêl xam kitong vô il Mag Anutu ên xe nêbê xam vông i vin niviha om xam mi vông yuac niviha, di xam xêmyaa vin lec Yesu om xam mi vông yuac xêkizêc, di xam mi vông i vin xêkizêc bêga ên nêbê Apumtau Yesu Kilisi ob lop mi lôm vô buc timuên, om xam diyaxênc buc tige. ⁴ Xam lige, xe xovô bêga ên xe nêbê Anutu xêyaa vin lec xam di ici va vînoo xam ên nêbê xam tu i xe, ⁵ ên buc wê xe loc nêl Anutu xolac vô xam ge od xe o nêl tiyi xocbê kiyang pileva ge lêm. Nge, xe nêl xolac hixôn xêkizêc wê Anutu Myakilôhô Ngibua vông ge, om xam ngô di vông i vin, di xam nêl ên xam nêbê xolac ge kiyang nôn vixôhilôg. Di xam xovô môp niviha wê xe vông vac xam mahigun ên xe nêbê i ngidu xam xôn ge.

⁶ Om gwêbaga xam mi timu vô môp wê xe hixôn Apumtau vông ge, ên xam vông i vin xolac di kô viyin lec, lêc Anutu Myakilôhô Ngibua ngidu xam xôn di vông xam nilôm vô niviha. ⁷ Om xomxo vông vinênc vihati vac vigwe levac Masedonia yuu Glik ngô wê xam Tesalonaika le xêkizêc vac vông vinênc, om tiyi xocbê xam hilung môp niviha tige vô he. ⁸ Om môp wê xam vông ge vông Apumtau kiyang la vô levac vac vigwe Masedonia yuu Glik vihati. Lêc o vigwe yuubed ge lêm. Nge, la vô levac vac vigwe tibeac hixôn, om xomxo vihati ngô wê xam Tesalonaika vông i vin Anutu ge, mêgem xe ob nêl vông vinênc wê xam vông ge kitong vô he lêm, ên heche va ngô pyap. ⁹ Di tibii Masedonia yuu Glik heche va nêl xam kitong ên nêbê buc taxlee wê xe loc vô xam Tesalonaika ge od xam kô xe lec niviha, di sea anutu kityooën wê mayibén ge di pilepac xam nilôm la vô Anutu nôn wê maviha kehe ge ên xam nêbê xam ob tu i nue yuac. ¹⁰ Di he nêl xam kitong ên nêbê xam diyaxênc buc wê Anutu nu tuc ob sea ben lag puunê di lop mi lôm ge. Anutu nu tuc ge wê yib lêc Anutu tipi vô i kidi lec maviha vac yibén. Ge Yesu wê ob vô il vêl ên Anutu xêyaa myavinê wê ob val vô xomxo lec buc timuên ge.

2

Pol vông yuac gê Tesalonaika

¹ Xam lige, xacxam va xovô ên xam nêbê ilage wê xe loc dô hixôn xam ge od yuac wê xe vông vac xam mahigun ge o tô vac lêm, ên xam ngô xe kiyang di vông i vin. ² Di xam xovô pyap ên xam nêbê buc taxlee ge xe mila dô vigwe Pilipai, lêc he ya vông viyin levac vô xe di nêl kiyang nipaén lec xe hixôn. Mêgem xe sea he di pec mi loc vô xam Tesalonaika, mèdec xomxo mangwe vac xam bom vông viyin vô xe ên wê xe nêl xolac

vô xam ge. Mêlêc il nêđ Anutu ngidu xe xôn om xe nêđ Anutu xolac vô xam dì xonaên ma.³ Kiyang wê xe nêđ vô xam ge, xe o nêđ kiyang soën ti lêm, dì xe o xo kiyang tibeac nêđ xam ngidu xe xôn lêm, dì xe o nêđ xe ob kityoo xam lêm. Ge o kiyang wê xe nêđ ge kehe lêm,⁴ dom kehe mô bêga nêđê Anutu yê dì xovô pyap ên nêđ nipaên ti o yêp vac xe nilôm lêm, om nêđê xe tiyi wê xe ob vông yuac xolac nêđen ge. Mêgem xe mi nêđ xolac vô xomxo, lêc xe o nêđ xolac ên xe nêđ xomxo i yê xe niviha lêm. Nge, xe nêđ xolac dì vông yuac ên xe nêđ Anutu vaci wê diyê dì xovô xe nilôm ge i yê xe niviha.⁵ Xam xovô pyap ên xam nêđ xe o nêđ kiyang hizi vô xam lêm, dì Anutu vaci yê pyap dì xovô bêga ên nêđ xe o viyum kiyang madoën vac kiyang niviha lêm.⁶ Dì xe o vông yuac ên xe nêđ xam pimil xe lêm, me xomxo ba he i pimil xe lêm. Lêc xe ga Kilisi nue sinale xe, om xe tiyi wê xe ob nêđ dì xam vông xe lêm vô levac. Lêcom xe o nêđ bêge vô xam lêm.⁷ Nge, xe dô mamlehe vac xam mahigun dì viac xam tiyi xochê nipwo ti ta viac i ge.⁸ Xe xêmyaa vin lec xam om xe nêđ xe ob nêđ Anutu xolac niviha vô xam, dì xe nêđ xe ob ngidu xam xôn lê, lêc xe obêc xib lec yuac wê xe vông ge od pyap, ên xe xêmyaa vin lec xam.⁹ Xam lige, xam xovô pyap ên yuac levac wê xe mi vông vac xam mahigun vô vidiiën yuu bucêñ vihati ge. Xe vông yuac xêkizêc lec xolac nêđen dì vông nêđ yuac bisnis hixôn ên xe nêđ xe ob kô mone ên kisuu xom yaên lec dì xe ob vông viyin vô xam ên xe xom yaên lêm.

¹⁰ Xam xovô pyap dì Anutu êno yê dì xovô môt wê xe mi vông tiyi buc vihati wê xe miloc dô hixôn xam wê xam vông i vin ge. Môt vihati wê xe mi vông ge môt ngibua dì môt bôbac, dì ti o so lêm.¹¹ Dì xam xovô ên xam nêđ xe viac xam toto tiyi xochê nipwo wê ma viac i ge. Mêgem xe didii xam vac môt niviha, dì nêđ kiyang wê ob ngidu xam xôn ge vô xam, dì xe viac kiyang niviha vô xam,¹² ên xe nêđ xam timu vô môt niviha vihati wê Anutu vông ge. Anutu ge wê tyuc xam ên nêđ xam lam vac i ben dì lam dô vac xêseac wê i vông ge hixôn i nue vông vinêñ vihati.

Tibii Tesalonaika le xêkizêc vac viyin

¹³ Tiyi buc vihati xe pimil Anutu lec môt ngwe wê xam vông ilage bêga nêđê ilage xam ngô Anutu xolac wê xe nêđ ge dì kô pilahi ên xam nêđ kiyang ge o xomxo pivulac pileva ti lêm. Nge, xam nêđ xe Anutu kiyang nôn vixôhilôg. Om xam nêđ vixôhilôg, ên ge Anutu kiyang nôn mê. Kiyang tige divông yuac xêkizêc vac xam wê xam vông i vin ge nilôm.¹⁴ Xam lige, xam tiyi xochê konglegesen viyang viyang wê he Yuda vông, wê dô vac vigwe levac Judia ge. Ên he vông i vin Yesu Kilisi dì tu Anutu nue, lêc he lie ya vông viyin vô he. Om xam tiyi xochê he, ên xam lime ya vông viyin vô xam lec vông vinêñ wê xam vông ge.¹⁵ Xomxo Yuda gee wê mae bue ilage hi plopete yib. Nang dêc he hi Apumtau Yesu yib, dì gwêbaga he vông viyin vô xe lec xolac dì tii xe la, dì he vông Anutu yê he nipaên, dì he vông vevac vô xomxo vihati,¹⁶ ên he le vac xe môt xôn ên nêđ xe o la nêđ Anutu kiyang vô tibii viyang ba lêm. Anutu kiyang tige tiyi wê ob vô xomxo vêl ên he nêđ nipaên. Lêc he Yuda le vac xe xôn. Om he nêđ nipaên vô levac vô he ên môt nipaên wê he vông ilage dì vông gwêbaga hixôn. Mêgem Anutu xêyaa myavinê lam yêp vô he gwêbaga.

Pol nêđ ob yê he i tii vac nang

¹⁷ Xam lige, xomxo Yuda tii xe vêl ên xam, om xe lam dô teva ên xam buc myabo dì xe o xê xam mammôn lêm. Lêc xe xo xam tiyi buc vihati dì xe myag môp wê xe ob lôc mi loc xê xam i tii vac nang ge, dì xe nilôm vô viyin ên wê xe o loc xê xam lêm ge. ¹⁸ Ên xe nêb xe ob lôc vô xam, lêc xe o tiyi lêm. A Pol, a myag môp lu tibeac ên a nêb a ob lôc vô xam, lêc Seten le vac môp xôn ên a. ¹⁹ Lêc xe nêb xe ob xê xam mammôn, ên buc timuên wê Yesu obêc lop mi lôm dì il le vô i manôn ge od Yesu obêc yê letyae dì vông vizid niviha vô xe lec wê xe nêl xolac vô he ge, di letyae obêc vông xe xêmyaa vô niviha, dì xe obêc nêl kiyang vô Yesu lec letyae ên nêbê he vông xe yuac vô nôn lec? Xacxam va mê. ²⁰ Ên xam ge wê xam vông xe lêm vô levac dì vông xe xêmyaa vô niviha.

3

Pol vông Timoti la ngidu he xôn

¹ Ilage xe tiyiên ma wê xe ob loc vô xam ge, ên môp ma, om vông viyin vô xe, ên xe xo xam lê, lêc mad xii Sailas nêb xii ob dô Atens, ² dì xii ob vông Timoti i lôc vô xam. Timoti ge, il lig dì Anutu nu yuac ti wê nêl Kilisi xolac ge. Om xii vông Timoti lôc ên xii nêb i lôc ngidu xam xôn ên vông vinên wê xam vông ge i yêp xêkizêc ta ³ dì viyin wê xomxo vông vô xam ge i o lêc pilepac xam ti lêm. Xacxam xovô pyap bê Anutu nêb il obêc kô viyin. ⁴ Ên ilage wê xe loc dô hixôn xam ge od xe nêl kitong vô xam ên xe nêbê il obêc kô viyin lec vông vinên wê il vông ge. Mêgem xam xovô pyap ên xam nêbê xe kiyang tige vô nôn lec dì il xôn kilê viyin. ⁵ Mêgem a nilôg viyin ên xam om a vông Timoti lôc mi loc vô xam ên a nêb i lôc yê xam ên a ob xovô bê vông vinên wê xam vông ge diyêp xêkizêc, me? Ên a dixo ên a nêb mêt Seten kityoo xam dì kitya yuac wê xe vông vô xam ge vêl.

Pol xêyaa vô niviha ên wê he divông i vin xêkizêc ge

⁶ Mêgem Timoti milôc vô xam dì kô kiyang yuu yuac wê lôc yê ge mi lôm lam nêl vô xe, dì nêl xam kiyang yuu yuac niviha kitong vô xe. Om nêl ên nêbê vông vinên wê xam vông ge diyêp xêkizêc dì xam xêmyaa vin lec xomxo vihati. Nang dêc nêl ên nêbê xam mi xo xe dì xam nilôm vô niviha ên xe dì xam nêb xam ob wê xe mammôn tiyi xochê xe nêb xe ob xê xam mammôn ge. ⁷ Xam lige, xe ngô wê xam vông i vin xêkizêc ta ge, mêgem vông vinên wê xam vông ge ngidu xe xôn vac viyin wê tulec xe ge, ⁸ ên xam obêc vông nilôm i la diluhu vô Apumtau dì le xêkizêc ta ge od ge wê ob vông xe dô niviha. ⁹ Om gwêbaga xe tiyi wê xe ob pimil Anutu ên xam ge. Mêgem xe le vô il Anutu manôn dì pimil i nginong nginong ên wê xam vông xe xêmyaa vô niviha yang ge. ¹⁰ Di xe kitaa vô Anutu tiyi bucên yuu víddiên vihati ên xe nêb i vông môp vô xe ên xe lôc xê xam mammôn i tii vac nang, dì vông vinên wê xam vông ge tiyiên obêc ma ge od xe ob ngidu xam xôn ên xam vông i vin xêkizêc ta.

Pol kitaa vô Anutu ên nêb i vông môp wê ob la yê he ge

¹¹ Mêgem xe kitaa vô il Mag Anutu yuu il Apumtau Yesu bêga bê yuu i vông môp wê xe ob lôc xê xam ge vô xe. ¹² Di xe kitaa vô Apumtau ên xe nêb i vông môp xêyaa vin lecên i hivun xam xôn dì i vô levac vac xam mahigun êdêc xam xêmyaa i vin lecma dì xêmyaa i vin lec xomxo

vihat i tiyi xocbê xe xêmyaa vin lec xam ge. ¹³ Xe kitaa bêge ên xe nêb Anutu i vông xam le xêkizêc ta, dì obêc buc timuên wê Apumtau Yesu obêc lop mi lôm hixôn xomxo vông vinên vihati ge od xam obêc le vô il Mag Anutu manôn, dì kiyang soên ti ob yêp vô xam lêm, om Anutu obêc yê xam niviha tiyi xocbê xomxo ngibua ge.

4

Môp wê Anutu yê niviha ge

¹ Xam lige, a ob nêl kiyang ngwe hixôn. Ilage xe tixuu xam ya môp niviha vihati ên xe nêb xam timu vô ên Anutu i yê xam niviha. Om xam mi timu vô môp tibêgee. Lêc gwêbaga xe tu Apumtau Yesu manôn dì nêl xêkizêc vô xam i tii vac nang bêga bê xam vông môp tibêgee vihati i vô levac, ² ên xam xovô môp yuu kiyang wê Apumtau Yesu vông vô xe dì xe nêl vô xam ge. ³ Môp wê Anutu nêb xam ob timu vô ge bêga bê xam tu xomxo ngibua wê nipaên ti o yêp vô xam lêm ge. Dì xam xona nêm ên môp yôdac vêx yuu vux. ⁴ Xam vux ge, xam obêc nêb ii vêx ge od xam timu vô môp iimaén wê Anutu hixôn lime vông vinên ob yê nêb niviha ge, ⁵ dì le i lêc yetac ên vêx wê diloc ge lêm ên ge môp nipaên wê tibii madiluhu wê lungén Anutu ge mi vông ge. ⁶ Le i lêc kityoo lime di vông he i vô nipaên lec môp tibêge lêm, ên xe nêl vô xam ilage ên xe nêbê Apumtau obêc vông myaviwen nipaên lec môp bêge, ⁷ ên Anutu o hilung môp ningeac tibêge vô il lêm. Nge, tyuc il ên nêb il tup vô môp niviha wê xêseac ge. ⁸ Mêgem xomxo ti obêc vô nimi vô Anutu kiyang tiga ge od o vô nimi vô xomxo kibun ga lêm. Nge, vô nimi vô Anutu wê vông Myakilôhô Ngibua wê i vông ge lam dô hixôn il ge.

⁹ Lêc môp wê xam xêmyaa ob vin lec lime ge, a ob kivuu kiyang ti vô xam lec môp tige lêm, ên Anutu vaci hilung vô xam pyap, om xam xêmyaa mi vin lecma, ¹⁰ dì xam xêmyaa vin lec xomxo vông vinên wê dô vac vigwe Masedonia gee vihati hixôn. Lêcom xe nêl xêkizêc vô xam bêga bê xam vông môp xêyaa vin lecén i vô levac, ¹¹ dì xam dô vac kiyang malehe, dì timu vô xam toto yuac bôbac, dì vông yuac ya xacxam va vigêm i tiyi xocbê xe nêl vô xam ilage, ¹² êdêc tibii madiluhu he i yê xam niviha, dì xam ob vông viyin vô lime lec yaênn yuu susu lêm.

Apumtau obêc lop mi lôm

¹³ Xam lige, xe nêb xe ob nêl kitong vô xam lec lime vông vinên wê yib ge, ên xam xovô dì xam nilôm i o lêc vô viyin ên he i tiyi xocbê tibii madiluhu ge lêm, ên tibii madiluhu ge wê he nilô vô viyin ên lie wê yib ge, ên he lungén môp wê xomxo yibên ob kidi lec maviha vac yibên ge. ¹⁴ Dom il ge, il vông i vin pyap ên il nêbê Yesu yib lêc kidi lec maviha vac yibên. Om il xovô ên il nêbê xomxo vông vinên wê yib ge, Anutu ob tipi vô he kidi lec ya xêkizêc wê Yesu vông ge dì didii he mi lam hixôn Yesu.

¹⁵ Mêgem gwêbaga xe nêl Apumtau kiyang vô xam bêga bê buc timuên wê Apumtau obêc lop mi lôm ge od il wê il gên dô madviha ge il ob luu xomxo wê yib ge mi la mug lêm. Nge, heche mô obêc mug. ¹⁶ Vô buc tige Anutu ob tyuc via levac dì angela levac ti ob keac dì Anutu vuac ob tyuc, dì Apumtau Yesu obêc sea vigwe kisii ganê dì lop mi lôm, mêdêc xomxo wê vông i vin Kilisi lêc yib ge ob kidi lec maviha tax. ¹⁷ Nang dêc il wê il vông i vin lêc gên dô madviha ge Kilisi obêc kô il timuên dì il ob mila

kituc lec xomxo wê yib ge vac viyobtoc, di il xôn ob mila le vô Apumtau gê lag puunê di la dô madviha hixôn i luta lêc luta. ¹⁸ Mêgem xam nêl kiyang tiga vîma ên i ngidu xam xôn di vông xam nilôm i vô viyin maên.

5

Il ob viac il ên buc wê Apumtau obêc vena lec ge

¹ Xam lige, xe ob kivuu kiyang vô xam lec buc me klismas wê Apumtau ob vena lec ge lêm, ² ên xacxam va vyac xovô ên xam nêbê il lungên buc tige tiyi xocbê il lungên buc wê xomxo yôdac ti ob val vông yôdac vô susu vô bucêng ge. ³ Vô buc tige xomxo tibeac ob nêl ên nêbê, “Gwêbaga buc malehe om il ob dô nidviha mê.” Lêc ge buc wê viyin ob val hivun he xôn lutibed tiyi xocbê vêx ti nu obêc yubac ge od ta yaxêng myavinê lutibed. Mêgem he ti o tiyi wê ob pec ên viyin wê ob val ge lêm. ⁴ Lêc xam lige, xam o dô vac mapitoc lêm, om buc viyin tige i o lêc val vông xam yetac i tiyi xocbê tibii yôdac vông xam yetac ge lêm, ⁵ ên xam o dô vac bucêng wê mapitoc ge lêm. Nge, il vîhati dô vac vîdiêng wê xêseac ge. ⁶ Mêgem il ob xêp i tiyi xocbê tibii madiluhu ge lêm. Nge, il madnôn i seac di il piyôp i xovô, ⁷ ên xomxo wê yêp ge mi yêp vô bucêng di he wê num mia ge mi num mi vô mavmav vô bucêng di piyôp vô judajuda. ⁸ Dom il mô dô vac xêseac, om il piyôp i xovô, di il vinyum môt vông vinêng yuu xêdyaa vin lecmaên i kisuu il lec i tiyi xocbê ngakwi xêkizêc kisuu il nidnivi lec ge. Di il vông i vin kiyang wê nêbê Apumtau obêc kô il mi il la dô hixôn i ge, om kiyang tige i hivun il xôn i tiyi xocbê kilung xêkizêc ta ti hivun il badzub xôn ge. ⁹ Ên Anutu o tung il ên nêbê ni ob nyag vô il mi kitya il vêl lêm. Nge, tung il ên nêbê il obêc vông i vin Apumtau Yesu Kilisi ge od ob vô il vêl ên il nêd nipaên. ¹⁰ Yesu yib lec il nêd nipaên ên nêb il yibêng yuu xôn madviha ge il vîhati ob dô madviha hixôn i. ¹¹ Mêgem xam nêl kiyang nivîha vîma di ngiduma xôn i tiyi xocbê môt wê xam mi vông gwêbaga.

Kiyang viwen timuên

¹² Xam lige, xe nêl vô xam bêga bê xam loc vac lime wê vông Anutu yuac vac xam mahigun ge kwa ngibi di ngô he kiyang, ên Apumtau vông he tu xam nêm levac ên nêb he i nêl kiyang vô xam di titô xam. ¹³ Om xam vông he lê i vô levac lec yuac wê he vông ge, di xam xêmyaa i vin lec he, di xam vîhati dô vac kiyang malehe.

¹⁴ Xam lige, xe nêl xêkizêc vô xam bêga bê xam titô he wê ni maên ge, di xam ngidu he wê xona xona ge xôn, di ngidu he wê o vông i vin xêkizêc lêm ge xôn, di lum nêl kiyang malehe vô xomxo vîhati.

¹⁵ Le i lêc vông nipaên vac nipaên lêm. Nge, xam vông nivîha vô lime hixôn tibii vîhati i tiyi buc vîhati.

¹⁶ Xam dô hixôn xêmyaa nivîha i tiyi buc vîhati, ¹⁷ di xam kitaa vô Anutu i tiyi buc vîhati, ¹⁸ di xam pimil Anutu i tiyi buc vîhati, buc wê xam tulec viyin hixôn buc wê xam tulec viyin ma ge. Xam tu Yesu Kilisi xe pyap, om Anutu nêb xam vông môt tibêgee.

¹⁹ Le i lêc le vac Anutu Myakilôhô Ngibua xôn lêm, ²⁰ di le i lêc vô nimi vô Anutu kiyang wê xomxo ob nêl vô xam ge lêm, ²¹ di xam yaxêng kiyang vîhati mi wê, dêc hôm nôn nivîha ²² di sea nipaên vîhati i loc dô xel.

²³ Anutu vaci wê malehe kehe ge i vông xam tu xomxo ngibua, di i viac xam kinum yuu myamkilôhô di nimnivi ên xam dô nivîha di kiyang soën

ti i o lêc yêp vô xam vô buc wê Apumtau Yesu Kilisi ob lop mì lôm ge lêm.
²⁴ Anutu wê tyuc xam ên nêb xam tu i nue ge ob vông bêge vô xam, ên
ici va ob pwoo i vya vac lêm.

²⁵ Xam lige, xam kitaa vô Anutu ên i ngidu xe xôn.

²⁶ Xam nêl vidiiêñ vô lime vông vinêñ vihati dì pul he vigê i tiyi xocbê
môp wê Anutu nue il mi vông ge.

²⁷ A nêl kiyang xêkizêc lec Apumtau lê bêga bê xam kitong kipihac ga
vô lime vông vinêñ vihati mì he i ngô.

²⁸ Vizid niviha wê il Apumtau Yesu Kilisi vông ge i hìvun xam vihati xôn.

2 TESALONAIKA

Pol kivuu kipihac wê vông yuu ge la vô tibii Tesalonaika

¹ A, Pol, xen Sailas yuu Timoti, xen kivuu kiyang ga vô xam Tesalonaika wê xam vông i vin Yesu ge. Xam tu il Mag Anutu yuu Apumtau Yesu Kilisi xe pyap.

² Mag Anutu yuu Apumtau Yesu Kilisi yuu i vông xam dô vac vizid niviha di vông kiyang malehe i hivun xam xôn.

Pol pimil Anutu

³ Xam lige, xe nilôm kidu xe om xe pimil Anutu ên xam tiyi buc vihati. Môp tige môp bôbac, ên vông vinê wê xam vông ge diyêp xêkizêc di vô levac tiyi buc vihati, di xam toto xêmyaa mi vin lecma nôn, di môp xêmyaa vin lecén tige divô levac vac xam mahigun tiyi buc vihati. ⁴ Mêgem xe yong xam lêm vô levac vac konglegesen viyang viyang ge bêga ên xe nêbê xomxo vông viyin yuu myavinê levac vô xam lec wê xam vông i vin ge, lêcom xam le xêkizêc ta di kilê viyin di hôm vông vinê wê xam vông ge xôn pilahi.

Anutu yaxên il ya môp bôbac

⁵ Xam mi le xêkizêc ta vac vông vinê, om xam môp bêge nêl xam kitong ên nêbê Anutu yaxên xam ya môp bôbac, om gwêbaga xam kô viyin levac ên wê xam tu Anutu nue ge, lêcom viyin tige ob vông xam vô niviha tiyi wê xam ob la dô vac Anutu ben lag puunê ge. ⁶ Di Anutu ob vông môp bôbac ngwe hixôn bêga bê ob vông myaviwen nipaên vô he wê vông viyin vô xam ge, ⁷ di ob vô viyin vêl ên xam, di ob vông il xôn dô seac vêl vô buc timuên wê Apumtau Yesu hixôn angela xêkizêc wê i vông ge obêc sea ben lag puunê di lop mi lam le seac ge. He ob lam hixôn ngwax mahelac levac, ⁸ di ob vông myaviwen nipaên vô xomxo wê lungên Anutu gee hixôn he wê vô ninya kitu vô il Apumtau Yesu xolac gee. ⁹ Om he ob kô myaviwen nipaên bêga bê Apumtau obêc ngiloo he la vêl tevabanê ên i manôn hixôn xêkizêc levac yuu xêseac wê i vông ge, om he ob la dô vac nipaên luta lêc luta ¹⁰ vô buc timuên wê Kilisi obêc lop mi lôm ge. Vô buc tige xomxo wê vông i vin di tu i nue gee vihati ob nêl Yesu lê vô levac di pimil i hixôn xêyaa niviha yang. Mêgem xam êno ob vông bêge ên xam vông i vin Anutu kiyang wê xe nêl vô xam ilage.

Pol kitaa vô Anutu lec tibii Tesalonaika

¹¹ Xe xovô ên xe nêbê xe nêl xolac vô xam ilage di xam vông i vin. Mêgem xe kitaa vô il Mag Anutu tiyi buc vihati bêga bê i ngidu xam xôn ên xam tu xomxo niviha tiyi wê xam ob vông môp yuu yuac niviha vihati wê Anutu tyuc xam ên nêbê xam ob vông ge. Di xe kitaa vô Anutu bêga bê i ngidu xam xôn ya xêkizêc wê i vông ge êdêc xam vông môp niviha vihati i tiyi wê xam nêbê xam ob vông ge, di xam vông yuac vihati wê xam vông ên wê xam vông i vin Yesu ge i diyêp niviha. ¹² Xe kitaa bêge ên xe nêbê môp wê xam vông ge i vông il lig Apumtau Yesu lê i vô levac, di Yesu i vông xam lêm i vô levac êno. Il Mag Anutu hixôn Apumtau Yesu Kilisi obêc vông bêge ya vizid niviha wê yuu vông ge.

2

Kiyang lec xomxo nipaên kehe nôn wê ob tu levac ge

¹ Xam lige, a ob nêl kitong vô xam lec buc wê Apumtau Yesu obêc vena di kituc il xôn mi il la vô i ge. Om xe nêl kitong vô xam bêga ên xe nêbê ² xomxo ya ob val nêl kiyang kityooêñ vô xam ên nêbê buc wê Apumtau ob vena lec ge val pyap. He ya nêl i tiyi xochê plopete kityooêñ mi nêl ge, di he ya nêl ya xovôêñ wê heche va vông ge, di he ya so ên he nêbê xe kivuu kiyang tibêge vac kipihac. Om xam obêc ngô kiyang kityooêñ tige ge od xam nilôm i o lêc vô viyin di xam vông i vin kiyang tibêge lutibed lêm. ³ Le i lêc vông i vin kiyang yuu môp kityooêñ wê xomxo ob nêl vô xam ge lêm, ên buc tige obêc seb lam tax lêm. Nge, xomxo tibeac hiwocên ob pwoo Anutu kiyang vac di vô nimi vô Anutu, di xomxo nipaên kehe nôn ob val le seac tax, nang dêc Apumtau ob vena timuêñ. Xomxo nipaên kehe nôn tige wê Anutu ob vông i la dô vac Seten ben. ⁴ Lêc xomxo nipaên tyo ob val le seac lê, lêc vông vevac vô Anutu nôn di anutu baba wê xomxo vaci vinoo ge hixôn susu ngibua vihati yang, di ob yong ici va lê ên nêbê i tu levac di luu susu ngibua vêl. Om ob la vac Anutu xumac ngibua di la dô di kityoo xomxo ên nêbê, "A ga a Anutu tyo mêga."

⁵ Ilage wê a loc dô hixôn xam ge od a nêl kiyang tiga kitong vô xam. Mêd xam lungêñ kiyang tige tii vac nang, me? ⁶ Lêcom xam xovô ên xam nêbê gwêbaga xomxo ngwe le vac xomxo nipaên tyo nêñ môp xôn ên nêb i lamêñ i ma, lêc ob lam le seac vô buc timuêñ wê Anutu vinoo vô i ge. ⁷ Xomxo nipaên kehe nôn tyo valêñ gên ma, lêcom gwêbaga i vông yuac nipaên wê pwoo Anutu kiyang vac ge mi dô xôpacêñ. Mêdêc obêc buc timuêñ ge od xomxo ngwe wê le vac i xôn ge obêc titêc la vêl, ⁸ mêd ge wê xomxo nipaên kehe nôn tyo ob lam le seac. Nang dêc Apumtau Yesu ob hi i yib ya myakilôhô wê lam vac mya ge. Apumtau ob lam le seac hixôn xêseac wê i vông ge, di ob hi xomxo nipaên tige vô nipaên ya xêkizêc wê i vông ge. ⁹ Lêcom buc wê xomxo nipaên kehe nôn tyo obêc val ge od obêc val hixôn xêkizêc wê Seten vông ge, om ob vông yuac levac hixôn do levac wê kityooêñ ge viyang viyang, ¹⁰ di ob vông môp nipaên wê kityooêñ ge vihati ên nêb i kityoo xomxo wê ob la dô vac nipaên luta ge. Xomxo tigee xêyaa obêc vin lec Anutu kiyang nôn ge od Anutu ob vô he vêl ên he nêñ nipaên, lêc he vô nimi vô om Anutu ob kitya he vêl. ¹¹ Mêgem Anutu ob vông xêkizêc wê kityooêñ ge vô he ên nêb he i vông i vin kiyang kityooêñ. ¹² Mêgem he vihati wê o vông i vin kiyang nôn lêm di xêyaa vin lec môp nipaên ge, Anutu ob nêl he nêñ nipaên kitong di vông he la dô vac nipaên luta lêc luta.

Anutu vinoo xam pyap ên nêb ob vô xam vêl ên nêm nipaên

¹³ Xam lige, Apumtau xêyaa vin lec xam, di xe nilôm kidu xe om xe pimil Anutu ên xam tiyi buc vihati, ên mugêñ ilage Anutu vinoo xam ên nêb ob vô xam vêl ên xam nêm nipaên. Om vô xam vêl ya yuac wê Myakilôhô Ngibua vông ge hixôn môp vông vinêñ wê xam vông ge, ên xam vông i vin i kiyang nôn. ¹⁴ Mêgem Anutu nêb ob tung xam la dô vac xêseac wê il Apumtau Yesu Kilisi vông ge, om didii xam pyap ya xolac niviha wê xe nêl vô xam ge. ¹⁵ Mêgem xam lige, xe nêl vô xam bêga bê xam le xêkizêc di hôm kiyang nôn wê xe nêl vô xam vac myam di kivuu vac kipihac ge xôn pilahi di timu vô.

¹⁶ Il Apumtau Yesu Kilisi yuu Mag Anutu, yuu xêyaa vin lec il om vông vizid niviha vô il ên nêb ob ngidu il xôn dì vông il nilôd i vô viyin maên luta lêc luta. Dì yuu ngidu il xôn om il dô bin nôn niviha wê yuu ob vông vô il timuên ge. ¹⁷ Mêgem xe kitaa vô Anutu ên xe nêbê i ngidu xam xôn dì vông xêkizêc vô xam êdêc xam vông yuac wê niviha ge ya dì nêl kiyang wê niviha ge vihati.

3

Xam kitaa vô Anutu bê i ngidu xe xôn

¹ Xam lige, a ob nêl kiyang ngwe hixôn bêga bê xam kitaa vô Anutu bê i ngidu xe xôn ên Apumtau kiyang i loc vac vigwe viyang viyang ge lutibed dì i vô levac i tiyi xocbê vô levac vac xam mahigun ge. ² Di xam kitaa vô Anutu bê i vô xe vêl ên tibii nipaên wê mi vông môt nipaên ge vigê, ên xam xovô ên xam nêbê xomxo tibeac o vông i vin Anutu lêm.

³ Lêc Apumtau ob pwoo vya vac dì sea il lêm. Nge, ob vông xam le xêkizêc dì viac xam, ên Seten i o vông xam vô nipaên lêm. ⁴ Apumtau vông xovôên vô xe lec xam, om xe xovô en xe nêbê gwêbaga xam ditimu vô môt vihati wê xe vông vô xam ge, dì xe xovô ên xe nêbê timuên ge xam ob vông môt bêgee i tii vac nang. ⁵ Om xe kitaa vô Apumtau bêga bê i vông xovôên niviha vô xam ên xam vyac xovô bê Anutu xêyaa vin lec xam, dì xam xovô bê Kilisi le xêkizêc dì kilê viyin.

Xomxo vihati i vông yuac

⁶ Xam lige, xe tu Apumtau Yesu Kilisi manôn dì nêl vô xam bêga bê xam kol xam mi dô teva ên lime vông vinê wê mi vô ni maên ên he yuac kibun ga, ên he o vông i tiyi wê xe nêl vô xam ilage lêm. ⁷ Èn xacxam va xovô pyap bêga bê xam ob tup vô môt wê xe vông ge, ên buc wê xe loc dô hixôn xam ilage od xe o dô vidaaën dì yuac ma lêm, ⁸ dì xe o kô yaên ti vô xam pileva lêm. Nge, xe vông yuac bisnis tiyi vidiliên yuu bucên vihati ên xe nêb xe ob kô mone lec dì kisuu xe xom yaên vô xam lêc xa, om xe vông yuac levac ên xe nêb xe ob vông viyin vô xam ên susu yaên lêm. ⁹ Xe vông yuac bêge, lêcom xam xovô ên xam nêbê xe tu xam nêm levac om xe tiyi wê xe ob nêl bê xam vông xe xom yaên pileva. Mêlec xe o nêl bêge vô xam lêm, ên xe nêb xe ob hilung môt niviha wê xam ob timu vô ge vô xam. ¹⁰ Om tiyi buc vihati wê xe dô hixôn xam ge od xe nêl vô xam bêga ên nêbê, “Xomxo ti obêc nêb ob xeedô pileva dì yuac i ma ge od xam o lêc vông yaên vô i lêm. Toto vigê i vông yuac lec, lêc ya.”

¹¹ Xe nêl kiyang tibêge vô xam ên xe ngô wê xam ya dô vidaaën dì o vông yuac ti lêm. Nge, xam ngena tibeac lec xomxo mangwe yuac wê he vông ge, dì xacxam va ge xam o vông yuac wê xam ob tulec yaên ge lêm. ¹² Mêgem xe viac kiyang vô he wê mi dô vidaaën ge dì nêl xêkizêc lec Apumtau Yesu Kilisi lê bêga bê he i dô niviha dì vông yuac ên tulec yaên.

¹³ Xam lige, xam nim i o lêc ma lec môt wê xam ob vông niviha vô xomxo ge lêm, ¹⁴ dì xomxo ti obêc vô ninya kitu vô kiyang wê xe kivuu vac kipihac tiga ge od xam xovô xomxo tyo dì kol xam mi dô teva ên i, ên i xovô nêon soën dì ni i yoc ên i. ¹⁵ Lêcom xam o lêc wê i xocbê tibii wê vông vevac vô xam ge te lêm. Nge, xam wê i xocbê xam lime moci ti, dì viac kiyang vô i ên i xovô.

Kiyang viwen timuén

¹⁶ Apumtau vaci wê kiyang malehe kehe ge i vông xam nilôm i vô malehe lec i tiyi buc vihati, buc viyin hixôn buc niviha. Apumtau i dô hixôn xam vihati.

¹⁷ A, Pol, a kivuu kiyang tiga ya vigêg dî a nêl vidiiên vô xam. A mi kivuu kiyang dî

mi nêl vidiiên vô xam vac kipihac vihati wê a kivuu ge. Môp wê a vông ge yêp bêge.

¹⁸ Vizid niviha wê il ned Apumtau Yesu Kilisi vông ge i loc dô hixôn xam vihati.

1 TIMOTI

Kipihac taxlee wê Pol kivuu vô Timoti ge

1 A, Pol, Yesu Kilisi nu sinale a. Anutu wê kitya il nêd nipaên vêl ge hixôn Yesu Kilisi wê il dô bin buc wê il ob xê i ge, yuu xôn vinoo a ên nêb a kô yuac sinale.

2 Timoti, ông ge a nug vông vinêñ nôn. A kivuu kipihac ga loc vô ông. Mag Anutu hixôn Apumtau Yesu Kilisi, yuu i vông vizid niviha i loc vô ông, dì xo vigwe pisiv ên ông, dì vông kiyang malehe i hivun ông xôn.

Xomxo wê nêl kiyang kityooën

3 Ilage wê a nêb a ob la vigwe Masedonia ge, a nêl vô ông ên a nêbê ông dô Epesas. Om a ob nêl vô ông i tii vac bêga bê ông dô Epesas, ên tibii ya dô vac xam mahigun dì tixuu xomxo ya xolac ba kityooën. Om ông dô ên le vac kiyang kityooën wê he vông ge xôn. **4** Ông nêl vô he bêga bê he i sea kiyang kityooën wê he mi nêl ge, ên he mi nêl pivulac pileva dì le nêl bue tivae wê dô ilage lê hixôn, om kiyang kityooën tige vông he piyôp vô himena himena, dì o vông xovôën vô he lec Anutu kiyang lêm, ên môt vông vinêñ tibed ge wê ob vông xovôën vô il lec Anutu kiyang. **5** Om a ob nêl vô ông bêga bê ông le vac he xôn dì nêl vô he bê he i sea kiyang kityooën. Om he obêc ngô ông kiyang dì timu vô ge od he nilô ob vô paha lec di nipaên ti ob yép vac he nilô lêm, dì he ob vông i vin Yesu. Om he obêc timu vô môt tibêge od he ob vông môt xêyaa vin lecén vô nôn lec. **6** Xomxo ya sea môt tigee dì la nêl kiyang vaxvax wê ob vô nôn niviha vô he lêm ge. **7** He nêb he ob tixuu xomxo ya xolac wê Moses vông ge. Lêc he lungen xolac tige dì lungen kehe hixôn.

8 Il xovô ên il nêbê il obêc timu vô Moses xolac i tiyi wê Anutu nêl ge od xolac ob vô niviha vô il. **9** Dì il xovô ên il nêbê Anutu o vông xolac ên nêb i titô xomxo wê niviha ge lêm. Nge, vông xolac ên nêb i titô xomxo wê nipaên ge, he wê pwwoo Anutu kiyang vac ge, dì he wê o ngô xomxo levac kiyang lêm ge, dì he wê vô nimi vô Anutu ge, dì he wê vông môt nipaên ge, dì he wê timu vô môt kibun ga dì o timu vô Anutu lêm ge, dì he wê yê Anutu hixôn susu ngibua xochê susu viddaaén ge, dì he wê hi tae mae yib ge, dì he wê hi tibii yib ge, **10** dì he wê vông môt yôdac vêx yuu vux ge, dì he vux wê vông môt yôdac vô vux ge, dì he wê hôm xomxo xôn dì kô mi la nêb tibii i kisuu he ge, dì he wê nêl kiyang kityooën ge, dì he wê hilung vigê la kisii ên nêb he nêl kiyang nôn lêc he kityoo ge. Anutu vông xolac ên nêb i titô xomxo nipaên tibêgee hixôn he vihati wê vông môt nipaên dì pwwoo Anutu kiyang nôn vac ge. **11** Kiyang nôn tige yêp vac xolac paha nilô wê Anutu vông vô a ên nêb a la nêl vô xomxo ge. Xolac tige nêl Anutu wê xêseac kehe ge kitong.

Pol pimil Anutu ên wê xo vigwe pisiv ên i ge

12 Il Apumtau Yesu Kilisi vông xêkizêc wê i vông ge vô a, dì yaxêñ a pyap ên nêb a tiyi wê a ob vông i yuac ge. Om a hi vixag pec ên i. **13** Ilage a so vyag vô Yesu lê, dì vông viyin levac vô xomxo wê vông i vin Yesu ge, dì a kô a lec dì vông he vô nipaên. A mi vông môt tibêgee lê, lêc a gên

o vông i vin Kilisi lêm om a o xovô nipaên wê a vông ge lêm. Mêgem il lig Apumtau xo vigwe pisiv ên a, ¹⁴ di vông xêyaa vin lecén wê i vông ge lam hivun a xôn, om a vông i vin Yesu Kilisi di a xêyaa vin lec i.

¹⁵ Kiyang yêp bêga ên nêbê Yesu Kilisi lam kibun ga ên nêb ob vô xomxo nipaên vêl ên he nêbê nipaên. Kiyang tige kiyang nôn vixôhilôg tiyi wê xomxo ob ngô di vông i vin ge. A ga xomxo nipaên nôn luu xomxo nipaên vihati vêl. ¹⁶ Lêc Yesu xo vigwe pisiv ên a ên nêb xomxo nipaên vihati he i yê di xovô bê a ga xomxo nipaên nôn, lêc Yesu o kitya a vêl lutibed lêm. Nge, xo vigwe pisiv ên a. Om he ob yê di vông i vin Yesu di dô maviha luta lêc luta. ¹⁷ Anutu tu king mi dô luta lêc luta di obêc yib lêm. Xomxo ti manôn o yê i lêm, di ici va Anutu nôn tibed. Lê levac yuu xêseac wê i vông ge i yêp vô i luta lêc luta. Nôn.

Timoti i vông vevac ya xolac

¹⁸ Timoti, a nug ông, ilage Anutu vông xovôên vô xe xomxo vông vinên lec yuac wê Anutu ob vông vô ông ge, mêgem xe nêl kitong vô ông. Om gwêbaga a ob nêl vô ông bêga bê ông xovô kiyang wê xe nêl vô ông ilage i tii vac nang ên i ngidu ông xôn di ông hôm xolac xôn pilahi di vông vevac xêkizêc ya. ¹⁹ Om ông le xêkizêc vac vông vinên wê ông vông ge di timu vô môp niviha i tiyi xochê ông xovô ge. Ên xomxo ya xovô môp niviha lêc o timu vô lêm. Nge, he vô nimi vô, om vông vinên wê he vông ge vô nipaên tiyi xocbê sip wê val hibu sea lec ngidax manôn wê le vac gwec ge. ²⁰ Haimenias yuu Aleksanda vông môp tibêge om a vông yuu la vac Seten vigê ên a nêb yuu i pilepac yuu di sea môp wê yuu mi nêl Anutu lê vô nipaên ge.

2

Môp kitaaêñ

¹ Om yuac wê a nêl vô xam ên a nêb xam vông ge, kiyang taxlee lec yuac tige bêga bê xam kitaa vô Anutu lec xomxo vihati ên i ngidu he xôn, di xam pimil Anutu ên he. ² Di xam kitaa vô Anutu lec king hixôn gavman levac vihati ên he i viac il niviha di il dô vac kiyang malehe kwa ngibi di timu vô môp wê Anutu hixôn xomxo ob yê niviha ge. ³ Kitaaêñ tibêge niviha di Anutu wê vô il vêl ên il nêd nipaên ge ob yê niviha, ⁴ ên Anutu nêb xomxo vihati i xovô kiyang nôn wê i vông ge kehe di pilepac nilô i loc vô i ên i kitya he nêb nipaên vêl. ⁵ Anutu nôn tibed, di xomxo tibed wê vông kisoac mi le vac il Anutu mahigun. Xomxo tige Yesu Kilisi. ⁶ Vô buc wê Anutu nêl ilage, Yesu vông ici va lam yib ên nêb ob vô il vêl ên il nêd nipaên. Om môp wê Yesu vông ge nêl kitong vô il bêga ên nêbê Anutu nêb ob kitya xomxo vihati nêb nipaên vêl. ⁷ Om Anutu vinoo a ên nêb a la vông yuac sinale di la nêl kiyang tige vô xomxo. A o kityoo lêm. Nge, a nêl vixôhilôg nôn. Anutu vinoo a ên nêb a la tixuu he wê o Yuda lêm ge ya kiyang nôn ên he i vông i vin.

⁸ Om a ob nêl vô xam bêga bê he vux vac vigwe vihati ge he i kitaa vô Anutu. Lêc he i sea môp kunac maên yuu ni nyagên di pilepac nilô i vô paha lec lê, lêc kitaa.

Môp wê vêx ob vông ge

⁹ A ob nêl vô hevêx bêga bê he i vinyum ngakwi i tiyi wê he xomxo levac ob yê niviha ge, di he i o vinyum ngakwi wê ob vông vux yetac ên he ge lêm, di he i o lêc vông nilô i loc vô môt wê he ob vunac vô bazub lihi di vunac vô ninivi ya komkom gol di vinyum nivimihi wê mone levac ge lêm. ¹⁰ Nge, he i vông nilô i loc vô môt niviha wê ob ngidu xomxo xôn ge, ên vêx wê nêl ên nêbê he Anutu nue ge wê he ob vông môt bêge. ¹¹ He i vô nipwo lec mi dô kiyang maên di ngô xolac mi xovô. ¹² Kiyang wê vêx ob nêl xolac ge a ob le vac xôn. Di he ob tu vux bazub lêm. Nge, he i dô kiyang maên di vô ninya vô kiyang. ¹³ Ên Anutu tung Adam tax, lêc tung Iv timuên. ¹⁴ Di Adam o ngô kiyang kityooê wê Seten nêl ge lêm. Nge, Iv môci wê vông i vin Seten kiyang di pwoo Anutu kiyang vac. ¹⁵ Om vô buc wê vêx obêc kô nipwo ge od obêc tulec myavinê levac. Lêc vêx obêc vông i vin xêkizêc di xo vigwe pisiv ên xomxo di dô i tiyi xochê vêx ngibua di kol he ên nipaên ge od Anutu obêc ngidu he xôn di vô he vêl ên he nêni nipaên.

3

Kiyang lec gyovixa

¹ Kiyang ti wê nôn ge yêp bêga ên nêbê vux ti obêc xo vínuç ên nêb ob kô yuac gyovixa ge od yuac wê nêb ob kô ge yuac niviha. ² Mêgem xam yaxê i, di vínoo xomxo wê mi viac môt wê i vông ge niviha om xomxo ti o tiyi wê ob tulec soên ti vô i lêm ge, di wê vinê tibed, di i viac i niviha ên môt nipaên, di timu vô piyôp niviha, di vông môt wê lie ob yê nêb niviha ge, di kô tibii mi la vac ben di viac he niviha, di tixuu xomxo i niviha ya xolac, ³ di o num mi vô mavmav lêm, di xêyaa o vô myavinê decdec di hi xomxo lêm. Nge, lum mi nêl kiyang vô xomxo, di o kunac xomxo vaxvax lêm, di o xo mone luu vêl lêm, ⁴ di viac vinê nue niviha, di titô nue ên nêb he i ngô kiyang wê i vông ge di timu vô. ⁵ Ên xomxo ti o tiyi wê obêc viac vinê nue di titô he lêm ge od ob tu Anutu nue nêni levac di viac he tibêna? ⁶ Xomxo wê gên vông i vin paha ge ti o tiyi wê ob kô yuac gyovixa ge lêm, ên obêc yong i ge od Anutu ob tii i vêl tiyi xochê tii Seten vêl ilage. ⁷ Om xam vínoo xomxo wê tibii madiluhu yê niviha ge. Ên tibii madiluhu obêc yê i nipaên lêc i tu gyovixa ge od he ob nêl nipaên lec i di vông i ni yoc di Seten ob hôm i xôn vac leac wê i vông ge.

Kiyang lec xomxo wê vông yuac vac konglegesen

⁸ Xomxo ya obêc nêb vông yuac vac konglegesen ge od xam yaxê he lêc vínoo he wê mi timu vô môt niviha bêga nêbê he vông nilô la vô he yuac, di he o nêl kiyang yuu lêm, di he o num mi vô mavmav lêm, di he o doma vô mone yuu susu lêm, ⁹ di nipaên ti o yêp vac he nilô lêm. Nge, he mi hôm Anutu kiyang nôn wê nêl môt vông vinê kitong ge xôn pilahi. ¹⁰ Om xam yaxê môt wê he vông ge lê, lêc xam obêc wê he niviha ge od he i vông yuac vac konglegesen. ¹¹ Xomxo tigee vinêe êno he i vông nilô i loc vô he yuac, di he i o lêc nêl kiyang wê ninya ninya ge lêm, di he i viac he niviha ên môt nipaên, di he i vông môt vihati i yêp niviha. ¹² Xomxo ti wê ob vông yuac vac konglegesen ge i ii vêx tibed di i titô nue di viac vinê nue niviha di titô he. ¹³ Om he wê vông yuac vac konglegesen di vông he yuac niviha ge, he lê ob yêp niviha, di he ob nêl Yesu Kilisi xolac wê he vông i vin ge i yêp seac di xonaên ob ma.

Anutu kiyang nôn kehe

¹⁴ Timoti, a nêb a ob loc xê ông decdec. Lêc a kivuu kipihac tiga dì vông i loc vô ông, ¹⁵ ên a obêc miloc vô ông decdec lêm ge od ông kitong kipihac tiga dì xovô môt niviha wê xomxo vông vinêni vihati ob timu vô ge. Ên il wê il vông i vin ge, Anutu mavîha nue il, om il vông Anutu kiyang nôn i le xêkizéc i tiyi xochê teac wê le pilahi dì hôm xumac xôn ge. ¹⁶ Anutu kiyang nôn ge kehe levac mabu, om xomxo ti o tiyi wê ob yax vun bê xolac nôn maén ge lêm. Kiyang tige kehe nêl bêga ên nêbê,

Kilisi lam tu xomxo kibun ga mi xomxo

yê i,

dì Myakilôhô Ngibua nêl kitong ên nêbê

Kilisi ge xomxo niviha.

Angela yê i,

dì xomxo la nêl i kitong vac vigwe

viyang viyang,

dì xomxo kibun ga vông i vin i,

dì Anutu kô i mi lax mi la lag puunê.

4

Kiyang lec xomxo wê nêl kiyang kityooên ge

¹ Myakilôhô Ngibua nêl kiyang seac vô il bêga ên nêbê vô buc timuên ge tibii ya ob sea vông vinêni wê he vông ge, dì ngô kiyang kityooên wê vimwo nipaên ob nêl ge di timu vô kiyang wê Seten nue ob nêl vô he ge. ² Tibii nipaên tigee xomxo kityooên wê mi nêl kiyang kityooên, om he hôm kiyang nipaên xôn mi i yêp vac he nilô, lêc he o yaxêni nipaên wê he mi vông ge lêm. ³ Dì he tixuu xomxo ya kiyang kityooên nêbê he iimaén i ma, dì he viibu he nêbê he i o ya yaén mangwe lêm. Lêc môt ge kityooên, ên Anutu vông yaén vihati yang vô il ên nêb il ob kitaa vô i dì pimil i ên yaén tigee lê, lêc xa. Om il wê il vông i vin dì xovô Anutu kiyang nôn ge il ob xa yaén vihati. ⁴ Ên susu wê Anutu tung ge vihati yang niviha. Om il ob pisôhô ti lêm. Nge, il ob xa susu vihati yang dì hi vixad ên Anutu lec susu tigee, ⁵ ên Anutu kiyang hixôn kitaaén wê il vông ge vông susu vihati ge tu ngibua.

Timoti ge Yesu Kilisi nu yuac niviha ti

⁶ Timoti, ông obêc nêl kiyang wê a kivuu ga vô lime vông vinêni ge od ông ob tu Yesu Kilisi nu yuac niviha ti, dì kiyang wê nêl môt vông vinêni kehe kitong ge hixôn kiyang nôn wê ông ngô dì timu vô ge, kiyang tige ob vông xêkizéc vô ông. ⁷ Om le i lêc ngô pivulac vidaaén wê o nêl kiyang nôn lec Anutu ge lêm. Nge, ông tixuu ông ya Anutu kiyang dì timu vô i tiyi lec buc vihati. ⁸ Ên il obêc tixuu il ya môt kibun ga wê niviha ge od ob vô niviha vô il nipwo titi. Lêc il obêc tixuu il ya Anutu kiyang mi timu vô ge od ob ngidu il xôn i luu vêl, ên ob vô niviha vô il gwêbaga wê il dô madviha lec kibun ga ge, dì ob vô niviha vô il vô buc timuên wê il ob dô madviha gê kisii ganê hixôn. ⁹ Kiyang tige nôn vixôhilôg tiyi wê xomxo ob ngô dì vông i vin ge. ¹⁰ Il dô bin Anutu wê mavîha ge, om il ob vông vevac ya xolac dì vông yuac xêkizéc. Anutu tiyi wê ob vô xomxo vihati vêl ên he nêni nipaên, lêc il wê il vông i vin i ge wê Anutu ob vô il vêl.

¹¹ Timoti, ông nêl kiyang wê a nêl ga vô xomxo dì tixuu he ya kiyang tiga ên he i timu vô. ¹² Ông ngivihi ti, om xomxo ti obêc nêb hi ông lêm i tô ên wê ông ngivihi ge od ông ngôen he i ma. Lêc ông vông môp niviha vac xomxo vông vinén mahigun ên he i yê dì timu vô. Om ông nêl kiyang niviha, dì vông môp bôbac, dì xêmyaa i vin lec xomxo, dì ông vông i vin xêkizêc ta dì nilôm yuu xovôen i yêp paha. ¹³ Ông kitong xolac vac xomxo mahigun ên he i ngô, dì nêl xolac kehe kitong vô he, ditixuu he ya xolac dì i loc tyip vô buc wê a ob milôc vô ông ge. ¹⁴ Ông nim i o lêc ma ên xêkizêc wê Anutu vông vô ông ên nêb ông vông i yuac ya ge lêm. Ên Anutu vông xêkizêc tige vô ông ilage lec buc wê gyovixa vyax vigê lec ông dì nêl kitong vô ông lec yuac wê Anutu nêb ob vông vô ông ge. ¹⁵ Om ông vông yuac tige i tiyi lec buc vihati, dì vông nilôm i loc vô yuac tige ên xomxo vihati he i yê dì xovô bê ông le xêkizêc vac xolac. ¹⁶ Ông viac ông nimviha dì viac kiyang wê ông ob tixuu xomxo ya ge i niviha hixôn, dì vông yuac tige xêkizêc i tiyi buc vihati. Ên ông obêc vông bêge ge od yuac wê ông vông ge obêc vô niviha vô ông dì ob vô niviha vô he wê ngô ông kiyang ge hixôn.

5

Môp titôên

¹ Timoti, ông ngivihi ti, om le i lêc titô kipwoc ya kiyang higacên lêm. Nge, ông titô kipwoc ya kiyang wê ông ob lum nêl ge i tiyi xochê ông nêl vô mam ge. Dì ông titô he ngivihi i tiyi xochê ông titô lime vux ge, ² dì titô he vêxta i tiyi xochê ông titô tame ge, dì titô he vêxwo hixôn nilôm paha i tiyi xochê ông titô lime vêx ge.

Kiyang lec vêxôv

³ Xam viac vêxôv wê bue nue ma ge ên ti o dô wê ob viac he ge lêm. ⁴ Lêc vêxôv bue nue obêc dô ge od he i viac bu vêx tyo dì viac tae mae hixôn, i tiyi wê he ob hi myaviwen wê tae mae vông vô he ge. Ên he obêc viac tae mae bue niviha ge od Anutu ob yê he niviha. ⁵ Vêxôv wê bue nue ma dì i dô gilon ge, vêxôv tige ob vông nilô la vô Anutu dì kitaa vô i vidiiên yuu bucên vihati ên nêb Anutu i ngidu i xôn. ⁶ Lêc vêxôv ti obêc vông nilô la vô môp kibun ga dì timu vô môp wê ici va xovô ge od ge tiyi xochê vêxôv tige yib waa. ⁷ Om ông nêl kiyang tige vô he ên he i dô niviha dì nipaên ti i o lêc yêp vô he lêm. ⁸ Ên xomxo ti obêc viac tae mae lie niviha lêm ge od tiyi xochê xomxo tige sea vông vinén wê i vông ge, mêd tu xomxo nipaên wê luu tibii madiluhu vêl ge.

⁹ Om vêxôv wê bue nue ma ge, ông kivuu he lê i yêp vac kipihac, ên konglegesen i kitong dì viac he wê lê yêp vac kipihac ge. Le i lêc kivuu vêxôv vihati lê lêm. Nge, he wê ông ob kivuu he lê i yêp vac kipihac ên konglegesen i viac he ge, he gee wê tu vêxta tiyi xochê klismas mila 60 dì he kô liya tibed lêc liya yib, ¹⁰ dì he lê vô levac ên môp niviha wê he mi vông ge, dì he viac nue niviha om nue lig mi vô levac dì timu vô môp niviha, dì he mi kô tibii mi la vac ben di la viac he niviha, dì he viac xomxo vông vinén niviha yang, dì ngidu xomxo wê tulec viyin ge xôn, dì mi vông môp niviha viyang viyang ge. Om vêxôv tibêgee wê ông ob kivuu he lê i yêp vac kipihac ên konglegesen i viac he ya susu.

11-12 Dì vêxôv lê obêc yêp vac kipihac ge od he i hilu kiyang taxlee bêga bê he ob kô vux ti i tii vac lêm. Nge, he ob dô vêxôv dì vông yuac vac konglegesen. Om vêxôv wê gên dô vêxwo ge, le i lêc kivuu he lê vac kipihac lêm, ên he ob xo ên nêbê he ob kô vux i tii vac. Om he lê obêc yêp vac kipihac dì he kô vux tii vac ge od tiyi xochê he pwoo kiyang wê he hilu ge vac dì vô nimi vô Kilisi. Om Anutu ob yê he nipaên. **13** Dì he vêxôv wê gên dô vêxwo ge, he lê obêc yêp vac kipihac mi konglegesen viac he ya susu ge od he ob vô ni maën ên yuac, dì he ob la vilee vilee vô lie dì vôngên yuac ob ma. Dì he ob vông môp nipaên wê luu vêl ge hixôn bêga bê he ob la ngô xomxo nêni kiyang pyap dì la tiyoo i la, dì he ob nêl kiyang nipaên tiyi wê xomxo vông vinêni nêlén ob ma ge. **14** Mêgem a ob nêl vô xam bêga bê he vêxôv wê gên dô vêxwo ge, konglegesen i o lêc viac he lêm. Nge, vêxôv tibégee he i kô vux i tii vac dì kô nue dì viac he xumac, ên he obêc vông bêge ge od tibii wê yê il nipaên ge ob tulec môp tiyi wê he ob nêl kiyang nipaên lec il ge lêm. **15** Il xovô ên il nêbê vêxôv ya sea môp niviha dì la timu vô Seten vông môp. **16** Om vêx wê vông i vin ge, li vêxôv ti obêc dô ge od i viac i niviha dì vôngên viyin vô konglegesen i ma, ên konglegesen ob viac vêxôv wê nue bue ma dì i dô gilon ge.

Kiyang lec xomxo levac

17 Xomxo levac wê viac xam di vông he yuac niviha ge, xam wê he niviha di pimil he di ngidu he xôn ya susu niviha. Dì he wê nêl Anutu kiyang vô xam di tixuu xam ya xolac ge, xam viac he niviha i luu vêl, **18** i tiyi kiyang wê yêp vac Moses xolac bêga ên nêbê, “Bwoc levac ti obêc vông yuac vô ông di kê wit ninivi vêl ge od le i lêc ku i mya xôn lêm.” Kiyang nêl bêge di

kiyang ngwe yêp vac Moses xolac bêga ên nêbê, “Xomxo ti obêc vông yuac ge od ob kô mone lec yuac wê i vông ge.” **19** Xomxo tibed obêc nêl kiyang lec gyovixa ti ên nêb i vông môp soên ge od ông o lêc ngô kiyang wê ici va nêl ge lêm. Lêc xomxo yuu me yon obêc nêl kiyang tiyima lec gyovixa ên nêbê i vông môp soên ge od ông ngô di yaxêni kiyang wê he vông ge. **20** Xomxo levac ti obêc vông môp nipaên ge od xam nêl i nêni nipaên lec i manôn vac konglegesen mahigun ên lie vihati i yê di xona nêni.

21 A, Pol, a le vô Anutu yuu Yesu Kilisi hixôn Anutu nue angela manôn di a nêl vô ông bêga bê ông ngô kiyang vihati wê a nêl ga di timu vô di yaxêni xomxo ya kiyang tige. Lêc le i lêc yaxêni he lutibed lêm. Nge, ông ngô he kiyang di yaxêni kehe i yêp seac lê. Le i lêc nêl kiyang xêkizéc vô xomxo ya di lum nêl kiyang vô lime lêm. Nge, ông wê he vihati tiyima. **22** Le i lêc vinoo xomxo ti decdec di tung i vac yuac wê konglegesen vông ge lêm. Dì le i lêc loc vac môp nipaên wê xomxo ya mi vông ge lêm. Nge, ông viac ông nimviha di dô hixôn nilôm paha.

23 Le i lêc num mia ningigooên pileva lêm. Nge, ông num mia wain nipwo ti hixôn ên i ngidu ông xêmyaa xôn, ên yidac wê mi vông ông nginong ge i ma.

24 Nipaên wê xomxo ya mi vông ge yêp seac vô il, om il xovô ên il nêbê he ob tulec myaviwen nipaên. Lêc nipaên wê xomxo ya vông ge yêp xôpacên, lêc obêc timuên ge od ob yêp seac êno. **25** Dì môp niviha wê xomxo mi vông ge tiyi bêge êno, ên mangwe yêp seac di mangwe yêp xôpacên, lêc vihati obêc yêp seac timuên.

6

Kiyang lec xomxo wê vông yuac vidaaêñ

¹ Xam wê xam tu xomxo levac nue yuac dì vông yuac vidaaêñ vô he ge, xam loc vac xomxo levac wê viac xam ge kwa ngîbi dì pîmil he lê ên he i o nêl nipaêñ lec Anutu hixôn i xolac lêm.

² Xam wê xam vông yuac vidaaêñ vô tibii wê vông i vin ge, xam ya mi nêl bêga ên xam nêbê, “Tibii wê viac a ge a lig vông vinên ti om xii tiyima, om a ob la vac i kiyang kwa ngîbi lêm.” Kiyang bêge o niviha lêm. Om xam nêl bêga bê, “Tibii tige a lig vông vinên wê a xêgyaa vin lec i ge, om a ob ngô kiyang wê i nêl ge dì vông yuac wê i vông vô a ge xêkizêc, ên yuac tige i vô nôn niviha vô i.”

Timoti, ông tixuu xomxo ya kiyang tibêge ên he i timu vô.

³ Kiyang nôn wê il Apumtau Yesu Kilisi vông ge didii il vac môt niviha wê Anutu vông ge. Om xomxo ti obêc sea Yesu kiyang nôn dì tixuu xomxo ya kiyang baba ge, ⁴ od xomxo tige yong i di xovôêñ ti o yêp vô i lêm. Xomxo tibêgee mi xo môt nipaêñ wê he ob ngaênma dì kunacma lec kiyang pileva wê nôn maên ge. Om kiyang tibêge vô nôn nipaêñ dì vông he yê lie tiyien ma ên susu me lê levac wê he kô ge, dì vông he hima, dì he nêl kiyang lecma, dì he vô nilô vôma, ⁵ dì he kunacma vaxvax. Xomxo tibêgee sea kiyang nôn om he piyôp vô yacyac. He so ên he nêb he obêc timu vô Anutu vông môt ge od he ob tulec susu tibeac. ⁶ Vixôhilôg, xomxo ti obêc timu vô môt wê Anutu vông ge dì obêc xo ên nêbê i nôn susu wê i kô ge tiyi pyap ge od ob vô nôn niviha vô i. ⁷ Èn il xovô ên il nêbê buc wê il yubac lec ge od il o kô susu ti lêc lam lêm. Nge, il lam pileva. Om buc wê il obêc xib lec ge od il ob kô susu ti lêc lax hixôn lêm. Nge, il ob lax mi la pileva. ⁸ Mégem il xed yaêñ yuu ned ngakwi obêc tiyi il ge od il ob nêl bêga bê, “A nêg susu tiyi a om pyap.” ⁹ Èn xomxo xêyaa obêc vin lec susu yuu mone levac ge od môt nipaêñ tigee obêc yaxêñ he dì hôm he xôn tiyi xocbê pulac hôm lili xôn ge. Om he nilô obêc kidu he ên môt nipaêñ wê xovôêñ niviha ti yêp vacêñ ma ge hixôn môt wê ob vông he vô nipaêñ ge, om he ob vô nipaêñ dì ob la dô hixôn Anutu lêm. ¹⁰ Èn môt wê xomxo xêyaa vin lec mone ge tu môt nipaêñ vihati ge kehe. Xomxo ya gee, he vông nilô la vô mone, om môt tige didii he la vac nipaêñ dì he sea vông vinên wê he vông ge, om he kilê viyin levac.

Pol nêl môt wê Timoti ob vông ge vô i

¹¹ Timoti, ông tu Anutu nu, om ông le teva ên môt nipaêñ wê a nêl kitong vô ông ge vihati yang. Ông vông nilôm i loc vô Anutu hixôn môt niviha, dì vông i vin Anutu xêkizêc ta, dì xo vigwe pisiv ên xomxo, dì le xêkizêc vac viyin, dì lum nêl kiyang vô lime. ¹² Môt vông vinên wê il vông ge tiyi xocbê xomxo tup mi luuma. Om ông tup xêkizêc ên nginoo dì tulec nôn maviha. Anutu nêl ên nêbê ông obêc dô mamviha luta, om ilage ông la le vô xomxo tibeac manôñ dì nêl vông vinên wê ông vông ge kitong yêp seac vô he mi he ngô. ¹³ Anutu ge wê vông il vihati dô madviha, dì Yesu Kilisi ge wê la le vô Pontias Pailat manôñ dì nêl i kiyang kitong yêp seac vô i. Om a le vô Anutu yuu Kilisi manôñ dì nêl yuac wê ông ob vông ge vô ông bêga bê ¹⁴ le i lêc vông kiyang wê yêp vac xolac ge ti i vô nipaêñ lêm, ên xomxo ti i o lêc nêl nipaêñ lec xolac lêm. Ông vông yuac tibêge i tiyi

buc vihati dì i loc tyip vô buc wê il lig Apumtau Yesu Kilisi obêc vena lec ge. ¹⁵ Buc wê Yesu ob lop mi lôm ge yêp vô Anutu vaci wê tu môp xêyaa niviha kehe, dì ici va tibed tu il nêd levac wê viac il ge. Anutu ge king vihati nêng king, dì xomxo levac vihati nêng levac, ¹⁶ dì ici va tibed wê ob yib lêm. Anutu dô vac xêseac pileva dì xomxo ti o tiyi wê ob la kwabo vô xêseac tige lêm. Xomxo ti o yê Anutu nôn ilage lêm, dì gwêbaga xomxo ti o tiyi wê ob yê i ge lêm. Lê levac hixôn xêkizêc wê i vông ge i yêp luta lêc luta. Nôn.

Kiyang lec xomxo wê susu tibeac ge

¹⁷ Ông nêl vô he wê susu tibeac ge bêga bê he i o kô he lec vô xomxo ên susu tibeac wê he vông ge lêm, dì he i o vông nilô i loc vô susu wê ob vô nipaên lutibed ge lêm. Nge, he i vông he nilô i loc vô Anutu, ên Anutu vông susu niviha vihati vô il ên nêb i vông il xêdyaa i vô niviha yang. ¹⁸ Om ông nêl vô he wê susu tibeac ge bêga bê he i vông yuac niviha ên i ngidu xomxo xôn, dì he i vông yuac tigee i vô levac, dì he i vông susu vô xomxo wê nêng susu maên ge ên i ngidu he xôn. ¹⁹ Ên he obêc vông bêge ge od tiyi xochê he kituc susu niviha wê ob vô nôn niviha vô he timuên ge, dì he obêc dô mavîha luta lêc luta.

Timoti i viac yuac wê Anutu vông ge

²⁰ Timoti, ông viac Anutu yuac wê vông vô ông ge i niviha, dì vô nimim vô kiyang vaxvax wê o tiyi Anutu xolac lêm ge. Dì le i lêc ngô kiyang kityooên wê xomxo nêl ge lêm. Ên he so ên he nêb kiyang kityooên tige xovôên kehe. ²¹ Xomxo ya vông nilô la vô kiyang kityooên tibêge, om he sea vông vinêng wê he vông ge.

Xêyaa vin lecên wê Anutu vông ge i ngidu xam xôn.

2 TIMOTI

Pol kivuu kipihac wê vông yuu ge la vô Timoti

1 A, Pol, Anutu vinoo a ên nêb a tu Yesu Kilisi nu sinale. Ilage Anutu hilu kiyang pyap bêga ên nêbê xomxo wê vông i vin Yesu ge obêc dô mavîha luta lêc luta. Om Anutu xovô kiyang wê hilu pyap ge dì vông yuac sinale vô a ên nêb a la nêl Yesu Kilisi kiyang kitong.

2 Timoti, a kivuu kipihac tiga vô ông. Ông ge a nug vông vinêñ wê a xêgyaa vin lec ông ge. Mag Anutu hixôn il lig Apumtau Yesu Kilisi, yuu i xo vigwe pisiv ên ông di vông vizid niviha hixôn kiyang malehe i loc vô ông.

Il nid ob yoc ên xolac lêm

3 A mi timu vô Anutu môp di vông i yuac tiyi xochê a mage buge vông ilage, dì nipaên ti o yêp vac a nilôg lêm. Timoti, a xo ông dì a pimil Anutu ên ông vac kitaaêñ wê a kitaa vidiiêñ yuu bucêñ vihati ge. **4** Dì a xo wê ông byag vô buc wê a sea ông ge, om a nêb a ob lôc vô ông i tii vac ên i vông a nilôg i vô niviha. **5** A xovô ên a nêbê vông vinêñ wê ông vông ge nôn dì o kityooêñ lêm. Ilage ông bum vêx Lois yuu tam Yunis vông i vin tibêge, om a xovô ên a nêbê gwêbaga vông vinêñ wê ông vông ge tiyi xochê yuu vông ge. **6** Om a ob nêl vô ông bê ông xovô xêkizêc wê Anutu vông vô ông ilage i tii vac. Ông kô xêkizêc tige vô buc wê a vyax vigêg lec ông ge. Om gwêbaga ông kô xêkizêc tige di vông yuac ya. **7** Ên Anutu o vông môp xonaêñ vô il lêm. Nge, vông xêkizêc wê i vông ge vô il dì vông môp xêyaa vin lecêñ vô il, dì vông il nilôd xovô môp yuu kiyang niviha ên nêb il timu vô.

8 Anutu vông xêkizêc wê i vông ge vô il, om ông nim i o lêc yoc ên Apumtau Anutu kiyang wê ông ob nêl ge lêm. Dì ông nim i o lêc yoc ên a ên wê tibii tung a lam dô vac kalabuhu lec Apumtau lê ge lêm. Nge, ông kilê viyin lec xolac hixôn a, dì le xêkizêc vac viyin tige ya xêkizêc wê Anutu vông vô ông ge. **9** Anutu vô il vêl ên il nêd nipaên dì tyuc il ên nêb il timu vô môp ngibua wê i vông ge. Lêc o vô il vêl ên il nêd nipaên ên yuac ti wê il vông ge lêm. Nge, ilage wê Anutu gên o tung lag yuu kibun lêm ge, od ici va xo vigwe pisiv ên il dì xovô pyap ên nêb Yesu Kilisi ob yib ên il nêd nipaên. **10** Dì gwêbaga môp wê Anutu xo vigwe pisiv ên il ge yêp seac vô il, ên wê Yesu Kilisi lam yib dì vô il vêl ên il nêd nipaên ge. Yesu kitya xêkizêc wê yibêñ vông ge vêl dì vông xolac niviha vô il ên nêb kiyang wê nêbê il ob dô madviha luta ge i yêp seac vô il.

11 Anutu vinoo a ên nêb a tu sinale dì la nêl xolac vô xomxo dì tixuu he ya xolac tige. **12** A vông yuac tibêge om tibii vông viyin wê a tulec gwêbaga ge vô a. Lêc a nig o yoc ên viyin tige lêm, ên a xovô xomxo ti wê a vông i vin i ge, dì a xovô ên a nêbê xomxo tyo tiyi wê ob viac yuac wê vông vac a vigêg ge i tiyi buc vihati dì i miloc vô buc wê Yesu obêc vena lec ge.

13 Ông timu vô kiyang nôn wê a nêl vô ông mi ông ngô ge, dì vông i vin Yesu Kilisi xêkizêc ta, dì ông xêmyaa i vin lec i, ên ông tu Kilisi xe pyap.

14 Myakilôhô Ngibua dô vac il nilôd, om ông viac kiyang nôn wê Anutu vông vac ông vigêm ge i niviha ya xêkizêc wê Myakilôhô Ngibua vông ge.

15 Timoti, ông xovô pyap ên ông nêbê Piselas yuu Hemosenis hixôn xomxo vông vinê vihati wê dô vac vigwe levac Esia ge, he sea a. **16** Léc Onesipolas ge, a kitaa vô Apumtau lec i bêga bê i xo vigwe pisiv ên Onesipolas yuu vinê di nue, ên mi ngidu a xôn di vông a nilôg vô niviha lu tibeac di ni o yoc ên wê a lam dô vac kalabuhu ga lêm. **17** Nge, buc wê Onesipolas val vigwe Lom ga ge od vông yuac levac lec myagén a mì val yêvô a. **18** Om a kitaa vô Apumtaubêga bê i xo vigwe pisiv ên Onesipolas vô buc timuên wê Yesu obêc vena ge. Ông xovô pyap ên ông nêbê buc ilage wê a la dô Epesas mi ngidu a xôn ya môp niviha tibeac.

2

Il tiyi xochê Yesu Kilisi nue vevac

1 A nug Timoti, Yesu Kilisi vông vizid niviha vô ông pyap om ông hôm vizid wê i vông ge xôn pilihi di le xêkizêc ya. **2** Kiyang vihati wê a nêl vô xomxo tibeac di ông ngô hixôn ge, ông vông kiyang tigee vô xomxo wê ob ngô di viac niviha ge ên he i loc nêl kiyang tigee vô xomxo ya ên he i ngô hixôn.

3 Ông le xêkizêc i tiyi xochê Yesu Kilisi nu vevac ti wê vông i yuac niviha ge, di ông kilê viyin hixôn xe lec yuac tige. **4** Xomxo ti wê kô yuac vevac ge ob vông yuac bangwe hixôn lêm. Nge, ob vông nilô vô yuac vevac tibed ên nêb tibii levac wê viac i ge i yê yuac wê i vông ge niviha. **5** Di xomxo ti obêc nêb tup mì nginoo ge od ob tup i tiyi môt wê ob kô nôn ge. Ên obêc ma ge od ob mila kô nôn wê tup ên ge lêm. **6** Di xomxo ti obêc xin vê vac yuac di viac yuac niviha ge od ob kô nôn mì ya tax. **7** Om ông xovô kiyang tiga wê a nêl ga, ên Apumtau ob vông xovôên vô ông ên ông xovô kiyang vihati kehe.

8 Ông xovô kiyang lec Yesu Kilisi i tii vac. Yesu pum lec Devit di yib di kidi lec mavîha vac yibén. Kiyang tiga xolac niviha wê a mi nêl ge. **9** Léc tibii yê a nipaên ên xolac tige, om vông viyin vô a di ku a xôn ya sen di vông a lam dô vac kalabuhu ga tiyi xochê tibii nipaên ti. Léc he tiyiên ma wê he ob ku Anutu kiyang xôn ge. **10** Mégem a le xêkizêc ta vac viyin, ên a nêb xomxo wê Anutu vinoo he ên nêb he i tu i nue ge he i ngô xolac di vông i vin Yesu Kilisi di dô mavîha hixôn i vac Anutu ben lag puunê luta lêc luta.

11 Kiyang tiga nôn bêga ên nêbê

“Il obêc xib hixôn i ge od il obêc dô madviha hixôn i. **12** Il obêc le xêkizêc vac viyin ge od il ob tu levac mì dô hixôn i. Léc il obêc yax i vun ge od i êno ob yax il vun. **13** Il obêc sea vông vinê wê il vông ge od i ob sea il lêm, ên o tiyi wê ob pilepac kiyang wê i vông ge lêm.”

Xomxo wê vông Anutu yuac vô niviha ge

14 Ông nêl kiyang tige vô xomxo ên he i xovô i tii vac nang, di ông le Apumtau manôn di nêl vô he bê he i o lêc vông vevac vóma lec kiyang vaxvax lêm, ên môt tibêge ob vô nôn niviha vô he lêm. Nge, ob vông he wê ngô kiyang tige vô nipaên.

15 Ông vông yuac niviha ên Anutu i yê ông niviha i tiyi xochê i nu yuac ti wê ông nêl xolac wê nôn ge bôbac di ông nim o yoc ên yuac tige lêm ge.

16 Ông kol ông ên kiyang vaxvax wê nôn maên ge. Ên kiyang tige ob didii xomxo la vac nipaên dì he ob vô nimi vô Anutu kiyang, dì ob vông môt tige vô levac. **17** Kiyang nipaên wê he nêl ge ob vô levac tiyi xochê kityax wê ob vô levac mi ya xomxo ninivi ma vêl ge. Haimenias yuu Pailitas, yuu mi vông bêge. **18** Yuu sea kiyang nôn dì nêl kiyang kityooên bêga ên nêbê, “Il kidi lec vac yibê pyap.” Yuu mi nêl bêge mi xomxo vông vinên ya ngô, om vông vinên wê he vông ge vô nipaên. **19** Lêt Anutu xolac le xêkizêc xochê teac le xêkizêc ge. Xolac bo ti nêl bêga ên nêbê, “Apumtau xovô xomxo wê tu i nue ge pyap.” Dì ngwe nêl bêga ên nêbê, “Xomxo ti obêc nêl ên nêbê i tu Apumtau nu ti ge od i vô nimi vô môt nipaên vihati.”

20 Vac xumac levac ti pile yuu dêg wê silva yuu gol ge vaci o dô vac lêm. Nge, dêg kibun yuu pile xax le vac hixôn. Dêg yuu pile ya vông yuac niviha, dì ya dô vaxvax. **21** Mêgem xomxo vông vinên ti

obêc vô nimi vô kiyang yuu môt nipaên dì dô niviha ge od tiyi xochê pile yuu dêg wê vông yuac niviha ge, ên xomxo tige vông nilô la vô Apumtau di viac i pyap tiyi wê ob vông yuac niviha wê Apumtau vông vô i ge vihati.

22 Om ông le teva ên môt nipaên vihati wê yêp vac xam ngivihi nilôm ên xam nêbê xam ob vông ge. Dì ông vông nilôm i loc vô môt niviha, dì môt vông vinên, dì môt xêyaa vin lecên, dì môt malehe hixôn. Om ông hixôn xomxo vihati wê xam xôn nilôm vô paha lec dì xam kitaa vô Apumtau ge, xam vihati timu vô môt tibêgee. **23** Ông kol ông ên kiyang vaxvax wê xovôên niviha ti o yêp vac lêm ge, ên kiyang tibêge wê ob vông xomxo kunacma dì vông vevac vîoma. **24** Xomxo ti obêc tu Apumtau nu yuac ge od i o vông vevac vô xomxo ya kiyang lêm. Nge, i lum nêl kiyang vô xomxo dì tixuu he i niviha ya xolac, dì xêyaa i o vô myavinê vô xomxo wê vông viyin vô i ge lêm, **25** dì i lum nêl kiyang vô he wê vông vevac vô xolac ge dì titô he, ên mêd Anutu ob vông he pilepac he dì he ob xovô kiyang nôn. **26** Ilage Seten ku he xôn vac leac wê i vông ge dì vông he timu vô ici va kiyang. Lêt he obêc xovô Anutu kiyang nôn ge od he piyôp obêc yêp niviha dì he ob sea leac wê Seten ku he xôn ya ge.

3

Môt nipaên wê ob val vô buc timuên ge

1 Ông xovô bêga bê vô buc myahipu ge od viyin tibeac obêc val. **2** Ên xomxo ob timu vô môt nipaên bêga nêbê he ob xovô heche va, dì he ob doma vô mone, dì he ob yong heche va lê, dì he ob kô he lec vô xomxo, dì he ob nêl xomxo lê nipaên, dì he ob vô ninya kitu vô tae mae, dì he ob pimil xomxo wê ngidu he xôn ge lêm, dì he ob la vac Anutu kiyang kwa ngibi lêm, **3** dì he ob vông niviha vô lie lêm, dì he xêyaa ob vô myavinê lec kiyang dì hôm xôn, dì he ob nêl kiyang nimi vaxvax, dì he ob kol he ên môt nipaên wê he ninivi xovô ge lêm, dì he ob vông xomxo vô nipaên, dì he ob vông vevac vô môt niviha vihati, **4** dì he ob kityoo lie dì vông he la vac xomxo nipaên vigê, dì he ob timu vô piyôp nipaên wê he vông ge lutibed, dì he ob xovô heche va ên nêbê he xomxo levac, dì he xêyaa ob vin lec Anutu lêm. Nge, he xêyaa ob vin lec môt toto wê ninivi xovô ge, **5** dì he ob yê da dì kitaa lê, lêt he nêl vac mya pileva, ên he vô nimi vô Anutu hixôn xêkizêc wê i vông ge. Timoti, ông le teva ên he wê mi vông môt nipaên tibêgee. **6** Ên he ya nêl xolac kityooên vô vêx wê o vông i vin

xêkizêc lêm ge. Vêx tigee mi vông môt nipaên wê vông he nilô vô viyin ge, dì he vông piyôp la vô kiyang nipaên tibeac. ⁷ Vêx tigee mi ngô kiyang viyang viyang ge ên nêb he ob kô xovôên lec, lêc he o tiyi wê he ob xovô kiyang nôn ge lêm. ⁸ Ilage vux yuu lê nêbê Janis yuu Jamblis, yuu vông vevac vô Moses vac vigwe Isip. Di gwêbaga xomxo tigee wê nêl kiyang kityooên vô vêx ge he tiyi xochê Janis yuu Jamblis, ên he vông vevac vô kiyang nôn, di piyôp wê he vông ge vô nipaên dì he sea vông vinêr wê nôn ge. ⁹ Léc môt kityooên wê he vông ge ob vô levac lêm. Ên xomxo ob yê môt wê he vông ge ên nêbê môt yacyac, tiyi xochê xomxo yê môt wê Janis yuu Jamblis vông ilage ên nêbê môt yacyac.

Pol nêl vô Timoti ên nêb i hôm Anutu kiyang xôn pilîhi

¹⁰ Ông dô hixôn a ila, om ông xovô kiyang pyap wê a tixuu xomxo ya ge, dì ông xovô môt vihati wê a mi timu vô ge, dì piyôp wê a vông ge, dì môt vông vinêr wê a vông ge, dì ông xovô wê a mi lum nêl kiyang malehe vô xomxo, dì a xo vigwe pisiv ên he, dì a le xêkizêc dì kile viyin vihati, ¹¹ dì ông xovô môt nipaên vihati wê tibii vông vô a ge hixôn viyin levac wê tulec a vac vigwe Antiok yuu Aikoniam yon Listla ge. A tulec viyin yuu myavinê mabu yocên, lêc Apumtau vô a vêl ên viyin tigee vihati. ¹² Vixôhilôg nôn, tibii ob vông viyin yuu myavinê vô xomxo vihati wê nêb ob timu vô môt wê Yesu Kilisi vông ge. ¹³ Di xomxo nipaên hixôn xomxo kityooên ob vông môt nipaên vô levac, dì nipaên wê he vông ge ob viyum he xôn, dì he ob kityoo xomxo tibeac, lêc Seten ob kityoo he.

¹⁴ Léc ông mô, kiyang nôn wê ông kô dì vông i vin xêkizêc ge, ông hôm kiyang tige xôn pilîhi, ên ông xovô xe vêx yuu vux wê xe tixuu ông ya kiyang tige, ¹⁵ dì ông xovô ên ông nêbê ilage ông gên dô nipwo, lêc ông kô xovôên lec Anutu kiyang dì i val tyip lec gwêbaga hixôn. Anutu kiyang tiyi wê ob vông xovôên vô xomxo ên he i vông i vin Yesu Kilisi dì i kitya he nêb nipaên vêl. ¹⁶ Anutu kiyang vihati wê yêp vac kipihac xolac ge, Anutu vaci vông vô xomxo mi he kivuu. Anutu kiyang tige niviha tiyi wê ob vông xovôên vô il, dì ob hilung il nêb nipaên vô il, dì ob titô môt wê il vông ge, dì ob tixuu il ya môt wê Anutu yê nêb niviha ge. ¹⁷ Om Anutu vông xolac vô il ên nêb i vông xovôên yuu xêkizêc vô il wê Anutu nue ge tiyi wê il ob vông yuac niviha ya ge.

4

Pol nêl vô Timoti ên nêb i nêl Anutu xolac nôn kitong

¹ Yesu Kilisi obêc yaxén xomxo vihati nêl kiyang, he wê dô maviha hixôn he wê yib ge, dì Yesu Kilisi ob vena le seac dì tu xomxo vihati nêb levac wê ob viac he luta ge. Om a le vô Anutu yuu Yesu Kilisi manôn dì a nêl vô ông bêga bê ² ông nêl Anutu kiyang i tiyi buc vihati, dì xomxo ob nêb ngô me ngôên obêc ma ge od ông nêl xolac vô he. Ông nêl xolac vô he i tiyi wê he ob ngô mi xovô dì vông i vin, dì ông nêl he nêb nipaên kitong vô he ên i kitiv he nilô dì he i pilepac he vêl ên môt nipaên wê he vông ge, dì ông nêl kiyang wê ob ngidu he xôn ge, dì môt wê ông ob lum nêl kiyang vô xomxo dì tixuu he ya xolac ge, le i lêc sea môt tige lêm. ³ Èn obêc buc timuên ge od xomxo ob nêb ngô kiyang nôn lêm. Nge, he ob timu vô môt wê heche va xovô ge, dì vinoo xomxo wê ob tixuu he ya

kiyang vaxvax wê he ngô nêb niviha ge. ⁴ Di he ob vô nimi vô kiyang nôn di vô ninya vô kiyang wê pivulac pileva ge. ⁵ Lêc ôcông va, ông piyôp i yêp niviha i tiyi buc vihati, di ông kilê viyin, di ông loc nêl Kilisi kiyang vô tibii madiluhu ên he i ngô di vông i vin. Yuac wê Anutu vông vac ông vigêm ge, ông vông yuac tigee vihati i vô nôn lec.

⁶ Èn a ga, tibii madiluhu nêb ob hi a xib, om a hi ob kipyax sea di a ob tu xocbê daa vô Anutu. Om buc wê a ob xib di sea kibun ga ge vô kwabo lec. ⁷ Vevac niviha wê a vông ya xolac ge, a vông pyap. A tup vac môp vông vinêñ di la tiyôô lec myahipu. Di a o sea vông vinêñ wê a vông ge lêm. Nge, a hôm xôn pilihi. ⁸ Om Apumtau viac nôn niviha pyap ên nêb a ob kô. Nôn tige bêga nêbê i ob yê a nêb a xomxo niviha. Om Apumtau wê yaxêñ xomxo ya môp bôbac ge obêc vông nôn tige vô a vô buc wê obêc vena lec ge. Lêc ob vông vô aca va tibed lêm. Nge, ob vông vô xomxo vihati wê he xêyaa vin lec ên nêb he ob yê i vô buc wê obêc vena lec ge.

Kiyang viwen timuên

⁹ Timoti, ông seb lam vô a lutibed, ¹⁰ ên Klesens la vigwe Galesia, di Taitas la vigwe Dalmesia. Dimas vông nilô la vô susu kibun ga om sea a dô di la vigwe Tesalonaika. ¹¹ Luk tibed wê dô hixôn a. Om ông loc kô Mak di muu lam vô a, ên Mak tiyi wê ob ngidu a xôn vac yuac ge. ¹² Tikikas ge, a vông i la Epesas.

¹³ Ilage wê a la vigwe Tloas ge od a sea a saket levac dô vac Kapas ben. Om buc wê ông obêc lam vô a ge od ông loc kô a saket tige mi lam, di kô a kipihac hixôn, di le i lêc lungêñ a kipihac wê he vông ya bwoc ninivi ge lêm. Nge, ông kô kipihac vihati mi lam hixôn.

¹⁴ Aleksanda wê vông yuac lec ain siêñ ge vông nipaêñ levac vô a, om Anutu obêc vông myaviwen nipaêñ vô i lec nipaêñ wê i vông vô a ge. ¹⁵ Om ông êno, ông viac ông ên xomxo tige, ên xêyaa vô myavinê ên nêb ob le vac kiyang niviha wê il mi nêl ge xôn.

¹⁶ Vô buc wê a la le vac kot taxlee ge, xomxo ti o le hixôn a di nêl kiyang wê ob ngidu a xôn ge lêm. Nge, he vihati sea a dô. Mêlec a kitaa vô Anutu ên a nêbê i kitya he nêñ nipaêñ wê he vông vô a ge vêl. ¹⁷ He vihati sea a mi la, lêc Apumtau dô hixôn a di vông xêkizêc wê i vông ge vô a, om a nêl Kilisi xolac vihati yêp seac di tibii madiluhu wê lam le vac kot ge vihati ngô. Om tiyi xocbê Anutu vô a vêl ên noo laion mya. ¹⁸ Apumtau obêc vô a vêl ên nipaêñ vihati wê xomxo nêb ob vông vô a ge, di obêc kô a mi la vac ben lag puunê di obêc viac a luta. Om il ob pimil i lê i yêp luta lêc luta. Nôn.

¹⁹ Ông nêl vô Akwila yuu vinê Plisila hixôn Onesipolas he vinê nue bêga bê a nêl vidiiêñ vô he. ²⁰ Elastas gên dô vac vigwe Kolin, di Tlopimas vông yidac ti om a sea i vac vigwe Mailitas mi i dô. ²¹ Ông seb lam vô a lutibed, di le i lêc bin buc wê lun yuu ningigooêñ ob val lec ge lêm. Yubyulas yuu Pyudens di Lainas yuu Klodia hixôn lime vông vinêñ vihati vac vigwe tiga, he nêl vidiiêñ vô ông.

²² Apumtau i ngidu ông xôn, di vizid niviha wê i vông ge i viac xam vihati.

TAITAS

Kipihac wê Pol kivuu vô Taitas ge

¹ A, Pol, a ga Anutu nu yuac ti, dì Yesu Kilisi nu sinale a. Anutu vông a la vô xomxo wê i vinoo he ên nêb he i tu i nue ge ên nêb a la ngidu he xôn ên he i vông i vin xêkizêc, di he i xovô Anutu kiyang nôn wê ob didii he mi la vac môp wê Anutu vông ge, ² dì he i xovô bê he obêc dô maviha luta lêc luta. Ilage wê Anutu gên o tung lag yuu kibun lêm ge od hilu kiyang pyap ên nêbê il obêc dô madviha luta lêc luta. Dì Anutu o tiyi wê ob kityoo il ge lêm. ³ Om buc wê Anutu nêl ge wê vông xomxo la nêl kiyang tige yêp seac. Anutu wê vô il vêl ên il nêd nipaêñ ge nêl ên nêb a êno kô yuac xolac nêlén tige.

⁴ Taitas, a kivuu kipihac tiga vô ông. Ông ge a nug wê u xôn vông i vin ge. Mag Anutu yuu nu tuc Yesu Kilisi wê vô il vêl ên il nêd nipaêñ ge, yuu i vông vizid niviha hixôn kiyang malehe i ngidu ông xôn.

⁵ A sea ông vac vigwe Klit ên a nêbê ông dô vac Klit dì vông yuac wê a vông ge myahipu i yêp niviha, di ông vinoo he wê ob kô yuac gyovixa vac vigwe toto i tiyi wê a nêl vô ông ilage. ⁶ Om ông yaxêñ he dì vinoo he wê nipaêñ ti o yêp vô he lêm, dì wê vinê tibed, di wê nue vông i vin Yesu om xomxo ti o tiyi wê ob nêl bê xomxo tige nue mi vông môp nipipaa me vô ninya kitu vô tae mae ge lêm. ⁷ Ên he gyovixa wê ob viac Anutu yuac, om he i timu vô môp niviha ên xomxo i o lêc tulec he nêñ nipaêñ ti lêm, dì he i o lêc kô he lec vô xomxo lêm, dì he xéyaa i o lêc vô myavinê lutibed lêm, dì he i o lêc num mi vô mavmav lêm, dì he i o lêc hi xomxo vaxvax lêm, dì he i o lêc doma vô mone i luu vêl lêm. ⁸ Nge, he i kô tibii mi loc viac he vac xumac di vev ngwax vô he, dì he xéyaa i vin lec môp niviha vihati, di he i viac he piyôp i yêp niviha, dì he i dô i tiyi xochê xomxo wê viac i niviha ge, dì he i timu vô môp wê Anutu vông ge vihati, dì he i viac he niviha ên môp vihati wê he xovô ên nêb ob vông ge, ⁹ dì he i hôm Anutu kiyang nôn wê xomxo tixuu he ya ge xôn pilili, ên he obêc hôm xôn pilili ge od he tiyi wê he ob nêl xolac nôn vô tibii dì hi he wê yax xolac vun ge nêñ kiyang i tô.

¹⁰ Ên xomxo tibeac vac vigwe Klit vô ninya kitu vô Anutu kiyang, dì nêl kiyang vaxvax wê vông xomxo piyôp vô himena himena ge. He wê mi timu vô Yuda vông môp ninivi gôlén gee, he tibeac mi nêl kiyang tibêgee. ¹¹ He nêb he ob kô mone yuu susu vô xomxo, om he tixuu he ya môp nipaêñ wê o tiyi wê il ob vông ge lêm. Om kiyang wê he nêl ge vông xomxo hixôn he tae mae lie vô nipaêñ. Mêgem ông le vac he xôn ên he i o nêl kiyang nipaêñ tibêge lêm. ¹² Ilage Klit levac ti nêl lec lie Klit bêga ên nêbê, “He Klit ge xomxo vigwe kityooen, di he tiyi xochê bwoc vimen ge, di he mi ya levac, dì mi dô ni maên.” ¹³ Kiyang tige vixôhilôg nôn. Om ông nêl he Klit nêñ nipaêñ vô he ya kiyang xêkizêc ên vông vinê wê he vông ge i yêp hôbac, ¹⁴ dì he i o ngô pivulac pileva wê xomxo Yuda mi nêl ge lêm, di he i o ngô kiyang baba wê xomxo wê vô nimi vô Anutu kiyang nôn ob nêl ge lêm.

¹⁵ Xomxo wê nilô paha ge ob yê susu vihati nêb niviha. Lêc xomxo wê nilô ningeac wê o vông i vin Kilisi lêm ge, he ob yê susu ti niviha lêm, ên piyôp yuu nilô vô ningeac tiyima. ¹⁶ He mya mi nêl bêga en nêbê, “A xovô Anutu.” Lêc môt wê he vông ge nêl he kitong nêbê he mi yax Anutu vun. He mi vô ninya kitu vô Anutu kiyang, dì he o tiyi wê he ob vông yuac niviha ti ge lêm. Om Anutu yê he nipaên.

2

Kiyang lec kipwoc

¹ Taitas, ông lêc tixuu xomxo ya môt niviha i tiyi xocbê Anutu kiyang nôn nêl ge. ² Om ông nêl vô he kipwoc bêga bê he i o lêc num mi vô mavmav lêm. Nge, he i timu vô môt niviha tiyi wê ob vông xomxo yê he niviha ge, dì he i viac he piyôp i yêp niviha, dì he i vông i vin xêkizêc ta, dì he xêyaa i vin lec xomxo, dì he i le xêkizêc vac viyin vihati wê ob val vô he ge.

Kiyang lec vêxta yuu vêxwo

³ Ông nêl vô he vêxta bêga bê he i timu vô môt i tiyi xocbê xomxo vông vinêr vông ge, dì he i o lêc nêl kiyang nipaên lec xomxo lêm, dì he i o num mia xêkizêc di mia i viac he lêm. Nge, he i tixuu he vêxwo ya môt niviha, ⁴ ên he vêxwo gee i xovô mi timu vô môt niviha bêga bê he xêyaa i vin lec liyae nue, ⁵ dì he i viac he piyôp i yêp niviha, dì he i o loc vô vux bangwe dì vông môt nipaên lêm, dì he i viac he xumac i niviha, dì he i ngidu xomxo xôn, dì he i loc vac liyae kiyang kwa ngibi. He i timu vô môt tibêgee vihati ên xomxo ti i o nêl nipaên lec Anutu xolac lêm.

Kiyang lec ngivihi

⁶ Ông nêl vô he ngivihi bêga bê he i viac he piyôp i yêp niviha. ⁷ Taitas, ôcông va ge ông timu vô môt niviha ên he ngivihi he i yê dì timu vô ông vixam. Dì wê ông obêc tixuu he ya kiyang ge, od le i lêc nêl kiyang kityooê hixôn lêm. Nge, ông vông piyôp i loc vô môt niviha di vông ông yuac tige. ⁸ Ông nêl kiyang nôn wê xovôê niviha ge ên xomxo ti i o lêc tulec nipaên ti i yêp vac lêm. Om xomxo obêc nêb vông vevac vô ông ya kiyang ge od he ni ob yoc ên he, ên he o tiyi wê ob nêl kiyang nipaên lec il ge lêm.

Kiyang lec xomxo wê tu xomxo levac nue yuac

⁹ Ông nêl vô he wê tu xomxo levac nue yuac ge bêga bê he i loc vac xomxo levac wê viac he ge kwa ngibi, dì vông he yuac vihati i niviha i tiyi wê xomxo levac ob yê niviha ge. Dì he i o luu kiyang vô xomxo levac ya kiyang nipaên lêm. ¹⁰ He i o lêc vun xomxo levac susu lêm. Nge, he i vông he yuac vihati i yêp niviha ên xomxo levac i yê bê he o vông yuac ti vô nipaên lêm. Ên nue yuac obêc vông bêge ge od xomxo ob yê xolac wê il mi nêl vô he ge nêb niviha. Xolac tiga, Anutu wê vô il vêl ên il nêd nipaên ge kiyang nôn.

¹¹ Ên môt wê Anutu xo vigwe pisiv ên il ge lam yêp seac pyap. Môt tige tiyi wê ob vô xomxo vihati vêl ên he nêb nipaên, ¹² dì ob tixuu il ya môt niviha bêga nêbê il ob sea môt wê il vô nimid vô Anutu ge, dì sea môt nipaên kibun ga, dì kol il ên môt nipaên, dì vông môt wê bôbac ge, dì

timu vô môp wê Anutu vông ge vihati i tiyi buc vihati wê il dô kibun ga ge.¹³ Il ob bin nôn niviha ti wê ob vông il xêdyaa vô niviha ge. Nôn tige bêga nêbê il Mag Anutu wê levac ge hixôn Yesu Kilisi wê vô il vêl ên il ned nipaên ge obêc vena hixôn xêseac wê i vông ge di lam le seac vô il.¹⁴ Kilisi lam yib ên il ên nêb ob vô il vêl ên nipaên vihati yang di vông il vô paha lec, ên nêb il tu i nue wê xo vinux ên nêb il vông yuac niviha ge.

¹⁵ Om ông nêl kiyang tige vô xomxo vihati, di tipi vô he piyôp ên he i timu vô kiyang tige, di nêl he nêl nipaên kitong vô he. Le i lêc vông xomxo ti i yê ông i tiyi xochê xomxo widaaêñ ge lêm.

3

Môp niviha wê il ob timu vô ge

¹ Taitas, ông nêl vô tibii Klit bêga bê he i loc vac gavman hixôn xomxo levac vihati kwa ngibi, di ngô he vya, di he i viac he i tiyi wê he ob vông yuac niviha vihati ge,² di he i o nêl kiyang nipaên lec xomxo ti lêm, di he i o ngaênma lêm. Nge, he i lum nêl kiyang vô xomxo, di he i vông niviha vô he vihati.

³ Èn ilage il piyôp maên êno, di il vô ninyad kitu vô kiyang, di Seten didii il mi la vac môp nipaên, di il nilôd kidu il ên môp viyang viyang wê il xovô ên il nêb il ob vông ge, hixôn môp wê il nidnivi yê niviha ge, om môp nipaên tibêgee viac il ilage, di il nilôd xo nipaên lec xomxo, di il do mad vô susu wê xomxo vông ge. Xomxo yê il nipaên, di il xê he nipaên.⁴ Il mi vông môp tibêgee ilage. Mêlêc Anutu wê vô il vêl ên il ned nipaên ge xêyaa vin lec il di vông niviha vô il. Om buc wê xêyaa vin lecén yuu niviha wê i vông ge lam yêp seac vô il madnôn,⁵ ge wê i vô il vêl ên il ned nipaên. Lêc Anutu o vô il vêl ên il ned nipaên ên yuac niviha ti wê il vông ge lêm. Nge, Anutu vaci xo vigwe pisiv ên il, om lipac il vô paha lec di il tu i nue paha, di Myakilôhô Ngibua vông il dô madviha.⁶ Yesu vô il vêl ên il ned nipaên, om Anutu kipyax Myakilôhô Ngibua lam vô il luu vêl lec yuac wê Yesu Kilisi vông ge⁷ ên nêb môp wê i xo vigwe pisiv ên il ge i vông il tu xomxo wê Anutu ob yê niviha ge di vông il tu i nue di il dô bin buc wê il ob dô madviha luta lêc luta ge.

⁸ Kiyang tige vixôhlîg nôn. Om a nêl vô ông bêga bê ông nêl kiyang tige xêkizêc vô xomxo, ên he wê vông i vin Anutu ge he i vông nilô i loc vô yuac niviha vihati di le xêkizêc vac yuac tigee. Yuac tigee niviha di ob ngidu xomxo xôn.

⁹ Ông lêc le teva ên kiyang vaxvax wê xomxo kunacma lec ge, di kiyang wê he nêl lec bue tivae lê ge, di kiyang higacêñ, di kiyang wê he ngaênma lec Moses xolac ge. Ông le teva ên kiyang tibêgee, ên ob ngidu il xôn lêm di ob vô nôn niviha vô il lêm.

¹⁰ Xomxo ti obêc lam nêl kiyang ti wê ob vông xomxo vông vinêñ hibu sea mi la le kidu kidu ge od ông nêl i nêl nipaên vô i manôñ lu ti me lu yuu. Lêc ngôñ obêc ma ge od ông vô nimim vô i,¹¹ ên ông xovô ên ông nêbê xomxo tibêge sea môp niviha di la vô môp nipaên, om nipaên wê ici va vông ge vông i vô nipaên di kitya i vêl.

Kiyang viwen timuêñ

¹² A nêb a obêc vông Atemas me Tikikas i loc vô ông vô buc timuêñ. Om buc wê yuu ngwe obêc val vô ông ge od ông sea vigwe Klit di seb lam vô a

lutibed vac vigwe Nikopolis, ên a nêl pyap ên a nêb a ob dô vac Nikopolis tiyi dentuc wê lun yuu ningigoên ge. ¹³ Xomxo ti lê nêbê Sinas ge wê i xovô môp wê gavman vông ge vihati. Ông vông Sinas yuu Apolos i loc lutibed, di óng ngidu yuu xôn êdêc susu ti i o lêc ma ên yuu vac môp lêm.

¹⁴ A nêl vô il lige vông vinêñ vihati bêga bê he i le xêkizêc vac yuac vihati wê niviha ge ên i ngidu he xôn i tiyi buc vihati di i ngidu xomxo wê susu maên ge xôn êno. Om he i vông yuac niviha wê ob vô nôn niviha ge, di he i o dô vidaaén lêm.

¹⁵ Xomxo vihati wê dô hixôn a ge nêl vidiiêñ vô ông. Ông nêl vidiiêñ vô il lige vông vinêñ wê xêyaa vin lec il ge.

Vizid niviha wê Anutu vông ge i viac xam vihati.

PAILIMON

Kipihac wê Pol kivuu vô Pailimon ge

¹ A, Pol, hixôn il lig Timoti, xii kivuu kipihac ga vô ông Pailimon. Pailimon, ông ge xii lig yuac wê xii xêmyaa vin lec ông ge. Tibii vông a lam dô vac kalabuhu ên wê a mi nêl Yesu Kilisi xolac ge, om a kivuu kiyang ga i loc vô ông, ² di i loc vô il lig vêx Apia hixôn, di i loc vô Akipas wê xe xôn mi vông yuac xolac xêkizêc ge, di i loc vô xomxo vông vinên vihati wê xam mi kitucma vac ông bom ge. ³ Vizid niviha yuu kiyang malehe wê il mag Anutu yuu Apumtau Yesu Kilisi vông ge i hivun xam xôn.

Pailimon vông i vin Yesu di xêyaa vin lec lie vông vinên

⁴ Pailimon, tiyi lec buc vihati wê a mi kitaa vô Anutu ge od a mi xovô ông vac kitaaêñ di a pîmil Anutu ên ông, ⁵ ên a ngô wê ông vông i vin Apumtau Yesu di ông xêmyaa vin lec xomxo vông vinên vihati ge. ⁶ Il xôn vông i vin mi dô tibed vac xolac nilô, om a kitaa vô Anutu lec ông ên a nêb ông dô niviha vac vông vinên, ên vyac xovô vizid niviha vihati wê il kô vô Kilisi ge. ⁷ A lig Pailimon, ông xêmyaa mi vin lec lime vông vinên vihati di ông mi ngidu he xôn di vông he nilô vô niviha, om môt wê ông vông ge vông a xêgyaa vô niviha di vông a nilôg vô viyin maen.

Kiyang lec Onisimas

⁸ Ông môt tibêge, mêgem a nêb a ob nêl kiyang ti vô ông. Ên môt niviha ti yêp wê a nêb ông vông ge, di a tiyi wê a ob nêl xêkizêc lec Yesu lê bê ông vông môt tige lê, ⁹ lêc a nêb a ob kidu ông lêm. Ên u xêdyaa vin lecma, om a nêb a ob lum nêl kiyang vô ông. A, Pol, a vô kipwoc di gwêbaga a lam dô vac xumac kalabuhu ên wê a mi nêl Yesu Kilisi xolac ge, ¹⁰ om a nêb a ob nêl vô ông lec a nug Onisimas. Ên a lam dô vac kalabuhu lê, lêc Onisimas ngô Yesu xolac wê a mi nêl ge di vông i vin, om tu a nug vông vinên ti. ¹¹ Vixôhîlôg, ilage Onisimas tu ông num yuac pileva, lêc o vông yuac niviha wê ob ngidu ông xôn ge lêm. Lêc gwêbaga tiyi wê ob vông yuac niviha wê ob ngidu u xôn ge.

¹² A xêgyaa vin lec Onisimas luu vél, lêc gwêbaga a vông i lôc ên a nêb i lôc vô ông. ¹³ Tibii vông a lam dô vac kalabuhu ên wê a mi nêl Yesu xolac ge, om a nêb Onisimas i tu ông mamnôn di dô hixôn a ên viac a vac kalabuhu. ¹⁴ A xo bêga lê, lêc a nêb ông obêc lee yuu lec lêm ge od a ob hôm Onisimas xôn lêm. Ên a nêb a ob kidu ông bê ông vông môt tige lêm. Nge, a nêb ôcông va xovô niviha wê ông ob vông vô a ge, lêc vông.

¹⁵ Ilage Onisimas pec ên ông dî lam dô teva ên ông nipwo tya, lêc kehe bêga bê obêc lôc mi loc vô ông di muu dô luta. ¹⁶ Lêc gwêbaga Onisimas obêc milôc dô xochê ông num yuac ilage lêm. Nge, obêc dô tiyi xochê u lig vông vinên ti wê u xêdyaa vin lec i ge. Ên a ga, a xê i tiyi xochê a lig wê a xêgyaa vin lec i ge, lêc ông ge, ông xêmyaa obêc vin lec i luu vél, ên Onisimas ge ông num yuac wê ob vông yuac vô ông ge, di i ge ông lim vông vinên êno.

¹⁷ Mêgem ông obêc xovô bê a ga ông lim wê u xôn mi vông yuac xolac ge od ông lêc viac Onisimas niviha i tiyi xocbê ông viac a niviha ge. ¹⁸ Lêc Onisimas obêc vông ông susu ti vô nipaên ilage, me myaviwen ti obêc yêp vô i ge od aca va obêc vông vac. ¹⁹ Mêgem a Pol, aca va kivuu kiyang ga ya vigêg bêga bê a obêc hi myaviwen wê Onisimas vông ge. Vixôhilôg, myaviwen wê a nêl xolac vô ông ilage yêp vô ông lê, lêc a ob nêl kiyang lec tige lêm. ²⁰ A lig Pailimon, u xôn vông i vin Kilisi, om a nêl lec Apumtau lê bê ông vông niviha vô a di vông i vô viyin maên.

²¹ Kiyang wê a kivuu vac kipihac ga, a xovô ên a nêbê ông obêc ngô di vông i vô nôn lec, di a xovô hixôn bê ông obêc vông môp niviha ya hixôn i luu kiyang wê a nêl ga vêl. ²² Di kiyang ngwe, a nêb ông viac xumac nilô wê a ob dô vac ge ti, ên a vông i vin ên a nêb Anutu ob ngô kitaaêñ wê xam mi kitaa lec a ge di ob vông a lôc mì loc vô xam.

²³ Epaplas wê xii xôn dô vac kalabuhu ga lec wê xii mi nêl Yesu Kilisi xolac ge, i mi xo ông om nêl vidiiêñ vô ông. ²⁴ Mêd Mak yuu Alistakas di Dimas yuu Luk, he ma ti wê xe xôn vông yuac xolac ge, he êno nêb ob nêl vidiiêñ vô ông. ²⁵ Xêyaa vin lecêñ yuu vizid niviha wê Apumtau Yesu Kilisi vông ge i viac xam.

HIBLU

Kipihac wê la vô tibii Hiblu ge

Anutu nu tuc kô i kiyang mi lam nêl vô il

¹ Ilage Anutu nêl i kiyang vô plopete tiyi buc tibeac ên nêb he i loc nêl vô il buge ên he i ngô. Om wê Anutu nêl i kiyang vô plopete ilage, od o timu vô môp tibed lêm. Nge, timu vô môp toto dì nêl i kiyang vô he. ² Lêc buc timuén viwen gwêbaga Anutu vông môp paha bêga nêbê vông nu tuc lam ên nêb i lam nêl Anutu kiyang i yêp seac vô il. Ilage Anutu nêl om nu tuc tung lag yuu kibun, dì Anutu vinoo i pyap ên nêb ob nêl nu tuc lê lec susu lag yuu kibun vihati. ³ Xêseac wê Yesu vông ge tiyi xocbê xêseac wê Anutu vông ge, di Yesu hixôn Anutu, yuu xôn tiyima. Dì kiyang wê Yesu vông ge xêkizêc om ngidu susu lag yuu kibun vihati yang ge xôn dì vông he dô xêkizêc. Yesu lam yib ên nêb ob vô xomxo vêl ên he nêñ nipaên. Pyap dêc lax mi la dô vô Anutu vigê hiyôv gê kisii ganê.

Anutu nu tuc nginoo angela vêl

⁴ Anutu vông lê levac vô nu tuc om nu tuc nginoo angela vihati vêl, ên lê levac wê Anutu nu tuc vông ge luu angela lê vêl. ⁵ Ilage Anutu nêl vô nu tuc ên nêbê,

“Ông ge a nug, dì gwêbaga a vông ông lêm vô levac.”

Anutu nêl bêge. Nang dì nêl vô nu tuc tii vac nang ên nêbê,

“A tu ông mam, dì ông tu a nug.”

Anutu nêl bêge, lêc o nêl bêge vô angela ti lêm. Nge, nêl vô nu tuc tibed. ⁶ Om vô buc wê Anutu nêb obêc vông nu tuc lam kibun ga ge od Anutu nêl ên nêbê,

“Angela wê a vông ge, he vihati i yev vixa kitu vô a nug tuc.”

⁷ Nang dêc nêl kiyang lec angela tii vac nang bêga ên nêbê,

“Angela wê a vông ge tu a nuge yuac, om a obêc nêl ge od he obêc tiyi xocbê lea, me he obêc tiyi xocbê ngwax mahelac dì ob la vông yuac tiyi xocbê a nêl ge.”

⁸ Anutu nêl vô angela ên nêbê he tu i nue yuac, lêc nêl vô nu tuc bêga ên nêbê,

“O Anutu, ông tu xomxo nêñ levac wê ông obêc dô luta lêc luta, dì ông viac nume vihati ya kiyang yuu môp bôbac. ⁹ Ông xêmyaa mi vin lec môp nivîha vihati, dom kiyang yuu môp nipaên ge vông ông xêmyaa vô myavinê. Mêgem a wê ông Anutu a ge, a vinoo ông dì vông ông xêmyaa vô nivîha luu wê a vông vô lime ge vêl.”

¹⁰ Nang dêc Anutu nêl vô nu tuc tii vac nang ên nêbê,

“Apumtau, vô buc taxlee ge ôcông va tu kibun kehe, dì ôcông va vigêm tung lag hixôn. ¹¹ Obêc buc ti ge od susu lag yuu kibun vihati yang xôa obêc ma, dom ông obêc dô luta. Susu lag yuu kibun vihati obêc vô tikwê tiyi xocbê nivimhi tikwê ge, ¹² om ông obêc vilun he i tiyi xocbê xomxo vilun nivimhi tikwê ên nêb ob nêx i la vêl ge, dì ông obêc pilepac he vô paha lec. Dom ôcông va ge, ông obêc pilepac lêm. Nge, ông obêc dô tiyi xocbê ông dô gwêbaga dì ông obêc dô luta lêc luta.”

¹³ Nang dêc Anutu nêl ên nêbê,

“Ông lam dô vô a vigêgê hiyôv, dì i loc tyip vô buc wê a obêc vông xomxo wê vông vevac vô ông ge he i lam dô vac ông kwa ngibi.”

Anutu nêl bêge, lêc o nêl vô angela ti lêm. Nge, nêl vô nu tuc tibed, ¹⁴ ên angela ge Anutu nue yuac wê tiyi xochbê myakilôhô ge. Om Anutu vông yuac vô he ên nêb he i loc ngidu xomxo wê Anutu ob vô he vêl ên he nêni nipaên ge xôn.

2

Il ob vô ninyad vô Yesu kiyang

¹ Yesu nginoo angela vêl, om a ob nêl vô xam bê kiyang wê il ngô pyap ge il ob hôm xôn pilihi dì seaën kiyang tige i ma. ² Ilage Anutu nêl i xolac vô angela di vông he lam nêl kitong vô xomxo kibun ga. Kiyang wê he lam nêl ge vixôhilôg nôn. Ilage xomxo wê ngôen angela kiyang ma di vô nimi vô ge, he vihati kô myaviwen tiyi wê he vông ge. ³ Lêc Yesu lê nginoo angela vêl dì Yesu vông vizid levac vô il ên wê vô il vêl ên il nêd nipaên ge. Om il obêc vô nimid vô vizid levac tige ge od il ob pec ên myaviwen nipaên wê Anutu ob vông vô il ge tibêna? Apumtau Yesu nêl taxlee ên nêbê obêc kitya il nêd nipaên vêl, dì xomxo wê ngô Yesu vya ge nêl kitong vô il hixôn ên nêbê, “Kiyang tige vixôhilôg nôn.” ⁴ Mêdêc Anutu nêb ob ngidu kiyang tige xôn, om vông do levac viyang viyang hixôn xêkizêc manôn toto, dì vông xovôen toto wê Myakilôhô Ngibua vông ge vô xomxo toto tiyi xochbê ici va xovô ên nêb ob vông vô he ge.

Yesu tu il badzub wê vô il vêl ên il nêd nipaên ge

⁵ A ob nêl kiyang lec môp wê Anutu obêc vông gê kibun ga vô buc timuên ge. Anutu o nêl vô angela ên nêbê he ob tu levac dì viac kibun vô buc tige lêm. ⁶ Nge, kiyang yêp vac xolac bêga ên nêbê,

“O Anutu, xomxo ga xomxo kibun, lêc bêna lêc ông xo he? Dì he ge xomxo kibun nu, lêc bêna lêc ông viac he?”

⁷ Vô buc myabo tya ông vông xomxo kibun ga la dô vac angela kwa ngibi.
Nang dêc ông vông he lê vô levac dì hôm he lê lec,

⁸ dì ông vông susu vihati la vac he kwa ngibi.”

Xolac nêl bêge, om il ob xovô bê Anutu tung susu vihati dô vac xomxo kwa ngibi, om susu ti o dô vaxvax lêm. Lêc gwêbaga il o xê wê susu vihati dô vac xomxo kwa ngibi ge lêm. ⁹ Nge, il xovô Yesu môci. Ilage Anutu lee yuu ên nêbê Yesu i loc dô vac angela kwa ngibi i tiyi buc myabo wê i lam dô kibun ga ge. Anutu xo vigwe pisiv ên il om vông Yesu lam yib ên il vihati nêd nipaên. Yesu kilê myavinê levac dì yib, mègem Anutu yong Yesu dì vông lê levac vô i.

¹⁰ Anutu tung susu lag yuu kibun vihati ên nêb he i vông i lê i vô levac. Dì Anutu nêb ob vông xomxo tibeac i tu i nue mi tung he la dô vac xêseac wê i vông ge. Mègem vông Yesu lam kilê myavinê levac ên nêb myavinê wê i kilê ge i vông i tu il nêd mugên wê ob vô il vêl ên il nêd nipaên ge. Om Anutu piyôp wê vông Yesu lam kilê myavinê ge, ge môp niviha. ¹¹ Il ge Anutu nue il, ên wê Yesu kitya il nêd nipaên vêl dì vông il tu xomxo ngibua ge. Mègem il xôn Yesu, il Mag tibed. Om Yesu nêl il ên nêbê i lie il, dì i ni o yoc ên wê nêl bêge lêm. ¹² Om Yesu nêl vô Anutu bêga ên nêbê,

“A obêc nêl ông lêm i yêp seac vô lige, dì a obêc vông lilo wê ob pimil ông lêm vô levac ge vac lige vông vinên mahigun.”

¹³ Nang dêc Yesu nêl tii vac nang ên nêbê,

“A vông i vin bêga ên a nêbê Mag Anutu ob ngidu a xôn.”

Yesu nêl bêge, nang dêc nêl i tii vac nang ên nêbê,

“Wê lê. A dô ga, dì Anutu nue wê vông vô a ge dô hixôn a.”

Yesu lam tu xomxo kibun xocbê il ga

¹⁴ Il wê Anutu nue ge, il xomxo kibun wê il nidnivi kibun. Om Yesu éno lam kô niniyi kibun ga tiyi il nidnivi, dì yib ên nêb yibêñ wê i vông ge i kitya Seten hixôn xêkizêc wê i vông ge i loc vêl, ên xêkizêc wê Seten vông ge didii xomxo vac yibêñ. ¹⁵ Buc vihati wê xomxo dô maviha lec kibun ga ge, he vihati xona ên buc wê he ob yib lec ge, om xonaén tige hôm he xôn. Mêgem Yesu lam yib ên nêb ob piwelac he vêl ên xonaén ên yibêñ. ¹⁶ Il ob xovô bê Yesu o lam yib ên nêb ob ngidu angela xôn lêm. Nge, lam yib ên nêb ob ngidu Eblaham bue il xôn. ¹⁷ Anutu vông Yesu lam tu xomxo kibun ga xocbê il ge, dì Yesu kô viyin yuu nipaén vihati tiyi xocbê il kô ge. Yesu vông bêge om tu il xomxo levac wê mi vông daa vô Anutu ên nêb i kitya xomxo nêñ nipaén vêl, tiyi xocbê xomxo Islel daa sién nêñ levac wê Hetplis* ge vông ilage. Om Yesu tu il nêd Hetplis wê xo vigwe pisiv ên il dì vông yuac wê Anutu vông vô i ge vô nôn lec, dì vông ici va tu daa vô Anutu ên nêb i kitya il nêd nipaén vêl dì kitya ni nyagén wê Anutu xo lec il ge vêl êno. ¹⁸ Buc wê Yesu lam dô kibun ga ge od viyin yuu myaviné toto tulec i di yaxên i, om gwêbaga viyin yuu myaviné obêc tulec il ge od Yesu tiyi wê ob ngidu il xôn ge.

3

Yesu kô lé levac luu Moses lê vêl

¹ Xam lige vông vinên wê Anutu vinoo xam ên nêb xam obêc dô hixôn i vac i ben kisiinê ge, xam xo Yesu pilahi, ên Yesu ge il Sinale yuu Hetplis* wê il vông i vin i dì nêl i lê yêp seac. ² Anutu vinoo Yesu ên nêb i kô yuac tige, om Yesu vông i tiyi dì o sea yuac tige lêm, tiyi xocbê Moses vông yuac wê Anutu vông vô i ên nêb i vông vac Anutu nue Islel mahigun ge. ³ Lêc Anutu vông Yesu lê vô levac luu Moses lê vêl. Ên il ob nêl xumac ti lê i vô levac lêm. Nge, xomxo ti wê lox xumac tige, il ob nêl i lê i vô levac luu xumac vêl. ⁴ Ên xumac vihati wê le lec kibun ga ge, xomxo toto lox, lêc Anutu ge wê tung susu vihati yang. ⁵ Moses vông yuac wê Anutu vông vô i ge vô nôn lec vac Anutu nue Islel mahigun. Yuac wê Moses vông ge bêga nêbê nêl yuac wê Anutu nêb ob vông timuén ge kitong. Om Moses vông yuac tiyi xocbê Anutu nu yuac ti. ⁶ Dom Kilisi ge Anutu nu nôn, om o vông yuac tiyi xocbê Anutu nu yuac ti lêm. Nge, vông yuac tiyi xocbê ma ob vông vô nu ti. Om tu Anutu nue nêñ levac dì vông yuac wê Anutu

* **2:17:** Lê Hetplis ge nêl lec xomxo Islel ti wê tu xomxo daa sién nêñ levac ge. Yuac wê xomxo tige vông ge bêga nêbê la vac Anutu xumac ngibua nilô ngwe wê ngibua nôn ge mi la si daa vô Anutu ên nêb i kitya he Islele vihati nêñ nipaén vêl. Lêc o vông vô buc tibeac lêm. Nge, vông lu tibed vac klismas ti. Vac kipihac wê Matyu, Mak, Luk di Jon kivuu lec Yesu Kilisi ge od xe kivuu xomxo tige lê bêga nêbê xomxo daa sién nêñ levac, me xomxo wê mi si daa ge nêñ levac. Lêc vac kipihac Hiblu ga kiyang tige yêp tibeac om xe kivuu myabo bê Hetplis. * **3:1:** ông wê Hiblu 2:17.

vông vô i ge niviha. Mêgem il obêc hôm vông vinên wê il vông ge xôn pilihi dì dô hixôn xêdyaa niviha dì bin vizid wê Anutu nêb obêc vông vô il ge od ge wê il obêc dô i tiyi Anutu nue.

Xomxo Islel o tulec seac dô vêlén lêm

- ⁷ Ngô lê. Myakilôhô Ngibua nêl vac xolac bêga ên nêbê, “Gwêbaga xam obêc ngô Anutu kiyang ge ⁸ od le i lêc vông i tiyi xocbê bume Islel vông ilage lêm, ên a nêl a kiyang vô bume Islel vac vigwe myadongên, lêc he vô ninya kitu vô ên he nêb ob yaxêna.
- ⁹ He dô vac vigwe myadongên tiyi klismas kehe yuu, dì yê yuac wê a vông vac he mahigun ge. Lêc he lungên a nang, dì he vông môp nipaêna nang nêb ob yaxêna.
- ¹⁰ Mêgem a nig nyag vô he, ên he vông nilô la vô môp nipaêna dì he o ngô a kiyang mi timu vô lêm.
- ¹¹ A nilôg vô myavinê vô he, om a nêl vixôhilôg nôn bê he obêc lam dô seac vêl hixôn a lêm.”

¹² Anutu nêl bêge, om xam lige, xam viac xam, gec lêc xam divông nilôm la vô môp nipaêna dì sea vông vinên wê xam vông ge dì vô nimim vô Anutu maviha. ¹³ Buc wê Anutu nêl ilage ên nêbê, “Gwêbaga”, ge Anutu o nêl lec buc ilage tibed lêm. Nge, nêl lec gwêbaga hixôn. Om buc vihati ge, xam nêl kiyang niviha wê ob ngidu xam xôn ge vôma, êdêc môp nipaêna i o lêc kityoo xam dì vông xam nilôm i le teva ên Anutu lêm. ¹⁴ Ên ilage il ngô Kilisi kiyang dì vông i vin. Om gwêbaga il ob hôm vông vinên wê il vông ge xôn pilihi dì i loc tiyip vô buc wê il ob xib lec ge. Il obêc vông bêge ge od il obêc la dô madviha hixôn Kilisi.

¹⁵ Om xam ngô Anutu kiyang i tii vac nang wê nêl ên nêbê, “Gwêbaga xam obêc ngô Anutu kiyang ge, od le i lêc vông i tiyi xocbê bume Islel vông ilage lêm. Ên a nêl a kiyang vô he lêc he vô ninya kitu vô.”

¹⁶ Ilage xomxo letyae ngô Anutu kiyang lêc vô ninya kitu vô? Ge he wê Moses kô he vêl vac vigwe Isip mi didii he mi la vac vigwe myadongên ge. ¹⁷ Di Anutu xêyaa vô myavinê vô xomxo letyae tiyi klismas kehe yuuê? Anutu xêyaa vô myavinê vô he Islel wê vông môp nipaêna vac vigwe myadongên ge, om hi he yib mi he ninivi yêp vac vigwe myadongên. ¹⁸ Di Anutu nêl kiyang vixôhilôg nôn vô letyae ên nêbê he ob la dô seac vêl hixôn i lêmê? Anutu nêl kiyang bêge vô he Islel wê o ngô kiyang wê i vông ge lêm. ¹⁹ Mêgem il ob xovô bê he o vông i vin lêm om he o tiyi wê he ob la dô seac vêl hixôn Anutu ge lêm.

4

Seac dô vêlén ge yêp vô Anutu

¹ Ilage Anutu hilu kiyang mi i yêp pyap. Kiyang tige nêl ên nêbê, “Xam obêc lam dô seac vêl hixôn a.” Kiyang nêl bêge, om il ob xona ned dì viac il, ên Anutu obêc yê vông vinên wê il vông ge tiyiên ma ge od il obêc la dô seac vêl hixôn i lêm. ² Ên Anutu xolac niviha lam vô il tiyi xocbê lam vô xomxo Islel ilage. Lêc kiyang tige o ngidu he xôn lêm. Ên he ngô lê, lêc he o vông i vin lêm. ³ Lêc il wê il vông i vin Anutu kiyang tige, il obêc la dô seac vêl hixôn Anutu. Lêc Anutu nêl kiyang lec he wê o vông i vin lêm ge bêga ên nêbê,

"A nilôg vô myavinê vô he, om a nêl vixôhilôg nôn bêga bê he ob lam dô seac vêl hixôn a lêm."

Anutu nêl bêge lec seac dô vêlén wê i vông ge, ên taxlee wê Anutu tung lag yuu kibun hixôn susu vihati pyap ge od o vông yuac ti tii vac lêm. Nge, dô seac vêl dì viac vô vigwe wê il ob la dô seac vêl lec ge. ⁴ Om buc wê vông vigê vilu dì sec yuu ge, kiyang yêp lec buc tige vac xolac bêga ên nêbê,

"Anutu vông i yuac vihati tiyi buc vigê vilu dì sec ti. Pyap dêc buc ti wê vông vigê vilu dì sec yuu ge od dô seac vêl."

⁵ Nang dêc Anutu nêl lec he wê o vông i vin lêm ge bêga ên nêbê, "He obêc lam dô seac vêl hixôn a lêm."

⁶ Ilage he Islel vô ninya kitu vô Anutu kiyang niviha, mègem he o la dô seac vêl hixôn Anutu lêm. Kiyang wê Anutu hilu ilage ên nêbê xomxo obêc la dô seac vêl hixôn i ge, kiyang tige yêp vô il gwêbaga hixôn. ⁷ Èn he Islel vô ninya kitu vô Anutu kiyang. Om Anutu vino bua paha gwêbaga ên nêbê il ngô i kiyang dì vông i vin êdêc la dô seac vêl hixôn i. Anutu nêl buc tige ên nêbê buc gwêbaga. Klismas tibeac lam la vêl, lêc kiyang wê a nêl pyap ge, Anutu nêl tii vac vô Devit, om Devit nêl kiyang tyo yêp seac tii vac nang bêga ên nêbê,

"Gwêbaga, xam obêc ngô Anutu kiyang ge, od le i lêc vô ninya kitu vô lêm."

⁸ Ilage xomxo Islel la dô vac vigwe myadongên, mèd Josua didii he mi la vac vigwe paha. Josua obêc didii he mi he la dô seac vêl hixôn Anutu ge od Anutu ob nêl kiyang lec buc paha ngwe lêm. Lêc Josua o vông vigwe seac dô vêlén vô he lêm. Om Anutu nêl buc paha wê xomxo ob la dô seac vêl hixôn i ge. ⁹ Om il xovô ên il nêbê Anutu viac buc timuênen wê nue obêc la dô seac vêl hixôn i ge. Buc seac dô vêlén tige tiyi xocbê buc da wê il mi dô seac vêl lec ge. ¹⁰ Om xomxo wê ob la dô seac vêl hixôn Anutu ge, he ob la vông yuac ti tii vac lêm. Nge, he yuac tiyôô om he obêc dô seac vêl i tiyi xocbê Anutu wê tung lag yuu kibun pyap dì dô seac vêl ge. ¹¹ Mègem a ob nêl bê il ob vông yuac xêkizêc êdêc la dô seac vêl hixôn Anutu, ên xomxo ti obêc timu vô Islel vông môp ilage dì vô nimi vô Anutu kiyang ge od o tiyi wê obêc la dô seac vêl hixôn Anutu ge lêm.

¹² Xam xovô bêga bê Anutu kiyang ge mavîha dì luu yipac wê manôn vilu vilu ge vêl, om vông yuac xêkizêc vac il nilôd tiyi xocbê il gôl bwoc ya yipac dì susu wê dô vac nilô nilô ge yêp seac. Anutu kiyang êno vông yuac vac il nilôd dì vông kiyang yuu môp wê yêp vac il nilôd ge yêp seac vô il mi il xovô. ¹³ Xomxo hixôn susu wê Anutu tung ge, ti o tiyi wê ob xôpac ên Anutu ge lêm. Nge, vihati le seac vô Anutu manôn, dì i yê kiyang yuu môp wê yêp vac il nilôd ge vihati, dì Anutu vaci wê ob yaxênil toto môp yuu nilôd.

¹⁴ Il nêd xomxo levac dô wê kô lê Hetplis* mi la dô kisii ganê. Ge Yesu wê Anutu nu tuc ge. Il xovô bêge om il ob hôm vông vinênen wê il vông ge xôn piliihi. ¹⁵ Èn buc wê il nêd Hetplis Yesu lam dô kibun ga ge od viyin yuu yaxênil vihati tulec i tiyi xocbê tulec il gwêbaga, lêc i o vông nipaen ti lêm. Il nêd xêkizêc ti o yêp wê il ob vông vevac vô nipaen ya ge lêm, lêc Yesu tulec yaxênil vihati tiyi xocbê il mi yaxênil ge om xovô dì xo vigwe pisiv ên il. ¹⁶ Il xovô bêge, mègem il ob la kwabo vô Anutu wê vizid niviha

* **4:14:** ông wê Hiblu 2:17.

kehe ge, dì il ob xona ên i lêm. Nge, il ob kitaa vô i vô buc wê il tulec viyin ge, ên Anutu i xo vigwe písiv ên il dì vông vizid niviha wê i vông ge i ngidu il xôn.

5

Yesu ge Hetplis wê kitya il nêd nipaên vêl ge

¹ Hetplis ge xomxo Islel ti wê Anutu vinoo i ên nêb i tu Hetplis, om yuac wê i vông ge bêga nêbê tu Islel vihati manôñ dì la le vô Anutu manôñ. Om mi tung daa dì si daa vô Anutu ên nipaên wê he Islel vông ge. ² Léc xomxo tige, xomxo xêlehelehe wê môp nipaên tixuu i tiyi xocbê tixuu il ge. Om ob lum nêl kiyang vô xomxo wê lungên môp niviha di sea Anutu vông môp mi la vac nipaên ge. ³ Om buc wê obêc tung daa vô Anutu ên nipaên wê lie Islel vông ge, od ob tung daa ên nipaên wê ici vông ge hixôn.

⁴ Lê levac wê nêbê Hetplis ge, xomxo ti o tiyi wê ici va ob kô lê tige lêm. Nge, Anutu vaci wê ob vinoo xomxo Hetplis tige, tiyi xocbê Anutu vinoo Elon ilage ên nêb i tu Hetplis wê mugên taxlee ge.

⁵ Kilisi êno o yong ici va ên nêb ob tu Hetplis lêm. Nge, Anutu vaci vinoo i ên nêb i kô yuac Hetplis, dì nêl vô i ên nêbê,

“Ông ge a nug ông, om gwêbaga a ob vông ông lêm i vô levac.”

⁶ Nang dêc Anutu nêl vô Yesu tii vac nang ên nêbê,

“Ông kô yuac Hetplis wê ob yêp luta tiyi xocbê Melkisedek ge.”

⁷ Vô buc wê Yesu lam dô kibun ga ge, od kitaa vô Anutu ên nêb i vô i vêl ên môp wê ob yib ge, dì tyuc la kisii dì byag hixôn. Yesu ngô ma Anutu kiyang dì dô vac i kwa ngibi, om Anutu ngô kitaaén wê i vông ge. ⁸ Yesu ge Anutu nu, léc kilê myavinê levac, dì myavinê tige vông i vô ninya lehe vô Anutu kiyang. ⁹ dì vông i tu xomxo wê nipaên ti o yêp vô i lêm ge. Mêgem xomxo wê ngô Yesu kiyang mi timu vô ge, Yesu ob tu he nêñ levac wê ob kitya he nêñ nipaên vêl dì vông he la dô vac niviha wê luta lêc luta ge.

¹⁰ Anutu vinoo Yesu ên nêb i tu Hetplis tiyi xocbê Melkisedek ge.

Il ob dô tiyi xocbê nipiipwo lêm

¹¹ Xe nêb xe ob nêl kiyang tibeac vô xam lec Melkisedek, lêc xam ob xovô kiyang paha decdec lêm. Om xam vông yuac levac vô xe wê xe ob nêl kiyang tige kehe kitong vô xam ge. ¹² Xam ngô xolac mi xovô ilatikwê tiyi wê xam ob nêl xolac vô xomxo gwêbaga. Léc xam o tiyi lêm. Om xomxo ob nêl xolac wê o viyin lêm wê xam ngô ilage i tii vac vô xam. Xam o tiyi xocbê xomxo levac wê ob ya yaén xêkizêc ge lêm. Nge, xam tiyi xocbê nume nipiipwo wê gên lul ge. ¹³ Ên Anutu kiyang wê viyin ge, xomxo vông vinêñ wê o vyac xovô kiyang tige lêm ge, he tiyi xocbê nipiipwo wê gên lul ge, om he tiyiên ma wê ob yaxêñ môp niviha dì nipaên ge. ¹⁴ Dom xomxo wê xovô Anutu kiyang wê viyin ge, he tiyi xocbê xomxo levac wê ya yaén xêkizêc ge. Ên he mi yaxêñ môp wê he vông ge tiyi buc vihati, om he tiyi wê he ob yaxêñ môp vihati mi xovô bê niviha me nipaên.

6

Kilisi kiyang wê viyin maén ge

¹⁻² Kilisi kiyang wê xam ngô ilage o viyin lêm om xam ngô mi xovô pyap. Ên kiyang wê viyin maén ge nêl bêga ên nêbê il sea môp wê ob vông il

vô nipaên ge dì vông nilôd i loc vô Anutu, dì vông i vin i. Nang dêc Kilisi kiyang taxlee wê viyin maên ge nêl môp lipacêñ yuu môp wê xomxo vyax vigê lec lie bazub ge kitong, dì nêl ên nêbê xomxo yibêñ obêc kidi lec maviha, dì Anutu ob yaxêñ xomxo nipaên dì ob vông myaviwen nipaên wê ob yêp luta ge vô he. Kiyang tige o viyin lêm om xam ngô mi xovô pyap. Om il ob nêl kiyang tige i tii vac vac lêm. Nge, il ob la vô Kilisi kiyang wê viyin ge ên xam xovô. ³ Anutu obêc tyuc lec ge od a ob nêl kiyang tige kitong vô xam.

Xomxo wê sea vông vinêñ wê he vông ge

⁴ Xomxo obêc vông i vin, nang dêc sea ge od he o tiyi wê he ob pilepac nilô i tii vac ge lêm. Vixôhilôg, he ngô Anutu kiyang dì vông i vin, dì Anutu vông he la dô vac xêseac, dì he tulec vizid wê Anutu vông lam ge, dì Myakilôhô Ngibua lam dô vac he nilô, ⁵ dì he kitong Anutu kiyang mi yaxêñ, lêc nêbê niviha, dì he xovô xêkizêc wê ob val vô buc timuêñ ge. ⁶ He vông bêge lê, lêc wê he obêc sea vông vinêñ wê he vông ge dì vô nimi vô vihati ge od môp ti o yêp wê he ob lôm vô Anutu tii vac ge lêm. Ên môp wê he vông i vin lêc sea ge tiyi xocbê he tul Anutu nu tuc lec xax pola tii vac nang ên nêbê xomxo i yê dì so vya vô i tii vac.

⁷ A ob nêl kiyang pilepacêñ lec xomxo wê vông i vin hixôn he wê sea vông vinêñ ge. He vihati tiyi xocbê kibun wê lun tô lec ge. Lun tô lec kibun, lêc vê obêc tip niviha mi vô nôn niviha wê ob ngidu xomxo xôn ge od Anutu ob yê kibun tige niviha dì vông yaêñ tige vô nôn tibeac. ⁸ Lêc nita obêc tip vac yuac tige dì yaêñ ob vô nôn niviha lêm ge od ob ngidu xomxo xôn lêm, om Anutu ob yê kibun ge nêbê nipaên, dì obêc buc timuêñ ge od ngwax ob ya vêl.

⁹ Xam lige wê xe xêmyaa vin lec xam ge, xe nêl kiyang tiga vô xam, lêc xe xovô ên xe nêbê xam vông i vin xêkizêc ta dì Anutu vô xam vêl ên nipaên, om gwêbaga yuac yuu môp wê xam vông ge vô nôn niviha. ¹⁰ Ên Anutu o xomxo nipaên ti lêm, om ob lungêñ yuac niviha wê xam vông vô i ge lêm. Nge, Anutu yê dì xovô yuac niviha wê xam vông ge, dì xovô ên nêbê xam xêmyaa vin lec i om xam mi ngidu lime vông vinêñ xôn. Xam vông yuac tyo ilage dì i yêp gwêbaga hixôn. ¹¹ Mêgem xe xo vinux yang ên xe nêbê xam toto vông yuac tige i xêkizêc ta dì hôm vông vinêñ wê xam vông ge xôn pilahi, dì bin buc wê Anutu ob tyuc xam ge, ¹² dì xam nim i o lêc ma lec lêm. Nge, xam timu vô xomxo wê vông i vin dì ni o ma lec kiyang lêm ge, ên he ge wê tulec vizid niviha vihati wê Anutu hilu kiyang pyap ilage ên nêbê ob vông vô he ge.

Anutu hilu kiyang dì nêl i lê hixôn

¹³ Môp wê xomxo ngwe ob hilu kiyang ti vô xomxo ngwe ge od ob nêl xomxo levac ti lê hixôn ên nêbê xomxo levac tige lê i ngidu i kiyang xôn. Lêc ilage wê Anutu hilu kiyang vô Eblaham ge od o nêl xomxo levac ti lê hixôn ên nêbê i ngidu kiyang tige xôn lêm. Ên xomxo ti lê o nginoo Anutu lê vêl lêm. Om Anutu nêl ici va lê hixôn. ¹⁴ Kiyang wê Anutu hilu vô Eblaham ge bêga ên nêbê,

“A hilu kiyang vixôhilôg nôn vô ông bê a obêc vông vizid niviha vô ông, dì a obêc vông ông bumé i vô tibeac.”

¹⁵ Eblaham ngô kiyang wê Anutu hilu ge dî ni o ma lec kiyang tige lêm. Nge, yaxên kiyang ên nêbê obêc vô nôn lec timuên, om kiyang tige vô nôn lec.

¹⁶ Vixôhilôg nôn, xomxo ngwe obêc hilu kiyang vô xomxo ngwe ge od ob nêl xomxo levac lê hixôn, êdêc xomxo ngwe ge i xovô bê i o kityoo kiyang tige lêm. ¹⁷ Mêgem kiyang wê Anutu hilu ge, Anutu nêl ici va lê hixôn ên nêb xomxo wê ob tulec nôn ge, he i xovô bêga bê i o kityoo lêm dî ob vô pilepac pilepac vô i kiyang ti lêm. ¹⁸ Om môp yuu ge. Ngwe wê Anutu hilu kiyang dî ngwe wê nêl ici va lê hixôn. Môp yuu ge obêc pilepac lêm, dî Anutu o tiyi wê ob kityoo il ya môp yuu ge lêm. Om il wê il pec ên môp nipaên mi la kwabo vô Anutu ge, il ob xovô bê Anutu obêc vông i tiyi kiyang wê hilu ge. Om xovôên tige vông il le xêkizêc ta dî il hôm kiyang tige xôn pilihî dî bin buc wê vihati obêc vô nôn lec vô il timuên ge. ¹⁹ Om kiyang wê Anutu hilu vô il ge ob pilepac lêm. Nge, ob vông il le xêkizêc tiyi xocbê anka hôm sip xôn pilihî mi i le kizêc ge. Il vông i vin kiyang tige om gwêbaga il vihati tiyi wê il ob la le vô Anutu manôn dî kitaa vô i, tiyi xocbê ilage Hetplis tibed la le vô Anutu manôn vac Anutu xumac ngibua nilô dî kitaa vô i ge. Nivimihi dia ti yux kisuu xumac nilô tige lec. ²⁰ Lêc Yesu la mug vac xumac ngibua nilô tige mi la le vô Anutu manôn ên il kibun ga vihati. Ên Yesu ge kô yuac Hetplis wê ob yêp luta tiyi xocbê Melkisedek ge.

7

Kiyang lec Hetplis ti wê lê nêbê Melkisedek

¹ A ob nêl kitong lec xomxo ti lê nêbê Melkisedek. Melkisedek tu xomxo Selem nêng king, dî kô yuac Hetplis* hixôn, om vông yuac vô Anutu kisiinê. Ilage Eblaham la vông vevac vô king ya mi hi he yib, mêd lax nêb ob la ben, lêc mila tulec Melkisedek vac môp, mêdêc Melkisedek kitaa lec i, om il xovô ên il nêbê Melkisedek ge xomxo levac, ² om Eblaham tung susu vihati wê i kô vac vevac ge la kidu vigê yuu dî vông kidu ti vô Melkisedek. Lê Melkisedek kehe bêga nêbê king wê viac xomxo ya môp bôbac ge. Melkisedek tu xomxo Selem nêng king dî lê wê nêbê Selem ge, kehe bêga nêbê king wê viac xomxo ya kiyang malehe ge. ³ Xomxo o vyac kivuu Melkisedek lê mi nêl kitong lêm, om il lungê Melkisedek ta yuu ma, dî mae bue taxlee, dî buc wê yubac lec ge, dî buc wê yib lec ge éno. Melkisedek ge tiyi xocbê Anutu nu tuc ên wê kô yuac Hetplis wê ob yêp luta ge.

⁴ Xam xovô Melkisedek di xovô bêga bê Melkisedek ge xomxo levac. Om Eblaham tung susu vihati wê kô vac vevac ge la kidu vigê yuu dêc vông kidu ti vô Melkisedek. ⁵ Ilage Anutu vinoo xomxo wê pum lec Livai gee vaci ên nêb he i kô yuac daa sién. He Isrel vihati, he pum lec Eblaham tiyi xocbê Livai he bue ge. Lêc Moses xolac nêl vô he Isrel ên nêbê he i tung he susu vihati i loc kidu vigê yuu, dêc vông kidu ti vô lie Livai wê vông yuac daa sién ge. ⁶ Melkisedek ge o pum lec Livai lêm, lêc Eblaham tung susu vihati wê i vông ge la kidu vigê yuu dî vông kidu ti vô Melkisedek. Mêdêc Melkisedek kitaa lec i ên nêbê Anutu wê hilu kiyang vô Eblaham ge i vông vizid niviha vô i. ⁷ Il xovô pyap ên il nêbê xomxo ngwe wê vông kitaa ên

* **7:1:** ông wê Hiblu 2:17.

vô xomxo ngwe ge luu ngwe wê kô kitaaén ge vêl, om il xovô ên il nêbê Melkisedek luu Eblaham vêl. ⁸ Livai bue wê kô susu vô lie Islel, dì he ge xomxo kibun wê ob yib ge. Lêc Melkisedek ti wê Eblaham vông susu kidu ti vô i ge, xolac nêl ên nêbê i xomxo wê maviha ge. ⁹⁻¹⁰ Mégem il xovô ên il nêbê ilage xomxo Islel mi vông susu kidu ti vô Livai bue ên wê he mi vông yuac daa sién ge. Lêc buc wê Livai gên o dô lêm ge, bu Eblaham tulec Melkisedek taxlee di vông susu kidu ti vô i, om tiyi xocbê Livai éno vông susu kidu ti vô Melkisedek. Om il xovô ên il nêbê Melkisedek luu Livai bue wê vông yuac daa sién ge vêl.

¹¹ Ilage Anutu vông yuac daa sién vô Livai he bue timuén, di yuac tige tu Moses xolac vihati kehe. Lêc yuac wê Livai vông ge o tiyi wê ob kitya xomxo nêl nipaén vêl di vông he vô niviha nôn ge lêm. Om Anutu vông xomxo wê ob vông yuac tige paha ngwe lam vô il, lêc xomxo tige o tiyi xocbê Elon wê pum lec Livai ge lêm. Nge, tiyi xocbê Melkisedek. ¹² Anutu vông xomxo paha ti wê tung daa vô Anutu ge lam vô il, om pilepac Moses xolac vac hixôn. ¹³ Èn xomxo paha tige o pum lec Livai lêm. Nge, kehe le vac xomxo ti wê o vông yuac daa sién ilage lêm. ¹⁴ Il xovô pyap ên il nêbê il Apumtau kehe yêp vac Yuda. Lêc Moses xolac o nêl ên nêbê Yuda bue ob kô yuac daa sién lêm. Nge, Livai bue wê he ob kô yuac tige.

¹⁵ Anutu vông xomxo paha ti lam ên nêb i tu Hetplis tiyi xocbê Melkisedek. Om kiyang wê nêbê Anutu pilepac Moses xolac vac ge yêp seac. ¹⁶ Yesu kô yuac Hetplis tige, lêc o pum lec Livai lêm, om o kô yuac tiyi xocbê Moses xolac nêl ge lêm. Nge, Yesu obêc dô maviha luta, om kô lê Hetplis ya xêkizêc wê ici va vông ge. ¹⁷ Di Anutu nêl kiyang lec Yesu bêga ên nêbê,

“Ông kô yuac Hetplis wê ob yêp luta tiyi xocbê Melkisedek ge.”

¹⁸ Anutu kitya Moses xolac vêl, ên môp daa sién o xêkizêc lêm, dì o tiyi wê ob ngidu xomxo xôn ge lêm. ¹⁹ Èn xolac wê Moses vông ge o vô xomxo vêl ên he nêl nipaén lêm, om Anutu vông môp paha vô il. Môp paha tige luu môp wê Moses xolac vông ge vêl, ên môp paha tige ob vông il la dô kwabo vô Anutu.

²⁰ Anutu vinoo Yesu ên nêbê i tu Hetplis, lêc o vinoo i pileva lêm. Nge, vinoo i di nêl ici va lê hixôn. Lêc Hetplis ilage, wê lie vinoo he ge, Anutu o nêl ici va lê hixôn lêm. Nge, heche va tu Hetplis tiyi xocbê Moses xolac nêl ge. ²¹ Lêc Yesu ge Anutu vinoo i di nêl ici va lê hixôn, di nêl vô i bêga ên nêbê,

“A Apumtau, a hilu kiyang di nêl aca va lêg hixôn, om o tiyi wê a obêc pilepac kiyang wê a nêl lec ông ge vac lêm. Om a nêb ông ob kô yuac Hetplis wê ob yêp luta ge.”

²² Anutu vinoo Yesu di nêl ici va lê hixôn, om il xovô ên il nêbê môp paha wê Yesu vông ge ob vô niviha vô il luu xolac wê Moses vông ge vêl.

²³ Vac Moses xolac ge xomxo ti kô yuac Hetplis, lêc yib di xomxo ngwe kô i nipilêhê. Om he wê kô yuac Hetplis ge vô tibeac, ên he o dô luta lêm. Nge, he yib. ²⁴ Lêc Yesu ge wê kô yuac Hetplis di ob dô luta, om ob vông yuac Hetplis sox vac xomxo ngwe lêm. ²⁵ Om xomxo obêc vông i vin Yesu di vông nilô la vô Anutu ge, od Yesu tiyi wê ob vô he vêl ên he nêl nipaén di vông he dô maviha luta lêc luta ge, ên Yesu ob dô maviha luta di kitaa vô Anutu ên nêb i ngidu he xôn.

26 Yesu tu Hetplis tiyi wê ob ngidu il xôn ge, ên i ngibua dì nipaên ti o yêp vô i lêm dì susu ningeac ti o yêp vac i nilô lêm, dì i o timu vô môp wê xomxo nipaên vông ge lêm, dì i lê vô levac tiyi xocbê Anutu lê ge.

27 Ilage xomxo ti wê Hetplis ge mi si daa vô Anutu lu tibed vac klismas ti, om taxlee si daa ên nipaên wê ici va vông ge. Pyap dêc si lu ngwe nang ên nipaên wê lie Islel vông ge éno. Lêc Yesu o vông yuac tiyi xocbê he vông ge lêm. Nge, Yesu vông daa lu tibed, ên wê vông ici va ninivi yib ge. Om vông môp daa sién ge tip vac. **28** Xomxo wê Moses xolac vinoo ên nêb he i kô yuac Hetplis gee, he xomxo xêlehelehe. Lêc timuên ge, Anutu hilu kiyang di nêl i lê hixôn dì vinoo nu tuc wê nipaên ti o yêp vô i lêm ge ên nêb i kô yuac Hetplis mi dô luta lêc luta.

8

Yesu vông yuac Hetplis gê lag puunê

1 Kiyang vihati wê xe nêl vô xam gwêbaga ge, kiyang tige kehe nêl bêga ên nêbê Yesu ge il nêd Hetplis* wê la dô vô Anutu vigê hiyôv gê lag puunê. **2** Om Yesu la dô lag puunê dì vông yuac Hetplis vac Anutu ben. Xumac sel nilô wê ngibua ge tixuu lec Anutu ben kisiinê, lêc Anutu ben kisiinê ge, xomxo ti o lox lêm. Nge, vigwe tige Apumtau vaci ben.

3 Hetplis vihati ge, Moses xolac vinoo he ên nêb he i loc mi tung daa dì si daa vô Anutu. Yesu éno kô yuac Hetplis, om Anutu nêbê i éno obêc vông daa vô i. **4** Yesu obêc dô lec kibun ga ge od ob kô yuac Hetplis lêm. Ên xomxo kibun ga dô wê ob kô yuac Hetplis dì tung daa vô Anutu tiyi xocbê Moses xolac nêl ge. **5** He vông he yuac vac Anutu xumac lilo ngibua

gê kibun ga, lêc yuac wê he vông ge tiyi xocbê kinu wê tixuu lec Anutu ben lag puunê ge. Om tiyi xocbê kiyang wê Anutu nêl vô Moses, vô buc wê Moses nêb ob lox xumac lilo sel ge. Anutu nêl vô i ên nêbê,

“Ông xona nêm dì lox xumac lilo sel dì tung susu vihati vac i tiyi kinu wê a hilung pyap vô ông lec kitôn Sainai ge.”

6 Yuac wê Yesu vông ge luu wê xomxo Islel vông ilage vêl. Mêd kiyang paha wê Anutu vông vô il ge luu kiyang tikwê wê Moses xolac vông ge vêl, mêd Yesu vông kiyang paha tige vô nôn lec vô il. Om kiyang paha tige ob vô nôn niviha vô il luu nôn wê Moses xolac nêl ge vêl.

Kiyang paha luu kiyang tikwê wê Moses vông ge vêl

7 Môp daa sién wê Moses xolac nêl lec ge obêc tiyi wê ob kitya xomxo nêl nipaên vêl ge od Anutu ob vông kiyang paha vô il lêm. Lêc xolac tikwê ge tiyiên ma. **8** Om ilage Anutu nêl xomxo nêl nipaên kitong ên nêbê,

“A, Apumtau, a nêl vô xam ên a nêbê obêc buc timuên ge od a obêc hilu kiyang paha vô xam wê kehe Islel hixôn xam wê kehe Yuda ge.

9 Kiyang paha wê a obêc hilu vô xam ge o tiyi xocbê kiyang wê a vông vô bume ilage lêm. Ilage vô buc wê a kô he vac vigwe Isip dì didii he mi la ge od a vông kiyang vô he ên a nêb he i timu vô. Lêc he o ngô kiyang wê a nêl ge lêm, om a vô nîmig vô he. A, Apumtau, a nêl bêge.

* **8:1:** Ông wê Hiblu 2:17.

- ¹⁰ Nang dêc a nêl ên a nêbê buc tigee obêc lam la vêl lê, lêc a obêc hilu kiyang paha vô xam Islel bêga bê a obêc vông a xolac paha i yêp vac xam piyôp, dì kivuu i yêp vac xam nilôm, dì a obêc tu xam Anutu dì xam ob tu a nuge.
- ¹¹ Om xam ob nêl vô xomxo me lime ti bê i xovô a Apumtau lêm. Ên vô buc tige xomxo wê lê levac hixôn he wê lê nipwo ge, he vihati obêc xovô a.
- ¹² Ên a obêc xo vigwe pisiv ên he di kitya he nêñ nipaêñ vêl dì a obêc xovô he nêñ nipaêñ i tii vac lêm. A, Apumtau, a nêl bêge.”
- ¹³ Om kiyang paha wê Anutu hilu ge vông xolac tikwê tiyôô vac. Ên susu wê vô tikwê ge ob dô buc myabo tyâ dì vô nipaêñ dì ob la xôa ma.

9

Kiyang lec xumac lilo sel wê he Islel lox ilage

¹ A ob nêl kitong lec môt tikwê wê Anutu vông vô Moses ge. Anutu hilung môt wê he Islel ob vông lilo vô i ge, dì nêl kiyang vô he ên nêbê he i lox xumac lilo sel ti i le kibun ga. ² Om he lox xumac sel wê nilô yuu yêp vac ge. Nilô ngwe yêp tax dì ngwe yêp timuên. Mêdêc lam ti le vac xumac nilô ngwe wê yêp tax ge. Dì tevol ti wê he mi tung blet lec ge le vac xumac nilô tige hixôn. Blet tige tiyi xochê he tung daa vô Anutu. Om xumac nilô ngwe wê yêp tax ge he nêl ên nêbê xumac nilô ngibua. ³ Mêd he yu nivimihi levac

yux kisuu xumac nilô ngwe wê yêp timuên ge lec. Dì he nêl ên nêbê xumac nilô ngwe wê yêp timuên ge xumac nilô ngibua wê ngibua nôn. ⁴ Alta ti wê he vông ya gol ge le vac xumac nilô tige, dì he wê vông yuac daa sién ge mi si susu nivivea niviha lec alta tyo. Dì kilong ti wê he nêl ên nêbê kilong wê Anutu kiyang yêp vac ge le hixôn. Dì he tul kilong tige ya xax di lipac gol lec vihati. Dì susu yon yêp vac kilong tyo nilô bêga nêbê, dêg gol ti wê mana dô vac ge, dì xax ti wê Elon pitoa ila lêc den lec ge, dì ngidax yuu wê Anutu kivuu xolac lec dì vông vô Moses ilage. ⁵ Mêd he sev xax xochê angela ge yuu dì lipac gol lec dì lax yuu le lec kilong tige kisii di yuule vilu vilu di vinihi wê yuu vông ge tidii mi la le kisii. Yuu tixuu lec xêseac wê Anutu vông ge. Vac angela yuu mahigun ge Hetplis mi hivip bwoc hi la lec kilong kisii ên nipaêñ wê he Islel vông ge. Susu mangwe yêp vac xumac lilo sel tige hixôn, lêc a ob nêl kiyang dia lec susu vihati lêm.

⁶ Susu wê he vông vac xumac lilo sel ge a nêl gwêbaga. Om a ob nêl kiyang lec xomxo wê mi vông yuac daa sién ge. He mi la vac xumac lilo sel nilô ngwe wê yêp tax ge dì vông he yuac tiyi xochê xolac wê Anutu vông vô Moses ge. ⁷ Dom xomxo ti wê kô yuac Hetplis ge ici va tibed wê ob la vac xumac nilô ngwe wê yêp timuên ge. Lêc ob la vac i tiyi buc vihati lêm. Nge, ob la vac xumac nilô tige lu tibed tiyi klismas ti. Om yuac wê Hetplis vông vac xumac nilô ngwe wê yêp timuên ge bêga ên nêbê kô bwoc hi mi la vac xumac nilô tige dì vông daa vô Anutu ên nipaêñ wê i vông ge hixôn nipaêñ wê lie Islel vông ge êno. ⁸ Om Myakilôhô Ngibua nêl môt tige kehe kitong vô il bêga ên nêbê xumac sel nilô ngwe wê yêp taxlee ge yuac obêc gên yêp vac ge od xomxo vihati o tiyi wê ob la le vô Anutu manôñ vac xumac sel nilô ngwe wê yêp timuên ge lêm. Nge, Hetplis tibed wê ob la vac. ⁹ Xumac lilo sel tige tixuu lec buc gwêbaga. He mi tung daa

dì mi si daa, lêc daa vihati wê he vông ge o tiyi wê ob kitya he nêni nipaên vêl dì vông he nilô vô paha lec ge lêm. ¹⁰ Di môp wê he vông ge xochê môp yaén yuu mia numêni di mia lipacêni, môp tigee ngidu ninivi pileva xôn. Lêc Anutu vông môp tigee vô he ên nêb he i timu vô, di i loc tyip lec buc timuêni wê ici va obêc vông môp paha ge.

Kilisi vông ici va hi la tu daa

¹¹ Lêc Kilisi val tu il nêdi Hetplis* wê viac vizid niviha vihati wê Anutu nêb ob vông vô il ge, mêtdec lax dô lag puunê. Vigwe tige niviha yang luu xumac liло sel wê yép kibun ga ilage vêl, di xomxo ti o lox ya vigé lêm, ên vigwe tige o vigwe kibun ga ti lêm.

¹² Lêc Kilisi o kô memek hi me bwoc levac nu hi mi la vac xumac sel nilô ngibua ngwe wê yép timuêni ge lêm. Nge, kô ici va hi mi la tung daa vac xumac ngibua tige lu tibed. Mêt Anutu yê daa wê i vông ge niviha om vô il vêl ên il nêdi nipaên di obêc vông il la dô hixôn i luta lêc luta. ¹³ Môp wê he Islel mi vông ge bêga ên nêbê xomxo ti obêc vông môp nipaên vô Anutu manôn ge, od xomxo wê mi si daa ge ob kô memek hi di bwoc levac vux ti hi di ob pilepac viwev wê he si bwoc levac vêx ge hixôn mia, mêtdec hivip hi yuu viwev la lec xomxo tige ên nêb i lipac ninivi i vô paha lec vô Anutu manôn. ¹⁴ Lêc hi wê Kilisi vông ge luu bwoc hi vêl. Ên nipaên ti o yép vô Kilisi lêm, di Myakilôhô Ngibua wê ob dô luta lêc luta ge ngidu i xôn, mêt Yesu vông hi wê i vông ge la tu daa vô Anutu. Om hi wê i vông ge o lipac il nidnivi pileva lêm. Nge, lipac il nilôd vô paha lec di vô il vêl ên môp wê nôn maén ge ên nêb il vông yuac vô Anutu maviha.

¹⁵ Kilisi vông ici va hi la tu daa vô Anutu, om vông kisoac vac il hixôn Anutu mahigun di vông môp paha wê Anutu vông vô il ge vô nôn lec. Yesu yib om vô il vêl ên nipaên vihati wê il vông vô buc wê il timu vô Moses xolac ge. Om xomxo vihati wê Anutu tyuc he lam ge, he wê ob dô maviha luta lêc luta tiyi xochê kiyang wê Anutu nêdi hilu pyap ilage.

¹⁶ Xomxo ti obêc yaxêni buc wê ob yib ge, od ob nêl nue lie lê lec susu vihati wê i vông ge, di xomxo tyo obêc yib ge, od nue ob kô susu wê ma vông ge. ¹⁷ Ên ma obêc yib vêl ge, od kiyang wê i nêl ge obêc vô nôn lec vô nue. Lêc ma obêc gên dô maviha ge od kiyang wê i nêl ge ob vô nôn lec vô buc wê i gên dô maviha ge lêm. ¹⁸ Mêtgem wê xomxo hi bwoc di kô hi mi la tung daa vô Anutu ge od hi tige nêl kitong ên nêbê bwoc tige yib vêl. Lêc hi obêc ma ge od Moses xolac ob vô nôn lec vô he lêm. ¹⁹ Ilage xomxo Islel kitucma mi dô di Moses kitong xolac wê Anutu vông vô i ge vihati mi he ngô. Kitong pyap déc pilepac bwoc hi hixôn mia ningigooen. Mêtdec hôm xax ngen ti wê lê nêbê hisop ge di vivil ya bwoc sipsip niviluhu wê he lipac ya busa hi ge. Mêt hoo xax tige la vac hi di hivip hi la lec kipihac xolac hixôn xomxo, ²⁰ di nêl ên nêbê,
“Hi tiga nêl kitong vô xam bê kiyang wê Anutu hilu pyap ge obêc vô nôn lec vô xam.”

²¹ Pyap déc Moses hivip hi la lec xumac liло sel, di la hivip hi la lec susu vihati wê dô vac xumac sel nilô ge. ²² Om môp wê xolac taxlee vông ge bêga ên nêbê susu tibeac ob vô paha lec ya hi. Lêc hi kipyaxêni obêc ma ge od Anutu ob kitya xomxo nêni nipaên vêl.

Kilisi vông ici va tu daa di kitya il nêdi nipaên vêl

* **9:11:** ông wê Hibu 2:17.

²³ Mêgem he vông xumac lilo sel hixôn susu wê dô vac xumac nilô ge vô paha lec ya bwoc hi. Susu tigee susu kibun, om tiyi xocbê kinu wê tixuu lec susu nôn wê dô kisii ganê ge. Lêc daa niviha wê luu bwoc hi vêl ge tiyi wê ob vông xomxo vô paha lec. ²⁴ Lêc Yesu o la vac xumac lilo gê kibun ga wê xomxo lox ya vigê ge ti lêm. Xumac lilo kibun ga tiyi xocbê kinu wê tixuu lec vigwe nôn lag puunê. Om Yesu la dô lag puunê dì gwêbaga tu il madnôn mi la le vô Anutu manôn ên nêb ob ngidu il xôn.

²⁵ Xomxo Islel ti wê kô yuac Hetplis ge la vac xumac lilo sel nilô wê yêp timuên ge lu tibed vac klismas ti dì kô bwoc hi mi la vông daa vô Anutu, dì o vông ici va hi lêm. Dom Kilisi ge vông ici va hi la tu daa vô Anutu lu tibed. ²⁶ Ên Yesu obêc vông ici va hi la tu daa lu tibeac ge od obêc tiyi xocbê lam kô myavinê dì yib lu tibeac, vô buc taxlee wê Anutu tung lag yuu kibun ge dì i val tyip gwêbaga hixôn. Lêc Kilisi o vông tibêge lêm. Nge, lam kibun ga lu tibed vô buc wê vô kwabo lec buc myahipu ge, dì vông ici va la tu daa vô Anutu ên nêb Anutu i kitya il nêd nipaên vêl. ²⁷ Xomxo vihati ob yib lu tibed, nang dêc Anutu ob yaxêm môt yuu kiyang wê he vông ge. ²⁸ Om Kilisi êno lam yib lu tibed dì vông ici va hi la tu daa vô Anutu ên nêb i kitya xomxo tibeac nêb nipaên vêl. Dì Yesu obêc vena lu ngwe nang, lêc ob lôm ên kitya xomxo nêb nipaên vêl i tii vac lêm. Nge, obêc lôm ên kô he wê xovô i mi dô bin i ge.

10

Bwoc levac hi o tiyi wê ob kitya il nêd nipaên vêl ge lêm

¹ Xolac taxlee wê nêl môt daa sién ge tiyi xocbê kinu wê tixuu lec môt yuu vizid niviha wê Kilisi ob vông vô il timuên ge. Om xomxo wê nêb ob la kwabo vô Anutu ge, daa wê he mi si tiyi klismas vihati ge o tiyi wê ob kitya he nêb nipaên vêl ge lêm. ² Ên daa tige obêc tiyi wê ob kitya he nêb nipaên vêl ge od he ob la si daa lu tibeac lêm. Nge, he ob la si lu tibed. Ên xomxo wê vông lilo dì kitaa vô Anutu ge, he obêc vông daa lu tibed tiyi wê ob vông he nilô vô paha lec ge od he ob xovô nipaên wê yêp vac he nilô ge i tii vac lêm. ³ Lêc daa wê he mi si tiyi klismas vihati ge vông he xovô nipaên wê yêp vô he ge tii vac. ⁴ Ên bwoc hi o tiyi wê ob kitya xomxo nêb nipaên vêl ge lêm.

⁵ Môt daa sién tige tiyiên ma, om buc wê Kilisi lam kibun ga ge od nêl vô Anutu ên nêbê,

“Môt wê xomxo si daa dì tung daa ge o tiyi wê ob vông ông wê he niviha ge lêm. Om ông viac ninivi wê ông nêb ông ob vông vô a ge pyap.

⁶ Môt wê he si bwoc dì tung daa mangwe hixôn ên nipaên wê he vông ge, ông xêmyaa o vin lec môt tige lêm.

⁷ Om a nêl vô ông ên a nêbê, Anutu, a val ên a nêb a ob vông yuac tiyi xocbê ông xovô ên ông nêb a vông ge, tiyi xocbê kiyang wê yêp vac kipihac ilage.”

⁸ Môt daa sién ge, he Islel vông i tiyi wê Moses xolac nêl ge. Lêc kiyang tax ngwe wê Yesu nêl ge nêl bêga ên nêbê, “Môt wê he si daa dì tung daa mangwe hixôn ge, dì môt wê he si bwoc dì tung daa ên nipaên wê he vông ge, môt tigee ông xêmyaa o vin lec lêm.” ⁹ Nang dêc kiyang wê Kilisi nêl timuên ge bêga ên nêbê, “A val ên a nêb a ob vông yuac i tiyi xocbê ông xovô ên ông nêb a vông ge.” Kilisi nêl bêge, om Anutu kitya

môp daa sién vêl di vông môp paha wê Kilisi ob lam yib ge. ¹⁰ Om Yesu Kilisi vông tiyi xochê Anutu nêl ge di vông ici va ninivi tu daa vô Anutu lu tibed. Om daa wê Yesu vông ge kitya il wê il vông i vin ge vihati nêd nipaên vêl di vông il tu xomxo ngibua lec.

¹¹ Xomxo vihati wê kô yuac daa sién ge, he mi si daa vô Anutu tiyi buc vihati. Lêc daa tigee o tiyi wê ob vô he vêl ên he nêñ nipaên ge lêm. ¹² Lêc Kilisi vông daa lu tibed tiyi wê ob kitya il nêd nipaên vêl i yêp luta ge. Pyap dêc la dô vô Anutu vigê hiyôv, ¹³ di la dô bin buc wê Anutu ob vông xomxo wê vông vevac vô i ge la dô vac Kilisi kwa ngibi. ¹⁴ Om daa tibed wê Yesu vông ge vông xomxo wê vông i vin ge vô paha lec mi i yêp luta.

¹⁵ Myakilôhô Ngibua êno nêl vô il bêga ên nêbê,

¹⁶ “Buc tigee obêc lam la vêl, nang dêc a obêc hilu kiyang paha vô he bêga bê a ob vông a xolac paha i yêp vac he nilô, di kivuu i yêp vac he piyôp. A, Apumtau a nêl bêge.”

¹⁷ Nang dêc nêl tii vac nang ên nêbê,
“A obêc xovô he nêñ nipaên hixôn môp nipaên wê he vông ge i tii vac lêm.”

Myakilôhô Ngibua nêl bêge. ¹⁸ Anutu kitya il nêd nipaên vêl pyap, om môp ti o yêp wê il ob si daa vô Anutu ên nêbê i kitya il nêd nipaên vêl ge lêm.

Il tiyi wê il ob la vô Anutu

¹⁹ Xam lige, Yesu yib di vông ici va hi la tu daa vô Anutu. Om il tiyi wê il ob la vô Anutu vac vigwe kisiinê, di il ob xona ên i lêm. ²⁰ Èn môp wê Yesu vông ge lêx nivimihi dia wê yux kisuu xumac liло nilô wê ngibua nôn ge, di vông môp paha ti wê maviha ge vô il om il êno tiyi wê il ob la le vô Anutu vac i ben kisii ganê ge. Nivimihi dia ge tixuu lec wê Yesu yib ge.

²¹ Di Yesu tu il nêd Hetplis wê viac Anutu nue il, ²² di i hi vông il nilôd vô paha lec di kitya il nêd soen wê yêp vô il ge la vêl, di Yesu lipac il nidnivi vô paha ya mia mayodaên. Om il ob sea kiyang kityooën vihati wê yêp vac il nilôd ge i loc vêl, di il ob vông i vin di nilôd i o vô yuu lêm, di il la kwabo vô Anutu. ²³ Il ob nêl vông vinêñ wê il vông ge hixôn vizid nivîha wê il dô bin ge kitong i yêp seac di il ob hôm kiyang tige xôn pilahi, ên il xovô ên il nêbê Anutu wê hilu kiyang pyap vô il ge obêc vông i vô nôn lec tiyi wê i nêl ge. ²⁴ Il ob xovô il lige di vông he nilô i kidu he ên he xêyaa i vin lecma di he i vông yuac nivîha, ²⁵ di il ob sea môp wê il kitucma di xê da ge lêm, ên xomxo ya sea môp tige lê, lêc il ob timu vô môp wê he vông ge lêm. Nge, il ob ngiduma xôn, ên buc wê Apumtau obêc vena lec ge vô kwabo lec.

²⁶ Èn il wê il xovô kiyang nôn pyap ge, il obêc sea kiyang tige vihati di lax vac môp nipaên tiyi xochê il vông ilage ge, od daa ti o yêp wê ob kitya il nêd nipaên vêl ge lêm. ²⁷ Nge, Anutu obêc vông myaviwen nipaên vô il, di xomxo wê vông vevac vô Anutu ge ngwax ob ya he ma vêl. ²⁸ Xolac taxlee wê Anutu vông vô Moses ge nêl bêga ên nêbê xomxo ti obêc pwoo Moses kiyang ti vac di xomxo yuu me yon obêc yê nipaên wê i vông ge di nêl i nêñ nipaên kitong ge od lie obêc xo vigwe pisiv ên i lêm. Nge, xolac nêl ên nêbê he ob hi i yib. ²⁹ Om xam ob nêbê va lec xomxo wê ob vô nimi vô Anutu nu tuc ge? Kilisi hi vông kiyang paha wê Anutu hilu vô il

ilage vô nôn lec, dì kitya il nêô nipaên vêl. Lêc xomxo vông vinêô ti obêc vô nimi vô Yesu dì nêô kiyang nipaên lec Yesu hi dì yê Myakilôhô Ngibua wê xo vigwe pisiv ên il ge nipaên ge od xomxo tige ob kô myaviwen levac lec luu xomxo wê pwoo Moses xolac vac ge vêl.³⁰ Èn il xovô Anutu wê nêô bêga ên nêôbê, “Môp myaviwen ge, aca va yuac om a ob vông nipaên vac nipaên.” Dì Anutu nêô tii vac nang ên nêôbê, “Apumtau vaci ob titô i nue vêx yuu vux vihati.”³¹ Anutu nêô bêge, om Anutu maviha obêc hôm xomxo ti xôn ên nêôbê ob vông myaviwen vô i ge od xomxo tige ob xona mabu.

³² Xam lêc xovô buc taxlee i tii vac nang. Vô buc tigee xam kô xovô ôn lec Anutu. Nang dêc tibii vông viyin levac vô xam ên wê xam vông i vin ge, lêc xam le xêkizêc ta.³³ Vô buc mangwe he kô xam mi lam lax xam le vac he mahigun dì nêô kiyang nipaên lec xam dì hi xam. Dì buc mangwe lime tulec viyin tibêge di xam kilê viyin hixôn he.³⁴ Dì xam xo vigwe pisiv ên he wê xomxo tung he la vac kalabuhu ên wê he vông i vin ge, dì buc mangwe tibii la vac xam toto bom dì kô xam nêm susu mi la. Lêc xam o vông vevac vô he lêm. Nge, xam dô hixôn xêmyaa niviha, ên xam xovô ên xam nêôbê susu wê xam ob kô timuên ge luu susu kibun ga vêl ên ob dô luta.³⁵ Om xam lêc hôm vông vinêô wê xam vông ge xôn pilili, ên xam obêc vông bêge ge od Anutu obêc vông nôn niviha vô xam timuên.³⁶ Xam le xêkizêc ta vac vông vinêô, ên obêc bêge ge od xam ob vông môp vihati i tiyi xocbê Anutu xo nêô xam vông ge, dì xam ob kô nôn niviha vihati wê Anutu hilu pyap vô xam ge.³⁷ Èn kiyang yêp vac xolac taxlee bêga ên nêôbê,

“Obêc buc myabo ge, od xomxo ti wê nêôbê ob vena ge obêc vena, dì ob hiyi lec lêm.

³⁸ Dì xomxo bôbac wê tu a nuge ge, he ob vông i vin a tiyi buc vihati wê he dô maviha lec kibun ga ge. Lêc he ti obêc sea vông vinêô wê i vông ge od a nilôg obêc vô niviha vô i lêm.”

³⁹ Kiyang nêô bêge, lêc il o tiyi xomxo wê sea vông vinêô wê he vông ge wê Anutu kitya he vêl ge lêm. Nge, il vông i vin om il obêc dô madviha luta.

11

Môp vông vinêô kehe

¹ Môp vông vinêô wê il vông ge kehe bêga nêôbê susu hixôn nôn vihati wê il nêôbê il ob kô ge, il xovô ên il nêôbê Anutu ob vông vô il timuên. Di susu yuu vizid vihati wê il xêêen ma ge, il xovô ên il nêôbê susu tigee dô vixôhilôg.² Xomxo wê dô ilage, he vông i vin om Anutu yê he niviha.³ Il vông i vin om il xovô ên il nêôbê Anutu tung lag yuu kibun ya kiyang wê ici va nêô ge. Om susu vihati yang wê il xê gwêbagaa, Anutu tung he ya susu wê il xêêen ma ge.

Ebel yuu Inok yon Nôa

⁴ Ilage Ebel vông i vin Anutu om la tung daa vô i, di Anutu yê daa wê Ebel vông ge niviha luu daa wê li tuc Ken vông ge vêl. Anutu yê Ebel niviha ên wê i vông i vin ge dì nêô ên nêôbê i xomxo niviha nôn, om Anutu xêyaa vin lec daa wê Ebel vông ge. Ebel yib ilage, lêc vông vinêô wê i vông ge nêô môp vông vinêô kitong vô il gwêbagaa hixôn.

⁵ Ilage Inok vông i vin Anutu, om o yib lêm. Nge, dô maviha dì Anutu kô i hixôn ninivi yuu kinu yadiluhu mi la lag puunê, om xomxo myag lêc o yêvô lêm ên Anutu kô i mi la lag puunê. Dì xolac taxlee nêl kitong lec Inok ên nêbê buc wê gên dô maviha ge od vông i vin Anutu om Anutu yê i niviha. ⁶ Lêc xomxo ti obêc vông i vin Anutu lêm ge od Anutu ob yê xomxo tige niviha lêm. Ên xomxo ti obêc nêb la kwabo vô Anutu ge, od i vông i vin bêga bê Anutu dô maviha dì obêc vông nôn niviha vô he wê myag i ge.

⁷ Nôa vông i vin Anutu, om ngô kiyang wê Anutu nêl vô i lec lun wê obêc val timuên ge. Nôa xovôên buc tige ma, lêc vông i tiyi wê Anutu nêl vô i ge, om lox sip levac ti di he vinê nue la dô niviha vac sip nilô. Om vông vinê wê Nôa vông ge nêl xomxo kibun ga nêl nipaên kitong, dì Anutu yê Nôa niviha ên wê vông i vin ge, om nêl ên nêbê Nôa ge xomxo niviha.

Eblaham yuu Sela

⁸ Ilage Anutu nêl vô Eblaham ên nêbê i sea ben dì loc vigwe bangwe wê Anutu nêl i lê lec ên nêb obêc vông vô i ge. Eblaham lungên môt wê ob la vô ge, lêc vông i vin om ngô Anutu kiyang dì sea ben mi la. ⁹ Eblaham vông i vin om la dô vac vigwe Kenan wê Anutu nêl ên nêbê ob vông vô i ge. Dì la dô vac vigwe tige tiyi xochê dô dug ge. Om o lox xumac ti lêm. Nge, mi dô vac xumac sel hixôn nu Aisak yuu bu Jekop, ên Anutu hilu kiyang vô yuu êno ên nêbê yuu lê lec vigwe tige om obêc vông vigwe tige vô yuu.

¹⁰ Lêc Eblaham o vông nilô la vô vigwe Kenan lêm. Nge, vông nilô la vô vigwe lag puunê wê Anutu vaci xovô ên nêb ob vông vô i ge.

¹¹ Sela vô vêxta om o tiyi wê ob kô nipwo ge lêm. Lêc Sela vông i vin kiyang wê Anutu nêl vô i lec nipwo ge ên xovô nêbê Anutu obêc vông kiyang tige vô nôn lec. Mêgem Anutu vông xêkizêc vô Sela om Sela vivi nu. ¹² Eblaham vô kipwoc om o tiyi wê ob kô nipwo ti ge lêm. Eblaham xomxo tibed, lêc bue timuên vô tibeac hiwocên tiyi xochê pitua wê le lec lag kisiinê dì luda wê dô vô gwec ninya ge, om xomxo ti o tiyi wê ob kitong Eblaham bue wê vô tibeac ge lêm.

¹³ Xomxo tigee vông i vin Anutu tiyi buc vihati mi i la tyip vô buc wê he yib ge hixôn. Lêc buc wê he dô kibun ga ge kiyang wê Anutu hilu pyap ge o vô nôn lec vô he lêm. Om tiyi xochê he le teva di yê ma la nôn niviha wê Anutu nêb obêc vông vô he timuên ge, dì he xêyaa vô niviha, dì he nêl seac ên nêbê, “Il dô kibun ga tiyi xochê il lam dô tibii ba ben om il ob dô buc dia lêm. Nge, il ob dô buc myabo tyatya.” ¹⁴ Xomxo wê nêl kiyang tibêge vông xovôên vô il bêga nêbê he myag vigwe ti wê ob tu he ben ge. ¹⁵ Om he o xo vigwe ti wê he sea ilage lêm. Wê he ob nêb lax mi la ben viyang bulac tii vac ge, od ge tiyi, lêc he o vông nilô lax vô vigwe tige lêm. ¹⁶ Nge, he xo ben niviha ti wê luu he ben ilage vêl. Ge vigwe kisiinê. Om he nêl ên he nêbê Anutu ge he Anutu. Dì Anutu ni o yoc ên kiyang tibêge lêm, ên ici va viac vigwe pyap vô he.

¹⁷⁻¹⁸ Ilage Anutu hilu kiyang vô Eblaham ên nêbê, “Bume timuên obêc pum lec num tuc Aisak dì he obêc vô tibeac.” Anutu nêl bêge, nang dêc buc timuên ge Anutu nêb ob yaxê Eblaham om nêl vô i ên nêbê, “Ông hi num tuc Aisak i yib dì vông i tu daa vô a.” Mêgem Eblaham vông i vin

kiyang wê Anutu hilu pyap ge om nêb ob vông Aisak i tu daa tiyi xochê Anutu nêl vô i ge. ¹⁹ Eblaham xovô bêga ên nêbê Anutu tiyi wê obêc tipi vô Aisak kidi lec maviha vac yibên tii vac nang ge. Om Eblaham nêb ob hi Aisak i yib lêc Anutu le vac xôn, om tiyi xochê Eblaham kô Aisak vac yibên.

Aisak yuu Jekop yon Josep

²⁰ Ilage Aisak kitaa lec nu Jekop yuu Iso ên nêb Anutu i vông vizid niviha vô yuu vô buc timuên, dì Aisak vông i vin ên nêbê Anutu obêc vông i tiyi wê i kitaa ge.

²¹ Jekop vông i vin Anutu, om vô kwabo lec buc wê ob yib ge od kitaa lec Josep nu yuu ên nêb Anutu i vông vizid niviha vô yuu. Pyap dêc hôm pitoa xôn dì yu kwa vac dì hi vixa pec ên Anutu. Jekop vông i vin ên nêbê Anutu obêc vông i tiyi wê i kitaa ge.

²² Josep vông i vin kiyang wê Anutu hilu vô he Islel ge. Om vô kwabo lec buc wê ob yib ge od Josep nêl ên nêbê vô buc wê he Islel obêc sea Isip ge od he i kô i len mi loc hixôn dì loc yev vac vigwe paha.

Moses

²³ He Islel dô vac vigwe Isip, dì Isip nêl king ti lê nêbê Pelo ge kidu he Islel ên nêbê he i hi nue vux i yib. Moses yubac dì ta yuu ma yê ên nêbê manôn niviha yang, mêgem yuu kô mi la vun i tiyi dentuc yon. Ên yuu vông i vin Anutu om yuu o xona ên Pelo lêm. ²⁴ Pelo nu vêx ti viac Moses tiyi xochê i ta ge. Mêdêc Moses lig mi vô levac, lêc vông i vin Anutu om xona nêb tibii i o nêl bê i Pelo nu byac nu lêm. ²⁵ Ên Moses xovô ên nêbê i obêc dô tiyi xochê tibii Isip ti ge od ob la vac môp nipaêñ wê he Isip mi vông wê ob vông nilô vô niviha buc myabo tyâ ge. Om nêb ob la dô hixôn lie Islel wê Anutu nue ge dì kilê viyin hixôn he. ²⁶ Ên Moses xovô ên nêbê môp wê ob kilê viyin lec Kîlisi lê ge luu môp wê ob kô susu niviha wê he Isip vông ge vêl, ên Moses vông nilô la vô vizid niviha wê Anutu obêc vông vô i timuên ge.

²⁷ Moses vông i vin Anutu om sea vigwe Isip mi la, dì Pelo xêyaa vô myavinê vô i, lêc Moses o xona ên Pelo lêm. Xomxo ti ob yê Anutu lec manôn lêm, lêc vông vinêñ wê Moses vông ge tiyi xochê yê Anutu lec manôn, om vông i le xêkizêc. ²⁸ Anutu nêl vô Moses ên nêbê i hivip bwoc sipsip hi la lec vuayen ên angela ti wê Anutu ob vông i lam ge i o lêc hi he Islel nue lêm. Om Moses vông i vin dì vông i tiyi xochê Anutu nêl ge. Môp tige môp Pasova.

Islel tibeac vông i vin Anutu

²⁹ He Islel vông i vin Anutu om he la vac Gwec Hi mahigun tiyi xochê môp kwepêñ mi la kehe vilu ganê. Mêdêc tibii Isip nêb ob timu vô he vixa, lêc gwec viwen viwen lôm hivun he xôn, dì hi he yib mima vêl.

³⁰⁻³¹ Josua vông Islel vux yuu la Jeliko ên nêb yuu i loc xôpac dì yê vigwe hixôn susu dì lôm nêl kitong vô i. Tibii Jeliko o vông i vin Anutu lêm, lêc vêx yôdac ti lê nêbê Lehap vông i vin. Om kô Islel vux yuu ge mi la vun vac xumac nilô ên nêb tibii Jeliko o hi yuu lêm. Om timuên wê he Islel mila hi tibii Jeliko yib ge od he o hi Lehap hixôn lêm. He Islel vông i vin Anutu ên nêb Anutu ob ngidu he xôn dì vông vigwe Jeliko vô he, om he

buu di vivac vō vigwe Jeliko tiyi buc vigē vilu di sec yuu. Mêdêc xenac ngidax vixa dia wē vivac Jeliko ge kipê mi la kibun.

³² Om a ob nêl kiyang ya hixôn, me? Ma vêl. Buc tiyiên ma wê a ob nêl kiyang kitong lec Gidion, Balak, Samson, Jepta, Devit, Samyuel, di plopete vihati hixôn. ³³ He vihati vông i vin Anutu. King tibeac kô he nue vevac mi la vông vevac vō he, lêc he nginoo tibii vevac vihati vêl. Di he viac xomxo ya môp bôbac. Di he kô nôn niviha wê Anutu hilu kiyang ên nêb ob vông vō he ge. Di tibii nêx he ya la vō noo laion ên nêb noo i ya he, lêc Anutu vông noo laion mya tung xôn. ³⁴ Di tibii nêx he ya la vac ngwax levac, lêc he vông i vin om Anutu hi ngwax yib. Di tibii nêb ob hi he ya yib ya yipac levac, lêc Anutu vō he vêl. He xomxo xélehelehe, lêc Anutu vông he tu xomxo xékizéc, om he le xékizéc vac vevac, di tii tibii vevac la vêl. ³⁵ Di vêx wê nue yib ge, Anutu tipi vō nue kidi lec mavîha. Di tibii tung xomxo vông vinêñ ya la vac kalabuhu di vông myavinê levac vô he di nêl vō he ên nêbê he obêc sea vông vinêñ wê he vông ge od ob piwelac he vêl ên kalabuhu, lêc obêc ma ge od he ob hi he i yib. Lêc he o sea vông vinêñ wê he vông ge lêm, ên he xovô ên he nêbê he obêc yib lec vông vinêñ ge od he ob kidi lec mi dô mavîha i luu wê he ob dô mavîha gê kibun ga vêl.

³⁶ Di he ya kô viyin bêga nêbê tibii nêl kiyang nipipaa lec he, di pisa he ya yihi, di ku ya xôn ya sen, di tung ya la dô vac kalabuhu. ³⁷ Di tibii nêx he mangwe ya ngidax nêb he i yib, di kiku he mangwe la yuu ya so, di hi he ya yib ya yipac. He vinyum bwoc sipsip yuu memek niviluhu tiyi xochê ngakwi ge ên he nêñ susu ma ên he, di he tulec viyin levac, di tibii vông myavinê levac vô he. ³⁸ Tibii tii he la, om he ya la dô vac vigwe myadongêñ, di ya la dô lec vigwe kitôn, di ya la dô vac ngidax kehe, di ya la dô vac vitovac. Xomxo vông vinêñ tigee, xomxo niviha yang, om tibii kibun ga o niviha tiyi wê xomxo vông vinêñ ob dô vac he mahigun ge lêm.

³⁹ Xomxo vông vinêñ wê a nêl kiyang lec he ge, he vông i vin, om Anutu yê he niviha. Lêc kiyang wê Anutu hilu pyap ge o vô nôn lec vô he lêm.

⁴⁰ Ên Anutu xo ên nêb obêc vông nôn niviha luu vêl vô il, om nêb ob kituc il hixôn he wê vông i vin ilage la kidu tibed di ob vông il xôn vô niviha nôn vô buc tibed.

12

Il ob vông madnôn i loc vō Yesu

¹ Xomxo wê a nêl kiyang lec he gwêbaga ge, he vihati dô ila lêc yib. Lêc vông vinêñ wê he vông ge yêp seac vô il, om tiyi xochê he hilung môp vông vinêñ vô il. Om il ob sea môp nipaêñ yuu susu kibun ga wê ku il xôn ge di tup xékizéc ya vông vinêñ wê Anutu vông vô il ge êdêc la nginoo. ² Om il ob le madnôn i loc vō Yesu, ên Yesu ge tu vông vinêñ wê il vông ge kehe di ici va ob vông môp vông vinêñ wê il vông ge vô nôn lec timuên. Yesu xovô ên nêbê obêc timuên ge od Anutu obêc vông i xéyaa vô niviha, om Yesu le xékizéc di kilê viyin di yib lec xax tiyi xochê xomxo nipaêñ ti. Lêc ni o yoc ên wê xomxo yê i nipaêñ ge lêm. Om yib lec xax di lax mi la dô vô Anutu vigê hiyôv.

Anutu vông viyin vō il ên nêb ob titô il

³ Xam lêc xovô Yesu. Ên tibii nipaên vông viyin levac vô i, lêc i le xêkizêc ta. Om xomxo obêc vông viyin vô xam ge od xam nim i o lêc ma lêm, di xam o lêc xona ên viyin wê ob tulec xam ge lêm. ⁴ Xam mi vông vevac vô nipaên, lêc xam gên o vông vevac di kipyax xam hi sea lêm. ⁵ Xam mêt lungêng kiyang wê Anutu nêl vô xam ên nêb i ob ngidu xam xôn ge, me? Anutu nêl vô xam tiyi xocbê ma nêl vô nu ti ên nêbê, “Nug, Apumtau obêc vông viyin ti vô ông ên nêb ob titô ông nêm nipaên ge, od ông o lêc wê ên ông nêbê môp tige viddaaen lêm. Di Anutu obêc hilung ông nêm nipaên vô ông ên nêb ob titô ông ge od ông xêmyaa i o lêc vô viyin lêm.

⁶ Ên xomxo wê Anutu xêyaa vin lec he ge, Anutu ob vông viyin vô he vihati ên i titô he nêbê nipaên, di xomxo vihati wê Anutu nêl ên nêbê i nue ge, Anutu ob hilung he nêbê nipaên vô he di titô he.”

⁷ Kiyang nêl bêge, om xam le xêkizêc di lee yuu bê Anutu i titô xam. Ên môp wê ob titô xam ge nêl kitong vô xam ên nêbê xam tu i nue. Nu tina dô wê ma o titô i lêm ge? Ti o dô lêm. ⁸ Ên mae vihati mi titô nue. Om Mag Anutu titôen xam obêc ma ge od obêc tiyi xocbê xam o tu i nue nôn lêm. Nge, xam ob tiyi xocbê nipwo wê ma maên ge. ⁹ Il ob xovô kiyang bêga hixôn bê il mage kibun ga, he hi il ên nêb ob titô il, lêc il la dô vac he kiyang kwa ngibi. Om Mag Anutu wê tu il kinud kehe ge, obêc titô il ge od il ob la vac i kiyang kwa ngibi i luu vêl di la dô madviha. ¹⁰ Il mage kibun ga, he dô buc myabo tya, di titô il tiyi xovôen wê he vông ge. Lêc Anutu titô il ên nêb môp titôen i vô nôn niviha vô il di il tu xomxo ngibua xocbê Anutu vaci ge. ¹¹ Vô buc wê Anutu ob titô il ge, il ob tulec myavînê, di il nilô ob vô niviha lêm. Lêc Anutu obêc titô il pyap ge od môp titôen tige obêc vô nôn niviha vô il bêga bê il ob tu xomxo wê mi timu vô môp niviha ge di il ob dô vac kiyang malehe kwa ngibi.

¹² Anutu titô il ên nêb i vô nôn niviha vô il, om xam vigêm wê yux kizêc ge xam titô ên i vô xêkizêc ên xam vông yuac ya. Di xam vixam wê vô xêlehe ge xam titô ên i vô xêkizêc lec. ¹³ Di xam vixam i kô xam mi loc vô môp niviha, êdêc lime wê o vông i vin xêkizêc lêm ge he i o sea vông vinêng wê he vông ge lêm. Nge, he i yê môp bôbac wê xam vông ge di lôm timu vô.

¹⁴ Xam vông yuac levac lec môp wê xam ob nêl kiyang malehe vôma ge, di xam vông nilôm i loc diluhu vô Anutu di tu xomxo wê ngibua ge, ên obêc ma ge od xam ob la dô hixôn Apumtau lêm. ¹⁵ Xam viac xam, gec lêc xam sea môp wê Anutu ob xo vigwe pisiv ên xam ge. Di xam viac xam, gec lêc xomxo ti didii xam mi la vac môp nipaên, ên xomxo tige tiyi xocbê xax nôn kilin wê ob vông xam tibêac vô nipaên. ¹⁶ Xam viac xam ên môp yôdac vêx yuu vux, di xam o lêc vô nimim vô Anutu tiyi xocbê Iso vông ilage lêm. Ên Iso ge tuc, om tiyi wê ob kô kitaaen niviha vô ma. Lêc Iso kitaa yaên vô li môn nêb ob ya. Lêc li môn nêl ên nêbê, “Ông obêc tyuc lec bê mag i vông kitaaen wê nêb ob vông vô ông ge vô a ge od a ob vông yaên vô ông.” Om Iso lee yuu, ¹⁷ mêt buc ya

lam la vêl, lêc Iso nêb ob kô kitaaen niviha vô ma, lêc ma nêbê tiyien ma, om Iso byag levac di myag môp wê ob pilepac nilô di kô kitaaen niviha tige, lêc môp ti o yêp lêm.

Il ob la vô Anutu gê lag puunê

¹⁸ Gwêbaga xam la kwabo vô Anutu, lêc xam o la kwabo vô susu kibun ga ti tiyi wê xam ob hôm ya vigêm ge lêm. Om xam o tiyi xochê he Islel ilage lêm. Èn he Islel la le kwabo vô kitôn Sainai, mêt he yê ngwax levac wê tum vac vigwe tige, dì mapítoc wê mapítoc ta ge hivun kitôn tige xôn, dì vigwe viyii levac mabu, ¹⁹ dì vuac tyuc vac, dì he ngô vya ti, lêc he nêl ên he nêbê he ob ngô vya tige tii vac lêm, ²⁰ èn he xona mabu yocên ên vya wê nêl ên nêbê,

“Xomxo ti obêc lii vigê lec kitôn tiga ge od xam nêx i ya ngidax èn i yib. Dì bwoc ti obêc kê kitôn tiga ge od xam hi i yib hixôn.”

²¹ He Islel yê dì ngô, om xona mabu, dì Moses nêl ên nêbê, “A éno xona mabu dì a yetac hixôn.”

²² Lêc il o la vô kitôn Sainai tiyi xochê he Islel ilage lêm. Nge, il la kwabo vô Anutu om tiyi xochê il la lec kitôn bangwe lê nêbê Saion dì la dô vac Anutu mavîha ben Jelusalem. Vigwe yuu ge tixuu lec Anutu ben lag puunê. Om il obêc mila tulec angela tibeac wê tibeac hiwocên wê he kitucma dì pimil Anutu ge, ²³ dì il ob la dô hixôn Anutu nue wê Anutu kivuu he lê pyap gê lag puunê ge, dì il ob la le vô Anutu wê obêc yaxê xomxo vihati nêñ môt yuu kiyang ge, dì il ob la tulec xomxo vông vinêñ ilage kinu. He gee wê xomxo niviha om Anutu vông he vô niviha nôn. ²⁴ Dì il ob la le vô Yesu wê vông kiyang paha wê Anutu hilu vô il ge vô nôn lec ya ici va hi wê kipyax sea ge. Ilage Ebel yib dì hi kipyax sea, lêc Yesu hi luu Ebel hi vêl, ên Yesu hi nêl kiyang niviha kitong bêga ên nêbê Anutu kitya il nêd nipaêñ vêl.

Xam viac xam

²⁵ Xam viac xam di le i lêc vô ninyam kitu vô Anutu kiyang wê nêl vô xam ge lêm. Ilage Moses nêl Anutu kiyang kitong vô he Islel, lêc he ngôêñ ma, om Anutu vông myaviwen vô he dì he o tiyi wê he ob pec ên myaviwen tige lêm. Dì gwêbaga Anutu dô lag puunê dì vông kiyang lam vô il. Om xam obêc vô ninyam kitu vô kiyang wê Anutu vaci vông ge od xam ob pec ên myaviwen nipaêñ wê Anutu ob vông vô xam ge lêm. Nge, xam obêc kô myaviwen luu wê xomxo ilage kô ge vêl. ²⁶ Ilage Anutu vya vông kibun yoc. Dì gwêbaga Anutu nêl vô il pyap ên nêbê, “Obêc buc timuêñ ge a obêc vông kibun i yoc tii vac nang. Lêc o kibun pileva lêm. Nge, a obêc vông lag yuu xôn kibun i yoc.” ²⁷ Anutu nêl bêge, om kiyang wê nêl ên nêbê, “A obêc vông kibun i yoc tii vac nang”, kiyang tige kehe bêga nêbê lag yuu kibun wê Anutu tung ilage obêc yoc dì xôa obêc ma, lêc Anutu ben wê yocêñ obêc ma ge wê ob dô.

²⁸ Mégem gwêbaga il ob pimil Anutu lê ên wê il ob la dô vac i ben wê ob yoc lêm ge. Om il ob kitaa vô Anutu dì vông i vuac i tiyi wê Anutu obêc yê niviha ge, dì il ob xona ên i, dì vông i lê i vô levac, ²⁹ èn Anutu wê il vông i vin i ge tiyi xochê ngwax mahelac wê obêc ya susu vihati ma vêl ge.

13

Môp toto wê Anutu yê niviha ge

¹ Xam wê xam vông i vin Kilisi ge, xam xêmyaa i vin lecma i tiyi buc vihati. ² Dì xam nim i o lêc ma lec tibii wê val vô xam ge lêm. Nge, xam

kô he mì loc vac bom dì viac he niviha, ên ilage xomxo ya kô angela mì la vac ben dì viac he niviha, lêc he lungên dì so ên nêb mêd tibii kibun ga.

³ Lime vông vinên wê tibii tung he la dô vac xumac kalabuhu ge, xam lêc xovô he i tiyi xocbê xam dô hixôn he ge. Dì xam xovô he wê tibii vông he ninivi kilê viyin ge, ên he ninivi tiyi xocbê il nidnivi ge.

⁴ Xam vihati, xam lêc wê môp iimaén i tiyi môp niviha dì le i lêc vông môp tige i vô nipaén lêm, ên Anutu obêc vông myaviwen vô he wê vông môp yôdac vêx yuu vux hixôn he wê vông môp iimaén vô nipaén ge.

⁵ Le i lêc vông nilô i loc vô mone tibed lêm. Nge, xam lêc xovô bêga bê, "Mone wê a kô ge, a kô tiyi a pyap." Xam lêc nêl bêge, ên Anutu nêl bêga ên nêbê, "A obêc sea ông dì vô nimig vô ông lêm." ⁶ Anutu nêl bêge, om il xonaén ob ma dì il ob nêl bêga bê, "Apumtau vaci ob ngidu a xôn, om a ob xona lêm. Letya tiyi wê ob vông a vô nipaénê?"

⁷ Xam xovô lime gyovixa wê dô ilage, ên he nêl Anutu kiyang vô xam di he mi timu vô môp vông vinên dì i la tyip lec buc wê he yib ge hixôn. Om xam xovô dì timu vô môp vông vinên wê he vông ilage.

⁸ Yesu Kîlisi dô ila dì gwêbaga dì obêc dô luta, dì obêc pilepac i lêm.

⁹ Xomxo ya obêc val nêl xolac ba vô xam ên nêb ob pilepac xam la vac môp wê he vông ge od xam o lêc sea Anutu dì timu vô môp wê he vông ge lêm. Ên xomxo ya nêl kiyang kityooén lec susu yaén ên nêbê xomxo obêc timu vô ge od ob vô niviha vô he. Lêc môp tibêge o tiyi wê ob ngidu il xôn ge lêm. Nge, vizid wê Anutu vông ge wê obêc ngidu il xôn dì il obêc dô niviha ya.

Daa wê Anutu yê niviha ge

¹⁰ Il alta ti le. Alta tige tixuu lec Yesu wê yib ên il nêd nipaén ge, om gwêbaga xomxo obêc timu vô Moses xolac dì si daa ge, od môp wê Yesu yib ge ob ngidu he xôn lêm. ¹¹ Xomxo ti wê Hetplis ge kô bwoc hi mì la vac xumac lilo sel nilô dì vông i tu daa ên nêb Anutu i yê dì kitya he nêbê nipaén vêl. Lêc bwoc nôn ge, he kô mì la si vac ngwax gê ninyawehe. ¹² Om vô buc wê Yesu yib ge he kô i êno mì la vac vigwe ninyawehe, di i kilê viyin levac dì yib ên nêb ob kitya xomxo vihati nêl nipaén vêl di vông he vô paha lec ya i

hi. ¹³ Yesu la vac vigwe ninyawehe di kilê viyin, om il êno ob kilê viyin i tiyi xochê i kilê ge. ¹⁴ Ên il xovô ên il nêbê il bed kibun ga ob yêp luta lêm. Om il ob myag vigwe ti wê il ob tulec timuén ge. ¹⁵ Om il ob hi vixad i pec ên Anutu i tiyi buc vihati ên yuac wê Yesu vông ge. Ên daa wê Anutu nêb il ob vông vô i ge bêga, il ob hi vixad i pec ên i dì nêl i lê i yêp seac vac myad i tiyi buc vihati.

¹⁶ Le i lêc sea môp wê xam mi ngiduma xôn niviha ge lêm. Om xam titang susu wê xam vông ge i loc vô lime wê nêbê obêc buc timuén ge he ob nêl yuac wê he vông ge kitong vô Anutu ên i yaxén he. Om xam ngô he kiyang dì loc vac he kwa ngibi, ên xam obêc vông bêge ge od he ob vông he yuac hixôn nilô niviha. Lêc obêc ma ge od he ob vông hixôn nilô viyin, dì ob vô niviha vô xam lêm.

¹⁷ Lime gyovixa mi viac xam niviha ên he xovô ên he nêbê obêc buc timuén ge he ob nêl yuac wê he vông ge kitong vô Anutu ên i yaxén he. Om xam ngô he kiyang dì loc vac he kwa ngibi, ên xam obêc vông bêge ge od he ob vông he yuac hixôn nilô niviha. Lêc obêc ma ge od he ob vông hixôn nilô viyin, dì ob vô niviha vô xam lêm.

Kitaaén wê ob ngidu il xôn ge

¹⁸ Xam lêc kitaa vô Anutu ên i ngidu xe xôn. Xe xovô ên xe nêbê nipaên ti o yêp vac xe nilôm lêm, ên xe nêb xe ob timu vô môp bôbac i tiyi buc vihati. ¹⁹ Om a nêbê xam kitaa vô Anutu ên i vông a lôc vô xam lutibed.

²⁰ Anutu ge kiyang malehe kehe, dì i tipi vô il lig Apumtau Yesu kidi lec maviha vac yibén. Yesu yib di kipyax i hi sea om vông kiyang wê Anutu hilu nêbê ob yêp luta ge vô nôn lec vô il, om Yesu tu il nêd levac wê viac il tiyi xochê xomxo viac bwoc sipsip ge. ²¹ Om a kitaa vô Anutu ên a nêb i vông vizid yuu susu niviha vihati vô xam êdêc xam timu vô môp niviha wê i vông ge. Di a kitaa vô i ên a nêbê i vông yuac wê i yê niviha ge vac xam nilôm lec Yesu Kilisi lê. Om il ob pimil Kilisi lê dì vông i lê i vô levac i yêp luta lêc luta. Nôn.

Kiyang viwen timuên

²² Xam lige, a kidu xam ên a nêbê xam ngô kiyang vihati wê a kivuu vac kipihac ga ên i ngidu xam xôn. Ên kiyang wê a kivuu vô xam ga, a kivuu kiyang myabo. ²³ Xam ngô lê. Tibii piwelac il lig Timoti vac kalabuhu dì vông i la. Om Timoti obêc val vô a lutibed ge od xii xôn ob miloc vô xam.

²⁴ Xe nêl vidiiêñ vô xam gyovixa hixôn xomxo vông vinêñ vihati wê dô hixôn xam ge. Il lige vông vinêñ wê dô vac vigwe Itali ge, he éno nêl vidiiêñ vô xam.

²⁵ Vizid niviha wê Anutu vông ge i ngidu xam vihati xôn. Nôn.

JEMS Kipihac wê Jems kivuu ge

¹ A Jems, a ga Anutu yuu Apumtau Yesu Kilisi nu yuac a, om a kivuu kipihac tiga i loc vô xam Islele wê xam pum lec Jekop nue vigê yuu dì tô mi la yuu ge, lêc gwêbaga xam sea bom dì toto loc dô vac tibii viyang ba ben. A nêl vidiién vô xam.

Viyin i vông xovôen vô il

² Xam lige, buc wê xam obêc tulec viyin ya ge od xam nilôm i o lêc vô viyin lêm. Nge, xam nilôm i niviha, ³ dì xam vyac xovô bê viyin tigee tulec xam nêb ob yaxên xam nêm vông vinên, lêc wê xam obêc vông i vin Anutu xêkizêc ge od xam obêc le pilîhi mi dô. ⁴ Om xam le pilîhi vac viyin mi dô i tiyi lec buc vihati, êdêc i vô niviha vô xam dì vông xam tu xomxo wê niviha lee i tiyi wê xam ob timu vô Anutu kiyang vihati ge.

Xomxo ti piyôp obêc myabo ge od i kitaa vô Anutu

⁵ Xam ti piyôp obêc myabo ge od i kitaa vô Anutu bê Anutu i vông piyôp niviha vô i, ge od Anutu obêc vông vô i. Èn Anutu ge wê ob vông susu vô xomxo vihati ge dì ob kol ên xomxo ti dì kunac i lêm. ⁶ Lêc xomxo ti obêc kitaa ge, od i vông i vin xêkizêc, dì nilô i o lêc vông yuu lêm. Èn xomxo ti wê nilô vông yuu ge tiyi xochê gwec wê lea vivêe dì i vô myapilôhô pileva ge. ⁷ Om xomxo tibêge i o lêc so bê Apumtau ob vông susu ti vô i lêm, ⁸ ên xomxo tibêge mi xo kiyang tibeac dì o timu vô môp tibed lêm.

Xomxo wê nêñ susu maén gee yuu xomxo wê susu tibeac gee

⁹ Lige vông vinên wê nêñ susu maén ge, he i dô hixôn xêyaa niviha, ên wê Anutu hôm he lec niviha ge. ¹⁰ Dì lige vông vinên wê susu tibeac ge, he i dô hixôn xêyaa niviha ên wê he susu tibeac lê, lêc he tiyi xochê xomxo pileva ge. Èn xomxo wê susu tibeac gee obêc yib tiyi xochê nita maviya wê vuac ge, ¹¹ lêc hiyôv obêc linac myapilihi ge od ya i ngigo dì maviya niviha tyo ob yal la vêl dì i yib. Om xomxo wê susu tibeac gee obêc vông yuac lec mi dô lê, lêc buc wê obêc yib ge od ob sea yuac yuu susu vihati obêc dô xel, dì ob yib mi la pileva.

Susu wê ob yaxên xomxo ge

¹² Xomxo ti obêc le pilîhi vac viyin ge od i xêyaa i vô niviha, ên Anutu obêc pimil i di vông i dô maviha luta tiyi xochê hilu kiyang pyap nêb ob vông vô xomxo wê he xêyaa vin lec i ge. ¹³ Lêc xomxo ti nilô obêc kidu i nêb i vông soën ti ge od i o lêc nêl bê Anutu didii i vac nipaén tige lêm. Èn nipaén ti o tiyi wê ob yaxên Anutu ge lêm, dì Anutu ob didii xomxo ti vac nipaén lêm. ¹⁴ Lêc yaxên tige kehe yêp vac il toto nilôd, om kidu il nêb il vông môp soën. ¹⁵ Nang dêc nipaén wê yêp vac il nilôd ge vô nôn lec dì vông il vac nipaén. Om nipaén obêc vô levac ge od nôn bêga nêbê il obêc xib dì la xôa ma timuén.

¹⁶ Om xam lige, le i lêc vông i vin kiyang kityooén wê nêl ên nêbê Anutu ob didii il vac nipaén ge lêm. ¹⁷ Èn vizid yuu susu nivihaviha vihati lam gê lag puunê. Ge Mag Anutu vaci vông i lam vô il. Anutu ge xêseac kehe, di

ob pilepac i xocbê hiyôv yuu dentuc ge lêm. Nge, i xêseac kehe wê obêc dô luta. ¹⁸ Anutu vaci xovô nêb ob vông il tu i nue om vông il vô paha lec ya kiyang nôn wê i vông ge. Anutu vông bêge, ên nêb il tu i nue mugên wê il luu susu vihati wê i tung ge vêl.

Il ob ngô Anutu via dî timu vô

¹⁹ Xam lige, xam vyac xovô môp bêga bê xam vihati ngô kiyang mi xovô niviha lê, dî le i lêc nêl kiyang lec lutibed lêm, dî le i lêc kunacma decdec lêm. ²⁰ Ên xêyaa myavinê wê xomxo vông ge ob vông môp niviha wê Anutu vông ge i vô nôn lec lêm. ²¹ Om xam sea môp nipaên yuu judajuda wê yêp vac xam nilôm ge, dî xam loc vac Anutu kwa ngibi dî hôm kiyang wê Anutu vông mi i yêp vac xam nilôm ge xôn. Ên kiyang tige tiyi wê obêc vô xam vêl ên nipaên dî vông xam lax vô Anutu.

²² Om xam timu vô Anutu kiyang vihati dî xam o lêc ngô pileva lêm. Ên xam obêc ngô pileva ge od xam kityoo xam. ²³ Ên xomxo ti obêc ngô Anutu kiyang lê, lêc ngô pileva dî o timu vô lêm ge, od ge tiyi xocbê xomxo ti yê manôn vac deac ge. ²⁴ Yê manôn vac deac pyap lêc la ge od o xovô manôn wê yê vac deac ge lêm. ²⁵ Anutu xolac niviha ge wê piwelac il vêl ên nipaên wê ku il xôn ge, om xomxo ti obêc xovô xolac tige niviha mi timu vô, dî o ngô pileva di lungên lêm ge, od xomxo tige obêc dô hixôn xêyaa niviha tiyi lec buc vihati.

²⁶ Xomxo ti obêc xo nêbê i xomxo niviha ên wê mi vông lilo dî mi kitaa vô Anutu ge, lêc o viac mya niviha lêm ge od kityoo i dî vông lilo yuu kitaa ge pisiv. ²⁷ Xomxo vông vinênen nêbê i ob ngidu pibua yuu vêxôv wê dô vac viyin ge xôn, dî il ob viac il niviha êdêc môp kibun ga i o lêc vông il vô nipaên lêm.

2

Il ob xê xomxo vihati i tiyima

¹ Xam lige, xam vông i vin Apumtau Yesu Kilisi, wê il nêb levac dî xêseac kehe ge, om xam o lêc hôm xomxo wê lê levac ge lec dî vô nîmim vô xomxo wê nén susu maên ge lêm. ² Ên obêc tiyi xocbê xam kitucma mi dô lê, lêc xomxo yuu miloc vô xam, xomxo ngwe ob miloc hixôn ngakwi yuu vunac vunac niviha, dî ngwe ob miloc hixôn nêbê ngakwi nipaên. ³ Mêd xam obêc hôm ngwe wê ngakwi niviha ge lec dî nêl vô i bêga bê, “Lam dô lec sia niviha tiga,” dî nêl vô xomxo susu maên ngweo bêga bê, “Ông loc le ganê, mad lam dô nêm vô a vixag ga.” ⁴ Xam obêc vông bêge ge od ge xam yaxênen xomxo ya piyôp soen wê xam vông ge mi wê xomxo ya niviha di wê ya nipaên.

⁵ Xam lige, xam ngô lê. Xomxo wê susu maên gê kibun ga ge wê Anutu vino he pyap nêb he i tu xomxo wê vông vinênen xêkizêc ge, dî nêl nêb he ge wê ob la dô vac i ben lag puunê dî kô vizid niviha wê Anutu hilu pyap nêb ob vông vô xomxo wê he xêyaa vin lec i ge. ⁶ Om bêna lêc xam vông xomxo wê susu maên ge vô nipaên mi dô hixôn ni yocênen? Xam xovô ên xam nêbê viyin lam gê na vô xamê? Xam xovô bê xomxo wê susu tibeac yuu mone levac ge wê mi vông viyin vô xam dî kô xam mi la vac kot ge. ⁷ Xam vông i vin Yesu lê dî tu i nue, lêc xomxo wê mone levac ge wê mi so vya vô lê niviha tige, lêc bêna lêc xam kô he lecê?

⁸ Il Apumtau Anutu nêl kiyang ti mì i yêp vac xolac bêga ên nêbê, “Ông xêmyaa i vin lec xomxo baba ge i tiyi xocbê ông xêmyaa vin lec ôcông va ge.” Om xam obêc timu vô kiyang tige ge od xam vông môp niviha mêtê. ⁹ Léc xam obêc hôm xomxo mangwe lec mì pimil he dì wê mangwe nipaên ge od xam vông ge so, dì xolac nêl xam nêm kitong nêbê xam vông nipaên. ¹⁰ Èn xomxo ti obêc timu vô xolac vihati niviha, léc vông bo ti la tiyien ma ge od tiyi xocbê pwoo xolac vihati ge vac. ¹¹ Èn Anutu nêl bêga nêbê, “Xam o léc vông yôdac vêx yuu vux lêm,” di nêl hixôn ên nêbê, “Xam o léc hi xomxo i yib lêm.” Om yôdac vêx yuu vux obêc ma, léc ông hi xomxo ti yib ge od ông vông xolac vihati vô nipaên. ¹² Om xam vyac xovô dì vông môp yuu kiyang vihati i tiyi xocbê kiyang wê yêp vac Anutu xolac ge. Èn xolac tige wê piwelac il vêl ên nipaên dì vông il lôm dô vac niviha ge, om buc timuén Anutu obêc yaxén il ned môp lec xolac tige. ¹³ Mêtgem xomxo ti obêc xo vigwe pisiv ên xomxo baba lêm ge od Anutu obêc xo vigwe pisiv ên xomxo tibêge lec buc wê ob titô il ned kiyang ge lêm. Léc xomxo wê xo vigwe pisiv ên xomxo baba ge, ge wê obêc la dô niviha vô buc wê Anutu ob titô il ned kiyang ge.

Vông vinén nôn yuu vông vinén mayibên

¹⁴ Xam lige, xomxo ti obêc nêb i xomxo vông vinén, léc o vông môp niviha hixôn lêm ge od i nêm vông vinén ge, mya nêl pileva dì o tiyi wê ob vô i vêl ên nipaên dì vông i dô vac niviha ge lêm. ¹⁵ Xam lime wê ngakwi yuu yaén ma ge ti obêc miloc vô xam, ¹⁶ léc xam ti obêc nêl vô i bêga bê, “Loc hixôn xêmyaa niviha, di vinyum ngakwi lec ên lea di wa yaén ên i den ông.” Xam obêc nêl bêge, léc xam obêc vông yaén yuu ngakwi wê ob ngidu i ninivi xôn ge lêm ge od kiyang tige ob vô niviha vô i tibêna? ¹⁷ Il ned môp vông vinén tiyi bêge. Èn vông vinén wê il vông ge obêc vông môp niviha ti lêm ge od il ned vông vinén ge mayibên.

¹⁸ Léc xomxo ti mêd obêc nêl bêga bê, “A ga wê a vông i vin di ông ge wê ông mi vông môp niviha.” Léc a ob nêl vô i bêga bê, “Ông nêb ông vông i vin lê, léc ông o vông môp niviha ti hixôn lêm. Om ông nêm vông vinén ob yêp seac mì xe xê tibêna? Dom a ga, a vông i vin nôn, om môp niviha wê a mi vông ge nêl vông vinén wê a vông ge kitong seac.”

¹⁹ Ông vông i vin ên ông nêbê Anutu tibed. Ge niviha lê, lêcom vimwo nipaên êno vông i vin kiyang tige di xona mabu, léc he o tu Anutu nue lêm. ²⁰ Ông ge piyôp maén, ên ông vông i vin pileva di ông o vông môp niviha hixôn lêm, om ông nêm vông vinén ge mayibên di nôn ma. Léc mêd ông nêb a nêl kiyang tige kehe kitong vô ông, om ông ngô lê. ²¹ Ilage il bug Eblaham vông nu Aisak tu daa vô Anutu tiyi xocbê Anutu nêl vô i ge, om Anutu yê môp wê i vông ge nêb i xomxo niviha. ²² Om ông xovô bêga bê Eblaham vông i vin Anutu di vông môp niviha hixôn, om môp niviha wê ivông ge vông i nêm vông vinén vô nôn lec. ²³ Mêtgem kiyang wê yêp vac xolac ge vô nôn lec bêga nêbê, “Eblaham vông i vin Anutu om Anutu yê vông vinén wê i vông ge di nêl nêbê i xomxo niviha.” Di Anutu yê Eblaham nêbê i nu wê yuu xêyaa vin lecma ge. ²⁴ Om il ob xovô bêga bê Anutu ob yê nêbê xomxo ti niviha lec vông vinén pileva lêm. Nge, Anutu obêc yê nôn niviha wê yêp seac vac vông vinén wê i vông ge od ob nêl bê i xomxo vông vinén nôn.

²⁵ Tiyi xochbê môp wê vêx yôdac Lehap vông ge. Ên xomxo yuu wê Josua vông yuu la ên nêb yuu loc yê vigwe ge, Lehap viac yuu niviha di vông yuu lax mi la môp bangwe mi la, om Anutu yê vêx tige niviha lec yuac wê i vông ge. ²⁶ Om il ob xovô bêga bê xomxo ti obêc vông i vin ya mya pileva di o vông môp niviha hixôn lêm ge od vông vinêr wê i vông ge mayibên, tiyi xochbê xomxo ninivi wê myakilôhô la vêl di ninivi vaci yêp ge.

3

Il ob viac myad i niviha

¹ Xam lige, xam o lêc nêl bê xam tibeac ob tu xomxo xolac nêlên lêm, ên il xovô bê buc tîmuên wê Anutu obêc titô il nêd kiyang ge od obêc pilii xe wê xomxo xolac nêlên ge, xe nêm kiyang lê, lêc vông myavîwen nipaén vô xe luu xomxo baba vêl. ² Il vihati mi vông môp soén, lêc xomxo ti obêc nêl kiyang niviha di ti soén ma ge od xomxo tibêge niviha yang, tiyi wê ob viac i ninivi yuu môp vihati niviha êno ge. ³ Xam xovô lê. Il obêc tung ain nipwo tya vac xôhô mya ge od il ob pop xôhô nôn levac tige ya susu nipwo tya gedi i la bôbac vô môp wê il nêb il ob la vô ge. ⁴ Di xam xovô lec sip êno. Sip ge susu mabu yocén lê, lêc obêc le pileva ge od lea obêc kô mi la vac gwec. Di sip stia ge susu nipwo tya lê, lêc xomxo ti wê mi kô sip ge obêc hôm lec mi ngibina ge od sip la bôbac vô môp ti wê nêb ob la vô ge. ⁵ Di get êno bêge. Il get ge nipwo tya, lêc yong i tiyi xochbê susu levac ti.

Di xam xovô lec ngwax. Ên ngwax nipwo tya tiyi wê ob ya nagyi levac ma vêl. ⁶ Di il get ge tiyi xochbê ngwax. Ên il get wê dô vac il myad ge keac kiyang nipaén tibeac di vông il nidnivi vihati vô nipaén. Seten vaci vông nipaén vac il get, mègem tum mahelac xochbê ngwax ge lec il nêd môp di ya i vô nipaén. ⁷ Xomxo tiyi wê ob kô bwoc vimen yuu menac di myel yuu lilii wê dô vac nita di dô vac mia ge viyang viyang di vông he vô malehe lec ge, om xomxo mi vông bêge. ⁸ Lêc xomxo ti o tiyi wê ici va ob vông get vô malehe lec ge lêm. Ên il get mi nêl kiyang nipaén vaxvax tibeac om nipaén tige la vông xomxo nilô vuac di hibu sea. ⁹ Il pimil Mag Apumtau ya il get lê, nang dêc il get so vya vô xomxo wê Anutu tung he tiyi ici va kinu ge. ¹⁰ Om kiyang yuu lam vac il myad tibed. Ngwe, il pimil Anutu, di ngwe, kiyang nipaén. Xam lige, môp bêge tiyiên ma vêl. ¹¹ Mia numên yuu mia gwec, yuu xôn o pituv vac maliyuhu tibed lêm. ¹² Xam lige, kwacsung mêt tiyi wê ob vuac nôn higuc ge, me? Me xeb tiyi wê ob vô nôn xochbê gulac nôn ge, me? Ma vêl. Di gwec êno o tiyi wê ob pilepac mia numên ge lêm. Om xam xovô bêga bê xomxo wê kiyang nipaén yêp vac i nilô ge od ob nêl kiyang nipaén, dom xomxo wê kiyang niviha yêp vac i nilô ge od ob nêl kiyang niviha.

Piyôp yuu xovôén niviha lam vô Anutu

¹³ Xomxo wê piyôp yuu xovôén niviha ge od i lêc tup vô môp niviha di i o lêc yong i lêm, êdêc xomxo i yê di xovô bê i xomxo xovôén nôn. ¹⁴ Lêc xam obêc dô hixôn nilôm nipaén vô xomxo ya di xam obêc xovô nêbê xam ob vông i tiyi wê xam nilôm xovô ge ên i vô niviha vô xacxam va ge, od xam o lêc yong xam bê xam piyôp levac lêm, ên ge xam pwoo kiyang nôn di nêl kiyang kityooén. ¹⁵ Ên xovôén tibêge o lam gê lag puunê vô Anutu lêm. Nge, ge nipaén kibun ga wê xomxo nilô xovô di Seten vaci

tu kehe ge. ¹⁶ Èn xomxo obêc dô hixôn nilô nipaên vô xomxo ya, dì obêc xovô nêbê he ob vông i tiyi wê he nilô xovô ge ên i vô niviha vô heche va ge od he ob dô vac niviha ti lêm. Nge, he ob dô vac viyin di nipaên viyang viyang obêc hivun he xôn. ¹⁷ Lêc xomxo wê kô xovôên niviha vô Anutu ge od ob vông môp bêga bê nipaên ti o yêp vac he nilô lêm, dì he dô vac malehe, dì he lum nêl kiyang vôma, dì he vô ninya lehe vô lie kiyang, dì he xo vigwe pisiv ên xomxo di vông môp niviha vô he, di he vông môp niviha vô xomxo vihati tiyima, dì he vông i vin nôn dì o nêl ya mya pileva lêm. ¹⁸ Dì xomxo wê nêl kiyang malehe vô lie ên nêb he xôn ob dô hixôn xêyaa niviha ge, ge tiyi xocbê he xin vê vac yuac om vê tige obêc tyip mi vô nôn niviha.

4

Xomxo wê xêyaa vin lec susu kibun ga ge vông vevac vô Anutu

¹ Xame, xam kunacma dì nêl kiyang vevac vôma ên va? Kehe bêga bê xam nêm nilôm ngaén vông xam nim nyag vôma di xam kunacma di hima lec. ² Èn xam xêmyaa vin lec susu viyang viyang gee ên xam nêb xam ob kô lê, lêc xam kôen ma, om xam nêbê xam ob hi xomxo i yib lec. Dì xam do mam vô susu viyang viyang gee, lêc tiyiên ma wê xam ob kô ge, om xam kunacma di hima lec. Xam o kô susu wê xam nêb xam ob kô ge lêm, dì kehe bêga bê xam o mi kitaa vô Anutu lec susu tigee lêm. ³ Lêc buc ya xam kitaa vô Anutu ên xam nêb i vông susu vô xam lê, lêc Anutu vôngên ma, ên xam o kitaa i la niviha lêm. Nge, xam kitaa ên xam nêb Anutu i vông susu wê ob vô niviha vô xacxam va ge. ⁴ Xam ge wê xam sea Anutu xolac ge mège. Èn xomxo xêyaa obêc vin lec susu yuu môp kibun ga ge, od ge tiyi xocbê he vông vevac vô Anutu ge, lêc mêd xam lungên tige, me? Ga a nêl vô xam ên a nêbê xomxo ti obêc vông nilô la vô susu kibun ga ge od tiyi xocbê vông vevac vô Anutu. ⁵ Èn kiyang yêp vac xolac bêga nêbê, “Il kinud wê Anutu tung vac il nilôd ge, Anutu yê xôn nêb il vông i loc diluhu vô ici va.” Kiyang nêl bêge, lêc xam mêd xo ên xam nêb Anutu nêl kiyang ga kityooên vô xam, me?

⁶ Lêc Anutu xêyaa vin lec il luu vêl om nêb ob ngidu il xôn, tiyi xocbê kiyang wê yêp vac xolac bêga ên nêbê, “Xomxo wê yong he vô Anutu ge, od Anutu obêc ngiloo he vêl. Lêc xomxo wê vông he vô nipwo lec dì la vac Anutu kwa ngibi ge, od Anutu obêc xo vigwe pisiv ên he di ngidu he xôn.” ⁷ Om xam pilepac xam dì loc vac Anutu kwa ngibi. Dì xam le pilîhi di tii Seten ên i pec vêl ên xam. ⁸ Xam loc kwabo vô Anutu, ên xam obêc la kwabo vô Anutu ge od Anutu êno ob lam kwabo vô xam. Lêc xam ge tibii nipaên, om xam pilepac nilôm i vô paha lec i tiyi xocbê xomxo lipac vigê vô paha lec ge. Xam nilôm ge vông yuu, om xam sea vilu wê nipaên ge dì vông nilôm yuu piyôp i loc diluhu vô Anutu. ⁹ Dì xam nilôm i vô viyin di xam byag ên nêm nipaên lê. Gwêbaga xam nap hixôn xêmyaa niviha, lêcom xam pilepac nilôm napên di byag hixôn nilôm viyin ên nêm nipaên wê xam vông ge lê. ¹⁰ Xam pilepac xam vô Apumtau manôn, ên xam obêc vông bêge ge od Apumtau obêc hôm xam lec di vông lê levac vô xam.

Il ob so vyad vô lige ngwe lêm

¹¹ Xam lige, xam o lêc so vyam vô lime vông vinên lêm. Ên xomxo ti obêc so vya vô li ngwe, me yaxê i nêb i xomxo nipaên ti ge od ge tiyi xochê so vya vô xolac di yaxê nêbê xolac ge nipaên. Di xam obêc yaxê xolac bêge ge od xam o timu vô xolac lêm. Nge, xam dô tiyi xochê xomxo wê nêb ob yaxê xolac mi yê bêc niviha me nipaên ge. ¹² Lêc Anutu tibed wê tu xolac kehe ge di i tibed wê ob yaxê xomxo ge. Om Anutu tiyi wê ob hôm xomxo lec, di i tiyi wê ob kitya xomxo vêl ge. Lêc xam letya wê xam nêb xam ob yaxê lime ge?

¹³ Xam ngô lê. Xam ya yong xam di nêl ên xam nêbê, “Gwêba me titige od xe ob la vac vigwe levac tiganê, ên la dô klismas ti di vông yuac bisnis ên kô mone levac lec.” Lêc a ob nêl vô xam bê ¹⁴ xam o xovô susu wê ob val vô xam titige lêm. Di buc wê xam ob dô mamviha ge, od xam ob dô bêna? Ge xam lungê, ên xam dô ge tiyi xochê ngwaxlu wê ob didii loc myabo tyâ di xôa ma lutibed ge. ¹⁵ Om xam lêc nêl kiyang ngwe bêga bê, “Apumtau obêc tyuc lec nêb il dô madviha di vông yuac ngwe ga me ngwe ganê ge, od il ob vông.” Xam obêc nêl ngwe bêge od obêc niviha. ¹⁶ Lêcom xam yong xam di pimil xam, lêc kiyang tibêge nipaên. ¹⁷ Om xam xovô lê. Xomxo ti obêc xovô môp niviha wê Anutu nêb il vông ge lê, lêc vôngê ma ge od i nê so.

5

Xomxo wê mone yuu susu tibeac gee

¹ Xam wê mone levac yuu susu tibeac gee, xam ngô di xovô viyin wê obêc val vô xam ge lê, di xam byag di iac ên xam lê. ² Susu vihati wê xam vông ge pital sea, di xam nêm vinyumên vihati ge, mun yuu gwaakivac kitov sea. ³ Di xam nêm mone gol yuu silva ge, guva iac sea, om guva tige obêc nêl xam nêm nipaên kitong, di myavinê obêc ya xam nimnivi tiyi xochê ngwax ya ge. Ên xam kituc susu yuu mone tibeac dô, lêc buc timuên wê xam ob kô myaviwen lec ge vô kwabo lec. ⁴ Xam ngô lê. Xomxo wê vông yuac vô xam lec yaên gee, xam mi kityoo he ya mone nipwo tyâ di hôm viwan xôn. Om he nêl mone wê dô vô xam ge nêl xam nêm nipaên kitong, di xêkizêc kehe Apumtau ngô xam nêm soën wê nume yuac tigee nêl ge. ⁵ Tiyi buc vihati wê xam dô kibun ga, xam kô susu nivihaviha tibeac di dô hixôn xêmyaa niviha, di xam vet nilôm ya yaên mi i pup lec, lêc buc wê myaviwen ob kitya xam vêl ge vô kwabo lec pyap. ⁶ Xam mi vông kot vô xomxo niviha mi hi he yib, lêc he o hi xam di vông myaviwen ti lôc vô xam lêm.

Il ob le pilîhi vac viyin di dô bin Apumtau

⁷ Om xam lige vông vinên, xam le pilîhi vac viyin di dô bin buc wê Apumtau obêc lop mi lôm ge. Il xovô ên il nêbê xomxo wê vông yuac yaên ge nêb ob kô yaên nôn om dô bin buc wê lun ob tô lec yaên tige ên nêb i vô nôn niviha. ⁸ Om xam le pilîhi di dô bin Apumtau êno bêge. Di xam vông i vin xêkizêc ta mi dô, ên buc wê Apumtau obêc lôm ge vô kwabo lec.

⁹ Xam lige, xam o lêc kunac lime di so vyam vô he lêm, êdêc kô myaviwen nipaên lec lêm. Ên xomxo ti wê obêc yaxê il nêd kiyang timuên ge val le kwabo pyap. ¹⁰ Xam lige, xam xovô plopete môp ilage wê he nêl xolac lec Apumtau lê di tibii le vông viyin levac vô he, lêc he le

xêkizêc di kilê viyin. Mêgem xam kilê viyin mi timu vô he vixa xocbê he kilê ge. ¹¹ Èn il mi nêl ên il nêbê xomxo wê le xêkizêc vac viyin gee, he ob dô hixôn xêyaa niviha. Xam xovô Jop kiyang pyap wê nêl ên nêbê Jop le pilih vac viyin viyang viyang wê tulec i ge, di timuên Apumtau vông môt niviha vô Jop tii vac, ên Apumtau ge wê xo vigwe pisiv ên il vihati om ob ngidu il xôn.

Il ob nêl bê il nêl kiyang nôn lag puunê lêm

¹² Xam lige, a ob nêl kiyang levac ti vô xam mi xam ngô lê. Kiyang bêga bê xam ti obêc nêl kiyang ti ge od xam o lêc nêl lag puunê me kibun me susu ti lê hixôn ên i ngidu ông kiyang xôn lêm. Nge, xam obêc lee yuu lec xomxo ngwe kiyang ge od xam nêl myabo bê “ngee”, ge od pyap. Lêc ma ge od xam nêl bêga bê “ma”, ge od pyap. Xam nêl bêge êdêc myaviwen nipaên i o lêc lôm lec xam lêm.

Kitaaén wê xomxo vông vinén vông ge xêkizêc

¹³ Xam lime ti obêc tulec viyin ge od i kitaa vô Anutu lê. Me xam ti xêmyaa obêc vô niviha ge od i vông lilo vô Anutu hixôn pimilên. ¹⁴ Lêc xam ti obêc vông yidac ge od i nêl gyovixa i lam, ên he i lam lipac wel lec i ninivi lec Apumtau Yesu lê di kitaa lec i bê Anutu i vông i vô niviha lec.

¹⁵ Di he obêc vông i vin Anutu di kitaa ge od Apumtau Anutu obêc vông xomxo tige vô niviha lec tii vac, di i nêl nipaên obêc yêp ge od Anutu obêc kitya vêl. ¹⁶ Mêgem xam nêl nêm nipaên kitong vòma di xam toto kitaa vô Anutu lec lime, ên Anutu i vông he i vô niviha lec. Èn kitaaén wê xomxo vông vinén vông ge xêkizêc tiyi wê ob vô nôn di ngidu xomxo xôn ge. ¹⁷ Xam xovô lec Ilaija lê. Èn Ilaija ge xomxo tiyi xochê il ga, lêcom kitaa xêkizêc vô Anutu ên nêbê lun i nux, mêgem lun nux tiyi klismas yon di dentuc vigê vilu di sec ti. ¹⁸ Nang dêc kitaa nang nêbê lun i val, om lun val mêt yaën tyip mi vô nôn.

Il ob vô il vêl ên môt nipaên

¹⁹ Xam lige, xam lime ti obêc sea xolac nôn di la vac môt nipaên, lêc li ngwe obêc didii i lôm vac niviha ge, ²⁰ od xam xovô bêga bê xomxo ti obêc vô li ngwe vêl ên môt nipaên ge, od tiyi xochê vô li tige vêl ên wê ob yib mi la vac nipaên ge, di Anutu ob kitya i nêl nipaên toto ge vêl.

1 PITA

Kipihac taxlee wê Pita kivuu ge

¹ A, Pita, Yesu Kilisi nu sinale a. A kivuu kipihac tiga i loc vô xam wê Anutu nue ge vihati vac vigwe levac Pontas di Galesia dî Kapadosia dî Esia dî Bitinia hixôn. Ilage tibii vevac tii xam moo sea mi xam loc dô vac vigwe tigee. ² Ilage Mag Anutu xovô pyap ên nêb ob vinoo xam. Om vinoo xam ên nêb xam tu i nue. Di Myakilôhô Ngibua vông xam tu xomxo ngibua ên nêb xam vô ninyam lehe vô Yesu Kilisi kiyang dî Yesu i lipac xam vô paha lec ya ici va hi.

Vizid niviha hixôn kiyang malehe wê Anutu vông ge i loc vô levac vô xam vihati.

Viyin toto obêc tixuu vông vinên wê il vông ge

³ Il ob pimil Anutu wê il lig Apumtau Yesu Kilisi Ma yuu Anutu ge lê. Ên Anutu xo vigwe pisiv ên il luu vêl, om vông il tu xomxo paha xochê il yubac paha tii vac ge ên wê Yesu Kilisi kidi lec maviha vac yibê. Om il xovô ên il nêbê il obêc dô madviha luta lêc luta, di il bin buc wê Anutu obêc vena kô il ge. ⁴ Om Anutu obêc vông nôn niviha ti vô il bêga nêbê il obêc dô madviha hixôn i. Nôn niviha tige pitalên obêc ma dî obêc vô nipaên lêm di xâa obêc ma lêm. Nge, Anutu viac nôn niviha tige pyap gê lag puunê mi dibin xam. ⁵ Xam vông i vin Anutu om Anutu viac xam niviha ya xêkizêc wê i vông ge, di xam obêc la dô mamviha hixôn i, om Anutu viac môp tige pyap wê obêc lam yêp seac timuên.

⁶ Xam xovô ên xam nêbê xam obêc la dô hixôn Anutu, om xam mi dô hixôn xêmyaa niviha. Mêlec gwêbaga Anutu obêc nêl ge od viyin toto ob tulec xam dî vông myavinê vô xam. Lêc ob dia lêm. ⁷ Anutu ob vông viyin toto tulec xam ên nêb viyin tigee i tixuu vông vinên wê xam vông ge ên xam xovô bê vông vinên wê xam vông ge vô xêkizêc lec, me? Xam xovô bêga bê gol ge xomxo mi yê niviha. Lêc gol tiyi wê ob vô nipaên ge, om xomxo si gol vac ngwax ên nêb ob yê bê gol ob dô xêkizêc vac ngwax me ob didee sea. Di vông vinên wê xam vông ge luu gol vêl. Om viyin wê tulec xam ge ob tixuu vông vinên wê xam vông ge tiyi xocbê ngwax tixuu gol ge ên nêb vông vinên wê xam vông ge i le xêkizêc ta, di buc timuên wê Yesu Kilisi obêc vena le seac ge od ob pimil xam dî yong xam dî vông xam lêm i vô levac. ⁸ Xam mammôn o yê Yesu ilage lêm, lêc xam xêmyaa vin lec i. Di gwêbaga xam o wê i lec mammôn lêm, lêc xam vông i vin i di xam xêmyaa vô niviha yang ên i, luu susu kibun ga vihati vêl, om tiyiên ma wê il ob nêl vac myad pileva ge. ⁹ Di vông vinên wê xam vông ge vô nôn niviha vô xam bêga nêbê Anutu vô xam vêl ên xam nêm nipaên.

¹⁰ Plopete vihati wê dô ilatikwê, he nêl kiyang wê Anutu vông vô he ge yêp seac. Kiyang tige nêl ên nêbê Anutu ob xo vigwe pisiv ên il dî vô il vêl ên il nêd nipaên. Kiyang tige vô nôn lec vô il, lêc he plopete ilage lungên kiyang tige kehe. Om he myag di kinêg kiyang wê nêbê Anutu obêc vô il vêl ên il nêd nipaên ge kehe. ¹¹ Myakilôhô Ngibua wê Yesu Kilisi vông ge dô vac he plopete nilô di nêl vô he bêga nêbê, “Obêc buc timuên ge xomxo ti obêc lam kilê viyin toto pyap. Nang dêc obêc la kô xêseac yuu lê levac.” Myakilôhô Ngibua vông xovôên tibêge vô he di he ngô, lêc he o

xovô kehe lêm, om he kinêg ên nêbê, “Xomxo tyo obêc val lec buc tina di ob val tibêna?” ¹² Lêc Anutu nêl kitong vô he bêga ên nêbê, “Xam plopete, a vông kiyang tige lec xomxo tyo vô xam ên a nêb xam loc nêl kiyang tige kitong vô xomxo vihati. Lêc a o vông yuac tige vô xam ên a nêb i ngidu xacxam xôn lêm. Nge, yuac tige obêc ngidu he wê obêc yubac timuên ge xôn.” Anutu nêl bêge vô he ilage, dì il xovô ên il nêbê kiyang wê he nêl ge vô nôn lec vô il, dì gwêbaga xomxo nêl xolac niviha tige kehe kitong vô xam mi xam ngô. Anutu vông Myakilôhô Ngibua wê dô lag puunê ge lam kibun ga, om xomxo nêl xolac vô xam ya xêkizêc wê Myakilôhô Ngibua vông ge. Dì angela êno xo ên nêb ob xovô xolac kehe.

Anutu tyuc il ên nêb il tu xomxo ngibua i tiyi xochê ici va ge

¹³ Mêgem xam viac piyôp i yêp niviha, dì xam viac xam niviha di vông xam piyôp yuu nilôm i loc diluhu vô vízid niviha wê Yesu Kilisi obêc vông vô xam vô buc timuên wê obêc vena seac vô xam ge. ¹⁴ Xam dô i tiyi xochê Anutu nue wê vô ninya lehe vô kiyang wê i nêl ge. Ilage xam lungê Anutu, om xam tîmu vô môp nipaêñ wê xam nilôm kidu xam ên nêb xam vông ge. Om le i lêc vông môp nipaêñ tibêgee i tii vac lêm. ¹⁵ Anutu wê vinoo xam ge ici va xomxo ngibua. Om xam êno, xam tu xomxo ngibua di tîmu vô môp niviha. ¹⁶ Ên xolac nêl bêga ên nêbê, “A xomxo ngibua, om xam êno, xam tu xomxo ngibua i tiyi xochê aca va ge.”

¹⁷ Xam mi kitaa vô Anutu dì nêl bêga bê, “Xe Mag ông.” Dì il Mag tige ob yaxêñ il lec il lêd lêm. Nge, ob yaxêñ il toto lec il nêd môp yuu yuac wê il vông ge. Om xam xona nêm di vyac xovô Anutu di timu vô môp niviha wê i vông ge i tiyi buc vihati wê xam dô kibun ga ge. ¹⁸ Xam xovô pyap ên xam nêbê ilage xam dô vac môp wê bume vông ge. Lêc môp tigee o vô niviha vô xam lêm. Om Anutu kisuu xam di vô xam vêl ên môp nipaêñ tigee. Lêc o kisuu xam ya susu kibun ga xochê silva me gol wê ob vô nipaêñ ge lêm. ¹⁹ Nge, kisuu xam ya hi wê Kilisi vông ge. Anutu yê Yesu hi tiyi xochê susu levac. Ilage xomxo si bwoc sipsip nu tu daa vô Anutu. Bwoc sipsip tige ninivi niviha di ningeac yuu nidodo ti o yêp vac hixôn lêm. Om Yesu tiyi xochê bwoc sipsip, ên nipaêñ ti o yêp vô i lêm, om i tu daa vô Anutu. ²⁰ Ilage Anutu gên o tung lag yuu kibun lêm, dì i nêl pyap ên nêb Yesu i tu daa xochê bwoc sipsip nu ti. Nang dêc timuên Anutu vông i lam le seac ên nêb i ngidu il xôn. ²¹ Yesu lam yib ên il nêd nipaêñ om il vông i vin Anutu. Anutu tipi vô Yesu kidi lec maviha vac yibêñ dì vông lê levac hixôn xêseac wê i vông ge vô i. Om xam vông i vin pyap dì bin nôn niviha wê Anutu obêc vông vô xam timuên ge.

Anutu xolac vông il vô paha lec

²² Xam ngô Anutu kiyang nôn dì vô ninyam lehe vô, om môp tige vông xam nilôm vô paha lec, dì vông xam xêmyaa vin lec lime vông vinên vihati. Dì xam o kityoo he lêm. Nge, xam xêmyaa vin lec he nôn. Xam mi vông bêge, om xam lêc vông yuac xêkizêc dì vông môp xêyaa vin lec maén i loc diluhu vô lime. ²³ Xam tu xomxo paha tiyi xochê xam yubac paha tii vac nang ge. Lêc tame o kô xam tii vac tiyi wê xam ob wib ge lêm. Nge, Anutu xolac vông xam vô paha lec, om xam obêc dô mamviha luta. Xolac tiga maviha di obêc yêp luta lêc luta. ²⁴ Ên xolac nêl bêga ên nêbê, “Xomxo vihati yang tiyi xochê pikunta, dì lê levac hixôn susu niviha wê he vông ge vihati tiyi xochê maviya. Dì pikunta obêc ngigo, dì maviya

obêc yal la. ²⁵ Lêt kiyang wê Apumtau vông ge obêc yêp luta lêt luta.”
Kiyang tige xolac niviha wê xomxo nêl kitong vô xam ge.

2

Apumtau tiyi xocbê ngidax wê maviha ge

¹ Om xam sea môp nipaên vihati yang, dì sea kiyang kityooên, di sea môp nipaên wê xam viyum vac kiyang niviha ge, di sea môp wê xam nim nyag vô xomxo ên susu wê he kô ge, di sea môp wê xam nêl kiyang nimi lec xomxo ge hixôn. ² Il xovô ên il nêbê il nuge nipwo mi byag tiyi buc vihati ên nêb ob lul. Om he mi lul dì le lig hixôn xêkizêc di vô levac. Om xam éno byag ên lul wê niviha ge i tiyi buc vihati. Lul ge Anutu kiyang nôn. Om xam kitong Anutu kiyang i tiyi buc vihati ên i ngidu xam xôn di xam le xêkizêc mi dô nimviha, dì i loc tyip lec buc wê xam obêc la dô mamviha hixôn Anutu ge. ³ Ên xam xovô ên xam nêbê xêyaa vin lecén wê Apumtau vông ge vô niviha vô xam.

⁴ Om xam lam vô Yesu. Yesu ge tiyi xocbê ngidax maviha. Lêt xomxo yê ngidax tige nipaên ên nêb tiyiên ma wê ob ngidu xumac xôn ge, om nêx i la. Lêt Anutu vinoo pyap dì yê ên nêb niviha yang. ⁵ Dì xam éno ge, xam tiyi xocbê ngidax wê maviha ge. Om xam tyuc lec ên Anutu i vilu vô xam dì vông xam tu xumac ngibua wê Myakilôhô Ngibua ob dô vac ge. Dì xam ob vông yuac wê ngibua ge dì vông xam tu xocbê daa vô Anutu. Xam vông bêge ên Anutu i xo yuac wê Yesu Kilisi vông ge dì yê daa wê xam vông ge i niviha. ⁶ Xolac nêl bêga nêbê,

“Xam ngô lê. A vinoo ngidax niviha ti. Ngidax tige niviha yang om tu ngidax levac wê ob le vac xumac xêkitu dì hôm xumac xôn mi i le xêkizêc. Om gwêbaga a tung ngidax tige dô gê Saion. Om xomxo obêc vông i vin i ge od he ni ob yoc lêm. Nge, a ob vông vông vinên wê he vông ge i vô nôn lec.”

⁷ Xolac nêl bêge, om xam xovô pyap ên xam nêbê Kilisi vông niviha vô xam wê xam vông i vin i ge. Lêt xomxo wê o vông i vin lêm ge, xolac nêl he kitong bêga ên nêbê,

“Xomxo nêx ngidax niviha tige la ên nêb nipaên, lêt gwêbaga ngidax tyo tu levac mi le vac xumac xêkitu dì hôm xumac xôn mi i le pilishi.”

⁸ Dì xolac nêl kiyang ngwe lec he wê o vông i vin lêm ge bêga ên nêbê, “Ngidax tige wê he obêc vinux vixa lec, om obêc vông he vô nipaên.”

Kiyang nêl bêge, ên he vô nimi vô Anutu kiyang, om kiyang tige wê he obêc vinux vixa lec dì vông he vô nipaên ge. Ilage Anutu nêl ên nêb obêc vông bêge vô he.

⁹ Lêt xam ge, Anutu vinoo xam pyap mi xam tu xomxo wê Anutu nêb ob viac xam ge, dì xam tu xomxo wê xam ob vông yuac vô Anutu tiyi xocbê xomxo wê si daa vô Anutu ge, dì xam tu xomxo ngibua, di xam tu xomxo wê Anutu vông ge, dì Anutu vinoo xam ên nêb xam loc nêl yuac niviha wê i vông ge kitong. Anutu tyuc xam om xam sea mapitoc dì i didii xam vô xêseac niviha wê i vông ge. ¹⁰ Ilage xam o dô tiyi xocbê Anutu nue ge lêm, lêt gwêbaga xam tu Anutu nue. Ilage Anutu o xo vigwe pisiv ên xam lêm, lêt gwêbaga Anutu xo vigwe pisiv ên xam.

Anutu nue yuac il

¹¹ Xam lige, xam dô gê kibun ga tiyi xocbê tibii vitevac wê he ob dô buc myabo tya ge. Om a nêl vô xam bê xam kol xam ên môp nipaên wê xam nilôm kidu xam ên nêb xam vông ge. Ên môp nipaên tigee wê ob vông vevac vô kiyang niviha wê yêp vac xam nilôm ge. ¹² Xam tup vô môp niviha vac tibii madiluhu mahigun, ên he obêc so ên nêbê xam vông môp nipaên ge od he obêc yê môp niviha wê xam vông ge dì xovô bê he nêl kiyang soên. Om he ob pimil Anutu vô buc timuên wê i obêc val vô he ge.

¹³ Xam tu Apumtau xe om xam xovô i dì timu vô môp vihati wê xomxo levac toto vông ge, dì loc vac he kwa ngibi. Dì gavman levac ti wê tu il badzub ge, xam ngô kiyang wê i vông ge dì timu vô. ¹⁴ Gavman nue yuac vihati yang ge, xam loc vac he kwa ngibi, ên gavman levac ti wê tu il badzub ge vông he lam vô il ên nêb he i vông myaviwen vô xomxo wê vông môp nipaên ge dì he hi i vixa pec ên xomxo wê vông môp niviha ge. ¹⁵ Anutu nêb xam loc vac he gavman kwa ngibi dì vông môp niviha. Ên xomxo wê piyôp maên ge he ya nêb ob nêl kiyang nipaên lec xam, lêc môp niviha vihati wê xam vông ge ob tung he mya xôn. ¹⁶ Xam loc dô i tiyi xocbê xomxo wê Anutu piwelac he vêl ên kalabuhu ge. Lêc o piwelac xam ên nêb xam loc vông môp nipaên lêm. Nge, piwelac xam ên nêb xam loc tu i nue yuac, om xam loc vông yuac wê i vông ge. ¹⁷ Xam vông xomxo vihati lê i vô levac dì xêmyaa i vin lec xomxo vông vinêni vihati yang, dì xam xona ên Anutu, dì vông gavman levac ti wê tu il badzub ge lê i vô levac.

Il ob timu vô Kilisi vixa di kilê viyin

¹⁸ Xam wê xam tu xomxo levac nue yuac dì vông yuac vidaaên vô he ge, xam xona nêm dì loc vac he wê viac xam ge kwa ngibi dì ngô he kiyang. Om xam loc vac he wê viac xam niviha dì lum nêl kiyang vô xam ge kwa ngibi, dì loc vac he wê viac xam nipaên ge kwa ngibi hixôn. ¹⁹ Ên xam obêc vông xam yuac niviha, lêc xomxo ob vông myavinê vô xam ge od xam xovô Anutu dì le xêkizêc dì kilê viyin wê he vông vô xam ge. Ên xam obêc vông bêge ge od Anutu ob yê xam niviha. ²⁰ Lêc xam obêc vông môp soên dì xomxo hi xam lec dì xam le xêkizêc dì kilê viyin tige ge od xam lêm ob vô levac ên wê xam kilê viyin tige lêm. Lêc xam obêc vông môp niviha, lêc xomxo hi xam lec dì xam le xêkizêc dì kilê viyin tige ge od Anutu ob yê xam ên nêb xam xomxo niviha. ²¹ Anutu tyuc xam ên nêb xam le xêkizêc vac viyin, ên Kilisi êno kilê viyin ên xam om hilung môp tige vô xam ên nêb xam timu vô i vixa. ²² Ên Kilisi o vông nipaên ti lêm dì xomxo o tulec kiyang kityooên ti lec i lêm. ²³ Dì xomxo nêl kiyang nipaên lec i, lêc Kilisi o luu kiyang nipaên ti lax vô he lêm. Dì he vông myavinê levac vô i, lêc i o vông myaviwen luu mi lax vô he lêm. Nge, vông i vin Anutu dì vông ici va la vac Anutu vigê, ên xovô ên nêbê Anutu obêc yaxêni xomxo vihati nêl kiyang dì vông niviha me nipaên vô he tiyi xocbê môp wê he vông ge. ²⁴ Kilisi vaci kô il nêd nipaên lec ici va ninivi dì yib lec xax pola ên nêb il sea môp nipaên vihati yang dì dô madviha dì timu vô môp niviha vihati. He hi Kilisi ninivi vô myavinê sea, lêc myavinê wê i vông ge vông xam vô niviha lec. ²⁵ Ilage xam la vaxvax tiyi xocbê bwoc sipsip wê xomxo ti o didii he lêm ge. Lêc gwêbaga xam pilepac xam pyap dì lôm lam timu vô Yesu wê didii xam dì viac xam tiyi xocbê xomxo ti viac bwoc sipsip ge.

3

Kiyang lec vêx yuu vux wê iima ge

¹ A nêl pyap gwêba ên a nêbê xam loc vac xomxo levac kwa ngîbi, om a ob nêl kiyang tiga vô xam vêx wê xam kô vux ge bêga bê xam loc vac liyame kiyang kwa ngibi, ên he ya obêc vông i vin Anutu kiyang lêm ge od he ob yê môp niviha wê xam mi vông ge di ob pilepac he nilô la vô Anutu. Lêc he ob pilepac nilô ên kiyang wê xam ob nêl vô he ge lêm. ² Nge, he ob yê xam dì xovô bê xam xona ên Anutu di timu vô môp niviha, om he ob pilepac nilô la vô Anutu. ³ Lêc xam vêx ge, le i lêc vông nilôm i loc vô môp vunacên i tiyi xochê xam vunac vô bamzub lihi dì nux komkom gol lec kwam di vinyum ngakwi paha ge lêm. ⁴ Nge, xam vunac vô xam nilôm möci bêga bê kiyang malehe i yêp vac xam nilôm. Ên vunacên tige ob vô nipaên lêm. Nge, obêc dô luta, di Anutu obêc yê vunacên tige nêb niviha yang. ⁵ Ilage vêx wê tu vêx ngibua wê vông nilô la diluhu vô Anutu ge, he vunac vô nilô ya vunacên tibêge di ngô liyae kiyang di la vac he kwa ngibi. ⁶ Sela êno vông môp tibêge di la vac liya Eblaham vyâ kwa ngibi di nêl vô i ên nêbê, “A nêg levac ông.” Om xam vêx ge, xam obêc timu vô môp niviha di xonaên obêc ma ge od xam ob tiyi xochê Sela nue.

⁷ A ob nêl vô xam vux wê xam ii vêx ge bêga bê xam xovô vinême di dô niviha hixôn he, ên xêkizêc wê he vông ge o tiyi wê xam vux vông ge lêm. Om xam viac he niviha. Di xam xovô bêga bê Anutu vông vizid niviha vô xam vux di vông vô vinême hixôn. Vizid tige bêga nêbê xam obêc dô mamviha luta hixôn Anutu. Om xam vux, xam dô niviha hixôn vinême ên môp nipaên ti i o lêc le vac kitaaên wê xam vông ge xôn lêm.

Il ob kilê viyin lec môp niviha wê il vông ge

⁸ A ob nêl kiyang ti hixôn bêga bê xam nilôm i yêp tibed, di xam xo vigwe pisiv ênma, di xam xêmyaa i vin lec lime vông vinên vihati, di xam viac lime vihati i niviha, di xam o yong xam vô lime lêm. ⁹ Di xam o vông nipaên vac nipaên lêm, di xomxo obêc nêl kiyang nipaên vô xam ge od le i lêc luu kiyang nipaên i loc vô he lêm. Nge, xam kitaa vô Anutu ên i vông vizid niviha vô he. Anutu tyuc xam ên nêb xam vông môp tibêge, om xam obêc vông bêge ge od Anutu ob vông vizid niviha vô xam vô buc timuên. ¹⁰ Om xam timu vô môp niviha bêgee, ên xolac nêl bêga ên nêbê, “Xomxo ti obêc nêb dô hixôn xêyaa niviha gê kibun ga di tulec niviha i tiyi buc vihati ge od i vibu mya xêkizêc di kiyang nipaên ti i o lêc tyip vac mya lêm, di i viac mya niviha di i o lêc nêl kiyang kityooen ti lêm. ¹¹ Mêd i vô nimi vô môp nipaên vihati di timu vô môp niviha, di myag môp wê ob dô ya kiyang malehe ge di timu vô. ¹² Ên Apumtau yê xomxo wê niviha ge di ngidu he xôn, di ngô kitaaen wê he kitaa vô i ge. Lêc he wê vông môp nipaên ge, Apumtau vô nimi vô he di vông myaviwen nipaên vô he.”

¹³ Xam obêc vông yuac xêkizêc di la vac môp niviha ge od letya ob vông xam vô nipaênê? ¹⁴ Lêc xam obêc vông môp niviha lêc xomxo obêc vông viyin vô xam ge od xam xêmyaa i vô niviha, di le i lêc xona ên he lêm, di xam nilôm i xo kiyang tibeac lêm. ¹⁵ Nge, xam vông nilôm i loc diluhu vô Kilisi di vông i tu xam nêm xomxo levac. Di xam viac xovôen wê xam vông ge, ên xomxo ti obêc kinêg xam lec vông vinên wê xam vông ge kehe ge od xam obêc tiyi wê xam ob nêl kitong vô he mi he xovô. Om xam wê

he tiyi xochbê he xomxo levac ge dì lum nêl kiyang malehe vô he. ¹⁶ Dì xam viac nilôm i vô paha, dì nipaên ti i o yêp vô xam lêm, ên xomxo obêc nêl nipaên vô xam ên wê xam vông i vin Kilisi dì timu vô môp niviha ge od he ni ob yoc ên kiyang nipaên wê he nêl lec xam ge. ¹⁷ Xam obêc vông môp niviha, lêc Anutu obêc tyuc lec ên nêbê xam tulec viyin ge od Anutu ob yê niviha. Ên môp tibêge luu môp wê xam tulec viyin ên môp nipaên ge vêl. ¹⁸ Ên Kilisi êno tulec viyin dì yib ên il nêd nipaên lu tibed dì obêc yib lu ngwe hixôn tii vac lêm. Kilisi ge xomxo niviha yang, lêc yib ên il wê nipaên ge ên nêb ob didii il lôm vô Anutu. Xomxo hi Yesu ninivi yib lêc i kinu dô maviha. ¹⁹⁻²⁰ Ilage vô buc wê Nôa dô maviha ge xomxo ya dô hixôn, lêc he o vông i vin Anutu kiyang lêm, om he yib mi la dô vac vigwe nipaên. Om buc timuén wê Kilisi yib ge od Kilisi kinu la nêl xolac vô xomxo yibên tigee kinu. Buc wê he gên dô maviha ge od he o vông i vin Anutu kiyang lêm. Lêc Anutu o kitya he vêl lutibed lêm. Nge, Anutu dibin he ên nêb he i pilepac nilô loc vô i. Nôa dilox sip levac ti, lêc he o pilepac he lêm. Om xomxo yuuytayed tiyi

xochbê he vigê vilu dì sec yon ge wê he la dô vac sip nilô, dì mia dung di lig, mêd he wê dô vac sip nilô ge vihati dô maviha dì ti o yib vac mia lêm. ²¹ Om môp wê Nôa dô maviha vac sip ge tixuu il lec môp wê il lipac mia ngibua ge bêga nêbê môp mia lipacén ge vô il vêl ên il nêd nipaên om il obêc dô madviha. Lêc il o lipac nidnivi ên il nêb ningeac i loc vêl lêm. Nge, mia lipacén wê il vông ge tiyi xochbê il kitaa vô Anutu ên il nêb i kitya il nêd nipaên vêl dì vông il nilôd i vô paha lec. Om wê Anutu kitya il nêd nipaên vêl ge, kehe lec wê Yesu Kilisi kidi lec maviha vac yibên ge. ²² Yesu lax mi la lag puunê dì la dô vô Anutu vigê hiyôv, om angela dì he wê kô lê levac gê lag puunê hixôn xêkizêc toto wê dô lag puunê ge vihati dô vac Kilisi kwa ngibi.

4

Il sea môp nipaên wê tibii madiluhu vông ge

¹ Kilisi kilê viyin lec ninivi om xam xovô wê i kilê viyin ge dì timu vô i vixa, ên xomxo ti obêc kô myavinê lec ninivi ge od sea môp nipaên pyap di ob timu vô i tii vac lêm. ² Mêgem buc vihati wê obêc dô kibun ga ge, od ob la vac môp wê nilô kidu i ên nêb i vông ge lêm. Nge, ob vông môp niviha vihati wê Anutu xovô ên nêb i vông ge. ³ Ilage xam la vô môp nipaên toto wê tibii madiluhu xêyaa vin lec ge dì xam vông môp nipaên luu vêl, om gwêbaga i tip loc. Môp nipaên wê xam vông ilage bêga nêbê môp yôdac vêx yuu vux, dì môp nipaên wê xam nilôm kidu xam nêb xam vông ge, dì xam num mi vô mavmav, dì xam wa yaén levac dì xam o vông mahigun vac lêm, dì xam num mia xêkizêc dì mia viac xam dì xam vông môp nipaên ya, dì xam vô nîmim vô Anutu kiyang dì yev vixam kitu vô anutu kityooén dì kitaa vô he. ⁴ Ilage xam mi vông môp nipaên tibêgee, lêc gwêbaga xam sea môp nipaên la dô xel. Om tibii madiluhu yetac ên wê xam o vông môp nipaên hixôn he lêm ge, om he nilô vô nipaên vô xam dì he nêl kiyang nipaên lec xam. ⁵ Lêc obêc buc timuén ge od he obêc la le vô Anutu manôn dì nêl môp nipaên wê he mi vông ge kehe kitong vô i dì Anutu ob yaxên he. Anutu viac i pyap ên nêb obêc yaxên xomxo vihati yang nêñ kiyang, he wê dô maviha hixôn he wê yib ge. ⁶ Vô buc wê he dô

maviha ge Anutu yaxêñ he dì he yib tiyi xocbê xomxo vihati ob yib ge. He yib pyap dêc Anutu kiyang niviha la vô he ên nêb he i ngô dì he kinu i lêc dô maviha i tiyi xocbê Anutu dô maviha ge.

Xovôñ toto wê Anutu vông vô il ge

⁷ Buc wê susu vihati yang obêc tiyôô ge vô kwabo lec. Om xam viac xam dì xovô niviha dì kitaa vô Anutu i tiyi buc vihati. ⁸ Môp xêyaa vin lecên tibed wê luu môp vihati yang ge vêl. Om xam xêmyaa i vin lec lime vihati, ên môp xêyaa vin lecén tiyi wê ob pilepac nipaêñ wê xomxo vông vô il ge vêl. ⁹ Xam lime vông vinêñ ya obêc miloc vô xam ge od xam vev ngwax vô he dì viac he niviha dì le i lêc vông hixôn nilôm yuu lêm. ¹⁰ Anutu vông xovôñ toto vô xam ên nêb xam toto vông yuac ya. Om xam vông yuac i niviha ên i ngidu xam lime xôn. Xam obêc vông bêge ge od xam ob vông xovôñ toto wê Anutu vông vô xam ge vô nôn lec. ¹¹ Om Anutu obêc vông xovôñ vô xomxo ti ên nêb i nel kiyang ge od xomxo tige i nel Anutu kiyang. Di Anutu obêc vông xovôñ vô xomxo ti ên nêb i ngidu xomxo xôn ge od xomxo tige i ngidu xomxo xôn ya xêkizêc wê Anutu vông vô i ge. Xam obêc vông Anutu yuac toto bêge ge od xomxo ob yê yuac wê xam vông ge niviha di pimil Anutu lec Yesu Kilisi lê. Xêkizêc hixôn xêseac i yêp vô i luta lêc luta. Nôn.

Il ob kilê viyin lec Kilisi lê

¹² Xam lige wê a xêgyaa vin lec xam ge, gwêbaga viyin yuu myavinê levac, tiyi xocbê ngwax myavinê nux xam ge, tulec xam ên nêb ob tixuu xam. Om le i lêc yetac ên viyin tige lêm, dì le i lêc xo dì nel bêga bê viyin tige paha ti lêm. ¹³ Nge, xam kilê viyin tiyi xocbê Kilisi kilê ge, om xam xêmyaa i niviha. Ên buc timuêñ wê Kilisi hixôn xêseac wê i vông ge obêc lam le seac ge od xam xêmyaa ob vô niviha yang. ¹⁴ Om xomxo obêc nel nipaêñ lec xam ên wê xam vông i vin Kilisi ge od xam xêmyaa i niviha, ên Anutu Myakilôhô Ngibua hixôn xêseac wê i vông ge dô hixôn xam pyap. ¹⁵ Lêc xam obêc kô myavinê ge od le i lêc kô lec wê xam hi xomxo ti yib ge lêm, me xam vun xomxo susu ge lêm, me xam vông môp nipaêñ viyang viyang ge lêm, me xam tung mammôn loc vô xomxo susu ya hixôn lêm. Nge, xam obêc kô myavinê ge od xam kô lec wê xam vông i vin Yesu ge. ¹⁶ Om xomxo ti obêc vông viyin vô xam ên wê xam vông i vin Kilisi ge od xam nim i o yoc lêm. Nge, xam pimil Anutu lec Kilisi lê. ¹⁷ Ên buc wê Anutu ob yaxêñ xomxo vihati nel kiyang ge vô kwabo lec. Di obêc yaxêñ il wê il tu i nue ge taxlee. Om Anutu obêc yaxêñ il wê il vông i vin i kiyang ge taxlee ge od ob vô bêna vô he wê pwoo i kiyang vac ge? ¹⁸ Xolac nel bêga ên nêbê,

“Xomxo vông vinêñ ob tulec viyin levac, di obêc timuêñ ge he ob la dô maviha. Di he wê pwoo Anutu kiyang vac di vông môp nipaêñ ge, he obêc la na?”

¹⁹ Xolac nel bêge, mêgem Anutu obêc tyuc lec ên nêb viyin ti i tulec xam ge od xam vông môp niviha di vông nilôm yuu nimnivi i loc vô Anutu. Ên Anutu tung il lec kibun ga di viac il niviha, di obêc sea kiyang wê hilu vô il ge lêm.

5

Xam gyovixa xam viac Anutu nue sipsip

¹ A nêb a ob nêl kiyang ti vô he gyovixa vac xam mahigun. A êno gyovixa ti, dì a xê Kilisi lec magnôn dì xê wê i kîlê viyin ge. Di obêc buc timuên ge xêseac wê Anutu vông ge obêc lam seac, mêt a hixôn xam, il xôn obêc la dô vac xêseac tige. Om a ob nêl xêkizêc vô xam gyovixa bêga bê ² xam viac Anutu nue i niviha ên he tiyi xochê bwoc sipsip wê xam ob viac ge. Lêc

xam nim obêc ma, lêc xomxo ti kidu xam vac yuac tige ge od o niviha lêm. Om xam xêmyaa i vin lec yuac gyovixa tige di xam vông yuac tyo i tiyi xochê Anutu vông vô xam ge. Dì le i lêc xo bê xam ob vông yuac gyovixa ên kô mone lec lêm. Nge, xam nilôm i kidu xam, dì xam vông yuac gyovixa tige. ³ Dì xam o lêc wê xacxam va tiyi xochê xomxo levac di wê lime wê Anutu vông vac xam vigêm ge nipaên di vông viyin vô he lêm. Nge, xam viac he niviha di didii he vac môp niviha ên he i yê di timu vô xam vixam. ⁴ Xam wê gyovixa ge, xam obêc vông yuac bêge ge od buc timuên wê Yesu Kilisi obêc vena ge od xam obêc kô xêseac wê vixôlên obêc ma ge. Yesu Kilisi ge il bazub wê viac il ge.

Il ob pilepac il di vô nipwo lec

⁵ A ob nêl vô xam ngivihi bêga bê xam loc vac gyovixa kwa ngibi di ngô he via. Di a ob nêl vô xam vêx yuu vux vihati bêga bê le i lêc kô xam lec vô xomxo lêm. Nge, xam pilepac xam mi vô nipwo lec di loc vac lime vông vinê vihati kwa ngibi, ên kiyang yêp bêga ên nêbê, "Anutu obêc vông vevac vô he wê kô he lec vô xomxo ge, di obêc vông vizid niviha vô he wê pilepac he mi vô nipwo lec ge." ⁶ Kiyang nêl bêge, mêtgem xam pilepac xam di vô nipwo lec di loc vac Anutu xêkizêc kwa ngibi, êdêc vô buc timuên wê Anutu vaci vinoor ge od i hôm xam lec di vông xam lêm i vô levac. ⁷ Anutu xo xam di viac xam, om xam vông viyin vihati wê tulec xam ge i loc vac i vigê.

⁸ Xam piyôp i yêp niviha di xam viac xam, ên Seten wê vông vevac vô xam ge la di lôm di la di lôm di myag xomxo ên nêb ob hi i tiyi xochê noo laion vô via levac ên nêb ob nga xomxo ge. ⁹ Om xam le xêkizêc ya vông vinê wê xam vông ge di vông vevac vô Seten, ên xam xovô pyap ên xam nêbê lime vông vinê vac vigwe vihati yang tulec viyin yuu myavinê tiyi xochê xam tulec ge. ¹⁰ Anutu ge vizid niviha vihati yang kehe i, di tyuc il ên nêbê il obêc la dô vac xêseac wê i vông ge luta lêc luta lec yuac wê Kilisi vông ge. Om gwêbaga xam ob kilê viyin vac buc myabo tya. Lêc viyin obêc tiyôô, di Anutu vaci obêc vông xam vô niviha lec i tii vac nang, di ngidu vông vinê wê xam vông ge xôn, di vông xam le xêkizêc. ¹¹ Xêkizêc wê Anutu vông ge ob yêp luta lêc luta. Nôn.

Pita kiyang timuên

¹² A, Pita, a nêl kiyang bo wê yêp vac kipihac tiga di Sailas kivuu ya vigê. A xê Sailas tiyi xochê a lig niviha wê vông yuac niviha ge. A kivuu kipihac tiga loc vô xam ên a nêb a ob ngidu xam xôn di nêl xêyaa vin lecên wê Anutu vông ge kitong vô xam bêga bê xêyaa vin lecên wê Anutu vông ge vixôhilôg nôn. Om xam le xêkizêc ya kiyang nôn tige. ¹³ Xomxo vông vinê Babilon wê Anutu vinoor he pyap ge, he nêl vidiiên vô xam. Di a nug

Mak êno nêl vidiiên vô xam. ¹⁴Xam vihati pul lime vông vinêñ vigê ên i nêl kitong vô he bê xam xêmyaa vin lec he.

Kiyang malehe i loc ngidu xam wê xam tu Kilisi xe ge xôn.

2 PITA

Pita kipihac wê vông yuu ge

¹ A, Saimon Pita, a ga Yesu Kilisi nu yuac dì a tu sinale ti. A kivuu kipihac tiga loc vô xam wê xam vông i vin Anutu tiyi xochê xe vông i vin ge. Môp vông vinên tige niviha. Il vông i vin lec môp niviha wê Kilisi vông ge. Yesu Kilisi ge il Anutu i wê vô il vêl ên il ned nipaén. ² Xam xovô Anutu yuu il lig Apumtau Yesu, om xam vông xovôen tige i vô levac, ên xêyaa vin lecên yuu kiyang malehe i vô levac vô xam.

Il ob vông môp wê Anutu tyuc il dì vinoo il ge i vô nôn lec

³ Anutu vông susu hixôn nôn niviha vihati vô il ya xêkizêc wê i vông ge ên nêb nôn tigee i ngidu il xôn gê kibun ga dì didii il mi la vac môp niviha wê Anutu vông ge vihati mi il timu vô. Om il kô nôn tigee vihati ya xovôen niviha wê Anutu vông vô il lec ici va ge. Anutu tyuc il ya xêseac yuu lê levac wê i vông ge ên nêb il tu i nue. ⁴ Ilage Anutu hilu kiyang tibeac vô il ên nêb ob vông nôn niviha vihati vô il ya xêseac yuu lê levac wê i vông ge. Nôn tigee niviha yang. Léc môp nipaén wê il nilôd kidu il ên nêb il vông ge yêp vô il gê kibun ga om vông il vô nipaén. Om Anutu vông kiyang wê hilu pyap ge vihati vô nôn lec vô il dì vông nôn niviha vihati vô il ên nêb he i ngidu il xôn dì il pec ên môp wê ob vông il vô nipaén ge, dì il tu xomxo niviha nôn i tiyi xochê Anutu vaci ge.

⁵ Anutu nêb il ob tu xomxo niviha i tiyi xochê i ge, mègem a ob nêl vô xam bê xam lêc vông yuac xêkizêc dì vông môp niviha vihati i yêp hixôn vông vinên wê xam vông ge, dì xam kô xovôen niviha hixôn, ⁶ dì xam viac xam ên môp wê nimniyi xovô ge, dì xam le xêkizêc vac viyin, dì xam timu vô môp wê Anutu vông ge vihati, ⁷ dì xêmyaa i vin lec lime, dì xêmyaa i vin lec xomxo vihati hixôn. ⁸ Èn xam obêc timu vô môp bêgee dì vông i vô levac ge od xovôen wê xam xovô lec il lig Apumtau Yesu Kilisi ge obêc yêp vidaaén lêm. Nge, ob vô nôn niviha vô xam, dì xam ob vông yuac niviha ya. ⁹ Léc xomxo vông vinên ti obêc vông môp tibêgee lêm ge od tiyi xochê manônc toc dì o yê vigwe lêm, ên ilage xovô wê Anutu kityia i nêb nipaén vêl ge lê, léc gwêbaga lungên môp tige nang.

¹⁰ Xam lige, Anutu tyuc xam dì vinoo xam pyap ên nêb xam tu i nue. Mègem xam vông yuac xêkizêc, ên môp wê Anutu tyuc xam dì vinoo xam ge i vô nôn lec. Èn xam obêc vông bêge ge od xam ob le xêkizêc dì susu ti ob pwoo xam pec lêm, ¹¹ dì Anutu obêc tax vuayen ên xam dì xam la vac Yesu Kilisi ben dì Anutu obêc hi vixa pec ên xam dì viac xam dô luta lêc luta. Yesu Kilisi ge il Apumtau wê vô il vêl ên il ned nipaén.

¹² Kiyang wê a nêl vô xam ge, xam ngô di vông i vin pyap, dì xam mi le xêkizêc vac kiyang nôn tige. Lêc a nêb a ob nêl kiyang tige i tii vac nang vô xam, ¹³ om tiyi buc vihati wê a dô magviha gê kibun ga ge od a ob nêl kiyang tige i tii vac vac vô xam ên xam ngô di hôm xôn pilhi. A obêc vông bêge ge od niviha, ¹⁴ ên il lig Apumtau Yesu Kilisi nêl kitong vô a om a xovô bêga ên a nêb buc wê a ob xib ge vô kwabo lec. ¹⁵ Om a nêb a ob vông yuac xêkizêc dì nêl kiyang tige i tii vac vô xam, êdêc wê a xib ge

od kiyang wê a nêl vô xam ge i yêp vac xam piyôp dì xam xovô i tiyi buc vihati.

Pita yê xêseac wê Kilisi vông ge

¹⁶ Xe nêl xêkizêc wê il lig Apumtau Yesu Kilisi vông ge kitong vô xam, dì xe nêl vô xam ên xe nêbê Yesu obêc vena i tii vac nang. Lêc xe o ngô pivulac vîdaaên ti lec Yesu mi nêl kitong vô xam lêm. Nge, xe xê Yesu lec mamnôn, dì xe xê xêseac wê i vông ge. Om xe nêl kitong vô xam. ¹⁷ Mag Anutu vông Yesu lê vô levac di vông xêseac wê i vông ge vô i. Anutu wê xêseac kehe ge vông kiyang lam vô Yesu bêga ên nêbê, “Xomxo tige a nug wê a xêgyaa vin lec i dì a xê i niviha ge.” ¹⁸ Xe dô hixôn Yesu lec kitôn ngibua om xe ngô vya tige wê lam gê lag kisiinê ge.

¹⁹ Om xe xovô bêga ên xe nêbê kiyang wê plopete vihati nêl ilage, he nêl vixôhilôg nôn. Om xam obêc hôm he kiyang tige xôn pilîhi ge, od xam ob dô niviha. Ên kiyang wê he nêl ge tiyi xochê lam wê linac vac mapitoc ge. Om xam timu vô he kiyang dì i loc tyip vô buc wê Kilisi obêc vena hixôn xêseac ge. Xêseac wê i vông ge nginoo xêseac wê lam vông ge vêl. Vô buc tige il ob xovô plopete kiyang wê he nêl ilage i yêp seac. ²⁰ Lêc taxlee ge xam xovô bêga bê xomxo ti o tiyi wê ob nêl plopete kiyang kehe kitong ya xovôên wê ici va vông ge lêm. ²¹ Ên ilage he plopete ti o nêl kiyang ya xovôên wê heche va xovô ge lêm. Nge, Myakilôhô Ngibua vông Anutu kiyang vô he lêc he nêl.

2

Môp nipaên wê plopete kityooên vông ge

¹ Ilage plopete kityooên ya kidi lec vac he Islel mahigun. Dì gwêbaga plopete kityooên ya obêc kidi lec vac xam mahigun dì kityoo xam ya xolac kityooên, dì he ob viyum kiyang nipaên vac kiyang niviha nilô, dì nêl kiyang kityooên viyang viyang wê obêc vông xomxo vô nipaên ge, dì he ob yax Apumtau wê vô he vêl ên nipaên ge vun. Om môp nipaên wê he vông ge wê Anutu obêc kitya he vêl lutibed. ² Dì he obêc didii xomxo tibeac la vac môp yôdac hixôn môp wê vaxvax ge. Om môp nipaên wê he vông ge ob vông xomxo nêl kiyang nipaên lec Anutu môp yuu kiyang nôn. ³ Plopete kityooên tigee mi vông nilô la vô mone, om he ob nêl kiyang kityooên vô xam ên nêb ob kô mone vô xam. Lêc ilage Anutu nêl mi i yêp pyap ên nêb obêc yaxê he nêl kiyang dì vông myaviwen vô he. Anutu wê obêc kitya he vêl ge o lungên he lêm. Nge, dô bin buc wê obêc vông myaviwen vô he ge.

⁴ Ilage angela ya vông môp nipaên, lêc Anutu o xo vigwe pisiv ên he lêm. Nge, tii he la vac vigwe nipaên, dì vông he la dô kalabuhu vac lôva wê mapitoc ta ge. Om he ob la dô dì i la tyip lec buc wê Anutu ob yaxê he nêl kiyang ge. ⁵ Ilage lec buc wê Nôâ dô maviha ge od xomxo vô nimi vô Anutu, lêc Anutu o xo vigwe pisiv ên he lêm. Nge, vông mia tyip vac kibun dì hi he ma vêl. Mêd Nôâ tibed wê mi nêl môp niviha kitong mi i yêp seac, om Anutu viac Nôâ dì xomxo vigê vilu dì sec yuu ge he dô maviha vô buc wê mia hi tibii ge. ⁶ Ilage Anutu yaxê môp nipaên wê tibii Sodom yuu Gomola vông ge. Om vông myaviwen vô vigwe yuu ge, dì nyuu yuuya ngwax levac dì ngwax ya yuu ma vêl, om vigwe tu viwev pileva. Anutu vông bêge ên nêb xomxo wê vô nimi vô i ge he i yê dì xovô

bê Anutu obêc vông myaviwen vô he. ⁷ Lot mi dô vac vigwe Sodom, lêc Anutu hôm Lot vêl ên ngwax wê ob ya vigwe Sodom yuu Gomola ge, ên Lot ge xomxo niviha ti. Om môp yôdac hixôn môp nipaên vihati wê tibii Sodom yuu Gomola vông ge vông Lot nilô vô viyin. ⁸ Ên Lot ge xomxo niviha wê nilô timu vô môp niviha ge, lêc dô vac he mahigun om yê môp nipaên wê he vông ge di ngô kiyang nipaên wê he nêl ge. Om vông i nilô vô viyin mabu yocêni tiyi buc vihati. ⁹ Kiyang tige wê nêl lec angela nipaên hixôn Nôa yuu Lot ge ob vông xovôen vô il bêga bê Apumtau xovô viyin wê tulec xomxo niviha ge om ici va tiyi wê ob vô he vêl ên viyin tige. Di xovô môp nipaên wê xomxo nipaên vông ge om ici va tiyi wê ob vông myaviwen vô he di i la tiyp vô buc wê obêc yaxêni xomxo vihati nêni kiyang ge. ¹⁰ Plopete kityooén obêc kô myaviwen nipaên i luu vêl, ên he mi vông môp yôdac hixôn môp ningeac vihati, di yê Anutu kiyang hixôn xomxo levac kiyang tiyi xochê kiyang pileva ge, di he mi yong he di timu vô môp wê he nilô xovô ge, di he nêl kiyang nipaên lec angela lag kisiinê di o xona lêm. ¹¹ Angela tigeetê hixôn xêkizêc wê he vông ge luu xomxo vihati vôngo vêl. Lêc angela tigeetê o luu kiyang nipaên ti lax vô plopete kityooén tigeetê lêm, di he o vông kiyang vô Apumtau lec nipaên wê xomxo tigeetê nêl lec he ge lêm.

¹² Plopete kityooén tigeetê mi timu vô môp nipaên wê ninivi vông ge, om he tiyi xochê bwoc vimen wê piyôp maên wê xomxo ob tii he di hi he yib ge. Ên he nêl kiyang nipaên vaxvax lec kiyang wê he xovôen kehe ma ge. Om môp nipaên wê he vông ge obêc vông he vô nipaên di kitya he vêl, ¹³ di he obêc kô myaviwen nipaên lec nipaên wê he vông ge. Ên he xêyaa vin lec wê he ob num di vông môp nipaên vô vidiieni wê hiyôv ge. Di he ya yaén hixôn xam, lêc he nilô vô niviha ên môp nipaên wê he mi vông ge, om he tiyi xochê do nipaên vac xam mahigun ge. ¹⁴ Di he manôn yê vêx di xo môp yôdac, di he o dô seac vêl ên môp nipaên lêm. Di he didii xomxo wê o vông i vin xêkizêc lêm ge mi la vac môp nipaên, di he vông piyôp yuu nilô la vihati vô susu kibun ga. Anutu nêl pyap ên nêbê obêc kitya he vêl. ¹⁵ Plopete kityooén tigeetê sea môp niviha di la vaxvax vac môp nipaên, di timu vô môp nipaên wê Bio nu vux Belam vông ilage. Belam xêyaa vin lec wê ob vông môp nipaên di kô mone lec. ¹⁶ Lêc bwoc donki wê Belam vông ge nêl i nêni nipaên kitong vô i. Bwoc donki o tiyi wê ob nêl kiyang ge lêm. Lêc donki tige keac vô Belam tiyi xochê xomxo keac ge di nêl Belam nêni nipaên kitong vô i. Om donki tige le vac plopete Belam nilô judajuda xôn.

¹⁷ Om plopete kityooén tigeetê vihati tiyi xochê lôva wê xomxo mi kilê mia vac lêc mia tuacêni ge, di he tiyi xochê lun mapitoc lêc lun valêni ma ge. Om Anutu viac vigwe mapitoc ta wê he obêc la dô vac ge. ¹⁸ Xomxo tigeetê kô he lec di keac via levac lec kiyang pileva wê nôn maên ge. Di he kityoo xomxo wê gên sea môp nipaên wê tibii madiluhu vông ge, di didii he lax mi la vac môp yôdac hixôn môp nipaên wê he ninivi xovô ge. ¹⁹ Xomxo kityooén tigeetê nêl bêga ên nêbê, “Xam obêc nêbê xam ob vông môp ti i tiyi wê xam xêmyaa vin lec ge od xam vông. Lêc môp tige ti o tiyi wê ob viac xam ge lêm.” He nêl bêge lê, lêc he nêl kiyang kityooén. Ên he tu xomxo yuac wê môp nipaên viac he ge. Ên môp nipaên ti obêc viac xomxo ge od xomxo tige ob tu môp nipaên tige nu yuac. ²⁰ Xomxo ob xovô il lig

Apumtau Yesu Kîlisi wê vô il vêl ên il nêd nipaên ge, di vông i vin i, di pec ên môp nipaên kibun ga wê vông he vô nipaên ge, lêc he obêc pilepac he mi lax vô môp nipaên tii vac nang di môp nipaên obêc hôm he xôn ge, od he obêc dô vac nipaên luu wê he dô vac tax ge vêl. ²¹ Ên ilage he o xovô môp niviha lêm om he dô vac nipaên. Lêc gwêbaga he xovô di vông i vin Anutu kiyang, lêc he vô nimi vô, om he ob dô vac nipaên luu wê he dô vac ilage vêl. ²² Om nipaên wê tulec he ge tiyi xochê kiyang ti wê yêp bêga ên nêbê, “Noo mi ya susu wê he mutac ge tii vac nang.” Di kiyang ngwe nêl bêga ên nêbê, “Bwoc ti wê loc hixôn ninivi niviha ge ob lax lipac i vac lôm tii vac nang.”

3

Apumtau Yesu obêc vena vixôhilôg

¹ Xam lige, ilage a kivuu kipihac ti vô xam, nang dêc gwêbaga a kivuu kipihac ngwe ga wê vông yuu ge vô xam. Lêc a kivuu kipihac yuu ge vô xam ên a nêb i tipi vô xam piyôp i yêp seac di xam xovô kiyang tiga i tii vac. ² A nêb xam xovô kiyang wê plopete ngibua nêl ilage i tii vac, ên he nêl kitong lec buc wê obêc val timuên ge. Di xam xovô xolac wê il Apumtau vông ge. Apumtau vô il vêl ên il nêd nipaên, di vông i xolac vô lime sinale di he nêl kitong vô xam mi xam ngô. Om xam ngô di xovô i tii vac.

³ Om xam lêc xovô taxlee bêga bê vô buc timuên ge od tibii ya obêc val vô xam di ob timu vô môp wê he nilô kidu he ên nêb he ob vông ge, di he ob so vya vô xam ên wê xam vông i vin Anutu ge, om he ob yax mang di nêl vô xam bêga ên nêbê, ⁴ “Yesu nêl vô xam ên nêbê obêc vena vô xam, me? Om tyo dô gê tina? Wê lê, Yesu o vena lêm. Nge, vô buc wê Anutu tung lag yuu kibun ge, di i la vô buc wê il mage buge yib ilage, di i val tyip gwêbaga hixôn, susu hixôn kiyang vihati dô tiyi xochê dô ilage di ti o pilepac lêm.” ⁵ He ob nêl kiyang tibêge vô xam, lêc he nêbê he ob xovô yuac wê Anutu vông ilage lêm. Yuac wê Anutu vông ilage bêga nêbê Anutu nêl di lag yêp di kibun val tyip vac mia nilô di yêp vac mia mahigun. ⁶ Lêc kibun o yêp bêge xuhu dia lêm. Nge, timuên ge od Anutu nêl di mia hivun kibun xôn ên wê xomxo vông nipaên ge. ⁷ Lêc lag yuu kibun wê yêp gwêbaga, Anutu nêl ên nêbê yuu ob yêp di i loc tyip lec buc wê ng wax obêc ya yuu xôn vêl ge. Vô buc tige Anutu obêc yaxên xomxo vihati nêl kiyang di obêc kitya he wê vô nimi vô i ge vêl.

⁸ Xam lige, le i lêc lungên kiyang tiga lêm. Kiyang tiga nêl bêga ên nêbê buc wê il xê ên il nêb buc myabo tya ge Anutu yê nêb buc dia tiyi xochê klismas 1,000, di buc wê il xê ên il nêb buc dia ge Anutu yê tiyi xochê buc tibed. ⁹ Om xomxo ya so ên he nêb mêd Apumtau vông yuac hiyi hiyi om kiyang wê nêb ob vena ge gên o vô nôn lec lêm. Ge he so. Ên Apumtau o vông yuac hiyi hiyi lêm. Nge, bin xomxo wê vô nimi vô i ge ên nêb he i pilepac he vêl ên nipaên wê he vông ge, ên Apumtau xo ên nêbê xomxo ti i o lêc yib mi la vac nipaên lêm.

Lag yuu kibun xôa obêc ma

¹⁰ Buc timuên wê Apumtau obêc vena lec ge, buc tige obêc val tiyi xochê xomxo yôdac ti. Ên buc tige il o xovô lêm. Vô buc tige lag obêc vô nididun levac di xôa obêc ma, di ng wax obêc ya lag yuu kibun hixôn susu vihati

ma vêl. ¹¹ Vixôhilôg nôn, Anutu obêc kitya susu lag yuu kibun vihati vêl. Om gwêbaga xam ob dô bêna? Xam vông môp ngibua i vô nôn lec vô xam di timu vô môp wê Anutu vông ge, ¹² di xam dô bin Anutu buc wê obêc val timuên ge di vông yuac xêkizêc ên buc tige i val sebseb. Vô buc tige ngwax obêc ya lag ma vêl, di susu vihati obêc didee ên ngwax levac di xôa obêc ma. ¹³ Ilage Anutu hilu kiyang pyap ên nêbê lag yuu kibun paha obêc yêp timuên, di kiyang niviha obêc hivun xôn, di nipaên ti obêc yêp hixôn lêm. Om il bin lag yuu kibun paha wê obêc val ge.

¹⁴ Xam lige, xam mi dô bin lag yuu kibun wê paha ge, om xam viac xam niviha di vông yuac xêkizêc ên Anutu i yê xam tiyi xocbê nipaên ti o yêp vô xam lêm ge di i yê xam tiyi xocbê xam dô vac kiyang malehe ge. ¹⁵ Xam xovô bêga bê Apumtau venaênen gên ma, ên dô bin xomxo vihati ên nêb he i pilepac he ên i kitya he nêni nipaên vêl. Kiyang tige tiyi xocbê kiyang wê Pol kivuu ge. Pol ge il lig wê il xêdyaa vin lec i ge. Anutu vông xovôôn vô i, ¹⁶ om i kivuu kiyang tiga vac kipihac vihati wê i kivuu ge. Kiyang wê Pol kivuu ge, kiyang ya viyin di kehe o yêp seac lêm, om vông yuac levac vô il ên wê il ob xovô kiyang wê i kivuu ge kehe. Om xomxo piyôp maên wê o le xêkizêc lêm ge, he ya pilepac xolac wê Pol kivuu ge vac di kiyang vihati wê yêp vac xolac ge hixôn. Om Anutu obêc kitya xomxo tigee vêl vô buc timuên.

¹⁷ Xam lige, xam xovô pyap ên xam nêbê xomxo tigee mi nêl kiyang kityooên di pwoo Anutu kiyang vac. Om xam viac xam ên he, gec lêc he didii xam la vac kiyang kityooên wê he nêl ge di vông xam sea vông vinêni wê xam vông ge. ¹⁸ Apumtau Yesu Kilisi vô il vêl ên il nêd nipaên. Om a nêl vô xam bêga bê xam vông xovôôn yuu xêyaa vin lecên wê Yesu vông ge i vô levac vac xam nilôm. Yesu lê i vô levac gwêbaga di i yêp luta lêc luta. Nôn.

1 JON

Kipihac taxlee wê Jon kivuu ge

Kiyang maviha kehe

¹ Xomxo ti wê kiyang maviha kehe ge, wê dô taxlee di kibun yuu susu viyang viyang ge gên ma ge, xe ob nêl i kitong vô xam, ên xe mammôn yê i di xe ngô kiyang wê nêl ge, di xe vigêm hôm lec i mi xê. ² Èn xomxo maviha kehe tige lam le seac vô xe mi xe xê di xovô, om xe nêl kitong vô xam bêga bê maviha luta dôen kehe tige dô hixôn ma Anutu lê, lêc lam le seac mi xe xê. ³ Xe xê di ngô pyap, om xe nêl kitong vô xam êno, ên xe nêb xam vông i vin di lam kituc lec xe, êdêc il vihati le tibed hixôn Mag Anutu yuu nu tuc Yesu Kilisi. ⁴ Om kiyang ga a kivuu vô xam ên a nêbê il xovô di i vông il nilôd i vô niviha lee.

Kiyang wê il ob dô vac xêseac ge

⁵ Kiyang wê xe ngô vô Yesu ge, xe nêl kitong vô xam bêga bê Anutu ge xêseac kehe di mapitoc ti o pitii lec i lêm. ⁶ Om il obêc nêbê il le kidu tibed hixôn Anutu, lêc il obêc tup vô môp mapitoc ge od il nêl kiyang kityooën di il o timu vô kiyang nôn lêm. ⁷ Lêc il obêc tup vô môp xêseac tiyi xocbê Anutu wê dô vac xêseac ge od il hixôn lige vihati, il ob dô hixôn xêdyaa vin lec maên, di Anutu nu tuc Yesu hi ob kitya il nêd nipaên vihati vêl di vông il vô paha lec.

⁸ Xame, il obêc nêbê nipaên ti o yêp vac il nilôd lêm ge od il kityoo il di kiyang nôn o yêp vac il nilôd lêm. ⁹ Lêc il obêc nêl nêd nipaên kitong seac vô Anutu ge od Anutu obêc pwoo i vya vac di sea il lêm, ên i ge niviha lee kehe, om obêc kitya il nêd nipaên vihati vêl di vông il vô paha lec. ¹⁰ Il obêc nêbê il o vông nipaên ti lêm ge, od ge tiyi xocbê il nêb Anutu ge xomxo kityooën, mêlêc il kityoo ge di Anutu kiyang ti o yêp vac il nilôd lêm.

2

Yesu ge il nêd ngidu xônên

¹ Xam nuge vông vinên, a kivuu kiyang ga vô xam ên a nêbê xam ti vôngên nipaên i ma. Lêc ti obêc vông nipaên ti ge od il nêd ngidu xônên dô wê obêc tu il madnôn di le vô Mag Anutu manôn ên il nêd nipaên ge. Ge xomxo niviha lee Yesu Kilisi mêt. ² Èn ici va yib lec il nêd nipaên ên nêb ob kitya il nêd nipaên vêl. Lêc o vông ên icil va lêm. Nge, vông ên il xomxo kibun ga vihati yang.

³ Il obêc timu vô Anutu kiyang ge od obêc vông xovôën vô il bêga bê il xovô Anutu pyap. ⁴ Lêc xomxo ti obêc nêbê i xovô Anutu pyap, lêc o vông Anutu kiyang vô nôn lec lêm ge, od ge xomxo kityooën kehe, di Anutu kiyang nôn o yêp vac i nilô lêm. ⁵⁻⁶ Èn xomxo wê timu vô Anutu kiyang ge, ge wê xêyaa vin lec Anutu vixôhilôg. Om xomxo ti obêc nêbê i dô vac Anutu nilô ge od i tup vô môp i tiyi xocbê Yesu vông ge lê, ên môp bêge wê obêc vông xovôën vô il ên nêb il dô vac Anutu nilô.

Xomxo wê xêyaa vin lec lie gee dô vac xêseac

⁷ Xam lige, kiyang wê a kivuu vô xam lec môp xêyaa vin lecên ge, ge o kiyang paha ti lêm. Nge, ge kiyang tîkwê wê val vô xam vô buc wê xam ngô Yesu xolac taxlee ge, om xam ngô pyap. ⁸ Mêlec kiyang ga, tiyi xocbê kiyang paha, ên xêseac nôn val dô gwêbaga om ob tii mapitoc la vêl. Mêd kiyang paha tiga, Yesu vông i vô nôn lec di i vô nôn vac xam nilôm gwêbaga hixôn, om il xovô ên il nêbê ge kiyang nôn vixôhilôg.

⁹ Xomxo ti obêc nêbê i dô vac xêseac, lêc nilô nipaên yêp vô lie vông vinê, ge od i gên dô vac mapitoc nilô. ¹⁰ Di xomxo ngwe wê xêyaa vin lec lie ge, dô vac xêseac nilô, di nipaên ti o le vac i nilô wê ob vông i vô nipaên ge lêm. ¹¹ Lêcom xomxo ngwe wê nilô vô nipaên vô lie ge, dô vac mapitoc nilô di la vac mapitoc di vô lung lungên môp, ên mapitoc vun manom xôn.

¹² Xam nuge, a kivuu kiyang ga vô xam, ên wê Kilisi yib om Anutu kitya xam nêm nipaên vêl ge. ¹³ Xam mage, a kivuu kiyang ga vô xam, ên xam xovô xomxo ti wê dô taxlee ilage di dô gwêbaga hixôn ge. Di xam ngivihi, a kivuu kiyang ga vô xam ên wê xam pwoo Seten hixôn i nipaên vêl ge.

¹⁴ Xam nuge, a kivuu kiyang ga vô xam ên wê xam xovô Mag Anutu ge. Di xam mage, a kivuu kiyang ga vô xam, ên xam xovô xomxo ti wê dô taxlee ilage di dô gwêbaga hixôn ge. Di xam ngivihi, a kivuu kiyang ga vô xam ên wê xam vô xêkizêc lec di Anutu kiyang yêp vac xam nilôm, om xam pwoo Seten hixôn i nipaên vêl ge.

Il xêyaa i o lêc vin lec môp yuu susu kibun ga lêm

¹⁵ Xam xêmyaa i o lêc vin lec susu yuu môp nipaên kibun ga lêm. Ên xomxo ti xêyaa obêc vin lec môp kibun ga ge od xêyaa o vin lec Mag Anutu lêm. ¹⁶ Ên môp nipaên kibun ga vihati, xochê nilô ngaên, di môp madoên, di xomxo yong he lec susu kibun ga, môp tigee ti o lam vô Mag Anutu lêm. Nge, ge môp wê xomxo kibun ga xovô ge. ¹⁷ Om kibun yuu susu kibun ga wê xomxo doma vô gee vihati xôa obêc ma, lêc xomxo wê ngô Anutu xolac mi timu vô ge wê obêc la dô luta lêc luta.

Xomxo wê vông vevac vô Kilisi gee

¹⁸ Xam nuge, gwêbaga buc myahipu vô kwabo lec. Ên xam ngô kiyang pyap ilage wê nêbê xomxo levac ti obêc val vông vevac vô Kilisi vô buc myahipu ge, mêd gwêbaga xomxo nipaên tibêgee tibeac divông vevac vô Kilisi ya kiyang kityooën, om il xovô ên il nêbê ga buc myahipu vô kwabo lec. ¹⁹ Xomxo nipaên tigee dô vac il mahigun lê, lêc sea il, ên he o il lige vông vinê lêm. Ên he obêc il lige ge od he obêc dô hixôn il. Lêc he sea il, om ge nêl he kitong seac nêbê he o il lige ya lêm.

²⁰ Lêc xam mô, Anutu vông Myakilôhô Ngibua lam dô vac xam vihati nilôm pyap, om xam xovô kiyang nôn pyap. ²¹ Om ga o tiyi xocbê xam lungên om a kivuu kiyang ga vô xam ge lêm. Nge, a kivuu kiyang ga vô xam ên wê xam xovô kiyang nôn pyap ge, di xam xovô ên xam nêbê kiyang kityooën ti o yêp vac kiyang nôn lêm.

²² Om xam xovô lê. Letya wê kiyang kityooën kehe? Ge xomxo wê nêl ên nêbê Yesu ge o Kilisi wê Anutu vông i lam ge lêm. Xomxo tibêgee wê vông vevac vô Kilisi, ên wê he vô nimi vô Mag Anutu yuu nu tuc Yesu ge. ²³ Ên xomxo wê vô nimi vô Yesu ge, ge tiyi xocbê vô nimi vô ma Anutu

êno. Dì xomxo ngwe wê vông i vin Yesu ge, od ge vông i vin ma Anutu êno.

²⁴ Kiyang wê xam ngô ilatikwê taxlee ge, xam hôm pilihi. Ên xam obêc hôm pilihi ge od xam obêc le hixôn Mag Anutu yuu nu Kilisi mi dô. ²⁵ Ên Kilisi hilu kiyang vô il pyap ên nêbê il obêc dô madviha luta lêc luta.

²⁶ Kiyang ga, a kivuu vô xam lec xomxo wê nêb ob kityoo xam ya kiyang kityooên ge. ²⁷ Lêc xam ge, Kilisi vông Myakilôhô Ngibua lam dô vac xam nilôm pyap mi dô gwêbaga. Om xam gên o lungên lêm, om xomxo paha ti o tiyi wê ob val vông xovôên vô xam ge lêm. Ên Myakilôhô Ngibua vaci mi vông xovôên vô xam lec kiyang yuu môp vihati, dì xovôên wê vông vô xam ge, o kityooên lêm. Nge, ge kiyang nôn mège. Om xam hôm Kilisi kiyang xôn pilihi mi dô i tiyi xochê Myakilôhô Ngibua nêl vô xam ge.

²⁸ Om xam nuge, gwêbaga xam hôm Kilisi kiyang xôn pilihi mi dô, êdêc buc wê Kilisi obêc lop mi lôm le seac ge od il le nidviha vô i manôn di xonaên yuu nid yocên i ma. ²⁹ Xam xovô pyap ên xam nêbê Anutu ge xomxo niviha lee, om xam ob xovô bêga bê xomxo wê vông môp niviha lee ge, ge wê tu Anutu nue.

3

Il tu Anutu nue pyap

¹ Xame, Mag Anutu xêyaa vin lec il luu vêl, om nêl nêbê i nue il, om vixôhilôg il tu i nue nôn. Lêc xomxo nipaên kibun ga lungên il, di kehe bêga bê he lungên Anutu, om lungên Anutu nue il. ² Xam lige, gwêbaga il tu Anutu nue pyap, dì buc timuên, il lungên, il obêc dô bêna? Tige gên o yêp seac vô il lêm, lêcom il xovô pyap bê buc wê Kilisi obêc lop mi lôm ge od il obêc vyac xê i, dì tu xochê ici va. ³ Om xomxo vihati wê vông i vin kiyang ga mi dô bin buc wê Kilisi ob vông i vô nôn lec ge, od he ob viac he nilô i vô niviha i tiyi xochê Kilisi nilô niviha ge.

⁴ Xomxo vihati wê vông nipaên ge, ge he pwoo Anutu kiyang vac, ên môp nipaên ge wê ob pwoo Anutu kiyang vac ge. ⁵ Dì xam xovô pyap bê Kilisi lam ên nêb ob lam kitya il ned nipaên vêl, di Kilisi ge, nipaên ti o yêp vac i nilô lêm. ⁶ Om xomxo vihati wê dô vac Kilisi nilô ge obêc vông môp nipaên lêm. Di xomxo wê vông nipaên ge, he lungên Kilisi di o xovô i lêm.

⁷ Xam nuge, xam o lêc vông i vin kiyang kityooên wê xomxo ob nêl vô xam ge lêm. Nge, xam xovô bê xomxo wê vông môp niviha ge, ge xomxo niviha tiyi xochê Kilisi ge. ⁸ Lêc xomxo wê mi vông môp nipaên ge, he tu Seten xe, ên Seten vaci vông nipaên vô buc taxlee ilage, di i lam tyip gwêbaga hixôn, om Anutu vông nu Yesu lam kibun ên nêbê i lam kitya Seten yuac vêl. ⁹ Xomxo wê Anutu nue ge obêc vông môp nipaên lêm, ên maviha wê Anutu vông ge lam le vac he nilô pyap. Om he tiyiên ma wê he ob vông nipaên ge, ên he tu Anutu nue pyap. ¹⁰ Om môp wê obêc nêl kitong vô il bê Anutu nu nae di Seten nu nae, môp bêga bê xomxo wê o vông môp niviha lêm, me xomxo wê xêyaa o vin lec lie lêm ge, ge o Anutu nue lêm.

Môp xêyaa vin lecên lie

¹¹ Kiyang wê xam ngô ilatikwê taxlee ge, kiyang bêga bê il xêdyaa i vin lecma, ¹² di il o lêc tiyi xocbê Adam nu tuc Ken ge lêm, ên Ken ge Seten nu om hi li mòn yib. Lêc

hi i yib lec kehe tina? Kehe bêga bê Ken mi vông môp nipaên di li mòn mi vông môp niviha. ¹³ Om xam lige, tibii nipaên kibun ga obêc vông vevac vô xam di yê xam nipaên ge od xam yetacê i lêc ma, ên ge o môp paha ti lêm.

¹⁴ Il xêdyaa mi vin lec lige vông vinén, om il xovô pyap ên il nêbê il sea môp mayibén di il dô vac môp maviha. Lêc xomxo wê xêyaa o vin lec lie lêm ge, gên dô vac môp mayibén. ¹⁵ Èn xomxo wê nilô vô nipaên vô lie ge tiyi xocbê xomxo wê hi xomxo ngwe yib ge. Di xam xovô pyap bê xomxo wê hi xomxo ngwe yib ge, maviha dôen kehe o yêp vac he nilô lêm. ¹⁶ Il xovô môp xêyaa vin lec maén pyap lec Kilisi môp wê xêyaa vin lec il om sea maviha wê i vông ge di yib ên nêb ob kisuu il lec ên nipaên. Mêgem il êno, il xêdyaa i vin lec lige tiyi wê il ob sea maviha wê il vông ge ên i ngidu he xôn. ¹⁷ Om xomxo susu tibeac ti obêc dô di yê li ngwe wê susu maén ge, lêc o xo vigwe pisiv ên i lêm, ge od xêyaa vin lecén wê Anutu vông ge o yêp vac i nilô lêm. ¹⁸ Om xam nuge, il xêdyaa i o lêc vin lec lige ya kiyang yuu myad pileva lêm. Nge, il xêdyaa i vin lec lige nôn di il vông i vô nôn lec.

Xomxo vông vinén le niviha vô Anutu manôn

¹⁹⁻²⁰ Mêgem il xêdyaa obêc vin lec lige tibêge ge od obêc vông xovôên vô il bê il dô vac kiyang nôn. Om il nilôd obêc so vya vô il lec il nêd nipaên ge od il obêc vông nilôd i vô viyin maén vô Anutu manôn, ên il xovô ên il nêbê Anutu ge levac luu il nilôd wê so vya vô il ge vêl di xovô i la tiyi lec myahipu. ²¹ Xam lige, il nilôd obêc so vya vô il lêm ge od il ob le niviha vô Anutu manôn di xonaên ob ma, ²² di susu vihati wê il ob kitaa vô i ge, od obêc vông vô il, ên wê il tup vô i xolac di vông môp wê i yê manôn niviha lec ge. ²³ Di i xolac bêga ên nêbê il vông i vin nu tuc Yesu Kilisi lê, di il xêdyaa i vin lecma, i tiyi xocbê xolac nêl vô il ge. ²⁴ Xomxo wê tup vô Anutu xolac ge, ge wê dô vac Anutu nilô di Anutu dô vac he nilô. Di Myakilôhô Ngibua wê Anutu vông vô il ge vông xovôên vô il ên nêbê Anutu dô vac il nilôd.

4

Kiyang nôn yuu kiyang kityooên

¹ Xam lige, plopete kityooên tibeac dô vac vigwe viyang viyang, om le i lêc vông i vin xomxo vihati kiyang wê nêl ên nêbê Myakilôhô Ngibua dô vac he nilô di vông xovôên vô he ge lêm. Nge, xam yaxêne he di xovô bê ge Anutu Myakilôhô Ngibua nôn, me ge bangwe? ² Xam ob xovô Myakilôhô Ngibua wê Anutu vông ge lec môp bêga, xomxo obêc nêl Yesu kitong bê Yesu Kilisi lam tu xomxo ge, od xam xovô bêga bê xomxo tigee, Myakilôhô Ngibua wê Anutu vông ge dô vac he nilô. ³ Lêc xomxo wê o nêl Yesu kitong bêge lêm ge, od Anutu Myakilôhô Ngibua o dô vac he nilô lêm. Nge, he kô kiyang vô xomxo kityooên kehe ti wê ob vông vevac vô Kilisi ge, ên xam ngô pyap bê kiyang kityooên tige obêc val kibun ga, om tyo val dô gwêbaga.

⁴ Xam nuge, xam ge Anutu nue, om xam pwoo plopete kityooêñ pec pyap, êñ Myakilôhô Ngibua wê dô vac xam nilôm ge xêkizêc wê i vông ge luu xêkizêc wê dô vac xomxo kibun ga nilô ge vêl. ⁵ Plopete kityooêñ tigee, ge xomxo nipaêñ kibun ga, om he mi nêl kiyang kibun pileva di xomxo kibun mi vô ninya lehe vô he kiyang. ⁶ Di il ga, il Anutu nue, om xomxo wê xovô Anutu pyap ge, ge wê ob vô ninya lehe vô il kiyang, di xomxo wê o tu Anutu nue lêm ge, ge wê ob ngô il kiyang lêm. Om môp bêge wê ob vông xovôêñ vô il bê kiyang lam vô Myakilôhô Ngibua wê kiyang nôn kehe ge, me lam vô kiyang kityooêñ kehe.

Anutu ge xêyaa vin lecêñ kehe

⁷ Xam lige, il xêdyaa i vin lecma, êñ xêyaa vin lecêñ kehe yêp vô Anutu tibed, om xomxo wê xêyaa vin lec lie ge, ge wê tu Anutu nue di xovô i niviha. ⁸ Di xomxo wê xêyaa o vin lec lie lêm ge, o xovô Anutu lêm, êñ Anutu ge xêyaa vin lecêñ kehe. ⁹ Anutu nu tuc tibed, lêc vông i lam kibun ga êñ nêb i lam vông il dô madviha, om môp tige nêl kitong vô il nêbê Anutu xêyaa vin lec il. ¹⁰ Di xêyaa vin lecêñ kehe, ge o xocbê il xêdyaa vin lec Anutu tax lêm. Nge, Anutu vaci xêyaa vin lec il tax om vông nu tuc lam kibun êñ nêb i lam kitya il nêd nipaêñ vêl. ¹¹ Xam lige, Anutu xêyaa vin lec il bêge, mêtgem il êno xêdyaa i vin lecma. ¹² Xomxo ti manôñ o yê Anutu lêm. Lécom il xêdyaa obêc vin lec lige ge, od ge tiyi xocbê Anutu vaci dô vac il nilôd, di xêyaa vin lecêñ wê Anutu vông ge vô nôn pyap vac il nilôd.

¹³ Anutu vông Myakilôhô Ngibua lam dô vac il nilôd, om vông xovôêñ vô il êñ nêbê il dô vac Anutu nilô di Anutu dô vac il nilôd. ¹⁴ Xe xê Yesu om xe nêl kitong vô xomxo vihati bêga bê Mag vông nu tuc lam kibun êñ nêb i lam vô xomxo kibun ga vêl ên he nêñ nipaêñ. ¹⁵ Om xomxo ti obêc nêl Yesu kitong bê Yesu ge Anutu nu ge od Anutu dô vac i nilô di i dô vac Anutu nilô. ¹⁶ Mêtgem il xovô di il vông i vin bê Anutu xêyaa vin lec il nôn.

Xêyaa vin lecêñ kehe yêp vô Anutu tibed, om xomxo wê dô vac môp xêyaa vin lecêñ ge, ge wê dô vac Anutu nilô di Anutu dô vac he nilô. ¹⁷ Xêyaa vin lecêñ ob vô nôn niviha vô il bêga bê buc timuêñ wê Anutu obêc yaxêñ xomxo nêñ kiyang ge, od il obêc le pilîhi di xonaêñ obêc ma, êñ gwêbaga il dô kibun ga di vông i tiyi Yesu môp wê vông ilage. ¹⁸ Môt xêyaa vin lecêñ ge, xonaêñ o yêp vac lêm. Ên môp xêyaa vin lecêñ obêc vô nôn niviha vac il nilôd ge od obêc tii xonaêñ vêl, ên xonaêñ kehe bêga bê xomxo xona ên myaviwen nipaêñ wê ob kô lec nêñ nipaêñ ge. Om xomxo ti obêc xona ge, od xêyaa vin lecêñ o vô nôn vac i nilô lêm.

¹⁹ Il xêdyaa vin lec Anutu di vin lec lige, di kehe bêga bê Anutu vaci xêyaa vin lec il tax. ²⁰ Xomxo ti obêc nêbê i xêyaa vin lec Anutu, lêc nilô vô nipaêñ vô lie ge od kityoo ge. Ên manôñ yê lie lê, lêc xêyaa o vin lec lêm, om xêyaa obêc vin lec Anutu wê manôñ yêêñ ma ge bêna? ²¹ Yesu xolac wê nêl vô il ge, bêga nêbê xomxo ti xêyaa obêc vin lec Anutu ge od xêyaa i vin lec lie êno.

¹ Xomxo vihati wê vông i vin Yesu ên nêb i Kilisi wê Anutu vông i lam ge, ge he tu Anutu nue. Dì he xêyaa obêc vin lec Mag Anutu ge od he xêyaa obêc vin lec Anutu nue hixôn. ² Om il xêdyaa obêc vin lec Anutu dì il tup vô i xolac ge od il obêc xovô bêga bê il xêdyaa vin lec Anutu nue êno. ³ Il xêdyaa obêc vin lec Anutu ge od il obêc tup vô i xolac. Dì i xolac ob vô viyin vô il lêm, ⁴ ên xomxo vihati wê tu Anutu nue ge, ge wê ob le xêkizêc dì pwoo nipaên kibun ga pec. Vông vinêr wê il vông ge, ge wê ob pwoo nipaên kibun ga pec ge? Ge xomxo wê vông i vin Yesu nêb i Anutu nu nôn ge wê obêc pwoo i pec.

Anutu nêb Yesu kitong nêb Yesu ge i nu nôn

⁶ Yesu Kilisi ge wê lam kibun mêd lam lipac mia dì lam kipyax i hi sea dì yib. Lêc o lam lipac mia pileva lêm. Nge, lipac mia dì kipyax i hi sea hixôn. Mêd Myakilôhô Ngibua ge wê mi nêl Yesu kitong vô il, ên Myakilôhô Ngibua ge kiyang nôn kehe. ⁷ Om yon wê nêl Yesu kitong nêbê Yesu ge Anutu nu ge, ⁸ Myakilôhô Ngibua yuu mia yon hi. Mêd yon ge, yon xôn nêl kiyang tibed lec Yesu. ⁹ Il mi vông i vin kiyang wê xomxo kibun ga nêl nêbê kiyang nôn ge, lêc kiyang wê Anutu nêl ge luu kiyang wê xomxo nêl ge vêl, dì kiyang wê Anutu nêl ge, ge nêl nu tuc Yesu kitong vô il. ¹⁰ Om xomxo wê vông i vin Anutu nu ge, ge wê hôm Anutu kiyang wê nêl Yesu kitong ge pilîhi vac nilô. Lêc xomxo wê o vông i vin Anutu lêm ge tiyi xocbê nêb Anutu ge kityooën, ên xomxo tige o vông i vin Anutu kiyang wê nêl Yesu kitong ge lêm. ¹¹ Kiyang wê Anutu nêl lec Yesu ge bêga nêbê Anutu ob vông il la dô madviha luta lêc luta, dì maviha dôen kehe ge nu tuc Yesu Kilisi. ¹² Om xomxo wê vông i vin Yesu dì tu i nue ge, od obêc la dô maviha luta lêc luta, lêc xomxo wê o vông i vin Yesu lêm ge od obêc la dô maviha lêm.

Il obêc dô madviha luta lêc luta

¹³ Kiyang ga vihati, a kivuu vô xam wê xam vông i vin Anutu nu ge, ên a nêbê xam xovô bê xam kô maviha luta dôen pyap, om xam obêc dô luta lêc luta. ¹⁴ Il xovô ên il nêbê il obêc kitaa susu ti vô Anutu tiyi xovôen wê Anutu vaci vôngo ge od Anutu obêc ngô. Anutu môp bêge, om il o xona ên i lêm. Nge, il ob kitaa hixôn nilôd niviha. ¹⁵ Ên il xovô ên il nêbê Anutu ob ngô kitaaén vihati wê il ob kitaa vô i ge, om il ob xovô hixôn bê susu wê il obêc kitaa vô i ge od ob vông vô il.

¹⁶ Xomxo ti obêc yé wê li ngwe vông môp nipaên ti, lêc o nipaên levac tiyi wê obêc vông li tige yib lec ge lêm ge, od xomxo wê yê ge i kitaa vô Anutu bê Anutu i pilepac li tige nêl nipaên vêl dì i dô maviha. Kiyang ga a nêl lec xomxo wê nêl nipaên o levac tiyi wê ob yib lec ge lêm. Vixôhilôg, nipaên dô wê xomxo ob yib lec ge, lêcom a o nêl bê xam kitaa lec nipaên tibêge lêm. ¹⁷ Môp soén vihati ge nipaên, lêc nipaên ya ge o tiyi wê ob vông xomxo yib lec ge lêm. Nge, tiyi wê Anutu ob kitya vêl ge.

¹⁸ Il xovô pyap ên il nêbê xomxo wê tu Anutu nue ge ob vông môp nipaên lêm, ên Yesu, Anutu nu, viac he niviha dì kisuu he lec ên nêb Seten i o lêc vông he vô nipaên lêm.

¹⁹ Il xovô pyap ên il nêbê il ga Anutu nue, dì xomxo nipaên kibun ga, he vihati dô vac Seten kwa ngibi.

20 Il xovô ên il nêbê Anutu nu tuc lam vông xovôêñ vô il ên nêb il xovô Anutu nôn. Mêd gwêbaga il dô vac Anutu yuu nu tuc Yesu Kilisi nilô. Di Anutu ge, Anutu nôn vixôhilôg dì maviha kehe wê il ob dô madviha luta lêc luta ge.

21 Om xam nuge, xam viac xam dì vô nîmim vô anutu kityooêñ.

2 JON

Jon kipihac wê vông yuu ge

¹ Ông vêx* wê Anutu vinoo ông ge, a wê gyovixa ge, a kivuu kipihac ga vô xam nume wê a xêgyaa vin lec xam hixôn nôn ge. Léc ge o aca tibed lêm. Nge, xomxo vihati wê xovô Anutu kiyang nôn ge, he xêyaa vin lec xam hixôn. ² Xe xêmyaa vin lec xam, kehe bêga bê kiyang nôn yêp vac il nilôd pyap di obêc yêp luta lêc luta. ³ Mag Anutu yuu nu tuc Yesu Kilisi ge, vizid niviha yuu xêyaa vin lecên di kiyang malehe wê yuu vông ge i hivun il xôn di il dô vac kiyang nôn yuu môt xêyaa vin lec maên.

Il xêdyaa i vin lecma

⁴ A nilôg niviha yang, ên a ngô wê ông nume mangwe timu vô xolac nôn tiyi xocbê Mag Anutu nêl vô il nêb il vông ge. ⁵ Om ông vêx ge, a nêl vô ông bê il xêdyaa i vin lecma. Ên kiyang ga o paha ti lêm. Nge, kiyang ga tikwê wê il ngô mi xovô pyap ilage. ⁶ Môt xêyaa vin lecên bêga ên nêbê il ob timu vô Anutu xolac. Di xolac wê xam ngô ilatikwê taxlee ge bêga nêbê xam timu vô môt xêyaa vin lecên.

Il viac il ên kiyang kityooên

⁷ Xomxo kityooên tibeac dô vac vigwe vihati. Xomxo tigee mi nêl ên nêbê Yesu Kilisi o lam tu xomxo lêm, om xomxo tibêgee xomxo kityooên wê he vông vevac vô Kilisi ge. ⁸ Om xam viac xam niviha êdêc yuac wê xam vông ge, nôn i o lêc loc xôa ma lêm. Nge, xam lêc kô myaviwen niviha lec timuên.

⁹ Xomxo ti obêc hôm Kilisi kiyang pilili lêm di obêc sox la vac xolac bangwe ge od o tu Anutu nu lêm. Di xomxo wê mi hôm Kilisi kiyang pilili ge, ge wê tu Mag Anutu yuu nu tuc Yesu xe. ¹⁰ Om xomxo ti obêc val vô xam ên nêb ob nêl xolac vô xam, lêc o nêl xolac tiyi wê Yesu vông ge lêm ge od xam o lêc kô i mi loc vac bom xumac lôma lêm, me xam o lêc pul i vigê mi nêl kiyang myalehe vô i lêm. ¹¹ Ên xomxo wê ob nêl kiyang myalehe vô i ge, tiyi xocbê ngidu yuac nipaên wê i vông ge xôn.

Kiyang myahipu timuên

¹² Kiyang tibeac yêp wê a ob nêl vô xam ge lê, lêc a nêb a ob kivuu lec kipihac lêm. Nge, a nêb aca va ob loc vô xam di il dô di keac lec kiyang di dô hixôn xêdyaa niviha.

¹³ Ông lim vêx wê Anutu vinoo i ge, nue nêl vidiiên vô ông.

* **1:1:** Kiyang ti wê Jon kivuu lec vêx ge, xomxo ya xo nêbê ge vêx ti nôn, di xomxo ya xo nêbê ge kiyang pilepacê wê Jon kivuu lec konglegesen ti vac vigwe Esia ge.

3 JON

Jon kipihac wê vông yon ge

¹ A lig Gaias, a wê gyovixa ge, a kivuu kiyang ga vô ông wê a xêgyaa vin lec ông hixôn nôn ge.

² Lig, a kitaa lec ông bê ông yuac vihati i vô niviha dì ôcông va dô nimviha i tiyi xocbê ông kinum dô niviha ge. ³ Èn lige vông vinên ya val vô a mi nêl ông kitong vô a nêbê Anutu kiyang nôn hivun ông xôn dì ông mi loc hixôn kiyang nôn. Mêgem a ngô kiyang wê he nêl lec ông ge dì a xêgyaa vô niviha, ⁴ ên a obêc ngô wê a nuge tup vô Anutu kiyang nôn bêge ge, od ge wê ob vông a xêgyaa vô niviha yang luu kiyang baba vêl.

Yuac niviha wê Gaias vông ge

⁵ O a lig Gaias, ông môt niviha lee yêp vac ôcông va bom, ên ông mi viac lige vông vinên niviha, dì tibii vông vinên ya obêc val vac vigwe ti lêc ông lungên he ge, od ông mi viac he niviha êno. ⁶ Mêd he val nêl ông kitong vô konglegesen ga ên nêbê ông vông môt xêyaa vin lecên niviha vô he. Om ông obêc xovô Anutu yuac wê he vông ge dì viac he ya susu wê ob ngidu he xôn vô môt ge od obêc niviha. ⁷ Èn he kô Yesu lê dì la vilee vac vigwe ya, lêc he o kô susu wê ob ngidu he xôn ge ti vô tibii madiluhu lêm. ⁸ Om yuac yêp vô icil va ên nêb il ob ngidu xomxo bêge xôn, êdêc il xôn vông yuac lec Anutu kiyang nôn.

Kiyang lec Daiotlepis yuu Demitlias

⁹ A kivuu kipihac ti mi vông i loc vô konglegesen vac ông bom, lêc Daiotlepis wê mi yong i ên nêb ob tu xam nêm levac ge nêb ob ngô a kiyang lêm. ¹⁰ Om buc wê a obêc miloc vô xam ge, od a ob nêl i môt wê mi vông ge kitong vô xam, ên xomxo tige mi nêl kiyang nipaên vaxvax lec xe. Léc o vông môt tige tibed lêm. Nge, vông môt nipaên hixôn bêga nêbê ici va nêb ob hôm xomxo vông vinên wê val vac xam bom ge lec lêm, dì lime wê nêb ob hôm xomxo tigee lec ge, Daiotlepis mi le vac he xôn dì tii he la vêl ên konglegesen.

¹¹ Om a lig Gaias, ông o lêc timu vô xomxo wê mi vông môt nipaên ge lêm. Nge, ông timu vô môt niviha. Èn xomxo wê mi vông môt niviha ge, ge wê tu Anutu xe, dì xomxo wê mi vông môt nipaên ge, he o xovô Anutu lêm. ¹² Dì lim Demitlias ge, xomxo vihati kô i lê lec, dì Demitlias timu vô kiyang nôn wê Anutu vông ge, om môt tigee nêl i kitong nêb i xomxo niviha. Dì a êno pimil i, dì ông xovô pyap ên ông nêbê kiyang wê a nêl ge, kiyang nôn vixôhilôg.

Kiyang myahipu timuén

¹³ Kiyang tibeac yêp wê a ob nêl vô ông ge lê, lêc a nêb a ob kivuu lec kipihac lêm. ¹⁴ Nge, a nêb a ob seb loc vô ông dêc u xôn keac lec.

¹⁵ Ông nilôm i dô niviha. Dì lime wê dô hixôn a ga nêb a nêl vidiién vô ông. Dì a, Jon nêb ông loc nêl vidiién vô lige wê dô hixôn ông ge.

JUT Kipihac wê Jut kivuu ge

¹ A, Jut, Yesu Kilisi nu yuac a, dì Jems ge, a lig. A kivuu kipihac ga vô xam wê Anutu tyuc xam dì xam timu vô i ge. Mag Anutu xéyaa vin lec xam dì Yesu Kilisi viac xam niviha. ² Anutu i xo vigwe pisiv ên xam, dì i vông kiyang malehe hixôn xéyaa vin lecén i hivun xam xôn dì i yêp dia.

Xomxo kityooên wê vông vevac vô Anutu xolac ge

³ Xam lige, a xo xam vinux yang ên a nêb a ob kivuu kipihac vô xam lec wê Anutu vô il vêl ên il nêd nipaên ge. Lêc gwêbaga a xo ên a nêb a ob kivuu kiyang bangwe i loc vô xam bêga bê xam hôm vông vinén wê xam vông ge xôn pilishi dì vông vevac vô xomxo wê xolac kityooên ge. Anutu vông môp vông vinén lu tibed vô il wê il tu i nue ge, dì ob vông lu ngwe tii vac nang vô il lêm. ⁴ Om a nêb a ob kivuu kiyang lec xomxo kityooên vô xam, ên he ya xôpac mi loc dô vac xam mahigun. He vô nimi vô Anutu, dì pilepac vízid wê Anutu vông ge lax lec kiyang kityooên ya ên nêb i ngidu môp nipaên wê yêp vac he nilô ge xôn. Di he yax Yesu Kilisi vun. Yesu Kilisi tibed ge wê tu il nêd xomxo levac dì i Apumtau. Mêgem ilage Anutu nêl ên nêb xomxo kityooên tige ob tulec myaviwen.

⁵ Om Anutu ob kitya xomxo kityooên tige ob kitya xomxo Islel wê vông vinén ma ilage vêl ge. Xam xovô pyap ên xam nêbê ilage Apumtau vô he Islel vêl ên vigwe Isip dì he lop mi la. Lêc timuên he ya o vông i vin lêm, om Anutu kitya he vêl. Xam xovô kiyang tiga pyap ila, lêc a nêb a ob nêl i tii vac vô xam ên xam xovô nang. ⁶ Ilage angela ya sea yuac hixôn lê levac wê Anutu vông vô he gee dì sea Anutu ben. Mêgem Anutu ku he xôn ya sen di tung he la vac vigwe mapitoc ta. Om he ob la dô di i la tyip vô buc levac wê Anutu ob yaxên he nêb kiyang ge. ⁷ Ilage he Sodom yuu Gomola hixôn he vac vigwe ya wê yêp kwabo vô vigwe levac yuu ge ninya ge, he êno vông môp nipaên. He vông môp yôdac vêx yuu vux, dì vêx vaci vông yôdac vôma, dì vux vaci vông yôdac vôma. Om Anutu vông myaviwen vô he dì ngwax wê yibê ma ge ya he ma vêl. Anutu hilung kiyang tige yêp seac vô il ên nêb il xê dì il o timu vô môp wê he vông ge lêm.

⁸ Gwêbaga xomxo kityooên wê vông môp nipaên tibêgee, he dô hixôn xam. He yê vivia bucén lec môp nipaên wê he ninivi xovô ge. He pwoo Apumtau hixôn xomxo kibun ga kiyang vac, dì he yong he vô Anutu nue angela. ⁹ Ilage angela ti lê nêbê Maikel ge yuu Seten ngaênma ên nêbê letya ob kô Moses wê yib ge ninivi. Maikel ge angela levac ti, lêc o yong i vô Seten di tii i la vêl lêm. Nge, nêl vô Seten ên nêbê, “Apumtau vaci obêc nêl kiyang xêkizêc vô ông.” ¹⁰ Mêlêc xomxo kityooên mô mi nêl kiyang nipaên lec susu wê he o xovô kehe lêm ge, dì vông môp wê heche va xovô ge tiyi xocbê bwoc vông môp wê he yê dì xovô ge. Om môp nipaên wê he nilô kidu he nêb he ob vông ge ob kitya he vêl. ¹¹ Anutu obêc vông myaviwen nipaên luu vêl vô he, ên wê he timu vô môp nipaên wê Ken vông ilage, di he vông he nilô la diluhu vô mone om he timu vô môp wê Belam vông ilage di nêl kiyang kityooên dì kô mone lec. Di he yong he

dì nêl kiyang nipaên lec Anutu tiyi xochê Kola vông vô Anutu ilage. Om Anutu ob kitya he vêl lec môp tibêgee.

¹² Buc vihati wê xam kituc yaên mi wa i yêp tibed ên wê xam xêmyaa vin lecma ge od xomxo kityooên tibêgee lam kituc lec xam di vông môp nipaên vac xam mahigun. He viac heche va di o ngidu xam xôn lêm. Om he tiyi xochê susu ningeac wê vông xam kitucmäen vô nipaên ge. Di he tiyi xochê lun mapítoc, lêc lun valén ma di lea vivêe lam la vêl. Di he tiyi xochê xax wê ob vuac nôn ge, lêc buc wê ob vuac ge od o vuac nôn lêm. Di he tiyi xochê xax wê mupac di xomxo pul vêl hixôn ngilôhô ge. ¹³ Xomxo kityooên tigee mi vông môp nipaên wê ob vông ni yoc lec ge lê, lêc he ni o yoc lêm. Om he tiyi xochê gwec wê vuac mabu mi lam kipyax myasong ningeac la kehe ge. Di he tiyi xochê pitua wê yal vêl ên lag mi lam di sea ben ge. Mêgem Anutu vông he nêng vigwe nipaên wê mapítoc ge yêp di he ob la dô vac luta.

Xomxo kityooên ob tulec myaviwen nipaên

¹⁴ Inok ge xomxo vigê vilu di sec yuu wê pum lec Adam ge,* lêc ilage Inok nêl xomxo kityooên tigee kitong ên nêbê, "Xam ngô lê. Apumtau obêc val hixôn angela wê i vông ge tibeac hiwocên, ¹⁵ ên ob vông myaviwen nipaên vô xomxo nipaên vihati. Di he wê pwoo i kiyang vac di o timu vô lêm gee, di he wê mi nêl kiyang nipaên lec Anutu gee, Anutu ob nêl he nêng nipaên kitong di he ob tulec myaviwen mabu." Inok nêl bêge ilage lec xomxo kityooên. ¹⁶ Xomxo kityooên tigee mi nêl kiyang nipaên lec Anutu, di he xêyaa vô myavinê lec môp yuu susu vihati, di he nilô kidu he ên môp nipaên wê yêp vac he nilô ge, di he mi keac vaxvax di yong he lê, di nêl kiyang hizi vô xomxo ên nêb he i vông susu ya vô he.

Xam hôm vông vinên xôn pilihu

¹⁷ Xam lige, xam ngô kiyang wê il lig Apumtau Yesu Kilisi nue sinale nêl vô xam ilage i tii vac nang, ¹⁸ ên he nêl ên he nêbê, "Obêc vô kwabo lec buc timuên myahipu ge od xomxo ya ob yax xolac wê Anutu vông ge vun di ob vô nimi vô Anutu, di he nilô ob la vô môp nipaên wê yêp vac he nilô ge." Sinale nêl bêge ilage. ¹⁹ Om xomxo nipaên tigee hibu xomxo vông vinên sea di he mi timu vô môp wê xomxo kibun ga vông. Om Myakilôhô Ngibua o dô vac he nilô lêm.

²⁰ Lêc xam lige, xam hôm vông vinên wê Anutu vông vô xam ge xôn xêkizêc ta ên i ngidu xam xôn. Di xam kitaa vô Anutu ya xêkizêc wê Myakilôhô Ngibua vông ge. ²¹ Xam hôm xêyaa vin lecên wê Anutu vông ge xôn pilihu. Di xam dô bin buc wê il lig Apumtau Yesu Kilisi obêc hilung xêyaa vin lecên wê i vông ge lam yêp seac, di ob vông xam la dô mamviha luta lêc luta. ²² Xomxo ya vông nilô la yuu lec vông vinên, om xam xo vigwe pisiv ên he di ngidu he xôn. ²³ He tiyi xochê he dô vac ngwax nipaên, om xam kô he mi lôm vêl ên ngwax lutibed. Di he ya, xam xo vigwe pisiv ên he, lêc xam xona nêm ên nipaên wê he vông ge, ên môp nipaên wê he vông ge tiyi xochê ngakwi ningeac wê he vinyum ge, om xam le teva ên môp tibêgee.

Jut pimil Anutu

* ^{1:14:} Kiyang wê nêl lec xomxo vigê vilu di sec yuu ge bêga nêbê Adam nu Set, di Set nu Inos, di Inos nu Kenan, di Kenan nu Mahalalel, di Mahalalel nu Jalet, di Jalet nu Inok, om he vigê vilu di sec yuu.

²⁴ Anutu vaci tiyi wê obêc viac xam niviha ên xam o lêc loc vac nipaên lêm. Anutu tiyi wê ob kô xam mî lam le vô i manôn vac xêseac, dì nêl vô xam bêga bê nipaên ti o yêp vô xam lêm, mêgem xam xêmyaa obêc vô niviha yang. ²⁵ Anutu tibed dô dì ici va wê vô il vél ên il nêd nipaên lec yuac wê il lig Apumtau Yesu Kilisi vông ge. Om il ob hi vixad ên Anutu wê tu il nêd xomxo levac, dì i xêkizêc kehe, di il hixôn susu vihati la vac i kwa ngibi. Anutu dô bêge ilage dì dô gwêbaga hixôn dì obêc dô luta lêc luta. Kiyang nôn.

LEVELESEN

Yesu Kilisi hilung buc wê obêc val timuên ge vô Jon

¹ Ilage kiyang wê yêp vac kipihac tiga yêp xôpacên, mêtêc Yesu Kilisi nêl kiyang tiga yêp seac ên nêb il xovô buc wê ob val timuên ge. Anutu nêl kiyang tiga kitong vô Yesu ên nêb i nêl kitong vô nue yuac, ên buc wê kiyang tyo obêc vô nôn lec ge vô kwabo lec. Om Yesu vông nue angela ti lam hilung susu hixôn kiyang wê obêc val timuên ge vô a Jon wê Anutu nu yuac a ge. ² Om a Jon, a xê pyap, om a nêb a obêc nêl Anutu kiyang tige kitong i yêp seac vô xam, dì a obêc nêl Yesu Kilisi kiyang kitong vô xam hixôn bêga nêbê kiyang tige nôn vixôhilôg.

³ Kiyang tiga nêl buc wê obêc val timuên ge kitong. Om xomxo ti obêc kitong kiyang tiga vô xomxo ge od Anutu obêc vông xomxo tige wê kitong kiyang ge xêyaa vô niviha. Dì xomxo obêc ngô kiyang tiga mi timu vô ge od Anutu obêc vông he xêyaa vô niviha êno, ên buc wê kiyang tiga obêc vô nôn lec ge val vô kwabo lec.

Jon kivuu kiyang vô konglegesen vigê vilu dì sec yuu vac vigwe levac Esia

⁴ A, Jon, a kivuu kiyang tiga vô konglegesen vigê vilu dì sec yuu vac vigwe levac Esia. Anutu wê dô mugên ilage dì dô gwêbaga di obêc dô luta lêc luta ge i vông vizid niviha i lam vô xam dì vông xam nilôm i vô malehe lec. Dì Myakilôhô Ngibua vigê vilu dì sec yuu wê dô vô Anutu sia king manôn ge, he i vông vizid niviha i lam vô xam dì vông xam nilôm i vô malehe lec. ⁵ Yesu Kilisi ge wê nêl kiyang vihati kitong yêp seac dì o yax ti vun lêm, dì i mugên wê kidi lec maviha vac yibêng ge dì nginoo king wê dô kibun ga vihati vêl dì tu he nêl xomxo levac. Om a nêb i vông vizid niviha i lam vô xam dì vông xam nilôm i vô malehe lec.

Yesu xêyaa vin lec il, om ici va hi wê kipyax sea ge kitya il nêd nipaên vêl, ⁶ dì vông il tu i nue dì ici va viac il, dì vông il tu Ma Anutu nue yuac xochê xomxo wê mi si daa ge. Xêseac yuu xêkizêc wê Yesu Kilisi vông ge i yêp luta lêc luta. Nôn.

⁷ Xam ngô lê. Kilisi obêc vena vac viyobtoc di xomxo vihati obêc yê i, di he wê tul i ya bilem di wê byêx i ya yii ge vihati ob yê i êno, di xomxo kibun ga vihati ob xo heche va di byag ên he. Vixôhilôg, kiyang ga obêc vô nôn lec. Nôn.

⁸ Apumtau Anutu wê xêkizêc kehe ge dô mugên ilage dì dô gwêbaga di obêc dô luta lêc luta, dì i nêl ên nêbê, “Aca va mugên di timuên.”

Jon yê Yesu Kilisi

⁹ A, Jon, xam lim a, di il xôn tu Yesu xe. A hixôn xam, il xôn kô myavinê di kilê viyin lec Yesu lê mi il le xêkizêc vac viyin tige, di il xôn tu Anutu nue. A nêl Anutu xolac dì a nêl wê a vông i vin Yesu ge vô xomxo, om he tii a lam dô lec vigwe kitôn tiga wê yêp vac gwec mahigun ge. Vigwe tiga lê nêbê Patmos. ¹⁰ Om a lam dô, mêtêc Apumtau buc da, di Myakilôhô Ngibua lam hivun a xôn, mêtêc a ngô vya levac ti lam vô a nimig. Vya tige tiyi xochê vuac tyuc, ¹¹ dì nêl bêga vô a ên nêbê, “A ob hilung buc wê ob val timuên ge vô ông mi ông wê di kivuu i tiyi xochê ông ob wê

ge vac kipihac dì vông i loc vô xomxo vông vinên vac vigwe vigê vilu di sec yuu ge. Vigwe tigeē lê nêbê Epesas, Smena, Pegamam, Taiatailla, Sadis, Paladelpia, dì Leodisia.”

¹² Vya tige nêl bêge, om a pilepac a ên a nêb a ob xê xomxo tyo wê nêl kiyang tige vô a ge. Om a pilepac, lêc a xê lam gol vigê vilu di sec yuu, ¹³ dì a xê xomxo ti le vac lam mahigun. Xomxo tige tiyi xocbê xomxo nu, di vinyum ngakwi dia ti, di vêx let gol ti lec yagtôv xôn, ¹⁴ di bazub lihi kwem tiyi xocbê bwoc sipsip niviluhu hixôn viyobtoc ge, di mangiluhu linac xocbê ngwax, ¹⁵ di vixa tiyi xocbê ain wê xomxo si lec ngwax mi i vô hi ge, di vya nididur levac xocbê mia levac didun, ¹⁶ di xomxo tyo hôm pitua vigê vilu di sec yuu vac vigê hiyôv, di yipac levac wê xônên manôn vilu ge yêp vac mya, di manôn linac tiyi xocbê hiyôv linac myapilihi.

¹⁷ A xê bêge, om a xona di vixog mi la xêp kibun vac i vixa kwa ngibi xocbê a xib ge. Mêlêc i vyax vigê hiyôv lec a dì nêl a ên nêbê, “Ông xonaên i ma, ên a xomxo mugên di timuên, ¹⁸ dì a dô magviha. Ilage a xib, lêc a kidi lec magviha tii vac nang. Om wê lê, a obêc dô magviha luta lêc luta, dì a kô ki wê Seten ben hixôn yibêng ge. ¹⁹ Om ông kivuu kiyang lec susu wê ông wê pyap gwêbaga di susu wê a obêc hilung vô ông timuên ge hixôn. ²⁰ Ông wê pitua vigê vilu di sec yuu wê dô vac a vigêg hiyôv ge hixôn lam gol vigê vilu di sec yuu. Susu tigae xocbê kiyang pilepacén, lêc a ob nêl kehe kitong vô ông. Lam gol vigê vilu di sec yuu ge kehe bêga ên nêbê konglegesen vigê vilu di sec yuu. Di pitua vigê vilu di sec yuu ge kehe bêga ên nêbê konglegesen vigê vilu di sec yuu ge he nêbê bazub.”

2

Kiyang la vô konglegesen Epesas

¹ Yesu nêl vô a, Jon, bêga ên nêbê, “Ông kivuu a kiyang ga i loc vô xomxo wê tu konglegesen Epesas nêbê bazub ge bêga bê a ga wê a hôm pitua vigê vilu di sec yuu vac vigêg hiyôv, di a vîlee vac lam gol vigê vilu di sec yuu gee mahigun. ² A nêl vô xam Epesas bêga bê a xovô môp vihati wê xam vông ge hixôn yuac levac wê xam vông ge, di a xovô ên a nêbê xam mi le xêkizêc vac viyin, di xam xêmyaa o vin lec xomxo nipaên lêm. Ên he kityoo ên he nêbê he êno tu sinale, lêc xam yaxên kiyang wê he vông ge pyap, om xam xovô ên xam nêbê he o sinale lêm. Nge, he xomxo kityooê. ³ A xovô ên a nêbê xam mi kilê viyin lec a lêg di le xêkizêc vac viyin tige, di xam o sea vông vinên wê xam vông ge lêm, di xam nim o ma lec yuac wê a vông ge lêm. ⁴ Lêc kiyang ti yêp bêga ên nêbê ilage wê xam vông i vin a paha ge, xam xêmyaa vin lec a nôn, lêc gwêbaga xam xêmyaa o vyac vin lec a tiyi xocbê ilage lêm. ⁵ Om xam lêc xovô môp wê xam vông vô a ilage i tii vac, di pilepac nilôm i loc vô yuac niviha wê xam vông taxlee ge. Lêc xam obêc pilepac xam lêm ge od a obêc val vô xam nêm lam gol vêl. ⁶ Lêc a xê xam môp niviha ti yêp bêga nêbê xam xêmyaa o vin lec môp nipaên wê Nikolas he nue vông ge lêm. A êno, a xêgyaa o vin lec môp tibêge lêm.

⁷ “Xam ninyam obêc yêp ge od xam ngô kiyang ga wê Myakilôhô Ngibua nêl vô xomxo vông vinên vac vigwe vihati gee. Xomxo ti obêc vông vevac vô môp nipaên mi pwoo i pec ge od a obêc lee yuu ên i yul xax nôn wê ob dô maviha ya ge mi ya. Xax tige Anutu yev i le vac vigwe paladis.”

Kiyang la vô konglegesen Smena

⁸ Nang dêc Yesu nêl vô a, Jon ên nêbê, “Ông kivuu a kiyang ga i loc vô xomxo wê tu konglegesen Smena nêñ bazub ge bêga bê a xomxo mugên dì timuén wê a xib lêc kidi lec magviha nang ge. ⁹ A nêl vô xam Smena bêga bê a xovô viyin wê tulec xam ge di a xovô ên a nêbê xam nêm susu maén, lêc Anutu vông vizid tibeac vô xam. Di a xovô kiyang nipaén wê xomxo ya nêl lec xam ge. He kityoo ên nêbê he xomxo Yuda, lêc he o xomxo Yuda lêm. Nge, he tibii wê Seten viac he ge. ¹⁰ Om le i lêc xona ên viyin wê obêc val vô xam ge lêm. Wê lê, Seten nue obêc tung xam ya la vac xumac kalabuhu ên nêb he obêc yaxê xam. Om xam obêc kilê viyin i tiyi buc vigê yuu. Lêc xam obêc kilê viyin di vông i vin xêkizêc ta di wib hixôn ge od a obêc vông nôn niviha wê maviha dôen ge vô xam.

¹¹ “Xam ninyam obêc yêp ge od xam ngô kiyang ga wê Myakilôhô Ngibua nêl vô xomxo vông vinêñ vac vigwe vihati gee. Xomxo ti obêc vông vevac vô môp nipaén mi pwoo i pec ge od yibêñ ngwe wê vông yuu ge obêc vông i vô nipaén lêm.”

Kiyang la vô konglegesen Pegamam

¹² Nang dêc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Pegamam nêñ bazub ge bêga bê a ga wê a hôm yipac levac wê xônêñ manôñ vilu vilu ge. ¹³ A nêl vô xam Pegamam bêga bê a xovô xam bom. Seten tu levac vac xam bom. Mêlêc a xovô ên a nêbê xam mi hôm a lêg xôn di vông i vin xêkizêc di xam o yax vông vinêñ wê xam vông ge vun lêm. Ilage xomxo vông vinêñ ti lê nêbê Antipas dô hixôn xam di nêl kiyang wê a vông ge vô xam di o sea kiyang wê a vông ge ti lêm. Lêc tibii hi Antipas yib vac xam mahigun vac vigwe wê Seten tu levac vac ge di xam wê. Lêc xam o sea vông vinêñ wê xam vông ge lêm. ¹⁴ Mêlêc kiyang ya yêp bêga ên nêbê xam ya mi timu vô môp nipaén wê Belam vông ilage. Belam hilung môp kityooén vô xomxo ngwe lê nêbê Belak, di Belak hilung môp nipaén tige vô xomxo Islel om he ya susu yaén wê tibii vông i tu daa vô anutu kityooén wê mayibêñ ge, di he vông môp yôdac vêx yuu vux hixôn. Lêc gwêbaga xam ya mi timu vô môp soén bêge. ¹⁵ Di xam ya mi timu vô kiyang nipaén wê Nikolas he nue nêl ge. ¹⁶ Mêgem xam pilepac nilôm i loc vô môp niviha, lêc obêc ma ge od a obêc miloc vô xam lutibed di hi he wê hôm môp nipaén xôn ge ya yipac levac wê yêp vac a myag ge.

¹⁷ “Xam ninyam obêc yêp ge od xam ngô kiyang ga wê Myakilôhô Ngibua nêl vô xomxo vông vinêñ vac vigwe vihati ge. Xomxo ti obêc vông vevac vô môp nipaén mi pwoo i pec ge od a obêc vông yaén lag puunê lê nêbê mana wê dô xôpacêñ ge vô i ên i ya, di a obêc vông ngidax kwem ti vô i di kivuu i lê paha lec ngidax tyo, di xomxo bangwe ob xovô lê paha tige lêm. Nge, xomxo ti wê lê yêp lec ngidax tige vaci obêc yê di xovô.”

Kiyang la vô konglegesen Taiataila

¹⁸ Nang dêc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Taiataila nêñ bazub ge bêga bê Anutu nu tuc a wê a magngiluhu linac tiyi xocbê ngwax ge di a vixag tiyi xocbê ain wê xomxo si lec ngwax mi i vô hi ge. ¹⁹ A nêl vô xam Taiataila bêga bê a xovô môp wê xam vông ge vihati, om a xovô môp xêyaa vin lecén hixôn môp vông vinêñ wê xam vông ge. Di a xovô ên a nêbê xam mi ngidu xomxo xôn, di

xam le xêkizêc vac viyin, dì gwêbaga xam vông yuac levac luu wê xam vông ilage vêl. ²⁰ Mélêc kiyang ti yêp vô xam bêga nêbê xam o sea vêx nipaên ti lê nêbê Jesebel ge lêm. Nge, xam vông i dô hixôn xam. Vêx tige kityoo ên nêbê i plopete ti, dì kityoo a nuge yuac mi didii he la vac môt yôdac vêx yuu vux, dì vông he ya yaén wê tibii vông i tu daa vô anutu kityooên ge. ²¹ A vông buc ya vô vêx tige ên a nêb i pilepac i, lêc vêx tige nêb ob pilepac i vêl ên môt yôdac vêx yuu vux lêm. ²² Om ngô lê, a obêc vông yidac levac vô vêx tige. Di he wê vông yôdac vô i ge, he obêc pilepac he vêl ên môt nipaên lêm ge od a obêc vông myavinê mabu vô he, ²³ dì a obêc hi vêx tyo nue yib. Mêgem xomxo vông vinê vac vigwe vihati gee ob yê mi xovô bêga bê a ga wê a yaxêن xomxo vihati piyôp yuu nilô mi xovô, dì a obêc vông nipaên me niviha vô xam toto i tiyi môt wê xam vông ge.

²⁴ “Lêc xam ya vac Taiataila ge, xam o timu vô kiyang kityooên wê Jesebel nêl ge lêm, dì xam o xovô Seten piyôp wê yêp xôpacên vac i nilô ge lêm. Om a nêl vô xam ên a nêbê a obêc vông viyin ngwe vô xam hixôn lêm, ²⁵ lêc xam hôm kiyang yuu yuac nôn xôn pilahi mi dô dì i loc tyip vô buc wê a obêc vena lec ge. ²⁶ Xomxo obêc vông vevac vô môt nipaên mi pwoo i pec dì vông a yuac dì i la tyip lec buc wê obêc yib ge od a ob vông i tu levac dì i viac xomxo vac vigwe vihati. ²⁷ Om obêc hôm xax ain dì viac he xêkizêc tiyi xochê xomxo hôm xax ain vac vigê dì hi dêg hibu sea ya ge. Yuac wê he viac ge tiyi xochê yuac wê Mag vông vô a ge. ²⁸ Di a ob vông pitua wê vigwe vidiiêng ge vô xomxo tigee.

²⁹ “Xam ninyam obêc yêp ge od xam ngô kiyang ga wê Myakilôhô Ngibua nêl vô xomxo vông vinê vac vigwe vihati gee.”

3

Kiyang la vô konglegesen Sadis

¹ Nang dêc Yesu nêl vô a, Jon, ên nêbê, “Ông kivuu a kiyang ga i loc vô xomxo wê tu konglegesen Sadis nêl bazub ge bêga bê a wê Anutu Myakilôhô Ngibua vigê vilu di sec yuu dô hixôn a, dì a hôm pitua vigê vilu di sec yuu vac vigêg.

“A nêl vô xam Sadis bêga bê a xovô xam nêm yuac. Xomxo pimil xam ên nêbê xam mi timu vô môt maviha. Lêc xam o timu vô môt tige lêm. Nge, xam timu vô môt mayibén. ² Om xam kidi lec di sea yêpén, dì vông xam yuac wê xam sea ge i yêp niviha i tii vac, ên a o xê xam yuac ti niviha vô Mag Anutu manôn lêm. ³ Ilage xam ngô kiyang tige mi xovô. Om xam xovô kiyang tige i tii vac di hôm xôn pilahi, dì pilepac xam. Lêc xam obêc kidi lec di sea yêpén mi pilepac xam lêm ge od a obêc val vô xam tiyi xochê tibii yôdac ge di xam ob xovô buc tige lêm. ⁴ Lêcom xam Sadis ya ge, xam o vông môt nipaên lêm, om tiyi xochê xam o vinyum ngakwi ningeac lêm. Om a xê xam tiyi wê xam obêc vinyum ngakwi kwem di lam dô hixôn a ge. ⁵ Xomxo ti obêc vông vevac vô môt nipaên mi pwoo i pec ge od a ob vông ngakwi kwem tibêge vô i mi i vinyum, dì a ob kitya i lê vêl ên kipihac lêm. Kipihac tige nêl xomxo wê obêc dô maviha luta gee lê. Di a ob nêl xomxo tige lê kitong i yêp seac vô Mag, dì a ob nêl i lê kitong vô Mag vông angela hixôn.

6 “Xam ninyam obêc yêp ge od xam ngô kiyang ga wê Myakilôhô Ngibua nêl vô xomxo vông vinên vac vigwe vihati gee.”

Kiyang la vô konglegesen Piladelpia

7 Nang dêc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Piladelpia nêl bazub ge bêga bê a ga, a xomxo ngibua di a kiyang nôn kehe. A kô ki wê Devit vông ge. Om a obêc tax vuayen ge od ti o tiyi wê ob tung lec ge lêm, di a obêc tung lec ge od ti o tiyi wê ob tax i tii vac ge lêm. **8** A nêl vô xam Piladelpia bêga bê a xovô xam nêm yuac, om wê lê. A vông vuayen ti le taxên vô xam mammôn, di ti o tiyi wê ob tung lec ge lêm. A xovô ên a nêbê xam nêm xêkizêc tiyiên ma, lêc xam mi timu vô kiyang wê a vông ge di xam o yax a vun lêm. **9** Om ngô lê. Seten nue nêl ên nêbê he xomxo Yuda, lêc he o xomxo Yuda lêm. Nge, he xomxo kityooên. Om a obêc vông he i loc yêp vac xam kwa ngibi ên he i xovô bê a xêgyaa vin lec xam. **10** Xam mi le xêkizêc vac viyin tiyi xochê a nêl vô xam ilage. Mêgem a obêc vô xam vêl ên viyin wê obêc val vô xam ge. Viyin tige obêc yaxê xomxo vihati wê dô kibun ga ge. **11** A obêc miloc vô xam lutibed, om xam hôm vông vinên wê xam vông ge xôn pilahi ên xomxo ti i o lêc vô nôn niviha wê Anutu vông vô xam ge vêl ên xam lêm. **12** Xomxo ti obêc vông vevac vô môp nipaên mi pwoo i pec ge od a obêc vông i le tiyi xochê xax xêkizêc wê le vac Mag Anutu xumac ngibua nilô ge, di xomxo tige ob sea xumac ngibua nilô di lam lop mi la vêl lêm, di a ob kivuu Mag Anutu lê lec i di kivuu Mag Anutu vigwe levac lê lec i hixôn. Vigwe tige, Jelusalem paha wê Mag Anutu obêc vông i lop mi lam gê lag puunê ge. Di a ob kivuu a lêg paha lec xomxo tyo hixôn.

13 “Xam ninyam obêc yêp ge od xam ngô kiyang ga wê Myakilôhô Ngibua nêl vô xomxo vông vinên vac vigwe vihati gee.”

Kiyang la vô konglegesen Leodisia

14 Nang dêc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Leodisia nêl bazub ge bêga bê kiyang nôn kehe a, di a mi nêl Anutu kiyang vihati ge yêp niviha, di a o yax ti vun lêm, di susu vihati wê Anutu tung ge a tu kehe ên. **15** A nêl vô xam Leodisia bêga bê a xovô xam nêm yuac. Xam o dô tiyi xochê mia ningigooên niviha ge lêm di xam o dô tiyi xochê mia nivinê niviha ge lêm. A nêb xam dô i tiyi xochê mia ningigooên niviha me mia nivinê niviha ge. **16** Lêc xam mi dô vac mia nivinê yuu ningigooên mahigun. Om a ob mutac xam vêl ên myag, **17** ên xam mi nêl ên xam nêbê, ‘Xe mone levac di susu tibeac, om susu ti o ma ên xe lêm.’ Xam mi nêl bêge, lêc xam dô nipaên tiyi wê xomxo ob xo vigwe pisiv ên xam ge, di xam dô tiyi xochê xomxo wê nêl susu maên ge, di xam mammôn toc di xam dô xêmtuac, lêc xam so ên xam nêb mêd xam dô nimviha. **18** Mêgem a vông xovôên vô xam bêga bê xam lam kisuu gol wê ngwax ya mi i vô paha ge vô a, ên a ob vông xam tulec vizid tibeac, di xam lam kisuu ngakwi kwem mi vinyum ên xomxo i o yê wê xam dô xêmtuac ge lêm ên ob vông ni yocên vô xam, di xam lam kisuu hizi wê xam ob lipac mammôn ya ge ên xam mammôn i seac di xam wê vigwe i tii vac. **19** Xomxo wê a xêgyaa vin lec he ge, a nêl he nêl nipaên kitong vô he di titô he. Om xam xovô môp wê xam vông ge di sea môp nipaên vihati i loc yêp xel, di pilepacxam mi vô paha lec. **20** Xam wê lê, a val le kwabo vô vuayen di a hi vigêg lec xumac di keac. Om xomxo ti obêc ngô a vyag di

lam tax xumac ge od a obêc la vac xumac lôma dì la dô hixôn i, dì xii xôn ob xa myam i yêp tibed. ²¹ Xomxo ti obêc vông vevac vô môp nipaên mi pwoo i pec ge od a obêc tyuc lec dì i dô lec sia king wê a vông ge hixôn a, tiyi xochê a vông vevac mi pwoo nipaên pec ge od a la dô lec sia king hixôn Mag Anutu.

²² “Xam ninyam obêc yêp ge om xam ngô kiyang ga wê Myakilôhô Ngibua nêl vô xomxo vông vinên vac vigwe vihati gee.”

4

He pimil Anutu gê lag puunê

¹ Kiyang wê a kivuu vô konglegesen ge tiyôô, mèdec a, Jon, a xê mag la kisiinê, lêc a xê vuayen wê le taxén gê lag puunê ge. Di vya wê a ngô taxlee tiyi xochê vuac tyuc ge, a ngô vya tige tii vac, di vya tyo nêl vô a ên nêbê, “Ông lec lam kisii ga lê, lêc a obêc hilung buc wê obêc val timuên ge vihati vô ông.” ² Mèdec lutibed Myakilôhô Ngibua lam hivun a xôn di a xê mag la sia king ti gê lag puunê dì xomxo ti dô lec. ³ Xomxo tige wê dô lec sia king ge linac xêseac tiyi xochê ngidax kwem lê nêbê jaspa hixôn ngidax hi ngwe lê nêbê konilian. Vîlub koo dì buu vô sia king tige di a xê tiyi xochê ngidax niyuu lê nêbê emelal. ⁴ Di sia 24 le i vivac vô xomxo ti wê dô lec sia king tige, di gyovixa 24 dô lec sia tigee. Di he vinyum ngakwi kwem dì tung kilung gol tiyi xochê king mi tung ge lec bazub. ⁵ Sia king tige tiyi xochê deac hixelac dì tug di vô didun levac, di ngwax tumên vigê vilu dì sec yuu tum mi le vô sia king manôn. Ngwax vigê vilu dì sec yuu gee tiyi xochê Anutu Myakilôhô Ngibua vigê vilu dì sec yuu. ⁶ Susu ti tiyi xochê gwec ge yêp vô sia king manôn, di gwec tige xêseac ta tiyi xochê deac ge.

Lili mavîha yuudiyuu buu sia king tige. Ti le vô manôn dì ti le vô nîmi dì yuu le vilu vilu. He mangiluhu tibeac dô lec he ninivi vihati, ⁷ di lili mavîha ti xochê noo laion, di ti xochê bwoc levac, di ti xochê xomxo, di ti xochê tul wê mi bôb mi la kisii ge, ⁸ di he toto ge vînihi vigê vilu dì sec ti, di he mangiluhu tibeac hivun he ninivi yuu nilô xôn, di he mi vông lilo tiyi bucêñ yuu vîldiên vihati bêga ên nêbê,

“Apumtau Anutu xêkizêc kehe ông, ông ngibua, ông ngibua, ông ngibua,
di ông dô mugêñ ilage, di dô gwêbaga, di ông obêc dô luta lêc luta.”

He nêl kiyang tibêge dì o vông mahigun vac lêm.

⁹ Anutu ge wê dô lec sia king mi dô mavîha luta lêc luta. Di lili mavîha yuudiyuu gee mi nêl Anutu xêseac kitong, di vông i lê vô levac, di pimil i. Buc vihati wê he vông bêge ge ¹⁰ od gyovixa 24 tigee la yêp kipôm manôn vac kibun vô Anutu wê dô lec sia king mi dô mavîha luta lêc luta ge di pimil i, di nêx he kilung gol la dô vô sia king manôn dì nêl ên nêbê,

¹¹ “O Apumtau, xe Anutu ông. Ông tiyi wê xomxo ob nêl xêseac wê ông vông ge kitong, di vông ông lêm i vô levac, di dô vac xêkizêc wê ông vông ge kwa ngibi, ên ông tung susu vihati ya xovôêñ wê ôcông va vông ge, mêgem susu tyoe dô gwêbaga.”

5

Jon yê kipihac ti

¹ A xê wê Anutu dô lec sia king ge, dì i hôm kipihac ti vac vigê hiyôv, léc kiyang yêp vac nilô dì yêp lec nimi hixôn. Di he vilun kipihac xôn di pitii ya tep vigê vilu dì sec yuu. ² Mêdec a xê angela xêkizêc ti keac via levac bêga ên nêbê, “Letya niviha tiyi wê ob tax tep di tidii kipihac tiga?” ³ Angela nêl bêge, léc xomxo wê dô lag puunê, dì he wê dô lec kibun, dì he wê yib dì dô vac kibun nilô gee, ti o niviha tiyi wê ob tidii kipihac tyo mi yê dì kitong ge lêm. ⁴ Di a xê wê he o tulec xomxo ti tiyi wê ob tidii kipihac mi kitong ge lêm, om vông a byag levac. ⁵ Mêdec gyovixa ti nêl vò a ên nêbê, “Le i byag lêm. Ngô lê. Xomxo ti wê xêkizêc tiyi xochê noo laion ge pum lec kehe Yuda, dì Devit ge i bu ilage. Xomxo tyo vông vevac vò môt nipaên mi pwoo i pec om tiyi wê obêc tax tep vigê vilu dì sec yuu ge vêl dì tidii kipihac tyo.”

Jon yê Yesu xochê bwoc Sipsip Nu ti

⁶ A xê Anutu sia king wê lilii maviha yuudiyuu le i buu ge, dì a xê bwoc Sipsip Nu ti le vac sia king yuu gyovixa mahigun, dì bwoc Sipsip Nu tyo tiyi xochê xomxo hi i yib ge, dì i levac vigê vilu dì sec yuu, dì mangiluhu vigê vilu dì sec yuu. Mangiluhu tige, ge Anutu Myakilôhô Ngibua vigê vilu dì sec yuu wê i vông he la vac vigwe vihati ge. ⁷ Mêdec bwoc Sipsip Nu tige la hôm kipihac wê yêp vô Anutu wê dô lec sia king ge vigê hiyôv. ⁸ Hôm kipihac pyap, mêdec lilii maviha yuudiyuu hixôn gyovixa 24 ge la yêp kipôm manôn vac kibun vô bwoc Sipsip Nu tyo. Gyovixa tigee toto hôm gita tiyi he vac vigê dì hôm pile gol vac vigê tiyi he vihati. Ngwaxlu nivivea niviha dô vac pile gol tigee mi pup lec vihati. Ngwaxlu nivivea niviha ge xomxo vông vinêñ kitaaêñ wê he mi kitaa ge. ⁹ Mêdec he gyovixa vông lilo paha ti bêga ên nêbê,

“Ông niviha tiyi wê ông ob hôm kipihac tyo di tax tep vêl ên ge. Ên xomxo hi ông wib ilage, dì ông kisuu xomxo vêl ya hi wê ông vông ge di kitya he nêñ nipaên vêl, dì vông he loc vô Anutu. Ông kisuu xomxo kehe toto, dì via toto, dì ninivî toto, dì xomxo vac vigwe toto ge hixôn, ¹⁰ dì ông vông he tu il Anutu nue yuac, dì i tu he nêñ levac, dì he ob tu xomxo levac gê kibun.”

He pimil bwoc Sipsip Nu tige

¹¹ Pyap dêc a xê mag la, dì a ngô angela tibeac via. He tibeac wê tibeac tiyi xochê tausen yuu milion ge. Di he le ngivina sia king hixôn lilii maviha yuudiyuu dì he gyovixa, ¹² dì keac via levac ên nêbê,

“Bwoc Sipsip Nu tiga wê xomxo hi i yib ge, i niviha tiyi wê ob kô lê levac hixôn susu niviha dì xovôñ yuu xêkizêc vihati, dì i tiyi wê xomxo vihati ob nêl i lê i vô levac dì nêl i xêseac kitong, dì pimil i ge.”

¹³ Mêdec a ngô xomxo hixôn susu wê Anutu tung ge vihati via, he wê dô lag puunê dì dô lec kibun dì dô vac kibun nilô dì dô vac gwec ge, he vihati nêl ên nêbê,

“Anutu wê dô lec sia king ge yuu bwoc Sipsip Nu tyo, il ob pimil yuu, dì nêl yuu lê i vô levac, dì nêl xêseac yuu xêkizêc wê yuu vông ge kitong i yêp luta lêc luta.”

¹⁴ Dì lilii maviha yuudiyuu ge nêl ên nêbê, “Nôn!” Mêdec gyovixa vihati la yêp kipôm manôn vac kibun vô yuu dì pimil yuu.

6

Bwoc Sipsip Nu tige tax tep vigê vilu di sec ti vêl ên kipihac

¹ Pyap dêc bwoc Sipsip Nu tige hôm kipihac wê tep vigê vilu di sec yuu pitii xôn ge. Nang dêc a xê wê i tax tep taxlee tip. Mêd a ngô lili mavîha yuudiyuu ge ti tyuc vya levac tiyi xochê deac tug ge di nêl ên nêbê, “Lam!” ² Di a xê mag la, lêc a xê xôhô kwem ti val, di xomxo ti dô lec di hôm vixev yuu vihol vac vigê. Mêdêc Anutu vông kilung ti vô i. Kilung tige, he mi vông vô xomxo wê vông vevac mi nginoo ge. Xomxo tige la vông vevac mi nginoo gwêbaga, di i yuac gên yêp wê ob vông vevac mi nginoo xomxo tibeac vêl.

³ Nang dêc bwoc Sipsip Nu tyo tax tep ngwe wê vông yuu ge tip. Lêc a ngô lili mavîha ti wê vông yuu ge vya wê nêl ên nêbê, “Lam!” ⁴ Mêd xôhô ngwe wê ninivi hi ge ti val, di xomxo ti dô lec. Mêdêc Anutu vông xêkizêc vô i ên nêb i kitya môp malehe vêl ên vigwe vihati ên xomxo i vông vevac vóma di hima mi yib. Om he vông yipac dia ti vô xomxo tige mi i kilê.

⁵ Nang dêc bwoc Sipsip Nu tyo tax tep ti wê vông yon ge tip. Nang di a ngô lili mavîha ti wê vông yon ge vya wê nêl ên nêbê, “Lam!” Mêdêc a xê xôhô viliac ti val, di xomxo ti dô lec di hôm skel ti vac vigê vilu, ⁶ di a ngô vya ti lam vac lili mavîha yuudiyuu gee mahigun bêga ên nêbê, “Ông yev plaua ya kap ti ên tibii i kisuu ya mone levac xochê mone kehe ti, di yev pidi ya kap lu yon ên tibii i kisuu ya mone levac xochê mone kehe ti. Lêc glis yuu mia ge mone i nipwo tyâ.”

⁷ Nang dêc bwoc Sipsip Nu tige tax tep ti wê vông yuudiyuu ge tip. Mêdêc a ngô lili mavîha ti wê vông yuudiyuu ge vya wê nêl ên nêbê, “Lam!” ⁸ Di a xê xôhô zang ti val, di xomxo ti dô lec lê nêbê Yibén, di xomxo ngwe lê nêbê Vigwe Yibén ge timu vô i mi val. Mêd Anutu vông xêkizêc vô yuu ên nêb yuu i hibu xomxo vihati i loc dô kidu yuudiyuu, lêc hi kidu ti i yib di kidu yon i dô. Om yuu hi he ya yib ya yipac wê manôn vilu vilu ge, di vông vip i den ya mi he yib, di yidac kehe toto tulec he ya di he yib, di bwoc vimen kibun ga nga he ya ma vêl.

⁹ Nang dêc bwoc Sipsip Nu tyo tax tep ti wê vông vigê vilu ge tip. Mêdêc a xê xomxo yibén kinu dô vac alta ngibi. Ilage xomxo tigee dô mavîha di hôm xolac xôn pilîhi di nêl i yêp seac, lêc tibii hi he yib. ¹⁰ Om he tyuc vya levac ên nêbê, “O Apumtau, xe king ông, ông ngibua, di kiyang nôn kehe ông. Buc vaba obêc lam la vêl di ông ob yaxêن xomxo wê kipyax xe hi sea ge nêl kiyang di vông myaviwen vô he?” ¹¹ He kinêg bêge, mêdec Anutu vông ngakwi kwem dia vô he toto di nêl vô he ên nêbê, “Xam dô seac vêl myabo lê, lêc tibii obêc hi xam lime yuac ya yib di hi xam lime ya yib hixôn, tiyi xochê he hi xam wib ilage. Di obêc la pyap ge od a ob vông myaviwen vô he lec wê he kipyax xam hi sea ge.”

¹² Nang dêc bwoc Sipsip Nu tyo tax tep ti wê vông vigê vilu di sec ti ge tip. Mêdêc a xê ngiyêg levac ti yoc, di hiyôv vô viliac tiyi xochê nivimihi viliac ge, di dentuc vô hi xochê xomxo hi ge, ¹³ di pituwa lag puunê tô mi lam kibun tiyi xochê lea liloo xax nôn wê huu ge toc mi lam kibun ge. ¹⁴ Mêd lag vilun xôn tiyi xochê guhu vilunen ge mi la xôa ma, di kitôn wê le kibun ge hixôn kitôn wê le vac gwec mahigun ge vihati, he sea ben di la. ¹⁵ Mêd king wê dô kibun ge vihati hixôn xomxo levac, di tibii vevac wê levac ge, di xomxo wê susu tibeac ge, di he wê xêkizêc ge, di he wê

tu xomxo nue yuac gee, dì he wê viac nue yuac ge, he vihati yang pec mi la xôpac vac vu madia hixôn ngidax wê yux lec kitôn vac madia ge.¹⁶ Di he tyuc la vô kitôn yuu ngidax ên nêbê, “Lam tô lec xe mi hivun xe xôn ên Anutu wê dô lec sia king ge manôn, ên yêen xe i ma, dì lam hivun xe xôn ên xêyaa myavinê wê bwoc Sipsip Nu tige vông ge,¹⁷ ên buc levac wê xêyaa myavinê wê Anutu yuu bwoc Sipsip Nu vông ge val gwêbaga, om letya tiyi wê ob le xêkizêc vac viyin tiga?”

7

Xomxo Islel 144,000 kô mak wê Anutu vông ge

¹ Pyap dêc a, Jon, a xê angela yuudiyuu wê le vô kibun myahipu yuudiyuu ge. He hôm lea xôn vac kibun myahipu yuudiyuu ên nêb lea i o lêc vivêe kibun yuu gwec me xax ti lêm. ² Angela yuudiyuu gee, Anutu vông xêkizêc vô he ên nêb he i vông kibun yuu gwec i vô nipaên. Mêdec a xê angela ba ti kidi vac viwen wê hiyôv tyip lam ge, dì i hôm Anutu wê maviha ge susu ti wê ob vông mak lec xomxo ya ge, dì i tyuc nya levac vô angela yuudiyuu gee ên nêbê, ³ “Xam o lêc vông kibun yuu gwec dì xax i vô nipaên lutibed lêm. Nge, xe obêc vông mak lec xomxo wê tu Anutu nue yuac ge manôn tax lê. Nang dêc timuên xam vông kibun yuu gwec dì xax i vô nipaên.” ⁴ Nêl bêge mêdec nêl kitong ên nêbê he ob vông mak lec xomxo Islel 144,000, dì ob vinoo he vac Islel kehe vihati. ⁵ Mêgem 12,000 pum lec kehe Yuda, dì 12,000 pum lec kehe Luben, dì 12,000 pum lec kehe Gat, ⁶ dì 12,000 pum lec kehe Asa, dì 12,000 pum lec kehe Naptalai, dì 12,000 pum lec kehe Manasa, ⁷ dì 12,000 pum lec kehe Simion, dì 12,000 pum lec kehe Livai, dì 12,000 pum lec kehe Isakal, ⁸ dì 12,000 pum lec kehe Sebyulan, dì 12,000 pum lec kehe Josep, dì 12,000 pum lec kehe Bensamin. He gee wê he kô mak wê Anutu vông ge.

Xomxo kidu levac ti pimil Anutu

⁹ Pyap dêc a xê mag la, lêc a xê xomxo tibeac kitucma mi dô, lêc he tibeac hiwocén, om o tiyi wê xomxo ti ob kitong he ge lêm. He lam vac vigwe toto, di kehe toto, di ninivi toto, di nya toto. Dì he vinyum ngakwi kwem di le vô sia king yuu bwoc Sipsip Nu tige manôn, di he vihati hôm bii lihi vac vigê, ¹⁰ di tyuc nya levac ên nêbê,

“Il nêd Anutu wê dô lec sia king ge hixôn bwoc Sipsip Nu tyo, yuu vô il vêl ên il nêd nipaên di vông il dô nidviha.”

¹¹ Mêdec angela vihati le i buu sia king yuu gyovixa dì lili maviha yuudiyuu, di he la le vô sia king manôn dì la yêp kipôm manôn vac kibun vô Anutu, di pimil i bêga ên nêbê, ¹² “Vixôhilôg nôn! Il obêc hi vixad ên il Anutu, di nêl xêseac wê i vông ge i yêp seac. Anutu tu xovôên nivîha vihati kehe, di il pimil i, di yong i lê i vô levac. Xêkizêc vihati ge yêp vô i, di xêkizêc vihati yang ge tu ici va xe di obêc yêp luta xel. Nôn.”

¹³ Mêdec gyovixa ti kinêg vô a ên nêbê, “Xomxo tigae wê vinyum ngakwi kwem gee, he letyae, di he lam gê na?” ¹⁴ Om a luu i nya bêga ên a nêbê, “Xomxo levac, a lungén di ôcông va xovô pyap.” Mêdec gyovixa tyo nêl vô a ên nêbê, “Xomxo tigae wê tibii vông myavinê levac vô he ên wê he vông i vin ge, om tiyi xocbê bwoc Sipsip Nu lipac ngakwi wê he vông ge vô paha ya i hi. ¹⁵ Mêgem he le vô Anutu wê dô lec sia king ge manôn, di pimil i vac xumac ngibua tiyi bucênu yuu vidiiêñ vihati, di Anutu vaci wê

dô lec sia king ge obêc dô hixôn he dî viac he. ¹⁶ Om vip ti ob den he lêm, dî mia ob ma ên he lêm, dî hiyôv ob ya he lêm, dî susu ti obêc vô myavinê vô he ninivi lêm, ¹⁷ ên bwoc Sipsip Nu tige wê dô lec sia king ge obêc tu he nêñ xomxo wê ob viac he dî didii he mî he la num mia maviha luta dôen ge, dî Anutu obêc kitya he maluc vêl ên he manôn, dî he ob byag i tii vac lêm.”

8

Bwoc Sipsip Nu tige tax tep ti wê vông vigê vilu di sec yuu ge tip

¹ Nang dêc bwoc Sipsip Nu tige tax tep ti wê vông vigê vilu di sec yuu ge tip, om vigwe kisii ganê yêp didun maêñ tiyi xocbê hiyôv manôn vilubed. ² Dî a xê angela vigê vilu di sec yuu wê mi le vô Anutu manôn ge, dî he hôm vuac vigê vilu di sec yuu vac vigê.

³ Mêdec angela ti kô pile gol dî la le vô alta, di Anutu vông susu nivivea niviha tibeac vô i ên nêb i kituc susu nivivea tyoe hixôn xomxo vông vinên nêñ kitaaêñ, dî la tung vihati xochbê daa lec alta gol wê le vô Anutu manôn ge. ⁴ Mêdec susu nivivea lu hixôn xomxo vông vinên nêñ kitaaêñ lec vac pile wê angela hôm vac vigê ge dî la vô Anutu. ⁵ Mêdec angela tyo hôm pile gol tige dî tung ngwax wê dô lec alta ge vac pile mî i pup lec, dî nêx i la lec kibun, mêdec deac tug, dî vigwe vô nididun, dî deac hixelac, dî ngiyêg yoc.

Angela yuudiyuu vê vuac

⁶ Nang dêc angela vigê vilu di sec yuu wê kô vuac vigê vilu di sec yuu gee viac he ên nêb he ob vê vuac tyoe.

⁷ Mêgem angela ti wê le mugêñ ge vê i vuac taxlee. Dî Anutu vông yôg vac kibun hixôn xax vihati la kidu yon. Mêdec ais yuu ngwax hixôn hi tô mi la kibun dî ya kibun hixôn xax kidu ti ma vêl, dî kidu yuu yêp niviha. Dî ngwax tige ya nita wê paha ge vihati ma vêl.

⁸ Nang dêc angela ngwe wê vông yuu ge vê vuac wê i vông ge. Mêdec Anutu nêx susu levac ti xocbê kitôn wê ngwax tum lec ge la tô vac gwec, dî vông yôg vac gwec la kidu yon, lêc kidu ti vô hi xocbê xomxo hi ge, dî kidu yuu yêp niviha, ⁹ dî Anutu hibu lili maviha wê dô vac gwec ge la kidu yon, lêc kidu ti yib mîma vêl, di kidu yuu dô maviha, dî he hibu sip la kidu yon dî kidu ti vô nipaêñ, dî kidu yuu le niviha.

¹⁰ Nang dêc angela ti wê vông yon ge vê i vuac. Anutu hi mia tip la bo yon. Mêdec pitua levac ti wê tum xocbê ngwax ge lam gê lag puunê dî tô mi la kibun vac mia bo ti, dî bo yuu yêp niviha, dî pitua tige tô mi la vac mia wê yêp vac lôva ge vihati. ¹¹ Pitua tyo lê nêbê kilin xocbê pixoho. Om vông mia kidu ti vô kilin, lêc kidu yuu dô niviha. Xomxo tibeac num mia kilin tige dî yib mîma vêl.

¹² Nang dêc angela ti wê vông yuudiyuu ge vê i vuac. Anutu vông yôg vac hiyôv yuu dentuc dî pitua la kidu yonyon. Mêdec hiyôv yuu dentuc dî pitua, kidu titi linacêñ ma, dî kidu yuuyuu linac. Mêgem vô vidiiêñ yuu hucêñ ge, hiyôv kityê ti vô mapitoc ta, dî kityê yuu linac. Dî vô bucêñ ge dentuc yuu pitua kidu titi linacêñ ma, dî kidu yuuyuu linac.

¹³ Nang dêc a xê tul ti bôb mi la kisii ganê, di a ngô menac tige tyuc vya xekizêc bêga ên nêbê, “Axi! Axi! Axi! Angela yon gên dô, om yon obêc

vê yon vuac ge od viyin levac mabu obêc val vô vêx yuu vux vihati wê dô kibun ge."

9

Angela ti wê vông vigê vilu ge vê vuac

¹ Nang dêc angela ti wê vông vigê vilu ge vê i vuac. Mêd a xê pitua ti hoo gê lag puunê dì la kibun, dì Anutu vông ki wê ob tax madia wê mapitoc ta ge vô pitua tige. ² Om tyo tax madia tyo, dì ngwaxlu levac xochê ngwax ya yuac ge lam tyip vac, dì hîvun hiyôv yuu lag xôn dì vigwe vô mapitoc ta. ³ Mêdêc hiveac tibeac lam vac ngwaxlu tige dì lam la lec kibun. He kô xêkizêc tiyi xochê kipyêc wê dô kibun ge. ⁴ Mêdêc kiyang la vô hiveac bêga ên nêbê, "Xam o lêc vông nita yuu xax hixôn susu wê tyip lec kibun ge i vô nipaén lêm. Nge, xam loc vô xomxo wê Anutu mak o yêp lec he manôn lêm ge, di xam loc vông he i vô nipaén. ⁵ Om xam loc vông myavinê mabu vô he i tiyi dentuc vigê vilu, lêc le i lêc hi he i yib lêm." Kiyang nêl bêge, dì myavinê wê hiveac vông vô xomxo ge tiyi xochê myavinê wê kipyêc

ving xomxo ge. ⁶ Vô buc tigee xomxo ob myag môp wê he ob yib lec ge, lêc he ob yêvô môp ti lêm, dì he xêyaa ob vin lec nêb he ob yib, lêc he ob yib lêm.

⁷ Hiveac tigee, he tiyi xochê xôhô wê xomxo viac pyap nêb ob la vevac ge. Susu ti xochê kilung gol ge dô lec he bazub, di manôn tiyi xochê xomxo manôn ge, ⁸ di bazub lihi dia xochê tibii vêx bazub lihi ge, dì nivu tiyi xochê noo laion nivu ge, ⁹ dì nibu tiyi xochê ngakwi ain, dì he vinihi vô nididun levac tiyi xochê pêt nipwo tibeac wê xomxo dô lec dì xôhô didi mi la vevac ge. ¹⁰ Di he xêxuhu tiyi xochê kipyêc xêxuhu ge di mya kîlin wê ob ving xomxo ya ge dô vac he xêxuhu. Om xêkizêc wê he vông ge kehe yêp vac he xêxuhu, om ob vông myavinê vô xomxo tiyi dentuc vigê vilu. ¹¹ Angela tige wê viac madia mapitoc ta ge tu hiveac tigee nêng king. Vac Hiblu vyva angela tyo lê nêbê Abadon, dì vac Glik vyva lê nêbê Apolion. Lê tige kehe bêga ên nêbê xomxo ti wê ob kitya susu hixôn xomxo vêl ge.

¹² Mêgem viyin wê mugên wê hiveac vông ge tiyôô. Om wê lê, viyin yuu obêc val timuên hixôn.

Angela ti wê vông vigê vilu di sec ti ge vê i vuac

¹³ Nang dì angela ti wê vông vigê vilu di sec ti ge vê i vuac. Mêd a ngô vyva ti lam vac alta gol levac dia yuudiyuu. Alta tige le vô Anutu manôn.

¹⁴ Vyva tyo nêl vô angela ti wê vông vigê vilu di sec ti wê hôm vuac ge ên nêbê, "Piwelac angela yuudiyuu wê he ku xôn vac mia levac Ypletis ge di vông he loc." ¹⁵ Om angela tige piwelac he yuudiyuu gee, dì vông he la ên nêb he i loc hibu xomxo vihati ge i loc kidu yon, dì he i hi kidu ti i yib, dì kidu yuu i dô mavîha. Ilage angela tyoe viac he pyap dì he dibin klismas di dentuc di buc hixôn hiyôv manôn wê he ob vông vevac lec ge. ¹⁶ Om he didiue vevac wê dô lêc xôhô ge mi la. Xomxo vevac tigee tibeac hiwocên tiyi xochê 200 milion ge, dì a ngô wê he nêl he naba tibêge. ¹⁷ Di a xê xochê a xê vivia, lêc xomxo vevac tigee dô lec xôhô. Xomxo tigee vinyum ngakwi ain lec pikopac xôn dì ngakwi tigee manôn hi yuu niyuu dì zang, dì xôhô wê he dô lec ge bazub tiyi xochê noo laion ge, dì ngwax yuu ngwaxlu yon ngidax salpa wê ngwax tum vac ge, yon xôn lam vilup

vac xôhô mya mi la. ¹⁸ He hi xomxo kidu ti yib ya susu nipaên yon ge, di kidu yuu dô maviha. He hi xomxo ya ngwax yuu ngwaxlu yon ngidax salpa wê lam vac xôhô mya ge. ¹⁹ Xêkizêc wê xôhô vông ge yêp vac he mya yuu xêxuhu. He xêxuhu tiyi xocbê myel lêc bazub le lec, di he mi vông vevac ya xêxuhu yuu bazub.

²⁰ Om susu nipaên yon ge hi xomxo ya yib. Lêc he wê gên dô maviha ge, he o pilepac he ên môp nipaên wê he vigê mi vông ge lêm, di he o sea môp wê he mi kitaa vô vimwo nipaên di kitaa vô anutu kityooên kinu ge lêm. Kinu tigee wê he vông ya gol di silva di ain di ngidax di sev ya xax, om kinu tigee o tiyi wê ob yê vigwe di ngô kiyang di la vac vigwe ya ge lêm. ²¹ Di xomxo tigee mi hi xomxo yib di vông môp yevac di môp yôdac vêx yuu vux, di vông yôdac vô xomxo susu. Lêc he o pilepac he di vô nimi vô môp nipaên tibêgee lêm.

10

Angela vông kipihac nipwo ti vô Jon mi i ya

¹ Pyap dêc a xê angela xêkizêc ti lop mi lam gê lag puunê, lêc viyobtoc hivun i xôn, di vilub koo mi yêp lec bazub kisii, di manôn linac xocbê hiyôv ge, di vixa yuu xôn tiyi xocbê teac di ngwax tum lec. ² Di i hôm kipihac nipwo wê tidii pyap ge ti vac vigê, di lax vixa vilu hiyôv la vac gwec, di lax vixa vilu kêt la lec kibun kisii, ³ di i tyuc vya levac tiyi xocbê noo laion vô vya ge. Tyuc pyap di deac vigê vilu di sec yuu gee tug di nêl kiyang. ⁴ Deac vigê vilu di sec yuu gee tug di nêl kiyang pyap, om a nêb a ob kivuu kiyang wê he nêl ge, mêtêc a ngô vya ti lam gê lag puunê bêga ên nêbê, “Le i lêc kivuu kiyang wê he deac vigê vilu di sec yuu gee tug di nêl ge lêm. Nge, i yêp xôpacên vac ôcông va piyôp.”

⁵ Mêtêc angela ti wê a xê pyap wê vixa vilu le vac gwec di vilu le lec kibun ge, angela tyo hilung vigê hiyôv la kisii ⁶ ên nêb ob nêl kiyang vixôhilôg nôn lec Anutu wê dô maviha luta lêc luta ge lê. Anutu tung lag hixôn susu wê dô vac ge, di tung kibun hixôn susu wê dô lec ge, di tung gwec hixôn susu wê dô vac ge. Om angela tyo nêl bêga ên nêbê, “Buc val pyap, om Anutu obêc bin buc ngwe hixôn lêm. ⁷ Nge, angela ti wê vông vigê vilu di sec yuu ge obêc vê i vuac ge od Anutu obêc vông kiyang xôpacên wê vông vô nue yuac plopete mi he nêl mi i yêp seac ilage vô nôn lec.”

⁸ Angela nêl bêge, mêtêc vya ti wê lam gê lag puunê mi a ngô ilage nêl vô a tii vac ên nêbê, “Loc hôm kipihac nipwo ti wê tidii pyap mi yêp vac angela vigê ge vêl. Angela tige wê vixa vilu le vac gwec di vilu le lec kibun.” ⁹ Om a la vô angela tyo mi la nêl vô i ên a nêbê, “Vông kipihac tiga vô a.” Om i nêl vô a ên nêbê, “Hôm kipihac tiga mi loc wa. Di ob vô nyen vac ông myam tiyi xocbê vinoluc ge di ob la dô vac xêmyaa di obêc kilin.” ¹⁰ Mêtêc a kô kipihac nipwo tige vac angela tyo vigê di xa i ma vêl, di kipihac vô nyen vac a myag, di a ngôn i la lê, lêc tyo la vô kilin levac vac a xêgyaa. ¹¹ Mêtêc angela tyo nêl vô a ên nêbê, “Loc nêl Anutu kiyang i tii vac lec buc yuu susu vihati wê obêc val timuên vô xomxo vac vigwe tibeac, di vya tibeac, di ob val vô king tibeac hixôn.”

11

Xomxo yuu nêl kiyang kitong

¹ Nang dêc Anutu vông pîtoa wê mi kô mak vô susu ya ge ti vô a, dì nêl vô a ên nêbê, “Kidi lec mì loc kô mak vô Anutu xumac ngibua yuu alta dì kitong xomxo wê dô vac xumac ngibua nilô mì kitaa ge. ² Lêc xumac ninyawehe ge, le i lêc kô mak vô hixôn lêm. Nge, ông sea i yêp xel, ên a vông vô tibii madiluhu, om he ob kê vigwe ngibua Jelusalem vô nipaên tiyi xochê dentuc 42 ge. ³ Di a obêc vông xêkizêc vô a nuge yuac yuu ên yuu i loc nêl kiyang wê a vông ge vô xomxo. Om yuu obêc vêx nivimihi wê xomxo mi vinyum lec buc wê he dô vac viyin ge, dì yuu obêc la nêl kiyang wê a vông ge i tiyi buc 1,260.” Angela nêl bêge, dì buc 1,260 ge tiyi xochê klismas yon dì dentuc vigê vilu dì sec ti ge.

⁴ Xomxo yuu ge tiyi xochê xax oliv yuu dì lam yuu wê le vô Apumtau wê viac kibun vihati ge manôñ. ⁵ Lêc tibii obêc nêb vông yuu i vô nipaên ge od ngwax obêc tum vac yuu mya dì ya tibii vevac tigee i ma. Vixôhilôg, tibii obêc vông nipaên vô yuu ge od ngwax obêc ya he yib. ⁶ Xêkizêc wê yuu vông ge tiyi wê yuu ob kol lag lec dì lun valêñ ob ma i tiyi buc vihati wê yuu ob nêl Anutu xolac ge. Dì xêkizêc wê yuu vông ge tiyi wê yuu ob pilepac mia dì i vô hi xochê xomxo hi ge, dì xêkizêc wê yuu vông ge tiyi wê yuu ob vông xomxo vô nipaên ya viyin kehe toto ge. Om tiyi buc vihati wê yuu obêc nêb vông viyin tibêge ge od yuu obêc vông.

⁷ Yuu obêc nêl Anutu kiyang pyap ge od bwoc vimen ti obêc lec vac vu madia wê mapitoc ta ge mì val tyip, di ob vông vevac vô yuu dì nginoo yuu vêl dì hi yuu yib, ⁸ dì yuu ninivi ob yêp vac môp levac vac vigwe levac Jelusalem wê nêl kiyang pilepacén nêbê Sodom yuu Isip. Vigwe levac Jelusalem wê ilage tibii hi Apumtau wê yuu vông ge yib lec xax. ⁹ Mêdêc xomxo ya vac ninivi toto di kehe toto di vya toto dì vigwe toto ge, he ob yê yuu ninivi tiyi buc yon diluhu dì buc ti viwen hixôn, di he ob tyuc lec nêb xomxo i o yev yuu lêm. ¹⁰ Om xomxo kibun ga vihati xêyaa ob vô nivîha ên wê plopete yuu ge yib, om he ob yoo dì myêl levac mì ya dì vông susu nivihaviha vôma, ên yuu nêl xomxo kibun ga nêl nipaên lec he manôñ dì vông viyin vô he.

¹¹ Mêdêc buc yon yadiluhu dì ti viwen lam la vêl lê, lêc Anutu vê myakilôhô maviha la vac yuu nilô dì yuu kidi lec maviha mi le kisii, di xomxo vihati wê yê yuu ge xona mabu ên yuu. ¹² Mêdêc vya levac ti lam gê lag puunê dì lam vô yuu bêga ên nêbê, “Muu lec mì lam kisii ga.” Mêgem yuu lec vac viyobtoc mi la lag puunê dì xomxo wê vông vevac vô yuu ge yê wê yuu lec mì la ge. ¹³ Mêdêc lutibed ngiyêg levac yoc dì kipê vigwe levac tige mya ti vêl, dì mya vigê vilu dì sec yuudiyuu gên le niviha. Ngiyêg tige hi xomxo 7,000 yib, dì he wê gên dô maviha ge xona mabu yocén, om pimil Anutu lag puunê.

¹⁴ Om viyin levac ti wê vông yuu ge val pyap. Om ngô lê, viyin levac ti wê vông yon ge obêc val lutibed.

Angela ti wê vông vigê vilu dì sec yuu ge vê i vuac

¹⁵ Nang dêc angela ti wê vông vigê vilu dì sec yuu ge vê i vuac dì vya ya lam gê lag puunê dì tyuc xêkizêc bêga nêbê,
“Il Apumtau Anutu hixôn Kîlisi, yuu tu king wê xomxo kibun vihati vông,
di ob tu king wê ob dô luta lêc luta

ge.”

¹⁶ Nêl bêge mêtêc gyovixa 24 wê mi dô lec sia wê le vô Anutu manôn ge, he kipôm manôn vac kibun di pimil Anutu ên nêbê,

¹⁷ “Apumtau Anutu, ông xêkizêc kehe, ông dô mugên ilage, di dô gwêbaga hixôn. Ông kô xêkizêc wê ông vông ge lec pyap di ông ob tu xomxo vihati nêñ king, om xe ob pimil ông. ¹⁸ Tibii madiluhu xêyaa vô myavinê vô ông, lêcom ông êno ge, ông xêmyaa vô myavinê vô he pyap. Om gwêbaga buc wê ông ob yaxêñ xomxo yibén nêñ kiyang ge val, di buc gwêbaga wê ông obêc vông nôn niviha vô nume yuac, he wê tu plopete hixôn xomxo vông vinêñ vihati, di he wê xona ên ông di la vac ông kwa ngibi, di he wê lê levac di he wê o le levac lêm ge vihati. Di buc gwêbaga wê ông obêc kitya he wê vông xomxo hixôn kibun vô nipaêñ ge

vêl.”

¹⁹ He nêl kiyang tige pyap, mêtêc Anutu xumac ngibua lag puunê tax mi le myadongêñ, di Anutu kilong yêp seac vac xumac ngibua tyo nilô. Kilong tige tiyi xochê kiyang wê Anutu hilu pyap ilage. Mêtêc deac hixelac, di vigwe vô nididun, di deac tug, di ngiyêg yoc, di lun tiyi xochê hikwelac kwem ge tô hixôn.

12

Vêx ti yuu myel levac ti kiyang

¹ Nang dêc do levac lag puunê ti val le seac bêga nêbê vêx ti dô, lêc vinyum hiyôv lec ninivi xochê ngakwi ge, di dentuc dô vac vixa ngibi, di pitua vigê yuu di tô mi la yuu ge dô lec bazub tiyi xochê kilung ti. ² Vêx tyo nu dô vac xêyaa, lêc kê ên nêb ob yubac, om ta yaxêñ myavinê levac di iac mabu. ³ Nang dêc do levac lag puunê ngwe val bêga nêbê myel levac mabu ti yêp. Myel tige ninivi hi, di bazub vigê vilu di sec yuu, di levac vigê yuu le lec bazub, di kilung vigê vilu di sec yuu xochê kilung wê king mi tung ge dô lec bazub toto. ⁴ Myel tige xêxuhu pityep pitua kidu ti ma vêl di nêñ he la lec kibun, di pitua kidu yuu ge dô vac lag. Mêtêc myel tige la le vô vêx tyo wê ob kô nu ge manôñ ên nêb nipwo tige obêc yubac ge od ob ya. ⁵ Mêtêc vêx tyo kô nu vux ti. Vô buc timuêñ wê nipwo tyo obêc vô levac ge od obêc hôm xax tiyi xochê ain ge vac vigê di viac xomxo vihati ya. Nu tyo yubac om myel tige nêb ob ya, lêc he kô i mi la vô Anutu lec i sia king. ⁶ Vêx tyo pec mi la vac vigwe myadongêñ mi la dô vac vigwe ti wê Anutu viac pyap vô i ge, om he ob vông yaêñ vô i di viac i tiyi buc 1,260 (klismas yon di dentuc vigê vilu di sec ti).

⁷ Mêtêc vevac levac tyip gê lag puunê. Maikel he nue angela vông vevac vô myel he nue angela nipaêñ, om he vông vevac vòma. ⁸ Lêc Maikel he nue angela luu myel he nue vêl, om myel he nue tiyiên ma wê ob dô lag puunê ge. ⁹ Om Maikel he nue angela nêx myel levac tyo lam kibun. Myel tige dô ilage, di lê ngwe nêbê vimwo nipaêñ Seten, di lê ngwe nêbê Devil wê mi nêl kiyang kityooêñ vô xomxo kibun ga vihati. Lêc Maikel he nue angela nêx myel nipaêñ tige hixôn nue angela nipaêñ lam kibun.

¹⁰ Pyap dêc a ngô vya levac ti lam gê lag puunê bêga ên nêbê,

“Gwêbaga il Anutu vô il vêl ên xêkizêc wê myel nipaên vông ge, om xêkizêc wê Anutu vông ge yêp seac dì i tu king wê il vông ge, dì Kilisi wê i vông i lam ge tu levac, ên angela wê Anutu vông ge tii xomxo nipaên tyo lam kibun. Ilage xomxo nipaên tige mi le vô Anutu manôn tiyi vidiiênu yuu bucén vihati, dì nêl kiyang kityooêñ lec il lige vông vinêñ vô Anutu. Lêc angela wê Anutu vông ge nêx i lam kibun.¹¹ Lêc hi wê bwoc Sipsip Nu vông ge kitya il lige nêñ nipaên vêl, om he nginoo Seten vêl, dì he mi nêl Kilisi kiyang yêp seac, om he luu Seten vêl, ên he o vông nilô la vô môp wê nêb he ob dô niviha ge lêm. Nge, he nêb xomxo obêc hi he yib ge od ge niviha dì kiyang ti o yêp lêm.¹² Mêgem ông vigwe kisii ganê hixôn xam vihati wê xam dô kisii ge, xam xêmyaa i niviha. Lêc xam kibun yuu xam gwec, xam xona nêm ên viyin levac ob val vô xam, ên Seten loc kibun pyap vô xam dì xêyaa vô myavinê levac, ên xovô nêb i nêñ buc wê Anutu obêc kitya i vêl ge val vô kwabo lec.”

¹³ Vya tyo nêl bêge, mêtêc myel levac tige yê wê he nêx i lam kibun ge, om la tii vêx tyo wê kô nu vux tige ên nêb ob hi i yib.¹⁴ Lêcom Anutu vông tul levac vinihi yuu vô vêx tyo ên nêb i vinyum lec i di bôb mi loc kisii ya dì sea myel i dô, dì loc ben vac vigwe mahigun pîleva ên he ob vet i ya yaêñ dì viac i tiyi klismas yon dì dentuc vigê vilu dì sec ti.¹⁵ Mêtêc myel tige mutac mia levac vac mya timu vô vêx tige vixa ên nêb i loc byêx vêx tyo i loc.¹⁶ Lêc kibun ngidu vêx tyo xôn bêga nêbê sux mya dì ngôñ mia wê myel mutac i la ge, om o la hi vêx tyo lêm.¹⁷ Mêtêc myel xêyaa vô myavinê vô vêx tyo, om loc mi la nêb ob la vông vevac vô vêx tyo nue. He gee wê mi timu vô Anutu xolac dì vông i vin Yesu dì nêl i kiyang yêp seac.¹⁸ Mêtêc myel tige mila le vô gwec ninya.

13

Bwoc vimen yuu val

¹ A xê bwoc vimen levac ti lam vac gwec. Bwoc vimen tige bazub vigê vilu dì sec yuu, dì levac vigê yuu le lec bazub, dì kilung vigê yuu tiyi xochê kilung wê king mi tung ge dô lec levac toto, dì lê nipaên ti yêp lec bazub toto. Lê kehe bêga nêbê kiyang nipaên toto wê xomxo nêl vaxvax lec Anutu ge.² Dì bwoc vimen wê a xê ge tiyi xochê noo lepat, dì vixa xochê noo bea vixa ge, dì mya xochê noo laion mya ge.

Dì myel levac vông xêkizêc wê i vông ge vô bwoc vimen tige, dì vông i tu levac xochê ici va ge, dì vông lê levac vô i.³ Bwoc vimen tige bazub vigê vilu dì sec yuu, lêc ti vô nipaên tiyi xochê xomxo nêx i yib ge. Lêc bazub tige vô niviha lec nang, om xomxo vihati yê dì yetac ên i di he xêyaa vô niviha di he la timu vô i vixa.⁴ Mêtêc xomxo yev vixa kitu vô myel levac dì pimil i, ên wê vông xêkizêc wê i vông ge vô bwoc vimen tige. Om he yev vixa kitu vô bwoc vimen êno dì nêl ên nêbê, “Letya vông xêkizêc tiyi xochê bwoc vimen tiga? Dì letya tiyi wê ob vông vevac vô i ge? Ti tiyien ma vêl.”

⁵ Bwoc vimen tige yong i di nêl kiyang nipaên lec Anutu. Dì kô xêkizêc tiyi wê ob vông môp nipaên tibêgee i miloc tyip vô dentuc 42 i lam loc vêl. Di Anutu diyê ya manôn dì o keac ti lec lêm.⁶ Om bwoc vimen tige nêl kiyang nipaên lec Anutu, om nêl kiyang nipaên lec Anutu lê dì nêl lec Anutu ben dì nêl lec Anutu nue wê dô kisii ganê.⁷ Bwoc vimen tige vông

vevac vō xomxo vōng vinēn dī nginoo he vēl. Lēc Anutu diyē ya manōn dī o nēl kiyang ti lec i lēm. Dī bwoc vimen kō xēkizēc wē ob tu king dī viac xomxo kehe toto dī ninivi toto dī vya toto dī vigwe toto ge.⁸ Om xomxo wē he lē o yēp vac Anutu kipihac lēm ge, he vihati ob yev vixa kitu vō bwoc vimen tige. Taxlee ilage wē Anutu gēn o tung kibun hixōn susu vihati lēm ge od kivuu xomxo wē ob dō maviha luta lēc luta ge lē yēp vac kipihac wē bwoc Sipsip Nu vōng ge, dī he tu i xe. Bwoc Sipsip Nu tige wē xomxo hi i yib ilage.

⁹ Xam ninyam obēc yēp ge od xam ngō kiyang tiga lē. ¹⁰ Anutu obēc lee yuu nēb xomxo ti i loc kalabuhu ge od ob la kalabuhu. Dī Anutu obēc lee yuu nēb xomxo ti i yib ya yipac ge od ob yib ya yipac. Om môp viyin tibēge obēc val ge od xomxo vōng vinēn he i le xēkizēc ta vac viyin dī hôm vōng vinēn wē he vōng ge xōn pilahi.

¹¹ Nang dēc a xē bwoc vimen ngwe val tyip vac kibun dī lam le seac. Levac nipwo yuu tiyi xochē levac wē bwoc sipsip nu ti vōng ge tyip lec bazub, dī keacēn wē i vōng ge tiyi xochē myel levac vya. ¹² Mēdēc bwoc vimen ngwe wē tax ge vōng xēkizēc vō bwoc vimen wē vōng yuu ge ên nēb i vōng yuac ya dī i kidu xomxo vihati ên nēbē he i yev vixa kitu vō bwoc vimen ngwe wē tax ge. Bwoc vimen ngwe wē tax ge wē bazub ti vō nipaēn tiyi xochē xomxo hi i yib ge, lēc vō niviha lec nang. ¹³ Mēdēc bwoc vimen ngwe wē vōng yuu ge vōng do tibeac. Do ti wē i vōng ge bēga nēbē i le vō xomxo manōn dī nēl dī xomxo yē ngwax ti tum gē kisii ganē dī lam tō lec kibun. ¹⁴ Anutu yē bwoc vimen wē vōng yuu ge ya manōn, dī o keac ti lec lēm. Om bwoc vimen tige vōng do tibeac vō bwoc vimen wē tax ge manōn, dī kityoo xomxo tibeac ya do wē i vōng ge, dī nēl vō he ên nēbē, “Xam sev xax ti i tiyi xochē bwoc vimen ngwe wē tax ge kinu, dī xam yev vixam kitu vō. Ilage bwoc vimen tige yib ya yipac, lēc kidi lec maviha tii vac nang.” Nēl bēge, om xomxo sev xax ti tiyi xochē bwoc vimen kinu. ¹⁵ Anutu yē ya manōn dī o nēl kiyang ti lec lēm. Om bwoc vimen ngwe wē vōng yuu ge vē myakilōhō vac kinu tyo, om kinu tige keac. Dī xomxo obēc yev vixa kitu vō kinu tige lēm ge od kinu tige obēc hi he yib.

¹⁶ Dī bwoc vimen wē vōng yuu ge nēl om xomxo vihati kō mak wē i vōng ge lec he vigē hiyōv me he manōn, he wē lē levac hixōn he wē lē nipwo, dī he wē mone yuu susu tibeac hixōn he wē nēn susu maēn ge, dī he wē tu levac dī viac nue yuac ge hixōn he wē tu xomxo levac nue yuac ge. ¹⁷ Om bwoc vimen mak yuu naba ob yēp lec xomxo ti lēm ge od o tiyi wē ob la kisuu susu ge lēm dī o tiyi wē ob vōng susu mī tibii i kisuu ge lēm. Mak hixōn naba tige nēl bwoc vimen lē kitong. ¹⁸ Mēgem il ob xovō niviha. Xomxo ti xovōn niviha obēc yēp vō i ge od i kitong naba wē bwoc vimen vōng ge dī xovō kehe. Naba tige tiyi xochē naba wē xomxo vōng. Naba wē i vōng ge tiyi xochē 666.

14

Xomxo 144,000 vōng lilo paha ti

¹ Nang dēc a Jon, a xē bwoc Sipsip Nu tige le lec kitōn ti lē nēbē Saion, dī xomxo 144,000 le hixōn i. Bwoc Sipsip Nu lē dī ma lē, yuu xōn lē yēp lec xomxo tigee manōn. ² Mēdēc a ngō vya ti lam gē lag puunē. Vya tige wē nidiidun levac xochē mia levac didun, dī xochē deac tug levac, dī

xochê xomxo tibeac hi gita mi vông lilo vac ge. ³ Xomxo 144,000 gee le vô Anutu wê dô lec sia king ge manôn, di he le vô lili mavilha yuudiyuu hixôn gyovixa 24 manôn hixôn, di he vông lilo paha ti. Xomxo 144,000 gee wê Anutu vô he vél ên xomxo nipaên wê dô lec kibun ge mahigun di kô he mi la vô i. Xomxo tigeec vaci wê ob xovô lilo paha tige, di xomxo bangwe ob xovô lilo tige lêm. ⁴ Xomxo 144,000 gee, he o vông môp nipaên ti vô vêx lêm. Nge, he dô tiyi xochê xomxo ngivihi ge. Di vigwe vihati wê bwoc Sipsip Nu la vilee vac ge od he timu vô i vixa. Anutu vô he vél ên xomxo kibun ga vihati di vông he lôm tu Anutu hixôn bwoc Sipsip Nu nue mugêñ. ⁵ He o nêl kiyang kityooêñ ti lêm, di nipaên ti o yêp vô he lêm.

Angela yon nêl kiyang

⁶ Nang dêc a xê angela ti bôb mi la kisii, di i la nêl xolac niviha wê obêc dô luta lêc luta ge vô xomxo kibun ga vihati. Om la nêl xolac vô xomxo vigwe toto, di xomxo kehe toto di vya toto di ninivi toto. ⁷ Om angela tige nêl vya levac ên nêbê, “Buc wê Anutu obêc yaxêñ xomxo vihati nêñ kiyang ge val pyap. Om xam xona nêm ên i di pîmîl i, di yev vixam kitu vô i. Anutu ge wê tung lag yuu kibun di gwec yuu mia vihati ilage.”

⁸ Nang dêc angela ngwe wê vông yuu ge timu vô angela ngwe wê tax ge mi val, di nêl ên nêbê, “Vigwe levac Babilon vô nipaên. Vô nipaên pyap. Xomxo Babilon mi didii xomxo vac vigwe vihati ge la vac môp yôdac vêx yuu vux wê he mi vông ge, om tiyi xochê tibii Babilon vông mia xêkizêc vô he ên nêb he i num di loc vac môp nipaên.”

⁹ Nang dêc angela ti wê vông yon ge timu vô angela yuu wê tax ge mi val, di nêl vya levac ên nêbê, “Xomxo ti obêc yev vixa kitu vô bwoc vimen hixôn i kinu di kô i lê tiyi xochê mak lec manôn me vigê ge ¹⁰ od obêc num mia xêkizêc. Mia tige, Anutu xêyaa myavinê wê obêc vông vô he ge. Di Anutu obêc pîlepac mia ningigoõen vac mia xêkizêc tige lêm. Nge, xomxo obêc num xêyaa myavinê wê Anutu vông ge tiyi xochê num mia xêkizêc ge. Om ngwax mahelac wê tum lec ngidax salpa ge obêc tum lec he di vông myavinê levac vô he, vô angela ngibua hixôn bwoc Sipsip Nu manôn. ¹¹ Di ngwax wê tum lec he di vông myavinê vô he ge, lu obêc la kisii luta lêc luta. Om xomxo wê yev vixa kitu vô bwoc vimen hixôn i kinu di kô i lê tiyi xochê mak lec he manôn me vigê ge, he obêc yaxêñ myavinê mabu tiyi buc vihati, vidiiêñ yuu bucêñ, di obêc dô seac vêl lêm.”

¹² Môp tibêge obêc val, om xomxo wê vông i vin Anutu di ngô i xolac di vông i vin Yesu ge, he i le xêkizêc.

¹³ Nang dêc a ngô vya ti lam gê lag puunê bêga ên nêbê, “Ông kivuu kiyang bêga bê gwêbaga di i loc vô buc vihati wê yêp timuêñ ge, xomxo obêc vông i vin Apumtau di yib vac vông vinêñ wê he vông ge od he obêc dô hixôn xêyaa niviha.” Vya nêl bêga, mêdêc Myakilôhô Ngibua tyuc lec ên nêbê, “Vixôhilôg nôn. He ob sea he yuac levac wê he vông ge di lam dô seac vêl, di he obêc lam pileva lêm. Nge, yuac niviha wê he vông ge obêc lam hixôn he.”

Buc wê xomxo la kô susu yaêñ nôn wê huu ge

¹⁴ Nang dêc a xê mag la, lêc a xê viyobtoc kwem ti, di xomxo ti xochê xomxo nu ge dô lec viyobtoc tyo. Xomxo tige tung kilung gol ti lec bazub di hôm yipac wê manôn ta ge ti vac vigê. ¹⁵ Mêdêc angela ti lam vac Anutu xumac ngibua wê dô kisii ganê ge di tyuc la vô xomxo ti wê dô lec viyobtoc

ge ên nêbê, "Hôm ông yipac lec dì loc vuv susu nôn wê huuên ge ya dì kô mì loc, ên susu vihati wê dô kibun ge vô nôn pyap. Om gwêbaga buc wê ob la kôen nôn mì lam." ¹⁶ Angela nêl bêge, mègem xomxo ti wê dô lec viyobtoc ge hôm i yipac dì la vuv susu nôn wê dô kibun ge vihati.

¹⁷ Nang dêc angela ngwe wê vông yuu ge lam vac Anutu xumac ngibua wê yêp kisii ganê ge, dì i êno hôm yipac wê manôn ta ge ti. ¹⁸ Mèdêc angela ti wê vông yon ge sea alta mì lam. Angela tige kô xêkizêc wê ob viac ngwax ge. Mèdêc tyuc vya levac vô angela ti wê hôm yipac wê manôn ta ge ên nêbê, "Hôm ông yipac lec dì loc kiku wain nôn wê dô kibun ge vêl ên yatôv dì kituc i loc dô kidu ti, ên wain nôn huu mîma vêl." ¹⁹ Om angela tige hôm i yipac dì la kiku wain nôn vêl ên yatôv dì kituc

vihatí la dô kidu tibed, dì kipyax i la vac lôva madia tiyi xocbê tang ge nêb he ob kê ya vixa. Kiyang tige nêl lec xêyaa myavinê wê Anutu vông ge. ²⁰ Mèdêc he kê wain nôn vac lôva madia wê le vô vigwe levac tige ninja. Om hi pup lec lôva madia tige di vuac mì lam tyip lec xôhô mya di butac mì la tiyi xocbê 300 kilomita ge.

15

Angela vigê vilu dì sec yuu ge hôm susu nipaên vigê vilu dì sec yuu vac he vigê

¹ Nang dêc a xê do levac ti gê kisii ganê dì a xo kiyang tibeac lec. A xê do tiga bêga nêbê angela vigê vilu di sec yuu, lêc he hôm susu nipaên vigê vilu dì sec yuu wê ob vông xomxo vô nipaên ge vac vigê. Buc wê susu nipaên tigee obêc pyap ge od xomxo obêc tulec nipaên ti tii vac lêm, ên xêyaa myavinê wê Anutu vông ge ob tiyôô vac vô buc tige.

² Mêd a xê susu ti tiyi xocbê gwec levac ge. Gwec tige tiyi xocbê glas wê he pilepac hixôn ngwax ge. Dì a xê xomxo tibeac. Ilage he vông vevac vô bwoc vimen hixôn i kinu yuu naba wê lê yêp lec ge dì nginoo i vêl. He le vô gwec wê xocbê glas ge ninja, dì hôm gita wê Anutu vông vô he ge vac vigê. ³ Dì he vông lilo ti wê Anutu nu yuac Moses vông ilage, dì bwoc Sipsip Nu tige vông hixôn. Lilo bêga bê,

"O Apumtau Anutu, xêkizêc kehe ông, yuac vihati wê ông vông ge xêkizêc,
dì xe xê dì xovô ên xe nêbê ông yuac niviha. Ông tu xomxo vihati
nên king, dì môp wê ông vông ge bôbac dì vixôhilôg nôn. ⁴ O
Apumtau, ôcông va tibed wê ông ngibua ge. Xomxo vihati obêc
xona ên ông dì pimil ông dì lam yev vixa kitu vô ông. Ên môp
bôbac wê ông vông ge vihati lam le seac mì yêp pyap."

⁵ He vông lilo tyo pyap, nang dêc a xê mag la, lêc xê Anutu xumac ngibua sel le taxên gê lag puunê. Xumac ngibua tige kehe bêga nêbê kiyang wê Anutu vông ge vô nôn lec. ⁶ Mèdêc angela vigê vilu dì sec yuu wê hôm susu nipaên vigê vilu dì sec yuu vac vigê ge, he lop vac Anutu xumac ngibua tige. He vinyum ngakwi kwem wê paha ge, dì vêx let gol lec yagtôv xôn. ⁷ Mèdêc lili maviha yuudiyuu gee, ti vông pile gol titi vô angela vigê vilu dì sec yuu gee, dì Anutu wê ob dô maviha luta lêc luta ge, xêyaa myavinê wê i vông ge pup lec pile gol vigê vilu dì sec yuu gee mya. ⁸ Mèdêc ngwaxlu lam vac xêseac yuu xêkizêc wê Anutu vông ge dì lam pup vac xumac ngibua nilô, om xomxo ti o tiyi wê ob la vac xumac ngibua nilô ge lêm.

Lêc angela vigê vilu dì sec yuu gee ob vông yuac lec susu nipaên vigê vilu dì sec yuu ge pyap lê, lêc xomxo ob la vac xumac ngibua nilô tige timuên.

16

Pile vigê vilu dì sec yuu wê Anutu xêyaa myavinê pup lec vac ge

¹ Nang dêc a ngô via levac ti lam vac Anutu xumac ngibua tige, dì via tyo nelô vô angela vigê vilu dì sec yuu gee ên nêbê, "Xêyaa myavinê wê Anutu vông wê pup lec xam pile vigê vilu dì sec yuu gee, xam loc kipyax vihati i loc kibun."

² Mégem angela taxlee tyo la kipyax susu nipaên wê pup lec i pile ge la kibun. Médék kityax nipaên wê myavinê levac ge ya xomxo vihati wê bwoc vimen mak yêp lec he di he yev vixa kitu vô bwoc vimen kinu ge. Kityax ya xomxo tigee vihati ma vêl.

³ Nang dêc angela ngwe wê vông yuu ge la kipyax susu nipaên wê pup lec i pile ge la vac gwec. Médék gwec tu hi tiyi xochê xomxo yibêñ hi ge, om susu vihati wê dô mavilha vac gwec gee yib mima vêl.

⁴ Nang dêc angela ti wê vông yon ge la kipyax susu nipaên wê pup lec i pile ge la vac mia levac dì mia wê yêp vac lôva ge hixôn, dì mia tu hi xochê xomxo hi ge. ⁵ A ngô angela wê mi viac mia ge via wê nelô ên nêbê, "O Anutu ngibua, ông dô mugêñ ilage dì dô gwêbaga hixôn. Gwêbaga ông yaxêñ xomxo nipaên nêñ kiyang dì vông myaviwen vac vô he. Om môp wê ông vông myaviwen vô xomxo ge môp niviha, ⁶ ên he mi hi plopete hixôn xomxo vông vinêñ yib dì kipyax he hi sea. Mégem gwêbaga ông vông hi vô xomxo nipaên tigee ên ông nêb he i num. Om he kô myaviwen nipaên tiyi môp wê he vông ge."

⁷ Nang dêc a ngô via ti lam vac alta dì tyuc via levac ên nêbê, "Vixôhilôg nôn, Apumtau Anutu xêkizêc kehe ông, ông yaxêñ xomxo nêñ kiyang dì vông myaviwen vô he i tiyi môp wê he vông ge. Môp wê ông yaxêñ xomxo nêñ kiyang ge niviha vixôhilôg."

⁸ Nang dêc angela ti wê vông yuudiyuu ge kipyax susu nipaên wê pup lec i pile ge la vô hiyôv, dì Anutu nêbê hiyôv i linac mabu mi ya xomxo xochê ngwax ge. ⁹ Mégem hiyôv myavinê nux he xochê ngwax nux ge. Médék he nelô kiyang vaxvax lec Anutu wê lee yuu dì vông myavinê levac tige vô he. Lêc he o pilepac he di pimil Anutu lêm.

¹⁰ Nang dêc angela ti wê vông vigê vilu ge kipyax susu nipaên wê pup lec i pile ge la vô sia king wê bwoc vimen vông ge. Mêd vigwe vô mapitoc ta di hivun xomxo wê dô vac bwoc vimen kwa ngibi ge vihati xôn, om he yaxêñ myavinê mabu di he dô nipaên, ¹¹ di he nelô kiyang nipaên lec Anutu wê dô kisii ganê ge ên wê vông myavinê hixôn kityax tulec he ge. Lêc he o pilepac he ên môp nipaên wê he vông ge lêm.

¹² Nang dêc angela ti wê vông vigê vilu dì sec ti ge kipyax susu nipaên wê pup lec i pile ge la vac mia levac lê nêbê Ypletis. Médék mia tuac mima vêl, om vông môp vô king he nue wê lam vac vigwe viwen wê hiyôv tyip lam ge. ¹³ Pyap dêc a xê vimwo nipaên yon tiyi xochê vidubac yon ge. Ti lam vac myel levac tige mya, di ti lam vac bwoc vimen mya di ti lam vac plopete kityooen tyo mya. ¹⁴ Vimwo nipaên yon ge, Seten nue yuac yon, om yon vông do tibeac di la vô king wê dô kibun ge vihati ên nêb ob kituc he i lam ên he i vông vevac vô Anutu wê xêkizêc kehe ge, om ob vông vevac vô Anutu lec buc levac wê Anutu vông ge.

15 Yesu nêl ên nêbê, “Wê lê. A obêc val tiyi xocbê tibii yôdac ge, om xam obêc xovô buc wê a obêc val lec ge lêm. Mêgem xomxo ti obêc bin a di yêpêñ obêc ma, di obêc vêx i nivimihî dô pilihi lec i di la vô môp ge od ni obêc yoc ên i lêm, ên ob la xêtuac mi xomxo yê lêm. Xomxo tige i dô hixôn xêyaa niviha.” Yesu nêl bêge.

16 Vimwo nipaêñ yon ge kituc king vihati la dô vac vigwe ti wê Hiblu vya nêl ên nêbê Amagedon.

17 Nang dêc angela ti wê vông vigê vilu di sec yuu ge kipyax susu nipaêñ wê pup lec i pile ge la vac lea. Mêdêc vac xumac ngibua vya ti lam vac sia king wê Anutu vông ge di lam vixun di tyuc xêkizêc ên nêbê, “Gwêbaga yuac vihati wê a vông ge pyap vac.” **18** Mêdêc deac hixelac di vigwe vô nididun di deac tug di ngiyêg mabu ti yoc. Vô buc ilage di i val tyip gwêbaga hixôn, xomxo o yaxêñ ngiyêg levac wê yoc tiyi xocbê ngiyêg levac tige lêm. **19** Om vigwe levac Babilon hibu la yon, di vigwe nipwopwo vihati ge kipê sea di vô nipaêñ. Om Anutu xo he Babilon tii vac ên nêb he i num wain wê i vông ge. Wain tige xêyaa myavinê wê Anutu vông ge. **20** Mêdêc kitôn wê le vac gwec mahigun ge vihati la mima vêl di kitôn wê le kehe ge vihati xôa ma hixôn. **21** Mêd lun hikwelac lam gê lag puunê di lam tô lec xomxo. Lun hikwelactige viyin mabu xocbê pidi yul ti. Mêdêc xomxo nêl kiyang nipaêñ lec Anutu ên wê vông viyin mabu tige tiyi xocbê lun hikwelac ge lam hi he vô nipaêñ.

17

Vêx yôdac tige kô myaviwen nipaêñ

1 Nang dêc angela vigê vilu di sec yuu wê hôm pile vigê vilu di sec yuu gee, he ti lam nêl vô a ên nêbê, “Lam, ên vêx yôdac wê dô vô mia levac ninya ge obêc kô myaviwen lec nipaêñ wê mi vông ge. Om a obêc hilung vêx tyo vô ông. Vêx tige tixuu lec vigwe levac Babilon wê yêp vô mia ninya ge. **2** King wê dô kibun ge vihati vông yôdac vô vêx tige,* di xomxo kibun vihati mi hôm môp yôdac wê vêx tyo vông ge xôn pilihi, om tiyi xocbê he num mi vô mavmav ge.”

3 Angela nêl bêge, mêdêc Myakilôhô Ngibua lam hivun a xôn di kô a mi la vac vigwe myadongên wê xomxo dô vacen ma ge. Lêc a xê vêx ti dô lec bwoc vimen wê ninivi hi ge ti. Bwoc vimen tige, lê tibeac hiwocên yêp lec ninivi. Lê tigee kehe bêga nêbê nêl kiyang nipaêñ lec Anutu. Bwoc vimen tige bazub vigê vilu di sec yuu di levac vigê yuu le lec bazub. **4** Vêx tige vinyum ngakwi hi tiyi xocbê manôn yuu ge, di vunac vô ya susu gol toto hixôn komkom di ngidax nivihaviha wê mone levac ge. Di hôm kap gol ti vac vigê, di môp nipaêñ toto tiyi xocbê susu byepacêñ ge hixôn ningeac toto wê vêx yôdac vông ge pup lec kap tige. **5** Di lê ti yêp lec vêx tyo manôn, lêc lê tige tiyi xocbê kiyang pilepacêñ ti wê kehe nêl bêga ên nêbê, “Vigwe levac Babilon wê tu vêx yôdac hixôn môp nipaêñ kibun ga vihati kehe.” **6** Vêx tige hi Anutu nue hixôn he wê vông i vin Yesu Kilisi di nêl i kiyang ge yib. Om tiyi xocbê vêx tige num he hi mi vô mavmav ge. A xê vêx tige di a yetac mabu.

* **17:2:** Kiyang pilepacêñ lec king wê vông yôdac vô vêx tige tixuu lec xomxo wê sea Anutu di la vông i vin anutu bangwe ge. Ge tiyi xocbê he sea Anutu maviba di la vô anutu mayibêñ, om Anutu yê he tiyi xocbê vux wê sea vinê mi la vông yôdac vô vêx ngwe ge.

⁷ Léc angela tige nél vô a ên nêbê, “Bêna léc ông yetac ên vêx tige? A ob nél kiyang pilepacén wê nél lec vêx tige kehe vô ông, dì nél bwoc vimen wê vêx tyo dô lec ge kehe vô ông hixôn. Bwoc vimen tige bazub vigê vilu di sec yuu dì levac vigê yuu le lec bazub. ⁸ Bwoc vimen tige wê ông wê ge, ge dô ilage, léc gwêbaga o dô lêm. Léc obêc timuên ge od obêc val tyip vac vu madia wê mapitoc ta ge mi lam, dì Anutu ob kitya i vêl. Vô buc mugén taxlee ge Anutu kivuu xomxo wê ob dô maviha ge lê vac kipihac. Léc xomxo wê he lê o yêp vac kipihac lêm ge he obêc yê bwoc vimen tige dì yetac mabu ên wê i dô ila léc gwêbaga o dô lêm dì obêc dô timuên i tii vac nang ge.

⁹ “Om xomxo wê piyôp xovôên ge heche va tiyi wê ob xovô kiyang tiga kehe. Bwoc vimen bazub vigê vilu dì sec yuu ge kehe ngwe bêga ên nêbê kitôn vigê vilu dì sec yuu wê vêx yôdac la dô lec ge, ¹⁰ dì kehe ngwe bêga ên nêbê xomxo vigê vilu dì sec yuu wê tu king ge. He vigê vilu tu king ilage, léc he o dô gwêbaga lêm, dì ti dô gwêbaga, dì ti gên o tu king lêm om obêc tu king timuên léc ob dô buc myabo tya. ¹¹ Léc bwoc vimen wê dô ila léc o dô gwêbaga lêm ge, ilage i ge king vigê vilu dì sec yuu ge ti, léc obêc tu king ti wê vông vigê vilu dì sec yon ge. Léc Anutu ob kitya i vêl.

¹² “Ông wê levac vigê yuu wê le lec bwoc vimen tige bazub ge pyap. Om levac tigee kehe bêga nêbê king vigê yuu léc he gên o tu king lêm. Léc obêc timuên ge od he ob kô xêkizêc hixôn bwoc vimen, dì he obêc tu king mi dô buc myabo tya. ¹³ King vigê yuu ge, he nilô hixôn piyôp yêp tibed, om he ob vông lê levac yuu xêkizêc wê he vông ge vô bwoc vimen ên i kô. ¹⁴ Mêdêc he ob vông vevac vô bwoc Sipsip Nu. Léc bwoc Sipsip Nu obêc nginoo he vêl, ên i tu xomxo levac vihati nêñ Apumtau, dì tu king vihati nêñ king. Dì xomxo wê dô hixôn i dì ngô i vya mì timu vô i vixa, dì ici va vinoo he, dì he vông i vin xêkizêc ge, xomxo tigee vông vevac hixôn bwoc Sipsip Nu mì he nginoo vêl.”

¹⁵ Angela nél bêge, nang dêc nél kiyang ngwe vô a bêga ên nêbê, “Mia wê vêx yôdac tige dô lec ge, kehe bêga ên nêbê ge xomxo vac vigwe toto di xomxo kidu toto di ninivi toto dì vya toto ge. ¹⁶ Dì levac vigê yuu wê ông wê pyap ge, he gee king vigê yuu, dì he hixôn bwoc vimen tige he xêyaa ob vô myavinê levac vô vêx yôdac tige. Om he ob vông i vô nipaêñ di kwax i nêñ ngakwi vêl dì i obêc dô ninivi pileva, dì he obêc ya vêx tige liyôhô dì nêx i la vac ngwax ên nêb ngwax i ya i ma vêl. ¹⁷ Anutu vông piyôp vô he ên nêb he i vông piyôp wê i nêl ge i vô nôn lec, om he vông lê levac yuu xêkizêc wê he vông ge vô bwoc vimen tige dì i la tyip vô buc wê Anutu obêc vông kiyang vihati wê i vông ge vô nôn lec. ¹⁸ Vêx yôdac wê ông wê pyap ge, nél lec vigwe levac Babilon wê king vihati dô vac i kwa ngibi ge.”

18

Vigwe Babilon vô nipaêñ

¹ Pyap dêc a xê angela ti lam gê lag puunê. Angela tige lê levac, di xêseac wê i vông ge linac lec kibun di i vô xêseac ta, ² dì tyuc vya xêkizêc ên nêbê,

“Vigwe levac Babilon vô nipaêñ. Vô nipaêñ vêl, om tu vimwo nipaêñ ben.

Om vimwo nipaêñ di menac nipaêñ wê il xaêñ mi ma ge, he dô

vac vigwe tige. ³ Vigwe tige vô nipaên, ên tibii Babilon didii xomxo vihati vac môp yôdac, om tiyi xochê he num mia xêkizêc wê tibii Babilon vông vô he ge di la vac môp nipaên. Di king kibun ga, he la vông môp yôdac hixôn tibii Babilon. Di xomxo kibun ga wê mi vông yuac bisnis ge, he kô mone levac vô tibii Babilon lec môp nipaên wê he vông ge.”

⁴ Angela nêl bêge, pyap dêc a ngô vyac levac ti lam gê lag puunê bêga ên nêbê,

“Xam vihati wê xam tu a nuge ge, xam lop mi lam vêl ên vigwe tige gec lêc xam dô hixôn he di timu vô môp nipaên wê he vông ge di xam kô myaviwen nipaên wê obêc val vô he ge hixôn. ⁵ Nipaên wê he vông ge tibeac luu vêl mi la vô Anutu, om Anutu yê he nêni nipaên tigee di xovô pyap. ⁶ Mêgem xam loc vông myaviwen nipaên vô tibii Babilon i tiyi xochê nipaên wê he vông ge. Om xam vông myaviwen nipaên i luu vêl i loc vô he. Tibii Babilon vông mia xêkizêc vô xomxo tibeac, om xam vông mia xêkizêc i nginoo vêl vô he ên he i num. ⁷ Tibii Babilon yong he lé lec môp nipaên tibeac wê he mi vông ge. Om xam vông myavinê levac vô he i tiyi nipaên wê he vông ge, di vông he byag mabu, ên he tiyi xochê vêx ti wê yong ici va di xo vac nilô ên nêbê, ‘A ga a kwin ti om a dô lec sia king, di a o vêxôv ti lêm, di viyin ti ob val vô a di vông a byag lêm.’ ⁸ Nêl bêge, mêgem viyin toto ob val vô tibii Babilon lec buc tibed. Om viyin wê ob val vô he ge bêga nêbê he ob vông yidac, di he lie ob yib di he ob byag, di vip ob den he ma vêl, di ngwax ob ya he ben Babilon ma vêl, ên Apumtau Anutu wê ob yaxêni he nêni nipaên di vông myaviwen nipaên vô he ge, i xêkizêc kehe.”

⁹ Angela nêl kiyang tige pyap, di king kibun ga vihati wê mi vông môp yôdac hixôn tibii Babilon di mi vông môp nipaên tibeac hixôn ge, he ob yê ngwaxlu wê tyip vac ngwax tumên di ya vigwe Babilon ma vêl ge, om he xêyaa ob vô viyin di he ob byag levac. ¹⁰ Di he ob xona ên myaviwen nipaên wê val vô vigwe tige, om he ob le teva ên vigwe tige di nêl ên nêbê, “Ông Babilon, ông Babilon, ông vigwe levac, di ông xêkizêc, lêc myaviwen nipaên val vô ông lutibed tiyi hiyôv manôn tibed, ên nipaên wê ông vông ge.”

¹¹ Mêd xomxo kibun ga vihati wê mi vông yuac bisnis ge, he xêyaa viyin di he byag, ên tibii Babilon wê ob kisuu he susu ge ti dôen ma. ¹² Susu wê he vông mi tibii Babilon mi kisuu ge bêga nêbê gol, silva, ngidax niviha, komkom wê mone levac ge, nivimihi kwem wê paha niviha ge, nivimihi hi toto, nivimihi xêlehe, xax wê nivivea niviha toto, susu vihati wê he sev elepan levac ge, di susu vihati wê he sev xax tiyi wê mone levac ge, di susu wê he vông ya kapa di ain di ngidax nidodo ge, ¹³ di xax ninivi yuu lehac wê tibii mi ya ge, di viwev wê ngwaxlu nivivea niviha ge, di susu hizi hizi wê nivivea niviha ge, di sanda nivivea niviha, di mia wain, di wel, di plaua, di pidi, di bwoc levac hixôn bwoc sipsip, di xôhô hixôn pêt wê xôhô mi didii ge, di xomxo wê vông yuac pileva ge, ge he mavilha. Xomxo wê ob kisuu susu tigee ge ti o dô lêm. ¹⁴ Mêgem xomxo wê mi vông yuac bisnis ge ob yê vigwe Babilon di nêl ên nêbê,

“Susu niviha wê xam Babilon nêb xam obêc kô ge vihati sea ông di la xoa ma, di susu yaén niviha wê mone levac ge hixôn susu vunacén

niviha ge vihati la xôpac ên xam. Om xam ob wêvô he i tii vac nang lêm!"

¹⁵ He wê vông yuac bisnis lec susu tibêgee dì kô mone levac vô tibii Babilon ge, he ob xona ên myavinê levac wê vigwe Babilon ob tulec ge, om he ob le teva ên vigwe tige dì byag mi dô hixôn xêyaa viyin, dì nêl ên nêbê,

¹⁶ "Ông Babilon, ông vigwe levac, viyin levac tulec ông. Ilage xam tibii Babilon vinyum ngakwi niviha xochê ngakwi kwem yuu hi ge, dì xam vunac vô ninivi ya gol yuu ngidax niviha hixôn komkom wê mone levac ge. ¹⁷ Lêc hiyôv manôn tibed tige mone yuu susu niviha vihati la vêl lutibed."

Nang dêc xomxo vihati wê mi kô sip ge, dì he wê kisuu sip ên nêb ob la vigwe bangwe ge, dì he wê mi vông yuac vac sip ge, hixôn he wê vông yuac bisnis lec gwec ge, he vihati le teva ên vigwe Babilon ¹⁸ dì yê ngwaxlu wê tyip vac ngwax tumên dì ya Babilon ma vêl ge, om he nêl via levac ên nêbê, "Vigwe levac ngwe yêp gê na wê il ob xê i tiyi xochê vigwe levac Babilon ge?" ¹⁹ Mêdêc he yev viwev lec he sea dì byag mi dô hixôn xêyaa viyin, dì iac levac ên nêbê,

"Ông Babilon, ông vigwe levac, viyin nipaên tulec ông. Ilage xomxo wê viac sip dì kô mi la vac gwec ge, he vihati kô mone levac vô ông lec yuac tige. Lêc hiyôv manôn tibed tige vigwe Babilon yêp pileva."

²⁰ "Xam lag puunê ge, dì xam wê Anutu nue ge, hixôn xam sinale yuu plopete ge, xam xêmyaa i vô niviha ên wê vigwe tyo vô nipaên ge, ên Anutu yaxê i dì vông myaviwen nipaên vô i, ên vigwe tige vông viyin levac vô xam."

²¹ Kiyang tiga pyap, nang dêc angela xêkizêc ti kô ngidax levac tiyi xochê xomxo mi sax wit nôn ya ge ti dì nêx i la vac gwec, dì nêl ên nêbê, "A nêx ngidax tige la vac gwec om xôa ma. Om xomxo obêc kitya xêkizêc wê vigwe levac Babilon vông ge vêl tiyi bêge, om xomxo obêc yê vigwe tige tii vac lêm. ²² Mêgem xomxo wê hi gita dì vông lilo, dì vê ngivêg, dì vê vuac gee, he ob vông bêge vac vigwe Babilon tii vac nang lêm. Dì xomxo wê kô xovôén niviha lec he yuac toto ge, he vihati xôa ob ma vac vigwe tige. Dì he wê mi sax wit ya ngidax ge, he êno xôa ob ma vac vigwe tige. ²³ Dì xomxo ob byêx ngwax vac lam vac vigwe tige tii vac lêm. Di vêx yuu vux obêc iima vac vigwe tige tii vac lêm. Ilage tibii Babilon mi vông yuac bisnis dì tu levac gê kibun ga, dì he kityoo xomxo vac vigwe vihati ge ya môp yevac wê he mi vông ge. ²⁴ Anutu yê vigwe Babilon nêñ soën levac yêp bêga nêbê he hi plopete hixôn Anutu nue yib, dì xomxo kibun ga vihati wê xomxo hi he yib ge, soën levac tige kehe yêp gê Babilon tibed."

19

Xomxo vihati xêyaa vô niviha ên wê vigwe Babilon vô nipaên ge

¹ Pyap dêc a ngô vya levac ti tiyi xochê xomxo tibeac wê dô lag puunê ge tyuc bêga ên nêbê, "Il obêc pimil il Anutu, ên vô il vêl ên il ned nipaên. Xêkizêc yuu lê levac yêp vô i, ² dì i yaxê xomxo di vông myaviwen vô he tiyi nipaên wê he vông ge, om môp tibêge niviha. Vigwe levac Babilon vông

xomxo vô nipaêñ ya môp yôdac, dì he hi Anutu nue yuac yib om Anutu vông myaviwen nipaêñ vac vô he.”

³ He nêl bêge dì tyuc tii vac nang ên nêbê,
“Il ob pîmil Anutu. Ngwax ya vigwe Babilon ma vêl om ngwaxlu tige obêc tyip dì le luta lêc luta.”

⁴ Pyap dêc gyovixa 24 hixôn lili mavîha yuudiyuu gee yev vixa kitu vô Anutu wê dô lec sia king ge dì nêl ên nêbê, “Kiyang nôn, om il ob pîmil Anutu.” ⁵ Mêdêc vya ti lam vac Anutu sia king dì nêl ên nêbê, “Xam wê xam tu Anutu nue yuac dì xam mi xona ên i ge, xam wê lêm nipwo ge hixôn xam wê lêm levac ge, xam vihati pîmil il Anutu.”

Kiyang pilepacên lec bwoc Sipsip Nu wê nêb ob kô vêx ti ge

⁶ Nang dêc a ngô vya ti tiyi xochê xomxo tibeac kitucma mi vô nididun levac ge dì tiyi xochê mia yubac vô didun ge dì tiyi xochê deac tug nididun levac ge, di vya tige nêl ên nêbê,

“Il ob pîmil il Anutu. Il Apumtau Anutu ge xêkizêc kehe i dì i tu king wê il vihati vông ge. ⁷ Om il ob dô hixôn xêdyaa niviha dì hi vixad i pec ên i dì pîmil i lê, ên gwêbaga buc wê bwoc Sipsip Nu obêc ii vêx ti, om vêx tyo viac i pyap mi dô.” ⁸ Om Anutu vông nivimihi kwem paha niviha ge vô vêx tige ên nêb i vinyum.”

Nivimihi kwem kehe bêga nêbê môp niviha vihati wê xomxo vông vinêñ mi vông ge.

⁹ Mêdêc angela ti nêl vô a ên nêbê, “Ông kivuu kiyang bêga bê xomxo wê Anutu ob nêl vô he ên nêbê he i lam ya vizid lec buc wê bwoc Sipsip Nu ob kô vêx ge, he xéyaa i vô niviha.” Angela nêl bêge, nang dêc nêl vô a tii vac nang ên nêbê, “Kiyang tiga Anutu kiyang nôn.”

¹⁰ Mêdêc a yev vixag kitu vô angela tige ên a nêb a ob kitaa vô i, lêc angela nêl vô a ên nêbê, “Le i lêc yev vixa kitu vô a lêm, ên a ga Anutu nu yuac ti xochê ông hixôn lime vông vinêñ wê nêl Yesu lê kitong ge. Om ông yev vixam kitu vô Anutu tibed. Ên xomxo wê nêl Yesu kiyang kitong ge, Myakilôhô Ngibua ngidu he xôn tiyi xochê Anutu ngidu plopete xôn ilage mi he nêl i xolac yêp seac vô xomxo ge.”

Xomxo ti dô lec xôhô kwem ti

¹¹ Nang dêc a xê vuayen tax gê lag puunê, lêc a xê xôhô kwem ti, di xomxo ti dô lec xôhô tige, dì i lê ngwe nêl bêga ên nêbê, “Xomxo wê viac i yuac niviha” dì lê ngwe nêl bêga ên nêbê, “Xomxo wê nêl kiyang nôn.” Xomxo tyo obêc yaxêñ xomxo nêñ kiyang dì obêc vông vevac vô he ge od obêc vông tiyi xovôñ niviha wê yêp vô i ge. ¹² Xomxo tige manôñ tiyi xochê ngwax mahelac dì i tung kilung tiyi xochê kilung wê king mi tung ge tibeac lec bazub, dì lê ti yêp lec i, lêc ici va xovô lê tige dì xomxo ya o xovô lê tige lêm. ¹³ Dì i vinyum ngakwi dia ti wê hi lipac lec ge dì xomxo nêl i lê ên nêbê, “Anutu kiyang nôn.” ¹⁴ Dì tibii vevac lag puunê vinyum ngakwi kwem niviha wê paha ge, di he toto dô lec xôhô kwem mi la timu vô xomxo tyo vixa. ¹⁵ Yipac dia wê manôñ ta ge ti le vac i mya, om ob hi xomxo vac vigwe vihati ya yipac tige mi he yib, di ob hôm xax xochê ain ge ti di viac he ya, di ob kê xax wain nôn vac lôva madia tiyi xochê

* ^{19:7:} Vêx tige kehe bêga nêbê xomxo wê vông i vin Kilisi ge, om kiyang wê nêl ên nêbê Kilisi ob ii vêx tige ge nêl lec wê Yesu ob kô xomxo vông vinêñ mi he la dô hixôn i vac i ben ge.

tang ge. Kiyang tige nêl lec xêyaa myavinê wê Anutu xêkizêc kehe vông ge. ¹⁶ Lê ti yêp lec xomxo tyo ngakwi yuu vixa pob bêga ên nêbê, “KING VIHATI NÊN KING, DÌ XOMXO LEVAC VIHATI NÊN LEVAC.”

¹⁷ Nang dêc a xê angela ti le vac hiyôv manôn, dì i tyuc vya levac la vô menac vihati wê bôb mi la kisii ge ên nêbê, “Xam kitucma mi lam wa vizid levac wê Anutu vông vô xam ge. ¹⁸ Xam ob wa king liyôhô, dì tibii vevac liyôhô, dì xomxo levac liyôhô, dì xôhô hixôn xomxo wê dô lec xôhô ge liyôhô, dì wa xomxo vihati liyôhô, he wê vông yuac pileva ge hixôn he wê viac nue yuac ge, di he wê lê nipwo hixôn he wê lê levac ge. Xam ob wa he liyôhô i ma vêl.”

¹⁹ Pyap dêc a xê bwoc vimen tige di king kibun ga vihati, hixôn he nue vevac. He vihati lam kitucma ên nêb he ob vông vevac vô xomxo tige wê dô lec xôhô kwem ge hixôn nue vevac wê i vông ge. ²⁰ Mêdêc xomxo tyo hôm bwoc vimen hixôn plopete kityooên xôn. Plopete kityooên tige wê mi le vô bwoc vimen manôn di vông do levac ên nêb ob kityoo xomxo ya do tigee. Om kityoo xomxo wê bwoc vimen mak yêp lec he dì he yev vixa kitu vô i kinu ge. Yuu gên dô maviha, dì xomxo tige nêx yuu la vac madia wê ng wax yuu ngidax salpa tum vac ge. ²¹ Xomxo ti wê dô lec xôhô kwem ge hi bwoc vimen nue vevac vihati yib ya yipac wê le vac mya ge. Mêdêc menac vihati lam ya xomxo tige liyôhô dì i den he.

20

Seten la dô vac madia tiyi klismas 1000

¹ Nang dêc a xê angela ti lop gê lag puunê dì lam, dì i hôm ki yuu sen levac vac vigê, lêc ki tige wê ob tax vu madia wê mapitoc ta ge ya. ² Mêdêc angela tige hôm myel levac tige xôn. Myel tige dô mugên ilage, dì lê yuu, ngwe nêbê Devil di ngwe nêbê vimwo nipaén Seten. Om angela tige ku myel tige xôn ya sen ên nêb i dô klismas 1,000. ³ Mêdêc nêx i la vac vu madia wê mapitoc ta ge dì tung vuayen lec xôn dì yu lok lec xôn pilîhi ên nêb myel tige i o loc kityoo xomxo vac vigwe vihati lêm i tiyi xochê klismas 1,000. Om obêc dô dì klismas 1,000 lam la vêl pyap, lêc angela obêc tax vuayen ên i dì i lam lop mi loc vilee buc myabo yang tya.

⁴ Nang dêc a xê sia king ya wê le ge di xomxo ya dô lec. Mêgem Anutu vông yuac vô he ên nêb he i yaxêr xomxo nêr kiyang. Dì a xê xomxo tibeac kinu. Ilage xomxo tige vông i vin Yesu di nêl i lê kitong di hôm Anutu kiyang xôn pilîhi, dì he o yev vixa kitu vô bwoc vimen hixôn i kinu lêm, dì mak wê bwoc vimen vông ge o yêp lec he manôn me vigê lêm. Om xomxo kiku he kwa vêl dì he yib, lêc he kidi lec maviha di tu king hixôn Kilisi tiyi xochê klismas 1,000. ⁵ Buc tige tiyi xochê buc taxlee wê xomxo kidi lec maviha ge. Lêc xomxo yibêr ya o kidi lec maviha hixôn he lêm. Nge, he obêc dô dì klismas 1,000 lam la vêl lê. ⁶ Om xomxo wê kidi lec maviha taxlee ge, he dô hixôn xêyaa niviha di tu xomxo ngibua, dì yibêr wê vông yuu ge nêr xêkizêc ti o yêp wê ob nginoo he vêl ge lêm. Nge, he ob tu Anutu hixôn Kilisi nue yuac wê ob vông daa ge, dì ob tu king hixôn Kilisi mi dô tiyi klismas 1,000.

Anutu nginoo Seten vêl

⁷ Klismas 1,000 obêc lam la vêl dì he ob tax vuayen vêl ên Seten wê dô vac vu madia mapitoc ge ên nêb i lam lop mi loc vilee. ⁸ Om ob lop mi

la kityoo xomxo vac kibun myahipu yuudiyuu wê nêl he lê nêbê Gok yuu Megok. Mêdec Seten ob kituc he vihati ên nêb he ob la vevac. He tibeac hîwocêñ tiyi xochê luda wê dô vô gwec ninya ge.⁹ Mêdec he kitucma di loc mi la kibun vihati di mila le buu vigwe Jelusalem hixôn xomxo vông vinêñ wê dô vac vigwe tige. Lêc Anutu xêyaa vin lec vigwe tige om ngwax ti tum gê lag puunê di lam tô lec tibii vevac tige mi ya he yib mima vêl.¹⁰ Seten mi kityoo xomxo vevac tige, om Anutu nêx i la vac madia wê ngwax yuu ngidax salpa tum vac ge. Om la dô hixôn bwoc viñen yuu plopete kityooêñ wê Anutu nêx yuu la vac ngwax ilage. Mégem yon ob dô vac ngwax di kô myavinê nipaêñ tiyi vidiiêñ yuu bucêñ vihati luta lêc luta.

Anutu yaxêñ xomxo nêñ kiyang

¹¹ Nang dêc a xê sia king levac ti wê kwem ge di xomxo ti dô lec, di kibun yuu xôn lag pec ên xomxo tyo di la xôa ma. ¹² Mêdec a xê xomxo yibêñ, he wê lê levac ge hixôn he wê lê nipwo ge, he vihati le vô sia king manôn. Mêdec xomxo tyo wê dô lec sia king ge tidii kipihac ya. Nang dêc tidii kipihac ngwe wê xomxo wê ob dô maviha ge lê yêp vac, di kitong kipihac wê

nêl môp wê xomxo yibêñ vông ge di yaxêñ he nêñ kiyang tiyi xochê he vông ge.¹³ Mêdec gwec vông xomxo wê yib mi yêp vac nilô ge lax vô Anutu, di vigwe Yibêñ hixôn Seten ben wê lê nêbê Hel ge vông xomxo wê yib mi dô vac ge lax vô Anutu, di Anutu yaxêñ he toto nêñ kiyang tiyi wê he vông ge.¹⁴ Pyap dêc nêx Yibêñ yuu Hel la vac madia wê ngwax tum vac ge. Madia wê ngwax tum vac ge, ge yibêñ ngwe wê vông yuu ge.¹⁵ Anutu kitong kipihac ti wê he wê ob dô maviha ge lê yêp vac. Om xomxo ti va lê obêc ma ên kipihac tige ge od Anutu obêc nêx i la vac madia wê ngwax tum vac ge, di i lê obêc yêp vac ge od ob dô maviha luta.

21

Anutu tung lag paha yuu kibun paha

¹ Nang dêc a xê lag paha hixôn kibun paha val yêp, ên lag tîkwê hixôn kibun tîkwê xôa ma di gwec yêpêñ ma. ² Di a xê vigwe ngibua Jelusalem wê paha ge. Vigwe tige dô hixôn Anutu, lêc sea ben lag puunê di lam kibun, di i vunacêñ niviha tiyi xochê vêx wê ob kô vux om vunac lec pyap ge. ³ Di a ngô via levac ti lam vô sia king di i tyuc bêga ên nêbê, “Xam ngô lê. Gwêbaga Anutu ben lam dô hixôn xomxo om Anutu ob dô vac he mahigun, di he obêc tu i nue, di ici va obêc dô hixôn he,⁴ di obêc kitya he maluc vêl ên he manôn, di he obêc yib i tii vac lêm, di he xêyaa obêc vô viyin i tii vac lêm, di he obêc byag nang lêm, di he obêc kilê myavinê tii vac lêm, ên môp tige wê yêp ilage, vihati obêc tip vac di ti ob yêp i tii vac lêm.”

⁵ Di xomxo tige wê dô lec sia king ge nêl ên nêbê, “Ngô lê. A vông susu vihati vô paha lec. Om ông kivuu kiyang wê a nêl vô ông pyap gwêbaga, ên kiyang tige nôn wê xomxo vihati ob vông i vin ge.⁶ Gwêbaga yuac vihati wê a vông ge pyap vac. A ga, aca va xomxo mugêñ di timuén, di a tu susu vihati yang kehe, di a vông a yuac vihati la tiyi. Xomxo ti obêc nêb num mia ge od a obêc vông mia maviha dôen mi i num. Lêc ob kisuu vô a lêm. Nge, a ob vông pileva mi i num.⁷ Xomxo ti obêc vông vevac

vô nipaên mi nginoo vêl ge od a obêc vông vizid niviha vô i, dì a obêc tu Anutu wê i vông ge di i obêc tu a nug. ⁸ Dom xomxo wê xona di o le xêkizêc lêm, di he wê o vông i vin lêm, di he wê vông môp ningeac di he wê hi xomxo yib, di he wê vông môp yôdac vêx yuu vux, di he wê vông yevac, di he wê yev vixa kitu vô anutu kityooê, di he wê nêl kiyang kityooê gee, he vihati ob la dô vac madia wê ngwax yuu ngidax salpa tum vac ge. Ge yibêng we wê vông yuu ge.”

Jelusalem paha

⁹ Angela vigê vilu di sec yuu wê hôm pile vigê vilu di sec yuu wê susu nipaên vigê vilu di sec yuu dô vac gee, he ti lam nêl vô a ên nêbê, “Lam ên a obêc hilung vêx ti wê bwoc Sipsip Nu ii ge vô ông.”* ¹⁰ Mêdêc Myakilôhô Ngibua lam hivun a xôn di angela tige kô a mi xii la tyip lec kitôn levac ti kisii, di i hilung vigwe ngibua Jelusalem wê dô hixôn Anutu ge vô a. Di a xê vigwe tige lop gê lag puunê mi lam. ¹¹ Di xêseac wê Anutu vông ge vông vigwe tige xêseac ta tiyi xochê ngidax jaspa wê mone levac ge, om xêseac ta xochê deac ge. ¹² Xenac vixa dia le i buu vigwe tyo, di vuayen vigê yuu di tô mi la yuu (12) le vac xenac tige, di angela vigê yuu di tô mi la yuu ge he toto le vô vuayen titi, di Islel kidu vigê yuu di tô mi la yuu ge, he toto lê yêp lec vuayen titi. ¹³ Vuayen yon le vô byeac vilu, di yon le vô byeac vilu, di yon le vô liyuhu viwen, di yon le vô liyuhu viwen. ¹⁴ Xenac wê buu vigwe levac tige le lec ngidax levac vigê yuu di tô mi la yuu wê ngidu xenac xôn ge, di bwoc Sipsip Nu tige nue ngivihi vigê yuu di tô mi la yuu ge, he toto lê yêp lec ngidax tigee.

¹⁵ Angela tige wê nêl kiyang vô a ge hôm xax gol ti vac vigê ên nêb ob kô mak vô vigwe levac hixôn xenac di vuayen vihati ya xax tige. ¹⁶ Vigwe levac tige xêkitu yuudiyuu ge vihati tiyima. Om vigwe dia di myakipwoc levac tiyima tiyi xochê 2,400 kilomita, di dia lec mi la kisii tiyi xochê 2,400 kilomita. ¹⁷ Mêdêc angela tige kô mak vô xenac êno, om xenac tige vixa dia tiyi xochê 144 mita. Mita tige wê xomxo mi vông mak ya ge, lêc angela vông mak ya tige hixôn.

¹⁸ Anutu vông xenac tige ya ngidax jaspa, di lox vigwe Jelusalem ya gol wê xêseac tiyi xochê deac ge. ¹⁹ Ngidax levac vigê yuu di tô mi la yuu wê xenac le lec ge, Anutu vunac vô ngidax tigee ya ngidax wê manôn toto ge.

Om ngidax taxlee ti wê xenac le lec ge lê nêbê jaspa,
di ngidax ngwe wê vông yuu ge blu lê nêbê sapaia,
di ti wê vông yon ge kwem lê nêbê aget,
di ti wê vông yuudiyuu ge niyuu lê nêbê emelal,
²⁰ di ti wê vông vigê vilu ge hi yuu kwem lê nêbê sadonikis,
di ti wê vông vigê vilu di sec ti ge hi lê nêbê konilian,
di ti wê vông vigê vilu di sec yon ge niyuu lê nêbê klisolait,
di ti wê vông vigê vilu di sec yuudiyuu ge zang lê nêbê belil,
di ti wê vông vigê vilu di sec yuudiyuu ge zang lê nêbê topas,
di ti wê vông vigê yuu ge niyuu hixôn zang lê nêbê klisoples,
di ti wê vông vigê yuu di tô mi la ti ge blu lê nêbê haiasin,
di ti wê vông vigê yuu di tô mi la yuu ge hi lê nêbê ametis.

* **21:9:** Vêx tige kehe bêga nêbê xomxo wê vông i vin Kilisi ge, om kiyang wê nêl ên nêbê Kilisi ob ii vêx tige ge nêl lec wê Yesu ob kô xomxo vông vinêni mi he la dô hixôn i vac i ben ge.

²¹ Vuayen vigê yuu dì tô mi la yuu wê le vac xenac tige, ge komkom kwem vigê yuu dì tô mi la yuu wê mone levac ge. Vuayen titi ge Anutu vông ya komkom levac ti, dì môp vihati wê la vac vigwe tige, gol pileva, léc xêseac tiyi xochê deac ge.

²² A o xê xumac ngibua ti le vac vigwe Jelusalem lêm, ên Apumtau Anutu wê xêkizêc kehe ge yuu bwoc Sipsip Nu ge, yuu tu xumac ngibua mi le vac vigwe tige. ²³ Di hiyôv yuu dentuc ge, yuu o vông yuac dì linac vac vigwe tige lêm, ên xêseac wê Anutu vông ge vông vigwe tige vô xêseac, dì bwoc Sipsip Nu tige xochê lam dì linac vac vigwe hixôn. ²⁴ Xomxo vihati ge tibeac ob la ya xêseac tiguee, dì king kibun ga vihati ob kô lê levac mi la hixôn vac vigwe tige. ²⁵ Vô vidiién ge he ob tung vuayen lec xôn lêm, dì bucén ge obêc vô mapitoc vac vigwe tige lêm. ²⁶ Di xomxo levac vac vigwe vihati ge obêc kô vunacên niviha wê he vông ge mi la vac vigwe tige. ²⁷ Lêc susu ningeac dì xomxo wê vông môp nipaên gee hixôn xomxo kityooên, he o tiyi wê ob vac la vac vigwe tige hixôn lêm. Bwoc Sipsip Nu tige kivuu xomxo wê obêc dô maviha ge lê vac kipihac maviha. Om he wê he lê yêp vac kipihac ge wê obêc la dô vac vigwe tige nilô.

22

Mia maviha dôén dì xax maviha dôén

¹ Nang dêc angela tige hilung mia levac wê maviha dôén ge ti vô a. Mia tige xêseac ta tiyi xochê deac ge, dì lam vac sia king wê Anutu hixôn bwoc Sipsip Nu vông ge dì lam la, ² dì la vô môp wê la vac vigwe Jelusalem ge mahigun. Di xax wê maviha dôén ge le vô mia ninja vilu vilu. Xax tige vuac nôn lu vigê yuu dì tô mi la yuu lec klismas titi, om mi vuac nôn lec dentuc titi. Xax tige lihi ob vông xomxo vac vigwe vihati vô niviha lec. ³ Di susu nipaên wê Anutu yê tiyiên ma ge ti ob dô vac vigwe tige lêm.

Anutu yuu bwoc Sipsip Nu wê yuu dô lec sia king ge yuu ob dô vac vigwe tige dì nue yuac obêc kitaa vô yuu. ⁴ He obêc yê Anutu manôn, dì Anutu obêc kivuu ici va lê lec he manôn. ⁵ Di bucén ob yêp i tii vac lêm, om xomxo ob byêx ngwax vac lam i tii vac lêm, dì hiyôv ob linac i tii vac lêm, ên xêseac wê Apumtau Anutu vông ge obêc linac vô he, dì he obêc tu king mi dô luta lêc luta.

Yesu obêc lop mi lam lutibed

⁶ Nang dêc angela tige nêl vô a ên nêbê, “Kiyang tiga, kiyang vixôhilôg nôn yang tiyi wê xomxo vihati ob vông i vin ge. Apumtau Anutu vông xovôên vô plopete ên nêb he i loc nêl i kiyang kitong, di gwêbaga Anutu vông nu angela ti la vô nue yuac ên nêb i hilung susu hixôn buc vihati wê obêc val lutibed ge vô he. ⁷ Om ngô lê, Yesu nêl bêga ên nêbê, ‘A obêc vena lutibed.’ Yesu nêl bêge, om xomxo obêc ngô kiyang wê yêp vac kipihac tiga di vông i vin ge od he ob dô hixôn xêyaa niviha. Kiyang tiga nêl lec buc wê obêc val timuên ge.”

⁸ A, Jon, a ngô kiyang tiga vihati di xê susu tiga vihati pyap, om a yev vixag kitu vô angela tyo wê hilung susu tigae vô a ge ên a nêb a ob kitaa vô i. ⁹ Lêc angela tige nêl vô a ên nêbê, “Ông o kitaa vô a lêm. A ga, a Anutu nu yuac ti tiyi xochê ông hixôn lime plopete di he wê vông i vin kiyang wê yêp vac kipihac tiga. Om ông kitaa vô Anutu vaci tibed. ¹⁰ Anutu kiyang wê nêl lec buc wê obêc val timuên ge yêp vac kipihac tiga, om le i lêc vilun

xôn ên xomxo dì lii i loc yêp lêm, ên buc wê Anutu nêb ob vông kiyang tiga vô nôn lec ge vô kwabo lec. Om ông tidii mi i yêp seac vô he manôn. ¹¹ Mêgem xomxo wê mi vông môp nipaên ge od he i timu vô môp nipaên, dì he wê mi vông môp ningeac ge he i vông môp ningeac, dì he wê mi vông môp niviha ge od he i vông môp niviha, dì he wê tu ngibua ge od he i dô tiyi xomxo ngibua.”

¹² Angela nêl bêge, pyap dêc Yesu nêl ên nêbê, “Xam ngô lê. A obêc vena lutibed, dì a obêc vông myaviwen nipaên vô he wê nipaên ge, dì vông niviha vô he wê niviha ge, om a ob vông vô he toto ge tiyi xocbê môp wê he vông ge. ¹³ A ga a xomxo mugên dì timuên, dì a dô buc mugên taxlee ge, dì a obêc dô luta lêc luta, dì susu vihati yang ge a tu kehe, dì a ob vông a yuac vihati loc tiyi myahipu.

¹⁴ “Xomxo wê mi lipac he nivimihi ge he xêyaa i vô niviha, ên he tiyi wê he obêc ya xax maviha dôen nôn, dì he tiyi wê ob la vac vuayen Jelusalem dì la dô vac nilô. ¹⁵ Léc xomxo nipaên, dì xomxo wê he mi vông yevac ge, dì he wê vông yôdac vêx yuu vux ge, dì he wê hi xomxo yib ge, dì he wê kitaa vô anutu kityooén ge, dì he vihati wê xêyaa vin lec kiyang kityooén dì timu vô ge, xomxo tigee wê he ob dô vixun ên Anutu ben dì ti tiyiên ma wê ob la vac nilô ge.

¹⁶ “A, Yesu, a vông a angela ti loc vô xam pyap ên a nêb i nêl kiyang tiga kitong vô xomxo vông vinên vac konglegesen vihati. A kehe yêp vac Devit di a tiyi xocbê pitua wê linac vigwe viduiên ge.”

¹⁷ Myakilôhô Ngibua hixôn xomxo vông vinên vihati nêl bêga nêbê, “Yesu, ông lam!” Om xomxo wê ob ngô kiyang tiga ge he i nêl bêga bê, “Yesu, ông lam!” Dì xomxo wê xo mia ên nêb ob num ge, he vihati i lam num mia maviha dôen wê Anutu ob vông pileva vô he ge.

¹⁸ A, Jon, a ob nêl kiyang vô xomxo vihati wê ngô kiyang wê yêp vac kipihac tiga ge. Kiyang tiga nêl lec buc wê obêc val timuên ge, om a ob nêl bêga bê xomxo ti obêc nêl kiyang bangwe yêp hixôn Anutu kiyang vac kipihac tiga ge, od susu nipaên vihati wê Anutu nêl kitong mi i yêp vac kipihac tiga ge, Anutu ob vông susu tigee vihati myaviwen vô i. ¹⁹ Di xomxo ti obêc kitya Anutu kiyang wê nêl lec buc timuên wê yêp vac kipihac tiga ge bo ti vêl ge od Anutu obêc vông xomxo tige i ya xax maviha dôen nôn wê i vông ge lêm, di xomxo tige o tiyi wê ob dô vac vigwe ngibua Jelusalem nilô ge lêm. Kipihac tiga nêl vigwe ngibua hixôn xax maviha dôen kitong.

²⁰ Yesu wê nêl kiyang tiga vihati kitong ge nêl gwêbaga ên nêbê, “Vixôhîlôg nôn. A obêc vena lutibed.”

A, Jon, a lee yuu ên a nêbê kiyang nôn. Apumtau Yesu, ông lôm lam.

²¹ Vizid niviha wê Apumtau Yesu vông ge i loc viac xam vihati. Kiyang nôn.

Read the New Testament daily

January

date	Scripture
1	Matyu 1:1-2:12
2	Matyu 2:13-3:6
3	Matyu 3:7-4:11
4	Matyu 4:12-25
5	Matyu 5:1-26
6	Matyu 5:27-48
7	Matyu 6:1-24
8	Matyu 6:25-7:14
9	Matyu 7:15-29
10	Matyu 8:1-17
11	Matyu 8:18-34
12	Matyu 9:1-17
13	Matyu 9:18-38
14	Matyu 10:1-23
15	Matyu 10:24-11:6
16	Matyu 11:7-30
17	Matyu 12:1-21
18	Matyu 12:22-45
19	Matyu 12:46-13:23
20	Matyu 13:24-46
21	Matyu 13:47-14:12
22	Matyu 14:13-36
23	Matyu 15:1-28
24	Matyu 15:29-16:12
25	Matyu 16:13-17:9
26	Matyu 17:10-27
27	Matyu 18:1-22
28	Matyu 18:23-19:12
29	Matyu 19:13-30
30	Matyu 20:1-28
31	Matyu 20:29-21:22

February

date	Scripture
1	Matyu 21:23-46
2	Matyu 22:1-33
3	Matyu 22:34-23:12
4	Matyu 23:13-39
5	Matyu 24:1-28
6	Matyu 24:29-51
7	Matyu 25:1-30
8	Matyu 25:31-26:13
9	Matyu 26:14-46
10	Matyu 26:47-68
11	Matyu 26:69-27:14
12	Matyu 27:15-31
13	Matyu 27:32-66
14	Matyu 28:1-20
15	Mak 1:1-28
16	Mak 1:29-2:12
17	Mak 2:13-3:6
18	Mak 3:7-30
19	Mak 3:31-4:25
20	Mak 4:26-5:20
21	Mak 5:21-43
22	Mak 6:1-29
23	Mak 6:30-56
24	Mak 7:1-23
25	Mak 7:24-8:10
26	Mak 8:11-9:1
27	Mak 9:2-29
28	Mak 9:30-10:12

date	Scripture
1	Mak 10:13-31
2	Mak 10:32-52
3	Mak 11:1-26
4	Mak 11:27-12:17
5	Mak 12:18-37
6	Mak 12:38-13:13
7	Mak 13:14-37
8	Mak 14:1-21
9	Mak 14:22-52
10	Mak 14:53-72
11	Mak 15:1-47
12	Mak 16:1-20
13	Luk 1:1-25
14	Luk 1:26-56
15	Luk 1:57-80
16	Luk 2:1-35
17	Luk 2:36-52
18	Luk 3:1-22
19	Luk 3:23-38
20	Luk 4:1-30
21	Luk 4:31-5:11
22	Luk 5:12-28
23	Luk 5:29-6:11
24	Luk 6:12-38
25	Luk 6:39-7:10
26	Luk 7:11-35
27	Luk 7:36-8:3
28	Luk 8:4-21
29	Luk 8:22-39
30	Luk 8:40-9:6
31	Luk 9:7-27

date	Scripture
1	Luk 9:28-50
2	Luk 9:51-10:12
3	Luk 10:13-37
4	Luk 10:38-11:13
5	Luk 11:14-36
6	Luk 11:37-12:7
7	Luk 12:8-34
8	Luk 12:35-59
9	Luk 13:1-21
10	Luk 13:22-14:6
11	Luk 14:7-35
12	Luk 15:1-32
13	Luk 16:1-18
14	Luk 16:19-17:10
15	Luk 17:11-37
16	Luk 18:1-17
17	Luk 18:18-43
18	Luk 19:1-27
19	Luk 19:28-48
20	Luk 20:1-26
21	Luk 20:27-47
22	Luk 21:1-28
23	Luk 21:29-22:13
24	Luk 22:14-34
25	Luk 22:35-53
26	Luk 22:54-23:12
27	Luk 23:13-43
28	Luk 23:44-24:12
29	Luk 24:13-53
30	Jon 1:1-28

date	Scripture
1	Jon 1:29-51
2	Jon 2:1-25
3	Jon 3:1-21
4	Jon 3:22-4:3
5	Jon 4:4-42
6	Jon 4:43-54
7	Jon 5:1-23
8	Jon 5:24-47
9	Jon 6:1-21
10	Jon 6:22-40
11	Jon 6:41-71
12	Jon 7:1-29
13	Jon 7:30-52
14	Jon 7:53-8:20
15	Jon 8:21-30
16	Jon 8:31-59
17	Jon 9:1-41
18	Jon 10:1-21
19	Jon 10:22-42
20	Jon 11:1-53
21	Jon 11:54-12:19
22	Jon 12:20-50
23	Jon 13:1-30
24	Jon 13:31-14:14
25	Jon 14:15-31
26	Jon 15:1-27
27	Jon 16:1-33
28	Jon 17:1-26
29	Jon 18:1-24
30	Jon 18:25-19:22
31	Jon 19:23-42

date	Scripture
1	Jon 20:1-31
2	Jon 21:1-25
3	Sinale 1:1-26
4	Sinale 2:1-47
5	Sinale 3:1-26
6	Sinale 4:1-37
7	Sinale 5:1-42
8	Sinale 6:1-15
9	Sinale 7:1-29
10	Sinale 7:30-50
11	Sinale 7:51-8:13
12	Sinale 8:14-40
13	Sinale 9:1-25
14	Sinale 9:26-43
15	Sinale 10:1-33
16	Sinale 10:34-48
17	Sinale 11:1-30
18	Sinale 12:1-23
19	Sinale 12:24-13:12
20	Sinale 13:13-41
21	Sinale 13:42-14:7
22	Sinale 14:8-28
23	Sinale 15:1-35
24	Sinale 15:36-16:15
25	Sinale 16:16-40
26	Sinale 17:1-34
27	Sinale 18:1-21
28	Sinale 18:22-19:12
29	Sinale 19:13-41
30	Sinale 20:1-38

date	Scripture
1	Sinale 21:1-16
2	Sinale 21:17-36
3	Sinale 21:37-22:16
4	Sinale 22:17-23:10
5	Sinale 23:11-35
6	Sinale 24:1-27
7	Sinale 25:1-27
8	Sinale 26:1-32
9	Sinale 27:1-20
10	Sinale 27:21-44
11	Sinale 28:1-31
12	Lom 1:1-17
13	Lom 1:18-32
14	Lom 2:1-24
15	Lom 2:25-3:8
16	Lom 3:9-31
17	Lom 4:1-12
18	Lom 4:13-5:5
19	Lom 5:6-21
20	Lom 6:1-23
21	Lom 7:1-14
22	Lom 7:15-8:6
23	Lom 8:7-21
24	Lom 8:22-39
25	Lom 9:1-21
26	Lom 9:22-10:13
27	Lom 10:14-11:12
28	Lom 11:13-36
29	Lom 12:1-21
30	Lom 13:1-14
31	Lom 14:1-23

date	Scripture
1	Lom 15:1-21
2	Lom 15:22-16:7
3	Lom 16:8-27
4	1 Kolin 1:1-17
5	1 Kolin 1:18-2:5
6	1 Kolin 2:6-3:4
7	1 Kolin 3:5-23
8	1 Kolin 4:1-21
9	1 Kolin 5:1-13
10	1 Kolin 6:1-20
11	1 Kolin 7:1-24
12	1 Kolin 7:25-40
13	1 Kolin 8:1-13
14	1 Kolin 9:1-18
15	1 Kolin 9:19-10:13
16	1 Kolin 10:14-11:1
17	1 Kolin 11:2-16
18	1 Kolin 11:17-34
19	1 Kolin 12:1-26
20	1 Kolin 12:27-13:13
21	1 Kolin 14:1-17
22	1 Kolin 14:18-40
23	1 Kolin 15:1-28
24	1 Kolin 15:29-58
25	1 Kolin 16:1-24
26	2 Kolin 1:1-11
27	2 Kolin 1:12-2:11
28	2 Kolin 2:12-17
29	2 Kolin 3:1-18
30	2 Kolin 4:1-12
31	2 Kolin 4:13-5:10

date	Scripture
1	2 Kolin 5:11-21
2	2 Kolin 6:1-13
3	2 Kolin 6:14-7:7
4	2 Kolin 7:8-16
5	2 Kolin 8:1-15
6	2 Kolin 8:16-24
7	2 Kolin 9:1-15
8	2 Kolin 10:1-18
9	2 Kolin 11:1-15
10	2 Kolin 11:16-33
11	2 Kolin 12:1-10
12	2 Kolin 12:11-21
13	2 Kolin 13:1-13
14	Galesia 1:1-24
15	Galesia 2:1-16
16	Galesia 2:17-3:9
17	Galesia 3:10-22
18	Galesia 3:23-4:20
19	Galesia 4:21-5:12
20	Galesia 5:13-26
21	Galesia 6:1-18
22	Epesas 1:1-23
23	Epesas 2:1-22
24	Epesas 3:1-21
25	Epesas 4:1-16
26	Epesas 4:17-5:2
27	Epesas 5:3-33
28	Epesas 6:1-24
29	Pilipai 1:1-26
30	Pilipai 1:27-2:18

date	Scripture
1	Pilipai 2:19–3:6
2	Pilipai 3:7–4:1
3	Pilipai 4:2–23
4	Kolosi 1:1–20
5	Kolosi 1:21–2:7
6	Kolosi 2:8–23
7	Kolosi 3:1–17
8	Kolosi 3:18–4:18
9	1 Tesalonaika 1:1–2:9
10	1 Tesalonaika 2:10–3:13
11	1 Tesalonaika 4:1–5:3
12	1 Tesalonaika 5:4–28
13	2 Tesalonaika 1:1–12
14	2 Tesalonaika 2:1–17
15	2 Tesalonaika 3:1–18
16	1 Timoti 1:1–20
17	1 Timoti 2:1–15
18	1 Timoti 3:1–16
19	1 Timoti 4:1–16
20	1 Timoti 5:1–25
21	1 Timoti 6:1–21
22	2 Timoti 1:1–18
23	2 Timoti 2:1–21
24	2 Timoti 2:22–3:17
25	2 Timoti 4:1–22
26	Taitas 1:1–16
27	Taitas 2:1–14
28	Taitas 2:15–3:15
29	Paillimon 1:1–25
30	Hiblu 1:1–14
31	Hiblu 2:1–18

date	Scripture
1	Hiblu 3:1-19
2	Hiblu 4:1-13
3	Hiblu 4:14–5:14
4	Hiblu 6:1-20
5	Hiblu 7:1-19
6	Hiblu 7:20-28
7	Hiblu 8:1-13
8	Hiblu 9:1-10
9	Hiblu 9:11-28
10	Hiblu 10:1-18
11	Hiblu 10:19-39
12	Hiblu 11:1-16
13	Hiblu 11:17-31
14	Hiblu 11:32–12:13
15	Hiblu 12:14-29
16	Hiblu 13:1-25
17	Jems 1:1-18
18	Jems 1:19–2:17
19	Jems 2:18–3:18
20	Jems 4:1-17
21	Jems 5:1-20
22	1 Pita 1:1-12
23	1 Pita 1:13–2:10
24	1 Pita 2:11–3:7
25	1 Pita 3:8–4:6
26	1 Pita 4:7–5:14
27	2 Pita 1:1-21
28	2 Pita 2:1-22
29	2 Pita 3:1-18
30	1 Jon 1:1-10

date	Scripture
1	1 Jon 2:1-17
2	1 Jon 2:18-3:2
3	1 Jon 3:3-24
4	1 Jon 4:1-21
5	1 Jon 5:1-21
6	2 Jon 1:1-13
7	3 Jon 1:1-14
8	Jut 1:1-25
9	Levelesen 1:1-20
10	Levelesen 2:1-17
11	Levelesen 2:18-3:6
12	Levelesen 3:7-22
13	Levelesen 4:1-11
14	Levelesen 5:1-14
15	Levelesen 6:1-17
16	Levelesen 7:1-17
17	Levelesen 8:1-13
18	Levelesen 9:1-21
19	Levelesen 10:1-11
20	Levelesen 11:1-19
21	Levelesen 12:1-18
22	Levelesen 13:1-18
23	Levelesen 14:1-20
24	Levelesen 15:1-8
25	Levelesen 16:1-21
26	Levelesen 17:1-18
27	Levelesen 18:1-24
28	Levelesen 19:1-21
29	Levelesen 20:1-15
30	Levelesen 21:1-27
31	Levelesen 22:1-21